


# Mussau-Emira Bible



Portions of the Holy Bible in the Mussau-Emira Language of  
Papua New Guinea

**Mussau-Emira Bible  
Portions of the Holy Bible in the Mussau-Emira Language of  
Papua New Guinea**  
**Sampela hap Buk Baibel long tokples Mussau-Emira long Niugini**

copyright © 2006, 2008, 2013, 2016, 2018 Wycliffe Bible Translators, Inc.

Language: Mussau-Emira

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-09

---

PDF generated using Haiola and XeLaTeX on 28 Dec 2024 from source files dated 13 Dec 2023  
9cadc943-c245-5983-a663-5b2655bf0449

## Contents

Rutu . . . . .	1
Jona . . . . .	6
Matiu . . . . .	9
Mak . . . . .	60
Luk . . . . .	92
Jon . . . . .	145
Apostolo . . . . .	182
Rom . . . . .	229
1 Korint . . . . .	252
2 Korint . . . . .	273
Galaisia . . . . .	287
Ipises . . . . .	294
Pilipae . . . . .	301
Kolosae . . . . .	306
1 Tesalonika . . . . .	311
2 Tesalonika . . . . .	316
1 Timoti . . . . .	319
2 Timoti . . . . .	325
Taetas . . . . .	330
Pilimon . . . . .	333
Hibru . . . . .	335
Jeimis . . . . .	351
1 Pita . . . . .	357
2 Pita . . . . .	363
1 Jon . . . . .	367
2 Jon . . . . .	373
3 Jon . . . . .	374
Jiud . . . . .	375
Niaulia ngaotu . . . . .	377
Malloeana inangari . . . . .	401

## Vuku eteva ta Rutu Inangari emuemua

Vuku eteva ta Rutu eaauliaa kiukiu eteae ta kateva vause rau evulula, ararina atea ta Rutu, aMoabi ia. Alumuna ateva ta Naomi alIsraeli ia. Nau eteva Naomi ghe kiriaa lao sio elIsraeli, Rutu ghe usiela. Rutu ghe apasungaala kinatama niaielousi eteva ta Naomi, ghe kasu vulila kapuna atoa me ghe saela elIsraeli, me ghe aimuli teela kapuira God ateva alIsraelietoa. Ararina atea Rutu ghe namuula elIsraeli, ta poli tuvuna ta King Deivit me Iesu.

Nau Naomi ghe oghi siola tanganuena eBetlehem, Rutu ghe usiela. Isaa eBetlehem lalu ghe tarala taita ateva ararina atea ta Boasi. Mangalina ia taitanna ateva Naomi, me tale inangari nipaopao Moses ghe pitila eaauliaa va mangalim ateva erooroo tani poli aoghi kosam, poli laghe uusila taita atoa. Boasi ghe ghelei ekapala isaa o voto me ghe laila ta Rutu, natuirarua amua ateva ghe mene ghaala kosane ateva Elimelek, taitanna ateva Naomi.

### **Tani kila amuemua**

Rutu ghe karangailila ta Naomi 1

Rutu ghe tarala Boasi 2

Naomi ghe loela inangari etingiu ta Rutu 3

Rutu me Boasi lalu ghe laila 4

### *Naomi me Rutu*

<sup>1</sup> Nau ta namu ngatoa laghe aitoiaa alIsraelietoa, paka maloo ateva ghe lutula. Taita ateva aBetlehem ia ta pai nge Juda ghe lao sio tani toka tau tale kateae masaliki eMoabi, ia me vausenna ateva me natuna taita alua.

<sup>2</sup> Taumattu ngateva o ararina atea ta Elimelek, vausenna ateva ta Naomi, me natuna taita alua arariirarua ta Maloni me Kilion. Ilia ararimangali nge Eprata ila, me tanganueira eBetlehem ta pai nge Juda. Laghe siola eMoabi tani toka.

<sup>3</sup> Vara me Elimelek ghe matela, ghe mate vulula vausenna ateva ta Naomi, me natuna taita alua.

<sup>4</sup> Natuna taita alua lalu ghe laila. Lalu ghe ghaala vause nge Moabi elua, arariirarua ta Opa me Rutu. Laghe tokala ghe roola koti kasangauluae (10) ninamanama.

<sup>5</sup> Vara me Maloni me Kilion lalu ghe mene matela, me Naomi nonga ghe tokala, poli taitanna ateva me natuna alua lotolu ghe mate akapala.

<sup>6</sup> Naomi ghe nongola va Iaue ang ghe tau lao sio masi nau ta kapuna atoa me inana ang ghe mene oroi ila. Liuna avalua o ia me alumuna vause alua laghe aimonomonosiaala tani kasu vuli eMoabi.

<sup>7</sup> Ang ghe kasukasus vuli nongina ghe tokatoka, ia me alumuna vause alua. Ngilotolu ghe kasukasus tani oghi lao ejuda, etapaa salana me

<sup>8</sup> Naomi ghe uela etairarua va, "Amalu oghila, me amalu lao tanganueimalua. Amalu laa toka tee kinaimalua alua. Iaue aue egeleli voto masina etaimalua, nongina amalu ghe aitara ngamasinaailiieghila, me lo tee alua ngilalu ghe matela.

<sup>9</sup> Iaue aue eaisausieiniemalua tani mene lai ppae. Me aue amalu toka masina tee!"

Naomi ghe ngusulaluela, me lalu ghe sauua saela, me ngilalu ghe ngangngala.

<sup>10</sup> Me lalu ghe uela etana va, "Angalu usio, me itolu lao ta kapum atoa."

<sup>11</sup> Me Naomi ghe uela va, "Masina, amalu oghila, alumughu elua! Vaalua me amalu anna tani usieghi? Karika arooroo tani mene ssu righi natughu taita va amalu ghaa me etaitaniimalua.

<sup>12</sup> Amalu oghila, alumughu elua, me amalu lao tanganueimalua. Ngaghele vause namuula. Karika arooroo tani mene ghaa teva taita. Arova aghele ghaa teva taita, ghaine nonga eleivoo, me ghele mene alutu toa natughu taita,

<sup>13</sup> aue karika amalu ghele anna tani mene lai, me amalu ghele toila ta la ghele tani namuu? Karika aghannaa va eisaa avalua o, alumughu elua. Amalua mene masina, me aghi karika masina, ta poli Iaue ang ghe gheleila voto sesa ang ghele lutula tale maamaulueaghi."

<sup>14</sup> Me lalu ghe mene sauua saela tani mene ngala. Vara me Opa ghe ngusula alumuna vause ateva tani akorovaia, me ghe kaili emasinala etana. Rutu nonga karika ghe anna tani oghi vulu Naomi.

<sup>15</sup> Me Naomi ghe uela va, "Tarala, iloam ange oghila tani laa tara kapuna atoa me kapuna goto atoa. Laa usia, me amalu oghi."

<sup>16</sup> Rutu ghe liula me ghe uela va, "Karika aghaloanna va uue va aoghi vuluo. Poli aue eaa ulao, aghi tee aue alao. Me eaa ulaa toka, aghi tee aue atoka. Kapum atoa aue kapughu ila, kapum Goto ateva, aue kapughu tee ia.

<sup>17</sup> Eaa ulaa mate, aghi tee aue amate, me la kaia teeieghi. Nimate nonga ateva aue epolaituala. Arova nganim kamekame, Iaue aue eliu aipolighi sesaaili."

<sup>18</sup> Nau Naomi ghe tarala va Rutu ghe arrekana tani usi, ghe vira ruula tani auliaa etana va eoghi.

<sup>19</sup> Lalu ghe kasula, kasula me lalu ghe laa rekata sio eBetlehem. Nau lalu ghe lao sio eBetlehem, ila akapa taumattu ngatoo laghe soghieinelaluela. Me vause atoa laghe aikolomieinila va, "Tani koronna, va ia okae Naomi?"

<sup>20</sup> Me Naomi,\* ghe uela etaira va, "Am rau mene kolo Naomi etaghi, am koloaghi va Mara† poli Vau ngepona ateva sarasarakanaili ia ghe gheleila voto kaakaalanaili‡ etaghi.

<sup>21</sup> Oroi peighi me aghe kasula. Iaue ang ghele ghaa oghieghi mae sio me ngaghele nim peisaanelia. Vaalua me am kolokolo Naomi etaghi? Iaue ghe tauueghi siola euu me ia sarasarakanaili ia ghe gheleila voto sesa ta ngetaghi."

<sup>22</sup> Isaa o kiukiuna Naomi nau ghe oghi lao sio tangantuena, lalu me Rutu atala nge Moabi ia. Lalu ghe kasu vulila eMoabi, me lalu ghe laa rekata sio eBetlehem nau laghe tiuuala tani sai bali raisi.

## 2

### Rutu ghe soula Boasi

<sup>1</sup> Kateva taumattu, tue peipeiena ia me namuu ia, ghe tokatoka eBetlehem, ararina ateeae ta Boasi. Mangalina ia Elimelek, taitanna ateva Naomi.

<sup>2</sup> Kateva nau Rutu atala nge Moabi ia ghe uela ta Naomi va, "Aghanna tani laa usi lo atoa da saisai bali raisi tapaa ngutana, me aghaa righi ta lo ateua taumattu aue eanna va aghaimuli tee kapuna atoa me aghaa llo ekaokao alokoi."

Naomi ghe uela va, "Ue, alumughu, laa usi."

<sup>3</sup> Rutu ghe lao sio tani aimuli tee lo atoa laghe saisai bali raisi, me ghe reirei llo laghe aakao. Karika ghe kilakila va paa ngutana ateeae o umane ia Boasi, mangalina ia Elimelek.

<sup>4</sup> Vara me Boasi ghe rekatala, ghe kasula eBetlehem. Me ghe uela ta tau ngai sai bali raisi etoa va, "Iaue aue etoka teeiem."

Laghe liula me laghe uela va, "Iaue aue earangiseio."

<sup>5</sup> Boasi ghe uela ta lo ateua ghe aaitoiaa tau ngai uungu etoa va, "See ia aliki vause ateva okae?"

<sup>6</sup> Me kapuira tau ngai toitoi eteva tau ngai uungu etoa ghe liula me ghe uela va, "Aliko vause nge Moabi ia. Lalu ghe kasula eMoabi me Naomi.

<sup>7</sup> Emae sio tani nongonongoaa va eaimuli tee lo atoa la saisai bali raisi me erei righi. Etuaala arau elue talaua tani reirei, me ia okae ange vira mene lao sio tani ainoana toka tale ale paapali erighi."

<sup>8</sup> Vara me Boasi ghe uela ta Rutu va, "Natughu, unongo, urau mene laa rei bali raisi ta mene righi ppae paa ngutana, ureirei nonga oia. Utoka tee lo atoa vause la uungu oia.

<sup>9</sup> Utara amasina paa ngutana la saisai bali raisi, me uaimuli teeila. Ngaghauliaala ta aliki taita atoa va la rau mene ghelei righi voto ta ngetam. Me arova uanna tani ropi, ulaa ropi tale aikaai manu eteva o aliki taita atoa la akuela."

<sup>10</sup> Vara me Rutu ghe suuiala me ghe turruula tapaa kosa, me ghe uela ta Boasi va, "Aghi ativuu ieghi. Vaalua me angu kaakaarasi tani ghelei masi voto etaghi?"

<sup>11</sup> Me Boasi ghe liula me ghe uela etana va, "Ngaghe nongo akapala voto ughe gheleila ta alumum vause ateva nau taitainim ateva ghe matela, me vaalua ughe kasu vulila kinam, tamam me tangantuem, me ughe mae sio tani toka tee llo taumattu karika ukilakila.

<sup>12</sup> Iaue aue eliu masi uunguaam, me isaa akapa aipolim kapuira Goto ateva alIsraeli etoa aue etaau, poli ughe tuutulielia tani aitarainio."

<sup>13</sup> Rutu ghe uela ta Boasi va, "Masinaaili voto angu gheleila ta ngetaghi, vaughu eteva. Arongona ta karika masina aghi nongina kapum vause atoa tau ngai uungu ila, me

\* **1:20:** Naomi Malloeana Naomi va masina.

† **1:20:** Mara Malloeana Mara va kaakaalana.

‡ **1:20:** kaakaalanaili Naomi ghe aulia ngavalua o ta poli ghe nnaala va, "Iaue ang ghe gheleila maamaauluaagi ang ghe aanasaailila, nau ghe tau vella taitannighi eteva me natughu elua lotolu ghe matela me karika righi tuvughu."

angu gheleila voto masina etaghi. Nau uaippooa ngamasina teeieghila, egheleieghila aghateateaa ngamasinala me nannaaghi tee emasinala.”

<sup>14</sup> Nau ninamanama, Boasi ghe mene uela ta Rutu va, “Mae ghaa righi verete, me usuu tale uaeni, me unama tee.”

Rutu ghe toka tee siola tau ngai uungu etoa, me ghe namanama teeilala. Boasi ghe tau lao sio bali raisi etana laghe tuu saela tale kuraa. Rutu ghe namala me ghe ssoiela, me kasina ghe oghi etokala.

<sup>15</sup> Nau ghe mene lao sio tani mene reirei, Boasi ghe uela ta kapuna aliki taita atoa va, “Am tau velu Rutu me erei ekalakalangina tale isaa o llo ngam iri eitaua ngatinginala. Am rau mene sama anamuu teeia va epalata.

<sup>16</sup> Me am ghaa righi bali raisi tale llo ngam iri eitaua ngatinginala, me am velu elokoi, me aue erei. Am rau mene tiu velua.”

<sup>17</sup> Rutu ghe reireila tale bali raisi elomosi ta sinaka ateva ghe suula. Me ghe paruparuaala llo ghe reila. Ghe ghaala vorovoro bali raisi ghe roola kateva efa.\*

<sup>18</sup> Rutu ghe ghaala isaa o bali, me ghe lao sio elo ale, me ghe apasungaala ta alumuna. Ghe sau teela tapiri nginana ghe nama vulula elo sinaka.

<sup>19</sup> Alumuna ghe kolomiela va, “Eaa ureireila tale nau eteva oia? Iaue earangise lo ateva taumattu etaraiola me eaikoloainiola.”

Rutu ghe uela va, “Areireila tale paa ngutana atae umana ia taumattu ngateva la ghasease Boasi etana.”

<sup>20</sup> Naomi ghe uela ta alumuna va, “Iaue aue earangiseia! Me Iaue karika ekakkaluua kanna inangari nialokoi ta lo atoa la tokatoka me lo atoa angila ghe matela.” Naomi ghe uela va, “Ia ona taumattu ngateva uunguaane va, ia esausitalua me tani ghaa oghitalua, ta kalakalanginaaili ia etatalua.”

<sup>21</sup> Me Rutu atala nge Moabi ia ghe uela va, “Boasi euela etaghi va auungu tee kapuna atoa elomosi ta la ruu tani sai bali raisi ta ngumana.”

<sup>22</sup> Naomi ghe uela ta alumuna va, “Alumughu, aue emasinaaili ta ughuungu tee kapuna tau ngai uungu etoa vause ila. Urau mene lao ta uma katoa, la rau tam laa ghaitara ngamasinaio.”

<sup>23</sup> Mausina avalua o me Rutu ghe kara ngaparasila ta kapuna tau ngai uungu etoa Boasi vause ila, elomosi ta laghe tani ruula tani sai bali raisi me uiti. Rutu ghe tokatoka tee alumuna vause ateva.

### 3

#### *Rutu me Boasi tale liu ngai kuluki bali raisi*

<sup>1</sup> Kateva nau Naomi ghe uela ta alumuna va, “Alumughu, aghanna tani pae teva taita, me ulai etana, me aue eitarainio me utoka amasina.

<sup>2</sup> Ia o taita ateva Boasi etana, kapuna vause tau ngai uungu etoa ughe reirei teeilala, kalakalangina ia etatalua. Ghaine eleivoo elaa kuluki bali raisi, liu ta la kuukuluki bali raisi.

<sup>3</sup> Ulaa suusuu, ukolikoli me uatoka righi unem aiaao masi ngusungusuaane, me usio kona ghaine euungu. Urau mene laa otuotu etana. Utani toi ta enamanama me eropi mua.

<sup>4</sup> Nau eteva ange anna tani asekanua, utara toooonga nongina eaa elaa ghaso. Me umange koukouna atiulu, me uaso sio kalakalaa ta komo kkena. Auena eauliaa va sa ateva umene gheleia.”

<sup>5</sup> Rutu ghe liula me ghe uela va, “Masina, aue ausila ngakapa inangarim.”

<sup>6</sup> Me Rutu ghe siola nongina la kuukuluki bali, me ghe ghelei ekapala voto alumuna vause ateva ghe auliaa tau lao sio.

<sup>7</sup> Nau Boasi ghe ruula tani ropi me namanama, ghe masimasila. Vara me ang ghe anna tani asekanua. Ghe lao sio aso nongina laghe kaokao aitauaa bali raisi. Rutu ghe kasu emorooia ssola, me ghe mangela koukouna atiulu Boasi, me ghe aso siola ta komo kkena.

<sup>8</sup> Elo matuaa voo me Boasi ghe soghila. Vara ghe kiria me ghe soghiaala vause ateva ghe asoaso ta komo kkena.

<sup>9</sup> Me Boasi ghe uela va, “Io see?”

Me vause ateva ghe liula me ghe uela va, “Aghi Rutu, kapum vause tau ngai uungu ieghi. Pulela me uakoueghi me emannem ieghi, poli io mangalim ta Elimelek. Liuna avalua o me uunguaam tani sausieghi me aitarainaghi.”

\* **2:17: efa** Efa kateva keru erooroo tani kaai 22 lita.

<sup>10</sup> Me Boasi ghe uela etana va, “Iaue aue earangiseio, natughu, poli angu apasungaala masi voto ghaine, ange lau ekapanaailila masi voto ughe gheleila ta Naomi. Me karika ughusiusi kkai aliki taita atoa, tue peipeiena ila me lo atoa karika peiira.

<sup>11</sup> Ghaine, natughu, urau mene matautu. Aue aghelei ekapa voto ukolomila. Ila akapa taumattu ngatoa tale masaliki eteae oia la kilakila va io eeleiaam me tokatokaam masinaaili.

<sup>12</sup> Koronna va aghi mangalina aghi taitanim ateva, me uunguaaghi tani ghaa oghio. Me mene kateva taumattu ararimangaliimami eitauaa, ia tee uunguaane tani sausio me ghaa oghio, poli ia kalakalanginaaili ia ta taitanim ateva.

<sup>13</sup> Asola oia, me aue epai alaa pae ia o taumattu ngateva, me anongo va vaalua nannaane. Arova eloanna tani aitarainio, masina. Arova karika, aghi aue aghairainio. Koronnaaili Iaue ang ghe kilala. Masina, asola oia me aue elue talaua ukasus.”

<sup>14</sup> Rutu ghe aso siola ta komo kkena Boasi. Ghe tam pai emasina elue talaua me ghe totula. Me Boasi ghe uela va, “Karika toa la mene kila va vause ateva emae sio oia nongina la kuukuluki bali raisi.”

<sup>15</sup> Boasi ghe uela va, “Ghaa mae sio tuku kaliom atiulu uvaovaoa, me upuleia me uposoa.” Boasi ghe kala tau lao sio bali raisi\* me ghe sau etoka saela ta Rutu. Ghe ruula me ghe lao sio elo masaliki.

<sup>16</sup> Nau Rutu ghe laa rekataa sio ta alumuna, alumuna ghe taraiela me ghe uela va, “Ane vaalua? Masina?” Rutu ghe aulia ngakapaailiila voto Boasi ghe gheleila.

<sup>17</sup> Me Rutu ghe uela va, “Boasi ekala tau mae sio bali raisi. Euela va, ‘Karika erooroo va unim lao ta usau righi bali raisi me ughunusi lao.’”

<sup>18</sup> Me Naomi ghe uela va, “Alumughu, unim matua atoka me utoitoi, poli karika ngitalu kilakila va sa ateva ninannaa ghaine elutu. Utara Boasi karika aue eainoana amasina lomose ta inangari evira masina.”

## 4

### *Boasi ghe laila ta Rutu*

<sup>1</sup> Boasi ghe saela tale liu ngai veluvelu eitaua ngateva kona laghe kupikupi sso, me ghe toka siola. Karika masau, me ghe tarala mangaliirarua ateva me Elimelek, ia o ghe aaulieinia ang ghe reerekata me ghe uela va, “Ei! Mangali, mae toka sio muu!” Ghe lao sio me ghe toka siola.

<sup>2</sup> Me Boasi ghe kolola kasangaulu (10) namuu laghe aaitoiaa masaliki eteae okae me ghe uela va, “Am mae toka sio.” Me laghe toka siola.

<sup>3</sup> Me ghe uela ta mangalina va, “Naomi ang ghe oghi mae sio, ghe kasula eMoabi. Me eloanna va teva taumattu kapuna Elimelek, ia o mangaliitalue ia, epoli tuku kosane ateva.

<sup>4</sup> Liuna avalua o, me auela va aghauliaa kiem. Arova ualoanna tani polia, upolia ta mataira namu ngatoa me taumattu ngatoa. Me arova utam aloanna tani polia, uauliaa etaghi me akila. Karika mene teva, ta italua nonga. Io tani kalakalanginaaili io, me auena aghi.”

Me ghe uela va, “Aue apolia.”

<sup>5</sup> Boasi ghe uela va, “Arova upoli tuku kosa ateva ta Naomi, ughaa tee Rutu me evausenim ia. Me isaa o kosa elao ta natuna atoa lo ateva taumattu ang ghe matela.”

<sup>6</sup> Me ia o taumattu ngateva ghe uela va, “Karika amene polia, ta karika aghaloanna va peighi elao ta mene katoa aliki karika va natughu ila. Io upolia me ughaa isaa o voto.”

<sup>7</sup> Emua arau ta Israeli eto, arova angila aloanna tani aipolia voto, tani auliah, me aikolikoliao righi voto, laghe gheelei evalua toko va taumattu ghe lullu velu unna aikasukasus, me ghe tautau lao ta mene kateva. Isaa o voto laghe gheelei eIsraeli.

<sup>8</sup> Liuna avalua o me mangalina ateva Boasi ghe uela va, “Io upoli tuku kosa ateva,” me ghe llu tau lao sio kateva tana unna aikasukasus ta kkena.

<sup>9</sup> Me Boasi ghe uela ta namu ngatoa me ila akapa taumattu ngatoa va, “Am akapa ngam tarala va voto kannu Elimelek, Maloni me Kilion, isaa o ghe tokatoka ta nimana Naomi, ghaine ngapolipoli ekapa.

<sup>10</sup> Aghi ngaghaaghaa Rutu ia o vauseni nge Moabi eteva, Maloni ghe mate vuluela me evausenighi ia. Kosane Maloni aue etoka ta kapuna atoa. Liu ta la tokatoka, kapuna atoa karika la mene aikkaluaa ararina ateeae. Ghaine am akapaaili ngam tarala me ngam nongo akapaailiila voto.”

\* **3:15:** Tale inangari nge Hibru, *ghe kala tau lao sio bali raisi erooroo ghaonomo aikaai*. Karika ita kilakila maamataniaane bali raisi erooroo ghaisaa.

<sup>11</sup> Me ila akapa taumattu ngatoa me lo atoa laghe aaitoieinila laghe uela va, “Ue, ngami tarala me ngami nongola. Iaue aue eghelei emasina ta ia o vause ateva ang ghe mae sio ta ngetam. Aue ealutu oroi aliki, nongina tuvuita vause alua aIsrael etoa ta Resolo me Lia. Me io aue unamuu ta ararimangali eteva eEprata, me aue la kila akapaio eBetlehem.

<sup>12</sup> Iaue aue etau aatu oroi aliki etaimalua. Aue la oroieili nongina natuna atoa Peresi, nautuirarua taita ateva Juda me Tama.”

<sup>13</sup> Vara me Boasi ghe ghaala Rutu, me ghe vausenna iela me ghe aso teeila, me Iaue ghe arangiseilaluelu, me Rutu ghe kkaaila, me ghe ghaala aliki eteva taita ia.

<sup>14</sup> Me vause atoa laghe uela ta Naomi va, “Ukkauaa Iaue poli ange tau aatu sio natum taita ateva ia o tutuvum ia. Iaue eaitarainio, me ararina ateeae aue enamuu ta aIsrael etoa.

<sup>15</sup> Alumum ealoannaailio me io tee ualoannaailia. Arova natum taita ghaitu, karika aue ughele ailousieinila nongina uaailousiaa alumum vause ateva. Liuna avalua o me ia o natum taita ateva ang ghele lutula, aue esausi tokatokaam, me aue eaitarainio nau uvause namuu.”

<sup>16</sup> Naomi ghe saula aliki eteva. Ghe tokatoka teeia, me ghe aaitarainia.

<sup>17</sup> Mene katoa vause laghe tokatoka aitauua laghe uela va, “Naomi ang ghele saula aliki eteva taita ia,” me laghe asela ararina ate ta Obet. Tamane ia Jesi, me Jesi tamane ia King Deivit.

<sup>18</sup> Vituu etoa ta Peresi:

Peresi ghe alutula Eseroni.

<sup>19</sup> Eseroni ghe alutula Ram,

me Ram ghe alutula Aminadab.

<sup>20</sup> Aminadab ghe alutula Nasoni,

me Nasoni ghe alutula Salmoni.

<sup>21</sup> Salmoni ghe alutula Boasi,

me Boasi ghe alutula Obet.

<sup>22</sup> Me Obet ghe alutula Jesi,

me Jesi ghe alutula Deivit.

## Vuku eteva ta Jona Inangari emuemua

Vuku eteva ta Jona, ie ppae ta mene katoa tana vuku propete, poli eaauliaa kiukiuna Jona, karika eaauliaa niuungu tani apasunga. Tee karika Jona nongina mene katoa propete, poli ghe nongo vulula God. God ghe suula Jona tani laa ppoaa eNinive, kinatama masaliki eteae eAsiria, tau ngai ssateeira ila alIsraeli etoa. Jona karika ghe nongo usilaala tani laa ppoaa etaira, poli ghe kilakila va God aue enim kkaluaa kaluira ssavoto, me karika aue etturu kinatama masaliki eteae eNinive.

God ghe apasungaala etaita ta vuku eteva oia va ie nonga eaitoia kosa akapa ateva, karika alIsraeli nonga atoa. Ghe suula kinatama kuukuu eteva ghe lao sio tale anua ateva nau Jona ghe iloula, ghe suula kko ateva tani asaangi Jona, me ghe aloannala va tau ngai ssateeira alIsraeli etoa la nna ngaioghioghiaa tale kaluira ssavoto.

### Tani kila amuemua

Jona ghe ilou eisuliaala ta Iaue 1

Jona ghe looloo saela ta Iaue 2

Jona ghe lao sio eNinive, me taumattu ngatoa laghe aiesoala tale inangarina God 3

Jona ghe sessaiela poli Iaue ghe nna ngaioghioghiaala 4

### *Jona ghe ilou eisuliaala ta God*

<sup>1</sup> Inangarina Iaue ghe mae sio ta Jona natuna ia Amittai. Ghe uela va,

<sup>2</sup> "Kasula me ulao eNinive, kinatama masaliki taatara ateae. Ulaa ppoaa ngaotu eleiaairaa karika masina, poli ataatara va ang ghe namungaili ila."

<sup>3</sup> Jona ghe anna tani ilou eisulia tee Iaue. Karika ghe lao sio eNinive, ta ghe lao ppae sio tale kateae ppae masaliki eTarsis. Ghe siola ejopa me ghe paela anua ateva ghe aloanna tani lao eTarsis. Ghe polila salana me ghe saesaala etana tani lao eTarsis, tani ilou eisulia tee Iaue.

<sup>4</sup> Me Iaue ghe suula kinatama kuukuu ttasi eteva ghe lutu teeilala elamana, ttasi vaoo ateva namungaili ia. Anua ateva ghaisa ngarighi ghe tapolapolaka.

<sup>5</sup> Me tau ngai uuungu etoa tale anua ateva laghe tiuuala tani matautu, me laghe kolokoloa nganamuu kapuira kuturu etoa. Me laghe tiuuala tani sau veluvelu sio ghinna atoa elamana tani ghelei oeakana anua ateva.

Me Jona ghe siola arau euu tale paa nganua ateva. Ghe laa sio aso me ghe asekanuela me ghe llusula.

<sup>6</sup> Kapteni eteva ghe siola etana me ghe uela etana va, "Vaalua me uaseasekanua? Totula me ukolokoloaa kuturum eteva. Koti ia aue ealousiusi teeita me aue esausita, me karika aue ita mate."

<sup>7</sup> Me tau ngai uuungu etoa tale anua ateva laghe uela va, "Ita piti arariita me ita kape nonga katengaata. Lo ateae arari ita kapea akasina, ia aue ita kila va, ia o taumattu ngateva mausina me ngita sessa." Laghe ghelei evaluelo o, me ararina ateae Jona ghe otuela.

<sup>8</sup> Vara me laghe uela etana va, "Uauliaa kiemami mausi saa me voto sesa ange saetala? Saa uuungam? Me aliaa io, me eaa tangantuem? Me see ila kapum atoa?"

<sup>9</sup> Me ghe uela etaira va, "Aghi aHibru ieghi. Akakkauaa Iaue, God epona liu ghe gheleila paamanu eteva me kosa ateva."

<sup>10</sup> Jona ghe uela ta tau ngai uuungu etoa tale anua ateva va, "Aghe ilou eisuliaala ta Iaue." Laghe nongola me laghe matautu saasakiala. Me laghe uela ta Jona va, "Vaalua me ughe gheleila voto oia sesaail?"

<sup>11</sup> Laghe uela etana va, "Ami saa etam me aue lueiemami?" Poli ttasi eteva ange sesaaili.

<sup>12</sup> Me ghe uela etaira va, "Am saueghila me am sau velueghi sio elamana me aue luei, ta mausighi me kinatama ttasi eteva euviuviem."

<sup>13</sup> Me karika, ta tau ngai uuungu etoa tale anua ateva laghe oseose paraparasi tani sso elae, me karika laghe rooroo, poli ttasi eteva ang ghe naanamungaili.

<sup>14</sup> Vara me laghe kolokolo saela ta Iaue. Laghe ue va, "O Iaue, urau mene tau veluemami va ami mate, ta poli ngami ghaagħhaa velu maamalueane īa oia taumattu ngateva. Me urau mene tau velu righi voto sesa eailutaw tale maamalueaaimami, poli ngami uviuvi emate taumattu ngateva karika righi eeleiaane sesa, poli io Iaue, ughelei voto tale aloaloannaam."

<sup>15</sup> Laghe saula Jona me laghe sau velue siola elamana, me ghe lueila.

<sup>16</sup> Tau ngai uungu etoa tale anua ateva laghe matautangailila Iaue. La ghe gheleila aiaavusuvusuena, me laghe auliaala inangariira nialokoi ta Iaue.

<sup>17</sup> Iaue ghe suula kinatama kko ateva ghe olomila Jona. Ghe laa sso toka kotolu llaa me voo ta kova kko ateva.

## 2

*Jona ghe looloo sae*

<sup>1</sup> Elome tale kova kko ateva me Jona ang ghe looloo sae ta Iaue.

<sup>2</sup> Ghe ue va,

“Voto sesa eghe lutu teeieghila, liuna avalua o me aghe kolo taula Iaue,  
me eghe liula.

Aghe tokatoka tale voto ateva sesa ia, llo taumattu matena la tokatoka etana, me aghe kolokolo saela etam,  
me ughe nongoaghila.

<sup>3</sup> Ughe sau velueghi sio mae

arau euueili tale paamanu eteva.

Manu eteva ghe akoueghila

me ugheleila kinatama kotoo atoa la ghasuula epona etaghi.

<sup>4</sup> Aghe annaa va, angu ghe tiu velueghila tale taataram  
me karika,

ta aue aghi amene tara alem

ale manga ateva.

<sup>5</sup> Kotoo atoa la ghasuula epona etaghi, me egheleieghila gharighi tau ghele arropieghi  
me malionge ateva ghe akoueghila.

Me rarrasa ngelamana atoa la ghakou taliaala urughu eteva.

<sup>6</sup> Aghe siola arau tale liue motouru etoa tale paamanu eteva.

Sesa voto ia nongina va atokatoka laalaa liu tale ale mata voovoo.

Iaue, io kapughu Goto io,

ughe ghaa ogchieghila me aghe kasu vulila sesa voto ateva.

<sup>7</sup> Nau maamaulueaghi ange kapakapa,

aghe annaala Iaue,

me aghe looloo saela etam

tale alem ale manga ateva.

<sup>8</sup> Llo taumattu ghe kakkaua kamena atoa kuturu,  
laghe kasu vulila aielousiaam ateva.

<sup>9</sup> Aghanna tani kkaueinio tale nikkinari me tale niaiaavusuvusuena,  
tani tau sae ararim ateeae.

Isaa akapa voto aghe gheleila inangari nialokoi etana, aue aghelei.

Iaue nonga erooroo tani asaangita.”

<sup>10</sup> Me Iaue ghe auliaala ta kko ateva, me kko ateva ghe laa sso lue atoka Jona elae.

## 3

*Jona ghe lao sio eNinive*

<sup>1</sup> Inangarina Iaue ghe mene mae sio ta Jona ghaluene va,

<sup>2</sup> “Kasula, me ulao eNinive, kinatama masaliki taatara ateeae. Ulaa ppooa ngaotu inangari atau aatu.”

<sup>3</sup> Jona ghe aimuli teela inangarina Iaue me ghe lao sio eNinive, kinatama masaliki taatara ia. Urooroo tani kasu talia etana kotolu nau.

<sup>4</sup> Jona ghe kasula me ghe laa rekata sio. Aitiuti eteva nau ghe rekatala eNinive, ghe tiuuala tani ppooaa ta taumattu ngatoa. Ghe ue va, “Ghaatingaulu (40) nau aue eruu, me Ninive aue God euvi tuuturungia.”

<sup>5</sup> Taumattu nge Ninive atoa laghe aiesoala ta God. Laghe samaa seela va, “Ita rau mene namanama, me ita rau mene ropi.” Me laghe asaela ghinna nialousiusi, namuu me aliki etoa.

<sup>6</sup> Inangarina ghe laa rekata sio ta kingi nge Ninive ateva. Kingi eteva ghe tingina vulu saela aitokatokane ateva, me ghe llu vella unna aiaasae ateva, uneira ia namu ngatoa, me ghe asaela ghinna nialousiusi, me ghe toka siola tale au kura.

<sup>7</sup> Me ghe uela va, “Am laa aulia ngakapa see eNinive va,

“Aghi me kapughu namu ngatoa ami uela va, karika teva taumattu me ghaata kkena emene ropi, me enamanama.

<sup>8</sup> Am akapaaili taumattu me ghaata kkena atoa am asae ghinna nialousiusi. Am kolokolo anamuu sae ta God. Me am oghi vulu sesa gheeleiaaimim me am ruu tani kiiuaa mene kateva.

<sup>9</sup> Arova ita ghelei evalua o, koti God aue eaikolikoliaa nannaane tani sessaia me karika ita mene mate.”

<sup>10</sup> Laghe oghi vulula eeleiaaira sesa, me God ghe tarala voto laghe gheleila, me ghe aikolikoliaala nannaane, me karika ghe gheleila voto ghe uela va eghelei.

## 4

*Jona ghe sessaia tale kanna niaielousi God*

<sup>1</sup> Jona ghe sessai saasakieiniela me ghe tam masimasila.

<sup>2</sup> Ghe looloo saela ta Iaue, ghe ue va, “O Iaue, karika aghe kasu vuli tanganueghi me aghe kilala va karika aue utturu eNinive. Liuna avalua o, me aghe ilou eisuliaala tani lao eTarsis. Aghe kilakila va io masinaaili io, me karika urooroo tani tturuu, me karika esessai parasio. Unem niaielousi namungaili me gharovaeaata ta uaikolikoliaa nannaam.

<sup>3</sup> O Iaue, ughaa velu maamaulueaghi, poli arova amate aue emasina. Arova atam mate, karika aue emasina.”

<sup>4</sup> Iaue ghe liula me ghe uela va, “Jona! Vaalua, masina ta esessaio?”

<sup>5</sup> Jona ghe kupi vulu ghoala kinatama masaliki taatara ateeae, me ghe lao sio ta pai sinaka esae. Ghe gheleila natu paapali erighi tani toka me tani tara sa ateva ghe mene lutu tale kinatama masaliki taatara ateeae eNinive.

<sup>6</sup> Vau ngepona Iaue ghe apinosala ngaapa ateeae, tani apallungia. Me ghe sausia, poli karika ghe annaa me ateateaa righi masina. Jona ghe masimasiangailiia ia o ngaapa ateeae.

<sup>7</sup> Vara elue talaua ta mene kateva nau, God ghe suula gharighi natu voto erarra tani laa nama amate ia o ngaapa ateeae, me emmate.

<sup>8</sup> Nau ta sinaka ateva ghe saela, God ghe suula kuukuu eteva aanasa ia ghe mae sio ta pai nge sinaka esae, me sinaka ateva ghe sinakila uruna ateva Jona, me matane ghe leeleela, me ang ghe anna tani katuu. Me Jona ang ghe annaa va, “Arova amate aue emasina. Arova atam mate, karika aue emasina.”

<sup>9</sup> Vara me God ghe uela ta Jona va, “Vaalua, masina ta esessaio tale ngaapa ateeae?”

Me Jona ghe liula me ghe uela va, “Ue! Ange sessaieiliieghila, me aghanna va arova aghele mate.”

<sup>10</sup> Iaue ghe uela va, “Uaalousiusi tee ngaapa ateeae io karika ughe uungu aanasala etana, me karika ughe apinosaiela, ta ghe nim pinosala eleivoo, me mene kateva voo ghe mmatela.

<sup>11</sup> Aghi tee aghalousiusieili tee eNinive, ta oroieili taumattu ngatoa, tani ioila elaulau kateva ai ghaluengaulu airari (120,000). Me karika la rooroo tani kila va eaa sesa me eaa masina, me oroinaaili tee ghaata kkena atoa.”

**Masi kiukiu  
Matiu  
ghe pitiela  
Inangari emuemua**

Matiu kateva ta kasangaulu ghalua (12) disaepolo, mene kateae ararina ta Livae. Matiu ghe tiuala tani piti tuvuna atoa Iesu, aitiutiu ta Abraham, me ghe mae sio ta Deivit, me tee ekiukiuaa lutulutuaane Iesu. Ghe pitila oroeilei voto Iesu ghe apasungaala ta taumattu ngatoa, me ghe polala tale ghalimae mutungi inangari: Iesu ghe aippooaala tale motouru (sapta 5-7), niloeloe ta disaepolo atoa (sapta 10), kiuku naimatoonga tale ararimangalina ateva epona liu (sapta 13), vaalua disaepolo atoa aue la toka (sapta 18), me maemaeaaane Iesu (sapta 24-25). Matiu ghe kaarasila tani apasunga vaalua Iesu ghe akoronnala inangari tani aulia ngamuemua tale propete atoa.

**Tani kila amuemua**

Tuvuna atoa me lutulutuaane Iesu 1:1-2:23

Jon tau ngai asuu ia ghe aimonomonosiaala salana Iesu 3:1-4:16  
Iesu ghe uungula eGalilii me voto kalakalangina eGalilii 4:17-16:20

Inangari eaaitiutiu 4:17-25

Iesu ghe aippooaala tale motouru 5:1-7:29

Kasina mirikol Iesu ghe gheleila 8:1-9:34

Disaepolo atoa laghe uungula 9:35-11:1

Vaalua taumattu ghe tarala uunguaane Iesu 11:2-12:50

Iesu ghe apasungaala tale kiukiu naimatoonga 13:1-53

Vaalua taumattu ghe nongola inangarina Iesu 13:54-16:20

Iesu ghe apasungaala ta disaepolo atoa 16:21-18:35

Iesu ghe uungula ejidua 19:1-25:46

Iesu ghe saela ejerusalem 19:1-20:34

Iesu ghe kupi ssola ejerusalem 21:1-22

Iesu me namu ngatoa ta aIsraeli etoa 21:23-23:39

Iesu ghe auliaala voto auena elutu 24:1-25:46

Matemateaane me tottotuaane Iesu 26:1-28:20

Nau Iesu ghe tokatoka ejerusalem 26:1-46

Laghe kunela Iesu me laghe gheleila niaiskei etana 26:47-27:26

Laghe avukala saela Iesu tale aikotoo 27:27-56

Laghe kaiaala Iesu me ghe totula tale nimate 27:57-28:20

*Tuvuna atoa Iesu Karisto*

(Luk 3:23-38)

<sup>1</sup> Lo ateva oia vuку eaauliaa tuvuna atoa Iesu Karisto. Iesu tuvuna ia Deivit. Me Deivit tuvuna ia Abraham.

<sup>2</sup> Abraham tamane ia Aisiki,

me Aisiki tamane ia Jekop,

me Jekop tamane ia Jiuda me tuena atoa me nengane atoa,

<sup>3</sup> me Jiuda tamairarue ia Peres me Sera, kinairarua ta Tamar,

me Peres tamane ia Hesron,

me Hesron tamane ia Ram,

<sup>4</sup> me Ram tamane ia Aminadab,

me Aminadab tamane ia Nason,

me Nason tamane ia Salmon,

<sup>5</sup> me Salmon tamane ia Boas, kinna ta Reiab,

me Boas tamane ia Obet, kinna ta Rutu,

me Obet tamane ia Jesi,

<sup>6</sup> me Jesi tamane ia King Deivit,

me Deivit tamane ia Solomon,

kinna Solomon manna akasina ia Uraea,

<sup>7</sup> me Solomon tamane ia Rehoboam,

me Rehoboam tamane ia Abia,

me Abia tamane ia Eisa,

<sup>8</sup> me Eisa tamane ia Jehosapat,  
me Jehosapat tamane ia Jehoram,  
me Jehoram tamane ia Usaea,  
<sup>9</sup> me Usaea tamane ia Jotam,  
me Jotam tamane ia Eihas,  
me Eihas tamane ia Hesikaea,  
<sup>10</sup> me Hesikaea tamane ia Manase,  
me Manase tamane ia Eimon,  
me Eimon tamane ia Josaea,

<sup>11</sup> me Josaea tamane ia Jehoiasin\* me nengane atoa. Isaa o nau laghe soallotila  
aIsraeli etoa me laghe siola eBabilon.

<sup>12</sup> Ghe mene tiuaala nau eteva laghe siola eBabilon:

Jehoiasin tamane ia Sealtiel,

me Sealtiel tamane ia Serubabel,

<sup>13</sup> me Serubabel tamane ia Abiut,

me Abiut tamane ia Eliakim,

me Eliakim tamane ia Eisor,

<sup>14</sup> me Eisor tamane ia Sadok,

me Sadok tamane ia Akim,

me Akim tamane ia Eliut,

<sup>15</sup> me Eliut tamane ia Eleasar,

me Eleasar tamane ia Matan,

me Matan tamane ia Jekop,

<sup>16</sup> me Jekop tamane ia Josep, manna ia Meri, ta ngetana Meri Iesu ghe lutula, la  
aseasea va Mesaea ia.

<sup>17</sup> Liuna avalua o me tuvuna atoa Abraham ghe tiuaala me ghe mae sio ta Deivit erooroo  
kasangaulu ghaata (14) vituu. Me ghe tiuaala ta Deivit me ghe ghaala nau eteva laghe  
siola eBabilon erooroo kasangaulu ghaata (14) vituu. Me ghe mene tiuaala nau laghe  
siola eBabilon me ghe ghaala nau ta Mesaea erooroo mene kasangaulu ghaata (14) vituu.

### Lutulutuaane Iesu Karisto

(Luk 2:1-7)

<sup>18</sup> Kiukiuna Iesu Karisto nau eteva ghe lutula, isaa avalua toko. Kinna ta Meri, laghe  
uela va aue eghaa Josep me emanna ia, me karika lalu ghe aso aitaaua me laghe tarala  
va tale sarasarakanina Spirit Manga ateva me Meri ghe kkaaila aliki eteva.

<sup>19</sup> Josep ghalughuluena ia, ghe nongola va Meri ang ghe suusunuku, ghe tam annala  
tani ghelei epalata Meri ta mataira taumattu ngatoa, liuna avalua o me ghe nnaala va  
enim ruu einao inangari etingiu etairarua.

<sup>20</sup> Nau eteva Josep ghe annangaili llo, arovaeeata ta kapuna ensolo ateva Vau eteva ghe  
mae sio etana tale niasoasopoi eteae. Me ghe auliaala etana va, "Josep io tuvuna io Deivit,  
urau mene matautu tani ghaa Meri va evausenimi ia. Unongo, ia o aliki eteva ekakkaia  
ta kovana, Spirit Manga ateva ghe tauet lao sio etana.

<sup>21</sup> Aliko eteva aue elutu etana, taita ia, me ukolo ararina atea ta Iesu, poli ia aue  
easaangi kapuna taumattu ngatoa<sup>†</sup> tale kaluira ssavoto."

<sup>22</sup> Isaa akapa llo Vau eteva ghe auliaala ta propete ateva emua arau ang ghele  
kaurekatila, ghe uela va.

<sup>23</sup> "Am nongola, kateva vause karika ghe aso tee teva taita aue esunuku me emolena  
aliki eteva taita ia, me aue la kolo ararina atea ta Immanuel" — malloeana va "God  
etokatoka teeita."

<sup>24</sup> Nau eteva Josep ghe anguula, ghe gheleila voto kapuna ensolo ateva Vau eteva ghe  
auliaala etana, me ghe ghaala vause ateva.

<sup>25</sup> Me karika ghe aso teeielo lomosina ta ghe molenaala aliki eteva, taita ia. Me ghe  
kolola ararina atea ta Iesu.

## 2

### Tau ngalomasaanga atoa laghe mae sio tani tara Iesu

<sup>1:11:</sup> 2 Ki 22-24; 2 Kro 36:10; Jer 27:20.      \* <sup>1:11:</sup> Tale inangari nge Grik, *Jekonia*, mene kateae ararina Jehoiasin.

<sup>1:12:</sup> Esra 3:2.      <sup>1:18:</sup> Luk 1:27, 35.      <sup>1:21:</sup> Luk 1:31; 2:21.      † <sup>1:21:</sup> Tale inangari nge Hibru, Iesu malloeana  
va "Iaue esaangai". Iaue ararina atea God tale Pokane ateva Inangari niaippooa ngaitauua. Utara Eksodis 3:14-22.

<sup>1:23:</sup> Ais 7:14.      <sup>1:25:</sup> Luk 2:21.

<sup>1</sup> Meri ghe molenaala Iesu eBetlehem nge Jiudia nau ta King Herot. Iesu ang ghe lutula me emulina tau ngalomasaanga atoa, tale pai nge sinaka esae laghe mae sio ejerusalem

<sup>2</sup> me laghe aaikolomaa see va, "Eaa ia aliki eteva ghe lutula, kapuira Kingi ia ajiu etoa? Ami ghe tarala kattona ateva tale pai nge sinaka esae ativilau, me ami mae sio tani kkaueinia."

<sup>3</sup> Nau eteva King Herot ghe nongola isaa o inangari ghe annangailila, me tee ila akapa taumattu nge Jerusalem atoa, ila tee laghe anna ngatingina.

<sup>4</sup> Vara me ghe kolola namu ngatoa tana pristi me tau ngalomasaanga atoa tale inangari nipaopao kapuira ila taumattu ngatoa, laghe mae sio tani velu eitauua, me ghe kolomilala va eaa Mesaea ngateva ue elaa lulu.

<sup>5</sup> Me laghe liula etana va, "Aue elutu eBetlehem nge Jiudia. Poli propete ateva ghe pitila inangari isaa avalua toko,

<sup>6</sup> "Me io Betlehem tale kosa nge Jiuda,

karika tani ghaunaaili ararim ateeae tale isaa akapaaili masaliki nge Jiuda, ta poli ta getam aue taumattu ngateva namuu ia aue etingina.

Me ia aue eaitoiaa kapughu aIsraeli etoa.'

<sup>7</sup> Herot ghe nongola isaa o inangari me ghe suu eisuliaala inangari ta tau ngalomasaanga nge sinaka esae atoa va la laa taraia. Nau eteva laghe lao sio, ghe kolomi emasinallala va, "Elovisa am ghe tani tarala katto ateva ghe kaurekatila?"

<sup>8</sup> Vara me ghe sungilala va, "Am lao sio eBetlehem, me am laa pae aotu va eaa ang ghele lulu ia o aliki eteva. Nau eteva am tani taraia am mene mae auliah etaghi, me aghi tee alaa kkaueinia."

<sup>9-10</sup> Nau laghe ruula tani nongo inangarina Kingi, laghe kasula. Laghe laolao me laghe mene tarala katto ateva, laghe taraiela esinaka esae. Nau eteva laghe mene tarala katto ateva laghe masimasieiliila. Ia o katto ateva ghe muemueiniila elaolao me ghe tokala epona kona aliki eteva ghe asoaso.

<sup>11</sup> Tau ngalomasaanga atoa laghe kupi ssola tale ale ateva, me laghe tarala aliki eteva me kinna ta Meri. Laghe tturru siola me laghe kkaueiniela, me laghe otila uneira aikaai, me laghe kapela golo, frankinsens,\* me mur† tani taula etana.

<sup>12</sup> God ghe auliaala kieira tale niasoasopoi va la rau mene lao nongina Herot etokatoka, me laghe lao ppae sio tale katikirighi salana me laghe lao sio tanganueira.

### *Josep, Meri me aliki eteva laghe siola eljip*

<sup>13</sup> Laghe kasula, me kapuna ensolo ateva Vau eteva ghe rekataala ta Josep, tale niasoasopoi eteae. Ensolo ateva ghe uela etana va, "Totula, me ughaa aliki eteva me kinna, me amatolu kasu parasi sio eljip. Am sio toka eljip, aue aghauliaa etam va elovisa am mene kiri sae. Poli Herot epaepae aliki eteva tani uvi ematea."

<sup>14</sup> Josep ghe totula me ghe ghaala aliki eteva me kinna, me eleivoo arau laghe siola eljip.

<sup>15</sup> Josep ghe tokala eljip me ghe ghaala nau eteva Herot ghe matela. Isaa o voto ghe lutula tani akaurekati illo Vau eteva ghe auliaala ta propete ateva emua arau. Ghe uela va, "Natughu taita ateva ghe tokatoka eljip, me aghi mene kolo veluela eljip."

### *King Herot ghe auliaala va la uvi emate aliki taita atoa*

<sup>16</sup> Nau eteva Herot ghe kilala va tau ngalomasaanga atoa laghe kameala me karika laghe mene kiriaa lao sio, ghe sessai emateala, me ghe uela va la uvi emate isaa akapaaili natu ngaliki taita eBetlehem me illo masaliki etokatoka akalakalaa, aliki aneira ninamanama etitiuaa ta ghaluae me esiosio aloi, poli tau ngalomasaanga atoa laghe uela va laghe tarala katto ateva ghe kaurekatila ghaluae ninamanama ang ghe lange sio.

<sup>17</sup> Illo propete Jerimaea ghe auliaala ang ghele tani kauerekatila, ghe uela va,

<sup>18</sup> "Laghe nongola lingi ngalo ateva eRama.

Laghe ngangngala me laghe ale amate,  
Resol ghe ngangngala natuna atoa.

Karika ghe aloanna righi airuui ngalo,  
poli ila akapa natuna atoa ngila ghe matela."

### *Josep me Meri lalu ghe kiri saela eNasareti*

<sup>19</sup> Nau Herot ghe matela, ensolo ateva ghe rekatala ta Josep tale niasoasopoi eteae eljip

<sup>20</sup> me ghe auliaala etana va, "Ughaa aliki eteva me kinna me amatolu mene sae eIsrael. Ta lo atoa laghe aaloanna tani uvi emate aliki eteva angila ghe mate akapala."

<sup>21</sup> Josep ghe totula me ghe ghaala aliki eteva me kinna me laghe saela eIsrael.

\* 2:2: Nam 24:17.    2:6: Maeka 5:2; Jon 7:42.    2:11: Sams 72:10-15; Ais 60:6.    2:11: **frankinsens** frankinsens  
masi voto aighelei aiaavusuvusuena.    † 2:11: **murrr** voto la raarariaa tale taumattu matena.    2:15: Osea 11:1.

2:18: Jer 31:15; Aitiutiut 35:19.

<sup>22</sup> Vara me Josep ghe nongola va ouna ateva King ta Arkelaus ghe ghaala liuna ateva tamana ta Herot ejjudia me ghe matautula tani lao. Vara me God ghe auliaala kiena tale niasoasopoi eteae va erau mene toka ejjudia, me ghe saela eGalilii.

<sup>23</sup> Ghe lao sio tani toka tale masaliki eteae laghe aseasea va eNasareti. Isaa o llo propete atoa laghe auliaala ghe tani kaurekatila va, “La aseasea va aNasareti ia.”

### 3

#### *Jon tau ngai aasuu ia*

(Mak 1:1-8; Luk 3:1-9, 15-17; Jon 1:19-28)

<sup>1</sup> Tale isaa o nau Jon tau ngai aasuu ia ghe mae sio me ghe tokatoka tale voto karika righi taumattu etana ejjudia. Ghe poppoaa tale taumattu ngatoa.

<sup>2</sup> Ghe ue va, “Am nna ngaioghioghiaa poli ararimangali ngepona liu eteva ange aakalakalaa.”

<sup>3</sup> Ia o taumattu ngateva ta Jon, God ghe aulieiniela ta propet Aisaea va,  
“Tale voto ateva karika righi taumattu etokatoka etana, lingi ngalo taumattu ngateva ekolokolo, eue va,

‘Am aimonomonosiaa salane atikirighi Vau eteva,  
am ghelei eghulughuluenaalaa akapa salane.’ ”

<sup>4</sup> Unna aiasae Jon laghe gheleila tale uu kamolo, me ghe ai-iriaa paisi eteae viliki vulumakao ia. Ghe namanama toto me iruena nge tapaa tuvui.

<sup>5</sup> Tale isaa o nau taumattu nge Jerusalem me isaa akapa ejjudia me taumattu ghe tokatoka kalakalaa tale ateo ateeae ejordan laghe mae sio ta Jon.

<sup>6</sup> Laghe aaulia ngaotu kaluiraa ssavoto me ghe aasuuia tale ateo ateeae ejordan.

<sup>7</sup> Jon ghe taatara va oroeiili Paresi me Sadiusi etoa laghe mae sio va easuula. Vara me ghe uela etaira va, “Am nongina va natuira iem katu ngatoa! See euela etaimim va am ilou vuli sessaiaane Vau eteva ange anna tani lutu etaimim?

<sup>8</sup> Am kuneaa righi ueimim tani apasunga va ngam ghe vella kaluimim ssavoto.

<sup>9</sup> Am rau mene ue va, ‘Ami tuyuna amami Abraham.’ Poli aghaauliaa etaimim va God erooroo tani ghelei isaa o atu etuvuna Abraham.

<sup>10</sup> Kulum ateva aimonomonosiaanna ia tani tue akatuu ai, me isaa o ai karika ekuukuneaa masi uene aue la tue me la sau velu sae tale kuraa ateeae.

<sup>11</sup> “Aghi aghaasuum tale manu tani apasunga va ngam ghe nna ngaioghioghiaala. Me taumattu ngateva auena emae, ia sarasarakaniaane elaulau sarasarakaniaaghi, karika masi taumattu ngieghi tani sau unna aikasukasuu. Ia aue eaasuum tale Spirit Manga ateva me tale kuraa ateeae.

<sup>12</sup> Ia emaema arova taumattu ngateva eposoposo unna pokoo ateva aisaraki uiti, tani pola uiti me kou uiti. Me eatoka aitauua uiti tale ale ngai atoka uiti eteva, me aue evelu sae kou uiti tale kuraa ateeae karika erooroo tani pala.”

#### *Jon ghe asuula Iesu*

(Mak 1:9-11; Luk 3:21-22)

<sup>13</sup> Tale isaa o nau Iesu ghe kasula eGalilii me ghe mae sio ejordan va Jon easuula.

<sup>14</sup> Jon ghe gheeghelei rungainia tani ue va, “Emaamasina arova io uasueeghi, vaalua me umae sio etaghi?”

<sup>15</sup> Iesu ghe liula etana va, “Masina. Ghaine ughelei nongina aghauliaa. Tale isaa o salana, ita ghelei isaa akapaili voto God ealoanna va ita ghelei.” Liuna avalua o me Jon ghe aimulisi teela inangarina Iesu.

<sup>16</sup> Nau Jon ghe asuula Iesu, Iesu ghe laa sae tingina epona, me epona liu ghe otiela me ghe tarala Spiriti eteva kanna ia God ghe sio mae nongina ghila ateva valusu ia, me ghe toka saaoala etana.

<sup>17</sup> Me epona liu kateva lingi ngalo ghe ue va, “Ia o natughu eteva aghaailousieinia, me masimasiaaghi ta ngetana namungaili.”

### 4

#### *Satana ghe tootoongaala Iesu*

(Mak 1:12-13; Luk 4:1-13)

<sup>1</sup> Tale isaa o nau Spiriti eteva ghe ssoaala Iesu tale voto ateva karika righi taumattu etana va namu ngateva ta raroai etoa etootoongainia.

<sup>2</sup> Iesu ghe naela ghe roola ghaatingaulu (40) llaa me ghaatingaulu voo, me airuuuu tale isaa o nau, ghe maloola.

<sup>3</sup> Vara me saikame ateva ghe mae sio tani rekataa etana, me ghe uela etana va, "Arova koronna va Natuna io God, uauliaa tale atu o me ekoli me everete."

<sup>4</sup> Iesu ghe liula me ghe uela va, "Uru ngai Manga ateva eue va, 'Karika taumattu ngatoa va la maamaulue nonga tale inana, karika, ta nau la aimulisi tee isaa akapaaili inangarina God aue la maulue.'

<sup>5</sup> Ghe aulia ngavaluela o, me namu ngateva ta raroai etoa ghe mene laoainie sio tale masaliki taatara atea manga ia.\* Me ghe saeainiela tale pungani ale manga ateva,<sup>6</sup> me ghe uela etana va, "Arova koronna va Natuna io God, ulove velu sio, poli Uru ngai Manga ateva eauliaa va,

"'Aue esuu kapuna ensolo atoa

    aue la sau evukalaio

me karika aue utaghua kekem tale atu.'"

<sup>7</sup> Iesu ghe uela etana va, "Uru ngai Manga ateva emene ue va, 'Urau mene tootoonga Vau eteva kapum Goto ia.'"

<sup>8</sup> Namu ngateva ta raroai etoa ghe mene ghaiae saela tale motouru eteva iaaili epona, me ghe apasungaala patunganua namu ngakapa atoa tale kosa ateva oia, me masi voto atoa etaira.

<sup>9</sup> Me ghe uela ta Iesu va, "Aue atau aatu isaa akapaaili voto angu tarala, arova ussuuiaa me ukkaueinieghi."

<sup>10</sup> Iesu ghe uela etana va, "Vellaio Satana, ta poli Uru ngai Manga ateva eauliaa va, 'Ukkauua Vau eteva kapum Goto ia, me uaimulisi teeia nonga.'

<sup>11</sup> Me namu ngateva ta raroai etoa ghe kasu vuliela, vara me ensolo atoa laghe mae sio tani sausia.

*Iesu ghe tiuala tani uungu*

(Mak 1:14-15; Luk 4:14-15)

<sup>12</sup> Nau eteva Iesu ghe nongola va Jon ie tale ale mata voovoo, ghe oghi lao sio eGalilii.

<sup>13</sup> Ghe kasu vuli eNasareti me ghe lao sio tani toka eKapenium tale ateo talia ngateae tale kosaira ararimangali elua ta Sebulon me Naptalae.

<sup>14</sup> Iesu ghe gheleila isaa o voto tani akauerekati inangari propet Aisaea ghe auliaala,

<sup>15</sup> "Taumattu tale kosa nge Sebulon me Naptalae,

    kosa etokatoka tale salana atikirighi elaa ghoa elamana, me kosa tale pai kativilau  
    tale ateo atea ejodan,

    Galilii kosaira ia taumattu ngeleka atoa.

<sup>16</sup> Isaa o taumattu etokatoka tale saurrom ateva

    ngila ghe tarala paka mallanga ateva,

lo atoa la tokatoka tale saurrom masau ta Vau ngepona ateva<sup>†</sup>

    mallanga ateva ang ghe llaala etaira."

<sup>17</sup> Tale isaa o nau Iesu ghe tiuala tani ppooaa, ghe ue va, "Am nna ngaioghioghiaa, poli ararimangali eteva epona liu ange aakalakalaa."

*Iesu ghe kolola disaepolo ghaata*

(Mak 1:16-20; Luk 5:1-11)

<sup>18</sup> Iesu ghe kasukasu elaoalo tale sama ateo talia ngateae eGalilii, me ghe tarala tue me nenga alua, Saemon la kolokoloa va Pita etana, me nengane ta Andru. Lalu ghe lukuluku ta tau ngelamana ilalua.

<sup>19</sup> Me ghe uela ta ngetairarua va, "Amalu mae usieghi me aue agheleiema me amalu tau ngai luku taumattu."

<sup>20</sup> Me aravaeaata ta lalu ghe velu elokoila uvena me lalu ghe usiela.

<sup>21</sup> Iesu ghe mene kasu tee lao sio me ghe mene tarala mene ghalua tue me nenga, Jon me Jeimis, natuna ilalua Sebedi, lalu ghe tokatoka tee tamairarua ta Sebedi, laghe anuunumi uneira uvena epona tale paanaka ateva, me Iesu ghe kololaluelua.<sup>22</sup> Karika lalu ghe aitoila ta lalu ghe kkure vulula paanaka ateva me tamairarua me lalu ghe usiela.

---

<sup>4:1</sup>: Hib 2:18; 4:15.    <sup>4:2</sup>: Eks 34:28.    <sup>4:4</sup>: Diut 8:3.    \* <sup>4:5</sup>: masaliki taatara atea manga ia Malloeana va Jerusalem.    <sup>4:6</sup>: Sams 91:11-12.    <sup>4:7</sup>: Diut 6:16.    <sup>4:10</sup>: Diut 6:13.    <sup>4:12</sup>: Mat 14:3; Mak 6:17; Luk 3:19-20.    <sup>4:15</sup>: Ais 9:1-2.    † <sup>4:16</sup>: Tale inangari nge Grik, voto ateva tootoo nimate.    <sup>4:17</sup>: Mat 3:2; 19:27.

*Iesu ghe poppoaa me ghe gheeghelei emasina taumattu ngatoa  
(Luk 6:17-19)*

<sup>23</sup> Iesu ghe kasukasu ekapa see eGalilii, me ghe aapasunga tale aleira ale nivelu eitauaa me ghe poppoaa masi kiukiuna ararimangali eteva, me ghe gheeghelei emasina isaa akapa asease sessa atoa.

<sup>24</sup> Kiukiuna Iesu ghe lao akapa seela tale provinsi eteva eSiria, me taumattu ngatoa laghe maemaeaa asease tau sessa atoa, lo atoa ghe anoanangi ila, me lo atoa raroai etoa laghe kupilala, me lo atoa laghe oo, me lo atoa karakanna ila, me Iesu ghe ghelei emasinalala.

<sup>25</sup> Oroi ila taumattu nge Galilii etoa me taumattu tale Kasangauluae Masaliki Taatara, me aJerusalem atoa, me ajiudia ngatoa me lo atoa tale pai kativilau tale ateo ateae eJodan, laghe usiusie see.

## 5

*Iesu ghe aippooaa tale motouru*

<sup>1</sup> Nau eteva Iesu ghe tarala taumattu ngatoa laghe orioeili ila, ghe saela tale motouru eteva, me ghe toka siola, me kapuna disaepolo atoa laghe mae sio etana.

<sup>2</sup> Me ghe tiuaala tani apasunga etaira va,

*Niarangise*

*(Luk 6:20-23)*

<sup>3</sup> "Aue emasinaaili ta lo atoa la kilakila va masi uunguaane ateva God karika ia etaira me la aloannaaili tani ghaaia,  
ta ararimangali ngepona liu eteva aue anueira ia.

<sup>4</sup> Aue emasinaaili ta lo atoa la ghaalousiusi,  
ta God aue airuui ngalo ia ta getairaa.

<sup>5</sup> Aue emasinaaili ta lo atoa la siosioaa nannaairaa,  
poli kosa akapa ateva aue kaluira ia.

<sup>6</sup> Aue emasinaaili ta lo atoa la ghaaloannaaili ghulughuluena, nonginaaili lo ateva emaamaloa ealoannaaili tani namanama, me ekaakangngata tani ropi,  
ta God aue eghelel erorooaa aloannaaira.

<sup>7</sup> Aue emasinaaili ta lo atoa la alalousiusi tee mene katoa,  
ta God aue ealousiusi teeila.

<sup>8</sup> Aue emasinaaili ta lo atoa urungutaniira raarangisana,  
ta aue la tara God.

<sup>9</sup> Aue emasinaaili ta lo atoa la ghaalokoi luei,  
ta God aue easela va natuna ila God.

<sup>10</sup> Aue emasinaaili ta lo atoa la ghaaghaa mmarakana mausi masi gheegheleiaaira,  
ta ararimangali ngepona liu eteva aue anueira ia.

<sup>11</sup> "Aue emasinaaili etaimim arova taumattu ngatoa la pilosiem, me la ghelei saasakiaa teeiem, me la ghaikameaa teeiem, poli ararighi eteae.

<sup>12</sup> Voto sesa laghe tani gheeghelei tee propete atoa emua arau, isaa oia la mene gheeghelei teeiem. Am masimasi etingina, ta aipoliimim namungaili isaa epona liu.

*Uela me mallanga ateva*

*(Mak 9:50; Luk 14:34-35)*

<sup>13</sup> "Am uela am tale kosa ateva oia, me arova namina ateva uela ateva ekapa, o vaalua aue ita mene gheleia me emene tue namina? Ta ia o ange kapala maamasikaniaane. Taumattu ngatoa aue la nim sau velua me la sakieinia tale kosa ateva.

<sup>14</sup> "Am mallanga am tale kosa ateva. Masaliki taatara ataeetokatoka epona tale motouru, karika eroroo tani aisulia.

<sup>15</sup> Me tee taumattu ngatoa karika la ghaarokoti kuraaira lam ataeetokatoka epona tale pakeainia tale keru. Ta la ghaatokiae sae tale aitiitinginane, ta etautau lao mallanga tale taumattu ngatoa tale ale ateva.

<sup>16</sup> Ia avalua o me, am apasunga mallangiimim tale taumattu ngatoa, me aue la tara masi gheeleiaaimim, me aue la tau sae ararina ataeetokatoka epona liu.

*Inangarina nipaopao God*

17 "Am rau mene annaa va aghe mae sio tani ghaa velu inangari nipaopao me inangariira propete atoa. Karika! Aghe tam mae sio tani ghaa velu, ta aghe mae sio tani ghelei eroorooa.

18 Aghaaulia ngakoronna etaimim va elomarase me kosa ateva oia aue ekapa, me aue karika teva mata nginangari ghaunaaili tale inangari nipaopao aue ekapa, karika, lomosina ta llo God ghe auliaala tale inangari nipaopao etani lutu ekapa.

19 Arova see ia taumattu ngateva etam aimulisi tee tuku kateva tale inangari nipaopao me eapasunga ta mene katoa tana taumattu tani tam aimulisi tee, karika aue enamuu tale ararimangali ngepona liu eteva, me lo ateva eaimulisi tee, ia ararina atae aue enamuu tale ararimangali ngepona liu eteva.

20 Aghaauliaa etaimim va, arova gheegheleiaaimim ghulughuluena etam lau masi gheegheleiaaira Paresi etoa me tau ngai aapasunga ngatoa tale inangari nipaopao, karika aue am sso tale ararimangali ngepona liu eteva.

### *Salana tani ghelei eghulughuluena inangari*

21 "Ngam ghe nongo vella va laghe auliaala ta lo atoa emua arau va, 'Am rau mene aiuvi emate. Me arova lo ateva eaiuvii emate aue elaa ghaisakei.'

22 Me aghi aghaauliaa etaimim va, lo ateva esessaia ta nengane ateva, aue eaisakei, me see eue ta nengane va, 'Alo kapakapa ateva,' aue elaa ghaisakei ta kansolo atoa, me lo ateva eue ta nengane va, 'Tau veevee ateva!' aue kuraa atae aetaia eGehenna.

23 "Liuna avalua o me arova angu maemaeaa kalum aighelei masi aiaavusuvusuena, me uannaa lao mua kapum ateva ghe annaa va ughe ghelei saasakiaala etana,

24 uatokia sio mua kalum aighelei masi aiaavusuvusuena me ulaa taraiia me amalu mene sama aitauaa, me auena umae ghelei masi aiaavusuvusuena sae ta God.

25 "Arova aissanim ateva ange laolao tani aulieinio ta tau ngai ghelei niaiskei eteva, ulaa tara parasia, me uauliaa etana va ualoanna va amalu kkaluaa llo voto amalu ghe gheleila karika masina, ta erau laa aulieinio ta tau ngai ghelei niaiskei eteva va elaa taua polisi eteva, va elaa ghatokaio sso tale ale mata voovoo.

26 Aghaaulia ngakoronna etam va karika aue ukupi ghoa tale ale mata voovoo lomosina ta utau ekapa lao viliki veu la ghase va utau lao.

### *Nilai sari*

27 "Ngam ghe nongo vella va laghe auliaala va, 'Karika umene lai sari.'

28 Me aghi aghaauliaa etaimim va, arova see ange tara ssaila vause ateva me ange annaa saasakiaala etana, ia ange lai sari teeielia tale urungutinanina ateva.

29 Arova matam muenna ativilau eghaaghao lao tale ssavoto, uvaliki velua me usau velua. Emaamasina arova kateva nonga ia tuku voto tale vilikim evulla ia, me karika va isaa akapa vilikim elao eGehenna.

30 Me arova nimam muenna atelange ange gheleila va angu lao sio tale ssavoto, usai kotooia me usau velua. Emaamasina arova kateva nonga ia tuku voto tale vilikim evulla ia, me karika va isaa akapa vilikim elao eGehenna.

### *Niairatii tale taita me vause*

(Mat 19:9; Mak 10:11-12; Luk 16:18)

31 "Ngam ghe nongo vella va, 'Arova taita ateva ange ratila vausenna ateva, eghelei tikirighi unna uru ngai tani apasunga va ange ratirati vause ateva me etau lao ta vause ateva.'

32 Me aghi aghaauliaa etaimim va arova taita ateva enim rati vause ateva tale kasina ppae asease voto me karika tale uunguaa niallai salosalooa see, ia o taita ateva egheelei vause ateva aue eakune taita, me lo ateva taita emene lai ta vause ateva o ange lai sarila.

### *Inangari nialokoi*

33 "Ngam ghe nongo vella va laghe auliaala ta lo atoa emua arau va, 'Am rau mene kamekame nau ngam gheleila inangari nialokoi, me nau ngam gheleila inangari nialokoi ta Vau palepale ateva, utani aimulisi tee llo uaauliaa.'

34 Me aghi aghaauliaa etaimim, am rau mene auliaa sae inangari nialokoi, karika epona liu tee, poli aitokatokane ateva o God,

**5:17:** Rom 3:31.    **5:18:** Luk 16:17; 21:33.    **5:19:** Jms 2:10.    **5:21:** Eks 20:13; Diut 5:17.    **5:22:** 1 Jon 3:15.

**5:23:** Mak 11:25.    **5:27:** Eks 20:14; Diut 5:18.    **5:29:** Mat 18:9; Mak 9:47.    **5:30:** Mat 18:8; Mak 9:43.    **5:31:**

Diut 24:1-4; Mak 10:4.    **5:32:** 1 Ko 7:10-11.    **5:33:** Diut 23:21; Lev 19:12; Nam 30:2.    **5:34:** Ais 66:1; Jms 5:12; Mat 23:22.

<sup>35</sup> me tale kosa ateva oia, poli God eaatingina saoaa kkena etana, me am rau mene auliaa sae inangari nialokoi tee ejerusalem, ta kinatama masalikina ia Kingi eteva iaaili epona.

<sup>36</sup> Urau mene auliaa inangari nialokoi tale urum ateva, ta karika urooroo tani ghelei katikirighi uu ngurum va eusousoana me evoovongiena.

<sup>37</sup> Am nim ue va ‘ue’ o ‘karika’, me karika am mene auliaa sae inangari nialokoi. Llo am nim mene auliaa, kanna sesa taumattu ngateva.

*Am rau mene ailiuaa voto sesa*

(Luk 6:29-30)

<sup>38</sup> “Ngam ghe nongo vella va laghe auliaala va, ‘Arova ughelei saasakiaa matana taumattu ngateva, eroo tani ghelei saasakiaa tee matam, me arova utumari kotoo ngalunggaluna, eroo tani tumari kotoo tee ngalunggalum.’

<sup>39</sup> Me aghi aghaauliaa etaimim va am rau mene liu voto sesa ngila ghelei teeiemla, arova ngila posalala bbam muenner ativilau, umene kirio me la mene posala mene kativilau.

<sup>40</sup> Arova taumattu ngateva ange laoainio sio tale niaisakei me eue tale niaisakei va upolia tale unem sioto ateva, masina utau tee lao aiaasae ngeleka ateva.

<sup>41</sup> Me arova la ue etam va usunuki ghinna me ukasuaa tale kateva kilomita, masina usunuki me ukasuaa lao ta ghalua kilomita.

<sup>42</sup> Utua lao voto tale lo ateva eloooloo, me urau mene aroo tale taumattu eanna tani ghaa voto pei niliu auena.

*Uailousiaa tau ngai ssateem atoa*

(Luk 6:27-28, 32-36)

<sup>43</sup> “Ngam ghe nongo vella va laghe auliaala va, ‘Uaielousiaa taumattu ngateva kalakalangina ia etam me ussa tee aissateem ateva.’

<sup>44</sup> Me aghi aghaauliaa etaimim va am ailousiaa aissaniimim atoa, me am looloo sae va God aue esausi lo atoa la gheelei saasakieinam.

<sup>45</sup> Arova am ghelei evalua o, aue natuna am Tamaimim ateva etokatoka epona liu, ta ia egheeghelei sinaka esaesae tale taumattu sesa me masina, me egheeghelei vao ateva ekaakatuu tale ghulughuluena atoa me tale tam ghulughuluena atoa.

<sup>46</sup> Arova am ailousiaa lo atoa la aailousieinam, saa aipolipoli aue am ghaa? Tau ngai ghaa takis atoa la gheelei evalua tee o.

<sup>47</sup> Me arova am ue va, ‘Elue talaua,’ nonga ta kapuimim atoa, am nim gheelei nongina katoa la gheelei. Tau ngeleka tee atoa la gheelei evalua o!

<sup>48</sup> Am ghulughuluenaaili nongina Tamaimim ateva epona liu ghulughuluenaaili ia.

## 6

*Vaalua tani aiparuuuii*

<sup>1</sup> “Am tani nanna ngamasina nau eteva am anna tani apasunga masi uunguaaimim ta mataira taumattu ngatoo va la tara. Arova am gheeghelei evalua o, karika aue am ghaa aipolipoli ta Tamaimim ateva etokatoka epona liu.

<sup>2</sup> “Liuna evalua o me nau eteva angu tautau lao voto ta lo atoa karika righi peiira, urau mene ghelei nongina usimaghluua atoa, la saasama me la gheeghelei tale ale nivelu eitauua me tale salana, va la taraila me la asaesae arariira. Aghaaulia ngakoronna etaimim va, ila o taumattu ngatoo angila ghe ghaala arau aipoliira.

<sup>3</sup> Me io, nau eteva uparruu lo ateva karika righi peina, ugheelei eisulia.\*

<sup>4</sup> Unem niaiparuuuii unim gheelei eisulia, Tamam ateva etaatara voto ugheelei eisulia, me ia aue etau aatu aipolipoli etam.”

*Nilooloo sae*

(Luk 11:2-4)

<sup>5</sup> “Me nau am aloanna tani looloo sae, am rau mene ghelei nongina usimaghluua atoa. La ghaloannaaili tani looloo sae tale ale nivelu eitauua ngatoo me tale aighoughou tale salana va taumattu ngatoo la taraila. Aghaaulia ngakoronna etaimim va, ila o taumattu ngatoo angila ghe ghaala arau aipoliira.

---

**5:35:** Sams 48:2; Ais 66:1.    **5:38:** Eks 21:24; Lev 24:20; Diut 19:21.    **5:43:** Lev 19:18.    **5:44:** Eks 23:4-5; Luk 23:34; Apos 7:60; Rom 12:14, 20.    **5:48:** Lev 19:2; Diut 18:13.    **6:1:** Mat 23:5.    \* **6:3:** Tale inangari nge Grik, urau mene ghelei va nimam uaise atelange ekila va sa ateva nimam muenna atelange egheeleia.    **6:5:** Mat 23:5; Luk 18:10-14.

<sup>6</sup> Me io, nau eteva ualoanna tani looloo sae, ukupi sso tale alem atiulu, me ukavati atamana ateae me io nonga ulooloo sae ta Tamam, me Tamam etaatara llo ugheeghelei eisulia aue etau aatu aipolim.

<sup>7</sup> Me nau eteva am looloo sae, am rau mene auliaa oroieili inangari karika mallooeana nongina tau ngeleka atoa. La annaa va arova la auliaa oroieili inangari aue kapuira goto atoa la nongola.

<sup>8</sup> Am rau mene usi gheegheleiaaira, poli Tamaimim ateva ekilakila akasina llo voto am aloanna me am nim aaimuli tani kolomia.

<sup>9</sup> Liuna avalua o me am looloo sae avalue toko va:

“ Tamaimami epona liu

usausiemami tani oneoneaa ararim ateae va manga ia,

<sup>10</sup> ami aloanna va ararimangalim ateva emae,

me tale kosa ateva oia ami ghelei aloannaam

nongina epona liu.

<sup>11</sup> Utau rooroaa mae aneimami inana tale lo ateva oia nau.

<sup>12</sup> Ukkaluaa gheeleiaamami sesa,

nongina ami kakkaluaa lo atoa gheeleiaaira sesa etaimami.

<sup>13</sup> Urau mene tau veluemami va ami lao tale nitootoonga,

me uakekkeliemami tale sesa taumattu ngateva.”<sup>†</sup>

<sup>14</sup> Poli arova am kkaluaa kaluira ssavoto lo atoa la gheelei teeiem, aue Tamaimim epona liu aue ekkaluaa kaluimim tana ssavoto.

<sup>15</sup> Me arova am tam kkaluaa kaluira ssavoto taumattu ngatoa, aue Tamaimim ateva karika aue ekkaluaa kaluimim tana ssavoto.”

### Ninæ

<sup>16</sup> “Nau angam naela, am rau mene ghelei taataraimim va esesaaili nongina usimaghalua atoa la gheeghelei. Nau la naenae, la ghaloanna va taumattu ngatoa la kilaila, liuna avalua o me karika la gheelei eraarangisanaila. Aghaulia ngakoronna etaimim, ila o taumattu ngatoa angila ghe ghaala arau aipoliira.

<sup>17</sup> Me io, nau unaenae usile urum ateva me upora matam

<sup>18</sup> me karika aue taumattu ngatoa la tara kilaio va unaenae, ta Tamam ateva etaatara voto ita tam taatara eaaisulia, ie nonga aue ekila, me etau aatu aipolim.”

### Unguua nighaa aitauua ghinna

(Luk 12:33-34)

<sup>19</sup> “Am rau mene ghaa aitauua peiimim tale kosa ateva oia. Aue ane ateva enama ghinna me tee aue erroso me tau niainao atoa tee aue la rruti ale me la ainao.

<sup>20</sup> Ta am atoka aitauua peiimim epona liu, me aue karika ane ateva enama me tee karika aue erroso, me tau niainao atoa karika aue la rruti ale me la ainao.

<sup>21</sup> Ta poli voto ateva peim etokatoka etana, aue urunguitanum tee ateva etoka etana.

### Matam – lam tale vilikim

(Luk 11:34-36)

<sup>22</sup> “Matam alua mallanga ilalua tale vilikim. Arova matam va masina, vilikim akapaaili aue epasu tale mallanga ateva.

<sup>23</sup> Me arova matam va sesa, aue vilikim akapaaili aue saurrom. Liuna avalua o me arova mallanga ateva etam va saurromriena ia, aue saurrom ateva enamungaili.

### Karika urooroo tani uungu ta ghalua vau

(Luk 16:13)

<sup>24</sup> “Karika teva taumattu erooroo tani uunguu ta ghalua vau, ta aue tani ssa tee kateva me aue emasiaa kateva, me aue enongo usilaa kateva me eliu vilina ta mene kateva. Karika urooroo tani uungu ta God me viliki veu.

### Urau mene ghelei nannaam va esio eeu

(Luk 12:22-34)

<sup>25</sup> “Liuna avalua o me aghauliaa etaimim va, am rau mene annangaili maamaulu-aaimim va sa ateva aue am namaia, me am ropia, me am rau mene annangaili vilikiimim

**6:7:** 1 Ki 18:26-29.    **6:8:** Mat 6:32.    **6:10:** Luk 22:42.    **6:12:** Mat 6:14-15; 18:21-35.    **6:13:** Luk 22:40; Jms 1:13; Jon 17:15; 2 Tes 3:3; 2 Tim 4:18.    <sup>†</sup> **6:13:** Kasina uru ngai laghe pitila, laghe mene uela va, *ta poli ararimangali, sarasarakan me nitau sae isaa etam nau ekapa atoa, koronna.*    **6:14:** Mak 11:25-26.    **6:16:** Ais 58:5-9.    **6:19:**

Jms 5:1-3.    **6:20:** Mat 19:21; Luk 18:22.    **6:25:** Plp 4:6; 1 Tim 6:6-8; 1 Pita 5:7.

va sa ateva am asaearaa. Karika am kilakila va maulue ateva namuu ia ta matane God, me inana isaa euu, me vilikiimim isaa epona, me aiaasae isaa euu?

<sup>26</sup> Am tara ghila atoa la looloo. Karika la pasapasa utana me karika la mukemuke atoka, ta Tamaimim ateva epona liu eangiinginila. Karika am kilakila va Tamaimim ateva, nannaane etaimim elaulau aitaraane tale ghila atoa?

<sup>27</sup> Me arova utoka annaa nonga sa ateva aue elutu tale maamauluuaam, isaa o voto aue etau aatu maulue me umene toka tau lao?

<sup>28</sup> "Vaalua me am annangaili aiaasae? Am tara palaoa ngatoa la piipinosa, karika la ungu me karika la gheeghelei kaloira.

<sup>29</sup> Aghaauliaa etaimim va molumoluuaane Solomon masinaaili, me karika ta palaoa ngatoa, la laulau molumoluuaane Solomon.

<sup>30</sup> God eaamolumolu evalua o rarrasa atoa, la piipinosa ghaine, me nimanaa la taula sae tale kura ateeae. Am rooroo tani aikaaiiaa va aue eaamolumolu evalueiem tee o, uneimim niaikaaiaa ghaunaaili.

<sup>31</sup> Liuna avalua o me am rau mene annangaili va, 'Sa ateva aue ami namaia?' me 'Sa ateva aue ami ropia?' me 'Aue ami asae sa ateva?'

<sup>32</sup> Tau ngeleka atoa la iilou paepae isaa o voto, Tamaimim ateva epona liu ekilakila isaa o voto am tuutukuna etana.

<sup>33</sup> Mata ngemua ateva voto am gheleia, am pae mua ararimangalina ateva God me gheegheleiaane ghulughuluena tale maamauluuaaimim, me ia aue etau aatu isaa o voto etaimim.

<sup>34</sup> Liuna avalua o me am rau mene annaa nimanaa, poli maamaataniaa nimanaa epei nimanaa. Me kateva kateva nau, rooroona ia tale maate.

## 7

### *Niaisakei*

(Luk 6:37-38, 41-42)

<sup>1</sup> "Am rau mene ue va katoa nonga taumattu la gheelei ssavoto, ta God erau auliaa teeiem va am tee am gheelei ssavoto.

<sup>2</sup> Poli God aue eghelei niaisakei etaimim nongina am gheelei niaisakei ta katoa, me saa ase voto am gheelei ta mene kateva, God aue eghelei tee etaimim.

<sup>3</sup> "Vaalua me utaatara nonga tuku vongovongo arighi ta matana kapum ateva me karika uannaa tuku palanga ateva ta matam?

<sup>4</sup> Vaalua me uue ta kapum ateva va, 'Mae sio me aghaa velu tuku vongovongo arighi ta matam,' me nau etoa tuku palanga ateva etokatoka ta matam?

<sup>5</sup> Usimaghalue io! Ta ughaa velu ekasina mua tuku palanga ateva ta matam, me aue utaatara amasina nau eteva ualoanna tani ghaa velu tuku vongovongo arighi ta matana kapum ateva.

<sup>6</sup> "Am rau mene ghaa voto manga va am tau lao ta paua atoa, ta aue la kirila me la ametiem me la namaiem. Me tee am rau mene velu sio uneimim pel ta mosu etoa, ta aue la asa saasakiaa.

### *Ukolomi, upae me umirimiri*

(Luk 11:9-13)

<sup>7</sup> "Am kolomi me aue etau aatu; me am pae me aue am tara; me am mirimiri me atamana ateeae aue etotia.

<sup>8</sup> Lo atoa la kookolomi, la ghaaghaha, me lo atoa la paepae, la taatara, me atamana eotioti ta lo atoa la mirimiri.

<sup>9</sup> "See etaimim tamatama atoa, arova teva natum eloooloo teva tuku verete, aue utau lao teva atu?

<sup>10</sup> Me arova eloooloo teva kko, aue utau lao teva katuu?

<sup>11</sup> Me gheegheleiaaimim sesa, me am kilakila tani tau lao masi voto ta natuimim atoa, am annaa va ghaisa ooroiaa voto Tamaimim ateva etokatoka epona liu etautau lao ta lo atoa la kookolomia?

<sup>12</sup> Tale isaa akapaaile voto, am ghelei lao ta katoa, llo am aloanna va la ghelei mae etaimim. Isaa o llo isaa tale inangari nipaopao me tale propete.

**6:26:** Mat 10:29-31; Luk 12:6-7.    **6:29:** 1 Ki 10:4-7; 2 Kro 9:3-6.    **6:32:** Mat 6:8.    **6:33:** 1 Ki 3:11-14; Sams 37:4, 25; Rom 14:17.    **7:1:** Rom 2:1; 1 Ko 4:5; Jms 4:11-12.    **7:2:** Mak 4:24.    **7:7:** Mak 11:24; Jon 14:13; 15:7; 16:23-24.

**7:8:** 1 Jon 3:22; 5:14-15.    **7:11:** Jms 1:17.    **7:12:** Mat 22:39-40; Luk 6:31; Rom 13:8-10.

*Ghauna arighi atamana*  
(Luk 13:24)

<sup>13</sup> “Am kipi sso tale ghauna arighi atamana. Atamana ateae namuu ia me salana atikirighi namuu ia elaoalao tale voto sesa, me oroi taumattu la kupikupi sso etana.

<sup>14</sup> Me atamana tani ghaa maulue ateva ghauna ia me salane atikirighi masukasukaleaili ia tani usilainia, me karika oroi ila lo atoa la uusilainia.”

*Ai eteae me uene*  
(Luk 6:43-44)

<sup>15</sup> “Am paniem nonga tale propete kamekame atoa. Gheeleiaaira eleka masina nongina sipsipi etoa, me nannaaira elome la nannaa sesa tani ghelei saasakieinam nongina sesa paua ngetapaa tuvui etoa.

<sup>16</sup> Tale ueira aue am kilaila. Karika teva taumattu elaa paapariki ue ngai tale uasa karasa me ue uasa tale ai rorroana.

<sup>17</sup> Tale ie nonga o salana atikirighi, masi ngai eteae ekuukuneaa masi uene, me sesa ngai eteae ekuukuneaa sesa uene.

<sup>18</sup> Masi ngai eteae karika erooroo tani kuneaa sesa ue ngai, me sesa ngai eteae karika erooroo tani kuneaa masi ue ngai,

<sup>19</sup> ta isaa akapaaaili ai karika ekuukuneaa masi uene la tuetuea katuu me la veluvelu sae tale kuraa.

<sup>20</sup> Am roo tani tara kila va see ila propete kamekame atoa tale gheeleiaaira, nongina am kilakila ai eteae tale uenenna.

*Karika akilakiaiem*  
(Luk 13:25-27)

<sup>21</sup> “Karika isaa akapa taumattu la aseaseaghi va, ‘Vau eteva,’ aue la kipi sso tale ararimangali ngepona liu eteva, karika. Ta lo atoa nonga la aimulisi tee gheeleiaane Tamaghi etokatoku epona liu aue la kipi sso tale ararimangali ngepona liu eteva.

<sup>22</sup> Oroi ila lo atoa aue la mae etaghi tale airuuruu eteva nau, aue la ue etaghi va, ‘Vau eteva, Vau eteva, karika va ami ghe aauliaa inangarina God tale ararim ateae, me ami ghe tiutiu velu raroai etoa tale ararim ateae, me ami ghe gheelei oroeiili voto atoa sarasarakana ila laghe lutulutu tale ararim ateae?’

<sup>23</sup> Me aue aliu etaira va, ‘Karika akilakilaem. Am kasu emasalikaala, tau nigheli ssavoto am!’ ”

*Ghalua ase nighelei ale*  
(Luk 6:47-49)

<sup>24</sup> “See ila lo atoa la nonganongo inangarighi me la uusilaa, ila nongina taumattu ngateva alomasaanga ia, ghe atulula alena ateva epona tale atu.

<sup>25</sup> Nau eteva vaao ateva ghe sio mae, me ateo ghe akalala, me kuukuu eteva ghe lutula, laghe tongue poila ale ateva, ale ateva karika ghe katuula, poli ie tale atu korokorongan.

<sup>26</sup> Me see ila lo atoa la nonganongo inangarighi me karika la uusilaa, ila nongina alo kapakapa ateva tana taumattu ghe atulula alena ateva tale rira.

<sup>27</sup> Nau eteva vaao ateva ghe sio mae, me ateo ghe akalala, me kuukuu eteva ghe mae sio, laghe gheleila ale ateva ghe katuula, me namungaili kaakatungaane.”

<sup>28</sup> Nau eteva Iesu ghe ruula tani auliaa isaa o voto, taumattu ngatoa laghe soghiaala llo ghe apasungaala,

<sup>29</sup> poli karika ghe aippooaa nongina tau ngai aapasunga ngatoa tale inangari nipaopao, ta nongina taumattu ngateva matuutulienia ia.

## 8

*Iesu ghe ghelei emasinala tasussuku eteva*  
(Mak 1:40-45; Luk 5:12-16)

<sup>1</sup> Nau Iesu ghe kkureaala tale motouru eteva, taumattu ngatoa oroeiili ila laghe usiela.

<sup>2</sup> Me taumattu ngateva, tasussukuna ia, ghe mae sio ta Iesu, me ghe suuiala ta liue kkena Iesu me ghe uela va, “Vau eteva, arova ualoanna, urooroo tani ghelei eraarangisanaieghi ta mata God.”

<sup>3</sup> Iesu ghe ssuualia nimane me ghe tulielu, me ghe uela etana va, “Aghaloanna; angu raarangisana.” Me gharavaea nonga ta ghe raarangisanala.

<sup>4</sup> Me Iesu ghe uela etana va, “Urau mene auliaa ta teva voto elutula etam. Ulaa me ulaa

**7:15:** Mat 24:24; Apos 20:29; 2 Pita 2:1.    **7:16:** Gal 5:19-22; Jms 3:12.    **7:19:** Mat 3:10; Luk 3:9; Jon 15:6.    **7:20:**

Mat 12:33.    **7:21:** Luk 6:46; Jms 1:25.    **7:23:** Sams 6:8; 2 Tim 2:19.    **7:29:** Mak 1:22; Luk 4:32.    **8:4:** Lev 14:1-32; Mat 9:30; Luk 17:14.

ghapasungainio ta pristi eteva, me ughelei aiaavusuvusuena tani apasunga va vilikim ange raarangisanala, nongina Moses ghe auliaala. Me taumattu ngatoa aue la kila va angu raarangisanala.”

*Iesu ghe ghelei emasinala kapuna tau ngai nonganongo anna ateva kateva namuu nge Rom*

<sup>5</sup> Nau eteva Iesu ghe ssola tale masaliki eteae eKapenium, kateva namuu ghe aaitoiaa kateva ai (100) tau ngai uvii ghe mae sio tani kolomia. <sup>6</sup> Ghe ue va, “Vau eteva, kapughu tau ngai nonganongo anna ateva ange karakanna alokoila elo ale, karika erooroo tani kasukasus, me vilikina atoa la mammarihana atingina.”

<sup>7</sup> Iesu ghe uela etana va, “Aghi aue alaa ghelei emasinala.”

<sup>8</sup> Namu ngateva ghe liula etana va, “Vau eteva, karika masina ieghi va umae tanganueghi. Unim aippooaa me kapughu tau ngai nonganongo anna ateva emasinala.

<sup>9</sup> Aghi tee auungu ta namu ngatoa, me aghaaitoiaa katoa tani tau ngai uvii. Nau eteva aue ta kateva va, ‘Lao sio,’ elao, me aue ta kateva va, ‘Mae sio,’ emaemae. Me aghaauliaa ta kapughu tau ngai nonganongo anna ateva va, ‘Gheleila voto toko,’ egheeghelei.”

<sup>10</sup> Nau eteva Iesu ghe nongola issaa o voto, ghe soghiala me ghe uela ta lo atoa laghe usiusia va, “Aghaaulia ngakoronna etaimim va karika aghe tara poi teva taumattu eIsrael kanna niaikaiaa namuu nongina lo ateva oia taumattu.

<sup>11</sup> Aghaauliaa etaimim va oroi ila lo atoa aue la mae akapa see tale kosa ateva oia, tani toka tee Abraham, Aisiki me Jekop tani namanama, tale ararimangali ngepona liu eteva.

<sup>12</sup> Me lo atoa alsraeli ila laghe annaa va aue la kupi sso tale ararimangali eteva, me karika, ta aue la vella ghoa tale kinatama saurrom ateva, me aue la ghoa toka ngangngala me la aingeresia ngalungaluira.”

<sup>13</sup> Me Iesu ghe uela ta namu ngateva oia va, “Lao sio elo ale, voto aue elutu nongina angu aikaiaiaa.” Me gharavaea ta tau ngai nonganongo anna ateva ghe masinala.

*Iesu ghe ghelei emasinala oroi taumattu*

(Mak 1:29-34; Luk 4:38-41)

<sup>14</sup> Nau eteva Iesu ghe rekatala tanganue Pita, ghe tarala alumuna vause ateva Pita ghe asoaso tale komo, me vilikina ghe aanasa me matana ghe valavalanga.

<sup>15</sup> Iesu ghe posola nimane, me mata valavalanga ateva ghe kapala, me ghe totu saela me ghe kaisilia anna inana.

<sup>16</sup> Nau sinaka ateva ang ghe suusuu me oroeili ila lo atoa raroai etoa laghe tokatoka etaira, laghe maeainila sio etana va eghelei emasinala, ghe nim aippooaa me raroai etoa laghe kupikupi ghoa, me ghe gheeghelei emasinala tee tau sessa akapa atoa.

<sup>17</sup> Isaa o voto ghe akauerekatila llo voto propete Aisaea ghe auliaala,  
“Ia ghe ghaala kaluita saghuighuina,  
me ghe saula kaluita sessa.”

*Nitootoonga aue emae etam nau eteva uaimulisi tee Iesu*

(Luk 9:57-62)

<sup>18</sup> Nau eteva Iesu ghe tarala taumattu ngatoa angila ghe oroeili, ghe uela ta kapuna atoa va, “Ita kasu, ita lao ta pai kativilau.”

<sup>19</sup> Angila ghe aloanna tani kasu, me tau ngai aapasunga ateva tale inangari nipaopao ghe mae sio, me ghe uela etana va, “Tisa, aghaloanna tani usio nongina eaa ulao.”

<sup>20</sup> Vara me Iesu ghe uela etana va, “Paua atoa aleira tale pake valienga, me ghila atoa aleira manee, me Natuna ateva Taumattu ngateva karika teva alena tani aso.”

<sup>21</sup> Mene kateva tana kapuna disaepolo ghe uela etana va, “Vau eteva, tau velueghila me alaa kaiaa mua tamaghi.”

<sup>22</sup> Iesu ghe uela etana va, “Usieghila me ratila lo atoa matena ila la kaiaa matena atoa.”

*Ttasi kuukuu eteva ghe kapala*

(Mak 4:35-41; Luk 8:22-25)

<sup>23</sup> Iesu ghe aikaaila tale paanaka ateva me kapuna disaepolo atoa laghe usiela, me laghe tiu ghoala.

<sup>24</sup> Elome tale ateo talia ngateae, paka kuukuu ttasi eteva ghe lutula. Paka kotoo atoa laghe aasuu kaakaai tale paanaka ateva, me Iesu ghe asekuanue alokoila.

<sup>25</sup> Disaepolo atoa laghe anguniela, me laghe ue etana va, “Vau eteva, sausiemamilia! Angita vuuvuluu!”

<sup>26</sup> Iesu ghe liula inangariira, me ghe uela etaira va, “Vaalua me am maamatautu,

ghaunaaili aikaaiiaaimim?" Ghe tingina saela me ghe paola kuukuu ttasi eteva tale ateo talia ngateae, me kinatama luei eteva ghe asola.

<sup>27</sup> Taumattu ngatoa tale paanaka ateva, laghe soghiaala me laghe ue va, "Saa taumattu ia taumattu ngateva oia, ta ttasi eteva me paamanu eteva la nonganongo usilainia?"

*Iesu ghe ghelei emasinala tau raroai elua  
(Mak 5:1-20; Luk 8:26-39)*

<sup>28</sup> Nau eteva Iesu ghe laa rekata sio tale pai kativilau, tale kosaira aGadara\* ngatoa, me ghe sousoula taumattu ngalua lalu ghe kasula tale liu niaikkaiaa, raroai etoa laghe tokatoka etairarua. Taumattu ngatoa karika laghe laolao akalakalaa etairarua poli lalu ghe aaiuvii.

<sup>29</sup> Lalu ghe aaore me lalu ghe ue va, "Sa ateva ualoannaia etaimami, Natuna ateva God? Vaalua me umae sio tani ghelei saasakieinamami me karika ghe ghaa nau?"

<sup>30</sup> Mala masau nongina laghe tiitingina, tinaua mosu etingiu ghe tingina namanama.

<sup>31</sup> Raroai etoa laghe kolomi esasaraskanala Iesu va, "Arova utiu veluemami, usuu tauemami lao ta mosu etoa."

<sup>32</sup> Me ghe uela etaira va, "Am lao sio." Laghe kipi vulu ghoala taumattu ngalua me laghe laa sae kupi sso ta mosu etoa. Me tinaua atingiu ghe titroula, me laghe ilou velu siola tale vallae me laghe aoso velu siola tapaa manu me ghe arropi ematelala.

<sup>33</sup> Lo atoa laghe aaitaraa mosu etoa laghe iloula, me laghe lao sio tale masaliki eteae, me laghe kiukiuaa ngakapala kiukiuirarua.

<sup>34</sup> Nau eteva taumattu ngatoa tale ia o masaliki taatara ateae laghe nongola kiuki, ila akapa laghe mae sio tani sou Iesu me laghe aulia ngasaraskanala ta Iesu va karika emene toka tale masalikiira ateae.

## 9

*Iesu ghe ghelei emasinala  
taumattu ngateva karakanna ia  
(Mak 5:1-20; Luk 8:26-39)*

<sup>1</sup> Iesu ghe aikaai ghoala tale paanaka ateva, me laghe lao sio tale pai kativilau, me laghe rekatala tale masalikina ateae.

<sup>2</sup> Katoa taumattu laghe maeaa sio taumattu ngateva karakanna ia, me ghe asoaso tale komo atiulu. Nau eteva Iesu ghe tarala uneira niaikkaiaa, me ghe uela etana va "Urau mene annaa, natughu, kalum ssavoto ange kapala."

<sup>3</sup> Katoa tana tau ngai aapasunga tale inangari nipaopao laghe tingina nannaa me laghe aippooaa elome etaira va, "Ierai oia ange ghaala liuna ateva God."

<sup>4</sup> Iesu ghe kilala nannaaира me ghe uela va, "Vaalua me ninannaa sesa etokatoka tale urunguitaniimim?

<sup>5</sup> Eaa teva voto malumina tani auliaa, tani ue va, 'Kalum ssavoto ange kapala,' o tani ue va, 'Tingina saela me ukasuu'?

<sup>6</sup> Me aghaaloanna va am tara kila, va Natuna ateva Taumattu ngateva matuutulienia teeia tani kkaluaa ssavoto tale kosa ateva." Me ghe uela ta taumattu ngateva karakanna ia va, "Tingina saela, me usau komom, me ulao tangantuem."

<sup>7</sup> Me ia o taumattu ngateva ghe tingina saela me ghe lao sio tangantuena.

<sup>8</sup> Nau eteva taumattu ngatoa laghe tarala isaa o voto, laghe soghiaala me laghe tau saela God, poli ghe tau lao sio matuutulienia tale taumattu ngatoa.

*Iesu ghe kolola Matiu  
(Mak 2:13-17; Luk 5:27-32)*

<sup>9</sup> Nau Iesu ghe kasukasu elao la me ghe tarala taumattu ngateva ararina ateae ta Matiu, ghe tokatoka tale natu ngale arighi aighaa takis ia me Iesu ghe uela etana va, "Mae usieghi," me Matiu ghe tingina saela me ghe usiela.

<sup>10</sup> Nau eteva Iesu ghe namanama tangantu Matiu, oroieli tau ngai ghaa takis atoa me tau ssavoto atoa laghe mae sio tani namanama teeia, me kapuna disaepolo atoa.

<sup>11</sup> Nau eteva Paresi etoa laghe tarala isaa o voto, laghe kookolomi kapuna disaepolo atoa Iesu va, "Vaalua me kapuimim tisa ngateva enamanama tee tau ngai ghaa takis atoa me tau ssavoto atoa?"

<sup>12</sup> Nau Iesu ghe nongola, ghe uela va, "Karika va lo atoa masina ila la anna va dokta etaraila, ta lo atoa nonga isikinna ila.

<sup>13</sup> Me am lao me am laa pae aotu vaalua mallooeana nau Uru ngai Manga ateva

\* **8:28:** aGadara Kasina uru ngai laghe pitila, laghe ue va aGergesa, kasina laghe ue va aGeresa.      **8:29:** Mak 1:24; Luk 4:41.      **9:1:** Mat 4:13.      **9:4:** Luk 9:47; Jon 2:25.      **9:6:** Jon 17:2.      **9:11:** Luk 15:2.      **9:13:** Mat 12:7; Osea 6:6.

eue va, 'Aghi aghaaloanna va am alousiusi tee mene kateva me karika va tani ghelei niaiaavusuvusuena,' poli karika aghe mae sio tani kolo ghulughuluena atoa ta aghe mae sio tani kolo tau ssavoto atoa."

*Laghe kookolomi Iesu tale ninae ateae  
(Mak 2:18-27; Luk 5:33-39)*

<sup>14</sup> Vara me kapuna disaepolo atoa Jon laghe mae sio me laghe kolomila Iesu va, "Vaalua me ami me Paresi etoa ami naenae, me kapum disaepolo atoa karika?"

<sup>15</sup> Iesu ghe liula me ghe uela va, "Kapuna atoa taumattu ngateva ange anna tani lai karika la aalousiusi nau eteva etokatoka teeila. Nau eteva aue emae me la ghaa velu taita ateva, ia o nau eteva aue la vira nae."

<sup>16</sup> "Karika teva eghaaghaa tuku ouna ateva kalio va evabbai pokane ateva aiaasae, ta tuku ouna ateva kalio aue emene ghelei mara ateva tale pokane ateva aiaasae emara anamuu."

<sup>17</sup> Karika teva taumattu etottoli ouna uaeni tale pokane ateva aikaai uaeni. Arova eghelei evalua o, aue ouna uaeni eghelei polaki aikaai uaeni eteva pokane ia, me uaeni eteva aue ekaao me aikaai uaeni eteva aue esesa. Ta la tottoli ouna uaeni tale ouna ateva aikaai uaeni ta ilalua akapa aue lalu masina."

*Vause arighi matena ia me vause ateva isikinna ia  
(Mak 5:21-43; Luk 8:40-56)*

<sup>18</sup> Nau eteva Iesu ghe aaioppoaa nonga me kateva namuu ghe mae sio me ghe suuiala emua etana, me ghe uela va, "Natughu vause arighi ghaviri nonga oia ematela. Mae sio me ulaa saoaa nimam etana me emene sakesake."

<sup>19</sup> Iesu ghe tingina saela me ghe usiela tee me kapuna disaepolo atoa.

<sup>20-21</sup> Vara me vause ateva rae ateva ghe iloueinila tale kasangaulu ghaluae (12) ninamanama, ghe nannaa va, "Arova aghele nim poso unna aiaasae ngeleka ateva koti aue aghele masina." Me ghe lao sio emuli ta Iesu me ghe posola euu tale sama unna aiaasae ngeleka ateva.

<sup>22</sup> Iesu ghe kiriela me ghe taraiela me ghe uela etana va, "Urau mene matautu, natughu. Tale unem niaikaiaa etaghi angu masinala." Tale ia o nau eteva vause ateva o ghe masinala.

<sup>23</sup> Nau eteva Iesu ghe kupi ssola tale alena ateva namu ngateva, ghe tarala lo atoa laghe vuuvuu flut atoa me taumattu ngatoo laghe aalousiusi etingina.

<sup>24</sup> Me ghe uela etaira va, "Am kupi ghoala. Vause arighi karika matena ia ta enim aseasekanua," me laghe tiuala tani kangainia.

<sup>25</sup> Nau eteva taumattu ngatoa laghe kupi ghoala eleka, Iesu ghe kupi ssola me ghe kune siola nimane vause arighi, me ghe totula.

<sup>26</sup> Kiukiuna vause arighi oia ghe kasu ekapa seela tale masaliki tale ia o distriki eteva.

*Iesu ghe ghelei emasinala mata salusalu elua me paavoo ateva*

<sup>27</sup> Nau eteva Iesu ghe mene kasukasu elaoelao, mata salusalu elua lalu ghe usiela, me lalu ghe kolokolo. Lalu ghe ue va, "Io Natuna io Deivit, ualousiusi teeengalua."

<sup>28</sup> Nau eteva ghe kupi ssola tale ale ateva, mata salusalu elua lalu ghe usiela. Me Iesu ghe kolomilaluela va, "Amalu aikaiaa va arooroo tani ghelei emasinaiemalua?"

Lalu ghe liula me lalu ghe uela va, "Ue, vau eteva."

<sup>29</sup> Vara me ghe posola matairaru, me ghe uela va, "Tale uneimalua niaikaiaa, aue amalu taatara."

<sup>30</sup> Me matairaru ghe mene taatarala. Iesu ghe aulia ngakorokoronganala etairaru va, "Karika amalu mene laa kiukiuaa see isaa o voto."

<sup>31</sup> Nau eteva lalu ghe kupi ghoala, lalu ghe kiukiueinie seela tale masaliki etoa.

<sup>32</sup> Nau eteva angilalu ghe kasukasu, me laghe mene maeaa sio taumattu ngateva raroai eteva ghe kupiela me karika ghe rooroo tani sama.

<sup>33</sup> Me nau eteva raroai eteva ghe kupi vulee ghoala, taumattu ngateva paavoo ia ghe samala. Taumattu ngatoo laghe tarala isaa o voto me laghe soghiala, me laghe ue va, "Karika righi voto avalua o ghe lutu eIsrael."

<sup>34</sup> Paresi etoa laghe ue va, "Enim tiutiu velu raroai etoa tale sarasarakaniaane kapuira namu ngateva raroai etoa."

*Tau ngai uuungu etoa malaki ila*

<sup>35</sup> Iesu ghe kasu ekapa seela tale masaliki taatara atoa me tale lutu ghauna masaliki. Ghe aapasunga tale aleira ale nivelu eitauua me ghe poppoona ngaotu masi kiukiu tale ararimangali ngepona liu eteva me ghe gheeghelei emasina isaa akapa asease sessa atoa.

<sup>36</sup> Nau ghe tarala taumattu ngatoa, ghe alousiusi teeilala poli nannaaira maateaili me karika teva taumattu tani sausila me ila nongina sipsipi etoa karika teva aitoiira.

<sup>37</sup> Me ghe uela ta kapuna disaepolo atoa va, “Utana ateva ang ghele matuela, me tau ngai uungu etoa karika oroi ila.

<sup>38</sup> Liuna avalua o, am kolomi sae Vau tale tau ngai mukemuke atoa va emene sungi toa tau ngai mukemuke tani lao tale utana atingiu matuenna ia.”

## 10

*Iesu ghe suula kasangaulu ghalua disaepolo tani laa uungu  
(Mak 3:13-19; Luk 6:12-16)*

<sup>1</sup> Iesu ghe kolo aitauaala kapuna disaepolo kasangaulu ghalua (12), me ghe tau lao sio matuutulienia tani tiu velu raroai etoa me tani ghelei emasina isaa akapa asease sessa atoa.

<sup>2</sup> Arariira toko kasangaulu ghalua (12) apostolo: Aitiutiui eteva ta Saemon (la kolokoloa va Pita) me nengane ta Andru, me Jeimis natuna ia Sebedi, me nengane ta Jon.

<sup>3</sup> Me Pilip me Batolomiu, Tomas me Matiu tau ngai ghaa takis ia, me Jeimis natuna ia Alpeas, me Tadias,

<sup>4</sup> me Saemon laghe aseala va Selot ia, me Jiudas Iskariot (ia auena ghe tau lao Iesu ta nimaira tau ngai ssateena atoa).

*Iesu ghe auliaala inangari tani aimuli tee  
(Mak 6:7-13; Luk 9:1-6)*

<sup>5</sup> Iesu ghe suula isaa oia kasangaulu ghalua, me ghe tau lao sio inangari niloeloe etaira va, “Nau eteva am kasu, am rau mene lao ta tau ngeleka ngatoa, me am rau mene sso tale masalikiira aSameria ngatoa.

<sup>6</sup> Ta am lao ta alsraeli etoa, ila nongina sipsipi etoa laghe rauela.

<sup>7</sup> Nau am lao am ppooa ngavalua toko va, ‘Ararimangali ngepona liu eteva ange aakalakalaa.’

<sup>8</sup> Am ghelei emasina tau sessa atoa, me am totu matena atoa, me am ghelei er-aarangisana tasussukuna atoa, me am tiu velu raroai etoa. Isaa o sarasarakana, aghe nim tau aatu sio, am nim mene taula, me karika am mene ghaa aipolipoli.

<sup>9</sup> Nau eteva am kasu, am rau mene annaa tani ghaa righi viliki veu, golo me silva me kopa.

<sup>10</sup> Am rau mene ghaa aikakkaai tale lo ateva o nikasu, me am rau mene ghaa ghalua aiaasae me aikasukasus, me aikkatulu. Poli emaamasina va tau ngai uungu eteva eghaghhaa anna inana ta lo atoa euungu etaira.

<sup>11</sup> “Arova ngam rekataala tale kateae masaliki, am pae lo ateva taumattu aue emasimasi tani aikoloainam, me am toka teeia, lomasina ta am kasu vuli ia o masaliki eteae.

<sup>12</sup> Nau eteva ngila aloannala va am toka teeila, am ue va, ‘Luei aue etoka etaimim.’

<sup>13</sup> Arova am kupi sso tale aleira masi taumattu ngatoa, am alokoi luei etaira, me arova karika, am mene ghaa oghi niarangise me luei etaira.

<sup>14</sup> Arova toa la tam ghaiem me la tam aloanna tani nongo usilaa inangariimim, am rariaa velu au kosa ateva ta kkeimim nau am kasu vuli ia o ale ateva o masaliki eteae.

<sup>15</sup> Aghaaulia ngakoronna etaimim va, aue nau niaiskei eteva, God aue eapasinga maomaona nimmarikana tale masaliki eteae eSodom me eGomorra, me sesaaili tale ia o masaliki eteae.

<sup>16</sup> Am nongo! Asungsungiem nongina sipsipi etoa elome tale sesa paua ngetapaa tuvui etoa, liuna avalua o me am anguu taatara nongina katu ngateva, me am nongina tee ghila ateva valusu ia karika egheelei righi sesa.

*Sesa nau aue emae  
(Mak 13:9-13; Luk 21:12-17)*

<sup>17</sup> “Am tani taatara amasina poli taumattu ngatoa aue la kuneiem me la laoainam tale aleira ale nivelu eitauua me la uetaem.

<sup>18</sup> Poli mausighi me aue la laoainam ta gavana ngatoa me kingi etoa, me ia o aue emasi nauimim tani aulia ngaotueeghi etaira me ta tau ngeleka ngatoo.

<sup>19</sup> Nau eteva la kuneiem, am rau mene annaa va sa ateva aue am aulieinia me vaalua aue am aippooaa. Ta God aue etau aatu inangari aue am auliaa.

<sup>20</sup> Ta karika va am aue am aippooaa ta aue Spirit Manga ateva kapuna ia Tamaimim ateva aue etau aatu inangari aue am auliaa.

<sup>21</sup> "Taumattu ngatoo aue la tau velu tueira me nengaira atoa ta lo atoa aue la uvi ematala, me tamatama atoa aue la ghelei evalua tee o ta natura atoa. Aliko etoa tee aue la ssa tee tamaira me kinairia atoa, me aue la uvi ematala.

<sup>22</sup> Taumattu ngakapa atoa aue la ssa teeiem poli ararighi eteae. Me see etingina akorokorongana tale unna niaikaaiaa tale airuuruu, maamauluuaane aue esaanga.

<sup>23</sup> Arova la ghelei teeiem tale kateae masaliki, am kasu vulia me am mene lao ppae tale kateae masaliki. Aghaulia ngakoronna va karika aue am ruu masaliki ekapa eisrael me Natuna ateva Taumattu ngateva emae.

<sup>24</sup> "Tau ngai ghaa alomasaanga ateva karika namuu ia ta kapuna tau ngai aapasunga ngateva, me tee tau ngai nonganongo anna ateva karika namuu ia ta vauna ateva.

<sup>25</sup> Tau ngai ghaa alomasaanga ateva erooroo va enongina tau ngai aapasunga ateva, me tau ngai nonganongo anna ateva erooroo va enongina vauna ateva. Arova la aseaghi va aghi Belsibul, namuu ta raroai etoa, aue la tau tee sesa arari etaimim.

*Tani matauta nonga God*

(Luk 12:2-7)

<sup>26</sup> "Ia avalua o me am rau mene matautainila. Karika righi voto am aaituttua va aue etam otu, isaa akapa voto pei niaisulia, aue la kila.

<sup>27</sup> Sa ateva aghaaulieinia eleivoo, am aulieinia ellaa me sa ateva aghaulia ngaghaunaie sso ta talingaimim, am sae tingina tale pungani ngale atoa me am auliaa.

<sup>28</sup> Am rau mene matauta lo atoa la anna tani uvi emateam, ta aue la nim turungi vilikiimim me karika aue la uvi emate maamauluuaaimim. Ta am matauta nonga lo ateva erooroo tani turungi ekapa vilikiimim me maamauluuaaimim eGehenna.

<sup>29</sup> Ghaluepai natu ghila la polipoli tale maketi tale kativilau nonga viliki veu me arova aloannaane God va karika teva emene mate, karika teva erooroo tani mate.

<sup>30</sup> Tee me isaa akapaili uu nguruumim, God ekilakila va ghaisa akapa.

<sup>31</sup> Ia avalua o me urau mene matautu ta maamauluuaam namungaili ta matane God, elaulau ghila atoa.

<sup>32</sup> "See eaulia ngaotu tale taumattu ngatoo tale kosa ateva oia va kapughu ia, aghi tee aue aghaulia ngaotu ta Tamaghi epona liu va ia kapughu ia.

<sup>33</sup> Arova lo ateva uauliaa ta katoa va karika ukilakilaeghi, aue aghauliaa tee ta Tamaghi epona liu va karika akilakilaio.

*Karika aghe maeaa sio luei*

(Luk 12:51-53; 14:26-27)

<sup>34</sup> "Am rau mene annaa va aghe maeaa sio luei tale kosa ateva oia, karika aghe maeaa sio luei ta aghe maeaa sio baenata ateva.

<sup>35</sup> Aghe mae sio tani ghelei va

"taita ateva essa tee tamana ateva,

me vause ateva essa tee kinna ateva  
me vause ateva essa tee alumuna vause ateva.

<sup>36</sup> Tau ngaissanira atoa karika aue la laa kasu emasau ta aue la tani kasu etoka elome tale paa ngaleira aitauua."

<sup>37</sup> "Lo ateva taumattu eaaielousiaa nonga tamane me kinna me natuna taita atoa me natuna vause atoa, me karika eaaielousieinaghi, karika emamasina va kapughu disaepolo ia.

<sup>38</sup> Me lo ateva karika ealona tani sunuki unna aikotoo ateva me eaimuli teeieggi, karika emamasina va kapughu disaepolo ia.

<sup>39</sup> Arova teva easaangi maamauluuaana, aue eraua, me arova eraua ta mausighi aue eghaa maulue ateva.

*Aipolipoli*

(Mak 9:41)

**10:20:** Jon 14:26.    **10:21:** Maeka 7:6; Mat 10:35; Mak 13:12; Luk 21:16.    **10:24:** Luk 6:40; Jon 13:16; 15:20.

**10:25:** Mat 9:34; 12:24; Mak 3:22; Luk 11:15.    **10:26:** Mak 4:22; Luk 8:17.    **10:28:** Jms 4:12; Rom 8:31.    **10:31:**

Mat 6:26.    **10:33:** Mak 8:38; Luk 9:26; 2 Tim 2:12.    **10:35:** Maeka 7:6.    **10:38:** Mat 16:24-25; Mak 8:34-35; Luk

9:23-24; 17:33; Jon 12:25.

<sup>40</sup> “See eghaaghiaiem eghaaghiaieghi, me see eghaaghiaieghi, eghaaghia lo ateva ghe sungieghila.

<sup>41</sup> See eaikoloaa propete ateva poli propete ia aue eghaa aipolipoli nongina propete ateva eghaaghia. Me see eaikoloaa tau ghulughuluena ateva poli tau ghulughuluena ateva kapuna ia God, aue eghaa aipolipolina tau ghulughuluena ateva.

<sup>42</sup> Me arova see etara teva tale isaa oia disaepolo taumattu ngatoa la taatara aloila sio euu, me earopiropi teva ta poli kapughu disaepolo ia, aghaaulia ngakoronna va aue eghaa aipolipoli.”

## 11

*Jon tau ngai aasuu ia ghe suula  
disaepolo atoa tani laa tara Iesu*

(Luk 7:18-35)

<sup>1</sup> Nau Iesu ghe ruula tani apasunga taula voto ta kapuna kasangaulu ghalua (12) disaepolo, ghe kasu vulila ia o voto ateva me ghe mene lao sio tani ppooaa me apasunga tale masaliki taatara atoa eGalilii.

<sup>2</sup> Nau eteva Jon ghe tokatoka tale ale mata voovoo me ghe nongola voto Mesaea ngateva ghe gheelei, me ghe suula kapuna disaepolo atoa

<sup>3</sup> tani laa kolomi Iesu va, “Io ia o taumattu ngateva God ghe uela va aue emae, o aue ami toi mene teva?”

<sup>4</sup> Iesu ghe liula me ghe uela va, “Am oghi lao sio me am laa ghuliaa ta Jon voto am tarala me am nongola.

<sup>5</sup> Mata salusaluna atoa mataira eotila me vereverenna atoa la kasukasula, me lo atoa tasussukuna ila la raarangisanala, me talinga volongo atoa la mene nonganongola, me matena atoa la totula, me llo taumattu karika peina la nongola masi kiukiu.

<sup>6</sup> Me aue emasinaaili ta taumattu ngateva, unna niaiesoaa karika ekaakatuu vuluueghi.”

<sup>7</sup> Nau kapuna disaepolo atoa Jon laghe kasula, me Iesu ang ghe auliaa Jon ta taumattu ngatoa. Ghe ue etaira va, “Sa ateva am ghe lao sio tani taraia tale voto ateva karika righi taumattu etana? Pitpiti eteva ghe kuukueinia?

<sup>8</sup> Arova karika, tani sa ateva am ghe lao sio tani taraia? Teva taumattu ghe molomolu tale masi ghinna? Karika, ta lo atoa la aasae masi ghinna la tokatoka tanganue king.

<sup>9</sup> Tani sa ateva am ghe kasueiniela? Propete ateva? Ue, aghaauliaa etaimim va am ghe tarala propete ateva me emene laulau mene katoa propete.

<sup>10</sup> Ia o taumattu ngateva, Uru ngai Manga ateva ghe auliainiela nau ghe uela va,

“‘Tarala, aue asuu aikasuaa inangarihi eteva emuemueinio,  
me ia aue eaimonomonosiaa ngamuemue alokoi salam.’

<sup>11</sup> Aghaaulia ngakoronna etaimim va elome ta lo atoa laghe lutula tale kosa ateva oia, karika teva erooro ta Jon ia o tau ngai aasuu ia. Me lo ateva karika teae ararina, me iaaili euu tale ararimangali ngepona liu eteva, elaulau Jon.

<sup>12</sup> Ghe tiuala ta nauna Jon tau ngai aasuu ia me ang ghe mae sio ta nauita ghaine, sesa taumattu ngatoa la korokorongana tani sari ararimangali ngepona liu eteva tale nim aloaloannaaira.

<sup>13</sup> Propete akapa atoa me inangari nipaopao laghe aulia ngaotula inangarina God ghe mae ghiaa sio nau ta Jon.

<sup>14</sup> Me arova am aiesoaa inangariira, Jon Elaija ta getana ia o laghe aulia ngamuemua alokoielia va aue emae.

<sup>15</sup> Lo ateva talingane manee tani nongo, aue enongo.

<sup>16</sup> “Sa ateva voto arooro tani auliaa me eaimatoonga taumattu tale lo ateva oia vituu? Ila nonginaaili aliki etoa la tokatoka tale liu nianamisi, katoa la ue lao ta mene lutu katoa va,

<sup>17</sup> “‘Ami ghe vuuvuu kkinari nilai eteae etaimim,  
me karika am ghe lokuloku;  
ami ghe ueei kkinari tani kkinariaa matena atoa,  
me karika am ghe aaloususi.’

<sup>18</sup> Nau Jon ghe mae sio me karika ghe namanama me ghe tam ropiropi, laghe ue teeia va, ‘Raroai eteva ghe tokatoka etana.’

<sup>19</sup> Me Natuna ateva Taumattu ngateva ghe mae sio me ghe namanama me ghe ropiropi, laghe ue teeia va, ‘Tau ninamanama ia, me tau niropi sesa manu ia, kapuira ia aighaa

takis atoa me tau ssavoto atoa.' Me masi ninannaa kanna God eaapasunga va koronna ia tale maamauluuaaira lo atoa la aaimuli teeia."

*Alousiusi ta llo taumattu karika  
la nanna ngaioghioghihaa  
(Luk 10:13-15)*

<sup>20</sup> Iesu ghe sama anamuu teela llo masaliki taatara ghe gheleila oroiannaaili mirikol poli taumattuna karika ghe nna ngaioghioghihaa.

<sup>21</sup> "Aue esesaaili ta ngetam, Korasin, me aue esesaaili ta ngetam, Betsaida! Marova mirikolo oia laghe gheleila eTaer me eSaedon, taumattu ngatoa aue laghe molu tale ghinna nialousiusi me au kura, tani apasunga va ngila ghe oghi vulula sesa gheegheleiaaira.

<sup>22</sup> Aue emaoamaona nimmarikana ta eTaer me eSaedon tale nau niaiskei eteva, me am karika.

<sup>23</sup> Me io, Kapenium? Uannaa va aue usae epona liu? Karika, io aue usioaili euu. Arova isaa o mirikol laghe gheleila etam va laghe gheleila eSodom, isaa oia nau Sodom ie tokatoka.

<sup>24</sup> Aghaauliaa etam va nau eteva God aue eghelei niaiskei, voto Sodom eghaa aue emala masina me io aue sesaaili."

*Niainoana ta Iesu  
(Luk 10:21-22)*

<sup>25</sup> Ia o nau eteva Iesu ghe uela va, "Atautauo sae Tamaghi, Vau ngepona liu io me kosa ateva, poli ughe aisiaulaala isaa o voto tale lo atoa nannaaira masina me lo atoa alomasaangaili ila me ughe aulia ngaotula ta lutu ngaliki etoa.

<sup>26</sup> Ue Tamaghi, ugheelei isaa o voto tani aimuli tee masi aaloannaam.

<sup>27</sup> "Isaa akapa voto Tamaghi ghe atokala ta nimaghi, me karika teva ekilakila Natuna ta Tamana nonga. Me karika teva ekilakila Tamaghi ta Natuna nonga, me lo atoa Natuna ghe apasungaala Tamane etaira tale aloaloannaane.

<sup>28</sup> "Am mae etaghi, lo atoa ngam maamango poli am sausau llo maate, me aue atau aatu niainoana etaimim.

<sup>29</sup> Am aimuli teeieghi me am ghaa alomasaanga etaghi me am uungu etaghi nongina vulumakao ateva euungu ta vauna ateva, poli aghi saghuighuina gheeleiaaghi me asiosiuua nannaaghi me maamaulueaimim aue eghaa niainoana. <sup>30</sup> Poli gheeleiaaghi karika masukasukale me llo aue atau aatu karika maate."

## 12

*Vau tale nau manga ateva  
(Mak 2:23-28; Luk 6:1-5)*

<sup>1</sup> Nau eteva o Iesu ghe kasu longotila tale utani uiti etingiu, tale nau manga ateva, kapuna disaepolo atoa laghe maamaloo, liuna avalua o me laghe ghaala kasina tani uiti me laghe tiuala tani gholu.

<sup>2</sup> Nau Paresi etoa laghe tarailala laghe uela etana va, "Tarala! Kapum disaepolo atoa la gheelei voto karika masina tani ghelei tale nau manga ateva."

<sup>3</sup> Iesu ghe liula me ghe uela etaira va, "Koti karika am ghe ritila llo Deivit me kapuna atoa laghe gheleila nau laghe maamaloo?

<sup>4</sup> Vaalua ghe ssola, ia me kapuna atoa, tale alena ateva God me laghe ghaala verete laghe amangala, pristi etoa nonga la rooroo tani nama, me laghe namala.

<sup>5</sup> Me karika am ghe ritila tale inangari nipaopao eue va karika sesa arongona ta pristi etoa la uungu tale ale manga ateva ta nau manga ateva tani ghelei aiaavusuvusuena?

<sup>6</sup> Aghaauliaa etaimim va lo ateva matuutulienaa uunguaane, me enaanamuu vulu ale manga ateva ia oia tale ale manga ateva.

<sup>7</sup> Karika am ghe kilala malloeana isaa o inangari va, 'Aghi aghaaloanna va am alousiusi tee mene kateva me karika va tani ghelei niaiaavusuvusuena.' Liuna avalua o me am ghe nim uela va sesa ila lo atoa karika righi sesa etaira.

<sup>8</sup> Poli Natuna ateva Taumattu ngateva Vau ia tale nau manga ateva."

**11:21:** Ais 23:1-18; Esik 26:1-21; 27:1-36; 28:1-26; Joel 3:4-8; Eimos 1:9-10; Sek 9:2-4.      **11:23:** Ais 14:13-15; Aitiutiu 19:24-28.      **11:24:** Mat 10:15; Luk 10:12.      **11:25:** 1 Ko 1:26-29.      **11:27:** Mat 28:18; Jon 3:35; 17:2; 1:18; 10:15.

**11:28:** Jer 31:25.      **11:30:** 1 Jon 5:3.      **12:1:** Diut 23:25.      **12:2:** Eks 20:10.      **12:3:** 1 Sam 21:1-6.      **12:4:** Lev 24:5-9.      **12:5:** Nam 28:9-10.      **12:6:** Mat 12:41-42.      **12:7:** Osea 6:6; Mat 9:13.

*Iesu ghe ghelei emasinala taumattu  
ngateva katelange nimane matena ia  
ta nau manga*

(Mak 3:1-6; Luk 6:6-11)

<sup>9</sup> Iesu ghe kasu vulila ia o masaliki eteae me ghe mene lao sio tale kateae masaliki me ghe kupi ssola tale aleira ale nivelu eitaua ngateva.

<sup>10</sup> Taumattu ngateva, katelange nimane matena ia, ghe tokatoka me laghe kolomila Iesu va, "Uneita inangari nipaopao eue va masina tani ghelei emasina ta nau manga ateva?" Poli laghe paepae salana tani laoaa Iesu tale niaisakei.

<sup>11</sup> Me Iesu ghe uela etaira va, "Arova teva etaimim teva kiena sipsipi ghelei katuu velu sio tale teva liu ta nau manga ateva, karika aue ughele laa ghaiae sio?

<sup>12</sup> God aloaloannaane tale taumattu elaulau sipsipi eteva! Liuna avalua o me masina tani ghelei masi voto ta nau manga ateva."

<sup>13</sup> Me ghe uela ta ia o taumattu ngateva va, "Korosila nimam atelange." Me ghe korosila me nimane atelange ghe masinala nongina mene katelange.

<sup>14</sup> Paresi etoa laghe kasula tani laa loe salana vaalua tani uvi emate Iesu.

*Kapuna tau ngai nonganongo anna ateva God*

<sup>15</sup> Iesu ghe kilala sa ateva Paresi etoa laghe aloanna tani gheleia. Liuna avalua o me ghe kasu vulila ia o masaliki eteae. Oroienaa taurattu ghe usiela me ghe ghelei emasinalaila tale aneira isiki.

<sup>16</sup> Iesu ghe aaulia ngakorokorongana ta ngetairya ya la rau mene laa ghaotu va ia see.

<sup>17</sup> Voto o ghe gheleila inangarina propete ateva Aisaea ghe kaurekatila, ghe uela va,  
<sup>18</sup> "Ia oia kapughu tau ngai nonganongo anna ateva, aghi aghe suitoongainiela,

me aghaaelousiangailia, me nannaaghi emaamasinaaili ta polina;  
me aue aghatoka kalughu Spiriti eteva etana.

Me aue eaulia ngaotu voto ghulughuluena tale patunganue akapa atoa.

<sup>19</sup> Karika aue eaissakeana me esama anamungaili ta tummatavanga.

<sup>20</sup> Aue eghelei voto masina tale taumattu saghuihuiena,

me karika aue eghelei saasakiaa ta lo atoa karika sarasarakanila ila.

Aue eghelei isaa o voto lomosina ta llo masina eapala llo sesa.

<sup>21</sup> Patunganua akapa atoa aue la ghatoka tuutuliira tale ararina atea."

*Laghe ue va Iesu ghe uungu tee Belsibul*

(Mak 3:20-30; Luk 11:14-23; 12:10)

<sup>22</sup> Laghe maeaa sio taumattu ngateva raroai eteva ghe tokatoka etana me tee mata salusulu ia me paavoo ia. Iesu ghe ghelei emasinalia me ghe samala me ghe taatarala.

<sup>23</sup> Me taumattu ngatoa laghe soghiaala voto ghe gheleila me laghe aikolomieinila va, "Koti taumattu ngateva oia natuna ia Deivit, va?"

<sup>24</sup> Nau Paresi etoa laghe nongola laghe uela va, "Tale sarasarakaniaane Belsibul, kapuira namu ngateva raroai etoa, me egheelei isaa o voto tani tiu velu raroai tale taumattu."

<sup>25</sup> Iesu ghe kilala nannaairia me ghe uela etaira va, "Arova masaliki eteae eaipola, karika que etoka amasina, me lo atea masaliki taatara o ale eaipola karika erooroo tani tingina akorokorongana.

<sup>26</sup> Arova Satana emene tiutiu velu Satana, aue eaipola, o vaalua ararimangalina ateva aue etingina?

<sup>27</sup> Me arova atiutiu velu raroai tale ararina atea Belsibul, kapuim atoa tani taumattu laghe tiutiu velu raroai tale ararina atea see? Ila aue la ghele aulaa va inangari am aulaa kamena.

<sup>28</sup> Me arova atiutiu velu raroai tale Spiriti eteva kannia ia God, eaapasunga va ararimangalina ateva God ang ghe mae sio ta ngetaimim.

<sup>29</sup> "Vaalua aue ugħha peina sarasarakaniaane ateva taumattu tanganuena? Arova ugħe iria mua, aue ugħelegħi roo tani għha peina.

<sup>30</sup> "Lo ateva karika kapughu ia, tau ngai ssateegħi ia, me lo ateva karika esaasausieegħi tani atoka aitaua, ia etani aatoka apolapola.

<sup>31</sup> Liuna avalua o me aghħa aulaa etaimim va God aue ekkaluaa isaa akapa ssavoto me inangari taumattu eaauliaa saasakiaa, me lo ateva eauliaa saasakiaa tale Spiriti eteva, God karika aue ekkaluaa.

<sup>32</sup> Lo ateva eauliaa saasakiaa tee Natuna ateva Taumattu ngateva, God aue ekkaluaa kanna ssavoto, me lo ateva taumattu eauliaa saasakiaa tee Spirit Manga ateva, God karika aue ekkaluaa, tale nau oia me nau ngemuli.

*Sesa ngai eteae ekuukuneaa uene sesa  
(Luk 6:43-45)*

<sup>33</sup> "Arova uue va ai eteae masina ia, utani ue tee va uenena masina. Me arova uue va ai eteae sesa ia, utani ue tee va uenena sesa. Poli ai eteae la kilakila maamasinaane me sesaane tale uenena.

<sup>34</sup> Am nongina natuira iem katu ngatoa, vaalua aue am auliaa masi voto nau eteva sesa taumattu ngam? Taumattu ngateva epoppoaa voto ekasukasu tale urunguitanina ateva.

<sup>35</sup> Masi taumattu ngateva etautau mae masi voto ekaakaai elome etana, me sesa taumattu ngateva etautau mae sesa voto ekaakaai elome etana.

<sup>36</sup> Aghaauliaa etaimim va tale nau niaiskei eteva, taumattu ngatoa aue la ghauliaa ta God asease inangari laghe nim poppooaa.

<sup>37</sup> Poli tale inangarim God aue ekolo va masi taumattu io o sesa taumattu io."

*Paresi etoa laghe kokkolomi Iesu va eghelei righi niaimatoonga  
(Mak 8:11-12; Luk 11:29-32)*

<sup>38</sup> Me Paresi etoa me tau ngai aapasunga tale inangari nipaopao atoa laghe uela ta Iesu va, "Tisa, ami anna tani tara righi niaimatoonga ughelei."

<sup>39</sup> Iesu ghe liula me ghe uela etaira va, "Sesa taumattu ngam me karika am uusilaa aloannaane God, me am anna tani tara niaimatoonga. Saa ghe lutu teela propete ateva ta Jona, ie nonga o niaimatootoongana ateva aue elutu.

<sup>40</sup> Nongina Jona ghe asola elome tale kova kko ateva kotolu llaa me kotolu voo, Natuna tee ateva Taumattu ngateva aue easo tale urunguitani kosa ateva kotolu llaa me kotolu voo.

<sup>41</sup> Aue taumattu nge Ninive atoa la tingina tale niaiskei eitauaa teeiem, me la ue va sesa am, poli aNinive atoa laghe nna ngaioghiogliaala, nau Jona ghe poppooaa etaira, me ia oia, lo ateva namuu ia ta Jona ange toka teeiemla.

<sup>42</sup> Tale nau niaiskei, aue Kuin nge Saot ateva etingina tee lo ateva oia vituu, me aue eue va sesa am, poli Kuin ateva ghe kasu emasaueiliila tani mae nongo alomasaanganiaane Solomon, me lo ateva taumattu namuu ia ta Solomon ange toka teeiemla.

*Nau sesa spiriti eteva emene kiikiriaa mae  
(Luk 11:24-26)*

<sup>43</sup> "Nau eteva sesa spiriti eteva ekupikupi ghoa tale taumattu ngateva, ekasukasu tale woto mallangona tani pae niainoana me nau etam tara

<sup>44</sup> eue va, 'Amene kiri lao tale ale ateva aghe kasu vuliela.' Nau elaa reerekata me etaatara va ale ateva karika toa etana me kaakalaa ngaraarangisana ia me elome masina tani toka etana.

<sup>45</sup> Me emene kasu, tani laa kolo ghaitu (7) sesa spiriti gheeleiaaira mene sesaaili. Me la kopi sso, me la sso tokatoka tale ale ateva. Gheeleiaane aue esesaaili, aue elau isaa akasina. Lo ateva oia vituu aue eghelei evalua o."

*Kinna me nengane atoa Iesu  
(Mak 3:31-35; Luk 8:19-21)*

<sup>46</sup> Nau Iesu ghe samasama tee taumattu ngatoa, kinna me nengane atoa laghe tiitingina eleka, laghe aloanna tani sama teeia.

<sup>47</sup> Kateva taumattu ghe auliaala etana va, "Kinam me nengam taita atoa eleka, la ghanna tani sama teeio."

<sup>48</sup> Iesu ghe liula me ghe uela etana va, "See ia kinaghi me see ila nengaghi etoa?"

<sup>49</sup> Ghe suisui lao kapuna disaepolo atoa me ghe ue va, "Kinaghi me nengaghi etoa o.

<sup>50</sup> Lo ateva egheelei aloannaane Tamaghi epona liu, nengaghi ia me kapughu vause ia me kinaghi ia."

## 13

*Kiukiu niaimatoonga tale  
tau ngai pasa katu ue ngai eteva  
(Mak 4:1-20; Luk 8:4-15)*

<sup>1</sup> Ia nonga o nau eteva me Iesu ghe kupi ghoala tale ale ateva me ghe lao sio tani toka tale sama ateo talia ngateae.

<sup>2</sup> Oroiannaaili taumattu ghe mae sio ta ngetana, mausina avalua o me ghe saesaela tale paanaka ateva me ghe tokala etana me taumattu ngatoa laghe tiitingina elo samarra.

<sup>3</sup> Ghe ppooaala oroiannaaili voto tale kiukiu niaimatoonga. Ghe uela va, "Am nongola! Tau ngai pasa katu ue ngai eteva ghe kasula tani pasa aina katu ue ngai. <sup>4</sup> Nau eteva ghe kaokaoala katu ue ngai, kasina ghe katuula tapaa salana me ghila atoa laghe mae sio tani nama.

<sup>5</sup> Kasina ghe katuula tale voto ateva sakolo ia, karika oroi kosa me arovaeeata nonga ta ghe pinosala, poli karika lluse ia.

<sup>6</sup> Me nau sinaka ateva ghe saela ghe sinaki ematelala. Laghe matela poli oane karika ghe sio liula ta eeu atu ia.

<sup>7</sup> Kasina katu ue ngai ghe katuula elome tale uasa karasa. Laghe pinosala me uasa karasa ateva ghe kavilli ematelala.

<sup>8</sup> Me kasina katu ue ngai ghe katuula tale masi kosa me laghe kuneaala ueira, kasina ghe kuneaala kateva ai (100), kasina ghe kuneaala ghaonomongaulu (60), me kasina kotolungaulu (30).

<sup>9</sup> Lo ateva talingane manee tani nongo, aue enongo."

<sup>10</sup> Disaepolo atoa laghe mae sio ta Iesu me laghe kolomiela va, "Vaalua me upoppooaa kiukiu niaimatoonga ta taumattu ngatoo?"

<sup>11</sup> Iesu ghe liula me ghe uela etaira va, "Alomasaanga tale voto eaaisulia tale ararimangali ngepona liu eteva, God ghe tau aatu etaimim, me ila karika.

<sup>12</sup> See righi voto etana, aue God emene taula me aue eghaa oroi voto, me lo ateva karika righi voto etana aue eghaa velu righi lutu voto etana.

<sup>13</sup> Liuna avalua o me aghaaauliaa voto etaira tale kiukiu niaimatoonga:  
"Arongona ta la taatara me karika aue la tara kila,

me arongona ta la nongonongo me karika aue la nongo me aloira emasaanga.

<sup>14</sup> Ta ngetairaa me llo Aisaea ghe aulia ngamuemua alokoila aue ekaurekati. Ghe uela va,  
"Aue am nongo me karika aue am kila;  
aue am tara me karika aue am alomasaanga tee.

<sup>15</sup> Urunguitaniira aue ekorokorongan,  
me talingaira aue evolovolongina tani nongo,  
me laghe akou rungaala mataira va karika la mene taatara.

Ta la rau tara nonga ta mataira,  
me la nongo ta talingaira,  
va la kila ta urunguitaniira,  
me la kiri mae va aghelei emasinaila.'

<sup>16</sup> Me am, niarangise etaimim, poli mataimim etaatara me talingaimim enonganongo.

<sup>17</sup> Aghaaulia ngakoronna etaimim va oroi ila propete atoa me taumattu ghulughuluena laghe aloannaaili tani tara voto am taatara ghaine, me karika laghe tarala, me tani nongo voto am nongonongo ghaine, me karika laghe nongola.

<sup>18</sup> "Am nongo malloeanina kiukiu niaimatoongana ataeae ta tau ngai pasa katu ue ngai eteva:

<sup>19</sup> Arova lo ateva enonganongo inangarina ararimangali eteva epona liu me alona etam maamasaangania, sesa taumattu ngateva eghaaghaa velu voto tau ngai pasa katu ue ngai eteva epasapasa tale urunguitanina ateva. Nongina katu ue ngai ghe katuula tapaa salana.

<sup>20</sup> Me llo katu ue ngai ghe katuula tale voto ateva sakolo ia, nongina taumattu ngateva enonganongo inangari me arovaeeata ta eghaaghaa me emasimi etingina.

<sup>21</sup> Me poli karika righi oane, karika etiitingina liu nau eteva sesa nau me niaiuviil elutulutu teeia mausi inangarina God, me arovaeeata ta ekaakatuu.

<sup>22</sup> Me llo katu ue ngai ghe katuula elome tale uasa karasa nongina taumattu ngateva enonganongo inangari me enannangaili voto kamena tale kosa ateva oia me ealoannaaili va isaa oia voto aue egheleia va etue peipeiena, me ekakkaluua inangari tale ararimangali eteva. Liuna avalua o me karika righi uene.

<sup>23</sup> Me llo katu ue ngai ghe katuula tale masi kosa nongina taumattu ngateva enonganongo inangari me alona emaamasaanga ekuukuneaa uene, kasina kateva ai (100), kasina ghaonomongaulu (60), me kasina kotolungaulu (30) oroiaane elaulau llo laghe pasa akasinala."

*Kiukiu niaimatoonga eauliaa ssa tuvui eteva*

<sup>24</sup> Iesu ghe mene auliaala kateae kiukiu niaimatoonga. Ghe uela va, "Ararimangali ngepona liu eteva nongina taumattu ngateva ghe pasala katu ue ngai masina tale utana atingiu.

<sup>25</sup> Me vara taumattu ngakapa atoa laghe lao sio tani asekanua, me tau ngai ssateena ateva ghe mae sio tani pasa ssa tuvui eteva elome tale katu uit, me ghe kasula.

<sup>26</sup> Nau eteva katu uit ghe pinosala me ghe kuneala uenenna, ssa tuvui tee ateva ghe pinosala teelilala.

<sup>27</sup> "Me kapuna tau ngai nonganongo anna atoa laghe lao sio me laghe uela ta tau ngumane va, 'Vau eteva, ami annaa va ughe vella nonga katu uit tale umam utana atingiu, me vaalua ssa tuvui eteva ghe pinosala?'

<sup>28</sup> "Ghe liula me ghe uela va, 'Tau ngai ssateeghi eteva ghe kaokaoaala.'

"Me tau ngai nonganongo anna atoa laghe kolomiela va, 'Uanna va ami laa muke velu?'

<sup>29</sup> "Ghe uela va, 'Karika. Am rau mukemuke velu ssa tuvui etoa, va am muke velu tee uit.'

<sup>30</sup> Am tau vellaluela me lalu sae aitauaa me elaa ghaa nau nisai uit. Ia o nau eteva aue aghauliaa ta lo atoa la sai uit tani ghaa akasina ssa tuvui etoa me la iri eitaeinila me pei nitungiaa me la ghaa aitauaa uit me aue la laa ghatoka tale aleghie ale niginana ateva."

*Kiukiu niaimatoonga atae tale*

*katu ue ngai erighi (mastet)*

(Mak 4:30-32; Luk 13:18-19)

<sup>31</sup> Ghe mene auliaala kateae kiukiu niaimatoonga. Ghe uela va, "Ararimangali ngepona liu eteva nongina katu ue ngai erighi la kolokoloa va mastet, taumattu ngateva ghe ghiaielaa, me ghe lao sio tani pasaia tapaa ngutana.

<sup>32</sup> Arongona ta ghaunaaili ia tale isaa akapaaili katu ue ngai me nau epiipinosa, enaanamuul vulu ekapa isaa akapa ai laghe pasala eutana. Me ia oia ai eteae ghila atoa la looloo la mae tokatoka tale laangina."

*Kiukiu niaimatoonga tale isti eteva*

(Luk 13:20-21)

<sup>33</sup> Me ghe mene auliaala kateae kiukiu niaimatoonga. Ghe uela va, "Ararimangali ngepona liu eteva nonginaaili isti eteva vause ateva ghe ghiaielaa me ghe ghelei eitauaa teela palaoa orioieili lomosi ta palaoa ngateva ghe rrangala."

<sup>34</sup> Iesu ghe aauliaa isaa akapa o voto ta taumattu ngatoa tale kiukiu niaimatoonga. Karika ghe aaulia ngamasalika teva voto ta ghe aauliaa nonga tale kiukiu niaimatoonga.

<sup>35</sup> Mausina avalua o me llo propete ateva ghe auliaala ghe kaurekatila. Ghe uela va, "Aghi aghaauliaa kiukiu niaimatoonga etaimim.

Me aue akiukiuaa voto aisulianna ghe tiuaala emua arau nau God ghe gheleila kosa ateva oia."

*Malloeana kiukiu niaimatoonga tale ssa tuvui eteva*

<sup>36</sup> Nau ghe kasu vulila taumattu ngatoa, ghe ssola tale ale ateva. Me kapuna disaepolo atoa laghe lao sio etana me laghe uela etana va, "Uaulia ngamasina etaimami malloeana kiukiu niaimatoonga ngateae ta ssa tuvui eteva me utana atingiu."

<sup>37</sup> Ghe liula me ghe uela etaira va, "Natuna ateva Taumattu ngateva ia o lo ateva ghe kaokaoaala masi ue ngai.

<sup>38</sup> Me paa ngutana atingiu eaaimatoonga kosa ateva, me masi ue ngai eaaimatoonga lo atoa natuna ila ararimangali eteva. Me ssa tuvui eteva eaimatoonga natuna atoa sesa taumattu ngateva.

<sup>39</sup> Me Satana tau ngai ssateena ateva God ghe pasala ssa tuvui eteva. Me nau nisai uit eaaimatoonga airuuruu tale kosa ateva me tau ngai sai uiti etoa, la aaimatoonga ensolo atoa.

<sup>40</sup> "Nongina laghe muke vella ssa tuvui eteva me laghe tungie saela tale kuraa, airuuruu tale kosa ateva aue ia avalua o.

<sup>41</sup> Natuna ateva Taumattu ngateva aue esuu kapuna ensolo atoa me aue la muke velu tale ararimangalina ateva voto akapa sesa etiitiuaa ssavoto me lo atoa la gheelei voto sesa.

<sup>42</sup> Aue la sau vella sai tale pakka kura ataeae ataataaili ia me aue niaingalaaii me niaingeresa ngalungalu elutu.

<sup>43</sup> Me ghulughuluena atoa taumattu ae la llaa nongina sinaka ateva tale ararimangalina ateva Tamaira ateva. Lo ateva talingane manee tani nongo, ae enongo."

*Kiukiu niaimatoonga tale masi voto laghe kaila*

<sup>44</sup> "Ararimangali ngepona liu eteva nonginaaili aikaai viliki veu eteva laghe kaieiniela tale paa ngutana atea. Nau eteva taumattu ngateva ghe taraiela ghe mene aisulieiniela me tale masimasiaane ghe aitaua ngakapala peina me laghe polila, me ghe polila ia o paa ngutana atea.

<sup>45</sup> "Me tee ararimangali ngepona liu eteva nonginaaili tau bisnisi eteva ghe paepae pel tani poli.

<sup>46</sup> Nau eteva ghe tarala lo ateva pel masinaaili ia ghe lao sio, ghe aitaua ngakapala peina me laghe polila, me ghe polila ia o pel ateva.

*Kiukiu niaimatoonga tale uvena atea*

<sup>47</sup> "Ararimangali ngepona liu eteva nonginaaili uvena atea laghe velue siola tale ateo talia ngateae me ghe ghaala asease kko atoa.

<sup>48</sup> Nau eteva ghe pasula, tau luku etoa laghe aea ssola elae me laghe toka siola me laghe ghaala masi kko, laghe kaaila tale keru, me laghe sau vella llo sesa.

<sup>49</sup> Airuuruu tale kosa ateva ae ia avalue ia o, ae ensolo atoa la mae pola sesa atoa ta ghulughuluena atoa taumattu,

<sup>50</sup> ae la sau vella sai tale pakra kura atea ataataaili ia me ae niaingalaaii me niaingeresa ngalungalu elutu."

<sup>51</sup> Iesu ghe kolomilala va, "Aloimim ange masaangala isaa o voto?"

Me laghe uela va, "Ue."

<sup>52</sup> Me ghe uela etaira va, "Liuna avalua o me isaa akapa tau ngai aapasunga tale inangari nipaopao laghe disaepolola tale ararimangali ngepona liu eteva nonginaaili taumattu ngateva eghaaghaa ouna me pokane masi voto tale rum atiulu la ghatoka masi voto etana tale alena ateva."

*Propete ateva la tam oneoneainia*

(Mak 6:1-6; Luk 4:16-30)

<sup>53</sup> Nau eteva Iesu ghe ruula tani auliaa isaa o kiukiu niaimatoonga me ghe kasu vulila ia o voto ateva.

<sup>54</sup> Ghe lao sio tale masalikina tunga atea me ghe tiuaala tani apasunga ta taumattu ngatoo tale aleira ale nivelu eitauaa. Me laghe soghiaala voto ghe aauliaa me ghe gheelei, me laghe kookolomi va, "Ia oia taumattu ngateva eaa ghe ghaala alomasaanga me sarasarakania tani ghelei mirikolo?

<sup>55</sup> Ita kilakila va natuna ia tau ngai atulu ale ateva ia oia taumattu ngateva, me ararina atea kinna ta Meri me nengana atoa ta Jeimis, Josep me Saemon me Jiuda.

<sup>56</sup> Me kapuna vause akapa atoa la tokatoka teeita. Me arova eaa ghe ghaala isaa o voto?"

<sup>57</sup> Me ang ghe sessaila etana.

Me Iesu ghe uela etaira va, "Propete ateva la oneoneainia tale kasina ppae masaliki, me tale masalikina tunga atea me tangantuena, karika."

<sup>58</sup> Karika ghe gheleila righi oroi mirikolo tale ia o masaliki etea poli karika laghe aikaaiia etana.

## 14

*Herot ghe annaa va Jon tau  
ngai aasuu ia ta Iesu*

(Mak 6:14-29; Luk 9:7-9)

<sup>1</sup> Isaa o nau, gavana ngateva Herot ghe nongonongo kiukiuna Iesu.

<sup>2</sup> Me ghe uela ta kapuna tau ngai uungu etoa va, "Ia oka taumattu ngateva Jon tau ngai aasuu ia etana ghe mene totula tale nimate! Liuna avalua o me sarasarakania ilia tani ghelei mirikolo."

<sup>3</sup> Poli emua akasina, Herot ghe suula inangari me laghe poso atokala Jon me ghe iriela me ghe atokaie ssola tale ale mata voovoo poli Herodias, vausenna ia tuena ta Pilip.

<sup>4</sup> Poli Jon ghe ue ta Herot va, "Karika masina ta uehe lai sariela."

<sup>5</sup> Herot ghe anna tani ubi ematea me poli ghe maamatauta taumattu ngatoo ta ila laghe ue va Jon propete ia, liuna avalua o me karika ghe roola tani ubi ematea.

<sup>6</sup> Nau eteva ghe rekatala tani nnaa nau eteva Herot ghe lutula etana, natuna vause ateva Herodias ghe ssiiuaala ta mataira Herot me kapuna atoa, me Herot ghe masimasiangailiela,

<sup>7</sup> me ghe auliaala inangari nialokoi me ghe aulia ngakoronnaailila etana va aue etaula saa voto aue ekolomi.

<sup>8</sup> Me kinna ghe auliaa tau lao sio ninanna ngateva me ghe uela va, “Ghaine arau aghaloanna uruna ateva Jon tau ngai aasuu ia tale tivilau terei.”

<sup>9</sup> King ghe alousiusila, me poli ghe gheleila inangari nialokoi eteva ta mataira namu ngatoa, ghe auliaala va la taula llo ghe kolomila.

<sup>10</sup> Me ghe suula soldia ngatoa me laghe sai pulela alona atiulu Jon tale ale mata voovoo.

<sup>11</sup> Laghe sau lao sio uruna ateva Jon tale terei etivilau me ghe taue lao sio ta aliki vause ateva. Ghe ghainela me ghe laoainie sio ta kinna.

<sup>12</sup> Kapuna disaepolo atoa Jon laghe mae sio tani ghaa vaulanna ateva Jon me laghe lao sio tani kaieinia. Me laghe lao sio tani auliaa ta Iesu.

*Iesu ghe anginila ghalima airari (5,000) taumattu*

(Mak 6:30-44; Luk 9:10-17; Jon 6:1-14)

<sup>13</sup> Iesu ghe nongola isaa o voto ghe lutula me ia nonga me disaepolo atoa laghe aikaaila tale paanaka ateva tani lao tale vaara. Nau eteva taumattu ngatoa laghe nongola, laghe kasu vulila masalikiira me laghe kasuaala tani laa ghaimuli teeia.

<sup>14</sup> Nau Iesu ghe ssola elae, ghe tarala oroieili taumattu ngatoa. Ghe alousiusi teeilala me ghe ghelei emasinailala tale aneira isiki.

<sup>15</sup> Auena sinaka ateva ghe suu me disaepolo atoa laghe lao sio etana me laghe uela va, “Voto ateva oia vurunganna ia, me ange aaitarrauui. Sungi vella taumattu ngatoa me la lao tale masaliki taumattu etana me la laa poli righi aneira inana.”

<sup>16</sup> Iesu ghe liula me ghe uela va, “La rororo tani toka. Am taula righi inana, me la nama.”

<sup>17</sup> Disaepolo atoa laghe uela va, “Ami posoposo ghalima nonga verete me ghalua kko.”

<sup>18</sup> Iesu ghe uela va, “Am maeara sio etaghi.”

<sup>19</sup> Me ghe auliaala ta taumattu ngatoa va la toka sio tale rarrasa me ghe ghaala verete ghalima me kko alua, me ghe taatara saela epona liu me ghe kaili emasina saela, me ghe pirila, me ghe tau lao sio ta disaepolo atoa me ila laghe lao sio tani aikoita ta taumattu ngatoa.

<sup>20</sup> Laghe namanamala me ghe ssoilala, me disaepolo atoa laghe kaai esokosokoiaala kasangaulu ghaluae (12) laka tale tapiri nginana ghe oghila.

<sup>21</sup> Lo atoa laghe namanamala ghe roola ghalima airari (5,000) taita, karika iraira tee vause me aliki etoa.

*Iesu ghe kasula epona tale paamanu eteva*

(Mak 6:45-52; Jon 6:15-21)

<sup>22</sup> Gheania nonga ta Iesu ghe auliaala va kapuna disaepolo atoa laghe aikaai tale paanaka ateva, me laghe muemue lao ta pai kativilau me ia ghe sungi velu mua taumattu ngatoa.

<sup>23</sup> Vara ghe sungi vellala, me ie nonga ghe saela tale motouru tani looloo sae. Ie nonga, me ghe aitarrauila.

<sup>24</sup> Paanaka ateva ang ghe mala masau ghoala me kotoo atoa angila ghe uvuvia poli laghe sousou kuukuu eteva.

<sup>25</sup> Elopai me Iesu ghe laa ghoa rekata etaira ghe kasukasu epona tale paamanu eteva.

<sup>26</sup> Nau eteva disaepolo atoa laghe taraiela ta ghe kasukasu epona tale paamanu ghe moi saasakieinilala me laghe ue va, “Raroai ia!” Me laghe aaipiia poli laghe maamatatau.

<sup>27</sup> Me gheania nonga ta Iesu ghe sama tecilala, me ghe uela va, “Am rau mene annaa, ta aghi oia. Am rau mene matautu.”

<sup>28</sup> Me Pita ghe uela ta Iesu va, “Vau eteva! Arova koronna va io Iesu, uauliaa mae etaghi me akasu mae etam epona tale paamanu.”

<sup>29</sup> Iesu ghe uela va, “Kkure sio mae.”

Me Pita ghe kkure vulula paanaka ateva me ang ghe kasukasu elao lao ta Iesu epona tale paamanu.

<sup>30</sup> Me vara ghe tarala kotoo ateva me ang ghe maamatatau me ang ghe lullusu me ang ghe kolokolo, ghe ue va, “Vau eteva, asaangieghila!”

<sup>31</sup> Gheania nonga ta Iesu ghe ssiiuaala nimane me ghe kunela Pita me ghe uela va, “Ghaunaaili unem niaikaiaia. Vaalua me eghaaghala nannaam?”

<sup>32</sup> Me nau eteva lalu ghe saesaela tale paanaka ateva me kuukuu eteva ghe kapala.

<sup>33</sup> Me lo atoa tale paanaka ateva laghe kkaueiniela, me laghe ue va, "Koronnaaili va Natuna io God."

*Iesu ghe ghelei emasinala tau sessa atoa eGenesaret  
(Mak 6:53-56)*

<sup>34</sup> Laghe ose longotila me laghe kautula tale distriki eteva eGenesaret.

<sup>35</sup> Nau eteva taumattu ngatoa tale ia o masaliki eteae laghe tara kilala Iesu, laghe suula inangari ta mene katoa masaliki me taumattu ghe maeaa sio kapuira tau sessa etana.

<sup>36</sup> Me laghe tani kookolomi ekorokorongana ia va etaui velu tau sessa atoa me la nim poso sama ghinnanina. Lo atoa laghe posoposo sama ghinnanina Iesu laghe maamasina.

## 15

*Voto raarangisana me voto karika raarangisana  
(Mak 7:1-23)*

<sup>1</sup> Katoa Paresi me tau ngai aapasunga tale inangari nipaopao, laghe kasula eJerusalem me laghe mae sio ta Iesu tani kolomia va,

<sup>2</sup> "Mausi saa me kapum disaepolo atoa karika la ghaaimuli tee voto tuvuita atoa laghe apasungaala etaita va ita gheelei? Karika la porapora nimaira nau la namanama."

<sup>3</sup> Iesu ghe liula me ghe uela va, "Me vaalua me karika am aaimuli usi tee inangari nipaopao kanna God me am aaimuli usi tee voto tuvuimim atoa laghe apasungaala va am gheelei?

<sup>4</sup> Poli God ghe uela va, 'Am oneoneaa tamaimim me kinaimim,' me, 'Lo ateva ekaakasikiena tamana o kinna aue la uvi ematea.'

<sup>5</sup> Me am auliaa va arova kateva righi peina erooroo tani sausi tamana o kinna, me eue etairarua va, 'Peighi tani sausiemalua ngagheleila inangari nialokoi tani taula ta Vau palepale,'

<sup>6</sup> am aapasunga va ia o taumattu ngateva karika erooroo tani oneoneaa tamana o kinna. Tale isaa o ase salana am gheelei inangarina God enim peepeisaane, ta am aaimuli usi tee aauliaairaa tuvuimim atoa.

<sup>7</sup> Am usimaghalua am! Propet Aisaea ghe aulia ngakoronnala nau ghe aulia ngamuemua alokoila gheeleiaaimim, ghe uela va:

<sup>8</sup> "Isaa oia taumattu la nim oneoneainaghia ta paaира  
me urunguitiira masaeili etaghi.

<sup>9</sup> Karika righi mallooeana uneira nikkauaa

poli la ghaapasunga llo nim kaluira taumattu ngatoa nonginaaili va kanna God."

<sup>10</sup> Iesu ghe kolola taumattu ngatoa me ghe uela etaira va, "Am nongo me aloimim emasaanga!

<sup>11</sup> Saa llo voto ekupikupi sso elome tale paa taumattu ngateva, karika egheleia va etam raarangisana, ta saa llo voto epoppooaa ekupikupi ghoa tale paane ateva egheleia etam raarangisana."

<sup>12</sup> Vara me disaepolo atoa laghe mae sio tani auliaa ta Iesu va, "Ukilakila va Paresi etoa esessaila tale inangari uauliaala?"

<sup>13</sup> Iesu ghe liula me ghe uela va, "Isaa akapaaili voto eutana Tamaghi epona liu karika ghe pasala, aue emuke akapaaili.

<sup>14</sup> Am rau mene annaa isaa o ase taumattu! Ilia nongina mata salusalu, la ghaloanna tani apasunga salana ta katoa, me arova mata salusalu eteva ekatulaa mene kateva mata salusalu, ilalua akapa aue lalu kupi tale liu."

<sup>15</sup> Vara me Pita ghe uela va, "Erooroo va uauliaa malloeanina isaa o inangari?"

<sup>16</sup> Iesu ghe liula me ghe uela va, "Vaalua? Am tee aloimim karika ghe masaanga?

<sup>17</sup> Karika am kilakila? Saa llo voto ekupikupi sso tale paa taumattu, esiosio tale kova taumattu, me emene kupikupi ghoa nau taumattu ngateva elaa tiutiu.

<sup>18</sup> Me saa llo voto ekupikupi ghoa tale paa taumattu, ekasukasau tale urunguita, isaa o voto egheeghelei taumattu ngateva etam raarangisana.

<sup>19</sup> Tale isaa akapa voto urunguita ateva eaalutu sesa ninanna, tani aiuvi emate, tani lai sari katoa maneeira, tani lai saasaloaa, niainao, inangari kamena me niauliaa saasakiaa.

<sup>20</sup> Isaa o voto egheeghelei taumattu ngateva etam raarangisana, me tani namanama me karika upora nimam, isaa o llo karika eghelei taumattu ngateva etam raarangisana."

*Unna niaikaiaia vausesti nge Keinan ateva  
(Mak 7:24-30)*

<sup>21</sup> Iesu ghe kasu vulila lo ateae o masaliki me ghe lao sio tale llo masaliki kalakalangina eTaer me eSaedon.

<sup>22</sup> Vausesti nge Keinan ateva, ghe tokatoka tale ia o pai etivilau, ghe mae sio ta Iesu, me ghe sama anamuula va, "Vau eteva, Natuna io Deivit, ualousiusi teeieghi! Natughu vause ateva raroai eteva etokatoka etana me egheelei saasakiein."

<sup>23</sup> Iesu karika poi ghe nim naisaueinia. Kapuna disaepolo atoa laghe lao sio me laghe aauliaa etana va, "Sungi aoghiela! Eusiusita me egheelei kinatama mangalia ateva!"

<sup>24</sup> Iesu ghe liula me ghe uela va, "God ghe sungieghila nonga tani mae sausi lo atoa Israeli ang ghe raulala."

<sup>25</sup> Vara me vause ateva ghe mae sio ghe suuaala ta liue kkena Iesu, me ghe uela va, "Sausiegħila, Vau eteva!"

<sup>26</sup> Iesu ghe liula me ghe uela va, "Karika masina tani tau lao aneira inana aliki etoa ta paua atoa."\*

<sup>27</sup> Vause ateva ghe liula me ghe uela va, "Koronnaaili, Vau eteva. Me paua tee atoa la namanama aneira vorovoro nginana vauira atoa ekaakatuu tale uneira tevoo."

<sup>28</sup> Iesu ghe liula me ghe uela etana va, "Vause ateva, niaikaiaia etam namungaili! Saa llo voto ualoanna va elutu etam, aue elutu." Ia arau o nau eteva, natuna vause ateva ghe masinala.

*Iesu ghe ghelei emasinala orioieili tau sessa atoa*

<sup>29</sup> Iesu ghe kasu vulila voto ateva o, me ghe lao akalakalangina sio tale ateo talia ngateae eGalilii. Ghe saela tale motouru eteva me ghe toka siola.

<sup>30</sup> Orioieili ila taumattu ngatoa laghe mae sio etana, laghe maeaa sio lo atoa kasukasuaairaa sesa, mata salusalu, riu makeakeana, paavoo me orioieili ila tau sessa atoa, laghe atokailala tale liue kkena Iesu, me ghe ghelei emasinalala.

<sup>31</sup> Taumattu ngatoa laghe annangailila nau laghe tarala paavoo atoa laghe samala, lo atoa riuira makeakeana laghe korosilala, lo atoa kasukasuaairaa sesa laghe masinala, me mata salusalu etoa ghe otilla mataira. Me laghe tau saela kapuira Goto ateva Israeli etoa.

*Iesu ghe anginila għata airari (4,000) taita*

*(Mak 8:1-10)*

<sup>32</sup> Iesu ghe kolola kapuna disaepolo atoa, me ghe uela va, "Aghaalousiusi tee taumattu ngatoa, ta laghe toka aitauaa teeieghila kotolu nau, me ghaine karika righi inana va la nama. Karika aghaloanna tani suu vella me maloona ila, la rau taatarruu elaolao va la katuu etapaa salana."

<sup>33</sup> Disaepolo atoa laghe kolomiela va, "Eaa ita ghele laa għaa righi inana ghelei orioieili tale voto ateva oio vurunganna ia, me ita anginila taumattu ngatoa oio oroienaili ila?"

<sup>34</sup> Iesu ghe kolomila va, "Għaisa akpa verete am uunus?"

Me laghe liula me laghe uela va, "Għaitu (7) verete me lutu kko għauna."

<sup>35</sup> Me Iesu ghe auliaala ta taumattu ngatoa va la toka sio tale kosa.

<sup>36</sup> Vara me ghe għala għaitu verete me kko, me ghe kaili emasina saela, ghe pirila, me ghe taula ta kapuna disaepolo atoa, me disaepolo atoa laghe tau lao sio ta taumattu ngatoa.

<sup>37</sup> Ila akpa laghe namanamala me laghe tuvula. Vara me disaepolo atoa laghe kaai aitauaala tapiri nginana ghe oghila, ghe roola ghaitue (7) laka.

<sup>38</sup> Ila akpa taita atoa laghe namanamala, ghe roola għata airari (4,000), karika laghe ioila vause atoa me aliki etoa.

<sup>39</sup> Vara me Iesu ghe suu vella taumattu ngatoa, me ghe aikaaila tale paanaka ateva, me ghe lao sio tale masaliki etoa kalakalangina ilia tale distriki eteva eMagadan.

## 16

*Lagħe tani anna tani tara teva niaimatoongana  
(Mak 8:11-13; Luk 12:24-56)*

<sup>1</sup> Paresi etoa me Sadiusi etoa laghe lao sio ta Iesu, me laghe kolomiela va eapasunga teva niaimatoongana negepona liu. Lagħe auliaa llo tani nim tootoongainia.

<sup>15:24:</sup> Mat 10:6. \* <sup>15:26:</sup> paua atoa Ajju etoa laghe annaa va ħalli muennha ilia ta lo atoa karika va ajju ilia, me laghe kololala va ueili paua ilia. Iesu ghe aimulisi tee auliaira. Nau ghe auliaa, karika va ghe sessaia. Ghe nim anna tani tootoonga aikaiaane vause ateva, karika va tani għelei saasakia nannaane. <sup>15:31:</sup> Mak 7:37. <sup>15:32:</sup> Mat 14:14. <sup>16:1:</sup> Mat 12:38; Luk 11:16.

<sup>2</sup> Ghe liula me ghe uela va, “Nau ange elo alai am ue va, ‘Aue masi nau poli karaane ateva eraeraeana,’

<sup>3</sup> me elue talaua am ue va, ‘Ghaine ettasi poli karaane ateva ange raeraeanala me ange aavoo.’ Am taatara kila kookoo ngateva me karika am taatara kila niaimatoonga tale nau.

<sup>4</sup> Sesa taumattu ngam me karika am uusilaa aloannaane God, am anna tani tara niaimatoonga. Saa ghe lutu teela Jona, ie nonga o niaimatootoongana ateva aue elutu.” Vara me Iesu ghe kasu vulilala me ghe lao ppae sio.

*Uneira isti Paresi me Sadiusi etoa  
(Mak 8:14-21)*

<sup>5</sup> Nau laghe lao sio ta pai kativilau tale ateo talia ngateae me disaepolo atoa laghe tarala va laghe aikkaluaala verete.

<sup>6</sup> Iesu ghe uela etaira va, “Am aikinikinitaa tani tara amasina uneira isti Paresi me Sadiusi etoa.”

<sup>7</sup> Laghe aikolomieinila tani ue va, “Koti eaauliaa llo oia poli karika ita ghaala righi verete.”

<sup>8</sup> Iesu ghe kilala sa ateva laghe aissakeana teeia me ghe uela etaira va, “Uneimim niaikaiaa ghaunaaili, vaalua me am aissakeana va poli karika righi verete?

<sup>9</sup> Vaalua, aloimim karika ghe masaanga? Karika am annaa ghalima verete ghe roola ta ghalima airari (5,000) me ghaisae keru am ghe kaaila?

<sup>10</sup> Me karika am annaa ghaitu verete ghe roola ta ghaata airari (4,000) taumattu me ghe roola ghaisae laka am ghe kaaila?

<sup>11</sup> Vaalua, me karika am kilakila va karika va aghaauliaa verete? Am aikinikinitaa tani tara amasina uneira isti Paresi me Sadiusi etoa.”

<sup>12</sup> Vara me laghe vira mene kilala va ghe eaauliaa llo Paresi me Sadiusi etoa laghe aapasunga, me karika va la taatara amasina tale isti la ghelei tale verete.

*Pita ghe auliaala va Iesu see ia  
(Mak 8:27-30; Luk 9:18-21)*

<sup>13</sup> Nau Iesu ghe lao sio tale voto ateva kalakalangina ia eSiiaria Pilipae, ghe kolomila kapuna disaepolo atoa va, “Taumattu ngatoa la ue va see ta Natuna ateva Taumattu ngateva?”

<sup>14</sup> Laghe liula me laghe uela va, “Katoa la ue va Jon tau ngai aasuu ia, me katoa la ue va Elaija, me katoa la ue va Jerimaea o mene katoa tani propete.”

<sup>15</sup> Me ghe kolomilala va, “Me am, am ue va aghi see?”

<sup>16</sup> Saemon Pita ghe liula me ghe uela va, “Io Mesaea io, Natuna io God ateva tokatoka liu ia.”

<sup>17</sup> Iesu ghe liula me ghe uela va, “Niarangise etam Saemon natuna io Jona, poli karika teva taumattu eauliaa tau aatu llo ona ta Tamaghi etokatoka epona liu.

<sup>18</sup> Me aghaauliaa etam va io Pita, me tale ia o atu eteva\* aue aghatulu aleghi ale manga ateva etana, me atamana ateeae tale voto ateva aleira ia matena atoa karika erooroo tani apalaiia.

<sup>19</sup> Aue atau aatu kii eteva tale ararimangali ngepona liu eteva; saa llo ugheelei runga tale kosa ateva, aue la ghelei runga tee epona liu, me llo utautau velu tale kosa ateva aue la tau velu tee epona liu.”

<sup>20</sup> Me ghe paola kapuna disaepolo atoa va la rau mene laa ghauliaa see va ia Mesaea ia.

*Iesu ghe auliaala va aue emate  
(Mak 8:31-9:1; Luk 9:22-27)*

<sup>21</sup> Isaa o nau Iesu ghe tiuaala tani aulia ngamasalika ta kapuna disaepolo atoa va aue etani sae ejerusalem me aue esae ghaa orioeili mmarihana, ta namu ngatoa, me namu ngatoa ta pristi etoa me tau ngai aapasinga ngatoa tale inangari nipaopao, me aue la uvi emateea, me aue kotonna ateva nau, emene totu.

<sup>22</sup> Pita ghe koloala me lalu ghe laa tingina ppae sio, me ghe tiuaala tani kisoia, ghe ue va, “Karika, Vau eteva! Isaa o voto karika erooroo tani lutu ta ngetam.”

<sup>23</sup> Iesu ghe kiriela me ghe uela ta Pita va, “Kasu vulieghila, Satana! Ugheelei rungarunga salaghi. Nannaam karika eannaa voto kannaa God ta voto kaluira taumattu ngatoa.”

**16:4:** Mat 12:39; Luk 11:29.    **16:6:** Luk 12:1.    **16:9:** Mat 14:17-21.    **16:10:** Mat 15:34-38.    **16:14:** Mat 14:1-2;

Mak 6:14-15; Luk 9:7-8.    **16:16:** Jon 6:69.    **16:17:** Gal 1:15-16.    **16:18:** Jon 1:42; Ips 2:20.    \* **16:18:** Tale inangari nge Grik, Pita la ue va Petros, malloeania ta “atu”.    **16:19:** Mat 18:18; Jon 20:23.

<sup>24</sup> Vara me Iesu ghe uela ta kapuna disaepolo atoa va, “Lo ateva eanna tani usieghi, etani sioaa nannaane me erau mene nnainia nonga me esunuki unna aikotoo ateva, me eaimuli teeieghi.

<sup>25</sup> Poli see eanna tani asaangi maamauluaane ave eraua, me lo ateva maamauluaane eraua ta poli mausighi ave emene ghaa.

<sup>26</sup> Saa righi masi voto ave elutu arova taumattu ngateva ghele ghaa voto akapaaili tale kosa ateva me ghele rau maamauluaane? O sa ateva ave ghele tauela tani aikolikolieinia tani mene ghaa maamauluaane?

<sup>27</sup> Poli Natuna ateva Taumattu ngateva ave emae tee mallangina ateva Tamane me kapuna ensolo atoa me ave etaula aipoliira kateva kateva taumattu tale voto laghe gheleila.

<sup>28</sup> Aghaaulia ngakoronna etaimim va katoa oia am tiitingina, karika ave am mate me ave am tara Natuna ateva Taumattu ngateva emae tee ararimangalina ateva.”

## 17

### *Vilikina Iesu ghe mene isaa ppaela (Mak 9:2-13; Luk 9:28-36)*

<sup>1</sup> Ghaonomo (6) nau ghe lange sio me Iesu ghe kolola Pita, Jeimis me Jon nengana Jeimis, me ila nonga laghe saela tale motouru eteva saesaenaaili ia.

<sup>2</sup> Tale ia o voto ateva taataraane Iesu ghe aikolikoliaala emua ta mataira. Matana ghe lallaa arova sinaka ateva, me ghinnanina ghe usola arova mallanga ateva.

<sup>3</sup> Vara me Moses me Elaija lalu ghe kaurekatila me lalu ghe tiauala tani sama tee Iesu.

<sup>4</sup> Me Pita ghe uela ta Iesu va, “Vau eteva, masinaaili ta ita sae mae oia. Arova uanna, ave aghelei kotolu ale paapali, kateva alem ia, me kateva alena ia Moses, me kateva Elaija.”

<sup>5</sup> Pita ghe aippooaa nonga me kookoo ngateva mallanginaaili ia ghe akoulala me lingi ngalo ateva elome tale kookoo ngateva ghe uela va, “Ia o natughu eteva aghaailousieinia, me masimasiaaghi ta getana namungaili. Am nongoa.”

<sup>6</sup> Nau eteva disaepolo atoa laghe nongola, laghe aso siola tapaa kosa, mataira ghe tau siola euu. Me laghe matautu etinginala.

<sup>7</sup> Iesu ghe lao sio me ghe posolala me ghe uela etaira va, “Am totula. Am rau mene matautu.”

<sup>8</sup> Nau eteva laghe atangaro saela, karika laghe tarala righi taumattu ta laghe tarala nonga Iesu.

<sup>9</sup> Nau laghe mae siosio tale motouru, me Iesu ghe ttoieinilala va la rau mene auliaa ta mene teva saa llo laghe tarala lomosina ta Natuna ateva Taumattu ngateva etotu tale nimate.

<sup>10</sup> Me disaepolo atoa laghe kolomiela va, “Vaalu me tau ngai aapasunga tale inangari nipaopao la ue va Elaija ave etani muemue mae?”

<sup>11</sup> Iesu ghe liula me ghe uela va, “Elaija ave emae akasina tani ghelei emasina aka povo.

<sup>12</sup> Me aghaauliaa etaimim va Elaija ghe mae sio me karika laghe tara kilaiela, me laghe ghelei teeielia isaa aka povo laghe anna tani ghelei etana. Tale ie nonga o salana atikirighi Natuna ateva Taumattu ngateva ave eghaa nimmarikana ta nimaira.”

<sup>13</sup> Me nannaaira disaepolo atoa ghe vira mene masalikela tani kila va ghe auliaa Jon tau ngai aasuu ia etaira.

### *Taita arighi raroai eteva ghe tokatoka etana ghe masinala (Mak 9:14-29; Luk 9:37-43)*

<sup>14</sup> Nau laghe rekatala nongina taumattu ngatoa, taita ateva ghe lao sio tani tara Iesu me ghe suuiala emua ta Iesu.

<sup>15</sup> Me ghe uela va, “Vau eteva, ualousiusi tee natughu taita arighi, poli eeo me egheeleia esessaaili me oroiaata ta ekaakatuvelu sae tale kuraa me tale manu tee.

<sup>16</sup> Amaeainie sio ta kapum disaepolo atoa me karika la roola tani ghelei emasinaia.”

<sup>17</sup> Me Iesu ghe liula me ghe uela va, “Am lo ateva oia vituu, karika righi uneimim niaiesoaa, nannaaimim me gheeleiaaimim karika ghulughuluena. Ghaisaata ave atoka aitauaa teeiem? Me ave ghaisaata ave atoiem va am aiesoaa? Am ghaa mae sio aliki eteva etaghi.”

<sup>18</sup> Iesu ghe paola raroai eteva, me ghe kasu vulila aliki eteva me ia arau o nau eteva, aliki eteva ghe masinala.

<sup>19</sup> Me disaepolo atoa laghe lao sio tani tara Iesu nau ie nonga me laghe kolomiela va, "Vaalua me ami karika ami roola tani tiu velu raroai eteva?"

<sup>20-21</sup> Iesu ghe liula me ghe uela va, "Poli uneim niaikaiaa ghaunaaili. Aghaulia ngakoronna etaimim va, arova uneim niaikaiaa naanamungaane nongina katu ue ngai erighi ghaunaaili ia (mastet), am rooroo tani ue ta motouru eteva o va, 'Kasula ona me umene lao teke,' aue ghele kasu. Aue am rooroo tani ghelei voto akapa."\*

*Aiaaghaluene Iesu ghe uela va  
aue emene totu*

(Mak 9:30-32; Luk 9:43-45)

<sup>22</sup> Nau eteva laghe mae aitauaa sio eGalilii me Iesu ghe uela etaira va, "Natuna ateva Taumattu ngateva aue la tauela ta nimaira taumattu ngatoa.

<sup>23</sup> Aue la uvi ematea me vara aiaakotonna ateva nau me aue emene totu." Nau disaepolo atoa laghe nongola laghe alousiusila.

*Iesu ghe taula takis moni pei tale ale manga ateva*

<sup>24</sup> Vara me Iesu me kapuna disaepolo atoa laghe laa rekata sio eKapenium, me lo atoa taumattu laghe ghaaghhaa takis moni pei tale ale manga ateva laghe uela ta Pita va, "Kapuimim tisa ngateva eveluelu takis tale ale manga ateva?"

<sup>25</sup> Me Pita ghe uela va, "Ue, eveluelu."

Me Pita ghe kupi ssola tale ale ateva, me Iesu ghe sama akasinala tani ue ta Pita va, "Saemon, uannaa va kingi etoa tale kosa ateva oia la ghaaghhaa takis tale ase voto atoa ta see atoa, ta kapuira atoa o ta mene katoa ppae?"

<sup>26</sup> Me Pita ghe uela va, "La ghaaghhaa takis ta mene katoa ppae."

Me Iesu ghe uela etana va, "Mausina avalua o me kapuira atoa la tam tautaula takis.

<sup>27</sup> Ta rau gheleila va esessaila etaita, siola tale ateo talia ngateae me uvelu ghoa unem airrekati eteae. Me nau urekati aitiutiui eteva kko, uoti paane ateva, me aue ughaa viliki veu etivilau. Ughaaia me ulaa tauela etaira aipoli kaluitalua takis."

## 18

*See aue enamuu?*

(Mak 9:33-37; Luk 9:46-48)

<sup>1</sup> Isaa o nau disaepolo atoa laghe lao sio ta Iesu me laghe kolomiela va, "See atoa namuu ila tale ararimangali ngepona liu eteva?"

<sup>2</sup> Iesu ghe kolola aliki erighi me ghe atinginaiela elome etaira.

<sup>3</sup> Me ghe uela va, "Aghaulia ngakoronna etaimim va am aikolikoliaa me am nongina lutu ngaliki etoa, arova karika, karika aue am kupi sso tale ararimangali ngepona liu eteva.

<sup>4</sup> Liuna avalua o me lo ateva esioaa nannaane nongina aliki eteva o, namuu ia tale ararimangali ngepona liu eteva.

<sup>5</sup> "Me see emasimasi tani ghaa lutu ngaliki etoa poli ararighi eteae egħaaghhaa teeieghi.

<sup>6</sup> Arova aliki erighi eaaiesoaa etagħi, me teva taumattu egħeilei unna niaikaiaa ekatuu, għeble masinaaili ta arova la għeile iri teva paka ngatu ta ngalona, me la għeile għoġġa allusia elo maliongħ.

<sup>7</sup> "Aue esesaaili ta taumattu tale kosa ateva mausi voto la għeilei me katoa tani taumattu uneira niaikaiaa ekaakattu. Isaa o voto aue elutu me aue esesaaili ta lo ateva taumattu egħeilei voto o elutulutu.

<sup>8</sup> Arova nimam o kekem egħeilei me ukaakattu tani għeilei voto sesa, usai kotoo me usau velu. Aue masina arova ughha maulue me katelange kekem me nimam karika ia, me karika masina arova nimam me kekem masina me aue la sau veluo sae tale kura atae tokatoka liu ia.

<sup>9</sup> Me arova teva matam egħeilei me ukaakattu tani għeilei voto sesa, uvaliki velua me usau velu, masina tani għha maulue ta kateva nonga matam, me karika masina arova matam akapa alua me la sau veluo sae tale kuraa atae eGħenna.

---

<sup>17:19:</sup> Mat 10:1.    <sup>17:20-21:</sup> Mat 21:21; Mak 11:23; Luk 17:6; 1 Ko 13:2.    \* <sup>17:20-21:</sup> Kasina uru ngi laghe pitila, lagħe piti teela, <sup>21</sup> Isaa o ase voto karika erooroo tani lutu arova karika ita tam nae me ita tam pure.    <sup>17:22:</sup> Mat 16:21.    <sup>17:24:</sup> Eks 30:13; 38:26.    <sup>18:1:</sup> Luk 22:24.    <sup>18:3:</sup> Mat 19:14; Mak 10:15; Luk 18:17.    <sup>18:5:</sup> Mat 10:40; Luk 10:16; Jon 13:20.    <sup>18:8:</sup> Mat 5:29-30.

*Kiukiu niaimatoonga ataeae tale  
sipsipi eteva ghe rauela*

(Luk 15:3-7)

<sup>10-11</sup> “Karika am mene tara aliki etoa va peisaane ila. Aghaaulua etaimim va kapuira ensolo atoa la laa reerekataa ta matane Tamaghi epona liu.\*

<sup>12</sup> “Vaalua am annaa? Arova teva taumattu kiena sipsipi erooroo kateva ai (100) me kateva ghele tiu ppa, am annaa va karika aue ghele kasu vuli ghasiongaulu ghasio (99) tale voto saesaena me ghele kasu tani laa pae lo ateva ghe tiu ppaela?

<sup>13</sup> Arova ghele tarai, aghaaulia ngakoronna etaimim va masimasiaane tale ia o sipsipi eteva namungaili me tale lo ghasiongaulu ghasio (99) karika laghe tiu ppaela.

<sup>14</sup> Tale ia nonga o salana atikirighi Tamaim ateva<sup>†</sup> epona liu karika eanna va teva ta lutu ngaliki etoa eraua.

*Vaalua tani sausi tuem o nengam ateva egheelei voto sesa ta ngetam*

(Luk 17:3)

<sup>15</sup> “Arova teva tuem o nengam egheelei teeio righi voto sesa, ulaa tarai me uauliaa voto sesa egheleila etam elome etaimalua nonga. Arova enongo usilainio, angu sausielia tani ghaa oghia.

<sup>16</sup> Arova etam nongo usilainio, ughaa kateva o ghalua tani mene laa tarai me la rooroo tani auliaa va voto o koronna.

<sup>17</sup> Arova etam nongo usilainila, am auliaa tale ale manga, me arova etam nongo usilaa tee ale manga, am tau velua, me enim toka nongina tau ngeleka ateva o tau ngai ghaa takis.

<sup>18</sup> “Aghaaulia ngakoronna etaimim va voto llo am gheelei runga tale kosa ateva, aue la ghelel runga tee epona liu, me llo am tautau velu tale kosa ateva aue la tau velu tee epona liu.

<sup>19</sup> “Amene aauliaa etaimim va arova lo alua taumattu tale kosa ateva lalu mae aitauua tale kateva nonga ninannaa me lalu kolomieghi tale righi voto aue Tamaghi epona liu aue ghele taula.

<sup>20</sup> Poli arova ghalua o kotolu la maemae aitauua tale ararighi eteae, aghi atokatoka aitauua teeila.”

*Kiukiu niaimatoonga ataeae tale sesa tau ngai uungu eteva*

<sup>21</sup> Me Pita ghe mae sio ta Iesu me ghe kolomiela va, “Vau eteva, aue ghaisaata akkaluaa voto sesa ateva tueghi o nengaghi ghele ghele etaghi, aue esae ta ghaituaata (7)?”

<sup>22</sup> Iesu ghe liula me ghe uela va, “Aghaaulia etam va karika va ghaituaata nonga, ta gaitungauluaata me mene ghai (77).‡

<sup>23</sup> “Liuna avalua o me ararimangali ngepona liu eteva nonginaaili kateva king ghe aloanna tani ghelel eghulughuluena uneira dinao kapuna tau ngai nonganongo anna atoa.

<sup>24</sup> Nau ghe tiauala, laghe maeaa sio ia o taumattu ngateva unna kinatama dinao ateva.§

<sup>25</sup> Poli karika ghe rooroo tani liu, vauna ateva ghe uela va la laa taua me la polia, ia me vausenna ateva me natuna atoa me peina akaa atoa, tani liu unna dinao ateva.

<sup>26</sup> “Ia o tau ngai nonganongo anna ateva ghe suuiala patu kkena emua etana me ghe annala va vauna ateva ealousiusi teeia me aue eliu ekapa voto.

<sup>27</sup> Vauna ateva ghe alousiusi teeielia me ghe uela va vulla tani liu unna dinao, me ghe tau veluela me ghe kasula.

<sup>28</sup> “Nau ghe kasula, ghe lao sio me ghe tarala kateva kapuna lalu ghe uungu eitauua ghe dinaola etana ta kateva ai (100) silva koen. Ghe poso atokaiela me ang ghe aloanna tani kii pule alona atiulu. Me ghe ue etana va, ‘Utani liu kalum dinao ateva.’

<sup>29</sup> “Kapuna ateva lalu ghe uungu eitauua ghe suuiala patu kkena emua etana me ghe anna va ghe alousiusi teeia me aue ghe liu unna dinao ateva.

<sup>30</sup> “Me kapuna ateva ghe ratila, ghe tani atoka ssola taumattu ngateva tale ale mata voovoo lamosina ta ghe tani liula kannna dinao ateva.

\* **18:10-11:** Hib 1:14; Luk 19:10.    \* **18:10-11:** Kasina uru ngai laghe pitila, laghe pitila <sup>11</sup> **Poli Natuna** ateva Taumattu ngateva ghe sio mae tani asaangi taumattu ghe rauela. Utara Luk 19:10.    † **18:14:** Kasina uru ngai laghe pitila, laghe pitila Tamaghi eteva.    **18:15:** Luk 17:3; Gal 6:1.    **18:16:** Diut 19:15; Jon 8:17.    **18:18:** Mat 16:19; Jon 20:23.

**18:19:** Mak 11:24; Jon 15:7.    **18:22:** Luk 17:4.    ‡ **18:22:** gaitungauluaata me mene ghai (77) o gaitungauluaata ghai (70 x 7).    § **18:24:** Tale inangari nge Griki, kasangaulu airari (10,000) talent. Kateva talent erooroo 6,000 silva koen (denarius), me kateva silva koen aipolina kateva nau.

<sup>31</sup> Nau mene katoa tani tau ngai nongonongo anna laghe tara isaa o voto ghe lutula, nannaairia karika ghe masinala. Liuna avalua o me laghe aulia ngakapala voto ghe lutula ta vauira ateva.

<sup>32</sup> "Me vauna ateva ghe mene koloala ia o tau ngai nongonongo anna ateva me ghe uela etana va, 'Io sesa taumattu io. Aghe ghaa velu ekapala kalum dinao poli ughe ue va aghalousiusi teeio.

<sup>33</sup> Vaalua me karika ughe mene alousiusi teela mene lo ateva kapum amalu ghe uungu eitauua nongina aghe gheleila etam?"

<sup>34</sup> Vauna ateva ghe sessaiela me ghe auliaala me lo atoa la ghaaitoiaa ale mata voovoo ateva va laghe ghelei teeia voto mmariikana lomasina ta etani liu ekapa kanna dinao.

<sup>35</sup> "Tamaghi epona liu egheelei evalua o etaimim, arova am tam kkaluaa kateva tueimim me nengaimim tale urunguitaniimim."

## 19

### *Tani airatii*

(Mak 10:1-12)

<sup>1</sup> Nau eteva Iesu ghe ruula tani auliaa isaa o voto, ghe kasu vulila eGalilii me ghe lao sio tale distriki eteva ejiduia ta pai kativilau ejordan.

<sup>2</sup> Oroiannaaili taumattu ghe usiusa me ghe ghelei emasinalala tale ia o voto ateva.

<sup>3</sup> Katoa Paresi laghe mae sio etana tani tootoongainia tale kateva nikokkolomi. Laghe uela etana va, "Uneita inangari nipaopao eue va masina arova taita ateva erooroo tani rati vausenna ateva tale aloaloannaane?"

<sup>4</sup> Ghe liula me ghe uela va, "Karika am ghe ritila va tale aitiutiu tale voto akapaaili lo ateva ghe gheleila voto 'ghe gheleila taita me vase'?"

<sup>5</sup> Me God ghe uela va, "Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva, me ilalua aue lalu kateva nonga tale vilikiirarua."

<sup>6</sup> Karika va emene ghaaghalue ilalua, ta ekaakateva nonga ilalua. Liuna avalua o me llo God eaatoka aitauaa, karika teva taumattu emene pola."

<sup>7</sup> Me laghe kolomiela va, "Me vaalua me Moses ghe pitila va taita ateva erooroo tani taula uru ngai niairatii ta vausenna ateva, me esungi velua?"

<sup>8</sup> Iesu ghe liula me ghe uela va, "Moses ghe uela va am rooroo tani rati vauseniiim poli urunguitaniimim korokoronganaiili, me aitiutiu tale voto akapaaili karika isaa avalua o.

<sup>9</sup> Aghaauliaa kieimim va lo ateva erati vausenna ateva nau karika tale uunguaa nialai salosalooa see, me emene ghaa mene teva vase, ange lai sarila."

<sup>10</sup> Disaepolo atoa laghe uela etana va, "Arova ia avalua o, aue emasina arova taita ateva erau mene lai."

<sup>11</sup> Iesu ghe liula me ghe uela va, "Karika va taumattu ngakapa aue eghaa isaa oia inangari, ta llo nonga atoa God ghe akorokoronganaiila tani ghaa isaa oia inangari.

<sup>12</sup> Poli katoa, nau laghe lutula laghe lutu saasakiala me karika la rooroo tani lai. Me katoa taumattu laghe kaatilala, me katoa la tam anna tani lai poli la ghanna tani ghelei uunguanne ararimangali ngepona liu eteva. Lo ateva erooroo tani ghaa isaa oia inangari aue eghaa."

### *Natu aliki etoa me Iesu*

(Mak 10:13-16; Luk 18:15-17)

<sup>13</sup> Me laghe maeaa sio lutu ngaliki etoa ta Iesu va esaaoaa nimane etaira me epure etaira. Disaepolo atoa laghe kisokiso lo atoa laghe maeainila sio.

<sup>14</sup> Me Iesu ghe uela va, "Am tau velu lutu ngaliki etoa, me la mae etaghi. Am rau mene ghelei rungainila poli ararimangali ngepona liu eteva kaluira ia lo atoa nongina ila o lutu ngaliki etoa."

<sup>15</sup> Ghe saoaala nimane etaira me ghe kasu vulila lo atae o masaliki.

### *Aliko taita ateva tue peipeiena ia*

(Mak 10:17-31; Luk 18:18-30)

<sup>16</sup> Vara me kateva taita ghe mae sio ta Iesu me ghe kolomila Iesu va, "Tisa, saa arighi masi voto aue aghelei me aghaa maulue ateva tokatoka liu ia?"

<sup>17</sup> Iesu ghe liula me ghe uela va, “Vaalua me ukokkolomi voto masina etaghi? Nim kateva nonga masina ia. Arova uanna tani ghaa maulue, unongo usilaa inangari nipaopao.”

<sup>18</sup> Me taita ateva ghe kolomila Iesu va, “Sa ateva inangari nipaopao?”

Iesu ghe liula me ghe uela va, “Urau mene aiuvi emate, urau mene lai sari, urau mene ainao, urau mene kamekame tale niaiskei,

<sup>19</sup> uoneoneaa tamam me kinam, me uaielousiaa taumattu ngateva kalakalangina ia etam nongina uaialelousieinio.”

<sup>20</sup> Me aliki taita ateva ghe uela va, “Isaa akapa voto ona ngaghe gheleila. Mene sa ateva voto karika aghe ghelei?”

<sup>21</sup> Iesu ghe liula etana me ghe uela va, “Arova uanna tani ghulughuluenaaili, ulao me ulaa tau peim me la poli me ughaa viliki veu me utau lao ta lo atoa karika righi peiira, me ae utau peipeiena epona liu. Me umae usieghi.”

<sup>22</sup> Nau eteva aliki taita ateva ghe nongo avaluela o, ghe alousiusila me ghe kasula, poli oroiannaaili peina.

<sup>23</sup> Me Iesu ghe uela ta kapuna disaepolo atoa va, “Aghaaaulia ngakoronna etaimim va aanasaaaili ta tue peipeiena atoa tani kupi sso tale ararimangali ngepona liu eteva.

<sup>24</sup> Me aghaaauliaa etaimim va marova masukasukale ta teva kamolo tani kupi sso tale teae mata raum, ae emasukasukaleaili tee ta teva tue peipeiena tani kupi sso tale ararimangalina ateva God.”

<sup>25</sup> Disaepolo atoa laghe soghiaa saasakiaa teela isaa o inangari me laghe kolomila va, “Me see nonga eroroo tani saanga?”

<sup>26</sup> Iesu ghe taatara lao sio etaira me ghe uela va, “Ta taumattu ngatoa, karika la rooroo tani ghelei isaa o voto, me ta God, eroroo tani ghelei isaa akapa voto.”

<sup>27</sup> Pita ghe liula me ghe uela va, “Ami ghe kasu vuli ekapala voto tani mae usio! Saa nonga ateva ae am ghaaia?”

<sup>28</sup> Iesu ghe uela etaira va, “Aghaaaulia ngakoronna etaimim va, nau voto emene aikolikoliaa nau Natuna ateva Taumattu ngateva etoka tale masi aitokatokane ateva king, lo atoa am aaimuli teeieghi ae am toka tale kasangaulu ghalua (12) aitokatoka uneira namu ngatoa. Me ae am ghelei niaiskei tale kasangaulu ghalua ararimangali nge Israel.

<sup>29</sup> Me lo atoa laghe kasu vulila tanganueira, o tueira me nengaira atoa o tamaira me kinaira me natuira atoa o umaira paa ngutana ta poli ararighi eteae, ae la ghaa ailiuliu tale isaa o voto elau kateva ai (100), me ae la ghaa tee maulue ateva tokatoka liu ia.

<sup>30</sup> Me oroi ila taumattu ngatoa matuutulieniila auet la sioaili euu, me see ila lo atoa arariira euu auet la matuutulieni.”

## 20

### Kiukiu niaimatoonga ataeae tale tau ngai uungu

<sup>1</sup> Iesu ghe mene kiukiu tee lao sio va, “Aghaaaulia ngavalua o poli ararimangali ngepona liu eteva nongina kateva tau kosa. Elue talaua poopooa, ghe lao sio tani kolo tau ngai uungu etoa va la uungu tale umana utani uaeni.

<sup>2</sup> Ila oia tau ngai uungu etoa laghe masimasila tani ghaa kateva kateva silva koen\* tale lo ateva o nau, me namu ngateva ghe sungilala tani laa uungu tale umana utani uaeni etingiu.

<sup>3</sup> “Elue talaua ta 9 kilok, namu ngateva ghe lao sio, me ghe tarala taumattu ngatoa laghe aaitokaa see nongina laghe veluelu eitauaa.

<sup>4</sup> Me eghe uela etaira va, ‘Am tee am roro rooroo tani laa uungu tale utani uaeni etingiu, me auet apoliem tale sa ateva ghulughuluena ia.’

<sup>5</sup> Me laghe kasula.

“Elo sinaka ta 12 kilok, me mene elo alai ta 3 kilok, namu ngateva ghe mene lao sio tani mene gheleila llo eghe ghelei.

<sup>6</sup> Elo alai ta 5 kilok, ghe lao sio me ghe tarala kasina taumattu ghe aaitokaa see, me ghe kolomilala va, ‘Vaalua me ia oia nau eteva am nim tokala etana?’

<sup>7</sup> “Me laghe uela va, ‘Karika teva taumattu etau mae sio righi niuungu etaimami.’

“Ghe uela etaira va, ‘Am tee am laa uungu tale utani uaeni etingiu.’†

<sup>8</sup> “Elo alai ta 6 kilok me tau kosa ateva ghe auliaala ta kapuna tau ngai toitoi eteva va, ‘Kolola tau ngai uungu etoa me utau lao aipoliira. Utau lao aipoliira kateva kateva, utiuaa

**19:17:** Lev 18:5; Luk 10:28.    **19:18:** Eks 20:13-16; Diut 5:17-20.    **19:19:** Eks 20:12; Lev 19:18.    **19:26:** Job 42:2.

**19:28:** Mat 25:31; Luk 22:30; Aotu 3:21.    **19:30:** Mat 20:16; Luk 13:30.    \* **20:2:** silva koen Silva koen (denarius) aipolina kateva nau.    † **20:7:** Kasina uru ngai laghe pitila, laghe mene uela va, *me ae apoli emasinaiem*.    **20:8:** Lev 19:13; Diut 24:15.

ta lo atoa laghe airuuruula tani mae uungu, me elaa ruu ta lo atoa laghe aitiutiula tani mae uungu.'

<sup>9</sup> "Lo atoa taumattu laghe tiuala ta 5 kilok elo alai laghe mae sio me laghe ghaala kateva kateva silva koen.

<sup>10</sup> Me nau eteva lo atoa laghe tiuala ngakasinala laghe mae sio, laghe nnaala va laghe ghaa oroi viliki veu, me karika, ila tee laghe ghaala kateva kateva silva koen.

<sup>11</sup> Laghe tarala viliki veu laghe ghaala me ghe sessailala ta tau kosa ateva, me laghe tiuala tani ailiuinieinia, laghe ue va,

<sup>12</sup> "Ta lo atoa la airuuruula tani uungu, la uungula nonga kateva aoa, me upolilala nongina upoliemamila. Ami gheleila kinatama niuungu eteva, ta ami tiuala arau elue talaua poopooa me sinaka ateva ange sinaki emateamamila."

<sup>13</sup> "Tau kosa ateva ghe nongola inangariira me eghe liu evaluela toko ta kateva kapuna tau ngai uungu va, 'Kapughu, karika agheleila teva voto sesa etam. Karika ughe asokoi teeiegihila va ae ughaa kateva silva koen?

<sup>14</sup> Ghaala aipolim me ukasus. Aghi aghe auliaala va la poli evaluateiem o lo atoa laghe airuuruula tani uungu, tale aloannaaghi.

<sup>15</sup> Koti karika erooroo va ahaimuli tee aloannaaghi tani aikoita uneghi viliki veu, va? Arova aghanana tani ghelei masi niuungu tale taumattu ateva oia, vaalua me esessaio?"

<sup>16</sup> Iesu ghe uela ta kapuna disaepolo atoa va, "Isaa avalua o me oroi ila taumattu ngatoa matuutulienia ila ae la sioaili euu, me see ila lo atoa arariira euu ae la matuutulienia."

*Aiaakotonna Iesu ghe uela va ae emate me emene totu*

(Mak 10:32-34; Luk 18:31-34)

<sup>17</sup> Iesu ghe kasula me ghe laa saesae eJerusalem. Me nau eteva laghe laa saesae, Iesu ghe kolo apalluula nonga kapuna kasangaulu ghalua (12) disaepolo, me ghe auliaala etaira va,

<sup>18</sup> "Am nongo, ita laa saesae eJerusalem, me ae la tau lao Natuna ateva Taumattu ngateva ta nimaira namu ngatoa tale pristi etoa me tau ngai aapasunga tale inangari nipaopao atoa, me ae la ghelei niaisakei etana, me la tingina aitauua tani uvi ematea.

<sup>19</sup> Ae la tauue lao ta taumattu ngeleka atoa, me ae la kusiaa teeia, la uetaia, me la avukalaia tale aikotoo. Emuli tale kotolu nau, ae etotu."

*Jeimis me Jon lalu ghe anna tani namuu*

(Mak 10:35-45)

<sup>20</sup> Emulina, kinairarua ateva natuna alua Sebedi me natuna alua lotolu ghe mae sio ta Iesu. Me kinairarua ghe suuiala me ghe uela va ealoanna kateva voto ta Iesu.

<sup>21</sup> Me Iesu ghe uela va, "Sa ateva uaaloanna?"

Me vaseue ateva oia ghe uela va, "Aghaloanna va uue va ilalua oia natughu elua, lalu toka kalakalangina tale ararimangalim eteva, kateva tale pai muenna ativilau, me kateva tale pai uaise ativilau."

<sup>22</sup> Iesu ghe nongola isaa oia inangari me ghe liula tani ue va, "Karika amalu kilakila amasina llo amalu kookolomi. Amalu rooroo tani ropi tale ia o kapa ateva nimmarikana etana ae aropi etana?"

Me lalu ghe uela va, "Ue, angalu rooroo."

<sup>23</sup> Iesu ghe uela etairarua va, "Koronna, ae amalu ropi tale uneghi kapa ateva, me tani toka tale pai muenna o uaise ativilau, aghi karika uunguaaghi tani tau aatu. Isaa o voto uneira isaa o taumattu Tamaghi ang ghe aimonomonosiaa tau lao sio."

<sup>24</sup> Nau eteva kasangaulu (10) disaepolo laghe nongola isaa o inangari tue me nenga alua lalu ghe kolomila Iesu, eghe sessailala.

<sup>25</sup> Iesu ghe kolo aitauuinilala me ghe uela etaira va, "Am kilakila, isaa o tau ngai toitoi tale tau ngeleka atoa, la gheelei taumattu enim uungu aanasa etaira. Me lo atoa matuutulienia ila, la gheelei saasakiaa ta taumattu ngatoa.

<sup>26</sup> Isaa o ase gheeleiaaira erau mene toka elome etaimim, karika. Lo ateva taumattu eaaloanna tani namuu elome etaimim, esio euu me eghelei nongina tau ngai nonganongo anna atoa.

<sup>27</sup> Me lo ateva taumattu eaaloanna tani muemueinam, etani kapuimim tau ngai uungu.

<sup>28</sup> Nongina Natuna ateva Taumattu ngateva ghe tam sio mae va la uungu etana, karika, ta ghe sio mae tani uungu etaira me tani taula maamauluaane tani ghaa oghi oroi taita me vaseue."

*Iesu ghe ghelei emasinala  
mata salusalu elua*

(Mak 10:46-52; Luk 18:35-43)

<sup>29</sup> Iesu me kapuna disaepolo atoa laghe kasu vulila masaliki taatara ataeae eJeriko, me orioeili taumattu ghe mene usiela.

<sup>30</sup> Me ghalua taumattu lalu ghe tokatoka tale sama salana atikirighi, mata salusalu ilalua. Me nau eteva lalu ghe nongola va Iesu ekasukasu emaemae, me namuu ta lalu ghe kolokoloa va, "Vau eteva, io Natuna io Deivit, ualousiusi teeengalua!"

<sup>31</sup> Nau eteva taumattu ngatoa laghe nongolaluela lalu ghe kolokolo, taumattu ngatoa laghe paopao rungainilalua va, "Amalu rau mene sama." Me ilalu ghe kolokolo anamuu va, "Vau eteva, Natuna ateva Deivit, ualousiusi teeengalua!"

<sup>32</sup> Iesu ghe tinginala, ghe kololaluela me ghe uela va, "Saa llo amalu aloanna va aghelei etaimalua?"

<sup>33</sup> Lalu ghe uela etana va, "Vau eteva, angalu aloanna va uoti matangalua."

<sup>34</sup> Iesu ghe alousiusi teeilaluela, ghe posola matairaru, me arovaeaata matairaru ghe taatarala, me lalu ghe usiela.

## 21

*Iesu ghe kipi ssola ejerusalem  
arovia kingi eteva*

(Mak 11:1-11; Luk 19:28-38; Jon 12:12-19)

<sup>1</sup> Nau eteva ngila ghe aakalakalaa ejerusalem me ngila ghe rekatala tale masaliki eteva eBetpeis tale motouru eteva eOliv, me Iesu ghe suula ghalua tani kapuna disaepolo.

<sup>2</sup> Ghe uela etairarua va, "Amalu muemuela me amalu lao tale masaliki eteaue ngeita taraike lao sio me arovaea ta aue amalu tara donki eteva me natuna ateva la iiri etinginalaluela. Amalu pulakailalua, me amalu maeainalua etaghi.

<sup>3</sup> Arova teva ekolomiemalua, amalu ue etana va, "Vau eteva eanna tani ghelei unguaane etairarua me aue arovaea nonga ta etaue velulalua."

<sup>4</sup> Isaa o voto ghe lutula tani ghelei inangarina propete ateva ghe kaurekatila,

<sup>5</sup> ghe uela va:

"Auliaala ta masaliki taatara ataeae eSaeon,

'Am tara kapuimim kingi eteva emaemae etaimim,  
esiosioaili eeu me eiiolu tale donki,

lo ateva donki aliki taita ia.'

<sup>6</sup> Disaepolo alua lalu ghe kasula tani ghelei voto Iesu ghe auliaala etairarua.

<sup>7</sup> Lalu ghe maeara sio donki eteva kinna ia me natuna ateva, me lalu ghe alokoi saela uneirarua aiaasae ngeleka etairarua, me Iesu ghe laa sae toka etairarua.

<sup>8</sup> Oroiannaaili taumattu laghe lullu velu uneira aiaasae ngeleka me laghe pulepule alokoi tapaa salana, me katoa laghe saisai laa ngai me laghe aalokoi sio tapaa salana.

<sup>9</sup> Lo atoa taumattu laghe muemueainia me lo atoa laghe aimuli etana laghe ovaova tani ue va,

"Tau sae ararina ataeae Natuna ateva Deivit!"

"Niarangise aue etoka ta lo ateva emaemae tale ararina ataeae Vau eteva!"

"Tau sae ararina ataeae God iaaili epona!"

<sup>10</sup> Nau eteva Iesu ghe kipi ssola ejerusalem, taumattu ngakapa ejerusalem ghe soghieiniela, me laghe aikolomieinila va, "See okae?"

<sup>11</sup> Me lo atoa laghe kasukasus teeia laghe ue va, "Iesu oke, propete ia me aNasareti ia eGalilii."

*Iesu tale ale manga*

(Mak 11:15-19; Luk 19:45-48; Jon 2:13-22)

<sup>12</sup> Iesu ghe kipi ssola nongina ale ngeleka atiulu tale ale manga ateva me ghe sungi vella lo atoa laghe aaitauua me laghe poppoli. Ghe sau etakila uneira tevoo atoa lo atoa laghe aikolikoliaa viliki veu me uneira aitokatoka lo atoa laghe aaitauua ghila valusu va la poli.

<sup>13</sup> Ghe uela etaira va, "Laghe pitila tale Uru ngai Manga ateva va, 'Aleghi ale manga ateva la ghaseaseva va ale ailooloo sae ia.' Me am ngam eleiela arova 'aleira ale niaisulua ia tau niainao atoa.'

<sup>14</sup> Mata salusalu etoa me tangorengorena atoa laghe mae sio tani taraia tale ale ngeleka atiulu tale ale manga ateva, me ghe ghelei emasinalala.

<sup>15</sup> Namuu ta pristi etoa me tau ngai aapasunga atoa tale inangari nipaopao laghe tarala masi voto ghe ghelei me vaalua aliki etoa laghe aore tale ale ngeleka atiulu tale ale manga ateva tani ue va, "Tau sae ararina atae Natuna ateva Deivit," me ghe sessai etinginailala.

<sup>16</sup> Me laghe kolomila Iesu va, "Unonganongo llo aliki etoa la ghaulia?"

Iesu ghe liula me ghe uela va, "Ue. Me koti karika am ghe ritila inangari laghe piti elokoila laghe uela va,

"'Ughe aimonomonosiaala lutu ngaliki etoa  
va aue la tau sae ararim atae.'"

<sup>17</sup> Ghe kasu vulilala me ghe kupi ghoala tale masaliki taatara atae me ia o voo ngateva ghe tokala tale masaliki eteva eBetani.

*Iesu ghe kaskienala ai etae (fig)*  
(Mak 11:12-14, 20-24)

<sup>18</sup> Elue talaua poopooa ghe mene laa soso tale masaliki taatara atae me ang ghe maamaloa.

<sup>19</sup> Me ghe tarala fig atae ghe tiitingina tale sama salana atikirighi me ghe lao akalakalangina sio etana me karika righi uenena, nim uruena ia, me ghe uela ta fig atae va, "Karika aue umene kuneaa righi uem." Me arovaeeaa ta fig atae ghe mmataela.

<sup>20</sup> Nau eteva disaepolo atoa laghe tarala isaa o voto laghe soghiaala me laghe kokkolomi va, "Vaalua me arovaeeaa nonga ta emmatela?"

<sup>21</sup> Iesu ghe liula me ghe uela etaira va, "Aghaaulia ngakoronna etaimim va arova am aikaaiia me karika nannaaimim eghaaghluua, karika aue am ghe ghelei nonga voto nongina llo elutluta tale fig atae, ta am rooroo tani ue ta ia o motouru eteva va ekasu me eghoa katuu elamana me aue ghele ghelei.

<sup>22</sup> Arova am aiesoaa, aue am ghaa saa ase voto aue am kokkolomi tale nilooloo sae."

*Nikokkolomi tale matuutulienaane Iesu*  
(Mak 11:27-33; Luk 20:1-8)

<sup>23</sup> Iesu ghe kupi ssala tale ale ngeleka atiulu tale ale manga ateva, me nau ghe tiuala tani apasunga, namu ngatoa ta pristi etoa me lo atoa laghe naanamuu ta taumattu ngatoa laghe mae sio etana, me laghe kolomiela va, "See ghe tau aatu sio matuutuliena etam, me see ghe sungiola tani mae ghelei isaa oia voto?"

<sup>24</sup> Iesu ghe liula me ghe uela etaira va, "Akolomiem mua tale kateva nikokkolomi, me arova am liu ia o nikokkolomi eteva, aue aghauliaa va see ghe tau mae sio matuutuliena etaghi.

<sup>25</sup> Ia Jon ghe asuu taumattu, see ghe tau lao sio matuutuliena etana, taumattu ngatoa, o God?"

Me laghe tiuala tani aissakea elome etaira. Laghe ue va, "Arova ita ue va, 'God,' aue eue teeita va, 'Me vaalua me karika am ghe aairesoaa etana?'

<sup>26</sup> Me arova ita ue va, 'Ta nim taumattu,' ita maamatauta taumattu ngatoa poli ila akapa la ue va Jon propete ia."

<sup>27</sup> Liuna avalua o laghe liula me laghe uela ta Iesu va, "Karika ami kilakila."

Me Iesu ghe uela etaira va, "Aghi tee, karika aue aghauliaa etaimim va see ghe tau mae sio matuutuliena etaghi.

*Kiukiu niamatoonga atae ta tue me nenga alua*

<sup>28</sup> "Vaalua am annaa tale kiukiu etae toko? Kateva taumattu natuna taita alua ghe lao sio ta mua ateva, me ghe uela va, 'Natughu, laa uungu tale utani uaeni.'

<sup>29</sup> "Me mua ateva ghe uela etana va, 'Karika aue alao,' vara me ghe nmaa aioghioghiaala me ghe lao sio.

<sup>30</sup> "Me tamairarua ghe mene auliaala isaa o inangari ta mene aiaaghluena ateva aliki. Ia o lo ateva aliki ghe liula me ghe uela va, 'Ue, namu ngateva, aue alao,' me karika ghe lao sio.

<sup>31</sup> "See ta ngetairarua ghe gheleila llo tamairarua ghe aloanna?"

Laghe liula me laghe uela va, "Aitiutiu eteva."

Me Iesu ghe uela etaira va, "Aghaaulia ngakoronna etaimim va aighaa takis atoa, me vause ngetapaa salana atoa ngeila muemueinam sso tale ararimangalina ateva God.

<sup>32</sup> Poli Jon ghe mae sio etaimim tani apasunga salana ghulughuluena, me karika am ghe aiesoaa llo ghe auliaala, nim aighaa takis nonga atoa me vause ngetapaa salana atoa laghe aiesoaa. Me am ghe taatara poi voto me karika am ghe nanna ngaioghioghiaa me am ghe aiesoaa etana.

*Kiukiu niaimatoonga tale sesa tau ngeutana atoa laghe aitaraa  
utani uaeni etingiu*

(Mak 12:1-12; Luk 20:9-19)

<sup>33</sup> “Am mene nongo kateae kiukiu niaimatoonga. Kateva taumattu ghe pasala utani uaeni etingiu tale kosane ateva, me ghe iri taliaala valavala atea me ghe kaila aiposooa uaeni eteva, me ghe atulula aitiketike ateva, me ghe tau lao sio ta katoa tau ngeutana tani aitarainia, me ghe kasu emasaua.

<sup>34</sup> Nau utana atingiu ghe massola, ghe suula kapuna tau ngai nongonongo anna atoa tani laa ghaa righi unenenna utani uaeni etingiu.

<sup>35</sup> “Lo atoa laghe aitaraa utana atingiu laghe kune atokailala: laghe paru emaamatela kateva, me laghe uvi ematela kateva, me aiaakotonna ateva laghe osaiela.

<sup>36</sup> Me ghe mene suu tau lao sio mene katoa tani kapuna tau ngai nongonongo anna etaira, orioiaira elaulau lo atoa laghe lao akasina sio. Tau ngai toi utana atingiu laghe ghelei teeilala voto nongina lo atoa laghe muemueainilala.

<sup>37</sup> Airuuruu ghe suula natuna ateva tani lao etaira, poli ghe ue va, ‘Aue la oneoneaa natuguhu eteva.’

<sup>38</sup> “Me nau tau ngai toi utana atingiu laghe tarala natuna ateva, laghe sama aitauaala elome etaira va, ‘Lo ateva aue eghaa utana atingiu okae. Ita laa uvi ematea me ita ghaa voto aue peina.’

<sup>39</sup> Mausina avalua o me laghe ghiaielu me laghe sau velue ghoala eleka tale utani uaeni etingiu me laghe uvi emateela.

<sup>40</sup> “Liuna avalua o me lo ateva umana ia utani uaeni etingiu nau erekata, sa ateva aue egheleia ta lo atoa laghe aitarainia?”

<sup>41</sup> Laghe liula me laghe uela va, “Aue egheleia voto sesaaili tale ila o sesa taumattu ngatoa, me aue emene taula utani uaeni etingiu ta mene katoa ppae lo atoa aue la taula uaeni etana nau la pariki.”

<sup>42</sup> Iesu ghe uela etaira va, “Koti am ghe ritila tale Uru ngai Manga ateva, eue va,

“Atu eteva tau ngai atulu ale atoa laghe ratiela

ghe aitiutuila tale atu ekapa atoa tani suei ale ateva.

Vau eteva ghe gheleila isaa o voto,

me taataraaane masinaaili ta mataita.”

<sup>43</sup> “Liuna avalua o me aghaaulilia etaimim va ararimangali eteva epona liu aue God eghaa velua etaimim me emene tauela ta lo atoa taumattu aue la nongo usilainia.

<sup>44</sup> Lo ateva aue ekatu saoaa tale ia o atu eteva aue etakotokoto, me arova atu eteva ekatu saoaa etana aue etaputuputu.”

<sup>45</sup> Nau eteva namu ngatoa ta pristi etoa me Paresi etoa laghe nongola ta Iesu ghe auliaala ia o kiukiu niaimatoongana atea, laghe kilala va ghe aauliaa teeila.

<sup>46</sup> Laghe paepae tikirighi salana tani kuneia, me laghe maamatauta taumattu ngatoa poli ila laghe ue va Iesu propete ia.

## 22

*Kiukiu niaimatoongana atea tale ninamanama atea tale nilai eteae  
(Luk 14:15-24)*

<sup>1</sup> Iesu ghe mene poppooaa etaira tale kiukiu niaimatoonga, ghe ue va,

<sup>2</sup> “Ararimangali ngepona liu eteva nonginaaili kingi eteva ghe aimonomonosiaala ninamanama atea tale nilai eteae ta natuna.

<sup>3</sup> Ghe suula kapuna tau ngai nongonongo anna atoa tani laa ghauliaa ta kolokolona atoa tale ia o ninamanama atea va la mae, me karika laghe annala tani mae.

<sup>4</sup> “Me ghe mene suula katoa tani kapuna tau ngai nongonongo anna. Ghe uela etaira va, ‘Am laa ue ta kolokolona atoa va: Ngaghaimonomonosiaala inana. Kieghi vulumakao atoa taita ila, me morona atoa natu vulumakao ngila uvila me pasila me isaa akapa voto ange aimonomonosiaala. La mae tale ninamanama atea tale nilai eteae.’

<sup>5</sup> “Me karika laghe anna tani nongo me laghe aitiuaala. Kateva ghe lao sio ta ngumane, me kateva ghe lao sio tani ghelei voto aue eghaa viliki veu etana.

<sup>6</sup> Me mene katoa laghe poso atokala kapuna tau ngai nongonongo anna atoa king me laghe ghelei teeilala voto karika masina, me laghe uvi ematela.

<sup>7</sup> King ghe sessaiela, me ghe suula kapuna tau ngai uvii etoa laghe lao sio tani tturu tau ngai uvii emate atoa, me laghe suluila masaliki taataraira atea.

<sup>8</sup> “Me ghe uela ta kapuna tau ngai nonganongo anna atoa va, ‘Ninamanama ateae tale nilai eteae ange aimonomonosiaala, me lo atoa aghe uela va la mae karika masina ila tani mae.

<sup>9</sup> Am lao sio tapaa salana me am kolo sa ateva taumattu am rooroo tani tara.’

<sup>10</sup> Liuna avalua o me tau ngai nonganongo anna atoa laghe lao sio tapaa salana me laghe kolola saa taumattu laghe roola tani tara, sesa me masina, me ale ngai namanama atiulu ghe pasula tale taumattu.

<sup>11</sup> “Me vara kingi eteava ghe kupi ssola tani tara taumattu ghe mae sio me ghe tarala kateva taumattu, karika ghe aasae koloso nilai eteae.

<sup>12</sup> Me ghe kolomiela va, ‘Kapughu, vaalua ukupi sso mae nau karika uaasae teva koloso nilai?’ Me taumattu ngateva karika ghe samala.

<sup>13</sup> “Me king ghe auliaala ta tau ngai uungu etoa va, ‘Am irila kkena me nimane, me am sau velue ghoa eleka tale aavoona me eghoa toka ngangngala me aingeresia ngalungaluna.’

<sup>14</sup> “Poli oroi la kolokolo me malaki llo la suisuitoonga.”

*Tani tau lao takis ta Siisa*

(Mak 12:13-17; Luk 20:20-26)

<sup>15</sup> Vara me Paresi etoa laghe kasula tani laa ghaimonomonosiaa salana vaalua tani ghaa Iesu tale inangarinia.

<sup>16</sup> Laghe suula kapuira disaepolo atoa, me kapuna tee atoa Herot tani lao etana. Laghe uela etana va, “Tisa, io nau ekapa atoa uaauliaa nonga voto koronna me voto uaapasunga tale salane God, koronna ia, karika unannangaili saa llo taumattu ngatoo la annaa, me karika utaatara taumattu taanaanamungaane me uunguaane.

<sup>17</sup> Auliaala etaimami io vaalua nannaam. Vaalua? Masina tani tau lao takis ta Siisa?”

<sup>18</sup> Iesu ghe kilakila voto laghe ailoeaalaa karika masina, me ghe uela etaira va, “Am usimaghalua am, vaalua me am aloanna tani tootoongainaghi?

<sup>19</sup> Am apasungaala viliki veu etivilau etaghi am tautau ta Siisa.” Me laghe maeaa sio viliki veu etivilau ta ngetana. <sup>20</sup> Me ghe kolomilala va, “See tootoona ateva me ararina ateae o?”

<sup>21</sup> Laghe liula me laghe uela va, “Siisa.”

Me ghe uela etaira va, “Am taula llo voto kanna Siisa ta Siisa, me voto kanna God ta God.”

<sup>22</sup> Laghe soghiaala isaa o inangari laghe nongola, liuna avalua o me laghe kasu vuliela.

*Nikokkolomi tale nilai nau nimene totu tale nimate*

(Mak 12:18-27; Luk 20:27-40)

<sup>23</sup> Tale ie nonga o nau eteva, Sadiusi etoa, karika la ghaaiesoaa tale nitotu tale nimate, laghe mae sio tee uneira nikokkolomi eteva.

<sup>24</sup> Laghe uela va, “Tisa, Moses ghe pitila etaimami va, arova taita ateva lailai ia emate me karika righi natuna, nengane aue eghaa vause ateva eraue vuluelaa, tani alutu natuna tuena.

<sup>25</sup> Ghaitu (7) tue me nenga laghe tokatoka teeimami. Aitiuti eteva ghe laila, me ghe matela. Me, poli karika righi natuna, nengane ghe mene ghaala vausenna ateva.

<sup>26</sup> Ase voto ateva o ghe mene lutula ta aiaaghaliene ateva taita me kotonna ateva, me ghe laa sio ruu tale aiaaghaituna ateva.

<sup>27</sup> Airuuruu me vause ateva ghe matela.

<sup>28</sup> Nau nitotu tale nimate, see aue evausenna ia ta ila o tue me nenga ghaitu, poli ila akapa laghe laila etana?”

<sup>29</sup> Iesu ghe liula me ghe uela etaira va, “Nannaaimim karika ghulughuluena, poli karika am kilakila Uru ngai Manga ateva me sarasarakaniaane God.

<sup>30</sup> Nau nitotu tale nimate, taumattu karika aue elai; aue la nongina ensolo atoa epona liu.

<sup>31</sup> Me tale tottotuaaira lo atoa matena ila, karika am ghe ritila voto llo God ghe auliaala etaimim?

<sup>32</sup> ‘Aghi kapuira Goto ieghi Abraham, Aisiki me Jekop.’ Karika va kapuira Goto ia matena atoa ta kapuira Goto ia lo atoa maulue ila.”

<sup>33</sup> Nau taumattu ngatoo laghe nongola laghe soghiaala llo ghe aapasunga.

*Mata ngemua ateva inangari nipaopao*

(Mak 12:28-34; Luk 10:25-28)

<sup>34</sup> Paresi etoa laghe velu eitauaala nau laghe nongola va inangarina Iesu ghe ghelei epaavoola Sadiusi etoa.

<sup>35</sup> Kateva etaira, muennaili ia tale inangari nipaopao, ghe toongiela tale ie toko nikokkolomi eteva.

<sup>36</sup> Ghe uela va, "Tisa, sa ateva inangari tale isaa o inangari nipaopao namuu?"

<sup>37</sup> Iesu ghe liula me ghe uela va, "Uaielousiaa Vaum ateva kapum Goto ia tale urunguitanim me tale maamauluaam me tale nannaam."

<sup>38</sup> Aitiutiu eteva o, me namuu ia tale isaa akapa inangari nipaopao.

<sup>39</sup> Me aiaaghaliene ateva, nongina aitiutiu eteva, "Uaielousiaa taumattu ngateva kalakalangina ia etam, nongina uaaielousieinio."

<sup>40</sup> Isaa akapa inangari nipaopao me lo inangari propete atoa laghe auliaala, etani laolao aitauaa tee ilala o inangari nipaopao alua."

*See tuvuna ia Mesaea?*

(Mak 12:35-37; Luk 20:41-44)

<sup>41</sup> Tale ie nonga o nau eteva Paresi etoa laghe velu eitauaala me Iesu ghe kolomilala va,

<sup>42</sup> "Vaalua am annaa ta Mesaea ngateva? See tuvuna ia?"

Laghe liula me laghe uela va, "Tuvuna ia Deivit."

<sup>43</sup> Me ghe uela etaira va, "Me vaalua me Deivit, Spiriti eteva ghe tokala etana, me ghe kolola ia o taumattu ngateva va Vau ia? Ghe uela va,

<sup>44</sup> "Vau ngepona ateva ghe uela ta kapughu vau eteva va,

"Toka siola tale pai muenna ativilau,

lomose ta aghatoka sio lo atoa la sessa teeio euu,

me uatingina saoaa kkem etaira."

<sup>45</sup> Arova Deivit ghe kolokoloa va 'Kapuna vau eteva,' vaalua me ghe mene nim tuvuna ia?"

<sup>46</sup> Karika teva ghe liula tani mene auliaa righi inangari. Ghe tiuala o, karika teva ghe mene anna tani kolomia tale mene righi nikokkolomi.

## 23

*Aue esesaaili ta tau ngai aapasunga ngatoa tale inangari nipaopao me Paresi etoa*

(Mak 12:38-40; Luk 11:37-52; 20:45-47)

<sup>1</sup> Vara me Iesu ghe uela ta taumattu ngatoa me kapuna disaepolo atoa va,

<sup>2</sup> "Tau ngai aapasunga ngatoa tale inangari nipaopao me Paresi etoa la tokatoka tale unna aitokatoka ateva Moses.

<sup>3</sup> Liuna avalua o me am nongo usilaa me am ghelei ekapa voto la aauliaa etaimim, me am rau mene aimuli tee gheeleiaira, poli voto la ghaauliaa karika la gheelei.

<sup>4</sup> Inangariira aanasaili tale taumattu ngatoa tani aimuli tee, nongina la aatoka sae voto maamatana karika kaakaai me iriiri emasina, ta pappaira taumattu ngatoa, me karika la aaloanna tani sausii tani sau.

<sup>5</sup> Isaa akapaaili voto la gheelei va taumattu ngatoa la taraila. La gheelei enamuu uneira lulu ngaikai me la pitipi inangarina ateva God me la kaakaai sio etana, me kadio atiulu la aakou uruira etana, euu tale aighoughou ghaata, la aavukala voto ghaata la kolokolo va tassel, tani apasunga va ila tau ngai kkauaa ila. <sup>6</sup> La ghaaloannaaili va taumattu ngatoa la oneoneainila, me la ghaaloannaaili tani toka tale uneira aitokatoka namu ngatoa elome tale ale nivelu eitauaa, me nongina namu ngatoa la namanama.

<sup>7</sup> La aloanna va taumattu ngatoa la soula tale masi inangari nongina oroi taumattu etokatoka me la asela va Rabae.

<sup>8</sup> "Me la rau mene aseam va Rabae, poli kateva nonga vauimim ateva,\* me am tue me nenga am.

<sup>9</sup> Me am rau mene aseam va taumattu tale kosa ateva oia va tamaimi ia, poli kateva nonga Tamaim ateva ia epona liu.

<sup>10</sup> Me la rau mene aseam va tau ngai aapasunga iem, poli kateva nonga tau ngai aapasunga ngateva, ia Mesaea ia.

<sup>11</sup> Me lo ateva namuu ia elome etaimim, ia kapuimim tau ngai nongonongo anna ia.

<sup>12</sup> Lo ateva taumattu eaaloanna tani saeaa ararina ateeae, ararina ateeae aue esio euu, me lo ateva taumattu esioaa nannaane euu, aue ararina ateeae esae epona.

13-14 “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghala am! Karika am roo tani tau velu katoa taumattu tani sso tale ararimangali ngepona liu eteva me am, karika am kupikupi sso.<sup>†</sup>

15 “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghala am! Am kasukasu ekapa see elae me elamana tani ghelei kateva taumattu ejiu, me nau angam ghaaiela, am gheeleia va eta uungua ta raroai eteva, me sesa uunguaane elaulau uunguaaimim.

16 “Aue esesaaili etaimim, tau ngai katula ngatoa mata salusalu iem! Am ue va, ‘Arova teva eauliaa inangarina tani ue va, “Koronnaaili tale ale manga ateva,” isaa o inangari karika righi malloeanina, me arova teva eauliaa inangarina tani ue va, “Koronnaaili tale golo tale ale manga ateva,” etani ghelei nongina eaauliaa.’

17 Am mata salusalu iem me alokapakapa am! Sa ateva namuu ia: golo, o ale manga ateva, eaamanga golo?

18 Me am ue tee va, ‘Arova teva eauliaa inangarina tani ue va, “Koronnaaili tale liu nigheli aiaavusuvusuena,” isaa o inangari karika righi malloeanina, me marova teva eauliaa inangarina tani ue va, “Koronnaaili tale isaa o voto epona tale liu nigheli aiaavusuvusuena,” etani ghelei nongina eaauliaa.’

19 Am mata salusaluna am! Sa ateva namuu ia: voto epona la maemaea tani ghelei aiaavusuvusuena, o liu nigheli aiaavusuvusuena ateva eaamanga voto o?

20 Liuna avalua o me lo ateva eauliaa inangari tani ue va, ‘Koronnaaili tale liu nigheli aiaavusuvusuena ateva,’ eaaulia ngakoronna tale liu nigheli aiaavusuvusuena me voto akapa etokatoka epona etana.

21 Me lo ateva eauliaa inangari tani ue va, ‘Koronnaaili tale ale manga ateva,’ eaaulia ngakoronna ta ale manga ateva me ta God, poli God etokatoka tale ale manga ateva.

22 Me lo ateva eue va, ‘Koronnaaili epona liu,’ eaaulia ngakoronna tale unna aitokatoka ateva God me lo ateva etokatoka etana.

23 “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghala am! Am tani ghelei emasinaaili aiaasokolo tale uneimim lutu voto ghaunaaili am ghaaghhaeutana, me karika am uusilaa maamasinaane inangari nipaopao nongina voto ghulughuluena me nialousiusi me uungua niaikaiaa. Isaa o voto am roo tani ghelei me karika am mene kkaluaa isaa o voto ghaunaaili.

24 Alousiusi etaimim, tau ngai katula ngatoa mata salusalu iem! Me am nongina taumattu ngateva ghe anna tani ghaa velu looloo arighi tale ropina manu, me ghe tam taatara kamolo ateva tale ropina manu, me ghe ropi teeielia.

25 “Aue esesaaili etaimim, tau ngai aapasunga ngatoa tale inangari nipaopao me Paresi etoa, usimaghala am! Am ghelei eraarangisana eleka tale kapa ateva me pelete ativilau, me elome pasu ia tale nikuruetu me nitam nanna ngamasina.

26 Paresi etoa am mata salusalu iem! Am ghelei eraarangisana akasina elome tale kapa ateva me pelete ativilau, me auena eleka emene raarangisana tee.

27 “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghala am! Am nonginaaili liu niaikkiaa ngateva la porapora araarangisanaailila eleka me taataraane masinaaili ia, me elome, pasueili ia tale riu taumattu matena me voto atoa karika raarangisana ila.

28 Tale ia o salana atikirighi, eleka etaimim am aapasunga ta taumattu ngatoa va ghulughuluena am, me karika poi, ta elome etaimim pasueili ia tale usimaghala me sesa voto.

29 “Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghala am! Am, am atututu liu niaikkiaa uneira propete atoa me am aamolomolu atu niaimatoonga uneira ghulughuluena atoa,

30 me am ue va, ‘Marova ita ghe tokatoka emua arau nau ta tuvuita atoa, karika aue ita ghe usi tani uvi emate propete atoa.’

31 Am aaulia ngakoronna va tuvuim atoa laghe uvi ematela propete atoa, me am tee am uusilaa uunguaaira tuvuim atoa.

32 Gheleila am me am laa ruu emasina sa ateva tuvuim atoa laghe tiueiniela!

33 “Otuena am me natuira am otuena atoa! Vaalua aue am kasu vuli sessaiaane God tale nau naisakei eteae?

<sup>†</sup> 23:13-14: Kasina uru ngai laghe pitila, laghe uela va, <sup>14</sup> Aue esesaaili etaimim, tau ngai aapasunga ngatoa tale inangari nipaopao me Paresi etoa, am usimaghala am! Am ghaaghha aitaautuaa peiira vase rause vulu etoa, me am kamekame tani ghelei aluseaili nilooloo sae. Nau eteva am lao tale niaiskei, aue am ghaa namungaili nimmarikana. Utara Mak 12:40; Luk 20:47.    23:16: Mat 15:14.    23:22: Ais 66:1; Mat 5:34.    23:23: Lev 27:30; Maeka 6:8.

23:25: Mak 7:4.    23:27: Apos 23:3.    23:28: Luk 16:15.    23:31: Apos 7:52.    23:33: Mat 3:7; 12:34; Luk 3:7.

<sup>34</sup> Liuna avalua o me aue asuu propete atoa, me tau ngalomasaanga, me tau ngai aapasunga ngatoa. Katoa etaira aue am uvi ematela me am avukalaila sae tale aikotoo, me katoa aue am uetaila tale aleimim ale nivelu eitauaa, me katoa aue am laa paela see tale masaliki taatara atoa.

<sup>35</sup> Liuna avalua o me aue am ghaa sesa ngaipolipoli tale taumattu ghulughuluena tale kosa ateva am ghe uvi ematela. Etiitiuaa ta ghulughuluena ateva taumattu Eibol me eruruu ta Sekaraea natuna ia Barakaea, ia o am ghe uvi emateala elome tale ale manga ateva me tale liu nigheli aiaavusuvusuena ateva.

<sup>36</sup> Aghaaulia ngakoronna va sesa ngaipolipolina isaa oia voto aue elutu tale lo ateva oia vituu.

<sup>37</sup> "Jerusalem, Jerusalem! Ughe uvi ematela propete atoa, ughe osala tau ngai kasuua inangarina atoa God tale atu! Ghaisaata aghaloanna tani atoka aitaueinam kapughu taumattu ngatoa, nongina kina paolo ateva eaakou natuna atoa tale kaekaena, me karika am aaloanna!"

<sup>38</sup> Liuna avalua o, me am nongola! God aue ekasu vuli alena ale manga ateva, me masalikiimim taatara ataeae aue taunganua.

<sup>39</sup> Poli aghaauliaa etaimim va karika aue am mene taraieghi, lomosi ta nau eteva aue emae, me aue am ue va, 'Niarangise ta lo ateva emaemaе tale ararina ataeae Vau eteva.'

## 24

*Aimatootoongana tale airuuruu tale nau  
(Mak 13:1-31; Luk 21:7-33)*

<sup>1</sup> Iesu ghe kupi ghoala tale ale manga ateva me ang ghe kasukasus me kapuna disaepolo atoa laghe mae sio etana. Laghe anna tani apasunga ale atoa tale ale manga ateva.

<sup>2</sup> Iesu ghe kolomilala va, "Am taatara isaa oia ale? Koronnaili aghaauliaa etaimim va karika teva atu aue etoka saoaa ta mene kateva. Aue taumattu ngatoa la puli reerekata issaa akapaaili oia voto."

<sup>3</sup> Nau lesu ghe toka siola tale motouru eteva eOliv me kapuna disaepolo atoa laghe mae sio tani kolomi einaoa va, "Auliaala etaimami, lovisaa isaa oia voto elutu me saa righi aimatoonga aue elutu tani apasunga maemaaem me airuuruu tale kosa ateva?"

<sup>4</sup> Iesu ghe liula me ghe uela va, "Am paniem teva taumattu erau kameam.

<sup>5</sup> Poli oroi taumattu aue la mae tale ararighi eteae me la ue va, 'Aghi Mesaea ieghi,' me aue la kame oroi taumattu.

<sup>6</sup> Aue am nongo niaiuvi me kiukiuna me am rau mene matauta isaa o voto, poli isaa o voto aue elutu me airuuruu tale kosa ateva auena emae.

<sup>7</sup> Patunganua atoa aue la ghaiuvieinila me ararimangali etoa aue la ghaiuvieinila tee. Nimaloo atoa me rukeruke aue la lutu tale kasina patunganua tale kosa ateva.

<sup>8</sup> Isaa o voto aue enim aitiutu tale nimmarikana, nongina mmarikegħhaa kinna ateva aliki eteva nau elutulutu.

<sup>9</sup> "Me aue la kuneiem me la tauer lao tani għha nimmarikana me aue la uvi emateam. Ila akpa patunganua atoa aue la ssa teeiem poli ararighi eteae.

<sup>10</sup> Tale ia o nau eteva, oroieili taumattu ngatoa aue la oghi vulu uneira niaikaiaa, me aue la aissa elome etaira, me aue la aitaueinila lao ta tau ngai ssateeira atoa.

<sup>11</sup> Me oroeilei propete kamekame atoa aue la kaurekat me aue la kame oroeilei taumattu.

<sup>12</sup> Poli ssavoto ateva aue enamungaili me niaielousi eteva tale oroi taumattu aue ekapa.

<sup>13</sup> Me see etingina akorokorongana tale unna niaikaiaa tale airuuruu, maamauluaane aue esaanga.

<sup>14</sup> Me ia oia masi kiukiu eteva tale ararimangali eteva epona liu, aue la ppooa ngakapaaie see tale kosa ateva va taumattu ngakapa atoa aue la nongoa, vara me airuuruu tale kosa ateva evira mae."

<sup>15</sup> Iesu ghe mene auliaa tee lao sio va, "Kasina nau aue am tara voto propet Deniol għe auliaala, va voto sesaaili aue elutu elome tale ale manga ateva, me egħelei taumattu ngatoa la kasu vulia me ale manga ateva aue enim toka (lo ateva taumattu aue eriti aue alona aue masaanga).

<sup>16</sup> Nau am tara isaa o voto elutu, lo atoa elome ejjudia am ilou sae tale motouru.

<sup>17</sup> Lo ateva taumattu etokatoka eleka\* tale ale ateva, erau mene kupi sso va esso ghaa righi ghinnanina tanganuena.

<sup>18</sup> Karika mene teva taumattu eutana emene oghi lao tanganuena tani laa ghaa unna aiaasae ngeleka.

<sup>19</sup> Alousiusi ta lo atoa la suusunuku me lo atoa la sussu tale isaa o nau!

<sup>20</sup> Am looloo sae va am rau mene ilou vuli niaiuvi eteae tale nau kkaili o tale nau manga ateva.

<sup>21</sup> Tale isaa o nau taumattu ngatoa aue la ghaa nimmarikana namungaili, aue elau nongina emua arau tale aitiutiui tale kosa ateva me nau ghaine, me auena karika aue mene righi voto avalua o elutu.

<sup>22</sup> Me marova God karika ghe nnaala tani atukuna isaa o nau, karika teva aue ghele saanga. Me poli enannangaili isaa o taumattu ghe suoitoongaala, sesa nau aue etukuna.

<sup>23</sup> Tale isaa o nau, arova teva eue etaimim va, ‘Tarala! Mesaea ngateva toko,’ o, ‘Ie teke,’ am rou mene aikaiaia.

<sup>24</sup> Ta poli katoa taumattu aue la mae me aue la kame va, ‘Aghi Mesaea ngateva’ mene katoa aue la kame va, ‘Aghi propete ieghi,’ aue la mae la ghelei aimatootoongana me voto tani apasunga sarasarakaniaira tani kame taumattu Vau palepale ghe suoitoongaala, kotiva isaa o voto aue eroo.

<sup>25</sup> Am nongola, llo oia ngaghe aulia ngamuemue alokoila etaimim, me auena elutu.

<sup>26</sup> “Liuna avalua o me arova la ue etaimim va, ‘Ie teke tale voto ateva karika righi taumattu etana,’ karika am mene lao. Me marova la ue va, ‘Ie toko elome tale ale atiulu,’ am rau mene aiesoaa.

<sup>27</sup> Poli nongina ravaravaia ateva eramerame aroi lao ta sinaka esae me sinaka esuu, aue enongina maemaeaane Natuna ateva Taumattu ngateva.

<sup>28</sup> Kona eaa taumattu matena easoaso, taotaokko atoa la veluvelu eitauaa.

<sup>29</sup> “Nongina Uru ngai Manga ateva eue va, ‘Nau isaa o sesa nau elange, arovaeanigaili ta

“ “sinaka ateva aue esaurrom  
me ulana ateva karika aue emallanga  
me katto atoa aue la katuu

me voto atoa korokorongana ila elomarase aue la ghaisiisia.” ’

<sup>30</sup> “Tale ia o nau eteva aimatootoongane Natuna ateva Taumattu ngateva ekauerekati elomarase. Patunganua akapa atoa tale kosa ateva aue la alousiusi, nau la tara Natuna ateva Taumattu ngateva aue emae tale urukookoo elomarase, tee sarasarakaniaane me kinatama mallangina ateva.

<sup>31</sup> Me taue ateva aue eaangari enamungaili, me aue esuu kapuna ensolo atoa tani laa kolo aitauaa taumattu ngatoa, ghe suuilala va kapuna ila tale isaa akapanaaili patunganua tale kosa ateva.

<sup>32</sup> “Am rooroo tani ghaa alomasaanga tale kiukiui niaimotoonga tale fig atae. Nau eteva am tara ai eteae ange tulutulu, am kila va masi nau tale sinaka ateva ange kalakalaala.

<sup>33</sup> Liuna avalua o, nau am tara isaa o voto, aue am kila va ange kalakalanginala, tapaa ngatamana.

<sup>34</sup> Aghaaulia ngakoronna ta lo ateva oia vituu va karika poi aue ekapa me isaa o voto aue elutu.

<sup>35</sup> Elomarase me kosa ateva oia aue ekapa me inangarighi karika poi aue ekapa.

*Karika teva ekilakila nau  
isaa o voto aue elutu*

*(Mak 13:32-37; Luk 17:26-30, 34-36)*

<sup>36</sup> “Me karika teva taumattu ekilakila ia o nau eteva me aoa ngateva tee, tee me ensolo atoa epona liu me Natuna,<sup>†</sup> ta Tamaghi nonga.

<sup>37</sup> Nongina ta nau Noa, aue emene nongina maemaeaane Natuna ateva Taumattu ngateva.

<sup>38</sup> Tale isaa o nau auena manu ghagga ateva ghe mae, taumattu ngatoa laghe namanama me laghe ropiropi me taita me vause atoa laghe lailai me ghe ghaala nau eteva Noa ghe kipi ssola tale anua ateva.

<sup>24:17:</sup> Luk 17:31.    \* <sup>24:17:</sup> Tale inangari nge Grik, eue va *etokatoka epona tale pungani ale ateva*.    <sup>24:21:</sup> Den 12:1.    <sup>24:23:</sup> Mat 24:5.    <sup>24:24:</sup> Diut 13:1-3; 2 Tes 2:8-9; Aotu 13:13-14.    <sup>24:26:</sup> Luk 17:23-24.    <sup>24:27:</sup> Mat 24:37-39.    <sup>24:28:</sup> Luk 17:37.    <sup>24:29:</sup> Ais 13:10; 34:4; Esik 32:7; Joel 2:10, 31; 2 Pita 3:10; Aotu 6:12-13.    <sup>24:30:</sup> Sek 12:10; Aotu 1:7; Den 7:13.    <sup>24:31:</sup> 1 Ko 15:52; 1 Tes 4:16.    <sup>24:34:</sup> Mat 16:28.    <sup>24:35:</sup> Mat 5:18.    <sup>24:36:</sup> Apos 1:7; 1 Tes 5:1-2.    <sup>†</sup> <sup>24:36:</sup> Kasina uru ngai laghe pitila, karika laghe pitila *me Natuna*.    <sup>24:37:</sup> Aitiutiui 6:5-8.

<sup>39</sup> Me karika laghe kilakila sa ateva ue ghe lutu, lomosi ta manu ghagga ateva ghe mae sio, me ghe gga vellala. Isaa o voto ue nonginaaili maemaeaane Natuna ateva Taumattu ngateva.

<sup>40</sup> Taita alua ue lalu uungu eutana: kateva ue la ghaaia me kateva ue la rati etokaia.

<sup>41</sup> Ghalua vause ue lalu moomonnaa ngaputuputu katu uiti tani ghelei palaoa: kateva ue la ghaaia, me kateva la rati etokaia.

<sup>42</sup> "Liuna avalua o, me am anguu taatara ta poli karika am kilakila nauna ateva Vauimim ateva ue emae etana.

<sup>43</sup> Am kila llo toko va, marova taumattu ngateva ekila va tau niainao ateva ue emae ainao tale alena ateva, ue etoka anguenguu me karika ue etaui velu alena ateva va tau niainao ateva errutia me ekupi sso.

<sup>44</sup> Liuna avalua o me am tee, am aimonomonosiaa poli Natuna ateva Taumattu ngateva ue emae tale ia o nau eteva karika am nannaa va ue emae etana.

<sup>45</sup> "Lo ateva tau ngai uungu egheelei emasina uunguaane me alomasaanga ia tani aitaraa voto, vauna ateva eroroo tani atokaia tanganauna tani aitaraa kapuna tau ngai uungu etoa me tani taula aneira inana tale nau nighaa inana.

<sup>46</sup> Niarangise ue etoka tale lo ateva tau ngai nonganongo anna, vauna ateva etara va egheelei isaa o niuungu, nau eteva ekiriaa mae.

<sup>47</sup> Aghaaulia ngakoronna etaimim va ue eatokaia va eitaraa ngakapaaili peina.

<sup>48</sup> Me arova tau ngai nonganongo anna ateva uunguaane sesa, ue eue ta urunguitanina ateva va, 'Vaughu eteva karika ue emae parasi,'

<sup>49</sup> me etiuua tani namanama me tani ropi sesa manu tee katoa, me etiuua tani uvi kapuna tau ngai uungu etoa la uungu eitauua teedia.

<sup>50</sup> Ia o tau ngai nonganongo anna ateva kapuna vau eteva ue emae tale ia o nau eteva ennaa va karika ue emae etana.

<sup>51</sup> Nau eteva emae, ue esai putuputua me eatoka teeie lao ta usiemaghala atoa. Aue la ngala me la aingeresa ngalungaluira.

## 25

### *Kiukiu niaimatoongana ateae ta kasangaulu aliki vause*

<sup>1</sup> "Tale nau eteva o ararimangali ngepona liu eteva ue nongina kasangaulu aliki vause. Laghe ghaala kuraairia lam me laghe lao sio tani sou taita ateva elai.

<sup>2</sup> Ghalima etaira alokapakapa me ghalima alomasaanga.

<sup>3</sup> Alokapakapa atoa laghe saula kuraairia lam me laghe tam ghaa teela mene righi oeli.

<sup>4</sup> Alomasaanga nonga atoa laghe ghaala uneira oeli laghe kaola tale uneira aikaai oeli me laghe sau teela kuraairia lam.

<sup>5</sup> Taita ateva elai ghe tam rekataa parasila me laghe mangoola. Liuna avalua o me laghe asekanuela me laghe llusula.

<sup>6</sup> "Elo matuua voo me laghe aaore me laghe ue va, 'Lo ateva elai ange reerekata! Am kupi ghoa mae me am ghoa soua!'

<sup>7</sup> "Me aliki vause atoa laghe totula me laghe kanukanuaala kuraairia lam.

<sup>8</sup> Alokapakapa atoa laghe uela ta alomasaanga atoa va, 'Am tau mae sio righi uneimim oeli etaimami ta kuraaimami lam ange palapala.'

<sup>9</sup> "Laghe liula me laghe uela va, 'Karika ami rooroo poli erau tam roo etaita. Am lao sio ta lo atoa ita polipoli etaira me am laa poli righi uneimim.'

<sup>10</sup> "Nau laghe kasukasu elaoalao tapaa salana, me taita ateva elai ghe rekataala. Llo ghalima aliki vause laghe aimanomanosiaala, laghe kupi eitauua teeie ssola tale ninamanama ateae tale nilai eteae, me laghe kavatila atamana ateae.

<sup>11</sup> "Vara me ghalima aliki vause laghe mene rekataala me ngila ghe kolokolo laghe ue va, 'Namu ngateva, namu ngateva, otila atamana ateae me ami kupi sso.'

<sup>12</sup> "Ghe liula me ghe uela va, 'Aghaaulia ngakoronna etaimim va karika akilakilaiem.' "

<sup>13</sup> Me Iesu ghe uela va, "Liuna avalua o me am tani anguu taatara poli karika am kilakila nau eteva me aoa ngateva.

### *Kiukiu niaimatoongana ateae ta tau ngai nonganongo anna atoa laghe ghaala viliki veu (Luk 19:11-27)*

<sup>14</sup> "Ararimangali eteva epona liu ue mene nongina taita ateva ghe anna tani kasu me auena emene kiri mae, me ghe kolola kapuna tau ngai nonganongo anna atoa me ghe taula peina etaira.

<sup>15</sup> Kateva ghe taula ghalima airari (5,000) gol koen me kateva ghalua airari (2,000) me mene kateva ghe taula kateva airari (1,000). Ghe tau roorooaa lao sio tale uunguaa kateva kateva erooroo tani ghelei me ghe kasula.

<sup>16</sup> Lo ateva tau ngai nongonongo anna ghe ghaala ghalima airari arovaeaa ta ghe kasula tani uungu tale unna tani viliki veu me ghe mene ghaala ghalima airari.

<sup>17</sup> Me lo tee ateva tau ngai nongonongo anna ghe ghaala ghalua airari, ghe mene ghaala ghalua airari.

<sup>18</sup> Me lo ateva tau ngai nongonongo anna ghe ghaala kateva airari ghe lao sio me ghe laa kai sio liu eteva tapaa kosa me ghe aisuliaala unna viliki veu vauna ateva.

<sup>19</sup> "Oroi nau ghe lange sio me vauvau ateva tau ngai nongonongo anna atoa ghe rekatala me ghe anna tani tara llo laghe gheleila tale viliki veu ghe tau lao sio etaira.

<sup>20</sup> Lo ateva tau ngai nongonongo anna ghe ghaala ghalima airari ghe lao tee sio mene ghalima ghe uunguaala, me ghe uela va, 'Vau eteva! Ughe tau mae sio ghalima airari, me tarala, aghe uunguaala mene ghalima airari.'

<sup>21</sup> "Vauna ateva ghe liula me ghe uela va, 'Amasimasieinio, poli ugheelei emasina uunguaam. Poli ughe ghelei emasinala llo niuungu pisike, aue aghatokaio me uitaraa oroi voto. Mae sio me umasimasi eitauaa teeieghi.'

<sup>22</sup> "Lo tee ateva tau ngai nongonongo anna ghe ghaala ghalua airari, ie tee ghe lao sio me ghe uela va, 'Vau eteva! Ughe tau mae sio ghalua airari me tarala, aghe ghaala mene ghalua.'

<sup>23</sup> "Vauna ateva ghe liula me ghe uela va, 'Amasimasieinio, poli ugheelei emasina uunguaam. Poli ughe ghelei emasinala llo niuungu pisike, aue aghatokaio me uitaraa oroi voto. Mae sio me umae masimasi eitauaa teeieghi.'

<sup>24</sup> "Vara me lo ateva tau ngai nongonongo anna ghe ghaala kateva airari ghe lao sio me ghe uela va, 'Vau eteva, akilakila va io tau nisessaeili io, umukemuke voto utam pasapasa me ughaaghhaa uiti karika ughe uungu aanasala etana.

<sup>25</sup> Liuna avalua o me aghe matautula, me aghe lao sio tani kai me aghe aisuliaala unem viliki veu tapaa kosa. Tarala peim isaa toko.'

<sup>26</sup> "Vauna ateva ghe liula me ghe uela va, 'Io sesa tau ngai nongonongo anna io me mangoona io! Ukilakila poi va, amukemuke voto atam pasapasa me aghaaghaha uiti karika aghe uungu aanasala etana.

<sup>27</sup> Ughe roola tani laa ghalokoi uneghi viliki veu, tale ale aialokoi viliki veu, me nau eteva aghe rekata, aue aghe mene ghaa me tee righi laghe mene saoaa sae.

<sup>28</sup> "Liuna avalua o me am ghaala kateva airari etana me am tau lao ta lo ateva unna kasangaulu airari (10,000).

<sup>29</sup> Poli see righi voto etana, aue God emene taula me aue eghaa oroi voto, me lo ateva karika righi voto etana, saa righi lutu voto etana, aue eghaa velu ekapa etana.

<sup>30</sup> Am sau velu ghoala mangoona ateva tau ngai nongonongo anna eleka. Aue la vella ghoa tale kinatama saurrom ateva, me aue la ghoa toka ngangngala me la aingeresia ngalungaluiru.'

### Sipsipi etoa me meemee atoa

<sup>31</sup> "Nau Natuna ateva Taumattu ngateva emae tale mallangina ateva tee me kapuna ensolo atoa,\* aue etoka tale aitokatokane ateva king eaapasunga matuutulienaae.

<sup>32</sup> Taumattu ngakapa atoa tale patunganua akapa atoa tale kosa ateva oia aue la mae velu eitauaa etana me aue epolaila nongina aitoi sipsipi eteva epolapola sipsipi etoa me meemee atoa.<sup>33</sup> Aue eatingina sipsipi etoa ta pai muenna ativilau me meemee atoa ta pai uaise ativilau.

<sup>34</sup> "Me king aue eue ta lo atoa tale pai muenna ativilau va, 'Am mae sio, Tamaghi ghe arangiseiemla. Ta ararimangali eteva ange kaakaluimi ia, tale nau eteva ghe tiuala emua arau nau God ghe gheleila kosa ateva oia.'

<sup>35</sup> Poli nau aghe maamaloo am ghe tautau mae inana etaghi, me nau aghe anna tani ropi am ghe aaropiropieghi, nau ouna aghi tale masalikiimam am ghe ghaaieghi lao tanganueimim.

<sup>36</sup> Nau karika ghinnanighi am ghe tautau mae ghinna etaghi. Nau aghe iisiki am ghe aaitarainaghi, aghe tokatoka tale ale mata voovoo am ghe mae taatarraighehi.'

<sup>25:15:</sup> Rom 12:6.    <sup>25:21:</sup> Mat 24:45-47; Luk 16:10.    <sup>25:29:</sup> Mat 13:12; Mak 4:25; Luk 8:18.    <sup>25:30:</sup> Mat 8:12;

Luk 13:28.    <sup>25:31:</sup> Mat 16:27; 19:28.    \* <sup>25:31:</sup> ensolo atoa Katoa uru ngai laghe pitila, laghe pitila ensolo manga atoa.    <sup>25:32:</sup> Esik 34:17; Autu 20:11-13.    <sup>25:35:</sup> Ais 58:7.

<sup>37</sup> “Me ghulughuluena atoa taumattu aue la kolomia va, ‘Vau ngepona, lovisaa ami ghe taraiola ta ughe maamaloo me ami ghe anginiola, me ughe anna tani ropi me ami ghe tau aatu me ughe ropila?’

<sup>38</sup> Lovisaa ouna io tale masalikimami me ami ghe ghaaio lao sio tanganuemami, o karika ghinnanim me ami ghe tau aatu ghinna?

<sup>39</sup> Me lovissaa ami ghe taraiola ughe iisiki me ughe tokatoka tale ale mata voovoo me ami ghe atu taataraoja?

<sup>40</sup> “Me king aue eliu me eue etaira va, ‘Aghaaaulia ngakoronna etaimim va, saa voto am ghe gheelei tee kateva nengaghi aliki mela ia, am ghe gheelei etaghi.’

<sup>41</sup> “Me aue eue ta lo atoa tale pai uaise ativilau va, ‘Am kasu emasalikaala etaghi, nikasikiena etaimim, me ngam laolao tale kura ateae tokatoka liu ia God ghe aimanomanosieiniela ta Satana me kapuna ensolo atoa.

<sup>42</sup> Poli aghe maamaloo karika am ghe tautau mae inana etaghi, me nau aghe anna tani ropi karika am ghe aaropiropieghi.

<sup>43</sup> Ouna ieghi tale masalikimim, karika am ghe aaikoloainaghi. Karika ghinnanighi, karika am ghe tautau mae righi ghinnanighi. Aghe iisiki me aghe tokatoka tale ale mata voovoo karika am ghe aaitarainaghi.’

<sup>44</sup> “Aue la kolomi va, ‘Vau ngepona, lovisaa ami ghe taraiola ughe maamaloo me ughe anna tani ropi me ouna io tale masalikimami? Me lovissaa karika ghinnanim me ughe iisiki me ughe tokatoka tale ale voovoo me karika ami ghe sausiola?’

<sup>45</sup> “Aue eliu etaira va, ‘Aghaaaulia ngakoronna etaimim va, nau karika am ghe gheelei ta kateva nengaghi aliki mela ia, issaa o voto, am ghe tam gheelei etaghi.’

<sup>46</sup> “Me aue la lao tale sesa nimmarikana ateva tokatoka liu ia me ghulughuluena atoa aue la lao tale maulue ateva tokatoka liu ia.”

## 26

*Laghe aailoeaa Iesu tani uvi ematea*

(Mak 14:1-2; Luk 22:1-2; Jon 11:45-53)

<sup>1</sup> Nau eteva Iesu ghe ruula tani apasunga isaa akapa o voto, me ghe uela ta kapuna disaepolo atoa va,

<sup>2</sup> “Am kilakila va kasi ghalua nau me Pasova ngateva etiuua, me Natuna ateva Taumattu ngateva aue la tauue lao me esae vukala tale aikotoo.”

<sup>3</sup> Me namu ngatoa tale pristi etoa me namu ngatoa la muemua taumattu ngatoa laghe velu eitauaala tale alena ateva Kaeapas, namuu ia ta pristi ekapa atoa,

<sup>4</sup> tani ailloea vaalua la kune aisulia Iesu me la uvi ematea.

<sup>5</sup> Me laghe mae sio nonga ta kateva ninannaa va la rau mene ghelei isaa o voto nau Pasova poli teae niaiuvii erau lutu.

*Vause ateva ghe kaola oeli ta Iesu eBetani*

(Mak 14:3-9; Jon 12:1-8)

<sup>6</sup> Nau Iesu ghe tokala eBetani tanganue Saemon taita ateva emua arau anna tasussuku eteva,

<sup>7</sup> laghe namanama me vause ateva ghe kupi sso mae tee masi aikakkai eteva laghe gheleielaa tale atu eteva alabasta ia, ghe kaakaai llo masi ngusungusuaane me aipolina namungaili me ghe kaola ta uruna ateva Iesu.

<sup>8</sup> Disaepolo atoa ghe sessailala nau laghe tarala llo ghe lutula me laghe ue va, “Eghelei elaelaeala voto ita rooroo tani ghaa viliki veu etana.

<sup>9</sup> Ghe roola va ghe tauela me aue laghe polia tale viliki veu oroi me isaa o viliki veu, laghe roo tani laa tau lao ta lo atoa karika tue peipeiena ila.”

<sup>10</sup> Iesu ghe kilala nannaaира, me ghe liula me ghe uela va, “Vaalua me esessaiem etana nau egheleila masi voto etaghi?

<sup>11</sup> Aue lo atoa karika tue peipeiena ila la toka teeiem nau ekapa atoa, me aghi karika oroi nau aue atoka teeiem.

<sup>12</sup> Ekaola voto masi ngusungusuaane etaghi tani aimanomanosieinaghi tale nau niaikkai.

<sup>13</sup> Aghaaaulia ngakoronna va eaa aue la ppooaa isaa o masi kiukiu tale kosa ateva, aue la ghauliaa tee masi gheeleiaane vause ateva oia, tani nnainia.”

*Jiudas ghe uela va aue etau lao Iesu*

(Mak 14:10-11; Luk 22:3-6)

<sup>14</sup> Me kateva ta kasangaulu ghalua (12) disaepolo, la kolokoloa va Jiudas Iskariot, ghe lao sio ta namu ngatoa ta pristi etoa,

<sup>15</sup> me ghe kolomilala va, "Aue am ghele polieghi ta ghaisa arova aghele tau aatu Iesu etaimim?" Me laghe tau lao sio kotolungaulu (30) viliki veu.

<sup>16</sup> Ghe tiuala tale ia o nau eteva, Jiudas ghe tiuala tani tara teva masi nau aue etauela etaira.

*Iesu ghe namanama teela disaepolo atoa*

(Mak 14:12-21; Luk 22:7-14, 21-23; Jon 13:21-30)

<sup>17</sup> Tale aitutiu eteva nau tale nivelu eitauaa tale verete karika righi isti etana, disaepolo atoa laghe lao sio ta Iesu me laghe kolomiela va, "Uanna va eaa aloi ami laa ghaimonomonosiaa ninamanama ateeae ta Pasova?"

<sup>18</sup> Ghe uela etaira va, "Nau eteva am kupi sso tale masaliki taatara ateeae, aue am tara taumattu ngateva. Am ue etana va, 'Tisa euela va: Nauna ange rekatala me eanna tani nama Pasova ngateva tee kapuna disaepolo atoa tanganuem.'"

<sup>19</sup> Liuna avalua o me disaepolo atoa laghe gheleila voto nongina Iesu ghe auliaala, me laghe aipanipaniaala inana tale Pasova ngateva.

<sup>20</sup> Vara elo alai me Iesu ghe toka tee siola kasangaulu ghalua (12) kapuna disaepolo tale tevo ainamanama ateva.

<sup>21</sup> Laghe namanama me Iesu ghe uela etaira va, "Aghaaulia ngakoronna etaimim va kateva etaimim aue etaueghi lao ta tau ngai ssateeghi etoa."

<sup>22</sup> Nau disaepolo atoa laghe nongola, laghe alousiusieiliila me kateva kateva ghe kookolomia va, "Vau eteva, kотi aghi, no?"

<sup>23</sup> Ghe liula me ghe uela va, "Kateva etaimim ita namanama aitauaa, ia aue etaueghi lao ta tau ngai ssateeghi etoa.

<sup>24</sup> Poli Natuna ateva Taumattu ngateva aue elao nongina Uru ngai Manga ateva eaauliaa va emate. Me alousiusi tale taumattu ngateva etautau lao Natuna ateva Taumattu ngateva ta tau ngai ssateena atoa. Aue ghele masina etana arova ghe tam lutula."

<sup>25</sup> Jiudas, lo ateva taumattu aue ghe tau lao Iesu, ie tee ghe kolomila ghe uela va, "Koti aghi, no, va Rabae?"

Me Iesu ghe uela etana va, "Inangari isaa ona angu auliaala."

*Iesu ghe tau lao sio verete me uaeni ta kapuna disaepolo atoa*

(Mak 14:22-26; Luk 22:15-20; 1 Ko 11:23-25)

<sup>26</sup> Laghe namanama me Iesu ghe ghaala verete ateva, me ghe kokkolomi saela ta God tani arangiseia, me ghe piriela me ghe tau lao sio ta disaepolo atoa, me ghe uela etaira va, "Am ghaala me am nama. Isaa oia verete malataughu."

<sup>27</sup> Me ghe mene ghaala kapa uaeni eteva me ghe mene kaili emasina saela ta God me ghe tau lao sio etaira me ghe uela va, "Am akapa am ropi etana,

<sup>28</sup> poli uaeni eteva oia raeghi ia tani ghelei ouna inangari niappooa ngaitauaa. Raeghi eteva aue eakalaa ta oroi taumattu ngatoa, tani kkaluaa sesa gheeleiaaira.

<sup>29</sup> Aghaauliaa etaimim va karika aue amene ropi righi uaeni lomosi ta aue amene ropi ouna uaeni teeiem tale ararimangalina ateva Tamaghi."

<sup>30</sup> Me laghe ueila kkinari eteae me laghe kupi ghoala tale masaliki taatara ateeae me laghe saela tale motouru eteva eOliv.

*Iesu ghe aulia ngamuemua alokoila llo Pita aue eghelei*

(Mak 14:27-31; Luk 22:31-34; Jon 13:36-38)

<sup>31</sup> Iesu ghe uela etaira va, "Ghaine eleivoo am akapaaili aue am ilou vulieghi, poli Uru ngai Manga ateva eue va,

"Aue avui emate tau ngai toi sipsipi eteva  
me aue sipsipi etoa la ilou reerekataa."

<sup>32</sup> Me nau atotu tale nimate aue amuuemua lao eGalilii me aue am laa taraiieghi okae."

<sup>33</sup> Pita ghe aulia ngaotula va, "Arova ila akapa la ilou vulio, aghi karika poi arooroo tani ilou vulio."

<sup>34</sup> Iesu ghe liula me ghe uela va, "Pita, llo koronna isaa avalua toko va, ia o voo ngateva auena paolo ateva taita eaangari, aue uee akasina kotoluaata va karika ukilakilaieghi."

<sup>35</sup> Me Pita ghe aasarasarakana tani ue va, "Karika poi arooroo tani ue va karika akilakilaio! Arova umate aghi tee aue amate teeio." Ila akapa disaepolo atoa laghe aulia ngavalua o ta Iesu.

*Iesu ghe looloo sae eGetsemeni  
(Mak 14:32-42; Luk 22:39-46)*

<sup>36</sup> Me Iesu ghe ghaala kapuna disaepolo atoa me laghe lao sio tale voto ateva la kolokoloa va eGetsemeni, me ghe uela etaira va, “Am toka oia me aghi aue amene kasu tee lao tani laa looloo sae.”

<sup>37</sup> Ghe kolola Pita me natuna alua Sebedi me ghe tiuala tani alousiusieili, me ang ghe ateateaa saasakiaa.

<sup>38</sup> Me ghe uela etairotolu va, “Maamauluaaghi ange sessaaili tee nialousiusi eteva, me egheleieghi arova amate. Am toka oia me am anguu taatara teeieghi.”

<sup>39</sup> Ghe kasu tee lao sio me ghe tturru siola tapaa kosa matane ghe tau siola me ghe tiuala tani looloo sae. Ghe ue va, “Tamaghi, arova erooroo uakekkeliieghi tale ia oia kapa nimmarihana ateva ange aanna tani ghiaieghi. Me karika umene ghelei tale aloaloannaaghi ta ughelei tale aloonnaam.”

<sup>40</sup> Ghe kiriaa lao sio ta disaepolo kotolu me ghe tarailotolla ta lotolu ghe aseasekanua me ghe uela ta Pita va, “Karika erooroo va am nim anguu taatara teeieghi ta kateva nonga aoa?”

<sup>41</sup> Am anguu taatara me am looloo sae ta God va karika am mene katuu tale nitootoonga. Nannaaaimim eanna tani ghelei voto, me vilikimim mangoona.”

<sup>42</sup> Ghe kasu vulilala me ghe mene lao sio tani looloo sae, ghe ue va, “Tamaghi, arova ia oia kapa nimmarihana ateva etam kkelieghi me aropia, aue aghelei aloaloannaam.”

<sup>43</sup> Vara ghe mene kiriaa mae sio etairotolu me ghe mene saopilotolla ta latolu ghe aseesekanua, poli matairotolu ghe maamaateaili.

<sup>44</sup> Me ghe mene lao sio tani looloo sae aiaakotonna. Ghe aauliaa inangari ang ghe auliaala mua.

<sup>45</sup> Ghe mene kiriaa lao sio ta disaepolo atoa me ghe uela etaira va, “Am aseasekanua me am kaakaarasi tani ainoana, va? Am tarala! Nau ange rekatala va Natuna ateva Taumattu ngateva ngila tautauela ta nimaira sesa taumattu ngatoa.

<sup>46</sup> Amotolu totula me ita kasu! Lo ateva etautaueghi lao ta tau ngai ssateeghi etoa ange reerekata.”

*Laghe kunela Iesu  
(Mak 14:43-50; Luk 22:47-53; Jon 18:3-12)*

<sup>47</sup> Nau ghe auliaala llo me Jiudas, kateva ta kasangaulu ghalua (12) disaepolo, ghe rekata teela taumattu ngatoa oroiannaaili ila me laghe posoposo baenata me tuku ngai. Namu ngatoa ta pristi etoa me namu ngatoa laghe sungilala.

<sup>48</sup> Lo ateva ghe tau lao sio etaira ghe auliaa tau lao sio niaimatoongana ateva aue egheleia. Ghe uela va, “Lo ateva taumattu angusua, ia o lo ateva am kuneia.”

<sup>49</sup> Liuna avalua o me Jiudas ghe lao sio ta Iesu me ghe uela va, “Rabae!” me ghe ngusuela.

<sup>50</sup> Me Iesu ghe uela etana va, “Kapughu, gheleila voto umae sio tani ghelei.”

Laghe kunela Iesu me laghe poso atinginaiela.

<sup>51</sup> Kateva taumattu ghe tiitingina tee Iesu ghe ghaala baenata ateva me ghe sai patela talingane ativilau kateva kapuna tau ngai nonganongo anna namu ngateva ta pristi etoa.

<sup>52</sup> Me Iesu ghe uela etana va, “Kaaila baenata ateva, poli lo atoa la aaiuvii tale baenata, aue la uvila tale baenata ateva.

<sup>53</sup> Karika ukilakila va arooro tani kolomi sae Tamaghi tani tau sio oroenaaaili ensolo atoa me arovaeeaa nonga ta aue ghele sungila?

<sup>54</sup> Me arova aghele ghelei, vaalua aue voto Uru ngai Manga ateva ghe auliaala aue ghele lutu ekoronna?”

<sup>55</sup> Me Iesu ghe uela ta taumattu ngatoa va, “Am annaa vara aghi tau ngai uvii me sari ghinna ieghi va am sau mae sio baenata me tuku ngai tani kuneieghi? Vaalua me karika am ghe kunekeunieeghi nau aghe aapasunga nau ekapa atoa tale ale manga ateva?”

<sup>56</sup> Isaa o voto ghe lutululu tani rooaa inangariira propete atoa laghe piti elokoila tale Uru ngai Manga ateva.” Tale ia o nau eteva, disaepolo akapa atoa laghe kasu vuliela me laghe iloula.

*Iesu ghe tinginala emua ta kansolo atoa  
(Mak 14:53-65; Luk 22:54-55, 63-71; Jon 18:13-14, 19-24)*

<sup>57</sup> Me taumattu ngatoa laghe kunela Iesu me laghe laoainie sio tanganue Kaeapas namuu ia ta pristi etoa, nongina tau ngai aapasunga ngatoa tale inangari nipaoapao me namu ngatoa laghe velu eitauaala.

<sup>58</sup> Vara me Pita ghe aaimuli me karika ghe kalakalaa. Ghe kupi ssola tale valavala atae ghe taataliaa alena ateva namu ngateva tale pristi etoa me ghe toka tee siola tau ngai toitoi etoa. Ghe toitoi tani tara va sa ateva aue ghe lutu ta Iesu.

<sup>59</sup> Namu ngatoa ta pristi etoa, me kansolo akapa atoa, laghe paepae righi taumattu aue laghe aikamea righi voto tee Iesu me laghe uvi ematea.

<sup>60</sup> Oroi taumattu laghe ghaala tani auliaa tee Iesu tale inangari kamena, me kansolo atoa karika laghe tara poila righi voto laghe aauliaa tee Iesu me laghe roo tani uvi ematea.

Vara me ghalua taumattu lalu ghe mae sio.

<sup>61</sup> Lalu ghe uela va, "Taumattu ngateva oia ghe uela va, 'Arooroo tani rruti alena ale manga ateva God me aue aghatulua ta kotolu nonga nau.'

<sup>62</sup> Namu ngateva ta pristi etoa ghe tingina saela me ghe uela ta Iesu va, "Karika aue uliu inangariira? Vaalua tale inangari la ghaauliaa teeio?"

<sup>63</sup> Me Iesu ghe nim maamatuaa tingina.

Me namu ngateva ta pristi etoa ghe uela etana va, "Tale ararina atae God tokatoka liu ia, aghanhaa va uauliaa etaimami va koronna va io Mesaea, Natuna io God?"

<sup>64</sup> Iesu ghe liula me ghe uela va, "Ue, nongina angu auliaala. Aue am tara Natuna ateva Taumattu ngateva ta etoka sio tale pai muenna ativilau ta lo ateva sarasarakania ia, me esio tale karaane epona liu."

<sup>65</sup> Vara me namu ngateva ta pristi etoa ghe rasila ghinnanina tani apasunga va ghe tam aloannala tani nongo, me ghe uela va, "Ange ghaala liuna ateva God! Karika ita mene aloanna mene righi taumattu tani auliaa mene righi inangariira poli ngam nongola voto ange auliaala.

<sup>66</sup> Vaalua am annaa?"

Laghe liula me laghe uela va, "Ange gheleila voto sesa erooroo va emate."

<sup>67</sup> Me laghe tiuuala tani kanusuiaa matane Iesu me laghe tuutumaria me katoa laghe pooposalaia.

<sup>68</sup> Me laghe ue etana va, "Poli Mesaea io, uauliaa inangarina God va see ange posalaia."

*Pita ghe uela va etam kilakila Iesu*

(Mak 14:66-72; Luk 22:56-62; Jon 18:15-18, 25-27)

<sup>69</sup> Pita ghe tokatoka elome tale valavala atae ghe taataliaa alena ateva namu ngateva ta pristi etoa, me kapuna vause tau ngai nonganongo anna ateva ghe lao sio etana me ghe uela va, "Io tee ughe kasukasu tee Iesu aGalilii ia."

<sup>70</sup> Me ta mataira akapa, Pita ghe liula me ghe uela va, "Karika akilakila isaa ona inangari uaauliaa."

<sup>71</sup> Me ghe kupi ghoala tale atamana atae tale valavala atae me mene kateva vause tau ngai nonganongo anna ia ghe taraiela me ghe uela ta taumattu ngatoa va, "Ia oia taumattu ngateva ghe kasukasu tee Iesu aNasareti ia."

<sup>72</sup> Me Pita ghe mene uela va, "Karika!" Me ghe uela va, "Koronnaaili ta epona liu va karika akilakila ia ona taumattu ngateva."

<sup>73</sup> Vara karika masau me lo atoa laghe tiitingina akalakalangina teeia laghe uela etana va, "Koronnaaili va io kateva etaira, poli samasamaam arova aGalilii eteva."

<sup>74</sup> Me Pita ghe uela va, "Koronnaaili ta God va karika akilakila ia ona taumattu ngateva!"

Vara me paolo ateva taita ia ghe aangarila.

<sup>75</sup> Arovaea ta Pita ghe annaala inangarina Iesu ghe uela va, "Auena paolo ateva taita ia eaangari, aue uue akasina kotoluaata va karika ukilakilaieghi." Pita ghe kupi ghoala me ghe ngalaalousiusieiliila.

## 27

*Laghe laoaa sio Iesu ta Paelat*

(Mak 15:1; Luk 23:1-2; Jon 18:28-32)

<sup>1</sup> Elue talaua poopooa namu ngakapa atoa ta pristi etoa me namu ngatoa laghe mae sio nonga tale kateva ninannaa va la uvi emate Iesu.

<sup>2</sup> Laghe iriela me laghe kasueiniela tani laoainia ta Paelat gavanaa ia.

*Judas ghe nauela*

(Apos 1:18-19)

<sup>3</sup> Nau Jiudas, ia o taumattu ngateva ghe tau lao sio Iesu ta tau ngai ssateena atoa, ghe tarala va ue la uvi emate Iesu, ghe maateailila ta nannaane me ghe mene laoaa sio viliki veu erooroo kotolungaulu (30) silva koen namu ngatoa ta pristi etoa me namu ngatoa laghe tau lao sio etana.

<sup>4</sup> Ghe uela va, “Ngagheleila voto karika masina tani tau lao taumattu ngateva karika righi kanna ssavoto va la uvi ematea.”

Laghe liula me laghe uela va, “Ami saa etana? Uunguaam ona.”

<sup>5</sup> Jiudas ghe sau velu elokoi siola viliki veu tale ale manga ateva me ghe kasula tani laa naua.

<sup>6</sup> Namu ngatoa ta pristi etoa laghe ghaa siola viliki veu me laghe uela va, “Uneita loo eue va karika masina tani alokoi sso tale ale viliki veu, poli viliki veu rae llo oia.”

<sup>7</sup> Liuna avalua o me laghe mae sio tale kateva ninannaa va, tale isaa o viliki veu aue la poli tuku kosa ateva kaluira ia lo atoa laghe gheelei sospena tale kosa me aue liu niaikkaiaira ia ativuu etoa.

<sup>8</sup> Liuna avalua o me tale isaa oia nau la aseasea va kosa tale rae ia.

<sup>9</sup> Me llo voto propete Jerimaea ghe auliaala ghe kaurekatila, ghe uela va, “Laghe ghaala kotolungaulu silva koen, aipolipoli eteva taumattu nge Israeli etoa laghe aseala etana va la polia,

<sup>10</sup> me tale isaa o viliki veu laghe polila tuku kosa ateva laghe gheelei sospena kosa etana, nongina Vau ngepona ateva ghe auliaala etaghi.”

*Iesu ghe tinginala emua ta Paelat*

(Mak 15:2-15; Luk 23:3-5, 13-25; Jon 18:33-19:16)

<sup>11</sup> Vara me Iesu ghe tinginala emua ta Paelat gavana ia me ghe kolomiela va, “Io kingi io ta ajiu etoa?”

Iesu ghe liula me ghe uela va, “Ue, nongina uaauliaa.”

<sup>12</sup> Nau eteva namu ngatoa ta pristi etoa me namu ngatoa laghe aauliaa teeia inangari emua ta matane Paelat, karika poi Iesu ghe liula.

<sup>13</sup> Me Paelat ghe kolomiela va, “Karika unonganongo inangari la ghaauliaa teeio?”

<sup>14</sup> Me karika poi Iesu ghe liula teva tuku inangari laghe aauliaa teeia. Me gavana ghe soghiaala isaa o voto ghe tarala etana.

<sup>15</sup> Kateva voto gavana ghe gheeleia nonga nau tale nivelu eitaua ngateae ta Pasova, ghe tautau velu lo ateva taumattu tale ale mata voovoo taumattu ngatoa laghe anna va etau velua.

<sup>16</sup> Isaa o nau kateva taumattu, taumattu ngakapa atoa laghe kilakilaia va sesa taumattu ia, ghe tokatoka tale ale mata voovoo, ararina ateaet Barabas.\*

<sup>17</sup> Nau taumattu ngatoa laghe mae sio tani velu eitauaa, Paelat ghe kolomilala va, “Am alona va atau velu see me emene atu etaimim: Barabas o Iesu la kolokoloa va Mesaea etana?”

<sup>18</sup> Poli Paelat ghe kilakila va laghe tam nannaee tee Iesu righi masina, liuna avalua o me laghe maeainie sio etana.

<sup>19</sup> Paelat ghe tokatoka tale aitokatoka ateva aighelei niaisakei ia, me vausenna ateva ghe suula inangari va, “Urau mene ghelei righi voto tale taumattu ngateva ona karika righi gheeleiaeae sesa. Poli ia me ngaghaala oroieili mmarikeana tale maamauluaaghi nau aghasoasopila eleivoo.”

<sup>20</sup> Namu ngatoa ta pristi etoa me namu ngatoa laghe paapasali taumattu ngatoa va etau velu Barabas me evui emate Iesu.

<sup>21</sup> Gavana ghe kolomilala va, “See etairarua am anna va atau velua me emene atu etaimim?”

Laghe liula me laghe uela va, “Barabas.”

<sup>22</sup> Me Paelat ghe kolomilala va, “O sa ateva aghelei ta Iesu la aseasea va Mesaea ia?”

Ila akapa laghe liula me laghe uela va, “Uavukalaiaeae sae tale aikotoo.”

<sup>23</sup> Me Paelat ghe kolomilala va, “Poli sa ateva voto sesa ghe gheeleila?”

Vara me laghe tiuaala tani sama anamungaili va, “Uavukalaiaeae sae tale aikotoo.”

<sup>24</sup> Nau Paelat ghe tarala va karika ang ghe rooroo tani ghelei righi llo, me niaikkaluii eteae ang ghe tiitiuaa, ghe ghaala manu me ghe porala nimane emua ta taumattu ngatoa me ghe uela va, “Karika righi inangarighi tale raena ateva taumattu ngateva oia. Sa ateva elutu etana uunguaaimiim.”

<sup>27:5:</sup> Apos 1:18-19; Mat 26:14-15.    <sup>27:9:</sup> Sek 11:12-13.    <sup>27:12:</sup> Ais 53:7.    \* <sup>27:16:</sup> Kasina uru ngai laghe pitila, laghe pitila va Iesu Barabas.    <sup>27:18:</sup> Jon 11:47-48; 12:19.    <sup>27:24:</sup> Diut 21:6-9.

<sup>25</sup> Taumattu ngatoa laghe liula me laghe ue va, "Utau velu rangane ateva etoka etaimami me natuimami etoa."

<sup>26</sup> Me ghe tau vella Barabas ghe mene lao sio etaira me Iesu laghe uetaielia mua me ghe taue lao sio va la laa ghavukalaie sae tale aikotoo.

*Soldia ngatoa laghe aanamisaa Iesu*

(Mak 15:16-20; Jon 19:2-3)

<sup>27</sup> Me kapuna soldia ngatoa gavana laghe ghaala Iesu me laghe ssoainiela tanganuena Gavana ngateva, me laghe kolo akapala soldia ngatoa me laghe tomuela.

<sup>28</sup> Laghe ghaa vella ghinnanina me laghe asae taula aiaasae ateva raeraeana ia,

<sup>29</sup> me laghe ghaala uasa rorroana me laghe navituala kou nguru eteva me laghe atokae saela ta uruna. Me laghe atinginala ai eteae ta nimane muenna atelange, me laghe susuusua emua etana me laghe pipilosia tani ue etana va, "Ei, kapuira kingi eteva ajiu etoa!"

<sup>30</sup> Laghe kaakanusuia me laghe ghaala ai eteae ta nimane me laghe paruparu uruna ateva.

<sup>31</sup> Nau laghe ruula tani anamisainia, laghe ghaa vella aiaasae ateva etana me laghe mene asae taula ghinnanina me laghe kasueiniela tani laa avukalaie sae tale aikotoo.

*Laghe avukala saela Iesu tale aikotoo*

(Mak 15:21-32; Luk 23:26-43; Jon 19:17-27)

<sup>32</sup> Nau laghe laa ghoa eleka, laghe soula taumattu ngateva atala nge Saerini ia, ararina atea ta Saemon, me laghe aecala me laghe sungiela va esau aikotoo ateva.

<sup>33</sup> Laghe rekatala tale voto ateva ararina atea ta Golgota, malloeana va Voto ateva arova Riu uru taumattu ngateva.

<sup>34</sup> Tale ia o voto ateva laghe tau lao sio uaeni ta Iesu va eropi. Laghe kao aitauua teela voto kaakaalina, me nau Iesu ghe tootoongaala, ghe tam annala tani ropi.

<sup>35</sup> Nau laghe avukalaie saela tale aikotoo me laghe tiuuala tani anamisi tani aikoita ghinnanina.

<sup>36</sup> Me laghe toka siola tale ia o voto ateva tani toi etokaia va ghe tani mate.

<sup>37</sup> Epona nongina uruna ateva laghe pitila me laghe avukalala inangari laghe laoainie sio tale niaisakei etana eue va, "Ia oia Iesu, kapuira kingi ia ajiu etoa."

<sup>38</sup> Taita alua lalu ghe aaivii me lalu ghe ghaaghaa peiira taumattu ngatoa, lalu tee laghe avukala teeilalue saela, kateva ta pai muenna ativilau me kateva ta pai uaise ativilau.

<sup>39</sup> Me taumattu ngatoa laghe kasukasu tapaa salana, laghe aauliaa teeia inangari karika masina. Laghe ringaringa uruira,

<sup>40</sup> me laghe ue va, "Io urooro tani rruti ale manga ateva me umene atulua ta kotolu nonga nau, asaangiola me ukkure sio tale aikotoo ateva, arova Natuna io God."

<sup>41</sup> Namu ngatoa ta pristi etoa me tau ngai aapasunga ngatoa tale inangari nipaopao me namu ngatoa, ila tee laghe aauliaa teeia inangari.

<sup>42</sup> Laghe ue va, "Eghe asaangila katoa, me karika erooroo tani asaangia! Ia kapuira kingi ia alIsraeli etoa! Am tau veluela me ekkure sio tale aikotoo ateva me aue ami aiesoaa etana.

<sup>43</sup> Ghe aatoka tuutulina ta God. Tau veluela me ghaine God easaangia arova eaannaia, poli ghe ue va, 'Aghi Natuna aghi God.'

<sup>44</sup> Tale ie nonga o salana atikirighi tau niainao tee alua laghe avukala teeilalue saela tale aikotoo, lalu ghe aauliaa teeia inangari.

*Matemateaane Iesu*

(Mak 15:33-34; Luk 23:44-49; Jon 19:28-30)

<sup>45</sup> Ghe tiuuala ta pai ngelo sinaka<sup>†</sup> me saurrom ateva ghe akoula kosa ateva, ghe roola kotolu aoa.

<sup>46</sup> Gharighi ghe 3 kilok<sup>‡</sup> me Iesu ghe ngala anamungailiila me ghe uela va, "Eli, Eli, lama sabaktani?" malloeana va, "Kapughu Goto ateva, kapughu Goto ateva, vaalua me angu tau velueghila?"

<sup>47</sup> Nau Katoa ta lo atoa laghe tiitingina akalakalangina laghe nongola, laghe uela va, "Ekolokolo Elaija."

<sup>27:25:</sup> Apos 5:28.    <sup>27:28:</sup> Luk 23:11.    <sup>27:30:</sup> Ais 50:6.    <sup>27:34:</sup> Sams 69:21.    <sup>27:35:</sup> Sams 22:18.    <sup>27:38:</sup>

Ais 53:12.    <sup>27:39:</sup> Sams 22:7; 109:25.    <sup>27:40:</sup> Mat 26:61; Jon 2:19.    <sup>27:43:</sup> Sams 22:8.    <sup>†</sup> <sup>27:45:</sup> *pai ngelo sinaka* Tale inangari nge Griek, *ghaonomina* (6) ateva aoa.    <sup>27:46:</sup> Sams 22:1.    <sup>‡</sup> <sup>27:46:</sup> 3 kilok Tale inangari nge Griek, *ta aiaaghasiona* (9) ateva aoa.

<sup>48</sup> Arovaea ta kateva ghe iloula tani laa ghaa tuku spans ateva me ghe asuuuela tale uaeni kaakaalina me ghe apasapasaiela tale ai eteae me ghe tauve saela va Iesu ghe mmua.

<sup>49</sup> Mene katoa laghe ue va, "Tau veluela me ie nonga evukala, me ita tara arova Elaija aue emae asaangia."

<sup>50</sup> Me nau eteva Iesu ghe mene aore namungailila me ghe tau vella maamauluuaane.

<sup>51</sup> Tale ia o nau eteva, kadio atiulu ghe vuuvukala tale ale manga ateva ghe tarriila me ghe ghaluevilaula, ghe laa sae tiuua epona me ghe laa sio ruu euu. Me kosa ateva ghe aisiisiaala me atu etoaa laghe tapolapolakala.

<sup>52</sup> Liengani niaikkaia ngatoa ghe ottilala me oroi ila taumattu ngatoa manga ila laghe matela laghe totula me laghe mene mauluela,

<sup>53</sup> me laghe totu vulula liengani niaikkaiaa me vara Iesu ghe totula tale nimate me laghe aotuotula ta orioeili ila taumattu ngatoa tale masaliki taatara atea manga ia.

<sup>54</sup> Nau lo ateva tau ngai uvii ghe aaitoiaa kateva ai (100) tau ngai uvii me lo atoa laghe toitoi evukala Iesu, laghe tarala rukeruke ateva me isaa akapa voto ghe lutula, laghe matautu etinginala me laghe uela va, "Koronna taumattu ngateva oia Natuna ia God."

<sup>55</sup> Oroi ila vause atoa laghe tiitingina amasau me laghe taatara. Laghe usilaa Iesu eGallilii tani aisausieinia.

<sup>56</sup> Elome ta ila o vause atoa, Meri aMakdala ia me Meri kinairarue ia Jeimis me Josep<sup>§</sup> me kinairarua ateva natuna alua Sebedi.

### *Kaakaiaane Iesu*

(Mak 15:42-47; Luk 23:50-56; Jon 19:38-42)

<sup>57</sup> Ghe elo alaila me taumattu ngateva, tue peipeiena ia, ararina atea ta Josep me tanganuena tale masaliki taatara atea eArimatia, ghe rekatala, ie tee kapuna disaepolo ia Iesu.

<sup>58</sup> Ghe lao sio ta Paelat me ghe kolomila Iesu etana. Me Paelat ghe uela va la tau lao Iesu etana.

<sup>59</sup> Josep ghe ghaala Iesu me ghe sumuela tale masi kadio raarangisana.

<sup>60</sup> Me ghe alokoiola tale unna liengani niaikkaia ngateae, ghe kaie ssola elome tale vallae. Ghe atakirila kinatama atu eteva tani tingina airungaa liengani niaikkaia ngateae, me ghe kasula.

<sup>61</sup> Meri aMakdala ia me mene kateva Meri lalu ghe tokatoka tale kativilau pai nongina liengani niaikkaia ngateae.

### *Lo atoa laghe aaitoiaa liengani niaikkaia ngateae*

<sup>62</sup> Vara mene kateva nau, nau manga ia, me namu ngatoa ta pristi etoa me Paresi etoa laghe lao sio ta Paelat.

<sup>63</sup> Me laghe uela etana va, "Namu ngateva, ami nannaa ia o tau nikamekame ateva nau maulue ia ghe ue va, 'Vara kotolu nau elange me aue amene totu.'

<sup>64</sup> Liuna avalua o me uaulia ngasarasarakan me la tani ghelei ekorokorongana lienga niaikkaia ngateae lomosi ta kotolu nau elange, poli kapuna disaepolo atoa la rau laa ghainaoa me la laa ue ta taumattu ngatoa va ange totula tale nimate. Lo ateva o nikamekame aue sesaaili tale lo akasina ateva nikamekame."

<sup>65</sup> Paelat ghe liula me ghe uela va, "Am ghaala tau ngaitoittoi etoa me am laa ghelei ekorokorongan liengani niaikkaia ngateae nongina vaalua am kilakila."

<sup>66</sup> Liuna avalua o me laghe lao sio me laghe ghelei ekorokoronganala liengani niaikkaia ngateae me laghe atokala aimatootoongana ateva tale atu eteva va arova teva eghaa velua, aue la kila, me laghe atinginala tau ngaitoittoi etoa tani aitoieinia.

## 28

### *Iesu ghe mene totula*

(Mak 16:1-8; Luk 24:1-12; Jon 20:1-10)

<sup>1</sup> Nau eteva nau manga ateva ghe ruula, me elue talaua poopooa tale aitiutiui eteva tana nau, Meri aMakdala ia me mene kateva Meri lalu ghe lao sio tani taatara tale liengani niaikkaia ngateae.

<sup>2</sup> Paka rukeruke ateva ghe lutula nongina lalu ghe tiitingina ta kapuna ensolo ateva Vau palepale ghe sio mae epona liu me ghe atakiri vella atu eteva ghe gheelei runga liengani niaikkaia ngateae me ghe tokala epona tale atu eteva.

<sup>3</sup> Mallanga ateva ta vilikina tani nonginaaili ravaravaia ateva me unna aiaasae usousoanaaili nongina karaane ateva.

<sup>4</sup> Lo atoa laghe aitoiaa liu niaikkaia ngateva laghe matautu saasakiaala, laghe reterete me laghe katu ngalokoi siola tapaa kosa tani nonginaaili matena atoa taumattu laghe asoaso.

<sup>5</sup> Vara me ensolo ateva ghe uela ta vause atoa va, “Am rau mene matautu. Akilakila va am aloanna tani tara Iesu, ia o ghe matela tale aikotoo.

<sup>6</sup> Karika ia oia. Ange totula nongina ghe auliaala. Am lange sso tara nongina laghe alokoioela.

<sup>7</sup> Gharovaeaata ta am kasu me am laa auliaa ta kapuna disaepolo atoa va ange totula tale nimate, me aue am taraia eGalilii, ta ange muemue lao sio okae.”

<sup>8</sup> Vause atoa laghe matautula me laghe pasula tale nimasimasi. Gharovaea ta laghe kasu vulila liengani niaikkaia ngateae me laghe masimasi etinginala tani laa ghauliaa kieira disaepolo atoa.

<sup>9</sup> Nau eteva laghe laolao, Iesu ghe sousoulala me ghe uela etaira va, “Elue talaua.” Me laghe mae akalakalaa sio tale liue kkena Iesu me laghe posoposo kkena me laghe kkaueiniela.

<sup>10</sup> Me Iesu ghe uela etaira va, “Am rau mene matautu. Am laa ghauliaa ta tueghi me nengaghi etoa va la lao eGalilii me aue la laa taraieghi okae.”

#### *Inangariira lo atoa laghe toitoi liengani niaikkaia ngateae*

<sup>11</sup> Nau eteva vause atoa laghe kasukasu elaolao tau ngai uvii etoa laghe aitoiaa liengani niaikkaia ngateae laghe ssola tale masaliki taatara ateae me laghe aulia ngakapaailiila voto ghe lutula ta namu ngatoa ta pristi etoa.

<sup>12</sup> Nau eteva namu ngatoa ta pristi etoa laghe nongola, laghe kolo aitauaala namu ngatoa me laghe aippooa ngaitauaala tani ghelei righi salana va la poli tau ngai uvii etoa tale namuu viliki veu, me la nim usilaa nongina vaalua aue ila la ghauliaa.

<sup>13</sup> Laghe uela ta tau ngai uvii etoa va, “Am ue va, ‘Kapuna disaepolo atoa Iesu la mae sio tani ainao Iesu eleivoo nau eteva ami ghe aseasekanua.’

<sup>14</sup> Me arova gavana ngateva enongo va am ue va am ghe asekanuela me laghe ainaola Iesu, am rau mene annaa. Aue ami aippooaa teeia me karika aue am ghaa righi maamatana etana.”

<sup>15</sup> Tau ngai uvii etoa laghe ghaala viliki veu me laghe auliaala voto laghe uela va la ghauliaa, me ia o kiukiu eteae ghe kasu ekapa seela ta ajiu etoa tale ia o nau eteva.

#### *Kinatama niuungu eteva Iesu ghe tause lao sio ta disaepolo atoa*

*(Mak 16:14-18; Luk 24:36-49; Jon 20:19-23; Apos 1:6-8)*

<sup>16</sup> Vara me kasangaulu me kateva (11) disaepolo laghe lao sio eGalilii me laghe saela tale motouru eteva nongina ghe auliaala etaira va aue la laa taraia etana.

<sup>17</sup> Nau eteva laghe taraiela laghe kkaueiniela, me katoa etaira laghe tam aikaiaala va laghe tarala Iesu.

<sup>18</sup> Vara me Iesu ghe mae sio etaira, me ghe uela etaira va, “Ngaghele ghaala nimatuutuliena akapa epona liu me tale kosa ateva oia.

<sup>19</sup> Liuna evalua o me am kasu me am mene ghaa righi disaepolo tale patunganua akapa atoa me am asuula tale ararina ateae Tamaghi me ta Natuna me tale Spirit Manga.

<sup>20</sup> Me am apasunga etaira tani nongo usilaa isaa akapaaili voto aghe auliaala etaimim me aue atoka teeiem tale nau ekapa atoa elaa ghaa airuuruu tale kosa ateva.”

## Masi kiukiu Mak ghe pitela **Inangari emuemua**

Masi kiukiuna Iesu Mak ghe pitela ekiukiuaa uunguaane Iesu, matemateaane me tottotaane tale nimate. Vuku eteva ta Mak tukuna ia ta mene kotolu vuku masi kiuki etana (Matiu, Luk me Jon), me ghe pitila oroi voto Iesu ghe gheleila tale llo voto ghe aapasunga. Matiu, Luk me Jon laghe pitila mene kasina voto oroi Iesu ghe aapasungaala. Mak eauliaa oroi niuungu sarasarakania Iesu ghe gheleila tani ghelei emasina tau sessa atoa, me sungi velu raroai, me tani kkaluaa ssavoto. Mak eaauliaa va sarasarakaniaane Iesu isaa epona ta Satana me Iesu erooroo tani asaangi taumattu.

Masi kiukiun ta Mak, Jon Mak ghe pitila. Ia karika va kateva ta kasangaulu ghalua (12) kapuna disaepolo Iesu. Ia ghe uungu tee Pol me Banabas. Tau ngalomasaanga atoa emua arau laghe uela va ghe kilala oroi kiukiun ta Pita eRom, me isaa oia ghe pitila.

### **Tani kila amuemua**

Inangarina Jon tau ngai aasuu ia *1:1-8*

Niasuu me nitootoonga ta Iesu *1:9-13*

Iesu eGalilii *1:14-9:50*

Iesu ghe lao sio eGalilii me ghe saela eJerusalem *10:1-52*

Unna nitootoonga me nimate Iesu tale airuuruu eteva uiki *11:1-15:47*

Iesu ghe totula tale nimate *16:1-8*

Iesu ghe otuotula ta kapuna disaepolo atoa *16:9-20*

*Jon tau ngai aasuu ia ghe poppoaa*

(Mat 3:1-12; Luk 3:1-9, 15-17; Jon 1:19-28)

<sup>1</sup> Aitiutiun tale masi kiukiuna Iesu Karisto, natuna ia God.

<sup>2</sup> Isaa oia masi kiukiun nongina propeet Aisaea ghe pitila:

“Nongola, aue asuu aikasuaa inangarighi eteva,

ia aue emuemueinio.

Ia aue eaimonomonosiaa salam atikirighi.”

<sup>3</sup> “Tale voto ateva karika righi taumattu ghe tokatoka etana, kateva lingi ngalo taumattu ekolokolo, eue va,

‘Am aimonomonosiala salane atikirighi Vau palepale. Am ghelei eghulughuluena akapa salane.’”

<sup>4</sup> Jon, ia o taumattu ngateva uunguaane tani asuu taumattu, eghe lao sio tale voto ateva karika righi taumattu etana, me ghe poppoaa ta taumattu ngatoa va la nna ngaioghioghiaa, me la ghaa niasuu, me God aue ekkaluaa kaluira ssavoto.

<sup>5</sup> Ila akapa ejjudia, me taumattu ngakapa atoa eJerusalem, laghe lao sio tani nongo Jon. Laghe aaulia ngaotu kaluira ssavoto, me Jon ghe asuulala tale ateo atae eJodan.

<sup>6</sup> Jon ghe aasae ghinnanina laghe gheleila tale uu kamolo, me ghe ai-iriaa paisi eteae viliki vulumakao ia. Ghe namanama toto me iruena nge tapaa tuvui.

<sup>7</sup> Eghe aaulia ngaotu va, “Kateva taumattu aue emae emuli ta ngetaghi, ia sarasarakaniaane elaulau sarasarakaniaaghi. Karika masi taumattu ngieghi va asuuiaa patu kkeghi, me apulaka oasa enaghinaghi unna aikasukasu.

<sup>8</sup> Aghi aghaasuum tale manu, me ia aue easuum tale Spirit Manga ateva.”

*Jon ghe asuula Iesu*

(Mat 3:13-17; Luk 3:21-22)

<sup>9</sup> Tale isaa o nau Iesu ghe kasula eNasareti eGalilii, me ghe lao sio, me Jon ghe asuuela eJodan.

<sup>10</sup> Nau eteva Iesu ghe lau sae mae tale paamanu eteva, eghe tarala epona liu ghe otiela, me Spiriti eteva nongina ghila ateva valusu ia ghe sio mae ta ngetana.

<sup>11</sup> Epona liu kateva lingi ngalo ghe uela va, “Io natughu io, aghailousiangailio, me masimasiaaghi ta ngetam namungaili.”

*Satana ghe tootoongaala Iesu*

(Mat 4:1-11; Luk 4:1-13)

<sup>12</sup> Katengaata ta Spiriti eteva ghe suula Iesu ghe ssola tale voto ateva karika righi taumattu ta ngetana.

<sup>13</sup> Iesu ghe tokala ghaatingaulu (40) nau, me Satana ghe mae sio tani tootoongainia. Eghe tokatoka tee ghaata kkena nge tapaa tuvui etoa, me ensolo atoa laghe sio mae tani sausia.

*Iesu ghe tiuaala tani ppooaa masi kiukiu  
(Mat 4:12-17; Luk 4:14-15)*

<sup>14</sup> Nau eteva laghe atoka ssola Jon tale ale mata voovoo, Iesu ghe lao sio eGalilii, me ghe tiuaala tani ppooaa masi kiukiuna God.

<sup>15</sup> Eghe ue va, "Nau eteva God ghe aulieiniela ange rekatala, me ararimangalina ateva God ange kalakalanginala. Am nna ngaioghioghiaa, me am aikaiaia masi kiukiu."

*Iesu ghe kolola disaepolo ghaata  
(Mat 4:18-22; Luk 5:1-11)*

<sup>16</sup> Iesu ghe kasukasu elao lao tale sama ateo talia ngateae eGalilii, me ghe tarala Saemon me nengana ta Andru. Lalu ghe lukuluku, poli tau ngelamana ilalua.

<sup>17</sup> Iesu ghe uela ta ngetairaruva va, "Amalu mae usieghi, me aue agheleiemalua me amalu tau ngai luku taumattu."

<sup>18</sup> Arovaeaata ta lalu ghe velu elokoila uneiraruva uvena me lalu ghe usiela.

<sup>19</sup> Iesu ghe mene kasu tau lao sio, me ghe tarala mene ghalua, Jeimis me nengana ta Jon, natuna ilalua Sebedi. Lalu ghe tokatoka tale olimoiraruva paanaka ateva, me lalu ghe aaimonomonosia uneiraruva uvena.

<sup>20</sup> Nau Iesu ghe tarailalueula me ghe kololalueula, me lalu ghe tingina vulu saela tamairaruva tale paanaka ateva tee tau ngai uungu etoa, me lalu ghe usiela.

*Iesu ghe ghelei emasinala taita ateva  
raroai eteva etana  
(Luk 4:31-37)*

<sup>21</sup> Laghe lao sio tale masaliki eteae eKapenium. Ta nau manga ateva, Iesu ghe ssola tale ale nivelu eitaua ngateva, me ghe aapasunga inangarinia God ta taumattu ngatoa.

<sup>22</sup> Nau eteva laghe nongola inangarinia, laghe soghiaala, poli karika ghe aippooaa nongina tau ngai aapasunga ngatoa tale inangari nipaopao, ta nongina taumattu ngateva matutulienia ia.

<sup>23</sup> Elome tale ale nivelu eitaua ngateva, kateva taumattu raroai eteva ghe tokatoka etana. Ghe sama anamungailila me ghe uela va,

<sup>24</sup> "Iesu aNasareti io, umae sio tani ghelei sa ateva etaimami? Vara ughelei saasakieina-mami? Akilakilaio, io manga io kapuna io God."

<sup>25</sup> Iesu ghe uela ta raroai eteva va, "Umatua atoka, me ukupi vulue ghoa."

<sup>26</sup> Me raroai eteva ghe soghesogheainiela, me ghe aore anamungailila, me ghe kupi vulu ghoa mae taumattu ngateva.

<sup>27</sup> Taumattu ngatoa laghe soghiaala voto ateva o ghe lutula, me laghe tiuaala tani aippooaa elome fa ngetaira. Laghe ue va, "Sa ateva ange lutula? Taumattu ngateva oia ange auliaala ouna niapasunga, me nongina taumattu ngateva matutulienia aippooaanee. Nau eaippooaa tee, raroai etoa la nongongoa."

<sup>28</sup> Arovaeaataaili ta kiukiuna voto Iesu ghe gheleila ghe kasu ekapa seela eGalilii.

*Iesu ghe ghelei emasinala oroi taumattu  
(Mat 8:14-17; Luk 4:38-41)*

<sup>29</sup> Arovaeaata ta Iesu me taumattu ngatoa laghe kupi ghoa mae tale ale nivelu eitaua ngateva, me laghe lao sio tangane Saemon me Andru, tee Jeimis me Jon.

<sup>30</sup> Alumuna vause ateva Saemon ghe iisiki, ghe asoaso tale komo poli vilikina ghe aanasa me matana ghe valavalanga. Vara me laghe auliaala ta Iesu va alumuna Saemon eiisiki.

<sup>31</sup> Iesu ghe lao sio me ghe kunela nimane atelange, me ghe totu etokaiela. Aanasa ateva ghe kapala, me ia o vause ateva ghe kaisila aneira inana.

<sup>32</sup> Ang ghe aitarrauui poli sinaka ateva ang ghe suula, me taumattu ngatoa laghe maeaa sio ta Iesu lo akapa atoa tau sessa ila me tee taumattu raroai etoa laghe tokatoka ta ngetaira.

<sup>33</sup> Taumattu ngakapa atoa tale masaliki eteae laghe velu eitauaala tale paa ngatamana ateae tale ale ateva.

<sup>34</sup> Iesu ghe ghelei emasinala oroi tau sessa atoa, me ghe tiu vella oroi raroai etoa. Raroai

etoa laghe kilakilaia, liuna avalua o me ghe pao rungainilala va karika la mene sama.

*Iesu ghe poppoaa  
(Luk 4:42-44)*

<sup>35</sup> Elue talaua poopooa Iesu ghe ghue totula, me ghe kasu vulila masaliki eteae, me ghe ssola tale kateva voto karika righi taumattu etana, me ghe tiauala tani looloo sae.

<sup>36</sup> Saemon me kapuna atoa laghe aimulila tani laa paea.

<sup>37</sup> Nau laghe taraiela me laghe uela va, "Taumattu ngakapaaili etoa la paepaeo!"

<sup>38</sup> Iesu ghe liula me ghe uela va, "Ita lao tale mene kasina masaliki kalakalangina. Aghaloanna tani laa ppooa tee etaira, poli mausina avalua o me aghe mae sio."

<sup>39</sup> Eghe kasu ekapa seela tale masaliki eGalilii me ghe poppoaa tale aleira ale nivelu eitauua, me ghe tiutiu velu raroai etoa ta taumattu ngatoa.

*Iesu ghe ghelei emasinala  
tau tasussukuna ateva*

*(Mat 8:1-4; Luk 5:12-16)*

<sup>40</sup> Kiteva taita tau tasussukuna ia ghe mae sio ta Iesu, me namungaili ta ghe kolomila Iesu. Taita ateva oia ghe suuiala ta liue kkena Iesu, me ghe uela va, "Marova ualoanna, uroo tani ghelei eraarangisanaieghi ta matane God."

<sup>41</sup> Iesu ghe alousiusi teeiela, me ghe saoaa saela nimane atelange etana me ghe uela va, "Aghaloanna. Angu raarangisanala!"

<sup>42</sup> Katengaata ta tasussuku eteva ghe kapala, me taita ateva ghe masinala.

<sup>43</sup> Iesu ghe sungiela va ekasu parasi, me eghe aulia ngasarasarakanala va,

<sup>44</sup> "Urau mene auliaa voto elutula etam. Ulaao me ulaa ghabasungainio ti pristi eteva, me ughelei aiaavusuvusuena tani apasunga va vilikim ange raarangisanala, nongina Moses ghe auliaala. Me taumattu ngatoa ae la kila va angu raarangisanala."

<sup>45</sup> Me nau taita ateva ghe kopi ghoala eghe auliaala ta taumattu ngatoa sa ateva ghe lutula etana. Ghe kiukiuaa ngakapa seela tale masaliki ghe lao sio etana. Liuna avalua o me Iesu karika ghe mene laolao tale tummatavanga, ta ghe nim tokatoka tale voto atoa karika righi taumattu etaira, me taumattu ngatoa tale isaa akapa masaliki laghe mae taatarai.

## 2

*Iesu ghe ghelei emasinala taumattu ngateva karakanna ia*

*(Mat 9:1-8; Luk 5:17-26)*

<sup>1</sup> Kasina nau ghe lange sio me Iesu ghe mene lao sio tale masalikina atea eKapenium, me taumattu ngatoa laghe nongola va etokatoka elome tale ale ateva.

<sup>2</sup> Taumattu ngatoa laghe pasula tale ale ateva, eghe ghoala arau etapaa ngatamana, me Iesu ghe poppoaa inangarina God.

<sup>3</sup> Katoa taumattu laghe maeaa sio kateva taita, karakanna ia, ta Iesu. Ghaata etaira laghe saue mae sio.

<sup>4</sup> Pasueili ale ateva, me karika laghe rooroo tani laoaa ngakalakalaa tau sessa ateva ta Iesu. Liuna avalua o me laghe saula tau sessa ateva, me laghe saeainiela tale pungani ngale ateva, Iesu ghe tokatoka elome etana. Laghe ghaa vella kasina aiaakou tale pungani ngale ateva, me laghe tau siola tau sessa ateva tale komona atea elome tale ale ateva.

<sup>5</sup> Iesu ghe tarala uneira niaikaiaia va namuu, me ghe uela ta tau sessa ateva va, "Natughu, kalum ssavoto ange kapala."

<sup>6</sup> Katoa tani tau ngai aapasunga tale inangari nipaopao laghe tokatoka elome tale ale ateva laghe nongola, me laghe aannaa va,

<sup>7</sup> "Vaalua me eaippooa ngavalua o? Ange ghaala liuna ateva God! Karika teva erooroo tani kkaluaaa ssavoto, ta God nonga!"

<sup>8</sup> Arovaeataa ta Iesu ghe kilala tale urunguitanina ateva, me ghe uela etaira va, "Vaalua me am nanna ngavalua o elome etaimim?"

<sup>9</sup> Sa ateva voto malumina tani auliaa ta taumattu ngateva karakanna ia? Tani ue va, 'Kalum ssavoto ange kapala' o tani ue va, 'Tingina saela, me usau komom me ukasu'?

<sup>10</sup> Me aghaloanna va am tara kila, va Natuna ateva Taumattu ngateva matutulienia teelia tani kkaluaaa ssavoto tale kosa ateva..." Vara me Iesu ghe taatara lao sio tale taumattu ngateva karakanna ia, me ghe uela va,

<sup>11</sup> "Aghaauliaa ta getamat va tingina saela, me usau komom, me ulao tanganuem."

<sup>12</sup> Taumattu ngateva ghe tingina saela, me ghe saula komona, me ghe kasula. Ila akapa taumattu ngatoa laghe tarala sa ateva ghe lutula, laghe soghiala, me laghe tau saela

ararina atae God, me laghe uela va, "Emua arau karika ami ghe taatara righi voto avalua oia, karikaili!"

*Iesu ghe kolola Livae  
(Mat 9:9-13; Luk 5:27-32)*

<sup>13</sup> Iesu ghe kупи ghoala tale ale ateva, me ghe kasukasu elaoao elosamarra tale kinatama ateo talia ngateae. Oroieili taumattu ngatoa laghe mene mae sio tani nongoa nau ghe aapasunga voto.

<sup>14</sup> Eghe kasukasu elaoao me ghe tarala Livae, natuna Alpeas, ghe tokatoka tale natu ngale arighi aighaa takis ia, me Iesu ghe uela etana va, "Mae usieghi." Ghe tingina saela, me ghe usila Iesu.

<sup>15</sup> Nau Iesu ghe namanama tanganue Livae, oroi ila taumattu ngatoa aighaa takis ila, me tau ssavoto atoa, laghe lao sio tani namanama tee Iesu me kapuna disaepolo atoa, poli oroi ila lo atoa laghe usiusia.

<sup>16</sup> Katoa tana taumattu tau ngai aapasunga ila tale inangari nipaopao, me taumattu tale Paresi ila, laghe tarala Iesu ghe namanama tee tau ngai ghelei ssavoto atoa me tau ngai ghaa takis atoa. Laghe uela ta kapuna disaepolo atoa va, "Vaalua me enamanama tee tau ngai ghaa takis me tau ssavoto atoa?"

<sup>17</sup> Iesu ghe nongola inangariira me ghe uela ta tau ngai aapasunga ngatoa va, "Lo atoa masina ila karika la ghaloanna niaisausi. Tau sessa nonga atoa la laa taatara dokta. Karika aghe sio mae tani kolo ghulughuluena atoa taumattu. Aghe sio mae tani kolo tau ssavoto atoa."

*Inangarina Iesu me gheeleiaaira ajiu etoa karika elaoao aitauaa  
(Mat 9:14-17; Luk 5:33-39)*

<sup>18</sup> Kateva nau kapuna disaepolo atoa Jon me kapuira tee atoa disaepolo Paresi etoa laghe naenae. Katoa tana taumattu laghe mae sio ta Iesu, me laghe kolomila va, "Vaalua me kapuna disaepolo atoa Jon me kapuira disaepolo tee atoa Paresi etoa la naenae, me kapum atoa disaepolo karika?"

<sup>19</sup> Iesu ghe uela va, "Vaalua kapuna atoa taumattu ngateva ange anna tani lai la ghele nae? Karika la roroo, nau taita ateva ange aloanna tani lai me etokatoka tee kapuna atoa, karika la naenae.

<sup>20</sup> Nau eteva ae emae me la ghaa velu taita ateva, ia o nau eteva ae la nae.

<sup>21</sup> "Karika teva eghaaghaa tuku ouna ateva kalio, me evabbai teva tuku pokane aiaasae. Marova eghelei me nau eporaia, tuku ouna ateva ae eghauna, me eghelei mara ateva emene namuu.

<sup>22</sup> Me karika teva taumattu etottoli kaai ouna uaeni tale pokane ateva aikaai. Marova eghelei evalua o, ae ouna uaeni eghelei polaki aikaai manu eteva, me ae ilalua akapa uaeni eteva me aikaaina ateva ae lalu peisaane. Karika, la kaokao ouna uaeni tale ouna aikaai."

*Vau tale nau manga ateva  
(Mat 12:1-8; Luk 6:1-5)*

<sup>23</sup> Kateva nau manga, Iesu ghe kasu valaala tale utana atingiu, utani uiti ia. Kapuna disaepolo atoa laghe kasukasu eitauaa teeia, me laghe ghaala kasina tani uiti me laghe namala.

<sup>24</sup> Paresi etoa laghe uela ta Iesu va, "Tarala, vaalua me la gheelei voto o, inangari nipaopao eue va karika masina tani ghelei tale nau manga ateva?"

<sup>25</sup> Iesu ghe liula inangariira me ghe uela va, "Vaalua, karika am ghe ritila kiukiuna atae Deivit ghe gheleielu, nau ia me kapuna atoa laghe malolau?

<sup>26</sup> Nau ta Abiata, namuu ia tale pristi etoa, Deivit ghe kупи ssola tale alena ateva God, me ghe namala verete laghe amangala, pristi etoa nonga la roroo tani nama, me ghe taula kasina ta kapuna atoa."

<sup>27</sup> Iesu ghe mene auliaa tee lao sio va, "God ghe gheleila nau manga ateva mausi taumattu ngatoa, karika God ghe gheleila taumattu ngatoa mausi nau manga ateva.

<sup>28</sup> Liuna avalua o me Natuna ateva Taumattu ngateva ia tee Vau ia tale nau manga ateva."

### 3

*Iesu ghe ghelei emasinala taumattu ngateva tale nau manga ateva  
(Mat 12:9-14; Luk 6:6-11)*

<sup>1</sup> Iesu ghe mene kupi ssola tale kateva ale nivelu eitauaa, me kateva taita ghe tokatoka, katelange nimane matena ia.

<sup>2</sup> Katoa tau ngai ssateena Iesu mataira ghe laolao nonga ta Iesu va, Iesu aue eghelei emasinaia tale nau manga ateva, o karika. Laghe annaa va marova eghelei emasinaia, aue la laoaa Iesu tale niaiseakei.

<sup>3</sup> Iesu ghe uela ta taita ateva nimane atelange matena ia va, “Tingina saela, me umae toko.”

<sup>4</sup> Me Iesu ghe kolomilala va, “Vaalua, tale inangari nipaopao, ita rooroo tani ghelei masi niungu ta nau manga ateva, o tani ghelei sesa niungu? Ita rooroo tani sausi mene kateva taumattu me erooroo tani toka amasina, o ita uvi ematea?” Tau ngai ssateena atoa Iesu karika laghe liu poila inangarina Iesu.

<sup>5</sup> Iesu ghe aitaraa seela ta taumattu ngatoa me ghe sessaiela. Eghe tarala va karika righi niaealousi tale urunguitanira, liuna avalua o me karika ghe masinala ta ngetana. Eghe uela ta taita ateva va, “Korosila nimam atelange.” Taita ateva ghe korosila nimane atelange, me ghe masinala.

<sup>6</sup> Nau Paresi etoa laghe tarala voto o ghe lutula, laghe kupi ghoala, me laghe lao sio tani tara kapuna atoa Herot. Laghe ailoeala salana vaalua la rooroo tani uvi ematea Iesu.

#### *Oroieili taumattu ngatoa laghe aimuli teela Iesu*

<sup>7</sup> Iesu me kapuna disaepolo atoa laghe kasu vulila voto ateva o, me laghe lao sio tale ateo talia ngateae eGalilii. Tana taumattu ngatoa laghe aimuli teeielia. Taumattu tale distriki eteva eGalilii, ejidua,

<sup>8</sup> eJerusalem, distriki eteva eldumea, me pai kativilau tale ateo atae eJodan, me tale patunganue masau eTaer me Saedon, laghe nongola voto Iesu ghe gheleila, me oroieili taumattu laghe mene mae sio ta Iesu.

<sup>9</sup> Iesu ghe uela ta kapuna disaepolo atoa va, “Am aimonomonosiala teva paanaka, poli oroieili taumattu ngatoa aue la mae, me aue la ghaisiriki tani mae taraieghi.”

<sup>10</sup> Poli ang ghe ghelei emasinala oroieili tau sessa atoa, liuna avalua o me oroi tau sessa atoa laghe aloanna tani mae akalakalaa me tani poso Iesu.

<sup>11</sup> Nau ekapa atoa lo atoa raroai etoa laghe tokatoka ta ngetaira laghe taatara Iesu, laghe tuuturru ta liue kkena me laghe samasama atingina me laghe ue va, “Io natuna io God.”

<sup>12</sup> Iesu ghe aulia ngakorokorongan ta ngetaira va la rau mene aotu va ia see.

#### *Iesu ghe kolola kasangaulu ghalua apostolo*

(Mat 10:1-4; Luk 6:12-16)

<sup>13</sup> Iesu ghe saela tale motouru. Eghe kolola lo atoa ghe aaloannaailila, me laghe mae sio ta ngetana.

<sup>14</sup> Eghe suietoongaala kasangaulu ghalua (12) taumattu va ila la toka aitauaa teeia, me ghe aselala va apostolo ila. Aue esungila tani ppooa ngakapa see inangarina ateva God,

<sup>15</sup> me aue etau lao sarasarakan tani suu velu raroai etoa.

<sup>16</sup> Eghe kolola kasangaulu ghalua: Saemon ta kateva, Iesu ghe aseala va Pita etana;

<sup>17</sup> eghe kolo teela Jeimis me Jon, natuna ilalua Sebedi (eghe asela arariirarua aluae ta Boaneges, malloceanina va “taumattu nongina palapalanga ateva eaangari”);

<sup>18</sup> eghe kolo teela Andru, Pilip, Batolomiu, Matiu, Tomas, Jeimis natuna ia Alpeas, Tadias, Saemon laghe aseala va Selot ia,

<sup>19</sup> me Jiudas Iskariot, ia auena ghe tau lao Iesu ta nimaira tau ngai ssateena atoa.

#### *Iesu me Belsibul*

(Mat 12:22-32; Luk 11:14-23; 12:10)

<sup>20</sup> Iesu eghe lao sio tale ale ateva eghe tokatoka etana, me poli tana taumattu ngatoa laghe mene mae sio tani velu raroai etoa, Iesu me kapuna disaepolo atoa karika righi nauira tani namanama.

<sup>21</sup> Kapuna atoa Iesu laghe nongola voto eghe poppooaa me ghe gheleli, me laghe mae sio tani kune velua, ta laghe ue va, “Ang ghe veeveenala.”

<sup>22</sup> Katoa tau ngai aapasunga tale inangari nipaopao laghe kasula eJerusalem me laghe ue va, “Belsibul ange kipiela. Etiuti velu raroai etoa tale sarasarakaniaane Belsibul, ia namuu ia tale raroai etoa.”

<sup>23</sup> Iesu ghe kolo aitaueinilala me ghe auliaala kateae kiukiu niamatoonga. Eghe uela va, “Vaalua, Satana erooroo tani sungi velu Satana?

<sup>24</sup> Marova taumattu tale kateva patunganua la tam tingina aitauaa, me niaiuvi eteae elutu, karika aue la korokorongan.

<sup>25</sup> Marova taumattu tale ale ateva la tam tingina aitauaa me niauvii elutu, karika aue la korokorongana.

<sup>26</sup> Me marova Satana essa tee kapuna atoa aue ghalue ila, me eghalua atoka ila, karika aue la korokorongana. Aue la ruu ekilanga.

<sup>27</sup> Karika teva taumattu erooroo tani kipi sso tangane taumattu ngateva sarasarakania me eghaa peina. Marova ealoanna, eiri etoka tau ngalena ateva, me evira ghaa peina.

<sup>28</sup> Aghaulia ngakoronna etaimim va God aue ekkaluua isaa akapa ssavoto me sesa nginangari taumattu eaauliaa saasakiaa tee God.

<sup>29</sup> Me marova taumattu eauliaa saasakiaa tale Spirit Manga ateva, God karika aue ekkaluua isaa oia me auena. Ia oia lo ateva ssavoto aue etoka ta ngetana nau ekapa atoa.”

<sup>30</sup> Iesu ghe auliaala poli laghe ue va, “Raroai eteva etokatoka etana.”

*Kinna Iesu me kapuna atoa*

(Mat 12:46-50; Luk 8:19-21)

<sup>31</sup> Kinna Iesu me nengane taita atoa laghe rekatala, me laghe nim suula inangari va eghoa taraila.

<sup>32</sup> Oroieili taumattu ngatoa laghe tokatoka talieinia, me laghe uela ta ngetana va, “Kinam me nengam taita atoa me vause atoa eleka la paepao.”

<sup>33</sup> Iesu ghe liula me ghe uela va, “See ia kinaghi me see ila kapughu taita atoa?”

<sup>34</sup> Eghe aitaraa seela tale taumattu ghe taatalia ngatokaia, me ghe uela va, “Taumattu oia kinaghi me nengaghi ila!”

<sup>35</sup> See eaimuli tee nannaane Tamaghi, ia nengaghi taita ia me nengaghi vause ia me kinaghi ia.”

## 4

*Kiukiu niaimatoonga tale tau ngai pasa  
katu ue ngai eteva*

(Mat 13:1-9; Luk 8:4-8)

<sup>1</sup> Kateva nau Iesu ghe mene tiauala tani apasunga tale sama ateo talia ngateae, me tana taumattu ngatoa laghe mae sio tani mene velu eitauaa. Poli oroieili taumattu, Iesu ghe saesaala tale paanaka ateva, me ghe vukala ghoala elamana, me ghe toka siola, me taumattu ngatoa laghe tinginala elosamarra.

<sup>2</sup> Iesu ghe aapasunga oroieili voto tale kiukiu niaimatoonga. Ghe ue ta ngetaira va,

<sup>3</sup> “Am nongola! Tau ngai pasa katu ue ngai eteva ghe lao sio tani pasa aina katu ue ngai.

<sup>4</sup> Nau eteva ghe kaokaoaala katu ue ngai, kasina ghe katuula tapaa salana, me ghila atoa laghe namala.

<sup>5</sup> Kasina tana katu ue ngai ghe katuula tale voto ateva sakolo ia, karika oroi kosa, gharovaeaata ta ghe pinosala, poli karika lluse ia.

<sup>6</sup> Nau eteva sinaka ateva ghe saela, eghe sinaki ematela, poli oane karika ghe sio liula ta euu atu ia.

<sup>7</sup> Kasina ghe katuula tale voto ateva uasa karasa atoa ta ngetana. Nau laghe pinosala, uasa karasa atoa laghe kavillala, karika laghe kunela.

<sup>8</sup> Kasina katu ue ngai ghe katuula tale masi kosa. Nau laghe pinosala laghe kuneala ueneira, kasina ghe kuneala kotolungaulu (30), kasina ghaonomongaulu (60), me kasina kateva ai (100). ”

<sup>9</sup> Vara me ghe uela va, “Lo ateva talingane manee tani nongo, aue enongo!”

*Mausina kiukiu niaimatoonga*

(Mat 13:10-17; Luk 8:9-10)

<sup>10</sup> Nau eteva Iesu nonga, me kasangaulu ghalua kapuna disaepolo, me mene katoa tana taumattu laghe tokatoka, me laghe kolomila Iesu tale malloeana kiukiu niaimatoonga.

<sup>11</sup> Iesu ghe liula me ghe uela va, “God ang ghe apasungaala etaimim voto eaaisulia tale aramangalina ateva God, me tale taumattu ngeleka, isaa akapa voto aghauliaa tale kiukiu niaimatoonga.

<sup>12</sup> Liuna avalua o me inangari tale Uru ngai Manga ateva aue elutu ekoronna, poli,  
“ ‘aue la tara me karika aue la tara kila,  
      aue la nongo me karika aloira aue emasaanga,  
la rau aikolikoliaa, me God ekkaluua kaluiraa ssavoto.’ ”

*Iesu ghe auliaala malloeana kiukiu niaimatoonga atea*

(Mat 13:18-23; Luk 8:11-15)

<sup>13</sup> Vara me Iesu ghe uela va, “Karika aloimim ange masaangaala kiukiu niaimatoonga atae? Vaalua aue aloimim emasaanga mene kasina kiukiu niaimatoonga?

<sup>14</sup> Tau ngai pasa katu ue ngai eteva ghe pasala inangari eteva.

<sup>15</sup> Kasina taumattu nongina katu ue ngai ghe katuula tale salana atikirighi. Nau la nongonongo inangarina ateva God, katengaata ta Satana emae ghaaghaa velu isaa o inangari.

<sup>16</sup> Me katoa tana taumattu nongina katu ue ngai ghe katuula tale voto ateva sakolo ia. La nongonongo me la ghaaghaa me la masimasi.

<sup>17</sup> Me nongina ai erighi ghauna oane karika esiosio liu, la masimasi nau eteva la nongonongo ta aitiutiu, va nau eteva la ghaaghaa maamatana mausi inangarina ateva God, la kaakatuu.

<sup>18</sup> Lo tana katu ue ngai ghe katuula elome tale uasa karasa eaimatoonga taumattu la nongonongo inangarina God,

<sup>19</sup> me nannaaира namungaili tale voto tale kosa ateva, nongina aloannaaira tani ghaa viliki veu me mene kasina voto. Isaa o voto tale kosa ateva ekaakavili ekatuu inangarina ateva God me karika epiipinosa va emene kuneaa righi ueneira.

<sup>20</sup> Me llo katu ue ngai ghe katuula tale masi kosa, eaimatoonga taumattu la nongonongo inangarina ateva God me la aiesoaa ta ngetana, me la kuukuneaa masi uene, kasina kotolungaulu, kasina ghaonomongaulu me kasina kateva ai.”

*Taumattu ngatoa karika la paapakeaa  
lam atae*

(Luk 8:16-18)

<sup>21</sup> Vara me Iesu ghe kolomilala va, “Vaalua! Nau eteva am ghaaghaa lam atae, am atotka pakeainia tale aikaai eteva me tale aisalo, o am aatokale sae tale aitiitinginane ateva?

<sup>22</sup> Voto ghaine eaaisulia auena eotu tale tummatavanga, me isaa akapa voto taumattu egheelei eisulia, auena eotu.

<sup>23</sup> Lo ateva talingane manee tani nongo, aue enongo!”

<sup>24</sup> Iesu ghe mene auliaa tee lao sio va, “Inangari angam nongola, am nnaa parasi. Arova am ghelei emasina tale taumattu, Vau palepale aue emene liu ta ngetaimim, me aue emene saaoaa sae mene righi.

<sup>25</sup> See righi voto etana, aue God emene taula, me lo ateva karika righi voto etana aue ghaaa velu righi lutu voto etana.”

*Kiukiu niaimatoonga tale katu uiti*

<sup>26</sup> Iesu ghe mene auliaa tee lao sio va, “Ararimangalina ateva God nongina taumattu ngateva ghe lao sio tani velu katu uiti tale utana atingiu,

<sup>27</sup> vara eleivoa taumattu ngateva ghe aseasekanua, me ellaa ghe laa ghelei mene kasina unguaane, me katu uiti ghe pinosala, me ghe namuula, me taumattu ngateva karika ghe kilala vaalua ghe pinosala me ghe namuula.

<sup>28</sup> Kosa ateva nonga ghe apinosala — me emulina laghe kunela. Aitiutiu vulena ateva, vara me aikouna ateva, emulina ghe kuneala uene.

<sup>29</sup> Nau eteva utana atingiu ghe matuennala, taumattu ngateva ghe lao sio tani sai uiti.”

*Kiukiu niaimatoonga tale  
katu ue ngai erighi (mastet)*

(Mat 13:31-32; Luk 13:18-19)

<sup>30</sup> Iesu ghe mene auliaala va, “Aue ita kolomi va, ‘Ararimangalina ateva God vaalue ia? Vaalua aue ita aimatoongainia?’

<sup>31</sup> Ia nongina katu ue ngai erighi la kolokoloa va mastet. Nau eteva la pasapasaia tapaa kosa, ghaunaaili ia.

<sup>32</sup> Nau la pasapasaia epiipinosa me enaanamungaili, karika nongina mene kasina katu ue ngai tale utana ateva. Laangina atoa namungaili ila, ghila atoa la rooroo tani laa toka palluu.”

*Iesu ghe aulia ngaotula inangarina  
tale kiukiu niaimatoonga*

(Mat 13:34-35)

<sup>33</sup> Nau eteva Iesu ghe auliaa ngaotula inangarina tale taumattu ngatoa, ghe auliaa tale kiukiu niaimatoonga ghe rooroo tale nongonongoaaira taumattu ngatoa.

<sup>34</sup> Karika ghe aaulia ngamasalika teva voto ta ghe aauliaa nonga tale kiukiu niaimatoonga. Nau eteva ia nonga me kapuna disaepolo atoa, me ghe auliaala malloeanina isaa o kiukiu niaimatoonga.

*Iesu ghe aippooala me paka ttasi eteva  
ghe kapala*

(Mat 8:23-27; Luk 8:22-25)

<sup>35</sup> Elo alai tale ia o nau eteva, Iesu ghe uela ta kapuna disaepolo atoa va, “Ita lao tale pai kativilau tale ateo talia ngateae.”

<sup>36</sup> Laghe kasu vulila taumattu ngatoa, me laghe saesaela tale paanaka ateva Iesu ang ghe saesae atokala etana, me laghe tiu ghoala. Mene kasina tana paanaka tee laghe tiu ghoa aitauaas teelilala.

<sup>37</sup> Vara me paka ttasi eteva ghe tiuaala, me kotoo atoa laghe tiuaala tani sae tale paanaka ateva, me manu eteva ang ghe pasupasu tale paanaka ateva.

<sup>38</sup> Iesu ghe aseasekanua emuli tale paanaka ateva, ghe panukanala tale pilo ateva. Vara me laghe anguniela me laghe uela va, “Tisa, ghaisa ngarighi ita vuluu, me koti karika unannaa maamauluaaita va ita rau mate?”

<sup>39</sup> Iesu ghe anguula, me ghe paola ttasi eteva, me ghe uela ta kotoo atoa va, “Am matua avukalala!” me ttasi eteva ghe ruula, me luei eteva ghe asola.

<sup>40</sup> Vara me ghe kolomila kapuna disaepolo atoa va, “Vaalua me am maamatautu? Karika am ghe aikaaiaa?”

<sup>41</sup> Laghe matautu saasakiaala, me laghe toka aikolomieinila va, “Saa taumattu ia taumattu ngateva oia, ta kotoo atoa me kuukuu eteva ngila nongo usilainiela?”

## 5

*Iesu ghe ghelei emasinala taumattu ngateva raroai etoa etana  
(Mat 8:28-34; Luk 8:26-39)*

<sup>1</sup> Iesu me kapuna disaepolo atoa laghe laa rekata sio tale pai kativilau tale ateo talia ngateae, tanganeira aGeresa\* ngatoa.

<sup>2</sup> Nau eteva ghe kkurela tale paanaka ateva, arovaeaata ta kateva taumattu raroai eteva ghe tokatoka etana ghe mae sio tani sou Iesu. Taita ateva oia ghe kupi ghoa mae tale voto ateva liu niaikkiaa ia.

<sup>3</sup> Ege tokatoka tale isaa o voto, me karika teva taumattu ghe rororo tani iri etokaia, me karika laghe rororo tani iri etokaia tee tale sene.

<sup>4</sup> Oroiaata laghe gheelei runga poi nimana me kekena tale sene, me ghe gheelei epatepate poli sarasarakanaili ia. Karika teva taumattu ghe rororo tani poso atokaia.

<sup>5</sup> Nau ekapaaili tale voo me llaa eghe tokatoka tale voto ateva liu niaikkiaa ia me tale motouru. Eghe ovaova atingina, me eghe saisai rirrii vilikina tale atu matakerengana.

<sup>6</sup> Nau eghe tara amasau lao sio Iesu, eghe iloula tani laa sousou Iesu, me ghe suuiala ta liue kkena Iesu.

<sup>7</sup> Me namuu ta ghe samala me ghe uela va, “Iesu io natuna io God iaaili epona, sa ateva ualoanna tani gheleia etaghi? Aghaaulia ngakoronna tale ararina atae God va, karika umene ghelei saasakieinieghi.”

<sup>8</sup> Poli Iesu ang ghe uela etana va, “Raroai eteva, kupi vulu ghoa mae taumattu ngateva.”

<sup>9</sup> Vara me Iesu ghe kolomela va, “See ararim atae?”

Me ghe uela va, “Ararighi etea ta Liijen, poli karika va aghi nonga, ta oroi iemami.”

<sup>10</sup> Ghaisaata araa ghe kolomi esarasarakanal Iesu va erau mene tiu vella va la kasu vuli ia o voto ateva.

<sup>11</sup> Karika masau tale tuku saesaena ateva tinaua mosu etingiu ghe tingina namanama.

<sup>12</sup> Raroai etoa laghe kolomi esarasarakanal Iesu va, “Usungi veluemami sae tale mosu etoa, me ami sae kupi etaira.”

<sup>13</sup> Iesu ghe tau vella raroai etoa laghe kupi vulu ghoa mae taita ateva, me laghe laa sae kupi sso tale mosu etoa. Katengaata ta tinaua atingiu ghe ttiroula, me laghe laa ghoa aoso velu sio tale vallae. Laghe katuu velu siola tale ateo talia ngateae, me laghe matela. Tinaua atingiu eghe arropi ematelala ghe roola ghalua airari (2,000).

<sup>14</sup> Lo atoa laghe aitaraa mosu etoa laghe iloula. Laghe lao sio elo ale me tapaa ngutana, me laghe kiukuaala voto ghe lutula ta mene katoa taumattu, me taumattu ngatoa laghe mae sio tani tara voto ghe lutula.

\* <sup>5:1:</sup> aGeresa Kasina uru ngai laghe pitila, laghe uela va, aGadara, me kasina laghe uela va, aGergesa. <sup>5:7:</sup> Mak 1:24.

<sup>15</sup> Laghe rekatala ta Iesu me laghe tarala taumattu ngateva emua arau oroieili raroai etoa laghe tokatoka etana. Me ia oia, eghe aaitiitii, me nannaane masina me eghe tokatoka. Laghe taraiela, me laghe matautula.

<sup>16</sup> Taumattu ngatoa laghe tarala voto Iesu ghe gheleila, me laghe kiukiuaala taita ateva raroai etoa etana me Iesu ghe ghelei emasinaielo me voto ghe lutula tale tinaua mosu etingiu.

<sup>17</sup> Nau eteva laghe nongola kiukiui, ila akapa laghe aulia ngasarasarakanala ta Iesu va karika emene toka tale masalikiira atea, ta elao ppae tale kasina masaliki.

<sup>18</sup> Nau Iesu ang ghe saesae tale paanaka ateva, taita ateva Iesu ghe tiu vella raroai etoa etana ghe kolomi esasaraskanala Iesu va, "Aghaloanna tani usio."

<sup>19</sup> Iesu karika ghe annala. Ghe uela etana va, "Lao sio tangantuem me ta kapum atoa. Ulaa ghauliaa voto Vau eteva ghe gheleila tani sausio, me alousiusiaane etam."

<sup>20</sup> Taita ateva ghe lao sio tangantuena, me ghe tiauala tani auliaa inangari me voto Iesu ghe gheleila etana tale Kasangauluae Masaliki Taatara. Taumattu ngakapa atoa laghe nongola, me laghe soghiaala isaa o voto.

*Iesu ghe ghelei emasinala aliki vause arighi me vause namu ngateva  
(Mat 9:18-26; Luk 8:40-56)*

<sup>21</sup> Nau Iesu ghe mene lao sio tale pai kativilau tale ateo talia ngateae, oroi taumattu ngatoa laghe mene aimuli teeila, nau ghe tokatoka elosamarra.

<sup>22</sup> Kateva namuu tale ale nivelu eitaua ngateva, ararina atea ta Jaeras, ghe mae sio me ghe suuiaala ta liue kkena Iesu,

<sup>23</sup> me ghe kolomi esasaraskanala Iesu va, "Natughu vause arighi gharighi tau emate. Aghaloannaaaili va umae saoaa nimam etana, me aue emasina me emene toka."

<sup>24</sup> Me Iesu ghe usiela.

Oroieili taumattu ngatoa laghe usiusi Iesu, me laghe tomtomua.

<sup>25</sup> Kateva vause ie tee elome tale taumattu o, rae ateva eghe iloueinia ghe roola kasangaulu ghaluae (12) ninamanama.

<sup>26</sup> Nau etoa ghe laa taatara dokta ngatoa. Laghe toooonga tani sausia, me karika, ta laghe nim tautau lao oroi mmaprikana. Unna viliki veu ghe nim kapakapa tani pae niaisausi, me karika ghe maamasina, me ang ghe nim sessaaili.

<sup>27</sup> Nau eghe nongola kiukiuna Iesu, eghe mae sio tani paea, me ie tee eghe tiitingina elome tale taumattu ngatoa pasueili ila me laghe tomtom Iesu. Eghe lao akalakalangina sio emuli ta Iesu, me ghe posola unna aiaasae ngeleka ateva Iesu,

<sup>28</sup> poli eghe annaala va, "Marova anim poso unna aiaasae ngeleka ateva, aue amasina."

<sup>29</sup> Katengaata ta rae ateva ghe iloueinia ghe ruula, me ghe ateateala va ghe masinala.

<sup>30</sup> Katengaata ta Iesu ghe ateateala va kasina tani sarasarakaniaane tani ghelei emasina taumattu ghe kasula etana. Liuna avalua o me ghe kiriela me ghe uela va, "See episola uneghi aiaasae ngeleka ateva?"

<sup>31</sup> Kapuna disaepolo atoa laghe uela va, "Karika utaatara tana taumattu ngatoa la tomtomuo? Vaalua me ukookolomi va see episola unem aiaasae ngeleka ateva?"

<sup>32</sup> Iesu ghe kiriela me ghe aaitaraa see va see ghe posoala.

<sup>33</sup> Me vause ateva ghe kilala voto ghe lutula etana, me ang ghe maamatautu, me ang ghe reterete. Eghe mae sio me ghe suuiaala ta liue kkena Iesu, me ghe aulia ngakapala voto ghe lutula etana.

<sup>34</sup> Iesu ghe uela etana va, "Natughu, tale unem niaikaiaa etaghi angu masinala. Kasula, me urau mene annaa poli anem isiki eteva ange kapala."

<sup>35</sup> Iesu ghe aippooaa nonga me taumattu ngatoa, kapuna ila namu ngateva tale ale nivelu eitaua ngateva, laghe rekatala. Laghe auliaala ta Jaeras va, "Natum ange matela. Vaalua me uanna tani ghelei Tisa va eainongieinia tani lao tangantuem?"

<sup>36</sup> Iesu karika ghe nongo usilaala. Eghe uela ta namu ngateva va, "Urau mene matautu. Uaikaaiaa nonga."

<sup>37</sup> Pita, Jeimis me Jon, nengana Jeimis, ilotolu nonga lotolu ghe lao aitauaa teeie sio tangantu Jaeras, me eghe uela ta mene katoa taumattu va la rau mene usia.

<sup>38</sup> Laghe laa rekata sio tangantu namu ngateva, me Iesu ghe nongola niaingalaaii eteae, me ghe tarala taumattu ngatoa laghe ngangngala anamungaili.

<sup>39</sup> Eghe kupi ssola me ghe uela etaira va, "Vaalua me am ghelei niaingalaaii eteae, me am ngangngala atingina? Aliko eteva oia karika va ematela. Enim asesekanua."

<sup>40</sup> Laghe rrila me laghe kangaala Iesu.

Eghe rrila me ghe sungi velu ekapaila ghoala eleka, me ghe kolola nonga kinna me tamane vause arighi me kapuna disaepolo kotolu, me laghe kupi ssola tale rum atiulu aliki eteva eghe asoaso etana.

<sup>41</sup> Eghe kune siola nimane aliki eteva me ghe uela va, “*Talita kum!*” (malloceanina va, “Aliki vause arighi, aghaulia etam va totula!”)

<sup>42</sup> Katengaata ta aliki vause arighi ghe totu saela, me ghe kasukasula. Nau laghe tarala voto o ghe lutula, laghe soghiala. Aliki vause arighi oia anna ninamanama kasangaulu ghalua (12).

<sup>43</sup> Iesu ghe aulia ngasarasarakanala etaira va karika la mene laa auliaa see voto o ghe lutula. Eghe uela va la tau lao righi inana, me aliki vause arighi enama.

## 6

*ANasareti etoa laghe liula viliira ta Iesu  
(Mat 13:53-58; Luk 4:16-30)*

<sup>1</sup> Iesu ghe kasu vulila masaliki eteae o, me ghe lao sio tale masalikina tuunga atae. Kapuna disaepolo atoa laghe aimuli teeila.

<sup>2</sup> Vara nau manga ateva, me ghe tiauala tani apasunga voto tale taumattu ngatoa tale ale nivelu eitaua ngateva. Orioilei taumattu laghe nongola inangari, me laghe mene ounala tani nongo, me laghe uela va, “Ia oia taumattu ngateva, eaa ghe ghaala inangari oia? Vaalua ghe ghaala ase alomasaanga ateva oia? Me vaalua me egheelei tee mirikolo sarasarakananaaili?”

<sup>3</sup> Nim tau ngai atulu ale ia, nenge? Natuna ia Meri tue me nenga ila me Jeimis, Josep, Jiuda me Saemon. Kapuna vause atoa la tokatoka teeita.” Laghe aaulia ngavalua o poli ghe sessaila etana.

<sup>4</sup> Iesu ghe uela etaira va, “Propete ateva ararina atae tale isaa akapa masaliki. Me tale masalikina tuunga atae, me elome tale mangalina atoa, me tale alena tuunga ateva, karika teae ararina.”

<sup>5</sup> Karika ghe rooroo tani ghelei righi mirikolo okae. Eghe nim saoaala nimane tale taumattu karika oroi, me ghe ghelei emasinalila.

<sup>6</sup> Eghe soghiala uneira niaikaiaia ta ngetana karika namuu.

*Iesu ghe tau lao sio niuungu ta 12 disaepolo  
(Mat 10:1, 5-15; Luk 9:1-6)*

Me ghe lao ppae sio tale kasina masaliki tani apasunga.

<sup>7</sup> Me ghe kolo aitauaala kasangaulu ghalua (12) disaepolo, me ghe sungilala ghalua ghalua. Ghe tau lao sio matutuiliana tani tiu velu raroai ta taumattu ngatoa.

<sup>8</sup> Me ghe uela etaira va, “Am ghaa aikkatuluimim me am rau mene ghaa mene righi voto. Am rau mene ghaa righi inana, aikakkai me righi viliki veu tale aikaai viliki veu.

<sup>9</sup> Am asae aikasukasus, me karika am mene ghaa ghalua aiaasae.

<sup>10</sup> Arova am rekata tale kateae masaliki, me am toka tale lo ateva ale, am toka o, lomosina ta am kasu vuli lo atae o masaliki.

<sup>11</sup> Me arova teae masaliki etam ghaiem, me karika la ghaloanna tani nongo inangariim, am kasus. Me nau eteva ngam aloanna tani kasu, am rariaa velu au kosa ta kekeimim, me aue la kila va voto la gheelei karika masina.”

<sup>12</sup> Disaepolo atoa laghe kasula tani ppooaa tale taumattu ngatoa va la nna ngaioghioghiaa.

<sup>13</sup> Laghe tiutiu velu raroai, me laghe raarariaa oeli tale tau sessa atoa, me laghe gheelei emasinalila.

*Herot ghe nongola kiukiuna Iesu  
(Mat 14:1-12; Luk 9:7-9)*

<sup>14</sup> King Herot ghe nongola kiukiun tali isaa o niuungu poli taumattu ngakapa atoa laghe kiukiuaa see Iesu, me katoa laghe uela va, “Jon tau ngai aasuu eteva ange totula tale nimate, liuna avalua o me sarasarakanana ia tani ghelei mirikolo.”

<sup>15</sup> Me katoa taumattu laghe ue va, “Ia Elaija.”

Mene katoa laghe ue va, “Ia propete ia, nongina mene katoa propete emua arau.”

<sup>16</sup> Nau Herot ghe nongola ghe uela va, “Jon, ia o aghe sai pulela alona atiulu, ange mene sakesakela!”

*Matemateaane Jon tau ngai aasuu eteva*

<sup>17</sup> Ia Herot ghe suula inangari me laghe poso atokala Jon. Laghe iriela me laghe atokaiela tale ale mata voovoo mausi Herodias, vausenna ateva tuena ta Pilip, ghe mene lai sariela.

<sup>18</sup> Poli Jon ghe uela ta Herot va, "Inangari nipaopao ateva eue va karika masina ta ughe mene lai sariila vausenna ateva tuem."

<sup>19</sup> Herodias ghe sessaieiliela ta Jon, me ghe aloannaailila tani uvi ematea, me karika ghe rooroo.

<sup>20</sup> Herot ghe kaakaarasi tani aitaraa Jon, poli ghe maamatautangailia ta ghe kilakila va Jon ghulughuluena ia me manga ia. Nau ghe nongonongo ta ghe aaippooaa, ghe nannangaili me nannaane ghe maamaate,<sup>†</sup> me ghe aloannaaili tani nongo.

<sup>21</sup> Masi nau eteva ghe rekatala ta Herodias nau Herot ghe gheleila kinatama nina-manama ataeae tani nnaa nau eteva Herot ghe lutula etana. Ghe gheleila ninamanama ataeae ta namu ngatoa la uungu ta gavman, namuu ta soldia ngatoa, me namu nge Galilii etoa.

<sup>22</sup> Laghe toka namanama, me natuna aliki vause ateva Herodias ghe kupi ssola tani ssiiuaa. Herot me lo atoa laghe namanama laghe masimasiangailila nissiua ngateae.

Herot ghe uela ta aliki vause ateva o va, "Sa ateva voto arova ukolomia etaghi, aue atau aatu."

<sup>23</sup> Herot ghe auliaala inangari nialokoi va, "Sa ateva voto arova ukolomi aue atau aatu. Arova uue va atau aatu kativilau tale peighi, aue atau aatu."

<sup>24</sup> Aliki vause ateva ghe kupi ghoala, me ghe lao sio tani kolomi kinna va, "Sa ateva voto asso kolomi king etana?"

Kinna ghe uela va, "Ussuo ue va, 'Aghaloanna uruna ateva Jon tau ngai aasuu eteva.'

<sup>25</sup> Arovaeaata ta aliki vause ateva ghe kiri ssola ta king me ghe uela va, "Ghaine arau aghaloanna uruna ateva Jon tau ngai aasuu ia tale tivilau terei."

<sup>26</sup> King ghe nongola me ghe alousiusieilila. Me poli ang ghe gheleila inangari nialokoi, me karika ghe aloanna tani palata ta mata namu ngatoa, karika ghe roola tani nongo vulu inangarina natuna Herodias.

<sup>27</sup> King karika ghe aitoila. Ghe suula soldia ngateva tani laa ghaa uruna ateva Jon. Soldia ngateva ghe lao sio tale ale mata voovoo me ghe sai pulela alona atiulu Jon.

<sup>28</sup> Ghe sau mae sio uruna ateva Jon tale terei etivilau me ghe tauue lao sio ta aliki vause ateva. Me aliki vause ateva ghe laoainie sio ta kinna.

<sup>29</sup> Kapuna disaepolo atoa Jon laghe nongola isaa o voto Herot ghe gheleila ta Jon. Laghe lao sio tani ghaa vaulanna ateva Jon, me laghe lao sio tani kaeinia.

*Iesu ghe anginila 5,000 taumattu  
(Mat 14:13-21; Luk 9:10-17; Jon 6:1-14)*

<sup>30</sup> Apostolo atoa laghe oghi mae sio, me laghe toka teela Iesu. Laghe kiukiuala voto laghe gheleila me inangari laghe auliaala ta taumattu ngatoa.

<sup>31</sup> Iesu me kapuna apostolo atoa karika righi nauira tani namanama, poli oroiieili taumattu ngatoa laghe mae taatara Iesu me laghe mene kasukasu. Liuna avalua o me Iesu ghe uela etaira va, "Ita lao ta pai kativilau karika righi taumattu etana, me am laa ghainoana."

<sup>32</sup> Ila nonga laghe kasula tale olimoira paanaka ateva tani lao tale vaara.

<sup>33</sup> Taumattu ngatoa laghe tarailala ta laghe tiu ghoala, me laghe kilailala. Me oroi taumattu tale kateae kateae masaliki laghe kilala voto ateva laghe laolao etana, me laghe kasu emuemuela tani lao.

<sup>34</sup> Nau Iesu ghe ssola elae, ghe tarala oroiieili taumattu ngatoa. Ghe alousiusi teeilala, poli ila nongina sipsipi etoa karika teva aitoiira, me ghe tiauala tani apasunga oroi voto etaira.

<sup>35</sup> Nau sinaka ateva ang ghe suusu, kapuna disaepolo atoa laghe lao sio ta netetana, me laghe uela va, "Ange voovoo, me voto ateva oia nim vaara ia."

<sup>36</sup> Sungi vellala me lao tale righi masaliki kalakalangina, me la laa poli righi inana me la nama."

<sup>37</sup> Iesu ghe liula me ghe uela va, "Am taula righi inana, me la nama."

Laghe uela va, "Ualoanna va ami laa poliaa velu ghalua ai silva koen<sup>‡</sup> tani poli inana tani anginila?"

<sup>38</sup> Iesu ghe uela etaira va, "Ghaisa verete? Am laa tara."

Nau laghe lao sio, laghe tarala verete ghalima me tee kko alua.

<sup>6:18:</sup> Lev 18:16.    <sup>† 6:20:</sup> ghe nannangaili me nannaane ghe maamaate Kasina uru ngai laghe pitila, laghe uela va, ghe gheelei oroi voto.    <sup>6:30:</sup> Luk 10:17.    <sup>6:34:</sup> Nam 27:17; Mat 9:36.    <sup>6:35:</sup> Mak 8:1-9.    <sup>‡ 6:37:</sup> silva koen Silva koen ativilau (denarius) erooroo aipolina kateva nau.

<sup>39</sup> Iesu ghe uela ta taumattu ngakapa atoa va, “Am laa toka sio tale rarrasa, me am toka tale uela.”

<sup>40</sup> Laghe tokala katoa kateva ai (100), me katoa ghalimangaulu (50).

<sup>41</sup> Emulina Iesu ghe ghaala verete ghalima me kko alua, me ghe taatara saela epona liu me ghe kaili emasina saela, me ghe pirla, me ghe tiuala tani taula ta kapuna disaepolo atoa va la taula. Me ghe koita teela kko alua.

<sup>42</sup> Ila akapa ghe ssoilala nau laghe namanamala.

<sup>43</sup> Emulina kapuna disaepolo atoa laghe kaa ei esokosokoiaala tapiri verete me tapiri kko. Laghe kaaila laka erooroo kasangaulu ghaluae (12).

<sup>44</sup> Taita atoa laghe namala verete ghe roola ghalima airari (5,000).

*Iesu ghe kasula epona tale paamanu*

(Mat 14:22-33; Jon 6:15-21)

<sup>45</sup> Arovaeaata ta Iesu ghe auliaala va kapuna disaepolo atoa laghe aikaaila tale paanaka ateva, me la muemue lao eBetsaida ta pai kativilau, me ia etoka me esungi velu mua taumattu ngatoa.

<sup>46</sup> Vara ghe suu vella taumattu ngatoa, me ghe saela tale motouru tani looloo sae.

<sup>47</sup> Nau ang ghe voola, paanaka ateva ang ghe rekatala elome tale ateо talia ngateae, me Iesu nonga elae.

<sup>48</sup> Ghe taatara va disaepolo atoa laghe oseose poi, me kuukuu eteva ghe aaoghila. Auena ghe pai, me Iesu ang ghe soosokotila. Ghe kasukasu epona tale paamanu eteva, me ang ghe anna tani laula.

<sup>49</sup> Nau disaepolo atoa laghe tarala Iesu ghe kasukasu epona tale paamanu eteva, laghe annaa va raroaina ia teva taumattu, me angeila ghe aaipiia,

<sup>50</sup> poli ila akapa laghe taraiela me laghe matautueiliila.

Arovaeaata ta Iesu ghe sama teeilala, me ghe uela va, “Am rau mene annaa, ta aghi oia. Am rau mene matautu.”

<sup>51</sup> Me ghe aikaai teeilala, me kuukuu eteva ghe kapala, me disaepolo atoa laghe soghiaa saasakiaala ia o voto ateva ghe lutula.

<sup>52</sup> Ta poli nannaaira karika marekate tani annaa me tani kila amasina mallooeana verete.

*Iesu ghe ghelei emasinala oroi tau sessa eGenesaret*

(Mat 14:34-36)

<sup>53</sup> Iesu me kapuna disaepolo atoa laghe ose longotila me laghe kautuula tale distriki eteva eGenesaret, me laghe rekati evukalala olimoira paanaka ateva.

<sup>54</sup> Nau eteva laghe kkurela tale olimoira paanaka ateva, taumattu ngatoa laghe tara kilala Iesu,

<sup>55</sup> me laghe ilou ekapa seela eGenesaret tani laa ghauliaa ta mene katoa va Iesu ange rekataala. Me tau sessa atoa, laghe sausau teeila me komoira tani laoainila kona laghe nonganongo nongina eaa Iesu ghe tokatoka.

<sup>56</sup> Nau Iesu ghe laolao tale masaliki pisike me namuu masaliki me tale voto karika oroi masaliki etana, tau sessa atoa laghe aalokolia tale maketi, me laghe kookolomi esarasarakana Iesu, va erooroo va la poso sama ghinnanina, me lo atoa laghe posoposoa laghe maamasina.

## 7

*Voto tuvuira atoa laghe apasungaala*

(Mat 15:1-20)

<sup>1</sup> Paresi etoa me katoa tana tau ngai aapasunga tale inangari nipaopao, laghe kasula eJerusalem, laghe lao sio me laghe tombla Iesu.

<sup>2</sup> Laghe tarala va katoa tana disaepolo kapuna ila Iesu, karika laghe porala nimaira, me laghe tam uusilaa salana tani ghelei me la raarangisana.

<sup>3</sup> (Poli Paresi etoa me ila akapa ajiu etoa laghe aimilisi tee voto tuvuira atoa laghe apasungaala, laghe tam rooroo tani namanama arova la tam pora amasina nimaira.

<sup>4</sup> Inana laghe polipoli tale maketi, karika la rooroo tani nama, ta laghe vira porapora me laghe namanama. Laghe aaimuli tee mene kasina ase salana nongina vaalua tani pora airopi manu, me aiaku manu, me aituu inana.\* )

<sup>5</sup> Paresi etoa me tau ngai aapasunga tale inangari nipaopao laghe kolomila Iesu va, “Vaalua me kapum disaepolo atoa la tam aimuli usi tee voto tuvuita atoa laghe apasungaala etaita va ita gheelei, me la nim namanama me karika la porapora nimaira?”

**6:46:** Luk 5:16.

**6:49:** Luk 24:37.

**6:51:** Mak 4:39.

**7:2:** Luk 11:38.

**7:4:** Mat 23:25.

\*

**7:4:** Kasina uru

ngai laghe pitila, laghe mene uela va, *me tevoo*.

<sup>6</sup> Iesu ghe liula etaira me ghe uela va, "Koronnaaili voto Aisaea ghe auliaala nau ghe aulia ngamuemua alokoila gheleiaaimim, am usimaghalua am. Nongina Uru ngai Manga ateva eaauliaa, eue va,

" Isaa oia taumattu la nim oneoneainaghi ta paaira  
me urunguitanira masaeuili etaghi.

<sup>7</sup> Karika righi mallooeana, uneira nikkaaua

poli la ghapasunga llo nim kaluira taumattu ngatoa nonginaaili va kanna God."

<sup>8</sup> Iesu ghe uela etaira va, "Am tam aaimuli tee inangari nipaopao kanna God, ta am nongongo uusilaa voto taumattu ngatoa laghe nim apasungala.

<sup>9</sup> "Muennaaili iem tani rati inangari nipaopao kanna God, me am anna tani aimuli usi tee voto am, am gheeghelei.

<sup>10</sup> Moses ghe uela va, 'Am oneoneaa kinaimim me tamaimim,' me 'Lo ateva ekaakasikiena tamana o kinna ae la uvi ematea.'

<sup>11</sup> Me am, am ue va taumattu ngateva erooro tani aulia ngavalua toko ta kinna me tamana va, 'Peighi tani sausiemalua ngagheleila inangari nialokoi tani taula ta God.'

<sup>12</sup> Arova ange aulia ngavaluela o, am gheeghelei rungainia va erau mene sausi tamana me kinna.

<sup>13</sup> Tale isaa o salana, am gheelei inangarina God enim peepeisaane, ta am aaimulisi tee aauliaira tuvuimim atoa. Orioeli mene kasina asease voto am gheelei."

*Sa ateva etani gheelei taumattu ngateva me karika eraarangisana*

<sup>14</sup> Iesu ghe mene kolo aitauaala taumattu ngatoa me ghe uela etaira va, "Am nongoaghi, me aloimim emasaanga.

<sup>15-16</sup> Karika va voto ekasukasu eleka me esosso tale taumattu ngateva va egheeleia etam raarangisana. Saa llo ekupikupi ghoa, isaa o voto egheelei taumattu ngateva etam raarangisana."<sup>†</sup>

<sup>17</sup> Nau ghe kasu vulila taumattu ngatoa me ghe lao sio elo ale, me kapuna disaepolo atoa laghe lao sio tani kolomia tale isaa o kiukiu niaimatoonga.

<sup>18</sup> Iesu ghe uela etaira va, "Am tee karika am kilakila sa ateva aghaaulieinia? Karika righi voto ekasukasu eleka me esosso tale taumattu ngateva egheeleia va etam raarangisana.

<sup>19</sup> Poli voto o, karika esosso tale urunguitanina ateva ta esiosio ta kovane, me elaa kupikupi velu ghoa nau eteva elaa tiutiu." (Tale isaa o inangari, Iesu ghe uela va isaa akapa inana raarangisana.)

<sup>20</sup> Me ghe mene uela va, "Saa llo voto ekupikupi ghoa tale taumattu ngateva, isaa o voto egheeleia etam raarangisana.

<sup>21</sup> Elome tale urunguitani taumattu, voto sesa ekasukasu etana. Tani nnaa saasakiaa, me nialai salosalooa see, me tani ainao, me tani aiuvi emate,

<sup>22</sup> Tani tani lai sari kateva manna ateva, me tani ssaii, me mene kasina tani voto sesa. Me tani kamekame, me ninanna ngakorokorongan tani ghelei ssavoto marova ghaata kkena atoa, me tani kiiuaa kateva, me tani auliaa saasakiaa tee kateva, me tani tau sae ninannaa, me tani ghelei voto arova alo kapakapa ateva.

<sup>23</sup> Isaa o voto ekasukasu elome tale taumattu ngateva, liuna avalua o me egheeleia etam raarangisana."

*Vauseni nge Poenisia ngateva unna niaikaiaa*

(Mat 15:21-28)

<sup>24</sup> Iesu ghe kasu vulila masaliki eteae me ghe lao sio tale kateae masaliki kalakalangina ia eTaer,<sup>‡</sup> me ghe ssola elome tale kateva ale, me karika eghe aloanna va teva eghe kilaia, me karika ghe roola tani aisulia.

<sup>25</sup> Arovaeeata ta vause ateva, natuna ateva raroai eteva ghe tokatoka etana, ghe nongola va Iesu ange rekatala, me eghe ailului lao sio me ghe suuiuala ta liue kkena fesu.

<sup>26</sup> Vause ateva karika ajiu ia, me ghe lutula ePoenisia elome tale patunganua ateva eSiria, ghe kookolomi esasararakana Iesu tani tiu velu raroai eteva ta natuna aliki vause ateva.

<sup>27</sup> Iesu ghe uela etana va, "Ami tau ekasina lao inana ta aliki etoa, karika masina tani tau lao aneira inana aliki etoa ta paua atoa."<sup>§</sup>

<sup>7:6:</sup> Ais 29:13.    <sup>7:10:</sup> Eks 20:12; 21:17; Diut 5:16.    <sup>7:15-16:</sup> Apos 10:14-15.    <sup>†</sup> <sup>7:15-16:</sup> Kasina uru ngai laghe pitila, laghe uela va, <sup>16</sup> *Lo ateva talingane manee tani nongo, aue enongo!*    <sup>‡</sup> <sup>7:24:</sup> Kasina uru ngai laghe pitila, laghe mene uela va, *me eSaedon.*    <sup>§</sup> <sup>7:27:</sup> *paua atoa* Ajiu etoa laghe anna va ila muennaaili ila ta lo atoa karika va ajiu ila, me laghe kololala va ueili paua ila. Iesu ghe aaimulisi tee auliaira. Nau ghe auliaa, karika va ghe sessaia. Ghe nim anna tani tooontoa aikaiaane vause ateva, karika va tani ghelei saasakiaa nannaane.

<sup>28</sup> Vause ateva ghe liula, me ghe uela va, "Koronna, vau eteva. Me paua atoa tee la namanama aneira vorororo nginana aliki etoa tale pake tevoo."

<sup>29</sup> Me Iesu ghe uela etana va, "Ta poli angu aulia ngavaluelo o, lao sio tanganuem me ulaa tara natum, ta raroai eteva ange kasu vuliela."

<sup>30</sup> Vause ateva ghe lao sio tanganuena, me ghe tara alokoila natuna tale komona atiulu, me raroai eteva ang ghe kasu vuliela.

*Iesu ghe otile talingana taumattu ngateva me samasamaane ghe masinala*

<sup>31</sup> Iesu ghe kasu vulila masaliki taatara ateae eTaer me ghe saela eSaendon, me ghe kasu tee lao sio tale Kasangauluae Masaliki Taatara. Emulina ghe lao sio tale ateo talia ngateae eGalilie.

<sup>32</sup> Taumattu ngatoa laghe maeaa sio tau sessa ateva ta Iesu, talingana volovolongina me tee paavoo ia, me laghe kolomila Iesu tani saoaa nimana atelange tale taumattu ngateva.

<sup>33</sup> Iesu ghe kolola taumattu ngateva elome ta taumattu ngatoa, me lalu ghe kasu vulilala, me Iesu ghe siki laala vuuvuu nimana alua ta talingane aluelange. Iesu ghe mene kanusila vuuvuu nimana alua me ghe posola ramuramuti paana ateva.

<sup>34</sup> Iesu ghe taatara saela epona liu, me ghe ainoana anamuula, me ghe uela ta taumattu ngateva va, "*Eppata!*" (mallooeana va "Talingana eoti!").

<sup>35</sup> Katengaata ta talingana taumattu ngateva ghe otile, me ghe sama amasinala.

<sup>36</sup> Iesu ghe paopao poila va, "Am rau mene kkai laa see," me karika, ta laghe kakkai laa see.

<sup>37</sup> Taumattu ngatoa laghe soghia ngatinginala mirikolo ateva, me laghe uela va, "Ia oia taumattu ngateva, voto akapa egheelei, masinaaili. Ia nonga ghe gheleila taumattu talingana volovolongina laghe nonganongola me paavoo atoa laghe samala."

## 8

*Iesu ghe anginila 4,000 taumattu*

(Mat 15:32-39)

<sup>1</sup> Isaao n nau orioannaaili taumattu ghe velu eitauaala, me karika righi inana tani nama. Me Iesu ghe kolola kapuna disaepolo atoa me ghe uela etaira va,

<sup>2</sup> "Aloghu eusiusi taumattu oia, poli ngeila ghe toka teeiegħiha kotolu nau, me karika righi aneira inana tani nama.

<sup>3</sup> Arova maloona ila me asungila va lao tanganueira, aue la taatarruu elaolao ta poli katoa laghe kasu emasaueilila."

<sup>4</sup> Me kapuna disaepolo atoa laghe liula me laghe uela va, "Voto ateva oia karika righi taumattu etana. Eaa que ita laa ghha verete me ita angini issa oia taumattu?"

<sup>5</sup> Iesu ghe kolomilala va, "Għaisa verete am uunus?"

Me laghe uela va, "Għaitu (7)."

<sup>6</sup> Me ghe uela ta taumattu ngatoa va la toka sio tapaa kosa. Me ghe għaalā verete għaitu me ghe kaili emasina saela, me ghe pirila, me ghe tau lao sio ta kapuna disaepolo atoa va laa għaikoita, me laghe lao sio tani aikoita.

<sup>7</sup> Me aneira lutu pisi tee paapakala karika oroi, ghe arangisela me ghe uela ta kapuna disaepolo atoa va laa għaikoita.

<sup>8</sup> Taumattu ngatoa laghe namanamala me ghe ssoilala, me laghe kaaila għaituae laka tale llo tapiri nginana laghe nama yulula.

<sup>9</sup> Ghe roola għaata airari (4,000) taumattu. Me ghe sungi vellala,

<sup>10</sup> me katengaata ta ia me kapuna disaepolo atoa laghe aikaaila tale paanaka ateva, me laghe lao sio tale distriki eteva eDlamanuta.

*Paresi etoa laghe aloannala tani tara teva niaimatootoongha*

(Mat 16:1-4)

<sup>11</sup> Paresi etoa laghe lao sio ta Iesu, me laghe kolomiela va eapasunga teva niaimatootoongana ngepona liu. Laghe aauliaa llo tani nim tootoongainia.

<sup>12</sup> Iesu ghe ateateala maamatana me ghe uela va, "Vaallu me taumattu ghaine atoa am aloanna tani tara niaimatootoongana? Aghaaulia ngakoronna etaimim va karika aue am tara poi teva."

<sup>13</sup> Ghe kasu vulilala me ghe mene għoala tale olimoira paanaka ateva, tani lao ta pai kativilau tale ateo talia ngateae.

*Uneira isti Paresi etoa me Herot*

(Mat 16:5-12)

<sup>14</sup> Disaepolo atoa laghe aikkaluuaala me karika laghe saula verete. Kateva nonga ia lo ateva ghe kaakaiaia tale paanaka ateva.

<sup>15</sup> Iesu ghe aulia ngasarasarakanala etaira va, "Am aikinikinitaa! Me am taatara amasina tale uneira isti Paresi etoa me Herot."

<sup>16</sup> Laghe tiuaala tani aippooaa elome etaira va, "Koti eaauliaa llo oia ta karika ita ghaala righi verete."

<sup>17</sup> Iesu ghe kilala sa ateva laghe aulieinia, me ghe kolomilala va, "Vaalua me am aauliaa va karika righi verete? Karika am ghe kila? Nannaaimim karika ghe oti?

<sup>18</sup> Mataimim karika etaatara? Talingaimim karika enonganongo? Karika am nanna?

<sup>19</sup> Nau eteva aghe pirila ghalima (5) verete tale ghalima airari (5,000) taumattu, ghaisae laka tapiri verete am ghe kaaila?"

"Kasangaulu ghalua (12)," laghe liula.

<sup>20</sup> Me ghe mene uela va, "Me nau eteva aghe pirila ghai (7) verete tale ghaata airari (4,000) taumattu, ghaisae laka am ghe kaaila tapiri verete etana?"

"Ghai," laghe liula.

<sup>21</sup> Me ghe kolomilala va, "Karika am ghe kila poi?"

*Iesu ghe ghelei emasinala mata salusalu eteva eBetsaida*

<sup>22</sup> Iesu me kapuna disaepolo atoa laghe laa rekata sio eBetsaida. Taumattu ngatoa laghe maeaa sia mata salusalu eteva ta Iesu va ghe posoa me ghe masina.

<sup>23</sup> Iesu ghe kunela nimana atelange, me lalu ghe kasu tee tau lao sio. Iesu ghe kanusuila matana alua me ghe saaoala nimane etana, me ghe kolomiela va, "Utaatara teva voto, o karika?"

<sup>24</sup> Taumattu ngateva ghe taatarala me ghe uela va, "Ataatara taumattu ngatoa arova ai etoa la kasukasu."

<sup>25</sup> Iesu ghe mene posola matana taumattu ngateva me ghe taatarala, me ghe masinala me ghe tara amasinala voto atoa.

<sup>26</sup> Iesu ghe sungi velue lao sio tanganuena, me ghe uela etana va, "Urau mene lao tapaa masaliki."

*Pita ghe auliaala va Iesu see ia*

*(Mat 16:13-20; Luk 9:18-21)*

<sup>27</sup> Iesu me kapuna disaepolo atoa laghe saela tale kasina masaliki taatara kalakalangina Esisaria Pilipae. Tapaa salana me Iesu ghe kolomila kapuna disaepolo atoa va, "Taumattu ngatoa la ue va aghi see?"

<sup>28</sup> Me laghe liula etana me laghe uela va, "Katoa taumattu la ue va io Jon tau ngai aasuu eteva; kasina eue va io Elaija; me mene katoa la ue va io kateva propete."

<sup>29</sup> Iesu ghe mene kolomilala va, "Me am vaalua? Am uue va aghi see?"

Pita ghe liula etana va, "Io Mesaea io."

<sup>30</sup> Iesu ghe paolala va karika la mene laa kkaila va ia see.

*Iesu ghe auliaala mammarikanaane me matemateaane*

*(Mat 16:21-28; Luk 9:22-27)*

<sup>31</sup> Me Iesu ghe tiuaala tani tau lao alomasaanga ta kapuna disaepolo atoa, ghe ue va, "Natuna ateva Taumattu ngateva aue etani ghaa oroieili immarikana. Namu ngatoa, me namu ngatoa ta pristi etoa, me tau ngai aapasunga ngatoa tale inangari nipaopao, aue la ratia. Aue la uvi ematea, me kotolu nau elange me aue etotu tale nimate."

<sup>32</sup> Ghe ghelei emasalikangailila etaira, me Pita ghe koloala me lalu ghe laa tingina ppae sio me ghe tiuaala tani kisoia.

<sup>33</sup> Me Iesu ghe kiriela me ghe taatara lao sio ta kapuna disaepolo atoa, me ghe tiuaala tani kiso Pita. Ghe uela va, "Kasu vulieghila, Satana! Nannaam karika eannahaa voto kannaa God, ta voto kaluira taumattu ngatoa."

<sup>34</sup> Me Iesu ghe kolola oroi taumattu me kapuna disaepolo atoa tani mae etana. Ghe auliaala etaira va, "Marova teva ealoanna tani usieghi, etani sioaa nannaane, me esunuki unna aikotoo ateva, me eaimuli etaghi.

<sup>35</sup> Me lo ateva ealoanna tani asaangi maamauluaane aue eraua, me lo ateva earau maamauluaane ta poli mausighi, me tee tale masi kiuki, aue esaanga.

<sup>36</sup> Marova taumattu ngateva eghaa voto akapaaile tale kosa ateva me maamauluaane ekapa, vaalua isaa o voto aue esausia? Koti karika.

<sup>37</sup> Sa ateva taumattu ngateva aue etaue lao tani ghaa oghi maamauluaane?

<sup>38</sup> Vituu eteva oia karika la uusilaa aloannaane God, me la gheeghelei ssavoto, me lo ateva taumattu tale lo ateva oia vituu epalatainaghi me inangarighi, aue Natuna ateva Taumattu ngateva aue epalatainia nau aue esio tee mallangina ateva Tamane me kapuna ensolo atoa manga ila.

## 9

<sup>1</sup> "Aghaaulia ngakoronna etaimim va katoa etaimim oia am tiitingina, karika aue am mate me aue am tara ararimangalina ateva God emae tee sarasarakaniaane."

*Taataraaane Iesu ghe aikolikoliaala  
(Mat 17:1-13; Luk 9:28-36)*

<sup>2</sup> Ghaonomo (6) nau ghe lange sio me Iesu ghe kolola Pita, Jeimis me Jon, me ilaata nonga laata ghe saela tale motouru eteva saesaenaili ia. Taataraaane Iesu ghe aikolikoliaala ta matairotolu,

<sup>3</sup> me ghinnanina ghe mallangala me ghe usousoanaailiila, karika poi teva taumattu tale kosa ateva erooro tani pora kalio va ghe uso avalua o.

<sup>4</sup> Me lotolu ghe tarala Elaija me Moses lalu ghe kauerekatila me lalu ghe tiuuala tani sama tee Iesu.

<sup>5</sup> Pita ghe uela ta Iesu va, "Tisa, masinaaili ta ita tokatoka oia. Angatolu ghelei kotolu ale paapali — kateva alem ia, me kateva alena ia Moses, me kateva Elaija."

<sup>6</sup> (Pita me kapuna alua lotolu ghe matautu saasakiala, me ghe tam kilala va sa arighi voto tani auliaa.)

<sup>7</sup> Me karaane ateva ghe mae sio, me tootoona ateva ghe akoulala, me lingi ngalo ateva elome tale karaane ateva ghe uela va, "Natughu eteva oia, aghaailousiangailia. Am nongoa."

<sup>8</sup> Arovaeata ta vara lotolu ghe mene taatara, me lotolu ghe luula mene ghalua. Lotolu ghe aaitaraa, me lotolu ghe tara nongala Iesu.

<sup>9</sup> Nau laghe mae siosio tale motouru, Iesu ghe ttoieinilotolla va la rau mene auliaa ta toa saa llo laghe tarala lomosi ta Natuna ateva Taumattu ngateva etotu tale nimate.

<sup>10</sup> Lotolu ghe nongo usilaala voto ghe ppooala ta ngetairatolu, me vara lotolu nonga me ngilotolu ghe aikolomieinilotolu va vaalua me euela va etotu tale nimate.

<sup>11</sup> Me disaepolo kotolu lotolu ghe kolomila Iesu va, "Vaalua me tau ngai aapasunga ngatoo tale inangari nipaopao la ue va Elaija aue etani muemue mae?"

<sup>12</sup> Iesu ghe liula me ghe uela va, "Elaija aue emae amuemue tani ghelei emasina akapa voto. Me vaalua me Uru ngai Manga ateva eue tee va Natuna ateva Taumattu ngateva aue eghaa oroi voto sesa me aue la ratia?

<sup>13</sup> Aghaauliaa etaimim va Elaija ang ghe mae sio, me taumattu ngatoo ngeila ghe ghelei ekapala saa llo voto laghe anna tani ghelei etana, nongina Uru ngai Manga ateva eaauliaa."

*Iesu ghe ghelei emasinala taita arighi  
(Mat 17:14-20; Luk 9:37-43)*

<sup>14</sup> Nau laata ghe sio mae tani mene tara katoa disaepolo, laghe tarala oroieili taumattu laghe tomtomla, me tau ngai aapasunga ngatoo tale inangari nipaopao laghe aissakeana teeila tale inangari.

<sup>15</sup> Nau taumattu ngatoo laghe tarala Iesu, ila akapa laghe soghieiniela, me laghe iloula tani laa soua.

<sup>16</sup> Iesu ghe kolomila va "Sa ateva am aaissakeana teeia?"

<sup>17</sup> Katega elome tale uta taumattu ngatoo ghe liula me ghe uela va, "Tisa, amaeaa sio natughu eteva etam, poli raroai eteva etokatoka ta ngetana egheeleia karika esamasama.

<sup>18</sup> Nau epoopotainia me usouso paane eghooa me eaningerresa ngalungaluna me ekakkarakaneana. Akolomila kapum disaepolo atoa va la suu velu raroai eteva etana, me karika la roola."

<sup>19</sup> Iesu ghe liula me ghe uela ta taumattu ngatoo va, "Am lo atoa oia taumattu, karika righi uneimim niaikaaia, ghaisaa ta aue atoka teeiem? Me aue ghaisaata ta aue atoiem va am aiesoaa? Am maeeaa sio aliki eteva etaghi."

<sup>20</sup> Laghe maeaa sio aliki eteva ta Iesu, me nau raroai eteva ghe tarala Iesu ghe gheleila me aliki eteva ghe tiuuala tani oo, me ghe ghelei ekatungiela, me ghe tiuuala tani vilieinia tapaa kosa, me usouso paane ghe ghooa ta paane.

<sup>21</sup> Iesu ghe kolomila tamane aliki eteva va, "Lovisaas isaa oia voto ghe tiuuala etana?"

Tamane ghe liula me ghe uela va, "Nau aliki aarau.

<sup>22</sup> Oroiaata raroai eteva eanna tani uvi ematea. Egheeleia ekaakatuu saoaa tale kura, me tale manu va earropia. Ualousiusi teeengalua, me usausiengalua arova urooroo."

<sup>23</sup> Iesu ghe liula me ghe uela va, "Vaalua me uue va, 'Arova urooroo?' Poli lo ateva eaaiakaiaa, erooroo tani ghelei ekapa voto."

<sup>24</sup> Arovaeata ta tamane aliki eteva ghe sama anamuula me ghe uela va, "Aghaikaiaa; me uasasarakanan uneghi niaikaiaa."

<sup>25</sup> Nau Iesu ghe tarala ya taumattu ngatoa ngeila ghe maemae akalakalanginaaili etana, me ghe paola raroai eteva; ghe uela va, "Raroai volovolongina me paavoo ateva, aghaauliaa etam va kupi vulu ghoa mae aliki eteva, me auena urau mene laa kupie sso."

<sup>26</sup> Raroai eteva ghe piila me ghe gheleila aliki eteva ang ghe oo, me ghe kupi vulue ghoa. Aliko eteva taataraane nonginaaili va ghe matela, oroi taumattu laghe taraiela laghe annaa va ang ghe matela.

<sup>27</sup> Iesu ghe kunela nimane atelange me ghe sausiela tani tingina, me ghe tinginala.

<sup>28</sup> Nau Iesu me kapuna disaepolo atoa laghe lao sio elo ale me ila nonga laghe tokatoka, me ngeila ghe kookolomi Iesu va, "Vaalua me ami karika ami roola tani tiu velu raroai eteva?"

<sup>29</sup> Iesu ghe liula me ghe uela va, "Nikokkolomi sae\*" nonga ateva erooroo tani tiu velu ia o ase lo ateva raroai. Karika mene tikirighi salana."

*Aiaaghluene Iesu ghe uela va aue emene totu*

(Mat 17:22-23; Luk 9:43-45)

<sup>30</sup> Laghe kasu vulila masaliki eteae o, me laghe lao tee sio eGalilii, me karika ghe mene anna va teva taumattu ghe kilaia,

<sup>31</sup> poli ghe poppoaa tani apasunga ta kapuna disaepolo atoa, me ghe ue etaira va, "Natuna ateva Taumattu ngateva ngeila tautuela ta nimaira taumattu ngatoa, me aue la uvi ematea, me vara kotolu nau elange me aue emene totu."

<sup>32</sup> Karika aloira ghe masaangaala llo ghe auliaala, me laghe maamatautu tani kolomia.

*Tani see namuu ia?*

(Mat 18:1-5; Luk 9:46-48)

<sup>33</sup> Iesu me kapuna disaepolo atoa laghe lao sio eKapenium. Laghe kupi ssola tale ale ateva me Iesu ang ghe kookolomila va, "Sa ateva am aissakeana teeia tapaa salana?"

<sup>34</sup> Karika laghe aisauaala, poli nau laghe maemae tapaa salana, laghe aaissakeana va tani see etaira namuu ia.

<sup>35</sup> Iesu ghe toka siola me ghe kolo aitauaala kapuna disaepolo atoa me ghe uela va, "See eanna va emuemue, etani gheleia eairuuruu, me etau ngai uungu ta mene katoa."

<sup>36</sup> Me ghe ghaala aliki erighi me ghe atinginaiela elome etaira, me ghe vaghiela, me ghe uela etaira va,

<sup>37</sup> "See eannainaghi me eaikoloa aliki etoa, eaaikoloainaghi, me lo ateva taumattu eaikoloainaghi, karika va eaaikoloainaghi nonga, ta eaaikoloa tee Tamaghi ghe sungieghila tani sio."

*See karika aissaniita ia, kapuita ia*

(Luk 9:49-50)

<sup>38</sup> Jon ghe uela va, "Tisa! Ami tarala taumattu ngateva etiutiu velu raroai eteva tale ararim ateeae, me ami paoala va eruu poli karika va ita me ia."

<sup>39</sup> Iesu ghe uela etaira va, "Am rau mene paoa, poli lo ateva taumattu eghelei mirikol tale ararighi eteae karika aue ailului tani auliaa teeieghi righi voto sesa,

<sup>40</sup> poli see karika aissaniita ia, kapuita ia.

<sup>41</sup> Aghaaulia ngakoronna etaimim va lo ateva taumattu etau aatu righi manu tale ararighi eteae va uropi, poli io kapuna io Karisto, aue eghaa aipolina.

*Nitootoonga tani ghelei ssavoto*

(Mat 18:6-9; Luk 17:1-2)

<sup>42</sup> "Arova aliki erighi eainesoaa etaghi, me teva taumattu egheelei unna niaikaiaa ekatuu, ghele masinaaili ta arova la ghele iri teva paka ngatu ta ngalona, me la ghele ghoa allusia elo maliong.

<sup>43-44</sup> Arova nimam atelange egheleio me ukaakatuu tani ghelei voto sesa, usai kotooria, poli aue emasina ta ngetam arova nimam atelange takotoona me usso tale maulue ateva.

9:23: Mat 21:21; Mak 11:23.      9:26: Mak 1:26.      \* 9:29: Kasina uru ngai laghe pitila, laghe uela va, *Nikokkolomi sae me niniae*.      9:30: Jon 7:1.      9:31: Mak 8:31; 10:32-34.      9:32: Luk 9:45.      9:35: Luk 22:24-26; Mat 20:25-27; Mak 10:43-44.      9:37: Mat 10:40.      9:40: Mat 12:30; Luk 11:23.      9:41: Mat 10:42.      9:43-44: Mat 5:30.

Me aue esesaaili arova nimam atelange etokatoka me angu laolao tale Gehenna tale kura ataeae karika epalapala.<sup>†</sup>

<sup>45-46</sup> Arova kekem atelange egheleio me ukaakatuu tani ghelei voto sesa, usai kotooia, poli aue emasina ta ngetam arova kekem atelange takotoona me ughaa maulue ateva, me esesaaili arova kekem atelange masina me angu laolao tale Gehenna tale kura ataeae karika epalapala.<sup>‡</sup>

<sup>47</sup> Me arova teva matam egheleio me ughelei voto sesa, uvaliki velua. Emaamasina arova ukupi sso tale ararimangalina ateva God tee kateva nonga matam, me esesaaili arova matam akapa alua lalu tokatoka me la sau veluo sae tale kura ataeae eGehenna,

<sup>48</sup> tale ia o voto ateva,

“ ‘ttoliti etoa karika la matemate

me kura ataeae karika epalapala.’

<sup>49</sup> Taumattu ngakapa kura ataeae aue gheleila la raarangisana.

<sup>50</sup> “Uela ateva masina ia, me arova namina ateva ekapa, vaalua emene ghelei me aue emene tue namina? Karika erooroo. Am, am toka arova masi uela ateva tani toka amasina, me luei easo elome etaimim me mene katoa taumattu.”

## 10

### *Tani airatii*

(Mat 19:1-12)

<sup>1</sup> Iesu ghe kasu vulila masaliki eteae, me ghe lao sio tale kativilau tale ateo ataeae ejodan, me tale distriki eteva ejidua. Oroi taita me vause laghe mae sio tani velu eitauaa ta Iesu. Me Iesu ghe aapasunga inangarina God ta ngetaira, nongina ghe gheelei nau etoa.

<sup>2</sup> Katoa Paresi laghe mae sio tani tooontoaga Iesu tale nikokkolomi eteva va, “Uneita inangari nipaopao eue va masina arova taita ateva erati vausenna ateva, o karika?”

<sup>3</sup> Iesu ghe liula me ghe uela va, “Saa inangari nipaopao Moses ghe tau aatu sio etaimim?”

<sup>4</sup> Me laghe uela va, “Moses ghe pitila va taita ateva erooroo tani piti uru ngai niairatii, me etaue lao ta vausenna ateva, me esungi velua.”

<sup>5</sup> Iesu ghe uela etaira va, “Moses ghe pitila llo inangari nipaopao etaimim poli urunguitaanimim korokoronganaiili.

<sup>6</sup> Emua arau nau ta God ghe gheleila kosa ateva, ‘God ghe gheleila taita me vause.’

<sup>7</sup> ‘Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva,

<sup>8</sup> me ilalua aue lalu kateva nonga tale vilikiirarua.’ God ghe uela va karika va ghalue ilalua ta kateva nonga ilalua.

<sup>9</sup> Liuna avalua o me voto God eaatoka aitauaa, karika mene teva taumattu emene pola.”

<sup>10</sup> Nau eteva Iesu me disaepolo atoa laghe kiri lao sio elo ale, me disaepolo atoa ngila ghe mene kookolomi Iesu tale isaa o inangari.

<sup>11</sup> Me Iesu ghe uela etaira va, “Arova taita ateva ngeratila vausenna ateva me emene lai ppae ta kateva vause, elailai salosaloaa, ta enim ghaaghaha mene kateva vause, me vausenna tuunga ateva ie etokatoka.

<sup>12</sup> Vause tee ateva arova erati taitanna ateva me elaa lai ta kateva ppae taita ia, ia tee elailai sari, ta enim ghaaghaha taita ateva me taitanna tuunga ateva ie etokatoka.”

### *Natu aliki etoa me Iesu*

(Mat 10:13-15; Luk 18:15-17)

<sup>13</sup> Katoa vause me taita laghe maeaa sio lutu ngaliki etoa ta Iesu va esaoaa nimane etaira, me disaepolo atoa laghe paopaoa.

<sup>14</sup> Me nau eteva Iesu ghe tarailala, karika ghe masimasiaala kapuna disaepolo atoa me ghe uela va, “Am maeainila sio etaghi. Am rau mene tiu velu natu aliki etoa tani mae etaghi, ta ararimangalina ateva God tanganueira ia ase taumattu ngatoo nongina natu aliki etoa.

<sup>15</sup> Aghaaulia ngakoronna etaimim va arova see karika eghaa ararimangalina ateva God nongina aliki etoa, karikaaili va aue elao tale ararimangalina ateva God.”

<sup>16</sup> Me Iesu ghe sausau aliki etoa me ghe saasaoaa nimane etaira me ghe aarangiseila.

<sup>†</sup> **9:43-44:** Kasina uru ngai laghe pitila, laghe uela va, <sup>44</sup> *tale ia o voto ateva, ‘ttoliti etoa karika la matemate, me kura ataeae karika epalapala.’* <sup>‡</sup> **9:45-46:** Kasina uru ngai laghe pitila, laghe uela va, <sup>46</sup> *tale ia o voto ateva, ‘ttoliti etoa karika la matemate, me kura ataeae karika epalapala.’*

**9:47:** Mat 5:29.

**9:48:** Ais 66:24.

**9:50:** Mat 5:13;

Luk 14:34. **10:4:** Diut 24:1-4; Mat 5:31. **10:6:** Aitiuti 1:27; 5:2. **10:7:** Aitiuti 2:24; Ips 5:31-33. **10:11:** Mat 5:32. **10:15:** Mat 18:3.

*Tue peipeiena ateva**(Mat 19:16-30; Luk 18:18-30)*

<sup>17</sup> Nau Iesu ghe mene kasukasu elao lao tapaa salana, taumattu ngateva ghe iloula emuli etana me ghe suuaala ta liue kkena Iesu, me ghe uela va, “Masi tisa ngateva, vaalua aghelei me aghaa maulue ateva etokatoka liu?”

<sup>18</sup> Iesu ghe liula me ghe uela etana va, “Vaalua me ukolokoaghi va masina ieghi? Karika teva masina ia ta God nonga.

<sup>19</sup> Ukilakila inangari nipaopao, va karika umene aiuvi emate, karika umene lai sari, karika umene ainao, karika umene kamekame tale niaiskei, karika umene aikameeaa tani ghaa voto, me uoneoneaa tamam me kinam.”

<sup>20</sup> Me ghe liula me ghe uela va, “Tisa, isaa ona inangari nipaopao ngaghe usilaala nau aliki taita aghi.”

<sup>21</sup> Iesu ghe tara usiusiela me ghe aielousieiniela, me ghe uela etana va, “Kasina ateva voto karika ughe gheleielo. Lao sio me ulaa tau lao ghinnanim me la poli, me ulaa tau lao viliki veu ta lo atoa karika righi ghinnaniira, me aue utau peipeiena epona liu, me umae aimuli etaghi.”

<sup>22</sup> Me taumattu ngateva oia nannaane ghe katungailila tale isaa o inangari, me ghe alousiusila me ghe kasula, poli tue peipeiena ia.

<sup>23</sup> Me Iesu ghe aitaraala me ghe uela ta kapuna disaepolo atoa va, “Tue peipeiena atoa aue aanaasaali etaira tani sso tale ararimangalina ateva God.”

<sup>24</sup> Me disaepolo atoa laghe soghiaala tani nongo inangarina Iesu. Iesu ghe mene ppooaa tee tau lao sio va, “Aliko etoa, tani sso tale ararimangalina ateva God, aanaasa ia.

<sup>25</sup> Marova masukasukale ta teva kamolo tani kupi sso tale teae mata raum, aue emasukasukaleaili tee ta teva tue peipeiena tani kupi sso tale ararimangalina ateva God.”

<sup>26</sup> Mausina avalua o me disaepolo atoa laghe soghiaala saasakiaa teeila inangarina Iesu me ngila ghe aaikolomieinila va, “Arova isaa avalua o, see nonga erooroo tani saanga?”

<sup>27</sup> Iesu ghe pasiaala matane etaira me ghe uela va, “Ta taumattu ngatoa, karika la rorooroo, me ta God la rorooroo, poli God erooroo tani ghelei ekapa voto.”

<sup>28</sup> Me Pita ghe tiauala tani auliaa ta Iesu va, “Utara, ami ghe kasu vuli ekapannaailila voto, me ami ghe aimuli teeiola.”

<sup>29</sup> Me Iesu ghe uela va, “Aghaaaulia ngakoronna etaimim va see ia taumattu ngateva eamuemueieghi me uunguua masi kiuki me ghe kasu vulila tangantuena, tuena atoa, nengana atoa, kinna me tamane me natuna atoa me umane utana,

<sup>30</sup> aue eghaa sae ta kateva ai (100). God aue etau lao oroi voto etana. Nau ta etokatoka tale kosa ateva oia, voto aue eghaa aue eoroieili, me aue elau voto llo peina ghe kasu vulila, aue eghaa oroi ale me tuena me nengana me kinna me natuna me umana utana. Katoa taumattu aue la ghelei voto sesa etana, me emulina aue eghaa maulue ateva etokatoka liu.

<sup>31</sup> Me oroi ila taumattu ngatoa matuutulienia ila aue la sioaili euu, me see ila lo atoa arariira euu aue la matuutulienia.”

*Iesu ghe auliaala va aue emate me emene totu**(Mat 20:17-19; Luk 18:31-34)*

<sup>32</sup> Iesu me kapuna disaepolo atoa laghe mene kasukasu elao lao ejerusalem. Iesu ghe muemueainila me kapuna disaepolo atoa laghe soosoghiaa voto laghe taatara ta Iesu. Taumattu ngatoa laghe aaimuli usi tee Iesu me kapuna disaepolo atoa laghe maamatautu. Iesu ghe mene kolola kasangaulu ghalua (12) kapuna disaepolo, me ghe mene aulia ngotaula voto aue elutu ta maamauluaane.

<sup>33</sup> Ghe uela va, “Am nongo! Nau eteva ngita laa soso ejerusalem aue la tau lao Natuna ateva Taumattu ngateva ta nimaira namu ngatoa ta pristi etoa me tau ngai aapasunga tale inangari nipaopao atoa, me aue la ghelei niaiskei etana, me la tingina aitauaa tale niaiskei etaeae va la uvi ematea. La ruu o, me la taue lao ta nimaira mene katoa ppae karika va ajiu ila.

<sup>34</sup> Me ila o katoa ppae taumattu aue la ghauliaa inangari niattara etana, la kanusueinia, me la uetaia, me la uvi ematea. Emate me vara aiaakotonna ateva nau, aue etotu.”

*Jeimis me Jon lalu ghe aloanna tani namuu**(Mat 20:20-28)*

<sup>35</sup> Jeimis me Jon, natuna ilalua Sebedi, lalu ghe mae sio ta Iesu me lalu ghe kolomiela va, “Tisa, angalu aloanna tani kolomio tale kateva voto, me angalu aloanna va ughelei ia o voto ateva etaingalua.”

<sup>36</sup> Me Iesu ghe kolomilueluva, "Sa ateva amalu aloannaia va agheleia etaimalua?"

<sup>37</sup> Me lalu ghe uela etana va, "Nau eteva ukingi, kateva etaingalua etoka tale pai muenna ativilau, me kateva tale pai uaise ativilau."

<sup>38</sup> Vara me Iesu ghe uela etairarua va, "Karika amalu tani kilakila amasina llo voto amalu kookolomieghi etana. Koti karika amalu rooroo tani ropi tale kapa ateva nimmarikana anga ghaainasiaa tani ropia? Me tani suu tale lo ateva nisuu anga ghaainasiaa tani suu etana?"

<sup>39</sup> Me lalu ghe uela ta Iesu va, "Angalu rooroo."

Me Iesu ghe uela va, "Koronna. Kapa ateva anga ghaainasiaa tani ropia, aue amalu ropi tee etana, me nisuu eteva anga ghaainasiaa tani suu etana aue amalu suu etana.

<sup>40</sup> Me see ia lo ateva aue etoka tale pai muenna ativilau me tale pai uaise ativilau, karika uunguaaghi tani tau aatu; karika. Llo o aitokatoka God ang ghe aimonomonosiaala va uneira ila taumattu ngatoa God aue sui toongainila."

<sup>41</sup> Nau eteva disaepolo kasangaulu (10) laghe nongola inangari Jeimis me Jon, eghe sessailala etairarua.

<sup>42</sup> Me Iesu ghe kolo aitaueinilala me ghe uela etaira va, "Am kilakila va lo atoa arariira ataeae va namuu ila ta tau ngeleka atoa, ila la gheelei taumattu enim uunguaanasa etaira. Me lo atoa matuutulienia ila, la gheelei saasakiaa etaira.

<sup>43</sup> Isaa o ase gheeleiaaira erau mene toka elome etaimim, karika. Lo ateva taumattu ealoanna tani namuu elome etaimim, esio euu me eghelei nongina tau ngai nonganongo anna atoa.

<sup>44</sup> Me see ia lo ateva ealoanna tani muemue etaimim, ia aue ekapuimim tau ngai uungu ia.

<sup>45</sup> Mausina avalua o, me Natuna ateva Taumattu ngateva karika ghe sio mae va taumattu ngatoa la uungu etana, karika. Ghe sio mae tani uungu etaira, me tani tau lao maamauluaane, tani ghia oghi oroi taita me vause."

*Iesu ghe ghelei emasinala mata salusalu eteva*

(Mat 20:29-34; Luk 18:35-43)

<sup>46</sup> Iesu me kapuna disaepolo atoa laghe rekatala ejeriko, laghe aso taula, me ngila ghe anna tani mene kasu ejeriko. Ia me kapuna disaepolo atoa me taumattu ngatoa oroeili ila laghe usiusia. Me Batimease, natuna ia Timease, ghe tokatoka tale sama salana atikirighi. Mata salusalu ia me uunguaane tani loo viliki veu tale taumattu ngatoa.

<sup>47</sup> Me eghe nongola va Iesu a Nasareti ia ange rekatala, me ghe taila tani ovaova atingina va, "Iesu, natuna ia Deivit, ualousiusi teeieghi!"

<sup>48</sup> Oroi ila taumattu ngatoa laghe kisokisoia me laghe ue etana va, "Urau mene sama." Me eghe mene ovaova anamungaili va, "Natuna ateva Deivit, ualousiusi teeieghi!"

<sup>49</sup> Me Iesu ghe tinginala, me ghe uela va, "Am kolo taue mae."

Me laghe uela etana va, "Umasimasi, tingina saela, ange kolokoloo tani lao etana."

<sup>50</sup> Vara me ghe uei vella unna aiaasae ngeleka ateva, me ghe tingina parasi saela me ghe lao sio ta Iesu.

<sup>51</sup> Me Iesu ghe kolomiela va, "Sa ateva ualoannaia va agheleia etam?"

Me mata salusalu eteva ghe uela va, "Vau eteva! Aghaloanna tani taataria."

<sup>52</sup> Me Iesu ghe uela etana va, "Kasula, ta unem niaikaaiaa ngeghelei emasinaiola." Me arovaeaata ta matane alua ghe otila o, me ghe usila Iesu tapaa salana.

## 11

*Iesu ghe ssola ejerusalem*

(Mat 21:1-11; Luk 19:28-40; Jon 12:12-19)

<sup>1</sup> Nau eteva laghe mae akalakalangina sio ejerusalem, me eBetpeis me eBetani, masaliki eluae tale motouru eteva eOliv, Iesu ghe suuila kapuna disaepolo alua,

<sup>2</sup> me ghe uela va, "Amalu lao tale masaliki etaeae ita taatariae ia o. Nau amalu rekata etana, amalu tara atingina natu donki eteva naunau etingina ia karika teva taumattu ghe sae toka me ghe ilou etana. Amalu pulakaia me amalu maeainia.

<sup>3</sup> Arova teva taumattu eue etaimalua va, "Vaalua me amalu ghaaghiaia?" amalu ue va, "Vau eteva ealoannaailia me auena emene ogheine mae."

<sup>4</sup> Me lalu ghe lao sio lalu ghe laa tara atingina sio natu donki eteva tapaa ngatamana tale ale ateva, tapaa salana, me lalu ghe pulakaiela.

<sup>5</sup> Katoa laghe tiitingina laghe uela etairarua va, "Vaalua me amalu puupulaka donki eteva?"

<sup>6</sup> Me lalu ghe auliaala saa llo Iesu ghe auliaala etairarua, me laghe tau vellaluela me lalu ghe kasula.

<sup>7</sup> Lalu ghe laoainie sio ta Iesu. Lalu ghe alokoi saela uneirarua aiaasae ngeleka etana me Iesu ghe laa sae toka etana.

<sup>8</sup> Me oroieli ila lo atoa laghe tiuala tani llu velu uneira aiaasae ngeleka epona tale salana atikirighi. Mene katoa laghe laa saisai laa ootou, me laghe velovelu epona tale salana atikirighi. <sup>9</sup> Lo atoa laghe kasukasu emua me lo atoa laghe usiusia laghe ovaova tani ue va,

“Tau sae ararina atae God!

God aue earangise lo ateva emaemae elome tale ararina atae Vau ngepona ateva!”

<sup>10</sup> “Niarangise tale ararimangalina ateva tuvuita ateva ta Deivit aue emae!”

“Tau sae ararina atae God iaaili epona!”

<sup>11</sup> Iesu ghe ssola ejerusalem, me ghe kupi ssola tale ale manga ateva, me ghe aaitaraa see tale voto atoa. Me ia o ang ghe elo alaila me Iesu ghe kiri lao sio eBetani tee me kapuna kasangaulu ghalua (12) disaepolo.

*Iesu ghe kasikienala fig atae*

(Mat 21:18-19)

<sup>12</sup> Elue talaua, laghe kasu vulila eBetani, me Iesu ang ghe maamaloo.

<sup>13</sup> Eghe taatara amasau lao sio me ghe tarala fig atae uruenaili ia. Me ghe lao sio tani taraiia va arova righi uene. Me nau eteva ghe laa rekataa sio, ghe tarala va uruna nonga, poli karika ghe ghaa nauna tani kune.

<sup>14</sup> Vara me Iesu ghe uela tale ai eteae va, “Karika teva aue emene nama righi uem!” Me kapuna disaepolo atoa laghe nongoala.

*Iesu ghe kupi ssola tale ale manga ateva*

(Mat 21:12-17; Luk 19:45-48; Jon 2:13-22)

<sup>15</sup> Nau eteva laghe rekatala ejerusalem, Iesu ghe ssola tale ale manga ateva, me ghe tiuala tani sungi velovelu lo atoa laghe aaitauua me laghe poppoli. Eghe sau etakila tevoo atoa uneira ila lo atoa laghe aaikolikololia viliki veu, me aitokatoka uneira lo atoa laghe aaitaraa valusu,

<sup>16</sup> me karika poi ghe aalonva toa la sau longoti righi peiira eleka nongina ale manga ateva.

<sup>17</sup> Vara me eghe tiuala tani apasunga tale taumattu ngatoa. “Karika am ghe kilala llo laghe pitila tale Uru ngai Manga ateva, ghe uela va,

“Aleghi ale manga ateva aue la ghasea va

ale ailooloo sae ia tale taumattu ngakapa atoa tale anua akapa atoa”?

Me am, ngam gheeleielaa ‘nongina va aleira ale niaisulia ia tau niainao atoa!’ ”

<sup>18</sup> Namu ngatoa ta pristi etoa me tau ngai aapasunga ngatoa tale inangari nipaopao laghe nongola voto oia, me ngila ghe paepae righi salana tani uvi emate Iesu, me laghe maamatautainia, ta poli taumattu ngakapa atoa laghe oouna tee inangarina.

<sup>19</sup> Elo alai tale ia o nau eteva, Iesu me kapuna disaepolo atoa laghe kasu vulila\* masaliki taatara atea.

*Taumattu eaiesoa ngakoronna me ekokkolomi sae aue eghaa voto*

(Mat 21:20-22)

<sup>20</sup> Elue talaua poopooa, Iesu me kapuna disaepolo atoa laghe kasukasu elao lao, me laghe tarala fig atea ta ang ghe mmatela. Oane me ia akapaa ilai eteae ghe mmatela.

<sup>21</sup> Pita ghe mene nnaa lao sio sa ateva Iesu ghe ppooinaihila tale ai eteae. Ghe uela va, “Tisa, tarala, fig atea ueghele kasikienainiela ange mmatela!”

<sup>22</sup> Iesu ghe liula etaira me ghe uela va, “Am aiesoaa ta God.

<sup>23</sup> Aghaaulia ngakoronna etaimim va, see arova eue tale motouru eteva o va, ‘Ukasu me ughoa katuu elamana,’ isaa o voto aue elutu etana, arova eaiesoaa tale urunguitanina ateva me karika eghaaghalua nannaane, voto o aue elutu.

<sup>24</sup> Liuna avalua o me aghaaulia etaimim va, sa ateva am kolomia tale uneimim nilooloo sae, me am aiesoaa va angam ghaala, aue am ghaa me aue kaluimim.

<sup>25-26</sup> Me nau am tingina me am looloo sae, am kkaluaa sesa katoa la gheelei etaimim, me Tamaimim ateva epona liu aue ekkaluea tee gheeleiaaimim sesa.”†

<sup>11:9:</sup> Sams 118:25-26; 148:1.    <sup>11:13:</sup> Luk 13:6.    <sup>11:17:</sup> Ais 56:7; Jer 7:11.    <sup>11:18:</sup> Mak 14:1.    \* <sup>11:19:</sup> Iesu

me kapuna disaepolo atoa laghe kasu vulila Kasina uru ngai laghe pitila, laghe uela va, Iesu ghe kasu vulila.    <sup>11:23:</sup>

Mati 17:20.    <sup>11:24:</sup> Mat 7:7.    <sup>11:25-26:</sup> Mat 6:14-15.    † <sup>11:25-26:</sup> Kasina uru ngai laghe pitila, laghe uela va,

<sup>26</sup> Marova am tam kkaluea, Tamaimim ateva epona liu karika aue ekkaluea tee eleiaaimim sesa. Utara Matiu 6:15.

*Nikokkolomi tale matuutulienaa Iesu  
(Mat 21:23-27; Luk 20:1-8)*

<sup>27</sup> Laghe kiriaa mae sio ejerusalem, me vara Iesu ghe kasukasus elome tale ale ngeleka etiulu tale ale manga ateva, me namuu ta pristi etoa me tau ngai aapasunga ngatoa tale inangari nipaopao me namu ngatoa laghe mae sio ta ngetana.

<sup>28</sup> Me laghe uela etana va, "See ghe tau aatu sio matuutulienaa etam, me see ghe sungiola tani mae ghelei isaa oia voto?"

<sup>29</sup> Me Iesu ghe uela etaira va, "Akolomiem mua tale kateva nikokkolomi, me arova am liu emasinaia, aue aghauliaa etaimim va see ghe tau mae sio matuutulienaa etaghi."

<sup>30</sup> Am liu etaghi va see ghe tau lao sio matuutulienaa ta Jon me ghe aasuu taumattu: Vau ngepona ateva o nim taumattu?"

<sup>31</sup> Me ngeila ghe tingina aissakea va sa ateva la ghaulieinia etana, "Arova ita ue va, 'Vau ngepona ateva,' aue eue va, 'Me vaalua me karika am ghe aakaiaa ta Jon?'

<sup>32</sup> Me arova ita ue va, 'Nim taumattu..." (Laghe maamatauta taumattu ngatoa, poli taumattu ngakapa atoa laghe annaa va Jon propete ia.)

<sup>33</sup> Liuna avalua o laghe liula me laghe uela ta Iesu va, "Karika ami kilakila."

Me Iesu ghe uela etaira va, "Aghi tee, karika aue aghauliaa etaimim va see ghe tau mae sio matuutulienaa etaghi."

## 12

*Kiukiu niamatoonga tale sesa tau ngeutana atoa laghe aaitaraa utani uaeni etingiu  
(Mat 21:33-46; Luk 20:9-19)*

<sup>1</sup> Iesu ghe tiuala tani aippooaa tee taumattu ngatoa tale kiukiu niamatoongana atoa va, "Kateva taumattu ghe pasala utani uaeni etingiu, me ghe iri taliaala valavala atae, me ghe kaila aimonaa uaeni eteva, me ghe atulula aitiketike ateva. Vara me ghe tau lao sio ta katoa tau ngeutana tani aitareainia, me ghe kasu emasaula. <sup>2</sup> Nau eteva utana atingiu ghe matuela, ghe suula kateva kapuna tau ngai uungu tani laa tara lo atoa laghe aaitaraa utana atingiu me aue ghe ghaa righi ue uaeni.

<sup>3</sup> Lo atoa laghe aaitaraa utana atingiu laghe llotiela, me laghe uvi saasakieiniela, me laghe sungi veluela, me karika ghe ghaala righi ue uaeni.

<sup>4</sup> Vara me ghe mene suula mene kateva kapuna tau ngai uungu tani mene lao etaira. Laghe mene lloti etokaiela, me laghe paru rriila uruna ateva, me laghe apalataiela.

<sup>5</sup> Ghe mene suula mene kateva, lo ateva o tau ngai uungu laghe uvi emateala. Orioelli ila lo atoa ghe mene sungilala kateva kateva ghe laolao; katoa laghe nim uvilala, me katoa laghe uvi ematelala.

<sup>6</sup> "Kateva nonga ia taumattu ghe tokala, natuna ia ghe tani aaielousieinia, ghe airuuruula tani sungia ta ghe ue va, 'Aue la oneoneaa natughu eteva.'

<sup>7</sup> "Nau eteva lo atoa laghe aaitaraa utana atingiu laghe taraiela, laghe aippooa ngaitauaala elome etaira va, 'Taumattu ngateva okae aue egħhaa akapa llo oia. Ita uvi ematea, me ita għaa utana atingiu me ekaluita ia.'

<sup>8</sup> Laghe llotiela, me laghe uvi emateala, me laghe sau velue għoala eleka tale utana atingiu.

<sup>9</sup> "Sa ateva taumattu ngateva, umana ia utana atingiu, aue egħeleja? Aue emae euvu ematela me emene tau lao utana atingiu ta katoa ppae.

<sup>10</sup> Koti karika am ghe ritila tale Uru ngai Manga ateva? Eue va,

"Atu eteva tau ngai atulu ale atoa laghe ratiela

għe aitħiutiula tale atu ekpa atoa tani suei ale ateva;

<sup>11</sup> Vau palepale għe għeilela isaa o voto

me taatħaraane masinaallil ta mataita.'

<sup>12</sup> Namu ngatoa laghe nongola me laghe kilala va Iesu għe aauliaa teeila tale kiukiu niamatoonga. Laghe aloanna tani kuneia, me laghe nim maamatauta taumattu ngatoa, me laghe tau veluela, me laghe kasula.

*Tan iu lao takis ta Siisa  
(Mat 22:15-22; Luk 20:20-26)*

<sup>13</sup> Laghe suula katoa tana Paresi me katoa tana kapuna Herot tani laa ghareaa Iesu va għe ppooa righi inangarina, me laghe għaġia me laghe laa ghatingināia tale niaisakei.

<sup>14</sup> Nau lagħe lao sio, lagħe uela va, "Tisa, io nau ekpa atoa uaauliaa nonga voto koronna. Karika unannangaili saa llo taumattu ngatoa la annaa, me karika utaatara

taumattu tale naanamungaaira me uunguaaira, me uaapasunga ngakoronna salane God. Vaalua? Masina tani taula takis ta Siisa? Ita taula, o karika ita mene taula?"

<sup>15</sup> Me ia ghe kilakilaaili va usimaghalue ila, me ghe uela etaira va, "Vaalua me am tootoongainaghi? Ghaa mae tivilau viliki veu me atara."

<sup>16</sup> Laghe tau lao sio viliki veu etivilau etana me ghe uela etaira va, "See tootoona ateva me ararina ataeo o?"

Me laghe uela va, "Siisa."

<sup>17</sup> Me Jesu ghe liula me ghe uela etaira va, "Am taula voto kanna Siisa ta Siisa, me voto kanna God ta God."

Me laghe soghiaala tani nongo llo ghe auliaala.

*Maulue ateva tale kosa ateva auena emae*

(Mat 22:23-33; Luk 20:27-40)

<sup>18</sup> Sadiusi etoa, karika la ghahaiesoaa tale nitotu tale nimate, katoa etaira laghe mae sio ta Iesu me laghe uela etana va,

<sup>19</sup> "Tisa! Moses ghe piti elokoila va arova taita ateva lailai ia emate me karika righi natuna, nengane ateva ave eghaa vausenna ateva ang ghe raue vuluela, me ave naturirarua atiutiu eteva aliki, la nnainia va natuna ia tuenia.

<sup>20</sup> Tue me nenga ghatiu (7). Atiutiu eteva ghe laila, me karika righi natuna me ghe matela.

<sup>21</sup> Ghaluene ateva ghe ghaala vausenna ateva tuena, ghe raue vuluela. Me ie tee ghe mene matela nau karika righi natuna. Ase voto ateva o ghe mene lutula ta aiaakotonna ateva aliki.

<sup>22</sup> Tue me nenga ghatiu laghe ghaala vause ateva, me karika righi natuira me laghe matela, me vause ateva ghe mate aruula.

<sup>23</sup> Nau nitotu tale nimate, see ave evausenna ia vause ateva o, poli ila akapa laghe laila etana?"

<sup>24</sup> Iesu ghe liula me ghe uela va, "Nannaaimim karika ghulughuluena, poli karika amkilakila Uru ngai Manga ateva me sarasarakaniaane God.

<sup>25</sup> Nau God ave etotu taumattu matena, taita atoa me vause atoa karika ave la lai; ave la nongina ensolo atoa epona liu.

<sup>26</sup> Me tale nitotu ta taumattu matena, karika am ghe ritila tale unna vuku eteva Moses, tale ciukiu natu ai erighi, God ghe uela va, 'Aghi kapuna Goto ieghi Abraham, Aisiki me Jekop.'

<sup>27</sup> God karika va kapuira Goto ia lo atoa taumattu matena ila, ta kapuira Goto ia lo atoa maulue ila. Am Sadiusi etoa, inangariimim nim kamena."

*Mata ngemua ateva inangari nipaopao*

(Mat 22:34-40; Luk 10:25-28)

<sup>28</sup> Tau ngai aapasunga ngateva tale inangari nipaopao ghe usila tani nongo nau eteva Sadiusi etoa laghe sama teela Iesu. Ghe nongola va Iesu ghe liu emasinaailila inangariira Sadiusi etoa. Liuna avalua o me ghe kolomila Iesu tale nikokkolomi eteva va, "Sa ateva inangari nipaopao mata ngemua ia me namuu ia tale isaa akapa inangari nipaopao?"

<sup>29</sup> Iesu ghe liula me ghe uela va, "Mata ngemua ateva voto va, 'Israeli etoa, am nongo, Vau palepale ateva kapuimim ia, ia nonga vau tuungi ia.

<sup>30</sup> Uaielousiaa Vaum ateva kapum Goto ia tale urunguitanim ateva, me tale maamaulu-aam, me tale nannaam, me tale sarasarakaniaam akapa.'

<sup>31</sup> Me aiaaghluena ateva inangari nipaopao eue va, 'Uaielousiaa taumattu ngateva kalakalangina ia etam, nongina uaaielousieinio.' Inangari nipaopao alua o, namuu ilalua tale isaa akapa inangari nipaopao."

<sup>32</sup> Me tau ngai aapasunga ngateva tale inangari nipaopao ghe uela va, "Masinaaili, tisa. Koronna llo inangari nguauliaala va Vau eteva epona liu ia nonga Vau palepale ia, karika mene teva nongina ia.

<sup>33</sup> Me ita aielousiaa Vau ngepona liu eteva tale urunguitaniita, me tale nannaaita, me tale sarasarakaniaaita, me ita aielousiaa taumattu ngatoa kalakalangina ila etaita, nongina ita aielousieinita. Poli masina tani aimuli tee inangari nipaopao alua o, me tani ghelei asease aiaavusuvisuena."

<sup>34</sup> Iesu ghe nongo kilala alomasaanganiaane taumattu ngateva o, me ghe uela etana va, "Io karika masau io tale ararimangalina ateva God." Ghe ruu evaluelaa o me ila akapa laghe matautula tani kolomi Iesu tale mene righi nikokkolomi.

*See tuvuna ia Mesaea?*

(Mat 22:41-46; Luk 20:41-44)

<sup>35</sup> Iesu ghe tokatoka elome tale ale manga ateva me ghe aapasunga voto ta taumattu ngatoa. Ghe ue va, "Vaalua me tau ngai aapasunga ngatoa tale inangari nipaopao la uue va Mesaea tuvuna ia Deivit?

<sup>36</sup> Me Spirit Manga ateva ghe tokala ta Deivit, me Deivit ghe uela va,

"Vau eteva ghe uela ta kapughu vau eteva va,

"Toka siola tale pai muenna ativilau lomose ta aghatoka sio lo atoa la sessa teeio euu, me uatingina saoaa kkem etaira."

<sup>37</sup> Deivit ghe uela va Mesaea vauna ia. Vaalua me ghele mene tuvuna ia?"

Oriannaaili taumattu laghe nonganongoa me laghe maamasiangaili llo ghe aauliaa.

*Tau ngai aapasunga atoa tale  
inangari nipaopao*

(Mat 23:1-36; Luk 20:45-47)

<sup>38</sup> Nau Iesu ghe mene aapasunga, ghe uela va, "Am taatara amasina tale gheegheleiiaira, tau ngai aapasunga ngatoa tale inangari nipaopao. La gheloanna nonga tani asae masi ghinna nongina namu ngatoa, me tani ghaa niioneoneaa tale tummatavanga.

<sup>39</sup> Me ila la gheloanna tani toka tale masi aitokatoka uneira namu ngatoa tale ale nivelu eitaua ngatoa, me tale ninamanama atoa.

<sup>40</sup> Tisa ngatoa la kamekame vause atoa raue vulu ila me la ghainao peiira, me la għaitaratarainila tani għelei aluse nilooloo sae atoa. Nau niaisakei, aue la għaa nimmarrikanam namungaili."

*Kanna opring vause raue vulu eteva  
(Luk 21:1-4)*

<sup>41</sup> Iesu ghe ssola tale ale manga ateva me ghe toka siola ta' pai kativilau tale voto ateva la kaakaai viliki veu, me ghe taatara taumattu ngatoa laghe kaakaai kaluira viliki veu. Orio tau peipeiena atoa laghe kaakaai oroieili kaluira viliki veu.

<sup>42</sup> Vara me vause raue vulu eteva, karika tau peipeiena ia, ghe kaaila tapiri viliki veu eluevilau.

<sup>43</sup> Iesu ghe kolola kapuna disaepolo atoa me ghe uela etaira va, "Aghaaulia ngakoronna etaimim va ia o vause ateva ange kaaila oroi viliki veu tale aikaai viliki veu eteva, me katoa la kaaila malaki.

<sup>44</sup> Ta ila akapaailli, la kaaila kasina nonga uneira viliki veu, me oroi isaa elo ale, me ia o vause ateva etau ekapa lao sio unna viliki veu tale aikaai viliki veu eteva, karika righi viliki veu tani mene poli righi peina."

## 13

*Aue la tturuu ale manga ateva*

(Mat 24:1-2; Luk 21:5-6)

<sup>1</sup> Nau Iesu ghe kupi għoala tale ale manga ateva, kateva tana kapuna disaepolo ghe uela etana va, "Tisa, tarala masi atu etoa namungaili ila, me masi ale atoa."

<sup>2</sup> Iesu ghe liula me ghe uela va, "Utaatara kinatama ale okae? Karika teva atu aue etoka saoaa ta mene kateva. Aue taumattu ngatoa la puli reerekata isaa akapaailli oia voto."

*Iesu ghe aulia ngaotula sesa nau aue emae*

(Mat 24:3-14; Luk 21:7-19)

<sup>3</sup> Nau eteva Iesu ghe nim tokatoka poi sio tale motouru eteva eOliv tale pai kativilau tale ale manga ateva, me Pita, Jeimis, Jon me Andru laghe mae sio tani kolomi einaoa,

<sup>4</sup> lagħe uela va, "Auliaala etaimmali, isaa o voto lovissaa elutu? Me sa aimatootoongana aue elutu, me aeuна voto o emae?"

<sup>5</sup> Iesu ghe uela etaira va, "Am paniem, teva taumattu erau kameam.

<sup>6</sup> Oroi ila lo atoa aue la mae tale ararighi eteae, me aue la ue va, 'Aghi oia Mesaea ngateva,' me aue la kame oroieili taumattu ngatoa.

<sup>7</sup> Me nau am nongo niaiuvii me kiukiuna, am rau mene matautu. Isaa o voto aue elutu, me airuruu tale kosa ateva karika għe mae.

<sup>8</sup> Patunganua atoa aue la ghajuvieinila; me ararimangali etoa aue la ghajuvieinila tee. Aue rukeruke atoa la ruke kasina voto tale kosa ateva me maloo atoa aue la lutu tee. Isaa

o voto aue enim aitiutiu tale nimmarikana, nongina mmarikana eghaaghaa kinna ateva aliki eteva nau elutululu.

<sup>9</sup> “Am oia am anguu taatara, ta isaa toko voto aue elutu. Am aue la kuneiem me la laoainiem tale liu niaiskei. Aue la mae la uviem tale ale nivelu eitauaa, me aue la ghatinginaiem emua ta gavana ngatoa me kingi etoa poli ararighi eteae, me aue am rooroo tani auliaas masi kiukiu tee etaira.

<sup>10</sup> Me mata ngemua ateva voto, masi kiukiu oia etani lao akapa see tale patunganua akapa atoa.

<sup>11</sup> Nau eteva la kuneiem me la laoainiem tale liu niaiskei, karika am mene matautu, me am annaa va sa ateva aue am aulieinia; ia o nau eteva, am ppoaa voto God aue etaau aatu tale nannaaimim. Poli inangari am ppoaa karika va inangariim; ta inangarinia Spirit Manga ateva.

<sup>12</sup> “Taumattu ngatoa aue la tau velu tueira me nengaira atoa ta lo atoa aue la uvi ematea, me tamaira atoa aue la ghelei tee ta natura atoa. Aliki etoa tee aue la ssa tee tamaira me kinaira atoa, me aue la uvi ematea.

<sup>13</sup> Taumattu ngakapa atoa aue la ssa teeemi poli ararighi eteae. Me see etingina akorokorongana tale unna niaikaiaia tale airuuruu, maamauluaane aue esaanga.

*Voto sesaaili aue emae*

(Mat 24:15-28; Luk 21:20-24)

<sup>14</sup> “Nau am tara voto sesaaili elutu tale voto karika liuna tani lutu me eghelei taumattu ngatoa la kasu me ale manga ateva aue enim toka, (lo ateva taumattu aue etara kila aue ealomasaanga) lo atoa elome ejidua am ilou sae tale motouru.

<sup>15</sup> Me karika teva etokatoka eleka tale alena ateva emene kupi sso elo ale me esso ghara righi voto.

<sup>16</sup> Karika teva eutana emene kiri lao tanganuena me elaa ghara teva unna aiaasae ngeleka.

<sup>17</sup> Alousiusi ta lo atoa la suusunuku me lo atoa la sussu tale isaa o nau!

<sup>18</sup> Am looloo sae va voto o erau mene lutu tale nau kkaili,

<sup>19</sup> poli voto sesaaili tale isaa too nau ang ghe lao sio. Tale kosa ateva oia, karika aue emene righi ase nau evalua o, nongina aitiutiu nau God ghe gheleila kosa ateva me nau ghaine, me auena karika aue emene righi voto evalua o elutu.

<sup>20</sup> Arova Vau palepale ateva karika ghe nnaala tani atukuna isaa o sesa nau, taumattu ngakapa atoa aue la ghele raua, me poli enannangaili isaa o taumattu ghe suitoongaala, liuna evalua o me aue eatukuna isaa o nau.

<sup>21</sup> Aue lo ateva o nau arova toa la ue etaimim va, ‘Tarala, Mesaea ngateva toko!’ me mene, ‘Tarala, ie too!’ karika am mene aikaaiaa inangariira.

<sup>22</sup> Ta poli katoa taumattu aue la mae aue la kame va, ‘Aghi Mesaea ngateva,’ me mene katoa aue la kame va, ‘Aghi propete ieghi’ aue la mae la ghelei aimatootoongana me voto tani apasunga sarasarakaniaairaa tani kame taumattu Vau palepale ghe suitoongaala, kotiva isaa o voto aue eroo.

<sup>23</sup> Liuna evalua o me aghaauliaa va am taatara amasina, voto akapa oia ngaghe aulia ngamuemue alokoila etaimim, me auena elutu.

*Maemaeaane Natuna ateva Taumattu ngateva*

(Mat 24:29-31; Luk 21:25-28)

<sup>24</sup> “Tale isaa o nau me sesa nau auena,

“sinaka ateva aue esaurrom,

me ulana ateva karika aue emallanga,

25 me katto atoa elomarase aue la katuu,

me voto atoa korokorongana ila elomarase aue la ghaisiisia.’

<sup>26</sup> “Me aue la tara Natuna ateva Taumattu ngateva aue emae tale urukookoo. Emae tee korokoronganiaane me kinatama mallangina.

<sup>27</sup> Me aue esungi ensolo atoa la lao tale ghaata aighoughou tale kosa ateva tani kolo aitauaa lo atoa ghe suitoongainilala, tale kosa akapa ateva.

*Am ghara ninannaa tale fig ateeae*

(Mat 24:32-35; Luk 21:29-33)

<sup>28</sup> "Am rooroo tani ghaa alomasaanga tale kiukiu niaimatoonga tale fig atea. Nau eteva am tara ai eteae ange tulutulu, am kila va masi nau tale sinaka ateva ange kalakalaala.

<sup>29</sup> Liuna avalua o, nau eteva am tara isaa o voto, aue am kila va ange kalakalanginala, tapaa ngatamana.

<sup>30</sup> Aghaaulia ngakoronna etaimim va lo ateva oia vituu karika poi aue ekapa me isaa o voto aue elutu.

<sup>31</sup> Elomarase me kosa ateva oia aue ekapa me inangarighi karika poi aue ekapa.

*Karika teva ekilakila nau isaa o voto aue elutu  
(Mat 24:36-44)*

<sup>32</sup> "Me ia o nau eteva o aoa ngateva, karika teva ekilakilaia. Ensolo ngepona liu tee atoa karika la kilakila, me Natuna tee. Nim Tamaghi nonga ekilakila.

<sup>33</sup> Am anguu taatara me am aimonomonosiaa\* poli am tam kilakila va saa nau eteva isaa o voto aue emae.

<sup>34</sup> Nonginaaili taumattu ngateva ang ghe kasukasu vuli tanganuena, me ghe taula niuungu ta kapuna tau ngai nonganongo anna atoa. Ghe aikotaala niuungu ta kateva kateva etaira, me ghe uela ta lo ateva ghe aaitoiaa atamana atea va eanguu taatara.

<sup>35</sup> "Mausina avalua o me am anguu taatara atoka poli karika am kilakila va lovissa tau ngalena emene kiriaa: aue elo alai, o eleivoo, o elopai, o elue talaua.

<sup>36</sup> Erau rekata parasi va etaraiem ta am aseasekanua.

<sup>37</sup> Voto aghaauliaa etaimim, aghaauliaa tee ta taumattu ngakapa atoa va, 'Am anguu taatara atoka!'

## 14

*Laghe paepae salana tani uvi emate Iesu  
(Mat 26:1-5; Luk 22:1-2; Jon 11:45-53)*

<sup>1</sup> Kasi ghalua nau me auena niaimonomonosiaa tale nivelu eitaua ngateae ta Pasova ngateva me nivelu eitaua ngateae tale verete karika righi isti etana ghe mae, me namu ngatoa ta pristi etoa me tau ngai aapasunga ngatoa tale inangari nipaopao ngila ghe paepae righi salana tani kune aisulia lesu me la uvi ematea.

<sup>2</sup> Laghe uela va, "Ita rau mene ghelei tale nau nivelu eitauaa, ta taumattu ngatoa la rau tiuua teae niaiuvi."

*Vause ateva ghe kaola llo masi ngusungusuaane ta uruna Iesu  
(Mat 26:6-13; Jon 12:1-8)*

<sup>3</sup> Iesu ghe tokatoka eBetani tale alena ateva Saemon emua arau anna tasussuku eteva. Nau Iesu ang ghe namanaama, me vause ateva ghe sso tee mae aikakkaai eteva, laghe gheleielia tale atu eteva alabasta ia, pasu ia tale aiaaoo masi ngusungusuaane laghe gheleielia nonga tale oane natu ai erighi la koloa va nadi ia, aipolina namungaili. Ghe ghelei polakila aikakkaai eteva me ghe kaola aiaavusuvusuena ateva ta uruna Iesu.

<sup>4</sup> Katoa taumattu laghe tokatoka ghe sessailala me laghe aippooaa elome etaira va, "Vaaluua me eruuruungia aiaaoo ateva masi ngusungusuaane?

<sup>5</sup> La rooroo tani polia ta kotolu ai (300) silva koen,\* me viliki veu la tau lao ta taumattu karika righi peiira." Me laghe kisokisoia.

<sup>6</sup> Me Iesu ghe uela va, "Ratiela! Vaaluua me am poppoaa teeia? Ange gheleila masi voto etaghi.

<sup>7</sup> Llo taumattu karika peiira la tokatoka teeiem nau ekapa atoa. Am rooroo tani sausila nau eteva am aloanna. Aghi karika aue atoka teeiem nau ekapa atoa.

<sup>8</sup> Nge gheleila voto erooroo tani ghelei; ange kaola aiaaoo masi ngusungusuaane ta vilikighi tani aimonomonosiaa ngamuemua tale nikkaiaa.

<sup>9</sup> Aghaaulia ngakoronna va eaa aue la ppoaa masi kiukiu eteva tale kosa ateva, aue la ghauliaa tee masi gheeleiaane vause ateva oia, tani nnainia."

<sup>10</sup> Me Jiudas Iskariot, kateva ta kasangaulu ghalua (12) disaepolo, ghe lao sio ta namu ngatoa ta pristi etoa tani taula Iesu ta nimaira.

<sup>11</sup> Laghe nongo avaluela o me laghe masimasila, me laghe gheleila inangari nialokoi va aue la taula righi viliki veu. Me Jiudas ghe tiauala tani pae salana tani tau lao Iesu ta ngetaira.

\* **13:33:** aimonomonosiaa Kasina uru ngai laghe pitila, laghe uela va, aimonomonosiaa me am looloo sae.      **13:35:** Luk 12:38.      **14:3:** Luk 7:37-38.      \* **14:5:** silva koen Silva koen ativilau (denarius) erooroo aipolina kateva nau.

**14:7:** Diut 15:11.      **14:8:** Jon 19:40.

*Iesu ghe namanama teela kapuna disaepolo atoa  
(Mat 26:17-25; Luk 22:7-14, 21-23; Jon 13:21-30)*

<sup>12</sup> Tale aitiutiu eteva nau tale nivelu eitauaa tale verete karika righi isti etana, nau eteva laghe uviivi emate Pasova sipsipi eteva, kapuna disaepolo atoa Iesu laghe mae sio me laghe uela etana va, “Eaa uanna va ami laa ghaimonomonosiaa voto me ughelei nianamanama ataeae ta Pasova?”

<sup>13</sup> Liuna avalua o me ghe suula ghalua tani kapuna disaepolo. Ghe uela etairarua va, “Amalu lao tale masaliki taatara ataeae, me nau amalu tara taumattu ngateva, esuusunuki alkaai manu eteva, amalu usia.

<sup>14</sup> Lo ateva ale elaa kupi sso etana, amalu ue ta tau ngalena va, ‘Tisa euela va: Eaa ia lo atiulu rum aue atoka etana, me aue anama Pasova ngateva tee kapughu disaepolo atoa?’

<sup>15</sup> Me aue eapasinga rum atiulu epona namuu ia, me ngeila aimonomonosiaa ngatokaiela. Amalu aimonomonosiaa aneita inana tale ia o rum atiulu.”

<sup>16</sup> Disaepolo alua lalu ghe lao sio tale masaliki taatara ataeae, me lalu ghe saopi ekapala voto Iesu ghe auliaala. Me lalu ghe aipanipaniaala inana tale Pasova ngateva.

<sup>17</sup> Vara elo alai me Iesu me kasangaulu ghalua disaepolo laghe rekatala.

<sup>18</sup> Laghe tiuuala tani namanama, me Iesu ghe uela etaira va, “Aghaaulia ngakoronna etaimim va kateva etaimim aue etaueghi lao ta nimaira tau ngai ssateeghi etoa. Taumattu ngateva ia oia ange namanama teeieghi.”

<sup>19</sup> Disaepolo atoa laghe tiuuala tani alousiusi, me kateva kateva etaira ghe kokkolomi Iesu va, “Koti aghi, no?”

<sup>20</sup> Ghe liula me ghe uela va, “Kateva ta kasangaulu ghalua kapughu disaepolo, ita namanama aitauaa.

<sup>21</sup> Poli Natuna ateva Taumattu ngateva aue elao nongina Uru ngai Manga ateva eaauliaa va emate. Me alousiusi tale taumattu ngateva etautau lao Natuna ateva Taumattu ngateva ta tau ngai ssateena atoa. Aue ghele masina etana arova ghe tam lutula.”

*Iesu ghe tau lao sio verete me uaeni ta disaepolo atoa*

*(Mat 26:26-30; Luk 22:15-20; 1 Ko 11:23-25)*

<sup>22</sup> Laghe namanama, me Iesu ghe ghaala verete ateva me ghe kaili emasina saela, me ghe piriela me ghe tauet lao sio ta disaepolo atoa, me ghe uela va, “Am ghaala. Isaa oia verete malataughu.”

<sup>23</sup> Me ghe mene ghaala kapa uaeni eteva, me ghe kaili emasina saela ta God, me ghe tauet lao sio etaira, me ila akapa laghe ropila tale ia o kapa uaeni eteva.

<sup>24</sup> Me ghe uela etaira va, “Uaeni eteva oia raeghi ia tani ghelei ouna inangari niaippooa ngaitauaa me aue eakalaa tani sausii oroi taumattu.

<sup>25</sup> Aghaaulia ngakoronna etaimim va karika aue amene ropi uaeni lomosi ta aropi ouna uaeni tale aririmangalina ateva God.”

<sup>26</sup> Me laghe ueila kkinari etaeae, me laghe kupi ghoala tale masaliki taatara ataeae me laghe saela tale motouru eteva eOliv.

*Iesu ghe aulia ngamuemua alokoila  
llo Pita aue eghelei*

*(Mat 26:31-35; Luk 22:31-34; Jon 13:36-38)*

<sup>27</sup> Iesu ghe uela ta kapuna disaepolo atoa va, “Am akapaaaili aue am ilou vulieghi, nongina Uru ngai Manga ateva eaauliaa. Eue va, ‘Aue auvi emate tau ngai toi sipsipi eteva, me sipsipi etoa aue la ilou reerekataa.’

<sup>28</sup> Me nau atotu tale nimate aue amuemue lao eGalilii me aue am laa taraiueghi okae.”

<sup>29</sup> Me Pita ghe uela va, “Arova ila akapa la ilou vulio, aghi karika poi arooroo tani ilou vulio.”

<sup>30</sup> Iesu ghe liula me ghe uela etana va, “Aghaaulia ngakoronna etam va, ia o voo ngateva auena taita ateva paolo eaangari ghaluaata, aue uee akasina kotoluaata va karika ukilakilaieghi.”

<sup>31</sup> Pita ghe aikaia ngakoronganai liuna avalua o me ghe uela va, “Aue amate teeio, me karika arooroo tani ue va karika akilakilaio.” Ila akapa inangariira nongina Pita.

*Iesu ghe looloo sae eGetsemeni*

*(Mat 26:36-46; Luk 22:39-46)*

<sup>32</sup> Iesu me kapuna disaepolo atoa laghe lao sio tale voto ateva la kolokolo Getsemeni etana, me Iesu ghe uela ta kapuna disaepolo atoa va, “Am toka oia, me alaa looloo sae.”

<sup>33</sup> Me ghe kolola Pita, Jeimis me Jon va la usia, me nannaane ghe tiuaala tani maate, me ang ghe ateateaa saasakiaa.

<sup>34</sup> Me ghe uela etairatolu va, “Maamaauluaaghi ange sessaaili tee nialousiusi eteva, me egheleieghi arova amate. Am toka oia me am anguu taatara.”

<sup>35</sup> Ghe nim kasu tee lao sio, me ghe tau siola paane, me ang ghe looloo sae va, arova erooro, isaa o sesa nau eghele kkelia.

<sup>36</sup> Me ghe uela va, “*Abba*,<sup>†</sup> Tamaghi, isaa akapa voto urooroo tani ghelei. Ughaa velu kapa nimmakiana ateva etaghi, me urau mene ghelei tale aloaloannaaghi ta ughelei tale aloaloannaam.”

<sup>37</sup> Ghe kiriaa lao sio ta disaepolo kotolu me ghe tarailotolla ta latolu ghe aseasekanua, me ghe uela ta Pita va, “Saemon, uaseasekanua? Karika urooroo tani anguu ta nim teva aoa?

<sup>38</sup> Am anguu taatara me am looloo sae ta God va karika am mene sso tale nitootonga. Nannaimim eanna tani ghelei voto, me vilikiimim mangoona.”

<sup>39</sup> Me ghe mene kasula tani looloo sae nongina ghe ghelei muela.

<sup>40</sup> Vara ghe mene kiriaa mae sio etairotolu me ghe mene saopilotolla ta latolu ghe aseasekanua, poli matairotolu ghe maamaateaili. Me karika latolu ghe kilakila sa ateva tani aulieinia.

<sup>41</sup> Ghe kiriaa mae sio aiaakotonna me ghe uela etairotolu va, “Amotolu aseasekanua me amotolu maamatua ngatoka, va? Ange roola! Nau eteva ange rekatala. Am tarala, Natuna ateva Taumattu ngateva ngeila tautauela ta nimaira sesa taumattu ngatoa.

<sup>42</sup> Amotolu totula me ita kasu! Lo ateva etautaueghi lao ta tau ngai ssateeieghi etoa ange reerekata.”

*Jiudas ghe tau lao sio Iesu ta  
tau ngai ssateena atoa*

(Mat 26:47-56; Luk 22:47-53; Jon 18:3-12)

<sup>43</sup> Nau Iesu ghe samasama nonga me Jiudas, kateva ta kasangaulu ghalua (12) disaepolo, ghe rekata teela taumattu ngatoa. Laghe posoposo baenata atoa me tuku ngai etoa. Namu ngatoa ta pristi etoa, me tau ngai aapasunga ngatoa tale inangari nipaopao, me namu ngatoa laghe sungilala.

<sup>44</sup> Lo ateva ghe tau lao sio etaira ghe auliaala aimatootoongana ateva va, “Lo ateva taumattu angusua, ia o lo ateva am kuneia me am kasueinia.”

<sup>45</sup> Nau ghe rekatala, ghe lao sio arau ta Iesu me ghe uela va, “Rabae!” me ghe ngusuela.

<sup>46</sup> Laghe kuneiela me laghe poso atinginaiela.

<sup>47</sup> Kateva tana taumattu ghe tiitingina ghe ghaala iemana baenata ateva, me ghe sai patela talingana ativilau kateva kapuna tau ngai nonganongo anna namu ngateva ta pristi etoa.

<sup>48</sup> Iesu ghe liula me ghe uela etaira va, “Am annaa va aghi tau niainao aghi, va am maeara sio iemaimim baenata me tuku ngai tani ghaaieghi?”

<sup>49</sup> Nau etoa aghe tokatoka tseeiem tale ale manga tani apasunga, me karika am ghe kunekuneieghi. Me masina, inangari tale Uru ngai Manga ateva ghaine elutu ekoromna.”

<sup>50</sup> Me ila akapa disaepolo atoa laghe aituuala, me laghe ilou vuliela.

<sup>51</sup> Kateva aliki taita ghe usiusia, ghe aaitiitiae nonga kalio atiulu usousoana ia, nau laghe kune teeila

<sup>52</sup> ghe vella kalionia atiulu usousoana ia me ghe nim iloula karika kalionia.

*Kansolo atoa laghe kookolomi Iesu*

(Mat 26:57-68; Luk 22:54-55, 63-71; Jon 18:13-14, 19-24)

<sup>53</sup> Laghe ghaala Iesu me laghe laoainie sio ta namu ngateva ta pristi etoa. Namu ngatoa ta pristi etoa, namu ngatoa, me tau ngai aapasunga ngatoa tale inangari nipaopao, laghe velu etauaala.

<sup>54</sup> Pita ghe aaimuli me karika ghe akalakalaa ta Iesu. Vara me ghe ssola tale valavala atae ghe taataliaa alena ateva namu ngateva tale pristi etoa. Ghe toka tee siola kapuira tau ngai totoi etoa pristi etoa tale sama kura atae me ghe maamaruu.

<sup>55</sup> Namu ngatoa ta pristi etoa me kansolo atoa laghe toooongala tani pae teva taumattu ghe auliaa righi sesa gheeleiaane Iesu me laghe uvi ematea, me karika laghe tarala teva.

<sup>56</sup> Katoa taumattu laghe aauliaa inangari kamena tee Iesu, me inangariira laghe poppopoaa karika ghe laolao aitauaa.

<sup>57</sup> Vara me katoa etaira laghe tinginala me laghe aikamea teela Iesu tani ue va,

**14:34:** Jon 12:27.    **14:36:** Mak 10:38; Jon 6:38.    <sup>†</sup> **14:36:** Tale inangari nge Aramaik, “*Abba*” mallooeana va “Tamaghi”.    **14:49:** Luk 19:47; 21:37; Jon 18:20.    **14:50:** Sams 31:11.

<sup>58</sup> “Ami ghe nongola ta ghe uela va, ‘Aghi aue arruti velu ale manga ateva taumattu ngatoa laghe atuluela ta nimaira, me elome tale kotolu nau aue aghatulu mene kateva, karika taumattu aue atulua ta nimaira.’”

<sup>59</sup> Me isaa o tee inangari laghe gheleila ghe aikasakasaliaala me ghe aitiuaala.

<sup>60</sup> Vara me namu ngateva ta pristi etoa ghe tinginala emua etaira me ghe kolomila Iesu va, “Karika aue uliu inangariira? Vaalua tale inangari la ghaauliaa teeio?”

<sup>61</sup> Me Iesu ghe nim maamatuaa tingina me karika poi ghe liula inangariira.

Me namu ngateva ta pristi etoa ghe mene kolomiela va, “Koronna va io Mesaea ngateva, natuna io Goto ateva taumattu ngatoa la tautau sae niarangise etana?”

<sup>62</sup> Iesu ghe liula me ghe uela va, “Ue, aghi! Aue am tara Natuna ateva Taumattu ngateva ta etoka sio tale pai muenna ativilau ta lo ateva sarasarakania ia, me esio tale karaane epona liu.”

<sup>63</sup> Namu ngateva ta pristi etoa ghe rasila ghinnanina, me ghe uela va, “Karika ita mene aloanna mene righi taumattu tani auliaa mene righi inangari.

<sup>64</sup> Ngam nongola ange ghaala liuna ateva God. Sa ateva am aloanna va ita gheleia etana?”

Laghe uela va, “Ange gheleila ssavoto, ita uvi ematea.”

<sup>65</sup> Me katoa etaira laghe tiuuala tani kanusua; laghe iri rungaala matane tale kalio, me laghe tuutumaria ta nimaira, me laghe ue va, “Arova propete io, uauliaa va see ange uvuvio!” Me lo atoa la ghaitaraa ale manga ateva laghe ghaaiela me laghe tiuuala tani posalaia.

### *Pita ghe uela va etam kilakila Iesu*

(Mat 26:69-75; Luk 22:56-62; Jon 18:15-18, 25-27)

<sup>66</sup> Pita ghe tokatoka eeu, elome tale valavalaa atae, me kateva vause kapuna tau ngai ungua ia namu ngateva ta pristi etoa ghe mae sio etana.

<sup>67</sup> Nau eteva ghe tarala Pita ta ghe maamaruu, ghe lao akalakalangina sio me ghe taatara lao sio etana me ghe uela va, “Io tee ughe kasukasu tee Iesu aNasareti ia.”

<sup>68</sup> Pita ghe uela va, “Karika poi akilakila isaa ona inangari uauliaa.” Me ghe kasula me ghe kupi ghoala tale atamana atae. Vara me taita paolo ateva ghe aangulara.<sup>‡</sup>

<sup>69</sup> Me ia o vause ateva tau ngai ungua ia ghe mene taraiela me ghe uela ta lo atoa laghe tititinga teefia va, “Kateva tee o.”

<sup>70</sup> Me Pita ghe mene uela va, “Karika.”

Karika masau me lo atoa laghe tititingina kalakalaa laghe uela ta Pita va, “Koronna io kateva etaira, poli io aGalili io.”

<sup>71</sup> Me Pita ghe aaulia ngakorokorongana va, “Koronnaaili karika akilakila taumattu ngateva ona am aaulieinia. Arova anim kamekame, God aue eghelei righi voto sesa etagli.”

<sup>72</sup> Vara me taita paolo ateva ghe mene angari eghaluenela, me Pita ghe annaala inangarina Iesu ghe uela va, “Auena paolo taita ateva eaangari ghaluaata aue uue akasina kotoluaata va karika ukilikilaieghi.” Me ghe ngala alousiusieiliila.

## 15

### *Laghe laoaa sio Iesu ta Paelat*

(Mat 27:1-2, 11-14; Luk 23:1-5; Jon 18:28-38)

<sup>1</sup> Elue talaua poopooa, namu ngatoa ta pristi etoa, namu ngatoa, me tau ngai aapasunga ngatoa tale inangari nipaopao, laghe velu eitauuala me laghe mae aitauaa sio nonga tale kateva ninannaa. Laghe irila Iesu, me laghe kasueiniela tani laoainia ta Paelat.

<sup>2</sup> Paelat ghe kolomiela va, “Io kingi io ta ajiu etoa?”

Me Iesu ghe uela va, “Ue, nongina uaauliaa.”

<sup>3</sup> Me namu ngatoa ta pristi etoa laghe ppoaala ta Paelat oroi voto karika masina ta Iesu.

<sup>4</sup> Me Paelat ghe mene kolomiela va, “Karika aue uliu? Tarala, oroi inangari ngeila auliaa teeio.”

<sup>5</sup> Me Iesu karika ghe liula inangarina, me Paelat ghe soghiaala gheeleiaane.

### *Paelat ghe uela va la ghavukala sae Iesu tale aikotoo*

(Mat 27:15-26; Luk 23:13-25; Jon 18:39-19:16)

**14:58:** Jon 2:19-21.    **14:64:** Lev 24:16; Jon 19:7.    <sup>‡</sup> **14:68:** Kasina uru ngai laghe pitila, karika laghe pitila va, Vara me taita paolo ateva ghe aangulara.    **15:1:** Luk 22:66.    **15:5:** Ais 53:7; Mak 14:61.

<sup>6</sup> Paelat ghe gheelei kateva ase voto nau ekapa atoa nau Pasova ngateva. Ghe tautau velu lo ateva taumattu, taumattu ngatoa la ghanna va ekupi ghoa tale ale mata voovoo.

<sup>7</sup> Taumattu ngateva, ararina ateeae ta Barabas, ghe tokatoka tale ale mata voovoo, ia me mene katoa taumattu, poli laghe aiuvii teela gavmani me laghe uvi ematela katoa tana taumattu.

<sup>8</sup> Taumattu ngatoa laghe lao sio ta Paelat me laghe uela etana va egheelei voto nongina egheelei.

<sup>9</sup> Paelat ghe kolomilala va, "Am anna va atau velu kapuira kingi eteva ajiu etoa?"

<sup>10</sup> Poli Paelat ghe kilakila va namu ngatoa ta pristi etoa laghe sessaila ta Iesu poli taumattu ngakapa atoa laghe maamasiaa Iesu, liuna avalua o me laghe maeainie sio tale liu niasaiseki.

<sup>11</sup> Namuu ta pristi etoa laghe suusulungi taumattu tani ue sae ta Paelat va erau mene tau velu Iesu, ta la ghanna va eta velu Barabas.

<sup>12</sup> Me Paelat ghe mene kolomilala va, "Sa ateva am anna va agheleia ta lo ateva am ue va kapuira kingi ia ajiu etoa?"

<sup>13</sup> Laghe ovaova atingina tani ue sae va, "Uavukalaie sae tale aikotoo!"

<sup>14</sup> Paelat ghe kolomilala va, "Poli sa? Sa ateva voto sesa ghe gheleila?"

Me laghe mene ovaova anamuu tee lao sio tani ue va, "Avukalaie saela tale aikotoo!"

<sup>15</sup> Poli Paelat ghe aanna tani ghelei emasimasi taumattu ngatoa, liuna avalua o me ghe tau vella Barabas, me ghe taula Iesu ta soldia ngatoa, me laghe uetaielaa mua me ghe vira mene tauela va la ghavukalaie sae tale aikotoo.

### *Soldia ngatoa laghe auliaa teela Iesu tale inangari*

(Mat 27:27-31; Jon 19:2-3)

<sup>16</sup> Soldia ngatoa laghe ssoaala Iesu tale tanganuena Gavana ngateva, la kolokoloa va Praetorium ateva, me laghe kolo aitauaala soldia ngatoa me laghe mae akapa sio.

<sup>17</sup> Laghe asaela aiaasae ateva ghueghuenna ia ta Iesu me laghe navitaala kou nguru eteva tale uasa atevaorroana ia, me laghe atokiae saela ta uruna Iesu.

<sup>18</sup> Me laghe uee etana va, "Ei, kapuira kingi eteva ajiu etoa!"

<sup>19</sup> Me laghe parula uruna ateva tale ai etea, me laghe kanusuila, me kateva kateva etaira ghe suusuuiuaa ta liue kkena Iesu tani tau lao ninamu ngateae etana.

<sup>20</sup> Laghe ruu ekapala tani attara ta Iesu, me laghe ghaa vella aiaasae ateva ghueghuenna ia laghe asae tau lao sio etana, me laghe asae taula ghinnanima, me laghe ghaiae lao sio tani laa avukalaie sae tale aikotoo.

### *Laghe avukala saela Iesu tale aikotoo*

(Mat 27:32-44; Luk 23:26-43; Jon 19:17-27)

<sup>21</sup> Saemon atala nge Saerini ia, natuna ta Aleksanda me Rufus, ghe rekata mae sio me ghe aloanna tani kupi sso, me soldia ngatoa laghe aeala me laghe sungiela va esau aikotoo ateva unna ia Iesu.

<sup>22</sup> Laghe ghaala Iesu me laghe laoainie sio tale voto ateva ararina ateeae ta Golgota, malloanea va "Voto ateva arova Riu uru taumattu ngateva".

<sup>23</sup> Laghe tau lao sio uaeni laghe kaai teela murr ta Iesu, me ghe tam aloannala tani ropi.

<sup>24</sup> Me laghe avukala saela Iesu tale aikotoo, me laghe tiauuala tani anamisi tani aikoita ghinnanima.

<sup>25</sup> Ta 9 kilok elue talaua\* laghe avukala saela Iesu tale aikotoo.

<sup>26</sup> Me laghe pitila inangari me laghe avukala tee saela. Laghe pitila laghe uela va, "Ierai oia kapuira Kingi ia ajiu etoa."

<sup>27-28</sup> Laghe avukala tee saela taita alua lalu ghe aaiuvii me lalu ghe ghaaghaa peiira taumattu ngatoa, kateva ta pai muenna ativilau, me kateva ta pai uaise ativilau.<sup>†</sup>

<sup>29</sup> Taumattu ngatoa laghe kasukasuu tapaa salana laghe aauliaa inangari karika masina. Laghe samasama ringaringa me laghe uela va, "Ei! Io oia ughe uela va urooroo tani rruti ale manga ateva me umene atulua ta kotolu nonga nau,

<sup>30</sup> erooroo va ghaine uasaangio me ukkure vulu sio aikotoo ateva?"

<sup>31</sup> Namu ngatoa ta pristi etoa me tau ngai aapasunga ngatoa tale inangari nipaopao laghe aamammarasaia tani ue elome etaira va, "Ghe asaangi katoa, me karika erooroo tani asaangia!

---

**15:11:** Apos 3:13-14.    **15:21:** Rom 16:13.    **15:24:** Sams 22:18.    \* **15:25:** 9 kilok elue talaua Tale inangari nge Grik, aiaakotonna ateva aoa.    **15:27-28:** Ais 53:12.    † **15:27-28:** Kasina uru ngai laghe pitila, laghe uela va, <sup>28</sup> Inangari tale Uru ngai Manga ateva laghe pitila ange lutu ekoronnala va, "Laghe ioi teeelia va, ie tee sesa taumattu ia." (Luk 22:37)    **15:29:** Sams 22:7; 109:25; Mak 14:58.

<sup>32</sup> Arova Mesaea ia, kapuira kingi ia alIsraeli etoa, ghaine etani kkure vulu sio aikotoo ateva, me aue ita aiesoaa etana nau ita tara." Tau niainao me tau niaiuvi tee alua, lalu ghe aauliaa teeia inangari.

### *Iesu ghe matela*

(Mat 27:45-56; Luk 23:44-49; Jon 19:28-30)

<sup>33</sup> Tale pai ngelo sinaka ativilau<sup>‡</sup> me saurrom ateva ghe mae sio, ghe akoula kosa ateva ghe roola kotolu aoa.

<sup>34</sup> Me ta 3 kilok elo alai<sup>§</sup> Iesu ghe sama anamungailila me ghe uela va, "Eloi, Eloi, lama sabaktani?" (malloeanina va, "Kapughu Goto ateva, Kapughu Goto ateva, vaalua me angu tau velueghila?")

<sup>35</sup> Nau katoa taumattu laghe tiitingina akalakalangina laghe nongola isaa o inangari, laghe uela va, "Am nongola, ekolokolo Elaija."

<sup>36</sup> Me kateva taumattu ghe iloula tani laa asuu tuku spans ateva tale uaeni kaakaalina, me ghe apasapasiela tale ai eteae, me ghe taue saela va Iesu ghe mmua. Ghe uela va, "Ita totoi mua, me ita tara va kotiva Elaija esio me eghaa velue sio."

<sup>37</sup> Me Iesu ghe ovaova anamungailila, me inoane ghe kapala.

<sup>38</sup> Kalio atiulu ghe vuuvukala tale ale manga ateva ghe tarriila elome, ghe tiuala epona me ghe laa sio ruu euu.

<sup>39</sup> Me nau lo ateva tau ngai uvii eaitoiaa kateva ai (100) tau ngai uvii, ghe tiitingina emua ta Iesu, ghe nongola Iesu ghe samala, me ghe tarala vaalua ghe matela, soldia ngateva ghe uela va, "Koronnaaili taumattu ngateva oia Natuna ia God!"

<sup>40</sup> Katoa tana vause laghe tiitingina amasau me laghe taatara. Elome etaira Meri aMakdala ia, Salome, me Meri kinairarue ia Jeimis ghauna me Joses.

<sup>41</sup> Nau Iesu ghe tokatoka eGalilii, ila o vause atoa laghe aaimuli teeia me laghe saasausia, me mene oroi katoa vause laghe mae aitauaa teeie sio ejerusalem.

### *Laghe alokoila Iesu tale lienga niaikkaia ngateae*

(Mat 27:57-61; Luk 23:50-56; Jon 19:38-42)

<sup>42</sup> Nau ghe elo alaila ta nau niaimonomonosia ngateva, lo ateva nau emuli ia ta nau manga ateva,

<sup>43</sup> Josep, tangantuena tale masaliki taatara atae eArimatia, namuu ia ta Kansolo atoa, me ie tee ghe totoi ararimangalina ateva God, karika ghe moiela tani sso tara Paelat. Ghe loola Iesu tani laa kaieinia.

<sup>44</sup> Paelat ghe soghila tani nongo va gharovaeaata ta ghe matela, me ghe kolola namu ngateva ta soldia ngatoa, me ghe kolomiela va, "Ange matela?"

<sup>45</sup> Nau namu ngateva ghe uela va ange matela, Paelat ghe uela va Josep erooroo tani ghaa Iesu.

<sup>46</sup> Josep ghe polila masi kalio atiulu usousoana ia, ghe ghaa velu siola Iesu tale aikotoo. Me ghe sumuela, me ghe laoainie sio tani alokoia tale lienga niaikkaia ngateae laghe kaie ssola elome tale vallae. Ghe atakirila atu eteva tani atingina runga liu eteva.

<sup>47</sup> Me Meri aMakdala ia me Meri kinna ia Joses lalu ghe tarala nongina laghe alokoiola.

## 16

### *Iesu ghe totula tale nimate*

(Mat 28:1-8; Luk 24:1-12; Jon 20:1-10)

<sup>1</sup> Nau eteva nau manga ateva ghe kapala, Meri aMakdala ia, Salome me Meri kinna ia Jeimis, laghe polila oeli masi ngusungusuane tani laa rariaa ta vilikina Iesu.

<sup>2</sup> Elue talaua poopooa tale aitiutiu eteva nau, laghe lao sio tale lienga niaikkaia ngateae nau sinaka ateva ang ghe saela.

<sup>3</sup> Laghe kasu aaikolomi va, "See aue eatakiri velu atu eteva tale paa lienga atea?"

<sup>4</sup> Vara laghe taatarala, me laghe tarala va karika teva atu tale paa lienga niaikkaia ngateae, me atu eteva namungaili ia ang ghe toka ppae lao sio.

<sup>5</sup> Laghe kupi ssola tale paa lienga niaikkaia ngateae, me laghe tarala aliki taita ateva ghe tokatoka tale pai muenna ativilau, ghe aasae ghinna usousoana, me laghe matautula.

<sup>6</sup> Aliko taita ateva ghe uela etaira va, "Am rau mene matautu. Am paepae Iesu aNasareti ia, ia o ghe matela tale aikotoo. Ange totula, karika ia oia. Am tarala voto ateva laghe alokoiola etana.

<sup>‡</sup> **15:33:** *pai ngelo sinaka ativilau* Tale inangari nge Griek, *ghaonomina* (6) ateva aoa.      <sup>§</sup> **15:34:** Sams 22:1.      **15:34:** 3 kilok elo alai Tale inangari nge Griek, *aiaaghaisio* (9) ateva aoa.      **15:36:** Sams 69:21.      **15:40:** Luk 8:2-3.

<sup>7</sup> Am laa auliaa ta kapuna disaepolo atoa, me Pita tee, va Iesu ange muemue lao sio eGalili. Aue am sio taraia okae, nongina ghe auliaala etaimim."

<sup>8</sup> Gharovaeaata ta laghe kupi velu ghoala, me laghe kasu vulila paa lienga niaikkaa ngateae, me laghe iloula. Kovaira ghe tallula, me laghe reterete. Karika laghe aippooaa, ta laghe maamatautu.

*Iesu ghe aotuotula ta Meri aMakdala ia  
(Mat 28:9-10; Jon 20:11-18)*

<sup>9 \*</sup> Nau Iesu ghe totula elue talaua poopooa, tale aitiutiu eteva nau, ghe aotuotue akasinala ta Meri aMakdala ia, ia, ia o Iesu ghe ghaa vella raroai ghaitu (7) etana.

<sup>10</sup> Vause ateva o ghe lao sio ghe auliaala ta lo atoa laghe tokatoka tee Iesu, me laghe aale amate teeia.

<sup>11</sup> Me nau laghe nongola Meri ghe uela va Iesu ang ghe sakesakela, me ia ghe taraiela, karika laghe aiesoala.

*Iesu ghe aotuotula ta mene ghalua disaepolo  
(Luk 24:13-35)*

<sup>12</sup> Emulina ghe mene aotuotula ta ghalua kapuna disaepolo lalu ghe kasukasu elaolao tale salana atikirighi, me taataaraane ghe isaa ppaela.

<sup>13</sup> Lalu ghe kiri lao sio ta mene katoa kapuna disaepolo tani auliaa, me karika laghe aiesoala.

*Iesu ghe mene aotuotula ta kasangaulu kateva disaepolo  
(Mat 28:16-20; Luk 24:36-49; Jon 20:19-23; Apos 1:6-8)*

<sup>14</sup> Emulina ghe mene aotuotula ta kasangaulu kateva (11) kapuna disaepolo, nau laghe namanama. Karika ghe masimasieinilala poli karika laghe aaiesoainia me urunguitanira korokoronganaiili, ta poli karika laghe aaiesoaa lo atoa laghe auliaa va Iesu ange totula.

<sup>15</sup> Me ghe uela etaira va, "Am lao tale kosa akapa ateva, me am laa ppooaa masi kiukiu tale taumattu ngakapa atoa.

<sup>16</sup> Lo ateva taumattu aue eaiesoaa me la ghasuua, aue esaanga. Lo ateva karika eaiesoaa aue eaisakei me eghaa nimmarikana.

<sup>17</sup> Lo atoa la ghairesoaa aue la ghelei niaimatootoongana: Tale ararighi eteae aue la ghaa velu raroai etoa, me aue la ghaippooaa tale oroieli asease nisama.

<sup>18</sup> Aue la poso katu ngatoa ta nimaira. Arova la ropi righi manu sesaaili, karika la rooroo tani mate. Aue la poso tau sessa atoa me tau sessa atoa aue la masina."

*Iesu ghe saela epona liu  
(Luk 24:50-53; Apos 1:9-11)*

<sup>19</sup> Emuli nau Vau eteva Iesu ghe ruula tani aippooaa teeila, God ghe ghaaiela, me ghe saela epona liu, me ghe tokala tale pai muenna ativilau ta God.

<sup>20</sup> Disaepolo atoa laghe lao sio tani ppooa ngakapa see. Vau Palepale ghe uungu eitauaa teeila tani ghelei aiemattootoongana atoa tani asarasarakana inangariira.

---

**16:7:** Mat 26:32; Mak 14:28.      \* **16:9:** Llo akasina alua tani vuku pokane laghe piti ekasinala ta nimaira, karika uooroo tani tara Mak 16:9-20. Oroi katoa tau ngalomasaanga la aikaaiaa va karika Mak ghe pitiela. Katoa tani taumattu laghe nim tara ssola tale mene kasina kiukiu elome tale Uru ngai Manga ateva me laghe nim piti mae sio ta vuku eteva ta Mak.    **16:14:** 1 Ko 15:5.    **16:15:** Apos 1:8.    **16:16:** Apos 2:38.    **16:17:** Apos 2:4; 8:7.    **16:18:** Luk 10:19; Apos 28:3-6.    **16:19:** Apos 1:9-11; 2:33-34.    **16:20:** Apos 14:3; Hib 2:3-4.

## Masi kiuki Luk ghe pituela Inangari emuemua

Luk karika va kateva kapuna disaepolo Iesu, ta dokta ia, ghe kasukasus eitauuaa tee Pol. Luk ghe pitila ghalua vuku, Masi Inangarina me Gheegheleiaairaa Apostolo atoa, me lalu auliaa kiukiuna Iesu me aitiutiu etoa ninamanama tale ale manga atoa. Eaauliaa oroi voto ghe lutula tale tokatokane Iesu, me inangarina Iesu. Etiuaa tale lutulutuaane Jon tau ngai asuu ia, me eruu tale tottotuaane Iesu. Luk karika ajiu ia, me eapasunga vaalua Iesu eaaloanna taumattu karika ajiu ila, lo atoa karika tue peipeiena ila, lo atoa ajiu laghe kolokolola va “tau ngai ghelei ssavoto ila”, me lo atoa karika arariira. Eaauliaa tee nilooloo sae, Spirit Manga ateva, me nimasimasi.

### **Tani kila amuemua**

Inangari tani tiuaa 1:1-4

Lutulutuaane Iesu me nau aliki ia 1:5-2:52

Jon tau ngai asuu ia me Iesu 3:1-4:13

Iesu ghe uungula eGalilii 4:14-9:50

Iesu ghe saela ejerusalem 9:51-19:10

Iesu ghe uungula ejerusalem 19:11-21:38

Matemateaane me tottotuaane Iesu 22:1-24:53

### *Aitiutiu*

<sup>1</sup> Namu ngateva Tiopilus, kasina ninamanama ang ghe lao sio, oroi taumattu laghe tooongaala tani piti kiukiuna voto Vau eteva ghe gheleila me ghe lutula elome etaimami.

<sup>2</sup> Laghe aaimuli tee inangariira lo atoa laghe tarala isaa o voto ta mataira. Laghe tiula ta nau voto ghe tani tiuaala. Isaa o taumattu ghe uungu tale inangarina ateva Vau ngepona ateva me ila laghe tau mae sio isaa oia kiuki.

<sup>3</sup> Liuna evalua o me aghi tee aghaloanna tani piti eghulughuluena isaa o kiuki me aghasaokie atu ta ngetam. Aghe uungula oroi nau tani kolomi emasina vaalua isaa o inangari ghe tani tiuaala. Namu ngateva, isaa oia voto ngapitila isaa akapaaili koronna.

<sup>4</sup> Utara me aue ukila amasina va isaa o inangari laghe apasungaala etam koronna akapa.

### *Ensolo ateva ghe uela ta Sekaraea va Jon aue elutu*

<sup>5</sup> Nau Herot kingi ia ejidua, kateva pristi ghe tokatoka, ararina atuae ta Sekaraea, tuvuna ia Abija, me vauseenna ateva, ararina atuae ta Elisabet, ie tee tuvuna ta Eron.

<sup>6</sup> Ilalua ghulughuluena ilalua ta matane Vau eteva. Lalu ghe aaimuli tee kannia inangari nipaopao me inangarina Vau eteva me karika righi gheeleiaairarua sesa ta matane.

<sup>7</sup> Me tee, karika righi naturirarua ta poli Elisabet kina ngere ia, me tee lalu ghe taita namuula me vause namuula.

<sup>8</sup> Kateva nau, kapuna atoa Sekaraea, laghe uungu tani ghelei uunguaaira pristi etoa, me Sekaraea, ie tee ghe uungu.

<sup>9</sup> Vara me laghe gheleila kasina salana tani kila va saa pristi eteva esso tale rum manga atiulu tani sso ghelei asu eteva masi ngusungusuaane esae ta Vau eteva. Laghe gheleila isaa o voto me laghe kilala va aue Sekaraea esso.

<sup>10</sup> Nau ghe ghelei isaa o voto tani ghelei asu eteva masi ngusungusuaane, taumattu ngatoa laghe lololo sae eleka, elome tale vanisi eteva tale ale manga ateva.

<sup>11</sup> Vara me ensolo ateva kapuna ia Vau eteva ghe otuotula ta Sekaraea. Ghe titingina tale pai muenna ativilau tale olta ngateva laghe gheeghelei asu eteva masi ngusungusuaane etana.

<sup>12</sup> Sekaraea ghe tarala ensolo ateva, me ghe soghieiniela, me ghe matautula.

<sup>13</sup> Me ensolo ateva ghe uela etana va, “Sekaraea, urau mene matautu. Vau eteva ang ghe nongola kalum nilooloo sae etana. Vausenim ateva ta Elisabet aue eghaa aliki eteva taita ia me uase ararina atuae ta Jon.

<sup>14</sup> Nimasimasi aue etoka ta ngetaimalua me aue amalu toka amasina. Oroi tee taumattu aue emasimasi poli aliki eteva aue elutu,

<sup>15</sup> poli ia aue enamuu ta taataraane Vau eteva, me erau mene ropi uaeni me manu sarasarakanana. Aue Spirit Manga ateva etoka etana nau ia ta kova kinna, me nau ekapa atoa.

<sup>16</sup> Ia aue ekatulaa oroi taumattu nge Israeli etoa me aue la mene kiri me la oghi lao ta Vau eteva kapuira God ia.

<sup>17</sup> Uunguaane me sarasarakaniaane aue nongina Elaija, me aue emuemue ta Vau eteva. Aue eghelei tamatama atoa me natuira atoa la mae aitauaa, me aue la kateva nonga, me aue eghelei emasina nannaaira lo atoa karika la nongonongo usilaa me aue la ghaa masi ninannaa nongina lo atoa ghulughuluena ila. Aue eghelei taumattu eaimonomonosiaa tale maemaeaane Vau eteva.

<sup>18</sup> Me Sekaraea ghe kolomila ensolo ateva va, “Vaalua arooroo tani kila va inangarim koronna, poli ngaghe taita namuula me vausenighi tee ateva ang ghe vause namuula?”

<sup>19</sup> Me ensolo ateva ghe liula me ghe uela va, “Aghi Gabriel. Atiitingina emua ta matane Vau eteva me ia esungieghila tani sio auliaa isaa oia masi inangari ta netetam.

<sup>20</sup> Unongo! Poli karika uaaiesoaa inangarighi, aue upaavoo. Karika aue usama lomosi ta voto aghauliaala aue elutu. Inangarighi aue elutu ekoronna tale nau Vau eteva eaaloanna.”

<sup>21</sup> Me taumattu ngatoa laghe toitoi poi Sekaraea me ngila ghe nannaa va sa ateva ange lutula me karika ange kupikupi ghoa parasi tale rum manga atiulu.

<sup>22</sup> Vara me ghe kupi ghoa mae, me karika ghe roola tani aippooaa teeila, me laghe nim kilala va koti ange tarala teva nitaatara ie nonga ange kilaila tale rum manga atiulu, poli ghe nim suisui me ghe aimatoonga ta nimane, ta ghe paavoola.

<sup>23</sup> Vara nauna tani uungu ghe ruula, me Sekaraea ghe oghi lao sio tanganuena.

<sup>24</sup> Emuli tale isaa o nau, me vausenenna ateva ta Elisabet ang ghe suusunuku, me ghe tam aotuotu poila ghe roola ghalima ulana.

<sup>25</sup> Ghe uela va, “Vau eteva ghe alousiusi teeieghila, me ang ghele gheleila ia oia voto ateva ange lutu etaghi, tani ghaa velu nipalata ateva etaghi ta mataira taumattu ngatoa.”

*Ensolo ateva ghe auliaala kiena Meri  
va Jesu aue elutu*

<sup>26</sup> Tale aiaaghaonomina ateva (6) ulanina Elisabet nau ghe suusunuku, Vau eteva ghe suula ensol Gabriel tani sio tale natu masaliki erighi eGalilii, ararina ataeae ta Nasareti.

<sup>27</sup> Ghe lao sio tani tara aliki vause ateva, karika ghe aso tee poi teva taita, ararina ataeae ta Meri. Laghe aseainiela va elai ta Josep, tuvuna ia Deivit.

<sup>28</sup> Ensolo ateva ghe lao sio etana me ghe uela va, “Elue talaua etam! God ang ghe arangiseiola, me Vau eteva etokatoka teeio.”

<sup>29</sup> Meri ghe soghiaala tani nongo isaa o inangari, me ghe annangailila va tani saa inangari llo oia.

<sup>30</sup> Me ensolo ateva ghe uela va, “Meri, urou mene matautu. Vau eteva aue eghelei masi voto etam.

<sup>31</sup> Unongo! Aue ukkaai aliki eteva taita ia, me uase ararina ataeae ta Jesu.

<sup>32</sup> Ia aue enamuu, me aue la koloa va Natuna ateva Lo ateva Iaaili Epona. Me Vau eteva God aue egheleia ekingi nongina tuvuna ta Deivit.

<sup>33</sup> Ia aue namuu tale ararimangalina ateva Jekop nau ekapa atoa, me ninamu ngateae etana karika aue ekapa.”

<sup>34</sup> Me Meri ghe kolomila ensolo ateva va, “Isaa o voto, vaalua aue elutu, poli karika aghe aso tee poi teva taita?”

<sup>35</sup> Me ensolo ateva ghe liula inangarina me ghe uela va, “Aue Spirit Manga ateva emae toka etam, me sarasarakaniaane Lo ateva Iaaili Epona aue eakouo. Ia o aliki eteva aue umolenaina aue emanga, me aue la koloa va Natuna ia God.

<sup>36</sup> Unongo, mangalim ta Elisabet ang ghe vause namuula, me ia oia ekakkaai me aue emolenaa, aliki eteva taita ia. Nau to ang ghe lao sio, laghe ue va karika erooroo tani ghaa aliki. Me ia oia esusunuku ang ghele ghaonomola (6) ulanina.

<sup>37</sup> Poli karika teva voto God etam rorooy tani ghelei.”

<sup>38</sup> Me Meri ghe uela va, “Unongo, aghi kapuna vause tau ngai uungu ieghi Vau ngepona ateva. Erooroo tani ghelei etaghi voto nongina uauliaa.” Vara me ensolo ateva ghe kasu vuliela.

*Meri ghe lao sio tani tara Elisabet*

<sup>39</sup> Kasina nau ghe lange sio tale isaa o nau, Meri ghe ailuiluila tani lao tale voto ateva oroi motouru etana tale kateae ppae natu masaliki tale masaliki eteae ejidua.

<sup>40</sup> Me ghe kupi ssola tanganuena Sekaraea me ghe tarala Elisabet me ghe uela va, “Elo alai etam.”

<sup>41</sup> Nau Elisabet ghe nongola Meri ghe samasama teeia, aliki eteva ta kovane namungaili ta ghe aisisiaala, me Spirit Manga ateva ghe pasula ta Elisabet.

<sup>42</sup> Me ghe sama anamungailila tani ue va, “Vau eteva ang ghe tau aatu sio niarangise elaulau niarangise etautau ta mene katoa vause. Ia ona aliki eteva ukaakaia aue eghaa niarangise ta Vau eteva.

<sup>43</sup> Kalughu sa ateva me kinna ateva Vaughu eteva ange mae sio tani taraieghi?

<sup>44</sup> Nau eteva anongola ta usamala,arovaeaata ta aliki eteva ta kovaghi emasimasila me eaisisiaala.

<sup>45</sup> God aue earangiseio poli ughe aiesoaala voto Vau eteva ghe uela va aue elutu ta ngetam.”

### *Kkinarina ataeae Meri*

<sup>46</sup> Meri ghe uela va,

“Maamauluaaghi etautau sae ararina ataeae Vau eteva,

<sup>47</sup> me urunguitanighi eteva emasimasiangaili God ta eaasaangieghi.

<sup>48</sup> Aghi nim tau ngai ungung ieghi etana, karika teae ararighi, me ghe taraieghila tale maamasinaane.

Ia oia vituu eteva me llo auena vituu aue la ue va Vau eteva ghe arangiseieghila,

<sup>49</sup> Lo ateva sarasarakanaili ia ghe gheleila voto namungaili etaghi, me ararina ataeae manga ia.

<sup>50</sup> Eaapasunga masi aalousiusiaane ta lo atoa la oneoneainia  
aue etoka gheelei evalua o tale ia oia vituu eteva me llo auena vituu.

<sup>51</sup> Ghe gheleila kinatama voto ta nimana,  
me ta lo atoa la tautau sae nannaaira, aue egheleila la ghaituua see.

<sup>52</sup> Ghe atoka siola lo atoa taumattu namu ngila me sarasarakanaili ila  
me ghe atingina saela lo atoa taumattu karika righi arariira.

<sup>53</sup> Ghe tautau masi voto ta lo atoa taumattu maloona ila,  
me lo atoa tau peipeiena ila, ghe sungisungi vella, nim ila laghe kasukasus karika laghe ghaaghhaa righi voto.

<sup>54</sup> Ghe sausila kapuna tau ngai nonganongo anna atoa ta Israeli etoa,  
poli eannahaa aalousiusiaane

<sup>55</sup> ta Abraham me lo atoa tuvuna auena la lutu,  
nongina ghe auliaala ta tuvuita atoa.”

<sup>56</sup> Meri ghe toka teela Elisabet ghe roola kotolu ulana me ghe vira mene kiriaa lao sio tanganuena.

### *Lutulutuaana Jon tau ngai aasuu ia*

<sup>57</sup> Nauna Elisabet tani molena, me ghe molenaala aliki eteva taita ia.

<sup>58</sup> Lo atoa taumattu tanganueira aitauaa me kapuna atoa, laghe nongola kiukiu vaalua Vau eteva aalousiusiaane ta Elisabet. Laghe masimasi etauaa teeiela.

<sup>59</sup> Aiaaghaoaluna (8) ateva nau, taumattu ngatoa laghe mae sio tani velu etauaa tani iso aliki eteva, me laghe aloanna tani ase ararina ataeae ta Sekaraea, poli ararina ia tamane.

<sup>60</sup> Kinna aliki eteva ghe uela va, “Karika! Ararina ataeae ta Jon.”

<sup>61</sup> Me laghe uela etana va, “Karika teva kapuimim ararina ia arari eteae ona.”

<sup>62</sup> Me laghe aaimatoonga ta nimaira tani kolomi tamana aliki eteva va saa arari eteae eaaloannaa.

<sup>63</sup> Sekaraea ghe aimatoongaala etaira va la ghaa taula teva aipitipiti me epiti inangrina. Inangrina ghe pitila ghe uela va, “Aliket eva, ararina ataeae ta Jon.” Taumattu ngatoa laghe soghiala voto laghe tarala.

<sup>64</sup> Arovaeeata ta God ghe otila paane ateva Sekaraea, me Sekaraea ghe samala, me ghe mene tiuaala tani sama me ghe tau saela ararina ataeae God.

<sup>65</sup> Me lo atoa masaliki kalakalangina ila laghe tarala isaa o voto ghe lutula, me ghe moilala, me kiukiu ghe kasu ekapa seela, me lo akapa atoa laghe tokatoka tale voto ateva oroi motouru etana ejidua, laghe nongo akapala.

<sup>66</sup> Lo akapa atoa taumattu laghe nongola, laghe nnaa soso laala isaa o kiukiu, me laghe aaikolomieinila va, "Aili eteva oia, aue saa taumattu nau enamuu?" Poli laghe tarala va sarasarakaniaane Vau eteva ghe toka aitauua teeiel.

*Kkinarina atae Sekaraea*

<sup>67</sup> Spirit Manga ateva ghe pasula ta Sekaraea, tamane aliki eteva, me ghe aulia ngamuemua alokoila inangari fani ue va,

<sup>68</sup> "Ita tau sae ararina atae Vau eteva, kapuira Goto ia Israeli etoa,  
poli ghe mae sio tani sausi kapuna taumattu ngatoa me ghe poli aoghi teeilala.

<sup>69</sup> Ghe tau mae sio kateva taumattu sarasarakanaili ia tani sausita  
elome ta tuvuna atoa Deivit, kapuna tau ngai nonganongo anna ateva God.

<sup>70</sup> Nongina ghe gheleila inangari nialokoi ta propete atoa manga ila me ila laghe auliaala emua arau,

<sup>71</sup> va aue easaangita ta tau ngai ssateeita atoa,  
me ta nimaira lo atoa esessaeiliila etaita.

<sup>72</sup> Ta poli aalousiusiaane ghe sausila tuvuita atoa,  
me eannahia inangari manga emua arau ghe aulia ngalokoila  
73 ghe auliaala inangari nialokoi ta tuvuita ateva ta Abraham.

<sup>74</sup> Eanna tani asaangita ta nimaira tau ngai ssateeita atoa  
me ita kkaueinia me ita rau mene matautu.

<sup>75</sup> Liuna avalua o me nau ekapa atoa, nau sakesake ita, ita kasu tale salana manga  
me ghulughuluena ta matane.

<sup>76</sup> Me io, natughu, aue la ghaseo va kapuna propete io Vau eteva;  
me io aue umuemuea Vau eteva tani aimonomonosiaa salane atikirighi,

<sup>77</sup> tani ghelei masalika tale kapuna taumattu ngatoa, vaalua tani saanga  
me eghaa velu kaluira ssavoto,

<sup>78</sup> tale aalousiusiaane kapuita Goto ateva,  
me mallanga ngepona liu eteva aue esio etaita

<sup>79</sup> tani tau mae mallanga ateva tale taumattu ngatoa la tokatoka tale saurrom  
me tootoo nimate ateva

me tani aitaraa kasukasuaaita tani lao tale salana luei."

<sup>80</sup> Ia o aliki eteva ghe namuula, me alomasaanganiaane ghe sarasarakanailiila, me ghe  
tokatoka tale voto ateva karika righi taumattu etana, elomosina ta ghe vira mene ghaala  
nauna tani ppooaa tale taumattu nge Israeli etoa.

## 2

*Lutulutuaane Iesu*

(Mat 1:18-25)

<sup>1</sup> Tale isaa o nau, Siisa Augustus ghe alokoila kateva inangari va la ghaa akapa arariira  
taumattu ngatoa.

<sup>2</sup> Nau eteva Kuirinius gavana ia eSiria, laghe gheleila aitiutiu eteva sensis.

<sup>3</sup> Liuna avalua o me isaa akapa taumattu ghe oghioghi lao tale masaliki tuvuirata  
me gavmani ghe ghaaghia arariira.

<sup>4</sup> Poli Josep ararimangalina aitauua tee Deivit, liuna avalua o me ghe kasu vulila  
masaliki etae eNasareti nge Galili, me ghe saela ejudia tale masalikina atae Deivit,  
la kolokoloa va Betlehem, tani alokoi ararina ateeae.

<sup>5</sup> Ia me vause ateva laghe aseainiela va eghaaia, ararina atae ta Meri, lalu ghe saela va  
gavmani ghe ghaa arariiraru. Isaa o nau Meri ghe suusunuku.

<sup>6</sup> Ilalua eBetlehem me ghe ghaala nauna Meri tani molenaan.

<sup>7</sup> me ghe molenaala natuna aitiutiu eteva aliki taita ia, me ghe ghiisainiela tale kalio  
me ghe alokoie siola tale aikaai aneira inana ateva vulumakao atoa, poli isaa akapa ale  
aiaasoaso ghe pasula.

*Ensolo atoa laghe auliaala kieira tau ngai toi sipsipi etoa*

<sup>8</sup> Eleka tale masaliki etae eBetlehem, katoa tana tau ngai toi sipsipi laghe aaitoiaa  
kieira ghaata kkena tale voto ateva rarrasa etana, eleivoo.

<sup>9</sup> Me kateva kapuna ensolo Vau eteva ghe rekataala etaira me mallangina ateva ghe  
talieinilala me laghe matautu saasakiala.

<sup>10</sup> Ensolo ateva ghe uela etaira va, "Am rau mene matautu, poli amae sio tani auliaa kieimim tale masi kiukiu. Isaa oia inangari aue egeleli isaa akapa taumattu la masimasieili.

<sup>11</sup> Ia oia nau eteva aliki eteva, aiasaangimim ia, ange lutula tale masalikina ataeae Deivit, ia Mesaea ia, me Vau ia.

<sup>12</sup> Vaalua aue am kilaia, aue am tarai a ghiighiisainia tale kalio, me easoaso tale aikaai aneira inana ateva vulumakao atoa."

<sup>13</sup> Arovaea nonga ta mene katoa ensolo oroiannaaili ila la tokatoka epona liu, laghe kaurekatila, me laghe tingina teela ia o ensolo ateva, me laghe tiuaala tani kkaua ararina ataeae God, laghe ue va,

<sup>14</sup> "Ita tau sae ararina ataeae Vau eteva epona liu

me tale kosa ateva luei aue etoka ta lo atoa God emaamasieinila."

<sup>15</sup> Nau ensolo atoa laghe kasu vulilala, me laghe saela epona liu, me tau ngai toi sipsipi etoa laghe appooa ngaitauaala va, "Ita kasu me ita lao eBethlehem, me ita laa tara isaa o voto ange lutula, Vau eteva eauliaala."

<sup>16</sup> Laghe ailuulila tani kasu, me laghe laa saopi sio Meri me Josep me aliki eteva, ghe asoaso tale aikaai aneira inana ateva vulumakao atoa.

<sup>17</sup> Nau eteva laghe taraiela, laghe auliaa seela inangarina aliki eteva, ensolo ateva ghe auliaala etaira.

<sup>18</sup> Me ila akapa taumattu ngatoa laghe nongola kiukiu tau ngai toi sipsipi etoa laghe auliaala, me laghe soghiaala.

<sup>19</sup> Meri ghe allokooia ngakapala isaa o inangari tale urunguitanina, me nau ekapa atoa ghe annaa.

<sup>20</sup> Tau ngai toi sipsipi etoa laghe oghiaala, me laghe tau saela ararina ataeae God, me laghe masimasiangailila God, poli isaa akapa voto ensolo ateva ghe auliaala, laghe tarala me laghe nongola, nongina ghe auliaala.

#### *Laghe asela ararina ataeae Iesu*

<sup>21</sup> Aiaaghaoaluna (8) ateva nau laghe isola aliki eteva, me laghe asela ararina ataeae ta Iesu, kinna karika ghe kaaia me ensolo ateva ghe ase allokooia ararina ataeae.

#### *Simion me Anna lalu ghe tarala Iesu tale ale manga ateva*

<sup>22</sup> Ghe ghaala nau ta Josep me Meri tani raarangsana, tani aimulusi tee inangari nipaopao Moses ghe pitti elokoila. Liuna avalua o me lalu ghe saula aliki eteva, me laghe saela ejerusalem tani apasungainia ta Vau eteva.

<sup>23</sup> Lalu ghe anna tani aimuli tee Uru ngai Manga ateva eue va, "Isaa akapa aliki taita aitiutiui tani lutu, la taula lao me la ghamangaila ta Vau eteva."

<sup>24</sup> Lalu ghe saela tani ghelei aiaavusuvusuena, nongina inangarina Vau eteva ghe auliaala va, "Ghila alua nongina alikaoo alua, o valusu elua, lalu vira mene naanamu."

<sup>25</sup> Isaa o nau kateva taumattu ghe tokatoka ejerusalem, ararina ataeae ta Simion, ghe gheeleli nonga voto ghulughuluena, me ghe aimuli tee God. Spirit Manga ateva ghe tokatoka ta ngetana. Ghe toitoi ia o taumattu ngateva aue alona eusi Israeli etoa.

<sup>26</sup> Spirit Manga ateva ang ghe aotula etana va karika aue emate lomosi ta etara mua kapuna Mesaea ngateva Vau eteva.

<sup>27</sup> Spirit Manga ateva ghe katulainiela me ghe kupi ssola tale ale ngeleka atiulu tale ale manga ateva, me kinna me tamane Iesu lalu ghe maeaa sio ia o aliki eteva Iesu etana, tani ghelei voto inangari nipaopao eaauliaa.

<sup>28</sup> Me Simion ghe sauela me ghe kalopiela, me ghe tau saela ararina ataeae God, me ghe uela va,

<sup>29</sup> "Vau eteva, aghi kapum tau ngai nonganongo anna ieghi,  
ia oia urooroo tani tau velueghi tale luei, nongina ughe auliaala.

<sup>30</sup> Mataghi ange tarala kalum niasaangi eteva,

<sup>31</sup> ughe aimanomanosieiniela ta mataira isaa akapa taumattu ngatoa,  
ia mallanga ia eaapasunga Vau eteva ta mene katoa patunganue namuu,

me aue la gharuaa kapum taumattu nge Israeli etoa."

<sup>33</sup> Tamana me kinna Iesu lalu ghe soosoghiaa voto Simion ghe aauliaa tee Iesu.

<sup>34</sup> Me Simion ghe arangiseiluelua, me ghe uela ta Meri va, "Ia oia natum ateva aue egeleli oroi taumattu nge Israeli, katoa aue la mate, me katoa aue la saanga, aue etoka tani aimatootoongana ta taumattu ngatoa, me karika poi aue la annaia,

<sup>35</sup> me aue eghelei nannaaira aisuliaane aue eotu. Me io, Meri, alousiusiaam aue enongina baenata ateva epasapasa urunguitanim ateva.”

<sup>36</sup> Vause ateva, propete ia, ghe vause namungailila, ararina atea ta Anna, natuna ia Panuel, tale ararimangali eteva ta Asa, ie tee ghe tokatoka tale ale manga ateva. Nau ghe laila ghe toka teela taitanna ateva ghaituae (7) ninamanama nonga me taitanna ateva ghe raue vuluela.

<sup>37</sup> Taitanna ateva ghe raue vuluela, me ghe tokala ghe roola ghaoolungaulu ghaataiae (84) anna ninamanama, me ghe kakkua tale ale manga ateva ellaa me eleivo, me ghe naeae me ghe looloo sae tale nau laghe suoiongaala va lao aitauaa etana tale ale manga.

<sup>38</sup> Nau Simion ghe aaippooaa tee Meri me Josep, Anna ghe rekatala, me ghe tiuuala tani tau sae God, me ghe aauliaa aliki eteva ta lo atoa laghe toitoi kapuira tau ngai asaangi eteva Israeli etoa.

### *Josep me Meri lalu ghe kiriaa siola eNasaret*

<sup>39</sup> Nau Josep me Meri lalu ghe ghelei ekapala voto tale inangarina Vau eteva, me lalu ghe mene oghi siola tanganueirarua eNasareti, ta pai nge Galilii.

<sup>40</sup> Ia o aliki eteva ang ghe naanamu, me sarasarakana ia, alomasaanga ia, me God ghe aarangiseia.

### *Iesu elome tale ale manga*

<sup>41</sup> Isaa akapaaii ninamanama, tamana me kinna Iesu lalu ghe saesae ejerusalem tale nivelu eitaua ngateae, laghe aseasea va Pasova.

<sup>42</sup> Nau anna ninamanama Iesu ghe kasangaulu ghaluaela (12), laghe saela tale nivelu eitaua ngateae, nongina laghe gheelei arau.

<sup>43</sup> Nau nivelu eitaua ngateae ghe ruula, tamane me kinna ngila ghe mene ooghiaa tani lao tanganueira, me taita arighi ta Iesu ghe tokala ejerusalem. Karika lalu ghe kilala.

<sup>44</sup> Lalu ghe annaa va Iesu ghe kasukasu tee mene katoa taumattu. Laghe kasula ghe roola kateva nau, me lalu ghe tiuuala tani paea. Lalu ghe aaikolomainie see, ta mangaliirarua atoa me kapuiruua atoa.

<sup>45</sup> Nau karika lalu ghe taraiela, lalu ghe mene ooghiaa lao sio ejerusalem tani mene paea.

<sup>46</sup> Ghalua nau ghe lange sio, me lalu ghe taraiela elome tale ale manga, ghe tokatoka tee tau ngai aapasunga ngatoa. Ghe nonganongola, me ghe kookolomila tale nikokkolomi.

<sup>47</sup> Lo atoa laghe nonganongoa laghe soosoghiaa aalomasaanganiaane, me vaalua ghe liiliu uneira nikokkolomi.

<sup>48</sup> Nau eteva kinna me tamane lalu ghe taraiela, lalu ghe soghieiniela, me kinna ghe uela etana va, “Natughu, vaalua me ughe ghelei evalueingalueela o? Angalua me tamam angalu ghele nannangailio nau eteva angalu ghele paepaeo.”

<sup>49</sup> Ghe kolomiluelu va, “Vaalua me amalu paepaeaghi? Amalu rooroo tani kila va aghi tale alena ateva Tamaghi.”

<sup>50</sup> Karika lalu ghe kila amasinala malloeanina voto ghe auliaala etairaru.

<sup>51</sup> Me ghe usiluelu, me laghe siola eNasareti, me nau ekapa atoa ghe nonganongo usilainilualu. Me kinna ghe aillokoia ngakapaailila isaa o voto tale urunguitanina ateva.

<sup>52</sup> Me Iesu ghe naanamu, me aalomasaanganiaane tee ghe laa saesae, me God me taumattu ngatoa laghe aaloannaailia.

## 3

### *Jon tau ngai aasuu ia ghe aimonomonosiaala salana atikirighi (Mat 3:1-12; Mak 1:1-8; Jon 1:19-28)*

<sup>1</sup> Tale aiaakasangaulu ghalimae (15) atea ninamanama ta Taiberias Siisa tani aitoiaa eRom, me Pontius Paelat gavana ia ejuidia, me Herot ghe aaitoiaa eGalilii, me tuena ta Pilip ghe aaitoiaa eIturea me eTrakonitis, me Lisianas ghe aaitoiaa eAbilen –

<sup>2</sup> isaa o nau Annas me Kaeapas namuu ilalua ta pristi etoa ta ajiu etoa, me isaa o nau tee, Jon natuna Sekaraea ghe tokatoka tale voto ateva karika righi taumattu ta ngetana, me inangarina God ghe mae sio etana.

<sup>3</sup> Jon ghe kasukasu ekapa see tale masaliki ejordan, kalakalaa tale ateo atea, me ghe poppooaa ta taumattu ngatoa va la nna ngaioghiohiaa me la ghaa niasuu, me God aue ekkaluaa kaluiraa ssavoto.

<sup>4</sup> Nongina propet Aisaea ghe pitila emua arau, ghe uela va,

"Tale voto ateva karika righi taumattu etokatoka etana, lingi ngalo taumattu ngateva ekolokolo, eue va,

'Am aimonomonosia salane atikirighi Vau eteva,  
am ghelei eghulughuluena akapala salane.

<sup>5</sup> Aue la rovii liu me voto saesaena pei nikai emasina,  
me llo salana viloviloana pei nighelei eghulughuluena  
me voto sesaaili aue la ghelei emasina.

<sup>6</sup> Me taumattu ngakapa atoa aue la tara kanna niasaangi God.' "

<sup>7</sup> Oroienaaili taumattu ghe mae sio ta Jon va easuula, me Jon ghe uela etaira va, "Am nongina va natuira iem katu ngatoa! See euela etaimim va am ilou vuli sessaiaane Vau eteva ange anna tani lutu etaimim?

<sup>8</sup> Am kuneaa righi uiimim tani apasunga va ngam ghe vella kaluimim ssavoto. Am rau mene ue va, 'Ami tuvuna amami Abraham.' Poli aghaauliaa etaimim va God erooroo tani ghelei isaa o atu etuvuna Abraham.

<sup>9</sup> Kulum ateva aimonomonosiaanna ia tani tue akatuu ai, me isaa o ai karika ekuukuneaa masi uene aue la tue me la sau velu sae tale kuraa atae."

<sup>10</sup> Me taumattu ngatoa laghe kolomila Jon va, "O sa ateva ami gheleia?"

<sup>11</sup> Jon ghe uela etaira va, "Arova ghalua unem sioto, utau lao teva ta lo ateva karika teva unna, me arova righi anem inana, uparruu mene katoa."

<sup>12</sup> Tau ngai ghaa takis atoa tee laghe mae sio va easuula, me laghe uela ta Jon va, "Tisa, ami vaalua ami ghelei?"

<sup>13</sup> Jon ghe uela etaira va, "Am ghaa lo viliki veu gavmani eue va am ghaa, am rau mene nim ghaa righi ta aloaloannaaimim."

<sup>14</sup> Me katoa tana soldia laghe kolomiela va, "Me ami, sa ateva ami gheleia?"

Jon ghe uela etaira va, "Am rau mene amatautu taumattu ngatoa tani ghaa uneira viliki veu, me am rau mene aikameaa. Am masimasi tee aipoliimim."

<sup>15</sup> Ila akapa taumattu ngatoa laghe toitoi Mesaea ngateva, laghe nannaa va koti Jon Mesaea ia.

<sup>16</sup> Jon ghe uela etaira va, "Aghi aghaasuuem tale manu, me mene kateva aue emae, ia sarasarakaniaane elaulau sarasarakaniaaghi. Karika masi taumattu ngieghi tani pulaka unna ai-iri aikasukasu. Ia aue easuuem tale Spirit Manga ateva me tale kuraa atae."

<sup>17</sup> Aue emae arova taumattu ngateva eposoposo unna pokon ateva aisaraki uiti ia tani pola uiti tale kou uit, me aue eatoka aitauaa uiti tale ale ngai atoka uiti eteva, me aue evelu sae kou uiti tale kuraa atae karika erooroo tani pala." <sup>18</sup> Tale oroi asease salana, Jon ghe poppoaa masi kiukiu tale taumattu ngatoa.

<sup>19</sup> Me Herot ia o gavana ia,\* Jon ghe uela etana va, "Karika masina ta ughe lai sarila Herodias, poli vausenni ia tuem." Oroi mene kasina ase gheeleiaane sesa

<sup>20</sup> me Herot ghe gheleila voto ateva sesaaili ia, nau ghe atoka ssola Jon tale ale mata voovoo.

*Iesu ghe ghaala niaasuu*  
(Mat 3:13-17; Mak 1:9-11)

<sup>21</sup> Nau Jon ghe aasuu taumattu ngatoa, ghe asuu teela Iesu. Epona liu ghe otiela nau Iesu ghe looloo sae,

<sup>22</sup> me Spirit Manga ateva ghe sio mae ta Iesu nongina ghila ateva, valusu ia. Me lingi ngalo ateva epona liu ghe uela va, "Io natughu io, aghaailousiangailio me masimasiaaghi ta getam namungaili."

*Arariira tuvuna atoa Iesu*  
(Mat 1:1-17)

<sup>23</sup> Nau Iesu ghe tiuala uunguaane koti anna ninamanama kotolungauluae (30). Taumattu ngatoa laghe annaa va natuna ia Josep,

Josep natuna ia Heli,

<sup>24</sup> me Heli natuna ia Matat,

me Matat natuna ia Livae,

me Livae natuna ia Melki,

me Melki natuna ia Jannai,

me Jannai natuna ia Josep,

<sup>25</sup> me Josep natuna ia Mattataeas,

**3:7:** Mat 12:34; 23:33.    **3:8:** Jon 8:33, 39.    **3:9:** Mat 7:19.    **3:12:** Luk 7:29.    **3:16:** Apes 13:25.    **3:19:** Mat

14:3-4; Mak 6:17-18.    \* **3:19:** gavana Tale inangari nge Grik, Tetrak, lo ateva taita ghe aaitoiaa kateva patunganue namuu tale ghaataiae patunganue namuu.    **3:22:** Jon 1:32.    **3:23:** Luk 4:22; Jon 6:42.

me Mattataeas natuna ia Eimos,  
 me Eimos natuna ia Nahum,  
 me Nahum natuna ia Esli,  
 me Esli natuna ia Naggai,  
<sup>26</sup> me Naggai natuna ia Mahat,  
 me Mahat natuna ia Mattataeas,  
 me Mattataeas natuna ia Semein,  
 me Semein natuna ia Josek,  
 me Josek natuna ia Joda,  
<sup>27</sup> me Joda natuna ia Joanan,  
 me Joanan natuna ia Resa,  
 me Resa natuna ia Serubabel,  
 me Serubabel natuna ia Sealtiel,  
 me Sealtiel natuna ia Neri,  
<sup>28</sup> me Neri natuna ia Melki,  
 me Melki natuna ia Addi,  
 me Addi natuna ia Kosam,  
 me Kosam natuna ia Elmadam,  
 me Elmadam natuna ia Er,  
<sup>29</sup> me Er natuna ia Josua,  
 me Josua natuna ia Eliesa,  
 me Eliesa natuna ia Jorim,  
 me Jorim natuna ia Mattat,  
 me Mattat natuna ia Livae,  
<sup>30</sup> me Livae natuna ia Simion,  
 me Simion natuna ia Jiuda,  
 me Jiuda natuna ia Josep,  
 me Josep natuna ia Jonam,  
 me Jonam natuna ia Eliakim,  
<sup>31</sup> me Eliakim natuna ia Melea,  
 me Melea natuna ia Menna,  
 me Menna natuna ia Mattata,  
 me Mattata natuna ia Naetan,  
 me Naetan natuna ia Deivit,  
<sup>32</sup> me Deivit natuna ia Jesi,  
 me Jesi natuna ia Obed,  
 me Obed natuna ia Boasi,  
 me Boasi natuna ia Salmon,  
 me Salmon natuna ia Nason,  
<sup>33</sup> me Nason natuna ia Aminadab,  
 me Aminadab natuna ia Admin,  
 me Admin natuna ia Arni,  
 me Arni natuna ia Hesron,  
 me Hesron natuna ia Peres,  
 me Peres natuna ia Jiuda,  
<sup>34</sup> me Jiuda natuna ia Jekop,  
 me Jekop natuna ia Aísiki,  
 me Aísiki natuna ia Abraham,  
 me Abraham natuna ia Tera,  
 me Tera natuna ia Nahor,  
<sup>35</sup> me Nahor natuna ia Seruk,  
 me Seruk natuna ia Reu,  
 me Reu natuna ia Pelek,  
 me Pelek natuna ia Eber,  
 me Eber natuna ia Sela,  
<sup>36</sup> me Sela natuna ia Keinan,  
 me Keinan natuna ia Apaksat,  
 me Apaksat natuna ia Sem,  
 me Sem natuna ia Noa,  
 me Noa natuna ia Lemek,

<sup>37</sup> me Lemek natuna ia Metiusila,  
me Metiusila natuna ia Inok,  
me Inok natuna ia Jaret,  
me Jaret natuna ia Mahalalel,  
me Mahalalel natuna ia Kenan,  
<sup>38</sup> me Kenan natuna ia Enos,  
me Enos natuna ia Set,  
me Set natuna ia Adam,  
me Adam natuna ia God.

**4**

*Namu ngateva ta raroai etoa  
ghe tootoongaala Iesu*

(Mat 4:1-11; Mak 1:12-13)

<sup>1</sup> Iesu ghe lau sae mae tale ateo ataea eJodan, me Spirit Manga ateva ghe pasula etana, me ghe ssoainiela tale voto ateva karika righi taumattu etana.

<sup>2</sup> Namu ngateva ta raroai etoa ghe tootoongaala Iesu tale ghaatingaulu (40) nau. Isaa o nau karika ghe namanama poila, me airuuruu tale isaa o nau ghe maloolaa.

<sup>3</sup> Namu ngateva ta raroai etoa ghe mae sio ta Iesu me ghe uela va, “Arova koronna va Natuna io God, uauliaa tale atu etiulu o me ekoli me everete.”

<sup>4</sup> Iesu ghe liula me ghe uela va, “Uru ngai Manga ateva eaauliaa va, ‘Karika taumattu ngatoaa va la maamaulue nonga tale inana.’”

<sup>5</sup> Namu ngateva ta raroai etoa ghe saeaala Iesu tale motouru tani apasunga patunganue namu ngakapa atoa tale kosa ateva oia, me tale ia o tuku nau erighi ghe apasunga ngakapala kosa ateva.

<sup>6</sup> Me ghe uela ta Iesu va, “Aue atau aatu matuutuliena, me unamuu tani aitaraa isaa o voto. Ta aghe ghaala isaa akapa o voto, me arova aghaloanna tani taula ta see, aue ataula.

<sup>7</sup> Isaa o voto aue peim arova usuuaa me ukkaueinaghi.”

<sup>8</sup> Iesu ghe liula me ghe uela va, “Uru ngai Manga ateva eue va, ‘Ukkaua Vau eteva kapum Goto ia, me uaimulusi teeia nonga.’”

<sup>9</sup> Ghe mene saeaala Iesu tale pungani ale manga ateva eJerusalem, me ghe uela va, “Arova Natuna io God, ulove velu sio.

<sup>10</sup> Ta Uru ngai Manga ateva eue va,

“ ‘Ia aue esuu kapuna ensolo atoa  
tani sio aitara ngamasinaailiio,

<sup>11</sup> Me aue la sau evukalao me

karika aue utaghua kekem tale atu.’”

<sup>12</sup> Iesu ghe uela etana va, “Uru ngai Manga ateva eue va, ‘Urau mene tootoonga Vau eteva kapum Goto ia.’”

<sup>13</sup> Namu ngateva ta raroai etoa ghe ruu ekapala unna nitootoonga ta Iesu, me ghe kasu vuliela tani mene toi mene teva masi nau ppae.

*Iesu ghe tiuuala niuungu eGaliliti*

(Mat 4:12-17; Mak 1:14-15)

<sup>14</sup> Iesu ghe ghaala sarasarakana tale Spirit Manga ateva, me ghe kiri lao sio eGalilii, me kukiuna ghe lao sio tale masaliki ekapa atoa.

<sup>15</sup> Ghe aapasunga tale aleira ale nivelu eitaua ngatoa, me ila akapa laghe aarueinia.

*Laghe tiu vella Iesu eNasaret*

(Mat 13:53-58; Mak 6:1-6)

<sup>16</sup> Iesu ghe lao sio eNasareti nongina ghe namuula, me tale nau manga ghe ssola tale ale nivelu eitaua ngateva, nongina eghe gheelei nau ekapa atoa, me ghe tingina saela tani ritii Uru ngai Manga ateva.

<sup>17</sup> Me laghe taula vuku eteva unna ia propete Aisaea, laghe aseasea va skrol, ghe pulakaiela, me ghe paela inangari Aisaea ghe pitila, <sup>18</sup> ghe uela va,

“Spiriti eteva ta Vau eteva etokatoka etaghi,

poli eghe suitoongainaghila

tani ppooaa masi inangari ta lo atoa karika peiira.

Me ghe sungieghila tani ppooaa va la ghaha velu lo atoa tale ale mata voovoo,

mata salusalu etoa aue la taatara,

tani ruu maamatana ta lo atoa la gheelei sesa etaira,  
 19 me tani aulia ngaotu va nauna oia Vau eteva tani asaangi kapuna taumattu.”  
 20 Iesu ghe mene talila skrol ateva, me ghe tauue lao sio ta lo ateva ghe aaitaraa skrol atoa, me ghe toka siola tani ppooaa. Ila akapa laghe pasiaala mataira etana,  
 21 me lesu ang ghe aauliaa etaira va, “Inangari oia tale Uru ngai Manga ateva ange koronala ghaine tale nongongoaaimim.”  
 22 Laghe soghiaala tani nongo masi inangari ghe kupi ghoa mae ta paane, me laghe masimasilu, me laghe aakolomieinila va, “Ia oia natuna Josep, o karika?”  
 23 Iesu ghe auliaala etaira va, “Akilakila va aue am ue ta tuku inangari eteva va, ‘Io dokta io, ughelei emasinaio mua.’ Me aue am ue etaghi va, ‘Ughelei mua righi voto oia tangantuem, nongina ami ghe nongola ughe gheelei voto eKapenium.’”  
 24 Ghe mene uela va, “Aghaaulia ngakoronna etaimim va karika toa la rooroo tani oneoneeaa teva propete tanganeira aitaauaa me ia.  
 25 Aghaaulia ngakoronna va oroi vause raue vulu eIsraeli nau ta Elaija, nau karika teva vaoa tale kotoluae (3) ninamanama me ghaonomo (6) ulana, me paka maloo ateva ghe asola elsrraeli.  
 26 Vau eteva ghe tam suula Elaija va ghe lao ta teva aIsraeli, ta ghe lao sio tale masaliki eteae eSarepat, ta vause raue vulu eteva elome tale patunganue namu ngateae eSaedon.  
 27 Me tee, oroi taumattu nge Israeli, isiki tasussukku eteva ghe ghaailala, nau ta propete ateva Elaisa, karika laghe raarangisanala, me Naaman nonga, aSiria ia, ghe raarangisanala.”  
 28 Lo atoa elome ale nivelu eitaua ngateva laghe nongola inangarina me ghe sessaileiililala.  
 29 Laghe tingina saela, me laghe kuneiela, me laghe ae velue ghoala eleka tale masaliki taatara atae, me laghe saeainiela tale motouru eteva. Laghe aloanna tani bbi velue sio tale vallae.  
 30 Me Iesu ghe kasula ta mallomeira, me ghe kasu vulilala.

*Iesu ghe ghelel emasinala taita ateva  
 raroai eteva etana  
 (Mak 1:21-28)*

31 Iesu ghe lao sio eKapenium, masaliki taatara ia eGalilii. Vara nau manga ateva ghe mae sio, me ghe tuiuala tani apasunga inangarina God ta taumattu ngatoa.  
 32 Laghe soghiaala voto ghe aauliaa, ta nonginaaili taumattu ngateva matuutulienia ia.  
 33 Elome ale nivelu eitaua ngateva, taita ateva, raroai eteva ghe tokatoka etana. Ghe sama anamuula,  
 34 me ghe uela va, “Iesu aNasareti io, umae sio tani ghelel sa ateva etaimami? Vara ughelei saasakieinamami? Akilakilaio, io manga io kapuna io God.”  
 35 Iesu ghe uela va, “Urau mene sama! Kupi ghoa mae!” Ghe kupi ghoala, me ghe gheleila taumattu ngateva ghe katuula elome ta taumattu ngatoa, me karika ghe vakovakola.  
 36 Ila akapa laghe soghiaala tani nongo me tara, me ngila ghe aippooaa elome etaira va, “Saa voto llo oia? Matuutulienia me sarasarakana inangarina! Epoppooaa ta raroai etoa, me la kupikupi ghoa!”  
 37 Kiukiuna Iesu ghe lao sio tale mene kasina masaliki.

*Iesu ghe ghelel emasinala oroi taumattu  
 (Mat 8:14-17; Mak 1:29-34)*

38 Iesu ghe kupi ghoala tale ale nivelu eitaua ngateva, me ghe lao sio tanganue Saemon. Alumuna Saemon ghe iisiki, vilikina ghe aanasa atingina me matana ghe valavalanga. Laghe aulieiniela ta Iesu va esausia.  
 39 Iesu ghe tingina valaala ta komona vause ateva, me ghe paola isiki eteva, me ghe kapala. Vause ateva ghe masinala, ghe totula, me ghe kaisila aneira inana.  
 40 Nau sinaka ateva ang ghe suusuu, laghe maea ngakapa sio taumattu asease isiki etaira, tani ghaa naisausi ta Iesu. Ghe nim saasaoaa nimana etaira me laghe maamasina.  
 41 Raroai etoa laghe kupikupi vulu ghoa taumattu ngatoa, me laghe samasama anamungaili, laghe ue va, “Io Natuna io God.” Iesu ghe paopaoala me ghe ue ta raroai etoa va, “Am rau mene sama,” poli ila raroai etoa la kilakila va ia Mesaea ia.

*Iesu ghe poppoaa  
 (Mak 1:35-39)*

<sup>42</sup> Elue talaua poopooa Iesu ghe ssola tale voto ateva karika righi taumattu etana, me laghe paepaea. Nau laghe taraiela, laghe auliaala etana va erau mene kasu.

<sup>43</sup> Ghe uela etaira va, "Karika apoppoaa nonga etaimim. Atani ppooaa masi kiukiuna ararimangalina ateva God ta mene kasina masaliki taatara, mausina avalua o me Tamaghi ghe sungieghila."

<sup>44</sup> Liuna avalua o me ghe poppoaa tale ale nivelu eitaua ngatoa ejjudia.

## 5

*Iesu ghe kolola aitiutiu etoa tana disaepolo*

(Mat 4:18-22; Mak 1:16-20)

<sup>1</sup> Kateva nau, Iesu ghe tiitingina elosamarra tale ateo talia ngateae eGenesaret, me orioeili taumattu ngatoa laghe mene tomuela, tani nongo inangarina ateva God.

<sup>2</sup> Me Iesu ghe tarala paanaka aluepai, lalu ghe vuuvukala tale ateo talia ngateae, me tau ngai pae kko atoa laghe kkure vululuelua, me laghe porapora uneira uvena.

<sup>3</sup> Me ghe aikaaila tale gharighi paanaka, unna ia Saemon, me ghe uela ta Saemon va esiki tee ghooa paanaka arighi mala masau elosamarra. Me ghe toka siola tale paanaka arighi, me ghe mene tiuuala tani apasunga.

<sup>4</sup> Nau ghe ruula tani sama, me ghe uela ta Saemon va, "Ose tee ghoala elo malionge, me am velu sio uneimim uvena aighaa kko."

<sup>5</sup> Saemon ghe liula tani ue va, "Namu ngateva, eleivoo ami tootoonga poila tani luku, me karika poi ami ghaala teva, me elue talaua teeiemamila. Me poli angu aauliaa, ae amene ghoa velu sio isaa oia uvena."

<sup>6</sup> Me nau eteva laghe velu siola uneira uvena, laghe ghaala oroieili kko, me uneira uvena ghaisa ngarighi ghe tarrii.

<sup>7</sup> Vara me angila ghe palepale lao mene kasina kapuira, laghe vuuvukala tale mene kateva paanaka, tani mae sausila. Me laghe mae sio, laghe kaaila kko tale paanaka alua, me ghaisa ngarighi lalu ghe vuluu.

<sup>8</sup> Nau eteva Saemon Pita ghe tara avaluela o, ghe tturrula ta liue kkena Iesu, me ghe uela va, "Vau eteva, kasu vulueghila; ta aghi tau ssavoto ieghi."

<sup>9</sup> Poli ia me kapuna atoa laghe soghiaala voto oia, nau laghe tarala,

<sup>10</sup> me tee Jeimis me Jon, natuna ilalua Sebedi, lalu ghe uungu eitauaa tee Saemon.

Me Iesu ghe uela ta Saemon va, "Karika umene matautu: ae llo to nau emaema, ae utau ngai luku taumattu."

<sup>11</sup> Me nau eteva laghe ssola elae, laghe kasu vulila isaa akapa voto me laghe usiela.

*Iesu ghe ghelei emasinala*

*tau tasussukuna ateva*

(Mat 8:1-4; Mak 1:40-45)

<sup>12</sup> Kateva nau, Iesu ghe tokatoka tale kateae masaliki, me kateva taumattu, anna tasussukuna eteva, ghe tarala Iesu, me ghe suuiala ta liue kkena Iesu, me ghe uela etana va, "Vau eteva, marova ualoanna, urooroo tani ghelei eraarangisananaieghi ta mata God!"

<sup>13</sup> Iesu ghe ssuuaala nimana, me ghe posoala, me ghe uela va, "Aghaaloanna. Angu raarangisanala!" Arovaeaata ta tasussuku eteva ghe kasu vulila taumattu ngateva.

<sup>14</sup> Iesu ghe uela etana va, "Urou mene kiuki ta teva taumattu, ta ulaa tara mua pristi eteva, me ia ae eauliaa ta taumattu ngatoa va angu raarangisanala, me ughelei sae aiaavusuvusuen, nongina Moses ghe auliaala."

<sup>15</sup> Me kiukiuna Iesu ghe kasu ekapa seela, me oroieili taumattu ghe mae sio tani nongoa, me ghe ghelei emasinalila.

<sup>16</sup> Me orioaata nau ghe kasukasu vuli taumattu ngatoa, me ghe laolao tale voto karika righi taumattu etana, me ghe looloo sae.

*Iesu ghe ghelei emasinala*

*tangorengorena ateva*

(Mat 9:1-8; Mak 2:1-12)

<sup>17</sup> Kateva nau, Iesu ghe mene aapasunga, me katoa Paresi me tau ngai aapasunga ngatoa tale inangari nipaopao, laghe mene mae sio tani toka. Laghe kasula ejerusalem, me isaa akapa lutu masaliki eGalilii me ejjudia. Me sarasarakanianee Vau eteva ghe toka aitauaa teela Iesu, tani ghelei emasina lo atoa laghe iisiki.

<sup>18</sup> Katoa taumattu laghe sau mae sio kateva taita. Ia oia taita ateva riuna atoa matena ilia, me ghe asoaso tale komona atiulu. Laghe aaloanna tani saue sso tale ale ateva tani taue lao ta Iesu.

<sup>19</sup> Me poli oroieili taumattu ghe tokatoka, me karika righi salana tani ssoainia, laghe saue saela epona tale pungani ngale ateva, laghe ghiaa vella aiaakou, me laghe taue siola tee komona atiulu elome ta taumattu ngakapa atoa, me emua ta Iesu.

<sup>20</sup> Nau eteva Iesu ghe tarala uneira niaiesoaa, me ghe uela ta taumattu ngateva va, "Kapughu, kalum ssavoto ange kapala!"

<sup>21</sup> Tau ngai aapasunga ngatoa tale inangari nipaopao, me Paresi etoa, laghe tiuuala tani nnaa elome tale nannaaira va, "Saa taumattu ia ierai oia me eaauliaa saasakiaa tee God, nau egheeleia va eaairooa tee God! Poli God nonga erooroo tani kkaluaa ssavoto!"

<sup>22</sup> Iesu ghe kilala nannaaira, me ghe uela etaira va, "Vaalua me am nannaas isaa ona ase voto tale urungutaniimim?"

<sup>23</sup> Vaalua, malumina tani ue va, 'Kalum ssavoto ange kapala,' o tani ue va, 'Tingina saela, me ukasu?'

<sup>24</sup> Ghaine aghaloanna va am tara kila, va Natuna ateva Taumattu ngateva matuutulienia teeia tani kkaluaa ssavoto tale kosa ateva." Me Iesu ghe uela ta taumattu ngateva oia va, "Aghaauliaa etam va, tingina saela, me usau komom, me ulao tanganuem!"

<sup>25</sup> Katengaata ta taumattu ngateva ghe tingina saela, ta mataira taumattu ngakapa atoa, ghe saula komona ghe asoaso etana, me ghe lao sio tanganuena, me ghe tau saela ararina atae God.

<sup>26</sup> Taumattu ngakapa atoa laghe soghiaala isaa oia voto ghe lutula. Laghe matautula, me ila tee laghe tau saela God, laghe ue va, "Ngami tarala kateva ase voto ghaine!"

*Iesu ghe kolola Livae*

(Mat 9:9-13; Mak 2:13-17)

<sup>27</sup> Emulina, Iesu ghe laolao, me ghe tarala tau ngai ghiaa takis eteva, ararina atae ta Livae, ghe tokatoka tale natu ngale arighi aighaa takis ia. Iesu ghe uela etana va, "Mae usieghi."

<sup>28</sup> Livae ghe tingina saela, ghe kasu vuli ekapaailila voto, me ghe usiela.

<sup>29</sup> Me Livae ghe gheleila kinatama ninamanama atae tangantuena mausii Iesu, me tale ninamanama atae, oroieili tau ngai ghiaa takis atoa, me mene katoa taumattu, laghe toka aitauuaa teeilaluela.

<sup>30</sup> Paresi etoa me tau ngai aapasunga ngatoa tale inangari nipaopao, ila tee Paresi ila, angila ghe samasama anamuun kapuna disaepolo atoa Iesu. Laghe ue va, "Vaalua me am namanama me am ropiropi, aitauuaa tee tau ngai ghiaa takis atoa me tau ssavoto atoa?"

<sup>31</sup> Me Iesu ghe liula inangariira me ghe uela va, "Karika va masina atoa la laa taatara dokta, ta isikinna atoa.

<sup>32</sup> Karika aghe sio mae tani kolo ghulughuluena taumattu, ta aghe sio mae tani kolo tau ssavoto atoa tani nna ngaioghioghiaa."

*Iesu ghe auliaala uunguuaa ninaa*

(Mat 9:14-17; Mak 2:18-22)

<sup>33</sup> Me taumattu ngatoa laghe uela ta Iesu va, "Oroiaata nau, kapuna disaepolo atoa Jon laghe naenae, me laghe looloo sae, me kapuira disaepolo tee atoa Paresi etoa, la gheelei evalua o. Me io, kapum disaepolo atoa la tam naenae."

<sup>34</sup> Me Iesu ghe uela va, "Marova kateva taita ealoanna tani lai, koti aue am auliaa ta kapuna atoa va la rau mene namanama, nau eteva ia o taita ateva etokatoka teeila? Karika!

<sup>35</sup> Me auena, nau la vira ghaaghiaa velu taita ateva, ia o nau eteva, la vira nae."

<sup>36</sup> Iesu ghe auliaa teela kateae kiukiu niaimatoonga etaira va, "Marova pokane ateva aiaasae ange tarriila, karika teva taumattu erooroo tani mene rasi ouna ateva aiaasae, tani samapi tarrii eteva tale pokane ateva aiaasae. Marova egheelei evalua o, aue egheelei kiukiuaa ouna ateva aiaasae, me tee ia o ouna ateva aiaasae, karika aue masina tee pokane ateva aiaasae.

<sup>37</sup> Karika teva taumattu etottoli kaai ouna uaeni tale pokane ateva aikaai gheelei tale viliki meemee. Marova egheelei evalua o, aue ouna uaeni egheelei polaki aikaai eteva, me aue ilalua akapa uaeni eteva me aikaaina ateva aue lalu peisaane.

<sup>38</sup> Liuna evalua o me la tottoli kaai ouna uaeni tale ouna aikaai manu gheelei tale viliki meemee.

<sup>39</sup> Me lo atoa taumattu la ropiropi pokane uaeni, karika aue la aloanna ouna. La ue va, ‘Llo pokane masinaaili.’ ”

## 6

*Vau tale nau manga ateva*

(Mat 12:1-8; Mak 2:23-28)

<sup>1</sup> Kateva nau manga, Iesu ghe kasu longotila tale utani uiti eteae. Kapuna disaepolo atoa laghe ghaala kasina tana uiti, me laghe sapusapulaa vella vilikina ta nimaira, me laghe namala.

<sup>2</sup> Katoa tana Paresi laghe uela etaira va, “Vaalua me am gheelei voto ona, inangari nipaopao eue va karika masina tani ghelei tale nau manga ateva?”

<sup>3</sup> Iesu ghe liula me ghe uela etaira va, “Koti karika am ghe ritila kiukiuna atae Deivit, nau ia me kapuna atoa laghe maloola,

<sup>4</sup> me ghe ssola tale alena ateva God, me ghe ghaala verete laghe amangala, me ghe namala, me ghe tau lao sio tee ta lo atoa laghe kasukasuu teeia. Isaa oia verete karika erooroo va nim taumattu enama, ta pristi nonga atoa.”

<sup>5</sup> Me Iesu ghe uela etaira va, “Natuna ateva Taumattu ngateva Vau ia tale nau manga ateva.”

*Iesu ghe ghelei emasinala taumattu ngateva nimana atelange matena ia*

(Mat 12:9-14; Mak 3:1-6)

<sup>6</sup> Mene kateva nau manga, Iesu ghe kupi ssola tale ale nivelu eitaua ngateva tani ppooa, me kateva taita ghe tokatoka, nimane muenna atelange matena ia.

<sup>7</sup> Tau ngai aapasunga ngatoo tale inangari nipaopao, me Paresi etoa, laghe taatara usiusi Iesu, laghe aloanna tani kila va aue eghelei emasina tau sessa atoa ta nau manga ateva, o karika. Laghe paepae righi salana tani laoaa Iesu tale niaisakei.

<sup>8</sup> Me Iesu ang ghe kila vella nannaairaa, me ghe uela ta taumattu ngateva, nimana atelange matena ia, va, “Tingina saela, me la taraoio.” Me ghe tingina saela.

<sup>9</sup> Me Iesu ghe uela etaira va, “Aghaloanna tani kolomiem kateva voto. Emaamasina tani ghelei masi voto, o sesa voto, ta nau manga ateva? Tani asaangi maamauluaa kateva taumattu, o tani turungia?”

<sup>10</sup> Ghe aitara ngakapa seela etaira, me ghe uela ta taumattu ngateva va, “Korosila nimam atelange.” Me ghe gheleila, me nimana atelange ghe masinala nongina emua arau.

<sup>11</sup> Me tau ngai aapasunga ngatoo tale inangari nipaopao, me Paresi etoa, ghe sessai etinginailala. Me angila ghe aailoe va, “Sa ateva ita gheleia ta Iesu?”

*Iesu ghe kolola 12 apostolo*

(Mat 10:1-4; Mak 3:13-19)

<sup>12</sup> Kateva nau tale isaa o nau, me Iesu ghe saela tale motouru tani looloo sae, ghe looloo saela ta God tale ia o voo ngateva, lomosi ta ghe paila.

<sup>13</sup> Nau eteva ghe paila, ghe kolo aitauaala kapuna disaepolo atoa, me ghe suitoongaala kasangaulu ghalua (12), me ghe mene aselala va apostolo ila.

<sup>14</sup> Kateva ta Saemon (Iesu ghe aseala va Pita etana), me ghe kolo teela Andru, tue me nenga ilalua me Saemon, me Jeimis, me Jon, me Pilip, me Batolomiu,

<sup>15</sup> me Matiu me Tomas, Jeimis natuna ia Alpeas, me Saemon laghe asease Selot etana,

<sup>16</sup> me Jiudas natuna ia Jeimis, me Jiudas Iskariot, ia auena ghe tau lao Iesu ta nimaira tau ngai ssateena atoa.

*Iesu ghe ghelei emasinala oroieili  
taumattu ngatoo*

(Mat 4:23-25)

<sup>17</sup> Iesu me ila o kapuna disaepolo atoa, laghe sio mae tale motouru eteva, me laghe tinginala tale malaale. Ia, me oroieili kapuna disaepolo atoa, me oroieili tee taumattu, laghe kasula tale distriki eteva ejjudia, me masaliki taatara atae ejerusalem, me tale samarra ateva kalakalangina tale masaliki taatara aluae eTaer me eSaedon,

<sup>18</sup> laghe mae sio tani nongoa, me laghe maeaa tee sio kapuira tau sessa atoa va la masina. Me lo atoa tee sesa spiriti eteva ghe tokatoka etaira, Iesu ghe ghelei emasinalala.

<sup>19</sup> Me oroieili taumattu angila ghe paepaea tani nim tulia, poli sarasarakan ghe kasukasuu etana, me ghe ghelei emasina akapailala.

*Nimasimasi me nialousiusi  
(Mat 5:1-12)*

<sup>20</sup> Iesu ghe taatara lao sio ta kapuna disaepolo atoa, me ghe uela va,  
“Aue emasinaaili ta lo atoa karika tue peipeiena am,

poli ararimangalina ateva God kaluummi ia.

<sup>21</sup> Aue emasinaaili ta lo atoa ghaine am maamaloo,  
ta auena essoiem.

Aue emasinaaili ta lo atoa ghaine am aalousiusi,  
ta auena am kanga.

<sup>22</sup> Aue emasinaaili etaimim nau eteva taumattu ngatoa la sessa teeiem,  
me nau eteva la aatoka apolapolaiem, me la lakolakoam,  
me la ue va, Io sesa taumattu io,’ mausi Natuna ateva Taumattu ngateva!

<sup>23</sup> “Am rooroo tani masimasi nau eteva llo o elutu, me am loku, me am masimasi,  
poli namungaili aipoliimim etoitioem epona liu. Nongina emua arau, tuvuira atoa laghe  
gheleila isaa oia voto ta propete atoa.

<sup>24</sup> “Me am lo atoa tue peipeiena am, aue esesaaili etaimim,  
poli nimasimasi ghaine am ghaaghhaa, auena ekarika.

<sup>25</sup> Me am lo atoa ghaine esossoiem, aue esesaaili etaimim;  
auena am maloo!

Me lo atoa ghaine am kangkanga, aue esesaaili etaimim;  
auena am alousiusi me am ngala!

<sup>26</sup> Me marova taumattu ngakapa atoa la aasaesae arariimim, aue esesaaili etaimim;  
nongina emua arau, tuvuira atoa laghe gheleila isaa oia voto ta propete kamekame  
atoa.

*Tani ailousiaa tau ngai ssateeita atoa  
(Mat 5:38-48; 7:12)*

<sup>27</sup> “Me aghaauliaa ta lo atoa am nonganongo, va am ailousiaa tau ngai ssateeimim atoa,  
am ghelei masi niuwungu ta lo atoa la sessa teeiem.

<sup>28</sup> Am arangise lo atoa la poppoaa saasakiaa teeiem, me am pure ta lo atoa la aloanna  
tani ghelei saasakieiniem.

<sup>29</sup> Me marova teva eposala kativilau bbam, utau lao mene kativilau me eposala teeia;  
me marova teva taumattu ealoanna tani ghaa unem aiaasae ngeleka ateva, masina eghaa  
tee unem sioto ateva.

<sup>30</sup> Utau lao peim ta lo ateva ekolomio, me marova lo ateva ange ghaala righi peim, urau  
mene kolomia va emene kiriaa mae.

<sup>31</sup> Am ghelei voto ta mene kateva taumattu nongina am aloanna va emene ghelei mae  
etaimim.

<sup>32</sup> “Marova am ailousiaa nonga lo atoa la aailousieiniem, vaalu me am aaloanna  
tani ghaa nimasimasi? Poli tau ngai gheelei ssavoto atoa tee la ailousiaa lo atoa la  
ailousieinila!

<sup>33</sup> Me marova am gheelei emasina ta lo atoa la gheelei emasina etaimim, vaalu me am  
aaloanna tani ghaa nimasimasi? Tau ngai gheelei ssavoto tee atoa, la gheelei evalua o!

<sup>34</sup> Me marova am tau viliki veu nonga ta lo atoa am nannaa va ila aue la mene liu  
etaimim, vaalu me am aaloanna tani ghaa nimasimasi? Tau ngai gheelei ssavoto tee  
atoa la tautau viliki veu ta tau ngai gheelei ssavoto atoa, me ila tee la annaa va aue la  
ghaa ailiuliu!

<sup>35</sup> Am ailousiaa tau ngai ssateeimim atoa, me am ghelei masi voto etaira; am aiparruu  
viliki veu, me am rau mene nnaa va am mene ghaa ailiuna. Poli am, aue am ghaa  
namungaili aipolipoli, me aue natuna iem lo ateva Iaaili Epona. Ta egheelei masina ta  
lo atoa karika la kaakaili emasina me lo atoa sesa gheeleiaaira.

<sup>36</sup> Am alousiusi tee mene katoa taumattu, nongina Tamaimim ateva eaalousiusi  
teeiem.”

*Am rau mene auliaa katoa gheeleiaaira  
(Mat 7:1-5)*

<sup>37</sup> Iesu ghe mene uela va, “Am rau mene ue va katoa nonga taumattu la gheelei ssavoto,  
me God karika aue eue teeiem va am tee am gheelei ssavoto; am rau mene sunganaa  
tau lao sesa aipolipoli ta kateva; me God karika aue esunganaa tau aatu sesa aipolipoli  
etaimim. Am kkaluaa gheeleiaa kateva taumattu, me God aue ekkaluaa gheeleiaaimim.

<sup>38</sup> Am parruu, aue God emene tau aatu etaimim; ekaai, me emonnaa tau sio, me emene

kaai, me aue epasu, me aue ekao velu kasina. Llo am tautau lao ta katoa, aue God emene tau aatu nongina am tautaula."

<sup>39</sup> Iesu ghe kiukiuaala kateae kiukiu niaimatoonga, "Teva mata salusalu karika erooroo tani katulaa mene teva mata salusalu; marova egheelei, aue lalu katuu velu sio tale liu eteva.

<sup>40</sup> Tau ngai ghia alomasaanga ateva karika namuu ia ta kapuna tau ngai aapasunga ngateva. Nau ange kila akapala voto, aue enongina kapuna tau ngai aapasunga ngateva.

<sup>41</sup> "Vaalua me utaatara nonga vongovongo ta matana kapum ateva, me karika utaatara paka palanga ateva ta matam?

<sup>42</sup> Vaalua me ualoanna tani ue ta kapum ateva va, 'Kapughu, aghaaloanna tani ghia velu tuku vongovongo ateva ta matam,' me io karika urooroo tara paka palanga ateva ta matam? Usimaghalue io, ughaa velu mua paka palanga ateva ta matam, me utaatara amasina tani ghia velu tuku vongovongo ateva ta matana kapum ateva.

*Ai eteae me uene*

(Mat 7:17-20; 12:34-35)

<sup>43</sup> "Masi ai eteae karika ekuukuneaa sesa ue ngai, tee sesa ai eteae karika ekuukuneaa masi ue ngai.

<sup>44</sup> Isaa akapa ai la taatara kila tale ueira la kuukuneaa. Karika am ghaagħha ue ngai tale uasa karasa atikirighi, me ue uasa tale ai rorroana ateeae.

<sup>45</sup> Masi taumattu ngateva eaapasunga masi voto tale masi urunguitanina ateva, me sesa taumattu ngateva, sesa voto eghoħha tale llo sesa etokatoka tale urunguitanina ateva. Sesa voto taumattu ngateva egheelei, etokatoka tale urunguitanina ateva, eaapasunga nau eteva eaippooaa."

*Tau ngalomasaanga ateva me alo kapakapa ateva lalu ghe atulula ale alua*

(Mat 7:24-27)

<sup>46</sup> Iesu ghe mene auliaa tee lao sio va, "Vaalua me am aseaseagħi va, 'Vau eteva,' me karika am għeellei nongina aghaaulia?

<sup>47</sup> Aue aghapasunga va saa taumattu ia lo ateva emaemae etagħi, me enongonongo inangarighi, me eaimilusi tee.

<sup>48</sup> Ia nongina lo ateva taumattu ghe kai liu siola, me ghe atulula alena ateva epona tale atu. Nau eteva ateo ateeae ghe għoala, me ghe akala poila ale ateva, karika poi ghe aisijsaala, poli ghe atulu ekorokoronganaailiela.

<sup>49</sup> Me lo ateva taumattu enongonongo inangarighi, me karika egheelei, ia nongina lo ateva taumattu ghe atulula alena ateva tale kosa karika korokorongana. Me nau eteva ateo ateeae ghe għoala, me ghe akalala ale ateva, ale ateva ghe katuula, me ghe akalainiela."

## 7

*Aikaiaane kapuira namu ngateva  
tau ngai uvii etoa*

(Mat 8:5-12; Jon 4:43-54)

<sup>1</sup> Nau eteva Iesu ghe ruula tani auliaa isaa o voto ta nongonongoa taumattu ngatoa, me ghe ssola eKapenium.

<sup>2</sup> Kateva namuu għe aitoiaa kateva ai (100) tau ngai uvii, kapuna tau ngai nongonongo anna ateva għe isikila, me għe aailousiangaili, me ang għe aainasiaa tani mate.

<sup>3</sup> Namu ngateva ta tau ngai uvii etoa għe nongola va Iesu ang għe rekatala, me għe suula namuu ta ajiu etoa, tani laa koloa va emae għeħlei emasina kapuna tau ngai nongonongo anna ateva.

<sup>4</sup> Nau lagħe lao sio ta Iesu lagħe aipoopoliangaili tani kolo Iesu, me lagħe ue va, "Utani sausia,

<sup>5</sup> poli eailousiangaili ajiu etoa, me għe sausitala tani atulu aleita ale nivelu eitħaua ngateva."

<sup>6</sup> Liuna avalua o me Iesu għe usilala.

Ang għe aakalakalaa tanganuena, me namu ngateva ta tau ngai uvii etoa għe suula kapuna atoa tani laa ue etana va, "Vau eteva, urau mene nnaa. Karika masina iegħi va ummae tanganuegħi.

<sup>7</sup> Mausina avalua o me karika ataatarieħi va masi taumattu iegħi tani mae tarraio. Anim anna va uppoa teva tuku inangari, me aue kapugħu tau ngai nongonongo anna ateva emasina.

<sup>8</sup> Aghi tee auungu ta namu ngatoa, me aghaaitoiaa katoa tani tau ngai uvii. Arova aue ta kateva va, ‘Lao sio,’ aue elao, va aue va, ‘Mae sio,’ aue emae, me arova aghele ue ta kapughu tau ngai nonganongo anna ateva va, ‘Gheleila llo toko,’ egheelei.”

<sup>9</sup> Iesu ghe soghieiniela nau ghe nongoala. Ghe kiriel, me ghe taatara lao sio ta taumattu ngatoa laghe aaimuli teelia, me ghe uela va, “Aghaauliaa etaimim va ia oia ase niaikaia ngateva namuu ia, karika aghe tara poia eIsrael.”

<sup>10</sup> Me taumattu ngatoa ghe sungilala, laghe oghi lao sio elo ale, me laghe tarala tau ngai nonganongo anna ateva, ta ang ghe masinala.

*Iesu ghe totula natuna aliki taita ateva vause rauve vulu eteva*

<sup>11</sup> Kasina nau ghe lange sio, me Iesu ghe lao sio tale masaliki eteae eNain. Kapuna disaepolo atoa me tana taumattu ngatoa laghe usiela tani lao.

<sup>12</sup> Nau ang ghe reerekata tale namu ngatee atamana tale ia o masaliki eteae, me ngeila ghe sausau emae ghooa taumattu ngateva matena ia. Vause ateva rauve vulu ia, ie nonga o natuna ateva ghe matela. Me orioeili taumattu tale ia o masaliki eteae laghe usiusi kinna.

<sup>13</sup> Nau Vau eteva ghe taraiela, urunguitanina ateva ghe alousiusi teeiel, me ghe uela etana va, “Urou mene ngala.”

<sup>14</sup> Ghe lao sio tale aisalo atea laghe sausaua etana, me ghe posoala, me lo atoa laghe sausaua laghe matua atinginala. Me ghe uela va, “Taita ateva, aghaauliaa etam va totula!”

<sup>15</sup> Taumattu ngateva matena ia ghe totu etokala, me ghe tiaala tani sama. Me Iesu ghe taeu lao sio ta kinna.

<sup>16</sup> Taumattu ngatoa laghe soghiaala, me laghe tau saela God, me laghe ue va, “Propete ateva namuu ia ange rekataala elome etaifa. Me God ange mae sio tani sausi kapuna taumattu ngatoa.”

<sup>17</sup> Isaa o kiukiuna Iesu ghe kasu ekapa seela ejjudia, me tale distriki kalakalangina ejjudia.

*Iesu me Jon tau ngai aasuu ia*

(Mat 11:2-19)

<sup>18</sup> Kapuna disaepolo atoa Jon laghe aulia ngakapala isaa o kiuki etana. Ghe kolola ghialua,

<sup>19</sup> me ghe sungilueluva lalu laa kolomi Vau eteva va, “Io ia o taumattu ngateva laghe uela va aue emae, o aue ami mene toi ppae mene teva?”

<sup>20</sup> Nau lalu ghe laa rekata sio ta Iesu, lalu ghe uela ta Iesu va, “Jon tau ngai aasuu ia esungiengalue la tani mae kolomio va, ‘Io ia o taumattu ngateva laghe uela va aue emae, o ami mene toi ppae mene teva?’”

<sup>21</sup> Ia o nau eteva, Iesu ghe ghelei emasinala oroi taumattu tau sessa, me lo atoa raroai etoa laghe tokatoka etaira, me ghe gheleila mata salusaluna atoa laghe taatarala.

<sup>22</sup> Ghe liula ta lo atoa Jon ghe sungilala va, “Am oghi lao sio, me am laa ghauliaa ta Jon llo ngam tarala, me ngam nongola. Mata salusaluna atoa la taatarala, me vereverenna atoa la kasukasula me tasussukuna atoa la raarangisanala, me talinga volongo atoa la nonganongola, me matena atoa la totula, me lo atoa karika peiira la nongola masi kiukiui.

<sup>23</sup> Me aue emasinaaili taumattu ngateva, unna niaiesoaa etam kaakatu vulueghi.”

<sup>24</sup> Vara me lo atoa Jon ghe sungilala laghe kasula, me Iesu ghe tiaala tani auliaa Jon taumattu ngatoa. Ghe ue va, “Sa ateva am ghe ssola tani taraia tale voto ateva karika righi taumattu etana? Pitipi eteva ghe kuukueinia?

<sup>25</sup> Arova karika, tani sa ateva am ghe kasueiniela tani sso taraia? Teva taumattu ghe aasae righi masi ghinna? Karika va isaa avalua o, ta lo atoa la asae masi ghinna, me la tokatoka tale masi nitoka, la tokatoka tangantuena king.

<sup>26</sup> Tani sa ateva am ghe kasula tani sso taraia? Propete ateva? Aghaauliaa etaimim va ue, me emene laulau mene katoa propete.

<sup>27</sup> Ia o taumattu ngateva, Uru ngai Manga ateva ghe aaulieeinia nau ghe uela va,

“ Tarala, aue asuu aikasuaa inangarighi eteva emuemueinio,

me ia aue eaimonomonosiaa ngamuemue ngalokoi salam.”

<sup>28</sup> Aghaauliaa etaimim va, ta lo atoa laghe lutula tale kosa ateva oia, karika teva erooroa ta Jon. Me lo ateva karika teae ararina, me iaaili euu tale ararimangalina ateva God, elaulau Jon.”

<sup>29</sup> (Taumattu ngakapa atoa, me tau ngai ghaa takis atoa, nau laghe nongola inangarina Iesu, laghe akoronnala va salane God koronna, poli Jon ghe asulala.

<sup>30</sup> Paresi etoa me lo atoa tau ngalomasaanga ila tale inangari nipaopao, laghe ratila aloaloannaane God etaira poli karika va Jon ghe asuuulala.)

<sup>31</sup> Me Iesu ghe mene uela va, “Sa ateva voto arooroo tani auliaa me eaimatoonga taumattu tale lo ateva oia vituu? Me ila saa taumattu ngila?

<sup>32</sup> Ila nonginaaili aliki etoa la tokatoka tale liu nianamisi, katoa la ue lao ta mene lutu katoa va,

“ ‘Ami ghe vuuvuu kkinari nilai eteae etaimim,  
me karika am ghe lokuloku;  
ami ghe ueei kkinari nialousiusi,  
me karika am ghe ngangngala.’

<sup>33</sup> Nau Jon tau ngai aasuu ia ghe mae sio, me karika ghe namanama verete, me karika ghe ropiropi uaeni, am ue va, ‘Raroai eteva ghe tokatoka etana.’

<sup>34</sup> Me nau Natuna ateva Taumattu ngateva ghe mae sio, me ghe namanama, me ghe ropiropi, am ue va, ‘Tau ninamanama ia, me tau niropiropi ia, me kapuira ia tau ngai ghaa takis atoa, me tau ssavoto atoa.’

<sup>35</sup> Masi ninannaa kannna God eaapasunga va koronna ia tale maamauluuaaira lo akapa atoa la aaimuli teeia.”

*Vause ateva sesa gheegheleiaane ghe kaola masi aiaaoo ta Iesu*

<sup>36</sup> Kateva Paresi ghe kolola Iesu va ghe laa namanama teeia tangantuena. Liuna avalua o me Iesu ghe lao sio tangantuena, me ghe lao sio tale tevoor tani namanama.

<sup>37</sup> Kateva vause tale ia o masaliki eteae, tau ngai ghelei ssavoto ia, ghe nongola va Iesu ghe namanama tangantuena Paresi eteva. Liuna avalua o me ghe ghaa lao sio aikaai eteva alabasta ia, pasu ia tale aiaaoo masinaaili ngusungusuaane.

<sup>38</sup> Ghe suuiala emuli ta liue kkena Iesu, me ghe tiuaala tani ngala, me ghe apposi kkena Iesu tale rarum matane, me ghe uluulu tale uu nguruna, me ghe nguungusuaa kkena, me ghe kaokao masi aiaaoo.

<sup>39</sup> Paresi eteva ghe koloala ghe tarala isaa o voto, me ghe tiuaala tani nna ngainao elome etana va, “Arova taumattu ngateva oia va propete ia, aue ghele kila va see eposoposoa, ta vause ateva oia tau ssavoto ia.”

<sup>40</sup> Iesu ghe liula etana me ghe uela va, “Saemon, aghanna tani auliaa kateva voto ta netgam.”

Saemon ghe liula me ghe uela va, “Tisa, aulieiniela.”

<sup>41</sup> Iesu ghe kiukiuala kiuki eterae, ghe uela va, “Taumattu ngalua lalu ghe ghaala viliki veu pei niliu ta kateva taumattu. Kateva ghe ghaala ghalima ai (500) silva koen, me mene kateva ghe ghaala ghalimangaulu (50).

<sup>42</sup> Karika teva etairarua ghe roola tani liu unna viliki veu lao taumattu ngateva. Liuna avalua o me ghe uela va unna viliki veu pei niliu enim vulla. See etairarua aue eailousiangaili ia o taumattu ngateva?”

<sup>43</sup> Saemon ghe liula me ghe uela va, “Aghannaa va koti lo ateva taumattu, unna viliki veu pei niliu oroi.”

Iesu ghe liula me ghe uela va, “Angu aulia ngakoronnala.”

<sup>44</sup> Vara me ghe kiriela, me ghe taatara lao sio ta vause ateva, me ghe uela ta Saemon va, “Tarala vause ateva o. Amae sio tangantuem, me karika utau mae sio righi manu aipora kkeghi. Eporala kkeghi tale rarum matane, me eulula tale uu nguruna.

<sup>45</sup> Karika ungusueghila nau arekatala, me ia, nau akupi sso mae arau, karika ghe ruu poi tani ngusu kkeghi.

<sup>46</sup> Io karika ukaala righi oeli ta urughu, me ia ekaola llo masi ngusungusuaane ta kkeghi.

<sup>47</sup> Liuna avalua o me aghaauliaa etam va kanna ssavoto oroiili, ange kapala, liuna avalua o me ailousiaane namungaili. Me lo ateva karika oroi llo laghe kkaluaala etana, ailousiaane karika namuu.”

<sup>48</sup> Me Iesu ghe uela ta vause ateva va, “Kalum ssavoto ange kapala.”

<sup>49</sup> Mene katoa laghe kololala tani mae namanama, laghe ue elome etaira va, “See etana ierai, me eue va ekakkaluua ssavoto?”

<sup>50</sup> Iesu ghe uela ta vause ateva va, “Kalum niaikaaiaa ange asaangiola. Kasula tale luei.”

<sup>1</sup> Emulina, Iesu ghe lao sio tale mene kasina masaliki taatara me llo masaliki ghauna, tani ppooaa masi kiukiu tale ararimangalina ateva God. Kasangaulu ghalua (12) disaepolo laghe usiusia,

<sup>2</sup> me tee lo atoa vause Iesu ghe tiu vella raroai etoa me ghe ghaa vella isiki etoa etaira; Meri aMakdala ia, lo ateva vause ghaitu (7) raroai laghe kupi ghoala etana;

<sup>3</sup> Joana vausenna ia Kusa (Kusa ia namuu ia ta lo atoa laghe aaitaraa voto tale paa ngalena ateva Herot); Susana; me oroila mene katoa vause. Ila laghe saasausi Iesu me kapuna atoa tani tau lao peira me viliki veu tani sausi niuungu.

*Kiukiu niaimatoongana tale tau ngai pasa katu ue ngai eteva  
(Mat 13:1-9; Mak 4:1-9)*

<sup>4</sup> Taumattu ngatoa laghe kasukasu tale masaliki taatara atoa tani mae tara Iesu. Nau laghe orioeili ila, me Iesu ghe auliaala kiukiu niaimatoongana ateeae, ghe uela va,

<sup>5</sup> “Tau ngai pasa katu ue ngai eteva ghe kasula tani pasa katu ue ngai. Nau eteva ghe kaokaoaala katu ue ngai, kasina katu ue ngai ghe katuula tapaa salana, me laghe asala me ghila atoa laghe namala.

<sup>6</sup> Kasina ghe katuula tale voto ateva sakolo ia. Nau eteva ghe piipinosa, ghe mallela me ghe mmatela, fa poli eeu atu ia, me karika righi manu.

<sup>7</sup> Kasina ghe katuu ssola elome tale uasa karasa atoa, me nau eteva laghe pinosa aitauaa teela uasa karasa atoa, uasa karasa atoa laghe kavili ematelala.

<sup>8</sup> Kasina ghe katuula tale masi kosa. Ghe pinosala me ghe kuneala katu ue ngai ghe roola kateva ai (100), me ghe laula ooroiaa llo katu ue ngai ekasina ghe kaokaoaala.”

Nau eteva ghe ruula tani kiukiu, ghe sama anamuula me ghe uela va, “Lo ateva talingane manee tani nongo, aue enongo.”

*Mausina kiukiu niaimatoongana  
(Mat 13:10-17; Mak 4:10-12)*

<sup>9</sup> Kapuna disaepolo atoa Iesu laghe kolomiela tale malloeanina kiukiu niaimatoongana ateeae.

<sup>10</sup> Iesu ghe uela va, “Alomasaanga tale voto eaaisulia tale ararimangalina ateva God, Tamaghi ghe tau aatu sio etaimim, me ta mene katoa aghaauliaa kiukiu niaimatoonga, poli,

“La taatara, me karika aue la tara kila;  
la nonganongo me karika la aalomasaanga tee.’

*Iesu ghe auliaala malloeanina kiukiu niaimatoongana ateeae  
(Mat 13:18-23; Mak 4:13-20)*

<sup>11</sup> “Malloeanina kiukiu niaimatoongana ateeae ia avalua toko va: Katu ue ngai eaaimatoonga inangarina ateva God.

<sup>12</sup> Llo ghe katuula etapaa salana eaaimatoonga lo atoa la nonganongo, vara me namu ngateva ta raroai etoa emaemae, me eghaaghaa velu inangari tale urunguitaniira. Liuna avalua o me karika aue la aikaaiaa me la saanga.

<sup>13</sup> Llo tale voto ateva sakolo ia, aue la masimasi tani nongo inangarina God, me aikaaiaira karika aluse, ta poli karika righi oaira. Nau nitootoonga emae, aue la katuu vulu God.

<sup>14</sup> Llo katu ue ngai ghe katuu ssola elome tale uasa karasa eaaimatoonga lo atoa la nonganongo, me nau la tokatoka, la nannangaili asease voto atoa, me la aloanna tani tue peipeiena, me la aloanna tani ghaa voto aue eaamasimasi maamauluuaaira, me isaa o voto aue ekavili ekatungila. Me karika aue la kuneaa righi uene.

<sup>15</sup> Katu ue ngai tale masi kosa eaaimatoonga lo atoa masina nannaaira me urunguitaniira masina, la nonganongo aikaaia inangari, me la posoposo parasi tale inangarina ateva God me la kuukuneaa masi ue ngai.

*Lam ateeae tale aitiitinginane ateva  
(Mak 4:21-25)*

<sup>16</sup> “Karika teva eaarokoti lam ateeae me eakou rungainia tale teva aiaku manu, me eaatoka pakeainia tale aisalo. Ta eaatokaie sae tale aitiitinginane ateva, me lo atoa la kupi sso tale ale ateva, aue la taatara etana.

<sup>17</sup> Me karika righi voto eaaisulia va aue etam otu, me karika righi voto la aituttua va aue etam otu, va taumattu ngakapa atoa karika aue la kila.

<sup>18</sup> Lo ateva righi voto etana, God ae emene tau lao kasina etana; me lo ateva karika righi voto etana, voto eannaa va isaa etana, God ae eghaa velu etana.”

*Iesu, kinna me nengane atoa  
(Mat 12:46-50; Mak 3:31-35)*

<sup>19</sup> Vara me kinna Iesu me nengane atoa laghe mae sio tani tara Iesu, karika laghe roola tani lao akalakalangina ta Iesu, poli orioeili taumattu ngatoa.

<sup>20</sup> Katoa laghe auliaala ta Iesu va, “Kinam me nengam atoa ila eleka, me la ghaloanna tani taraio.”

<sup>21</sup> Iesu ghe liula me ghe uela va, “Lo atoa la nonganongo inangarina ateva God me la gheelei uunguaane, ila kinaghi ila me nengahi ila.”

*Iesu ghe paola ttasi eteva me ghe lueila  
(Mat 8:23-27; Mak 4:35-41)*

<sup>22</sup> Kateva nau Iesu me kapuna disaepolo atoa laghe aikaaila tale paanaka ateva, me Iesu ghe uela va, “Ita lao tale pai kativilau tale ateo talia ngateae.” Vara me laghe tiu ghoala.

<sup>23</sup> Nau eteva laghe oseose elaoalo, Iesu ghe asekanue alokoila, me ghe llusula. Paka kuukuu ttasi eteva ghe lutu teelila, me ang ghe aavuluu paanaka ateva, me laghe tokala tale paka nimoia.

<sup>24</sup> Disaepolo atoa laghe angunila Iesu me laghe uela va, “Vau eteva, vau eteva, ngita raarau!”

Iesu ghe tingina saela me ghe paola kuukuu eteva me paka kotoo atoa laghe aakope, me ttasi eteva ghe kapala, me luei eteva ghe asola.

<sup>25</sup> Ghe kolomila kapuna disaepolo atoa va, “Vaalu karika righi aikaaiaimim?”

Tale nimoia laghe soghiala voto oia ghe lutula, me ngila ghe aaikolomieinila va, “Saa taumattu ia lo ateva oia? Esamasama tee ttasi eteva me kotoo atoa, me la nonganongo usilainia.”

*Iesu ghe ghelei emasinala taumattu ngateva raroai etoa etana  
(Mat 8:28-34; Mak 5:1-20)*

<sup>26</sup> Laghe ose lao sio tanganue aGeresa<sup>\*</sup> ngatoa, tale mene pai kativilau eGalilii.

<sup>27</sup> Nau Iesu ghe tingina ssola elae, taita ateva, raroai etoa laghe tokatoka etana, tale masaliki taatara atae, ghe ghoa mae tani sou Iesu. Oroi nau ang ghe lao sio ghe tam aasae righi ghinna, me ghe tam tokatoka tale teva ale ta ghe tokatoka tale liu niaikkaia.

<sup>28</sup> Nau ghe tarala Iesu ghe aore anamungailila, me ghe tturru siola ta liue kkena Iesu, me namungaili ta ghe samala me ghe uela va, “Sa ateva ualoannaia etaghi Iesu, Natuna io God iaaili Epona? Aghaaloanna va urau mene ghelei righi sesa etaghi!”

<sup>29</sup> Poli Iesu ghe aulia ngasarasarakanala ta raroai etoa vala kupi vulu ghoa ia o taumattu ngateva. Oroita raroai etoa ngila ghe tokala etana, liuna avalua o me nau laghe iriiri poi nimane me kkena tale sene, me taumattu ngateva ghe aaitoiaa poia, ghe gheeghelei patepate sene, me raroai etoa laghe kookouenie see tale voto karika righi taumattu etana.

<sup>30</sup> Iesu ghe kolomiela va, “See ia ararim ateeae?”

Ghe liula va, “Aghi Lijen,” ta oroi raroai etoa laghe tokatoka etana.

<sup>31</sup> Me laghe aipoopolia ta Iesu va ghe rau mene suu vella lao tale liu eteva karika aioghioghi etana.

<sup>32</sup> Oroieili mosu ghe tingina suesue see tale motouru. Raroai etoa laghe kookolomi esasarakananaaili ta Iesu va etau vella me la laa kupi sso ta mosu etoa, me Iesu ghe tau vellala.

<sup>33</sup> Nau eteva raroai etoa laghe kasu vulila taumattu ngateva oia, laghe kupila mosu etoa, me mosu etoa laghe aikarati velu siola tale voto ateva siosiona ia, me laghe aoso velu siola tale ateo talia ngateae, me ghe arropi ematelala.

<sup>34</sup> Lo atoa laghe aaitaraa mosu, laghe tarala vaalu isaa o voto ghe lutula. Laghe iloula tani laa kkailaa tale masaliki taatara atae, me mene kasina lutu masaliki kalakalangina.

<sup>35</sup> Me taumattu ngatoa laghe lao sio tani tara isaa o voto ghe lutula. Nau eteva laghe mae sio ta Iesu, laghe tarala taumattu ngateva ia o raroai etoa laghe kasu vuliela, ghe tokatoka ta liue kkena Iesu, ghe molu etokala, me nannaane ang ghe masinala; me laghe matautula.

<sup>36</sup> Lo atoa laghe tarala, laghe auliaala kiukiuna taumattu ngateva oia, raroai etoa etana, saa voto ghe lutula, me ghe masinala.

<sup>8:18:</sup> Mat 25:29; Luk 19:26. \* <sup>8:26:</sup> aGeresa Kasina uru ngai laghe pitila, laghe ue va aGergesa, kasina laghe ue va aGadara.

<sup>37</sup> Isaa avalua o me taumattu tale masaliki eteae eGeresa me llo masaliki kalakala etana, laghe kolomila Iesu va ekasu, poli paka nimoia ateva ghe ghaailala. Iesu ghe aikaaila tale paanaka ateva, me laghe aimonomonosiaala tani kasu.

<sup>38</sup> Taumattu ngateva raroai etoa laghe kasu vuliela, ghe aloannaaili tani usi Iesu. Iesu ghe sungi aaoghiela, me ghe uela etana va,

<sup>39</sup> “Ukiri lao tanganuemu, me ulaa ghauliaa saa voto God ghe gheleila etam.” Liuna avalua o, taumattu ngateva oia ghe lao sio tanganuena, me ghe kiukiuuala tale masaliki taatara ateaet saa voto Iesu ghe gheleila etana.

*Vause arighi matena ia me vause ateva isikina ia*

*(Mat 9:18-26; Mak 5:21-43)*

<sup>40</sup> Nau eteva Iesu ghe oghiala, taumattu ngatoa laghe souela tale nimasimasi, poli ila akapa laghe aloanna tani tarai.

<sup>41</sup> Taumattu ngateva ararina ateaet ta Jaeras, namuu ia tale ale nivelu eitaua ngateva, ghe mae sio, me ghe suuiala ta liue kkena Iesu, poli ghe aloannaaili va Iesu ghe usia, me lalu ghe lao tanganuena,

<sup>42</sup> poli kateva nonga ia natuna aliki vause ateva, anna ninamanama erooroo kasangaulu ghaluae (12), me ang ghe aainasiaa tani mate.

Nau eteva Iesu ang ghe laolao, taumattu ngatoa laghe tomtomua.

<sup>43</sup> Me vause ateva rae ateva ghe ililoueinia ghe roola kasangaulu ghaluae (12) ninamanama, ie tee elome ta taumattu ngatoa. Ghe rungiaala unna viliki veu tani ghaha naisausi,<sup>†</sup> me karika teva ghe roola tani ghelei emasinaia.

<sup>44</sup> Ghe keola emuli ta Iesu, me ghe posola euu tale sama unna aiaasae ateva Iesu, me katengaata nonga ta rae ateva ghe ruula tani ilou.

<sup>45</sup> Iesu ghe kolomila va, “See etulieghila?”

Nau eteva laghe uela va karika poi teva ghe tulielo, Pita ghe uela va, “Vau eteva, taumattu ngatoa orioieili ila, me la aikerreii tani atu etam.”

<sup>46</sup> Me karika ta Iesu ghe mene uela va, “Kateva etulieghila; aghateateaala va kasina tani sarasarakana ange kasula etagh.”

<sup>47</sup> Me vause ateva, ghe kilala va karika ghe roola tani aisulia, ghe moiela, me ghe lao sio tano suuiaa ta liue kkena Iesu. Ta mata taumattu ngatoa, ghe auliaala mausi saa, me ghe tulila Iesu, me vaalua arovaeaata nonga ta ghe masinala.

<sup>48</sup> Iesu ghe uela ta vause ateva va, “Natughu, tale unem niaikaaiia etagh angu masinala. Kasula tale luei.”

<sup>49</sup> Nau eteva Iesu ghe aippooaa, me taumattu ngateva ghe kasula tanganuena Jaeras, ia o namuu ia tale ale nivelu eitaua ngateva, ghe rekatala. Ghe uela va, “Natum vause arighi ange matela. Urou mene ghelei va emene aanaasa ta tisa ngateva.”

<sup>50</sup> Iesu ghe nongola, me ghe uela ta Jaeras va, “Urou mene matautu; unim aikaaiia, me aue emasina.”

<sup>51</sup> Nau eteva ghe rekatala tanganuena Jaeras, ghe tam aloannala righi taumattu tani usie sso elo ale, ta Pita nonga me Jeimis, Jon, me tamane me kinna aliki vause arighi, ila nonga laghe ssola.

<sup>52</sup> Taumattu ngatoa laghe ngangngala, me laghe aalousiusi teeia. Iesu ghe uela va, “Angenna ngam ngalala. Aliko vause arighi karika ematela, ta enim aseasekanua.”

<sup>53</sup> Laghe kanganielia, ta laghe kilakila va aliki vause ateva matena ia.

<sup>54</sup> Iesu ghe kune siola nimane atelange, me ghe uela va, “Aliko erighi, totula!”

<sup>55</sup> Aliko vause arighi ghe sakesakela, me arovaeaata ta ghe laa sio totu, me ghe tingina saela. Me Iesu ghe uela etaira va la tau lao righi inana, me enama.

<sup>56</sup> Tamane me kinna lalu ghe soghiaala tani tara, me Iesu ghe aulia ngakorokoronganala etairarua va lalu rou mene auliaa ta righi taumattu isaa o voto ghe lutula.

## 9

*Iesu ghe suula 12 disaepolo*

*(Mat 10:5-15; Mak 6:7-13)*

<sup>1</sup> Iesu ghe kolo aitauaala kasangaulu ghalua (12) kapuna disaepolo, me ghe taula sarasarakana me nimatuutuliena etaira tani ghaa velu raroai, me tani ghaa velu isiki ta taumattu ngatoa.

<sup>2</sup> Me ghe singulala tani laa ppooa ngaotu ararimangalina ateva God, me tani ghelei emasina tau sessa atoao.

<sup>3</sup> Ghe uela etaira va, “Am rau mene ghaa righi voto nau am kasu. Karika mene tiulu

<sup>†</sup> **8:43:** Kasina uru ngai laghe pitila, karika laghe uela va *Ghe rungiaala unna viliki veu tani ghaha naisausi.*

**8:48:**

aikkatulu tani kkatulu, teva aikaai ghinna, me righi inana me viliki veu, me karika am mene ghaha ghalua aiaasae.

<sup>4</sup> Me arova am laa toka tale lo ateva ale, am toka elaa ghaa nau am kasu vuli lo atea o masaliki.

<sup>5</sup> Me arova karika la ghaaiem, am kasu. Nau am kasu, am rariaa velu kosa ta kkeimim, me ae la kila va voto laghe gheleila karika masina.”

<sup>6</sup> Me disaepolo atoa laghe kasula tani laa ppooaa see masi inangari tale kateae kateae masaliki, me tani ghelei emasina tau sessa atoa.

*Herot ghe aloanna tani kila va Iesu tani see ia  
(Mat 14:1-12; Mak 6:14-29)*

<sup>7</sup> Gavana ngateva Herot ghe nannangaili ta ghe nongola oroieili voto Iesu ghe gheelei, poli laghe uue va Jon ang ghe mene totula tale nimate,

<sup>8</sup> me katoa laghe uue va Elaija ghe kaurekatala, me katoa laghe uue va kateva ta propete atoa emua arau ang ghe mene totula.

<sup>9</sup> Liuna avalua o me Herot ghe ue va, “Jon ngaghe auliaala me laghe sai pulela alona atiuu, me tani see ia taumattu ngateva oia, amene nonganongo uunguaane?” Me ghe aloanna tani tarai.

*Iesu ghe taula inana ta 5,000 taumattu  
(Mat 14:13-21; Mak 6:30-44; Jon 6:1-14)*

<sup>10</sup> Apostolo atoa laghe kiriaa mae sio ta Iesu, me laghe aulia ngakapala voto laghe gheleila. Ghe ghaialala, me ila nonga laghe lao sio tale masaliki taatara atea eBetsaida.

<sup>11</sup> Nau taumattu ngatoa laghe nongola va ang ghe kasula, laghe aimulila etana. Ia ghe masimasieinilala, me ghe tiauala tani ppooaa ararimangalina ateva God etaira, me ghe gheelei emasina tau sessa atoa.

<sup>12</sup> Auena sinaka ateva ghe suu, me kasangaulu ghalua (12) disaepolo laghe lao sio, me laghe uela ta Iesu va, “Sungi vellala, me la lao tale righi masaliki, o paa ngutana, tani laa poli righi inana me la nama, me la ghaso. Ta voto ateva oia ita tokatoka etana vurunganna ia.”

<sup>13</sup> Iesu ghe uela etaira va, “Am, am taula righi inana, me la nama.”

Laghe liula me laghe uela va, “Ghalima nonga verete me ghaluepai kko. Ualoanna va ami laa poli see righi aneira inana?”

<sup>14</sup> Erooro ghalima airari (5,000) taita oia ghe tokatoka.

Iesu ghe uela ta disaepolo atoa va, “Am laa ghauliaa etaira va la laa toka aitauua sio ghalimangaulu (50) taumattu ta kateae uela.”

<sup>15</sup> Disaepolo atoa laghe auliaala, me laghe toka siola tale uela.

<sup>16</sup> Iesu ghe ghaala verete ghalima me kko aluepai, me ghe taatara saela epona liu, me ghe kaili emasina saela, me ghe pirila, me ghe taula ta disaepolo atoa tani laa koita ta taumattu ngatoa.

<sup>17</sup> Laghe namala, me ila akapa laghe tuvula, me disaepolo atoa laghe kaai esokosokoiaala tapiri nginana, ghe roola kasangaulu ghaluae (12) laka.

*Pita ghe aulia ngaotula va Iesu tani see ia  
(Mat 16:13-19; Mak 8:27-29)*

<sup>18</sup> Kateva nau Iesu ghe puupure, me kapuna disaepolo atoa laghe tokatoka teeia, me ghe kolomilala va, “Taumattu ngatoa la ue va aghi tani see?”

<sup>19</sup> Laghe liula me laghe uela va, “Katoa la ue va io Jon tau ngai aasuu ia, me katoa la ue va io Elaija, me katoa la ue va io kateva ta propete atoa emua arau ang ghe mene totula.”

<sup>20</sup> Me ghe kolomilala va, “Me am, am ue va aghi see?”

Me Pita ghe liula me ghe uela va, “Io kapuna Mesaea ngateva God.”

*Iesu ghe uela va aue emate me emene totu  
(Mat 16:20-28; Mak 8:30-9:1)*

<sup>21</sup> Iesu ghe paolala va karika la mene laa ghauliaa see va ia see.

<sup>22</sup> Me ghe uela va, “Natuna ateva Taumattu ngateva aue eghaa oroieili mmarikana, me namu ngatoa, me namu ngatoa ta pristi etoa, me tau ngai aapasunga ngatoa tale inangari niipaopao, aue la liu viliira etana, me ae la uvi ematea. Me ae kotonna ateva nau, emene totu.”

<sup>23</sup> Vara me ghe uela ta kapuna disaepolo atoa va, “Arova lo ateva ealoanna tani usieghi, etani sioaa nannaane, me esunuki unna aikotoo ateva nau ekapa atoa, me eaimuli etaghi.

<sup>24</sup> Ta poli arova lo ateva eannaa nonga maamauluuaane, aue eraua. Me arova lo ateva eraua ta poli mausighi, aue esaanga.

<sup>25</sup> Me arova lo ateva eghaa voto akapaaili tale kosa ateva, me maamauluuaane ekapa, vaalua isaa o voto aue esausia?

<sup>26</sup> Arova lo ateva taumattu epalatainaghi me inangarighi eteva, aue Natuna ateva Tau-mattu ngateva epalatainia, nau eteva emae tee maamallangiaane, me maamallangiaane Tamane, me tee kapuna ensolo atoa manga ila.

<sup>27</sup> Aghaaulia ngakoronna etaimim va katoa oia etaimim am tiitingina, karika aue am mate, me aue am tara ararimangalina ateva God.”

*Vilikina Iesu ghe mene isaa ppaela*

(Mat 17:1-8; Mak 9:2-8)

<sup>28</sup> Koti ghaaoalu (8) nau ghe lange sio, nau ghe ppooala llo inangari, me ghe kolola Pita me Jon me Jeimis, me laghe saela tale motouru tani looloo sae.

<sup>29</sup> Ghe looloo sae, me taatara matane ghe isaa ppaela, ghinnanina ghe usousoanaailiila, me ghe ravaravaiteenaailiila.

<sup>30-31</sup> Vara me ghalua taumattu, Moses me Elaija, lalu ghe kaurekatila tale mallanginaane ateva God, me lalu ghe samasama tee Iesu. Lalu ghe aauliaa saa llo voto aue elutu etana eJerusalem, me vaalua aue ekasu vuli kosa ateva oia.

<sup>32</sup> Matana Pita me mene ghalua tana kapuna ghe maamatana tani asekanu. Me nau laghe totula, laghe tarala mallanga ateva ta matana Iesu, me mene ghalua lalu ghe tiitingina teeia.

<sup>33</sup> Me nau lalu ghe aloanna tani kasu vuli Iesu, me Pita ghe uela ta Iesu va, “Vau eteva, masina ta ngeita tokala oia, me angatolu atulu ale paapali kotolu, kateva alem ia, me kateva alena ia Moses, me kateva Elaija.” Pita ghe auliaala isaa o inangari, me karika ghe kilakila sa ateva ghe aaulieinia.

<sup>34</sup> Nau Pita ghe aauliaa isaa o inangari, me urukookoo ateva ghe akoulala, me ngilotolu ghe maamatautu.

<sup>35</sup> Lingi ngalo ateva ghe mae sio tale urukookoo ateva, ghe uela va, “Ia o taita ateva natughu ia, ngaghe suitoongainiela. Am nongoa.”

<sup>36</sup> Nau lingi ngalo eteva ghe ruula, me laghe tara nongala Iesu. Nau laghe oghi sio mae, karika laghe auliaa poila ta mene toa tale voto laghe tarala.

*Iesu ghe ghelei emasinala taita arighi  
raroai eteva ghe tokatoka etana*

(Mat 17:14-18; Mak 9:14-27)

<sup>37</sup> Ghe paila ta mene kateva nau, nau eteva laghe sio mae tale motouru eteva, me laghe tarala oroieli taumattu ngatoo, laghe mae sio tani sou Iesu.

<sup>38</sup> Kateva etaira ghe samala me ghe uela va, “Tisa! Mae tara natughu eteva, ta kateva nonga natughu, me ughelei emasinaia.

<sup>39</sup> Nau eteva raroai eteva ekupikupia, esamasama anamungaili, me egheeleia eoo, me usouso paane eghoa, me egheelei saasakiaa vilikina, me karika poi ekasukasu vuli parasia.

<sup>40</sup> Anim auliaa poila ta kapum disaepolo atoa tani ghaa velu raroai eteva, me karika la roola.”

<sup>41</sup> Iesu ghe liula me ghe uela va, “Am lo ateva oia vituu, karika righi uneimim niaiesoaa, nannaaimim me gheeleiaaimim karika ghulughuluena. Ghaisaata aue atoka teeiem, me ghaisaata aue asau sesa gheeleiaaimim? Ghaa mae natum ateva.”

<sup>42</sup> Nau aliki eteva ghe maemae, me raroai eteva ghe sau velu elokoie siola tapaa kosa, me ghe tiauala tani oo. Iesu ghe paola raroai eteva, me ghe ghelei emasinala aliki eteva, me ghe tuela tara tamana.

<sup>43</sup> Ila akapa taumattu ngatoa laghe soghiala tani tara sarasarakaniaane God.

*Ghaluene Iesu ghe uela va aue emate*

(Mat 17:22-23; Mak 9:30-32)

Taumattu ngakapa atoa laghe nannangaili isaa akapa voto Iesu ghe gheleila, me Iesu ghe uela ta kapuna disaepolo atoa va,

<sup>44</sup> “Am nongo amasina sa ateva aghaaulieinia ta ngetaimim, va Natuna ateva Taumattu ngateva aue la taeu lao ta nimaira taumattu ngatoa.”

<sup>45</sup> Karika laghe alomasaanga teela malloeianina inangari Iesu ghe auliaala, ta malloeiana ghe aaisulia etaira. Laghe maamatautu tani kolomia.

*See aue enamuu?**(Mat 18:1-5; Mak 9:33-37)*

<sup>46</sup> Kateva nau, laghe aaissakeana va tani see aue enamuu etaira.

<sup>47</sup> Iesu ghe kilala nannaaira, liuna avalua o me ghe ghaala aliki erighi, me ghe mae atingina valainie sio etana.

<sup>48</sup> Vara me ghe uela etaira va, "See umasimasi tani aikoloaa aliki etoa tale ararighi eteae, ughaaghhaa teeieghi, me ughaaghhaa tee lo ateva ghe sungieghila. See etaimim esio euu, ia namuu ia etaimim."

*See karika tau ngai ssateeimim ia,  
kapuimim ia**(Mak 9:38-40)*

<sup>49</sup> Jon ghe liula me ghe uela va, "Vau eteva, ami ghe tarala taumattu ngateva, ghe sungi vella raroai etoa tale ararim atea, me ami ghe tootoonga tani pao rungainia, poli karika va eusiusita."

<sup>50</sup> Iesu ghe uela va, "Am rau mene paoa, ta lo ateva karika esessa teeita, kapuita ia."

*ASameria ngatoa karika laghe aloanna va Iesu ghe lao tanganueira*

<sup>51</sup> Nauna Iesu ang ghe aakalakalangina tani sae epona liu, me ghe annaaili tani sae ejerusalem.

<sup>52</sup> Ghe sungi emuemuela katoa kapuna tani laa ghaimanomanosieinila tale kateae masalikiira aSameria ngatoa.

<sup>53</sup> Karika laghe aloanna tani aikoloainia, ta poli ghe aloanna tani sae ejerusalem.

<sup>54</sup> Disaepolo alua ta Jeimis me Jon, lalu ghe tarala ta laghe ghelei evaluela o, me lalu ghe kolomila Iesu va, "Vau eteva, ualoanna va ami kolo sae kura atea epona liu, me esio ataila?"\*

<sup>55</sup> Iesu ghe kiriela, me ghe paolaluelu,<sup>†</sup>

<sup>56</sup> me laghe mene lao sio ta mene kateae masaliki.

*Iesu ghe auliaala vaalua tani aimuli teeia**(Mat 8:19-22)*

<sup>57</sup> Nau laghe kasukasu elaoelao tapaa salana, kateva taumattu ghe uela ta Iesu va, "Aghaloanna tani usio nongina eaa ulao."

<sup>58</sup> Iesu ghe liula me ghe uela va, "Paua nge tapaa tuvui etoa tue liuira, me ghila atoa aleira, me Natuna ateva Taumattu ngateva karika teva alena tani laa ghasekanua etana."

<sup>59</sup> Me ghe uela ta mene kateva taumattu va, "Mae usieghi."

Me taumattu ngateva ghe liula me ghe uela va, "Vau eteva, utau velueghi mua, me alaa kaiaa tamaghi."

<sup>60</sup> Iesu ghe uela etana va, "Utau vella matena atoa la laa kaiaa matena atoa. Me ukasu, me ulaa ghaluiaa see ararimangalina ateva God."

<sup>61</sup> Kateva ghe uela ta Iesu va, "Aghi aghaloanna tani usio, me utau velueghi mua, me alaa ghakorova kapughu etoa tanganueghi."

<sup>62</sup> Iesu ghe liula me ghe uela etana va, "Arova teva taumattu eoseose me etaatara lao emuli, karika erooroo tani uuungu tale ararimangalina ateva God."

**10***Iesu ghe suula 72*

<sup>1</sup> Emulina tale isaa o voto, Vau eteva ghe mene suoiongaala ghaftungaulu ghalua (72),\* me ghe sungi emuemueilala ghalua ghalua ta ngetaira, tani lao akapa see tale masaliki taatara, me tale masaliki auena ghe lao etana.

<sup>2</sup> Ghe uela ta ngetaira va, "Utana atingiu ang ghele matuela, me tau ngai uuungu etoa karika oroi ila. Liuna avalua o, am kolomi sae Vau tale tau ngai mukemuke ateva, va emene sungi toa tau ngai mukemuke, tani lao tale utana atingiu matuenna ia."

<sup>3</sup> Am kasula! Asungsungiem nongina natu sipsipi etoa la tiitingina tee sesa paua ngetapaa tuvui etoa.

**9:46:** Luk 22:24.    **9:48:** Mat 10:40.    **9:50:** Mat 12:30; Luk 11:23.    **9:54:** 2 Ki 1:9-16.    \* **9:54:** Kasina uru ngai laghe pitila, laghe uela va Vau eteva, ualoanna va ami kolo sae kura atea epona liu, me esio ataila, nongina Elaja ghe gheleila? Utara 2 Kingi etoa 1:10-12.    † **9:55:** Kasina uru ngai laghe pitila, laghe uela va me ghe uela etairarua va, "Karika amalu kilakila saa spiriti eteva etoka etaimalua." **56** Natuna ateva Taumattu ngateva karika ghe sio mae tani uvii emate taumattu, ta tani asaangila."    **9:61:** 1 Ki 19:20.    **10:1:** Mak 6:7.    \* **10:1:** Kasina uru ngai laghe pitila laghe uela va, ghaftungaulu (70).    **10:2:** Mat 9:37-38; Jon 4:35.    **10:3:** Mat 10:16.

<sup>4</sup> Karika am mene ghaa aikaa viliki veu, aikaaai ghinna, o aiaasae tale keke. Karika am mene tingina aippooaa elao lao etapaa salana.

<sup>5</sup> "Nau am kipi sso tale ale ateva, am ue akasina va, 'Luei etoka tale ale ateva oia.'

<sup>6</sup> Marova teva taumattu tale luei etokatoka, kaluimim luei aue easo ta ngetana; marova karika, aue luei eteva eoghi atu ta ngetaimim.

<sup>7</sup> Am tokia tale ia o ale ateva, marova la tau aatu inana me manu, am ghaa, poli emaamasina va tau ngai uungu eteva eghaa aipolipoli tale uunguaane egheelei. Karika am mene kasu ekapa see tale ale atoa.

<sup>8</sup> "Nau am lao tale masaliki taatara me la ghaa iem, am nama inana la tau aatu.

<sup>9</sup> Am ghelei emasina tau sessa atoa, me am ue ta ngetaira va, 'Ararimangalina ateva God ange kalakalanginala etaimim.'

<sup>10</sup> Me marova am sso tale masaliki taatara, me la ratiem, am lao tale tummatavanga, me am ue va,

<sup>11</sup> 'Kosa tale masalikiimim etokatoka tale kkengalua, ngangalu raarariaa velu poli ngam ratien galuelua. Me am kila isaa oia voto: Ararimangalina ateva God ange aakalakalaala.'

<sup>12</sup> Aghaauliaa ta ngetaimim va, aue nau niaiskei eteva, God aue eapasunga maomaona nimmarikana tale masaliki eteae eSodom, me sesaaili tale lo atae oia masaliki!

*Nialousiusi ta lo atoa masaliki taatara  
karika la nanna ngaioghioghiaa*

(Mat 11:20-24)

<sup>13</sup> "Aue esesaaili ta ngetam, Korasin! Aue esesaaili tee ta ngetam, Betsaida! Marova mirikolo oia laghe gheleila eTaer me eSaedon, taumattu ngatoa aue laghe molu tale ghinna nialousiusi me au kura, tani apasunga va ngila ghe oghi vulula sesa gheeleiaira.

<sup>14</sup> Aue emaomaona nimmarikana ta eTaer me eSaedon tale nau niaiskei eteva, me am karika.

<sup>15</sup> Me io, Kapanium, uannaa va aue usae epona? Karika, io aue usioaili euu.

<sup>16</sup> "See enongongoam, enongongoaghi; me see eratiem, eratiratieggi, me see eratiratieggi, eratirati lo ateva ghe sungieghila."

<sup>17</sup> Kasina nau ghe lange sio, me ghaitungaulu ghalua (72)<sup>†</sup> taumattu, laghe oghi mae sio tee nimasimasi, me laghe uela va, "Vau eteva, raroai etoa tee laghe nonganongo usilainamami, nau ami ghe aauliaa voto tale ararim atae."

<sup>18</sup> Ege liula me ghe uela va, "Aghe tarala Satana ghe katuula nongina ravaravaia ateva ghe sio mae epona liu.

<sup>19</sup> Ngaghe tau aatu sio sarasarakanan tani asa katuu me onioni, me tani apala tau ngai ssateem ateva; karika righi voto aue eghelei saasakieinam.

<sup>20</sup> Karika am mene masimasi va raroai etoa la nonganongo usilainam, ta am masimasi va arariimim laghe piti elokoila epona liu."

*Iesu ghe masimasi*

(Mat 11:25-27; 13:16-17)

<sup>21</sup> Tale ia o nau eteva, Iesu ghe pasula tale nimasimasi kanna Spirit Manga ateva, me ghe uela va, "Atautauo sae, Tamagh, Vau ngepona liu io me kosa ateva, poli ughe aisuliaala isaa oia voto ta tau ngalamasaanga atoa, me angu aotuotula ta natum natu aliki etoa. Ue Tamagh, ugheelei isaa o voto tani aimuli tee masi aaloannaam.

<sup>22</sup> "Tamagh ang ghe tau mae sio isaa akapa voto oia etaghi. Karika teva ekilakila va see ia Natuna, Tamane nonga; me karika teva ekilakila va see ia Tamane, Natuna nonga, me lo atoa Natuna ghe suitoongainilala, me ghe apasungaala Tamane etaira."

<sup>23</sup> Eghe kiriela me ghe aulia ngainaola ta kapuna disaepolo atoa va, "Niarangise tale lo atoa taumattu la taatara voto am taatara.

<sup>24</sup> Aghaauliaa ta ngetaimim va oroeili propete atoa me kingi etoa laghe aaloanna tani tara voto am taatara ghaine, me karika laghe tarala, me laghe aaloanna tani nongo voto am nonganongo ghaine, me karika laghe nongola!"

*Kiukiu niaimatoongana ta masi taumattu nge Sameria ngateva*

<sup>25</sup> Kateva nau, kateva taumattu, muennaaili ia tale inangari nipaopao, ghe tingina saela tani tootoonga Iesu tale kateva nikokkolomi. Ghe uela va, "Tisa, sa ateva agheleia tani ghaa maulue ateva tokatoka liu ia?"

**10:4:** Mat 10:7-14; Mak 6:8-11; Luk 9:3-5.    **10:7:** 1 Ko 9:6-14; 1 Tim 5:18.    **10:8:** 1 Ko 10:27.    **10:11:** Apos 13:51;

18:6.    **10:12:** Aitiuti 19:24-25; Mat 10:15; 11:24.    **10:16:** Mat 10:40; Luk 9:48; Jon 5:23.    <sup>†</sup> **10:17:** Kasina uru ngai laghe pitila laghe uela va, *ghaitungaulu* (70).    **10:18:** Jon 12:31; Aotu 12:8-9.    **10:19:** Sams 91:13; Mak 16:18.

**10:20:** Plp 4:3; Aotu 3:5.    **10:22:** Jon 3:35; 10:15.    **10:25:** Mat 22:35-40; Luk 18:18.

<sup>26</sup> Iesu ghe liula me ghe uela va, “Sa ateva laghe pitiela tale inangari nipaopao? Saa kilakilaam ta ngetana?”

<sup>27</sup> Eghe liula me ghe uela va, “Uaielousiaa Vaum ateva kapum Goto ia tale urunguitanim ateva, me tale maamaauluaam, me tale sarasarakaniaam, me tale nannaam; me uaielousiaa tee taumattu ngateva kalakalangina ia etam, nongina uaielousieinio.”

<sup>28</sup> Iesu ghe liula me ghe uela va, “Inangari angu liula koronnaaili; ughelei isaa o voto, me aue utoka.”

<sup>29</sup> Eghe aloanna tani apasunga va ia ghulughuluena ia, me ghe kolomila Iesu va, “See ia taumattu ngateva kalakalangina ia etaghii?”

<sup>30</sup> Iesu ghe liula me ghe uela va, “Kateva taumattu ghe kasula eJerusalem tani sio ejeriko, me tau niainao atoa laghe uviela. Laghe ghaa velu ekapala ghinnanina, laghe uviela, me laghe kasu vuli elokoielo, me ghaisa ngarighi ghe mate.

<sup>31</sup> Pristi eteva ghe usilaala ie nonga o salana atikirighi. Nau ghe tarala taumattu ngateva uvivina ia, ghe keoa ngalokoielo, me ghe kasula.

<sup>32</sup> Tee me Livae ateva, nau eteva ghe mae sio tale ia o voto ateva taumattu ngateva ghe asoaso etana, ghe taraiela, me ghe keoa ngalokoielo.

<sup>33</sup> Vara me taumattu nge Sameria ngateva, ie tee ghe usilaala ia o salana atikirighi. Ghe mae sio nongina taumattu ngateva ghe asoaso; nau ghe taraiela, ghe alousiusi teeelia.

<sup>34</sup> Ghe lao akalakalaa sio ta ngetana, me ghe kaola oeli me uaeni ta vilikina, me usaina, me ghe ghiisila. Ghe sau etokae saela tale kienan donki eteva,<sup>‡</sup> me ghe laoainie sio tale ale aiaosoatoa me ghe aitarainiela.

<sup>35</sup> Elue talaua, ghe tau lao sio ghaluevilau viliki veu ta tau ngai toitoi eteva, me ghe uela va, ‘Uitarainia, me marova uitarainia tee tale mene righi peim, aue amae aliu voto akapa ughe gheleila ta ngetana.’

<sup>36</sup> “See ta ngetairotolu uannaa va ia kalakalangina ia ta taumattu ngateva, tau niainao atoa laghe uviela?”

<sup>37</sup> Tau ngalomasaanga ateva tale inangari nipaopao ghe liula me ghe uela va, “Ia o taumattu ngateva ghe alousiusi teeelia.”

Iesu ghe uela va, “Lao sio, me ughelei nongina ia o taumattu ngateva ghe gheleila.”

### *Iesu tanganue Mata me Meri*

<sup>38</sup> Nau Iesu me kapuna disaepolo atoa laghe kasukasu elaolao, me laghe rekatala tale masalikiteeae. Vause ateva, ararina ateeae ta Mata, ghe kolola lao sio tanganuena.

<sup>39</sup> Nengana vause ateva, ararina ateeae ta Meri, ghe toka siola ta liue kkena Vau eteva, tani nongoa ta ghe aaippooaa.

<sup>40</sup> Mata ghe aaivengevengesi, poli ia nonga ghe aaimonomonosiaa inana. Ghe mae sio, me ghe uela va, “Vau eteva, emamasina va aghi nonga aghaimonomonosiaa inana, me nengahii enim tokatoka? Auliaala, me emae sausieghii!”

<sup>41</sup> Vau eteva ghe liula me ghe uela va, “Mata, Mata, unannaa oroieli voto,

<sup>42</sup> me kateva nonga voto ateva ualoannaia, me karika ia etam. Meri ange aloannala ia o voto ateva masina ia, me karika aue aghaa velua etana.”

## 11

### *Iesu ghe apasungaala vaalua tani looloo sae (Mat 6:9-15; 7:7-11)*

<sup>1</sup> Kateva nau Iesu ghe looloo sae tale kateva voto, me nau ghe ruula, kateva kapuna disaepolo ghe uela etana va, “Vau eteva, uapasunga etaimami vaalua tani looloo sae, nongina Jon ghe apasunga ta kapuna disaepolo atoa.”

<sup>2</sup> Iesu ghe uela etaira va, “Nau am looloo sae, am looloo sae avalua toko va, “Tamamami,

usausiemami tani oneoneaa ararim ateeae va manga ia, ami aloanna va ararimangalim ateva esio.

<sup>3</sup> Utau rooroaa mae anemami inana tale kateva kateva nau.

<sup>4</sup> Me ukkaluaa kaluimami ssavoto,

nongina ami kakkalaua lo akapa atoa la gheelei sesa voto etaimami, me urau mene tau veluemami va ami lao tale nitootoonga.”

<sup>5</sup> Iesu ghe mene uela etaira va, “Arova teva kapum ghele mae rekataa etam elomatuua voo, me ughelei laa kolomi mene teva kapum va, ‘Aghaloanna va utau mae verete kotolu,

<sup>6</sup> poli kapughu eteva ekasu emasaula, me ange mae sio tanganueghi, me karikaaili righi inana etaghi va atau lao.'

<sup>7</sup> "Arova kapum ateva ghele liu etam va, 'Urau mene angunainaghi. Anga kavatila atamana atae. Aghi me natughu etoa angami asekanuela. Atam rooroo tani totu va atau aatu voto ualoanna.'

<sup>8</sup> Agaauliaa etaimim va karika aue ghele totu me ghele tau aatu verete, me poli unurrekana tani toka kookolomia, aue ghele totu, me ghele tau aatu voto akapaaili ualoanna, poli karika upaapalata tani toka kookolomi nau ekapa atoa.

<sup>9</sup> "Aghaauliaa etaimim va am kolomi, me aue etaau aatu, me am pae, aue am tara, me am mirimiri, aue atamana atae eotia.

<sup>10</sup> Lo atoa la kookolomi, la ghaaghha, me lo atoa la paepae, la taatara, me atamana eotioti ta lo atoa la mirimiri.

<sup>11</sup> "Arova teva natum eloolo teva kko, aue ughele taula teva katuu etana?

<sup>12</sup> O arova ghele loo teva otolu ghila, aue ughele tau lao teva onioni?

<sup>13</sup> Am arova sesa gheegheleiaaimim, me am kilakila tani tau lao masi voto ta natuimim atoa, aue Tamaimim ateva epona liu aue etaau sio Spirit Manga ateva ororiaata ta lo atoa la kookolomia."

### *Iesu me Belsibul*

(Mat 12:22-30; Mak 3:20-27)

<sup>14</sup> Iesu ghe tiu vella raroai eteva tale taumattu ngateva ghe gheeleia me taumattu ngateva ghe tam samasama. Nau raroai eteva ghe kupi vulu ghoala taumattu ngateva, me ghe tiuuala tani sama, orioeili taumattu ngatoo laghe soghiaala ia o voto ateva Iesu ghe gheeleiela.

<sup>15</sup> Me katoa laghe ue va, "Etiutiu velu raroai etoa tale sarasarakaniaane Belsibul, kapuira namuu ia raroai etoa."

<sup>16</sup> Me katoa laghe nim anna tani tootoonga Iesu. Laghe kookolomia tale righi aimatootoongana ngepona liu.

<sup>17</sup> Me Iesu ghe kilakila nannaaira, me ghe uela etaira va, "Lo ateva ararimangali eaaipola, karika aue etoka liu, me lo ateva pamili eaaipola aue ila tee la ghaftiuua.

<sup>18</sup> Arova ararimangalina ateva Satana egħalvevilu ia, vaalua aue etingina aitauua? Agaauliaa etaimim poli am ue va atiutiu velu raroai tale sarasarakaniaane Belsibul.

<sup>19</sup> Me arova atiutiu velu raroai tale ararina atee Belsibul, kapuim atoa tani taumattu laghe tiutiu velu raroai tale ararina atee see? Ila aue la ghele auliaa va inangari am auliaa kamena.

<sup>20</sup> Ta poli arova atiutiu velu ta nimane God, eaapasunga va ararimangalina ateva God ang ghe sio mae ta ngetaimim.

<sup>21</sup> "Nau eteva lo ateva taumattu sarasarakania ia, me eposoposo ghinna niaiuvi, aue eaitara ngamasina alena ateva, me ghinnanina aue etoka amasina.

<sup>22</sup> Me arova sarasarakanaili eteva taumattu emae tee ghinna niaiuvi, aue euvia, me eghaa velu ekapa ghinna niaiuvi me eakoita peina ta mene katoa taumattu.

<sup>23</sup> "Lo ateva karika kapughu ia, tau ngai ssateeghi ia, me lo ateva karika esaasausieghi tani atoka aitauua, ia etani aatoka apolapola.

### *Sesa spiriti eteva ghe mene oghi mae sio*

(Mat 12:43-45)

<sup>24</sup> "Nau sesa spiriti eteva ekasukasu vuli taumattu ngateva, ekasukasu ekapa see tale voto mallangona, epaepae teva voto aue eainoana etana. Va etam rooroo tani tara teva voto tani ainoana, ange ue va, 'Amene oghi lao tale ale ateva aghe tokatoka etana.'

<sup>25</sup> Nau ange laa rekataa sio va ange tarala alena ateva raarangisana ia, me elome masina tani toka etana,

<sup>26</sup> liuna avalua o me aue emene kasu tani laa kolo ghaitu (7) sesa spiriti gheeleiaair aue sesaaili. Me aue la kupi sso, me la sso toka tale ale ateva. Gheeleiaane taumattu ngateva esesaaili, elaulau llo gheeleiaane akasina."

### *Niarangise koronna*

<sup>27</sup> Nau Iesu ghe aippooaa, me vause ateva ghe tokatoka teeila ghe sama anamuula, me ghe uela ta Iesu va, "Niarangise etokatoka ta lo ateva vause ghe kaaiola, me ghe ssuula."

<sup>28</sup> Iesu ghe liula me ghe uela va, "Koronnaaili inangarim, me kinatama niarangise ta lo atoa la nongonongo me la uusilaa inangarina God."

### *Laghe kolomila niaimatoonga ngateva*

<sup>29</sup> Nau taumattu ngatoa ghe ooroi, Iesu ghe uela va, “Lo ateva oia vituu, karika va masi taumattu ngam, ta am anna nonga tani taro niaimatoonga. Saa ghe lutu teela Jona, ie nonga o niaimatootoongana ateva aue elutu.

<sup>30</sup> Nongina emua arau ta nau Jona, ia ghe aimatootoongana ta taumattu nge Ninive, aue enongina Natuna ateva Taumattu ngateva tale lo ateva oia vituu.

<sup>31</sup> Tale nau niaiskei, aue Kuin nge Saot ateva etingina tee lo ateva oia vituu, me aue eue va sesa am, poli Kuin ateva ghe kasu emasaueilila tani mae nongo alomasaanganiaane Solomon, me lo ateva taumattu namuu ia ta Solomon ange toka teeimla.

<sup>32</sup> Aue taumattu nge Ninive atoa la tingina tale niaiskei eitauaa teeiem, me la ue va sesa am, poli aNinive atoa laghe nna ngaioghioghiaala, nau Jona ghe poppooaa etaira, me ia oia, lo ateva namuu ia ta Jona ange toka teeimla.

### *Mallanga*

(Mat 5:15; 6:22-23)

<sup>33</sup> “Karika teva eaarokoti kuraane lam atea va eaatoka aisulieinia, o eaakou rungainia tale teva aikai manu,\* ta eaatokiae sae epona tale aitiitinginane ateva, me nau taumattu ngatoa la kupi sso, aue la rororo tani taro mallangina ateva.

<sup>34</sup> Matam alua emamallangi vilikim. Arova matam va masina, vilikim akapaaili aue epasu tale mallanga ateva, va nau matam nge sesala, isaa akapa vilikim aue saurromiema.

<sup>35</sup> Liuna avalua o me ukaarasi tani aimonomonosiaa, poli mallanga ateva etam karika va saurrom ia.

<sup>36</sup> Liuna avalua o me arova vilikim akapaaili emallanga me karika mene teva tuku vilikim saurromiema, isaa akapaaili aue emallanga, nonginaaili lam atea emamallanga etam.”

### *Ghaonomo voto sesaaili*

(Mat 23:1-36; Mak 12:38-40; Luk 20:45-47)

<sup>37</sup> Nau Iesu ghe ruula tani aippooaa, me kateva Paresi ghe koloala tani laa namanama tananuena. Iesu ghe usiela me ghe lao sio tale tevoo ateva tani namanama.

<sup>38</sup> Paresi eteva ghe soghiaala tani taro va Iesu ghe tam pora akasinala nimana, nongina gheeleiaaira Paresi etoa, me ghe nim namanama.

<sup>39</sup> Me Vau eteva ghe uela etana va, “Am Paresi etoa, am porapora araarrangisana uneimim kapa me pelete eleka, me elome etaimim kuruuetuna am, me sesaaili iem.

<sup>40</sup> Am alo kapakapa am! Am tam kilakila va lo ateva ghe gheleila eleka ghe ghelei teela elome?

<sup>41</sup> Me am taula saa llo voto elome tale uneimim aikakkai ta lo atoa karika peiira, me aue isaa akapaaili voto aue eraarrangisana etaimim.

<sup>42</sup> “Aue esesaaili etaimim Paresi etoa, poli am tautau lao aiaasokolo tale lutu voto ghaunaaili am ghaaghaa eutana, me am kakkaluaa tani ghelei voto ghulughuluena me tani aielousiaa ‘God. Am ghelei ekapa voto tani ghelei ghulughuluena voto, me tani aielousiaa God, me tee tani taula aiaasokolo.

<sup>43</sup> “Aue esesaaili etaimim Paresi etoa, poli am tani aloannaaili aitokatoka ngemua tale ale nivelu etiaauaa, me am aloanna va taumattu ngatoa la souem me la ue va, ‘Elue talaua’ me ‘Elo sinaka’ etaimim tale maketi.

<sup>44</sup> “Aue esesaaili etaimim, ta am nongina liu niaikkaia ngateva taumattu ngatoa la kasukasua saoaa etana, me la tam kilakila va liu niaikkaia ia.”

<sup>45</sup> Kateva tau ngai aapasunga tale inangari nipaopao ghe liula, me ghe uela va, “Tisa, nau eteva uaauliaa isaa oia voto, uaauliaa teeiemami.”

<sup>46</sup> Iesu ghe liula me ghe uela va, “Am tau ngai aapasunga iem tale inangari nipaopao, aue esesaaili etaimim, poli inangariimim aanasaaili tale taumattu ngatoa tani aimuli tee, nongina am aatoka sae voto maamatanaaili ta katoa, me karika la rororo tani sau, me karika am saasausila.

<sup>47</sup> “Aue esesaaili etaimim ta am atuutulu atu niaimatoonga tale liu niaikkaiaaira propete atoa, tuvuim atoa laghe uvi ematelala.

<sup>48</sup> Am uaaulia ngaotu va am masimasiaa saa voto tuvuim atoa laghe gheleila nau laghe uvi ematelala propete atoa. Liuna avalua o me am atuutulu atu niaimatoonga tale pongasovuira.

<sup>49</sup> Liuna avalua o me tale aalomasaanganiaane God ghe uela va, ‘Aue asungi tau lao propete atoa me apostolo atoa, katoa aue la uvi saasakieinila, me katoa aue la uvi ematela.’

<sup>50</sup> Liuna avalua o me lo ateva oia vituu, aue la ghaa sesa ngaipolipoli mausi propete akapa atoa laghe uvi ematelala emua arau, tale aitiutiui tale kosa ateva,

<sup>51</sup> ghe tiauala ta matemateaane Eibol, me ghe mae sio ta Sekaraea, laghe uvi emateala tale mallome liu nighelei aiaavusuvusuena me tale rum manga atiulu. Aghaaulia ngakoronnaaili etaimim va lo ateva oia vituu aue eghaa sesa aipolipoli.

<sup>52</sup> “Aue esesaaili etaimim lo atoa alomasaangaaili iem tale inangari nipaopao, poli am ghe ghaa vella kii eteva tani ghaa alomasaanga, me am, karika am sosso, me lo atoa vara la kupi sso, am gheelei rungaininga.”

<sup>53</sup> Me nau Iesu ghe kasu vulila ia o voto ateva me Paresi etoa me tau ngai aapasunga ngatoa tale inangari nipaopao laghe sessaileiilala, me laghe kookolomi oroeiili nikokkolomi.

<sup>54</sup> Laghe sassaia tani nongo va ghe auliaa righi sesa inangari.

## 12

### *Am paniem tale gheeleiaira usimaghalua atoa*

<sup>1</sup> Nau eteva oroi airari taumattu laghe mae aitauaa sio, laghe aisiriki tani tara, me Iesu ghe tiaua ngakasinala tani aippooaa tee kapuna disaepolo atoa. Ghe uela va, “Am taatara amasina tale uneira isti Paresi etoa, usimaghalue ia.

<sup>2</sup> Karika righi voto am aaifuttua va aue etam otu, isaa akapa voto pei nialisilia, aue la kila.

<sup>3</sup> Liuna avalua o, me voto ngam auliaala tale voo ngateva aue la nongo ellaa, me voto ngam aulia ngaghaunala tale paa ngaleimim, aue la aulia ngaotu tale tummatavanga.

### *God nonga ita matautainia*

(Mat 10:28-31)

<sup>4</sup> “Aghaauliaa etaimim, kapughu etoa, am rau mene matauta lo atoa la uvi emateam, poli auena karika mene righi uunguaaira etaimim.

<sup>5</sup> Aue aghapasunga lo ateva am matautainia. Am matauta lo ateva matuutulienia ia tani uvi emate taumattu, me tani sau velula sae tale Gehenna. Aghaauliaa etaimim va am matautainia!

<sup>6</sup> God karika erooroo tani aikkaluaa kateva ta ghalima natu ghila aipoliira erooroo ghaluevilau viliki veu.

<sup>7</sup> Ekilakila ghaisa uu ngurum tale urum ateva. Urau mene matautu, ta maamauluaam namungaili ta matane God, elaulau ghila atoa.

### *Aulia ngaotu Iesu ta taumattu ngatoa*

(Mat 10:32-33; 12:32; 10:19-20)

<sup>8</sup> “Aghaauliaa etaimim, va lo ateva eaulia ngaotu ta taumattu ngatoa va kapughi ia, aue Natuna ateva Taumattu ngateva eaulia ngaotua ta kapuna ensolo atoa God va ia kapuna ia.

<sup>9</sup> Lo ateva taumattu eue va karika ekilakilaieghi, aue aghaauliaa ta kapuna ensolo atoa God va karika akilakilaia.

<sup>10</sup> Me lo atoa la auliaa tee Natuna ateva Taumattu ngateva, aue God ekkaluaa. Me lo atoa la auliaa saasakiaa tee Spirit Manga ateva, God karika aue ekkaluaa.

<sup>11</sup> “Nau eteva la ssoainiem tale liu niaisakei, emua ta namu ngatoa me taumattu matuutulienia, am rau mene matautu tani nnaa va, ‘Vaalua ami liu inangari, me sa ateva ami aulieinia?’

<sup>12</sup> ta Spirit Manga ateva, tale ia o nau eteva, aue eapasunga sa ateva aue am aulieinia.”

### *Kiukiu niaimatoongana tale tau peipeiena ateva alo kapakapa ia*

<sup>13</sup> Kateva elome tale taumattu ngatoa ghe uela etana va, “Tisa, uauliaa ta tueghi eteva me eakoita peina tamaingalua etaingalua.”

<sup>14</sup> Iesu ghe liula va, “See ghe uela va aghi aghelei niaisakei, me akoita voto etaimalua?”

<sup>15</sup> Vara me ghe uela etaira va, “Am taatara amasina, me am tingina akorokorongan. Am rau mene raungaa peiimim, poli karika aue am ghaa maulue ateva tale peiimim.”

<sup>16</sup> Me ghe auliaala kiukiu niaimatoongana ataeae etaira va, “Kateva taita tue peipeiena ia, kosane ateva ghe apinosala oroeiili masi inana atoa tale kateae ninamanama.

<sup>17</sup> Ghe nannaa va, ‘Sa ateva agheleia? Karika teva ale tani atoka aitauaa aneghi inana.’

<sup>18</sup> "Vara me ghe uela va, 'Aghelei evalua toko, va arruti aleghi ale nginana atoa, me amene atulu righi namuu, me aghatoka aitauaa sso aneghi inana me peighi.

<sup>19</sup> Me aghauliaa etaghi va, "Aghi ngaghaala oroieili masi voto atoa, aue la toka oroi ninamanama. Aghainoana, anamanama, aropi, me amasimasi."

<sup>20</sup> "God ghe uela etana va, 'Alo kapakapa ateva! Ghaine eleivoo aghaa velu maamaulu-aam, me see eghaa voto ughe aimonomonosiaala?"

<sup>21</sup> "Aue enongina avalua o tale tue peipeiena atoa la ghaaghaa oroieili voto, me karika la nannaa God."

*Am rau mene ghelei nannaaimim va ekatuu  
(Mat 6:19-21, 25-34)*

<sup>22</sup> Vara me Iesu ghe uela ta kapuna disaepolo atoa va, "Liuna avalua o, me aghaauliaa etaimim va, am rau mene annaa maamauluaimim me am ue va, 'Sa ateva ami namaia,' me am rau mene annaa vilikiimim, me am ue va, 'Sa ateva ami asaea?'

<sup>23</sup> Karika am kilakila va maulue ateva namuu ia ta matana God, me inana isaa euu, me vilikiimim isaa epona, me aiaasae isaa euu?

<sup>24</sup> Am tara ghila atoa. Karika la pasapasa, me karika la mukemuke, me karika righi aleira tani atoka aneira inana, ta God eangiinginila. Am taumattu ngatoa namuu iem ta matana God.

<sup>25</sup> See etaimim enannangaili erooroo tani ghelei maamauluane emene toka tee lao? Karika poi!

<sup>26</sup> Ta poli karika am rooroo tani ghelei isaa o lutu voto, vaalua me am nannaa mene kasina voto?

<sup>27</sup> "Am tara vaalua palaoa ngatoa la piipinosa. Karika la uungu aanasa tani ghaa peiira. Aghaauliaa etaimim va molumoluane Solomon masinaaili, me palaoa ngatoa, la laulau molumoluane Solomon.

<sup>28</sup> God eaamolumolu evalua o rarrasa atoa, la piipinosa ghaine, me niimanaa la taula sae tale kura atea. Am rooroo tani aikaaiaa va aue eaamolumolu evalueiem tee o, ghauna uneimim niaakaiaa.

<sup>29</sup> Karika am mene atoka nannaaimim va sa ateva am namaia, me sa ateva am ropia. Am rau mene nnaa isaa o voto.

<sup>30</sup> Ta poli taumattu tale kosa ateva la iilou paepae isaa o voto, me Tamaimim epona liu ekilakila va sa ateva am tuutukuna etana.

<sup>31</sup> Am pae ararimangalina ateva God, me aue etau aatu isaa o voto etaimim.

<sup>32</sup> "Am rau mene matautu, lutu lo atoa sipsip karika oroi iem, ta poli Tamaimim epona liu emasimasi tani tau atatu ararimangalina ateva etaimim.

<sup>33</sup> Am taula peiimim me la poli, me viliki veu am taula ta lo atoa karika righi peiira. Me am ghaa lo ateva aikkaai viliki veu karika aue epoka, me am ghaa ghinnani ngepona liu, karika aue esesa, me karika teva tau niainao erooroo tani ainao, me karika aue eavu.

<sup>34</sup> Ta poli voto ateva peiimim etokatoka etana, aue urunguitaniiimim tee ateva aue etoka etana.

*Am toka anguenguu  
(Mat 24:45-51)*

<sup>35</sup> "Am aimonomonosiaa tale niuungu. Am ghelei kuraimim lam etoka ramerame,

<sup>36</sup> nongina lo atoa tau ngai nonganongo anna, la toitoi vauira ateva tani kiri mae tale nisigha ngateae. Nau eteva emae, me emirimiri etapaa ngatamana, gharovaeataa nonga ta aue la oti, me ekupi sso.

<sup>37</sup> Niarangise atoka ta lo atoa tau ngai uungu, vauira ateva etaraila va karika la aseasekanua, nau emae. Aghaulia ngakoronna etaimim va aue emolu tani aipanipanliaa aneira inana kapuna tau ngai nonganongo anna atoa, me aue la mae tale tevoo ateva, me etau lao inana etaira.

<sup>38</sup> Niarangise aue etoka ta lo atoa tau ngai uungu vauira ateva etara va la aaimonomonosiaa, marova emae elomatuua voo, o elopai.

<sup>39</sup> Am nim nnaa va marova taumattu ngateva ekilakila nau eteva tau niainao ateva emae etana, karika aue ghele tau velu alena ateva va ghele rrutia.

<sup>40</sup> Am tee am aimonomonosiaa, ta poli Natuna ateva Taumattu ngateva aue emae tale nau eteva karika am nannaa va aue emae etana."

<sup>41</sup> Pita ghe kolomila va, "Vau eteva, uaauliaa ia ona kiukiu niaimatoongana atea etaimami, o ta taumattu ngakapaaili etoa?"

<sup>42</sup> Iesu ghe liula va, “See ia lo ateva egheelei emasina uunguaane, me alomasaanga ia tani aitaraa voto, aue eaitara ngakapaaili tau ngai nonganongo anna atoa, tani taula inana tale nau nighaa inana.

<sup>43</sup> Niarangise aue etoka tale lo ateva tau ngai nonganongo anna, vauna ateva etara va egheelei isaa o niuungu, nau eteva ekiriaa mae.

<sup>44</sup> Aghaaulia ngakoronna etaimim va aue eatokaia va eaitara ngakapaaili peina.

<sup>45</sup> Me marova ia o tau ngai nonganongo anna ateva ennaa va, ‘Vaughu eteva karika aue emaa parasi,’ me etiuua tani uvi mene katoa tau ngai nonganongo anna, me etiuua tani namanama, me ropi uaeni, me nannaane eaisavisavila,

<sup>46</sup> aue kapuna vau ateva ia o tau ngai nonganongo anna ateva emae, tale ia o nau eteva eannaia va karika aue emae etana, aue esai putuputua me eatoka aitauua teeia me lo atoa karika la aikaaiaa.

<sup>47</sup> Lo ateva tau ngai nonganongo anna ekilakila sa ateva vauna ateva ealoanna va egheleia, me karika eaimonomonosiaa tani ghelei, aue vauna ateva euvi saasakieinia.

<sup>48</sup> Me lo ateva karika ekilakila sa ateva vauna ateva ealoannaia etana, me egheelei voto sesa, ia o lo ateva karika aue la uvi saasakieinia. Lo atoa laghe taula oroi voto, la ghanna tani ghaa oroi voto etaira, me lo ateva laghe taula oroieili voto va eitaraa, aue la ghanna oroieili voto va eliu etaira.

### *Karika va luei ta niaipolapolaii*

(Mat 10:34-36)

<sup>49</sup> “Aghe mae sio tani tau kura ateaetale kosa ateva oio, me aghannaaili va arova ghele rame.

<sup>50</sup> Me aue asuu tale kateva ase niaasu, me ngamamarikana teeia, lomosi ta niaasu eteae eruu etaghi.

<sup>51</sup> Am annaa va aghe mae sio tani tau luei tale kosa ateva? Karika! Aghaauliaa etaimim va, karika va luei, ta niaipolapolaii.

<sup>52</sup> Ange tiitiuaa oia me ange laolao; aue ghalima taumattu tale kateva pamili aue la atiuua, kotolu aue lotolu ssa tee ghalua, me ghalua aue lalu ssa tee kotolu.

<sup>53</sup> Aliki taita ateva aue essa tee tamane, me tamane aue essa tee natuna aliki taita ateva. Me aliki vause ateva aue essa tee kinna, me kinna aue essa tee natuna aliki vause ateva. Vause ateva aue essa tee alumuna vause ateva, me alumuna vause ateva aue essa tee vause ateva.”

### *Tani kila nau*

(Mat 16:2-3; 5:25-26)

<sup>54</sup> Ghe uela ta taumattu ngatoa va, “Nau am taatara urukookoo esaesae ta pai sinaka esuu, gharovaeaata nonga ta am ue va, ‘Aue evaao,’ me evaavaao.”\*

<sup>55</sup> Me nau eteva am taatara kuukuu eteva emaemae ta saot, am ue va, ‘Aue aanasa ateva elutu’, me aanasa ateva emaemae.<sup>†</sup>

<sup>56</sup> Am usimaghalua am! Am kilakila tani tara kila voto euu me eunaakookoo, me vaalua me karika am rooroo tani tara kila nau etiulu oia?

<sup>57</sup> “Vaalua me am, karika am rooroo tani kila saa voto ghulughuluena?

<sup>58</sup> Marova ngamalu laolao tale niaisakei me teva aissanim, utootoonga tani kkaluaa etana etapaa salana, ta erau laoainio ta lo ateva egheelei niaisakei, va etaou lao ta polisi etoa, va la atokao sso tale ale mata voovoo.

<sup>59</sup> Aghaauliaa etam va karika aue ukupi ghoa lamosina ta utau ekapa lao viliki veu la ghase va utau lao.”

## 13

### *Nna ngaioghioghiaa o umate*

<sup>1</sup> Tale ia o nau eteva, katoa tana taumattu laghe auliaala ta Iesu vaalua Paelat ghe uvi ematet katoa tana aGalilii nau eteva laghe gheelei sae aiaavusuvusuena ta Vau ngepona ateva.

<sup>2</sup> Iesu ghe liula etaira me ghe uela va, “Poli ila o aGalilii etoa laghe mate avalueta o, am annaa va ila sesaaili kaluira ssavoto, me lo atoa oia aGalilii karika laghe matela?”

<sup>3</sup> Aghaauliaa etaimim va karika! Arova am tam nna ngaioghioghiaa, am tee aue am mate.

\* 12:44: Mat 25:21, 23.      12:47: Jms 4:17.      12:50: Mak 10:38-39.      12:53: Maeka 7:6; Mal 4:6.      † 12:54: EIsraeli, vaao ateva elaa ghaiotka ta pai sinaka esuu, ta poli paamanu eteva (Mediterranean), ia tee ta pai sinaka esuu.

† 12:55: EIsraeli, aanasa ateva emaemae ta pai saot ativilau, ta poli voto ateva aanasa ia, karika oroi voto epiipinosa etana.      13:2: Jon 9:2.

<sup>4</sup> Vaalua tale kasangaulu ghaoalu (18) taumattu nge Siloam laghe matela nau aitiketike ateva ghe katuu sauuala ta ngetaira? Am annaa va gheeleiaaira sesaaili ta mene lo atoa eJerusalem?

<sup>5</sup> Aghaauliaa etaimim va karika! Arova am tam nna ngaioghioghiaa, am tee aue am mate.”

*Kiukiu niaimatoongana tale ai eteae (fig)*

<sup>6</sup> Iesu ghe auliaala kateae kiukiu niaimatoongana ta taumattu ngatoa, ghe uela va, “Kateva taumattu, aina fig ateae ghe tiitingina tale umana paa ngutani uaeni etingiu. Ghe lao sio tani taatara poi va ghe tara righi uene me karika ghe tarala righi.

<sup>7</sup> Ghe uela ta kapuna tau ngai pasa utana atingiu va, ‘Tarala, kotoluae ninamanama aghe mae taatara vara aghe tara righi uene, me karika poi righi ataatara. Tue veluela! Vaalua me enim ruurungia inanina kosa ateva?’

<sup>8</sup> “Tau ngai pasa utana atingiu ghe liula me ghe uela va, ‘Vau eteva, rati etinginaiela, me emene tingina kateae ninamanama. Aue amene kai talieinia, me amene kuukumui poia.

<sup>9</sup> Marova ekune tale mene kateae ninamanama, aue emasinaaili. Marova karika, aue ita tue veluela.’”

*Iesu ghe ghelei emasinala vause ateva poupouena ia tale nau manga ateva*

<sup>10</sup> Kateva nau manga, Iesu ghe aapasunga tale kateva ale nivelu eitauaa.

<sup>11</sup> Vause ateva raroai eteva ghe tokala ta ngetana ghe roola kasangaulu ghaoaluae (18) ninamanama; raroai eteva ghe gheeleia ghe poupou tani kasu, me karika ghe rooroo tani korosia.

<sup>12</sup> Nau eteva Iesu ghe taraiela, eghe koloa mae sio etana, me ghe uela va, “Vause ateva, angu masinala tale voto ghe gheelei saasakieinio.”

<sup>13</sup> Eghe saoala nimane ta ngetana, me katengaata ta ghe korosiela, me ghe tiuaala tani tau sae God.

<sup>14</sup> Kateva tana namuu tale ale nivelu eitauua ngateva ghe sessaiela ta Iesu, poli ghe ghelei emasinala vause ateva ta nau manga ateva, ghe samala me ghe uela ta taumattu ngatoa va, “Nauita ghaonomo tani ghelei uunguaaita, am mae tale isaa o nau va la ghelei emasinaiem, karika va ta nau manga ateva!”

<sup>15</sup> Vau eteva ghe liula me ghe uela etana va, “Usimaghalua am! Am oia, aue am ghele pulaka kieimim vulumakao o donki, me aue am ghele laa gharopiropi tale nau manga ateva.

<sup>16</sup> Vaalua, karika ita rooroo tani sausi ia oia vause ateva tale nau manga ateva? Poli ie tee natuna vause ia Abraham, Satana ghe ghaaiela ghe roola kasangaulu ghaoaluae (18) ninamanama.”

<sup>17</sup> Ailiiliu tale inangarina ghe ghelei epalatala tau ngai ssateena atoa, me taumattu ghe taatara masi voto ghe gheelei, laghe masimasi.

*Kiukiu niaimatoongana tale katu ue ngai erighi me isti eteva*

(Mat 13:31-33; Mak 4:30-32)

<sup>18</sup> Vara me Iesu ghe kolomila va, “Vaalue ia ararimangalina ateva God? Aue asuimatoongainia tale sa ateva?

<sup>19</sup> Ia nongina katu ue ngai erighi la kolokoloa va mastet, taumattu ngateva ghe ghaala katu ue ngai erighi, ghe pasaiela tale umana utana atingiu. Ai erighi ghe pinosala, me ghe namungailila, me ghila atoa laghe gheleila aleira tale laangina.”

<sup>20</sup> Iesu ghe mene kolomila va, “Sa ateva aue asuimatoonga ararimangalina ateva God etana?

<sup>21</sup> Ia avalua toko, va vause ateva ghe ghaala isti me ghe ghelei eitauaa teela orioieili palaoa lomosi ta palaoa ngateva ghe rrangala.”

*Ghauna ateae atamana*

(Mat 7:13-14, 21-23)

<sup>22</sup> Iesu ghe laolao see tale masaliki taatara atoa, me tale ghauna atoa masaliki, ghe aapasunga elaoela ta taumattu ngatoa, me ghe lao sio eJerusalem.

<sup>23</sup> Kateva taumattu ghe kolomiela va, “Vau eteva, karika oroi taumattu aue esaanga?”

Iesu ghe uela etaира va,

<sup>24</sup> “Am sarasarakana tani kupi sso tale atamana ateae ghauna ia; poli orioieili taumattu ngatoa aue la tootoonga tani kupi sso, me karika aue la roo.

25 Namuu tale ale ateva ue etingina, me eghoa kavati atamana atae; me ue am tingina eleka, me am mirimiri, me am kolokolo tale atamana atae, me ue am ue va, 'Namu ngateva, otila atamana atae etaimami!'

"Aue eliu etaimim me eue va, 'Karika akilakilaiem va am see iem!'

26 "Aue am liu me am ue va, 'Ami ghe namanama me ropiropi eitauaa teeio; ughe apasunga tale masalikiimami!'

27 "Aue emene ue va, 'Karika akilakilaiem va am see iem. Am kasu vulieghila, am akapa sesa gheeleiaaimimi!'

28 "Aue am ngala me am aingeresia ngalungaluimim, nau am tara Abraham, Aisiki me Jekop, me propete atoata tale ararimangalina ateva God, me am, ue la tiu veluem!

29 Taumattu ue ekasu tale sinaka esae me sinaka esuu, me tale mene ghaluevilau pai not me saot tale kosa ateva, ue la mae tale tevoo ateva tale kinatama ninamanama atae tale ararimangalina ateva God.

30 Nongola! Kasina taumattu arariira euu ue la matuutulieni, me kasina taumattu matuutulieni ila aue la sioaili euu."

*Iesu ghe alousiusi teela ejerusalem*

(Mat 23:37-39)

31 Ia o nau eteva katoa tana Paresi laghe mae sio ta Iesu, me laghe uela etana va, "Ukasu vuli voto ateva oia, me ulao ppae tale mene teae masaliki, poli Herot ealoanna tani uvi emateeo."

32 Iesu ghe liula etaira me ghe uela va, "Am laa ghuliaa etana tau nikamekame ateva okae va, 'Aghi aue atiu velu raroai etoa, me aue aghelei emasina taumattu ghaine me nimanaa, me tale aiaakotonna ateva nau, aue aruu uunguaaghi.'

33 Karika aue atoka, ghaine, nimanaa me luevo; koronnaaili karika teva propete aue emate eleka ejerusalem!

34 "Jerusalem, Jerusalem! Ughe uvi ematela propete atoa, ughe osala tau ngai kasuaa inangarina atoa God tale atu! Orioata aghaalonna tani atoka aitaueinam kapughu taumattu ngatoa, nongina kina paolo ateva eaakou natuna atoa tale kaekaena, me karika am aaloanna!

35 Liuna avalua o, me am nongola! God aue ekasu vuli alena ale manga ateva, me masalikiim taatara atae aue eturungia. Aghaauliaa etaimim va karika aue am mene taraieghi, lomosi ta nau eteva aue emae, me aue am ue va, 'Niarangise ta lo ateva emaema tale ararina atea Vau eteva.'

## 14

*Iesu ghe ghelei emasinala taumattu ngateva ghe airorrongoii*

1 Keteva nau manga, Iesu ghe lao sio tani namanama tanganue kateva namuu ta Paresi etoa, me taumattu ngatoa karika laghe ghaaghhaa velu mataira ta Iesu.

2 Taita ateva, nimane me kkena ghe rorrongo, ghe tokatoka emua ta Iesu.

3 Iesu ghe kolomila tau ngai apasunga tale inangari nipaopao me Paresi etoa va, "Vaaluua uneita inangari nipaopao eaauliaa, masina tani ghelei emasina teva taumattu tale nau manga ateva, o karika?"

4 Karika laghe liu poila. Iesu ghe posola taita ateva, me ghe ghelei emasinala, me ghe sungi veluela.

5 Vara me ghe uela etaira va, "Arova teva etaimim, teva natuna o kiena ghaata kkena, ghele katuu velu sio tale liu eteva tale nau manga ateva, karika aue am ghele ae velue sae parasi?"

6 Karika laghe roola tani liu inangarina.

*Iesu ghe uela va ita siuua nannaaита*

7 Iesu ghe taatara vaalua katoa tana namuu ta Paresi etoa laghe taatara masi liuira tani toka, me ghe auliaala lo atae oia kiukiui niamatoongana ta taumattu ngakapa atoa:

8 "Nau eteva kateva ange koloola tani lao tale ninamanama eteae, karika umene tara masi aitokatoka va utoka ta ngetana. Karika ukilakila va mene kateva taumattu la kolo teeielaa mene namuu teeia ta ngetam.

9 Lo ateva, unna ninamanama atae, ghe kolo akapaiemaluela, aue emae etam me eue va, 'Tinginala, me ierai etoka siol!' Aue upalata, nau la ghaaio me la ghoa atokaio emuli.

10 Nau eteva ngila koloola, ulaa toka sio tale aitokatoka ateva emuli. Nau lo ateva, unna ninamanama atae, emae, eue va, 'Kapughu, mae sio, me ulaa toka tale masi aitokatoka

ateva.' Isaa o voto aue eghelei, masi ararim atae emua tale taumattu ngakapa atoa tale lo atae o nivelu eitauaa.

<sup>11</sup> See ualoanna tani saeaa nannaam, aue God eatokaio sio euu, me see usiuua nannaam aue God eatokaio sae epona."

<sup>12</sup> Iesu ghe uela ta taumattu ngateva unna ninamanama atae va, "Nau eteva ualoanna tani ghelei ninamanama, urau mene kolo kapum atoa, tuem atoa, nengam atoa, mangalim atoa, o taumattu tue peipeiena, poli auena la mene koloo me la liu voto ughe gheleila ta ngetaira.

<sup>13</sup> Nau ughelei ninamanama atae, ukolo lo atoa karika righi peiira, tokatoka ngeuu etoa, kke tapakase atoa, me mata salusaluna atoa;

<sup>14</sup> aue ughaa niarangise, poli ila karika la rooroo tani liu voto ughelei ta ngetaira. God aue eliu, tale nau eteva tau ghulughuluena atoa aue la totu tale nimate."

*Kiukiu niamatoongana tale paka ninamanama atae*

(Mat 22:1-10)

<sup>15</sup> Nau eteva kateva tana taumattu ghe tokatoka tale ia o ninamanama atae ghe nongola isaa oia inangari, me ghe uela ta Iesu va, "Niarangise aue eghaa lo atoa aue la toka tale paka ninamanama atae tale ararimangalina ateva God!"

<sup>16</sup> Iesu ghe uela etana va, "Kateva taumattu ghe aimonomonosiala kinatama ninamanama atae, me ghe suula inangari ta oroi taumattu va la mae.

<sup>17</sup> Ghe ghaala nau ninamanama, me ghe suula kapuna tau ngai nonganongo anna ateva va elaa kolo taumattu ang ghe uela va la mae, ta voto akapa ang ghe aimonomonosiala.

<sup>18</sup> "Ila akapa laghe tiuala tani aikamekameaa me laghe aauliaa vaalua me karika laghe roola tani lao. Aitiuti eteva ghe uela ta tau ngai nonganongo anna ateva va, 'Aghe polila tuku kosa ateva. Aghaloanna tani laa tarai. Alousiusi, ta karika aue amae.'

<sup>19</sup> "Mene kateva ghe uela va, 'Aghe polila kasangaulu (10) kieghi vulumakao, me alaolao tani taraila, me atoongainila tani uungu, alousiusi ta karika aue amae.'

<sup>20</sup> "Mene kateva ghe uela va, 'Amina laila, o karika arooroo tani mae.'

<sup>21</sup> "Tau ngai nonganongo anna ateva ghe lao sio, me ghe auliaala ta vauna ateva. Vau eteva ghe sessaiela, me ghe uela etana va, 'Ailuiluila, me ukasu parasi me ulao tale liu nivelu eitauaa, me tale salana atoa tale masaliki taatara, me ukolo mae lo atoa karika righi peiira, tokatoka ngeuu etoa, mata salusaluna atoa, me kke tapakase atoa.'

<sup>22</sup> "Tau ngai nonganongo anna ateva ghe kasula tani ghelei llo vauna ateva ghe auliaala, me nau ghe kiriaa mae sio, ghe uela va, 'Inangarim ngami gheleila, me oroi aitokatoka karika righi taumattuna.'

<sup>23</sup> "Vauna ateva ghe uela va, 'Ulaao tale salana namuu, me ukkele valaa tale ghauna salana, me ukolo asarasarakana taumattu ngatoa, me la mae, me la ghapasu aleghi eteva.

<sup>24</sup> Aghaauliaa etaimim va karika poi teva taumattu aghe kolo akasinala, aue la nama aneghi inana!'

*Taumattu ngateva enannaa ngamasina me eaimuli tee Iesu*

(Mat 10:37-38)

<sup>25</sup> Orioili taumattu ngatoa laghe usiusi see Iesu. Ghe kiriela me ghe uela etaira va,

<sup>26</sup> "Lo ateva ualoanna tani aimuli teeieghi, karika urooroo va ukapughu disaepolo arova utam rooroo tani rati etoka tamam me kinam, vausenim ateva me natum atoa, tuem atoa me nengam atoa, me maamauluaam.

<sup>27</sup> See karika urooroo tani sunuki unem ateva tani aikotoo, me umae aimuli etaghi, karika urooroo tani kapughu disaepolo.

<sup>28</sup> "Arova teva etaimim eaimonomonosiaa tani atulu ale ateva, etokatoka sio mua, me etara mua va ghaisa aipolina, me tani tara va viliki veu rooroona tani ruu ale ateva, o karika.

<sup>29</sup> Arova etiuaa ale ateva me etam rungia, taumattu ngatoa aue la amammarasa,

<sup>30</sup> me la ue va, 'Ia o taumattu ngateva ghe tiuala ale ateva, me karikaaili ang ghe roola tani rungia!'

<sup>31</sup> "Arova kingi eteva ange laolao tani aiuvii, me kapuna tau ngai uuvi etoa erooroo kasangaulu airari (10,000), aue etoka mua, me eannaa va erooroo tani laa aiuvii tee mene kateva kingi, kapuna tau ngai uuvi etoa erooroo ghaluengaulu airari (20,000), me aue apalaia, o karika?

<sup>32</sup> Arova karika erooroo, aue esungi kapuna tau ngaikasuaa inangari etoa tani laa sou kingi eteva, me la loo luei nau eteva masau ila.

<sup>33</sup> Tale ia nonga o salana atikirighi, karika teva etaimim erooroo tani kapughu disaepolo, arova etam oghi vulu peina akapaaili.

*Uela ateva karika righi namina  
(Mat 5:13; Mak 9:50)*

<sup>34</sup> "Uela ateva masina ia, me marova ekapa namina, vaalua urooroo tani mene ghelei me emene tue namina?

<sup>35</sup> Ia o ase uela ateva karika ita rooroo tani ghelei righi voto etana, liuna avalua o me la nim sausau velu.

"Lo ateva talingane manee tani nongo, aue enongo."

## 15

*Kiukiu niaimatoongana tale sipsipi eteva  
ghe raela*

*(Mat 18:12-14)*

<sup>1</sup> Kateva nau, tau ngai ghaa takis atoa me tau ssavoto atoa, laghe mae sio tani nongo Iesu.

<sup>2</sup> Paresi etoa me tau ngai aapasunga tale inangari nipaopao atoa, laghe tiuala tani auliuliaa Iesu, laghe ue va, "Ia oia taumattu ngateva ealoanna tau ssavoto atoa tani toka, me tani namanama teeila."

<sup>3</sup> Me Iesu ghe auliaala etaira kiukiu niaimatoongana ataeae etaira. Ghe uela va,

<sup>4</sup> "Arova kateva etaimim kieni sipsipi erooroo kateva ai (100), me kateva etaira ghele raua, am annaa va karika aue ghele kasu vuli ghasiongaulu ghasio (99) sipsipi nongina la ghele namanama, me ghele laa pae lo ateva ghe raela, lomosi ta aue ghele taraiia?"

<sup>5</sup> Nau eteva ghele taraiia, aue ghele masimasi, ghele sau, me ghele alokoie sae ta pappana,

<sup>6</sup> me ghele sau lao tanganuena. Aue ghele kolo kapuna akapa atoa, me lo atoa la tokatoka kalakalaa teeia, me ghele ue ta ngetaira va, 'Masimasiaaghi namungaili, poli ngatarala kieghi sipsipi eteva ghe raela. Am mae masimasi teeieighi!' <sup>7</sup> Aghaauliaa etaimim va, tale isaa o ase salana, namungaili nimasimasi elutululu epona liu, nau eteva kateva tana tau ssavoto enanna ngaioghioghiaa ta ghasiongaulu ghasio (99) taumattu ghulughuluena, karika righi kaluira ssavoto va la nna ngaioghioghiaa.

*Kiukiu niaimatoongana tale  
viliki veu etivilau ghe raela*

<sup>8</sup> "Marova teva vause unna kasangauluvilau (10) viliki veu, me ghele rau kativilau, sa ateva aue ghele gheleia? Aue ghele arokoti kurane lam atae, me ghele kkala tani paea amasinaaili alena ateva, lomosi ta ghele taraiia.

<sup>9</sup> Nau ghele taraiia, ghele kolo kapuna atoa, me lo atoa la tokatoka akalakalangina tanganuena, me ghele ue va, 'Masimasiaaghi namungaili, ta ngatarala uneghi viliki veu etivilau ghe raela. Am mae masimasi eitauaa teeieighi!'

<sup>10</sup> Tale ia o ase salana atikirighi, aghaauliaa etaimim va ensolo atoa kapuna ila God, masimasiaairaa namungaili, nau eteva kateva tana tau ssavoto enanna ngaioghioghiaa."

*Kiukiu niaimatoongana tale aliki taita ateva ghe raela*

<sup>11</sup> Iesu ghe mene uela va, "Taumattu ngateva, natuna taita alua.

<sup>12</sup> Muli eteva taita ghe uela ta tamane va, 'Tamaghi, tau mae peighi nau umate aue agaha.' Me tamairarua ghe koitaala peirarua natuna taita alua.

<sup>13</sup> "Karika masau nau ghe lange sio me muli eteva taita ghe tau ekapala peina laghe polila, ghe ghaala viliki veu, me ghe kasula tani lao tale masau patunganue namuu. Ghe tiuala tani poli aloanaane,

<sup>14</sup> me unna viliki veu ghe kapala, me tale isaa o nau, paka maloo ateva ghe tinginala, me ghe karikala righi peina.

<sup>15</sup> Liuna avalua o me ghe lao sio tani pae niuungu. Kateva taumattu tale ia o patunganue namu ngateae ghe sungiela tani laa ghaitoiaa mosu etoa me eanginila.

<sup>16</sup> Eghe aloannaaili tani nama righi inana aneira mosu etoa, poli karika teva ghe tautau lao righi inana va ghe nama.

<sup>17</sup> "Nau eteva masi ninannaa ghe ghaaiela me ghe uela va, 'Kapuna tau ngai uungu etoa tamaghi orioieili aneira inana, me aghi oia maloo ateva ange gheelei emateaghil!

<sup>18</sup> Akasu, me alao ta tamaghi, me aue alaa ue va, "Tamaghi, aghe ghelei saasakiala ta mata God, me ta matam.

<sup>19</sup> Karika masina aghi va uaseaghi va natum ieghi; uaseaghi va marova kateva kapum tau ngai uungu.”<sup>1</sup>

<sup>20</sup> Ghe tingina saela, me ange laolao ta tamane.

“Masau ia tanganue tamane, me tamane ghe taraiela; urunguitanina ateva ghe pasula tale nialousiusi, me ghe ilou lao sio tani sou natuna, me ghe llotiela me ghe ngusuela.

<sup>21</sup> “Aliko taita ateva ghe uela va, ‘Tamaghi, aghe ghelei saasakiaala ta mata God, me ta matam. Karika masina aghi va uaseaghi va natum ieghi.’

<sup>22</sup> “Me tamane ghe uela ta kapuna tau ngai uungu etoa va, ‘Am ailuiluila! Am maeaa sio teva aiaasae masinaaili, me easae. Am atokala teva ringi ta vuuvuu nimane, me am asae taula lua aikasukasus ta kkema.

<sup>23</sup> Am laa ghaa morona ateva natu vulumakao, me am uvi ematea, me ita namanama aitauaa teeia, me ita masimasi.

<sup>24</sup> Poli ia oia natughu taita ateva ghe matela, me ange mene sakesakela, me ghe rauela, me ange rekatala.” Me laghe tiuaala tani masimasi.

<sup>25</sup> “Karika masau, me natuna mua ateva taita ghe oghiaha mae sio etapaa ngutana. Eghe kasukasus emaemae, ang ghe kalakalangina elo ale, me ghe nongola paka mangalia ateva tale nikau me niloku.

<sup>26</sup> Ghe kolola kateva tani aliki, me ghe kolomiela va, ‘Vaalua me la gheelei mangalia ateva okae?’

<sup>27</sup> “Aliko eteva ghe liula me ghe uela va, ‘Nengam ateva ange rekatala. Tamam euvia ematela morona ateva natu vulumakao, poli nengam ange mae sio tani rekataa etana, me ange masimasi.’

<sup>28</sup> “Mua ateva taita ghe sessaiela, me ghe tam aloannala tani sso elo ale. Tamane ghe ghoa mae tani aipoopoliaa poi teeia.

<sup>29</sup> Ghe liula ta tamane me ghe uela va, ‘Tarala, ninamanama atoa ngaghe uungula etam nonginaili tau ngai nonganongo anna ateva, me karika poi aghe nonganongo vulu inangarim. Sa ateva ughe taue mae sio etaghi? Karika poi va ughe tau mae sio arova nim teva natu meemee va aghe ghelei teae ninamanama, me aghe masimasi eitauaa tee kapughu etoa!

<sup>30</sup> Me natum taita ateva oia ghe nim lao sio tani rungia see peim tale vause ngetapaa salana atoa, me nau erekatala, ughuvi ematela morona ateva natu vulumakao va eanna ia!

<sup>31</sup> “Tamane ghe liula me ghe uela va, ‘Natughu, io utokatoka teeieghi nau ekapa atoa, issaa akapa peighi peim.

<sup>32</sup> Me ita velu eitauaa me ita tani masimasi, poli nengam ghe matela, me ange sakesakela, me ghe rauela, me ange rekatala.”

## 16

*Kiukiu niaimatoongana ataeae tale taumattu ngateva ghe aaitoiaa tau ngai uungu etoa*

<sup>1</sup> Iesu ghe uela ta kapuna disaepolo atoa va, “Kateva tau peipeiena, kapuna tau ngai uungu eteva, laghe ue va karika masina ia, ta karika ghe aaitara ngamasina peina kapuna namu ngateva.

<sup>2</sup> Kapuna namu ngateva ghe koloala me ghe kolomiela va, ‘Vaalua tale inangari anongonongo la ghaauliaa teeio? Laa ghaimonomonosiaa kiukiuna uunguaam tale peighi uaaitaraa, poli karika urooroo tani mene aitaraa peighi.’

<sup>3</sup> “Tau ngai uungu eteva ghe nnaala va, ‘Kapughu namu ngateva ange ghaaghaa velu niuungu etaghi. Sa ateva agheleia? Karika sarasarakana ieghi tani kaikai me palatanna ieghi tani nim loo viliki veu.

<sup>4</sup> Ngakilala sa ateva agheleia, me nau eteva aruu tale niuungu, taumattu ngatoa ae la ghaikoloainaghi nau alao tanganueira.”

<sup>5</sup> “Liuna avalua o me ghe kolokolo kateva kateva tale taumattu laghe nim ghaala voto ta vauna ateva. Ghe kolomila aitiuti eteva va, ‘Ghaisa kalum voto ughe nim ghaala ta vaughu eteva?’

<sup>6</sup> “Lo ateva taumattu ghe nim ghaala voto ghe liula me ghe uela va, ‘Ghaoalu ai (800) galon\* oliv oeli.’

“Tau ngai uungu eteva ghe uela etana va, ‘Ghaala uru ngai etikirighi laghe pitila kulum voto ughe nim ghaala ta vaughu eteva, me arovaetaa ta utoka sio, me upiti nonga ghaata ai (400).’

<sup>7</sup> “Me ghe kolomila mene kateva va, ‘Ghaisa kalum voto ughe nim ghaala?’

“Me taumattu ngateva ghe uela va, ‘Kateva ai (100) aikaai uiti.’

“Tau ngai uungu eteva ghe uela etana va, ‘Ghaala uru ngai eteva laghe pitila kalum voto ughe nim ghaala etana, me upiti nonga ghaolungaulu (80).’

8 “Nau vauna ateva ghe kilala voto kapuna sesa tau ngai uungu eteva ghe gheleila, ghe arueiniela, poli ghe gheleila voto tau muenna nonga atoa la gheelei. Taumattu tale kosa ateva oia muennnaili ila tale ase salana tani ghelei uunguaaira, me taumattu tale mallanga atoa karika.

9 Aghaauliaa etaimim va am ghinaghina masi voto tale kosa ateva tani ghelei, me eoroi kapuimim. Me nau eteva isaa o voto ekapa aue la masimasi tani ghaaiem tale voto ateva tokatoka liu ia.

10 “Lo ateva la atoka tuutuliira etana tale lutu voto pisike, aue la atoka tee tuutuliira tee etana tale namuu voto. Me lo ateva etam gheelei voto koronna tale lutu voto pisike, karika aue eghelei voto koronna tale llo voto namuu.

11 Arova karika la ghaatoka tuutuliira etaimim tani aitaraa masi voto tale kosa ateva, karika teva aue eatoka tuutuliira etaimim tani ghaa voto koronna.

12 Me arova la tam aatoka tuutuliira va am rooroo tani aitaraa katoa peiira, karika teva aue ghele tau aatu righi voto va ghele peiimim.

13 “Karika teva tau ngai nonganongo anna erooroo tani uungu ta ghalua vau, poli aue ghele ssa tee kateva, me ghele aielousiaa kateva. O aue ghele nongo usilaa kateva, me ghele liu vilina ta mene kateva. Karika am rooroo tani uungu ta God me viliki veu.”

*Inangari nipaopao me  
ararimangalina ateva God  
(Mat 11:12-13)*

14 Paresi etoa, la ghaielousiangaili viliki veu, nau laghe nongola isaa o inangari, laghe tiuala tani amamarasa Iesu.

15 Iesu ghe uela etaira va, “Am, am nim aaloanna tani aitaratarainam tani ghelei masi voto ta mata taumattu ngatoo, me karika, ta God nonga ekilakila urunguitaniimim, poli voto masinaaili ta mata taumattu ngatoo, sesaaili ta matane God.

16 “Inangari nipaopao me inangariira propete atoa laghe pitila, ghe laa ghaa sio nau ta Jon, me ghe tiuala tale nau etiulu o, masi inangari tale ararimangalina ateva God laghe tiuala tani ppooa ngaotua, me taumattu ngakapa atoa laghe annaaili tani kupi sso etana.

17 Elomarase me kosa ateva lalu rooroo tani kapa, me teva tuku voto ghaunaaili tale inangari nipaopao karika erooroo tani kapa.

18 “Lo ateva erati vausenna ateva me elai ta mene teva vause ange lai sarila. Me lo ateva taita emene ghaa vause ateva oia laghe rati etokaiela, ia tee ange lai sarila.

*Tau peipeiena ateva me Lasarus*

19 “Kateva tau peipeiena ghe molumolu me ghe aasae masi ghinna atoa, me ghe gheelei ninamanama nau ekapa atoa.

20 Tapaa ngatamana tale valavalala atae tangantuena, tau nilooloo ateva, ararina atae ta Lasarus, laghe mae aatokaia, pasu ia tale usai.

21 Ghe anna va enama llo inana aue ekatuu tale unna tevoo ateva tue peipeiena ateva. Me tee paua atoa laghe mae raarameaa usaina.

22 “Ghe ghaala nau eteva, tau nilooloo ateva ghe matela, me ensolo atoa laghe saue lao sio, me laghe laa ghalokoi valainie sio ta Abraham.<sup>†</sup> Tau peipeiena tee ateva ghe matela, me laghe kaeinieila.

23 Tale Hades, ghe aateateaa paka mmarikana ateva, me vara ghe sae taatara, me ghe tarala Abraham masaeili ia, me Lasarus ghe tokatoka valaa etana.

24 Ghe kolokolo saela etana me ghe uela va, ‘Tamaghi Abraham, alom eusieghi me usuu Lasarus tani asuu elo velena tale vuuvuu nimane ateva tale manu me esio amakarrii ramuramuti paaghi eteva, poli aghateateaa paka mmarikana tale kura atae oia.’

25 “Abraham ghe liula me ghe uela va, ‘Natughu, unnaa nau ta sakesake, io ughe ghaaghhaa masi voto, nau Lasarus ghe ghaaghhaa voto sesa. Me ghaine ange tokatoka amasina oia, me io angu ghaaghhaa mmarikana.

26 Me tee, elome etaimami me io, paka salesalena ateva easoaso. Lo atoa la anna tani kasu oia me la ghatu ona, karika la rooroo, me lo tee atoa la anna tani kasu ona me la mae etaimami, karika aue la roo.’

**16:10:** Luk 19:17-26.    **16:13:** Mat 6:24.    **16:15:** Mat 23:28; Luk 18:9-14.    **16:16:** Mat 11:12-13.    **16:17:** Mat 5:18.    <sup>†</sup> **16:22:** Ajiu etoa laghe annaa va epona liu ghulughuluena atoa taumattu la tokatoka tale ninamanama atae. Lo ateva etokatoka tee sio Abraham, eaapasunga va ia namuu ia.

<sup>27</sup> "Ghe liula me ghe uela va, 'Tana aghaloannaaili, Tamaghi, va usuu Lasarus me elao tanganue tamaghi,

<sup>28</sup> poli ghalima nengaghi, me Lasarus elaa ghauliaa kieira, poli ila tee la rau mae tale voto ateva oia sesaaili ia."

<sup>29</sup> "Abraham ghe liula me ghe uela va, 'Inangariira Moses me propete atoa isaa okae etaira; aue la nongola.'

<sup>30</sup> "Tau peipeiena ateva ghe uela va, 'Karika, Tamaghi Abraham! Arova teva ang ghe matela ghele lao etaira, aue la ghele nna ngaioghioghiaa tale kaluira ssavoto.'

<sup>31</sup> "Abraham ghe uela etana va, 'Arova la tam rooroo tani nongo Moses me propete atoa, karika aue la akoronna voto, arova teva ghele totu tale nimate, me ghe auliaa etaira.' "

## 17

### Ssavoto

(Mat 18:6-7)

<sup>1</sup> Iesu ghe uela ta kapuna disaepolo atoa va, "Voto egheelei taumattu ekaakatuu tale ssavoto ange ailituta, me aue esesaaili ta taumattu ngateva egheelei voto oia elutulutu!"

<sup>2</sup> Aue ghele masinaaili etana marova la ghele iri atu etiulu maate ia ta ngalon, me la ghele ghoa allusia elo malionge, ta erau ghelei teva aliki va unna niaikaaiia ekatuu.

<sup>3</sup> Am paniem tale voto am gheelei!

"Marova tuem ateva o nengam ateva egheelei ssavoto, uaulia ngakorokorongana etana, me marova enna ngaioghioghiaa, ukkaluaa.

<sup>4</sup> Marova eghelei teeio voto karika masina ghaituaata (7) tale kateva nau, me emae kkaluaa ghaituaata, me eue va, 'Nganna ngaioghioghiaala,' ukkaluaa voto egheelei teeio etana."

### Niaikaaiia

<sup>5</sup> Apostolo atoa laghe uela ta Vau eteva va, "Ughelei unemami niaikaaiia me enamuu."

<sup>6</sup> Vau eteva ghe liula va, "Marova uneimim niaikaaiia naanamungaane nongina katu ue ngai erighi ghaunaaili ia (maset), am rooroo tani ue ta ai eteae o va etammuti tee uane, me emene ghoa pinosa elamana, aue ghele roo tani nongo usilainiem.

### Uunguaane tau ngai nonganongo anna ateva

<sup>7</sup> "Marova kateva etaimim kapuna tau ngai nonganongo anna ateva euungu etapaa ngutana, o eaaitaraa kiem sipsipi, nau ekiriaa mae elo ale, vaalua, aue uailuilueinia tani namanama?

<sup>8</sup> Karika! Aue ughele ue etana va, 'Uaimonomonosiaa aneghi inana, me uaipanipanliaa, me ukaisi tau mae aneghi inana, me uaku ateoghu me anamanama me aropi, me auena umina namanama me uropi.'

<sup>9</sup> Vaalua, karika aue ukaili emasina tale uunguaane ange gheleila?

<sup>10</sup> Nim nongina am, nau ngam gheleila voto God eaauliaa etaimim tani ghelei, airuuruu am nim ue va, 'Uunguaamami arau, poli ami nim tau ngai nonganongo anna iemami erau.'

### Iesu ghe ghelei emasinala 10 tau tasussuku (lepa)

<sup>11</sup> Iesu ghe mene laa saesae eJerusalem, ghe kasu eloi lao sio tale aiolaa ngateva eSameria me eGalilii.

<sup>12</sup> Ghe kasukasu elao lao tale masaliki eteae, me kasangaulu (10) taita aneira tasussuku eteva, laghe sousouela, laghe tingina amasaula,

<sup>13</sup> me laghe kolokolo atingina tani ue va, "Iesu! Namu ngateva! Alousiusi teeiemamila!"

<sup>14</sup> Nau Iesu ghe tarailala, me ghe uela va, "Am lao sio, me am laa apasungainam ta pristi etoa." Laghe kasukasu elao lao, me laghe raarangisanala.

<sup>15</sup> Kateva etaira, nau ghe tarala va ghe raarangisanala, ghe oghi lao sio, me namungaili ta ghe tau saela God.

<sup>16</sup> Ghe lao sio me ghe suuiala ta liue kkena Iesu, me ghe kaili emasinala etana. Taita ateva oia aSameria ia.

<sup>17</sup> Iesu ghe uela va, "Kasangaulu (10) taumattu la raarangisanala, me eaa ghasio (9)?

<sup>18</sup> Vaalua me taitani ngeleka ateva, ia nonga emae sio tani amasina ta God?"

<sup>19</sup> Iesu ghe uela etana va, "Tingina saela me ukas; unem niaikaaiia ange ghelei emasinaliota."

### Maemaeeaa ararimangalina ateva God

(Mat 24:23-28, 37-41)

<sup>20</sup>Katoa tana Paresi laghe kookolomi Iesu va lovisa ararimangalina ateva God aue emae. Ghe liula me ghe uela va, "Ararimangalina ateva God karika aue emae nongina am, am taatara.

<sup>21</sup>Karika teva aue eue va, "Tarala, ie tokol!" o, "Ie teke!" ta ararimangalina ateva God ia oia elome ta ngetaimim."

<sup>22</sup>Vara me ghe uela ta kapuna disaepolo atoa va, "Nau too emaemaa, aue am aloannaaili tani tara Natuna ateva Taumattu ngateva tale teva nau, me karika aue am tarai.

<sup>23</sup>Katoa aue la ue etaimim va, "Tarala, ie teke!" o, "Tarala, ie tokol!" Karika am mene akoronnaila va am usilaa.

<sup>24</sup>Poli nongina ravaravaia ateva eravaravaia elomarase, me emammallanga akapa tale pai etoa, aue enongina Natuna ateva Taumattu ngateva tale nauna ateva.

<sup>25</sup>Aitiutiu aue eateateaa mmapikana, me taumattu tale lo ateva oia vituu aue la ratia.

<sup>26</sup>"Me nauna Natuna ateva Taumattu ngateva aue enongina nau Noa.

<sup>27</sup>Taumattu ngatoa laghe namanama me ropiropi, taita me vause atoa laghe lailai, me ghe ghaala nau eteva Noa ghe kupi ssola tale anua ateva, me manu ghagga ateva ghe mae sio, me ghe tturungi ekapailala.

<sup>28</sup>"Aue enongina tee nau ta Lot. Taumattu ngatoa laghe namanama, ropiropi me laghe aaipoliaa peiira, laghe pasapasa, me laghe atuutulu.

<sup>29</sup>Me nau eteva Lot ghe kasu vulila eSodom, kura atae me atu ramerame ghe sio mae epona liu, ghe tturungi ekapailala.

<sup>30</sup>"Aue enongina nau eteva Natuna ateva Taumattu ngateva emae rekata.

<sup>31</sup>Tale ia o nau eteva, taumattu ngateva etokatoka eleka tale ale ateva, erau mene kupi sso tangantuena va eso ghaa peina; aue enongina tee taumattu ngateva euungu tapaa ngutana, erau mene oghi ghoo tangantuena.

<sup>32</sup>Am annaa sa ateva ghe lutula ta vausenna ateva Lot!

<sup>33</sup>See etootoonga tani asaangi maamauluaane, aue eraua; me see earau maamauluaane, aue esaanga.

<sup>34</sup>Tale ia o nau eteva, aghauliaa etaimim va, aue ghalua taumattu lalu aso tale kateae nonga aisalo eleivoo: kateva aue la ghaaia, me kateva aue la rati elokoia.

<sup>35-36</sup>Ghalua vause aue lalu gheelei putuputu palaoa: kateva aue la ghaaia, me kateva la rati etokaia."\*

<sup>37</sup>Disaepolo atoa laghe kolomiela va, "Vau eteva, llo oia eaa aue elaa lutu?"

Iesu ghe liula me ghe uela va, "Nongina eaa matena ateva taumattu easoaso, paka ghila atoa la veluvelu eitauaa."†

## 18

*Kiukiu niaimatoongana atae aue vause raue vulu eteva me tau ngai ghelei niaiskei eteva*

<sup>1</sup>Iesu ghe auliaala kiukiu niaimatoongana atae aue disaepolo atoa tani apasunga etaira va la tani looloo sae tale nau ekapa atoa, me karika la mene sio asoasoaa.

<sup>2</sup>Me ghe uela va, "Tale kateae masaliki tau ngai ghelei niaiskei eteva, karika ghe maamatauta God ateva, me tee karika ghe oneoneaa tee kasina taumattu.

<sup>3</sup>Me tee vause raue vulu eteva, ie tee elome tale masaliki etae, ghe maemae nonga ta tau ngai ghelei niaiskei eteva. Ghe aaloannaaili va esausia, tale aloaloannaane. Ghe ue etana va, 'Usausieghi tale tau ngai ssateeieghi eteva.'

<sup>4-5</sup>"Kasina nau ang ghe lange sio, karika ghe aloanna tani nongoa me sausia, vara me ghe nnaala va, 'Arongona ta karika aoneoneaa God me taumattu tee atoa, me poli vause raue vulu eteva oia etautau mae maate etaghi, asausia, poli erou toka maemae nonga va eghelei emangoieghi.'

<sup>6</sup>Vau eteva ghe uela va, "Am nongo inangarina sesa tau ngai ghelei niaiskei eteva ghe auliaala.

<sup>7</sup>Am annaa va God karika aue eghele sausi kapuna atoa ghe aimatoongainilala, la looloo sae etana tale llaa me voo? Vaalua, am annaa tee va aue ghele aippetana tani sausila?

<sup>8</sup>Aghauliaa etaimim va aravaeangalii ta aue ghele sausila. Tale isaa o salana, nau Natuna ateva Taumattu ngateva aue esio tale kosa ateva, aue etara righi taumattu eaiesoaa etana?"

<sup>17:23:</sup> Mak 13:21; Luk 21:8.

<sup>17:28:</sup> Aitiutiu 18:20; 19:25.

<sup>17:31:</sup> Mat 24:17-18.

<sup>17:32:</sup> Aitiutiu 19:17, 26.

<sup>17:33:</sup> Luk 9:24. \* <sup>17:35-36:</sup> Kasina uru ngai laghe pitila, laghe mene pitila va,<sup>36</sup> *Ghalua aue lalu uungu etapaa ngutana: kateva aue la ghaaia; me kateva la rati etokaia.* (Mat 24:40) † <sup>17:37:</sup> Paka ghila atoa, la aseasela va valsa, la namanama nonga voto ang ghe matela me mauuna.

<sup>18:1:</sup> Kol 4:2; 1 Tes 5:17.

*Kiukiu niaimatoongana atea eteva me tau ngai ghaa takis ateva*

<sup>9</sup> Kasina taumattu la nannainila nonga va ila ghulughuluena ila, me katoa taumattu karika. Iesu ghe kiukiuaala etaira ia oia kiukiu niaimatoongana atea, ghe uela va,

<sup>10</sup> “Ghalua taumattu lalu ghe saela tale ale manga ateva tani looloo sae, kateva taumattu Paresi ia, me kateva tau ngai ghaa takis ia.

<sup>11</sup> Taumattu tale Paresi eteva ghe tingina saela me ghe looloo saela, me ghe aauliaa masi unguuanae. Ghe uela va, ‘God, aghi akaakaili emasina etam va aghi karika nongina lo atoa taumattu la ainao, gheeleiaira karika masina, me la lailai sari, me nongina ia o tau ngai ghaa takis ateva.

<sup>12</sup> Ghaluaata tale ghaitu (7) nau anaenae, me atautau aiaasokolo tale voto akapa aghaaghaa.’

<sup>13</sup> “Tau ngai ghaa takis ateva ghe tingina amasaula, me ghe sioaala nannaane, me ghe looloo saela, ghe uela va, ‘God, ualousiusi teeieghi, poli aghi tau ssavoto aghi.’

<sup>14</sup> “Aghaauliaa etaimim va ia oia taumattu ngateva, karika nongina Paresi eteva, nau ghe kasula tani lao tangantuena, God ghe taraiela va ia ghulughuluena ia. See esaea nannaane, aue God etaue sio euu, see esioaa nannaane euu, God aue eanamunamunganeia.”

*Natu aliki etoa me Iesu*

(Mat 19:13-15; Mak 10:13-16)

<sup>15</sup> Taumattu ngatoa laghe maeaa sio natuira raaraina atoa ta Iesu, va esaoaa nimane etaira me earangiseila. Disaepolo atoa laghe tarailala me laghe pao rungainilala.

<sup>16</sup> Me Iesu ghe kolola natu ngaliki etoa laghe mae sio etana me ghe uela va, “Am tau velu natu aliki etoa la mae etaghi, karika am mene ghelei rungainila. Ta poli ararimangalina ateva God anueira ia taumattu ngatoa nongina natu ngaliki etoa.

<sup>17</sup> Aghaaulia ngakoronnaaili, va arova see karika eghaa lo ateva o ararimangalina God nongina natu aliki etoa, karika aue esso etana.”

*Tau peipeiena ateva*

(Mat 19:16-30; Mak 10:17-31)

<sup>18</sup> Kateva namuu ghe mae sio ta Iesu, me ghe kolomiela va, “Masi tisa ngateva, vaalua aroo tani ghelei, me aghaa lo ateva o maulue tokatoka liu ia?”

<sup>19</sup> Iesu ghe liula me ghe uela etana va, “Vaalua me uue va masina ieghi? Karika teva masina, ta God nonga masina ia.

<sup>20</sup> Ukilakila inangari nipaopao eue va, ‘Karika umene lai sari, karika umene aiuvi emate, karika umene ainao, me tee karika umene kamekame tale niaiskei, uoneoneaa tamam me kinam.’”

<sup>21</sup> Ghe uela ta Iesu va, “Isaa ona voto ngaghe aimuli teela nau aliki ieghi arau.”

<sup>22</sup> Nau Iesu ghe nongola isaa o inangarina, ghe uela etana va, “Kateva voto karika ughe gheleia. Utau lao peim la poli, me ughaa viliki veu me ulaoa ta taumattu karika righi peiira. Arova ughelei evalua o, aue utau peipeiena epona liu, me umae aimuli teeieghi.”

<sup>23</sup> Me nau ghe nongola isaa o inangari, ghe alousiusila, ta poli ia tau peipeiena ia.

<sup>24</sup> Iesu ghe taatara lao sio etana, me ghe uela va, “Aanasaaili ta tau peipeiena ateva tani kupi sso tale ararimangalina ateva God!

<sup>25</sup> Poli marova masukasukale ta teva kamolo tani kupi sso tale teae mata raum, aue emasukasukaleaili tee ta teva tue peipeiena tani kupi sso tale ararimangalina ateva God.”

<sup>26</sup> Taumattu ngatoa laghe nongoala, me laghe kolomiela va, “See nonga erooroo tani saanga?”

<sup>27</sup> Iesu ghe liula me ghe uela va, “Voto taumattu karika erooroo tani ghelei, God nonga erooroo.”

<sup>28</sup> Pita ghe uela etana va, “Tarala, ngami ghe kasu vulila tanganueimami me peiimami tani aimuli teeio!”

<sup>29</sup> Iesu ghe uela ta ngetaira va, “Aghaaulia ngakoronna etaimim va, arova teva taumattu ekasu vuli tanganuena, manna, tuena atoa, nengana atoa, kinna me tamana me natuna atoa, mausi ararimangalina ateva God,

<sup>30</sup> aue God etaue lao etana orioeili peina tale nau oia, me nau aue emae, eghaa lo ateva maulue tokatoka liu ia.”

*Iesu ghe aulia ngamuemuela matemateaane*

(Mat 20:17-19; Mak 10:32-34)

<sup>31</sup> Iesu ghe kolo aitauaala kapuna kasangaulu ghalua (12) disaepolo, me ghe uela etaira va, "Ngita laa saesae ejerusalem, me isaa akapa inangari propete atoa laghe piti emuemuela ta Natuna ateva Taumattu ngateva aue ekoronna.

<sup>32</sup> Aue la tauet lao ta taumattu ngeleka atoa, me aue la kusiaa teeia, me kangainia, me kanusua, la parua, me la uvi ematea.

<sup>33</sup> Emuli tale kotolu nau, aue etotu."

<sup>34</sup> Aloira disaepolo atoa karika ghe maamasaanga tee inangarina. Mallooeana inangari ghe aaisulia, karika laghe kilakila sa ateva Iesu ghe aaulieinia etaira.

*Tau nilooloo ateva mata salusalu ia  
ghe taatarala*

(Mat 20:29-34; Mak 10:46-52)

<sup>35</sup> Nau Iesu ang ghe mae akalakalaa sio ejeriko, mata salusalu eteva ghe tokatoka tale sama salana atikirighi, uunguaane tani looloo.

<sup>36</sup> Ghe nonganongo oroieli taumattu ngatoa laghe kasukasu elangelange nongina ghe tokatoka, me ghe samala, me ghe kolomilala va sa ateva ange lutula.

<sup>37</sup> Laghe uela etana va, "Iesu aNasareti ia toko ekasukasu emaemae."

<sup>38</sup> Me ghe kolokolo va, "Iesu, natuna io Deivit, ualousiusi teeieghi!"

<sup>39</sup> Taumattu ngatoa laghe muemue, laghe paopaoa va, "Urou mene sama." Me karika, ta ghe mene kolokolo anamuula tani ue va, "Natuna ateva Deivit, ualousiusi teeieghi!"

<sup>40</sup> Iesu ghe tinginala, me ghe uela va, "Taumattu ngateva emae etaghi." Nau ghe mae akalakalaa sio, Iesu ghe kolomiela va,

<sup>41</sup> "Sa ateva ualoanna va agheleia etam?"

Ghe liula me ghe uela va, "Vau eteva, aghaloanna tani taatara."

<sup>42</sup> Vara me Iesu ghe uela etana va, "Angu taatarala; tale kalum niaikaiaa angu masinala."

<sup>43</sup> Ia arau o me ghe taatarala, me ghe aimulila ta Iesu, ghe tautau sae ararina atuae God. Nau taumattu ngatoa laghe taraiela, ila tee laghe tau saela ararina atuae God.

## 19

*Iesu me Sakies*

<sup>1</sup> Iesu ghe ssola ejeriko, me ang ghe mene aainasiaa tani kasu.

<sup>2</sup> Kateva taumattu ghe tokatoka okae, ararina atuae ta Sakies, namuu ia ta lo atoa uunguaaira tani ghaa takis, me tue peipeiena ia.

<sup>3</sup> Ghe aloana tani tara va Iesu saa taumattu ia, me karika ghe rooroo, ta poli tukunaaili ia, me oroieli taumattu ngatoa.

<sup>4</sup> Liuna avalua o me ghe ilou emuemuela me ghe saela ai eteae ta ghe kilakila va Iesu aue ghe mae avalua o.

<sup>5</sup> Nau Iesu ghe rekatala tale ia o ai eteae, ghe taatara saela, me ghe uela va, "Sakies, kkure parasi sio mae, ta ghaine atanii laa toka teeio tanganuem."

<sup>6</sup> Gharavaea nonga ta ghe kkure siola, me ghe masimasieiliila me ghe kolola Iesu va lalu lao tanganuena.

<sup>7</sup> Nau taumattu ngatoa laghe tara avaluela o, laghe tiuaala tani aulilieinia tani uue va Iesu ange lao sio tani toka tee tau ssavoto ateva.

<sup>8</sup> Sakies ghe tingina saela me ghe uela ta Iesu va, "Vau eteva, aue ataula kasina peighi ta lo atoa karika righi peiira. Me arova aghe kamekame me aghe ghaaghhaa peiira taumattu ngatoa, aue aliu ghaatiaata."

<sup>9</sup> Iesu ghe uela etana va, "God ange asaangila taumattu tale lo ateva oia ale, poli ia tee taumattu ngateva oia, tuvuna ia Abraham.

<sup>10</sup> Poli Natuna ateva Taumattu ngateva ghe sio mae tani pae me asaangi taumattu ghe rauela."

*Kiukiu niaimatoongana tale*

*10 tau ngai nonganongo anna*

(Mat 25:14-30)

<sup>11</sup> Nau eteva laghe nonganongo isaa o inangari Iesu ghe aauliaa, me ghe mene tiuaala tani auliaa kateae kiukiu niaimatoongana, ta poli ang ghe reerekata ejerusalem, me taumattu ngatoa laghe annaa va Iesu aue ekingi tale ia arau o nau eteva.

<sup>12</sup> Ghe uela va, "Kateva namuu ghe lao sio tale patunganue namuu masau tani ghaa ninamuva ekingi, me auena emene kiri mae.

<sup>13</sup> Ghe kolola kasangaulu (10) kapuna tau ngai nonganongo anna me ghe tau lao sio kativilau gol koen\* ta kateva kateva etaira. Me auena ghe kasu, ghe uela etaira va, ‘Am ungu tani mene saoaa mene righi lomose ta amene kiri mae.’

<sup>14</sup> “Taumattu ngatoa tale masalikina atae karika laghe masimasieiniela, me laghe suula kasina etaira tani laa auliaa va, ‘Karika ami aaloanna va ierai enamuu etaimami.’

<sup>15</sup> “Me karika, ta ghe ghaala ninamu ngateae va ekingi, me ghe kiri lao sio tanganuena. Ghe kolola kapuna tau ngai nonganongo anna kasangaulu me tani tara va ngila ghe unguualia mene righi viliki veu tani saoaa tale llo laghe ghaa akasinala o karika.

<sup>16</sup> “Aitiutu eteva ghe lao sio me ghe uela va, ‘Namu ngateva, unem gol koen ativilau, aghe uunguala me aghe mene ghaala kasangauluvilau.’

<sup>17</sup> “Vauna ateva ghe liula va, ‘Masi uunguaam, poli ughe ghelei emasinala tale pisike niungu, ae uitaraa kasangauluae masaliki taatara.’

<sup>18</sup> “Aiaaghalua ateva ghe lao sio me ghe uela va, ‘Namu ngateva, unem gol koen ativilau, aghe uungula me aghe mene gheleila ghalimavilau.’

<sup>19</sup> “Me ghe uela etana va, ‘Me io, ae uitaraa ghalimae masaliki taatara.’

<sup>20</sup> “Mene kateva kapuna tau ngai nonganongo anna ghe lao sio me ghe uela va, ‘Unem gol koen ativilau toko. Aghe suumi elokoilela tale tuku tapiri kalio ateva.

<sup>21</sup> Aghe matautainiola ta io karika masi taumattu io, unim ghaaghaa voto karika kalum, me unim mukemuke voto karika ughe pasala.’

<sup>22</sup> “Namu ngateva ghe liula me ghe uela etana va, ‘Aue uaisakei tale isaa o inangari uaauliaa, io sesa tau ngai nonganongo anna io. Ughe kilakila va aghi karika masi taumattu ieghi, anim ghaaghaa voto karika kalughu, me anim mukemuke voto karika aghe pasala.

<sup>23</sup> Vaalua me karika ughe alokoi ssola uneghi viliki veu tale ale aialokoi viliki veu eteva? Me nau eteva ngaghe kiriaa mae sio ae aghele ghaa tee llo laghe saoaa saela tee me llo aghe tau aatu.’

<sup>24</sup> “Me ghe auliaala ta lo atoa laghe tiitingina akalakalaa va, ‘Am ghaa vella unna gol koen ativilau, me am taue lao ta lo ateva ghe ghaala kasangauluvilau gol koen.’

<sup>25</sup> “Laghe uela va, ‘Namu ngateva, ia ang ghe ghaala kasangauluvilau!’

<sup>26</sup> “Me ghe liula me ghe uela va, ‘Aghaauliusa etaimim va lo ateva euungu aanasa tale voto laghe taula ae la mene saoaa mene kasina, me lo ateva karika euunguaa voto laghe taula etana ae la ghaa velu saa voto isaa etana.

<sup>27</sup> Me isaa o taumattu karika laghe aloanna va aghi akapuira kingi, am ghaaila mae me am uvi ematela emua ta ngetaghi.”

### *Iesu ang ghe aakalakalaa ejerusalem*

(Mat 21:1-11; Mak 11:1-11; Jon 12:12-19)

<sup>28</sup> Nau eteva Iesu ghe ruula tani auliaa llo oia, me ghe kasu emuemuela tani sae ejerusalem.

<sup>29</sup> Nau eteva ang ghe aakalakalaa tale masaliki elua eBetpeis me eBetani tale motouru eteva la kolokolo va Oliv, ghe sungila disaepolo alua,

<sup>30</sup> me ghe uela etairaruva va, “Amalu lao tale ia o masaliki eteae. Me nau amalu kipi sso tale masaliki eteae, ae amalu tara atingina natu donki eteva iriri etingina ia, karika teva taumattu ghe sae toka ta ngetana me ghe iloueinia. Amalu pulakaia, me amalu maeainia oia.

<sup>31</sup> Marova teva ekolomiemalua va, ‘Vaalua me amalu puupulakaia?’ amalu ue etana va, ‘Vau eteva eaaloannaia.’”

<sup>32</sup> Nau lalu ghe lao sio, lalu ghe tarala va llo Iesu ghe auliaala, ghe koronnala.

<sup>33</sup> Nau lalu ghe puupulakaia, tau kienaa ghe kolomilalueluva, “Vaalua me amalu puupulakaia natu donki eteva?”

<sup>34</sup> Lalu ghe liula me lalu ghe uela va, “Vau eteva eaaloannaia.”

<sup>35</sup> Lalu ghe laoainie sio ta Iesu, me lalu ghe pulela uneiraruva aiaasae ngeleka epona tale ghaata kkena eteva, me laghe sausila Iesu tani sae toka sae etana.

<sup>36</sup> Nau eteva Iesu ghe ilou elaolao, taumattu ngatoa laghe alokoi aiaasae ngeleka tapaa salana.

<sup>37</sup> Nau eteva ang ghe aakalakalaa tale voto ateva nongina salana atikirighi ghe laa siosio tale motouru eteva eOliv, ila akapaili lo atoa laghe usiusi Iesu laghe tiuuala tani masimasieili. Laghe kikkinari enamungaili tani kkauaa sae God, ta poli laghe annaa isaa o mirikol laghe tarala Iesu ghe gheleila.

\* **19:13:** gol koen Tale inangari nge Griek, mina. Kateva mina erooroaa aipolipoli ta kotolu ulana. **19:17:** Luk 16:10.

**19:26:** Mat 13:12; Luk 8:18.

<sup>38</sup> “Aue God eghelei emasina ta kingi eteva emaemae tale ararina ataeae Vau ngepona ateva!”

“Luei etoka epona liu, me ita tau sae ararina ataeae God iaaili epona!”

<sup>39</sup> Katoa elome tale ila o taumattu ngatoa Paresi ila laghe ue ta Iesu va, “Tisa, pao rungaala kapum disaepolo atoa!”

<sup>40</sup> Iesu ghe liula me ghe uela etaira va, “Aghaauliaa etaimim va, marova la matua atoka, aue atu etoa la sama anamungaila tani tau sae ararighi eteae.”

<sup>41</sup> Nau eteva ang ghe aakalakala me ghe taatara siola eJerusalem, ghe alousiusi teeila.

<sup>42</sup> Me ghe uela va, “Jerusalem, ghaine tale nau eteva oia aghaloanna va arova ughele kila sa ateva ghelelio me ughele toka tale luei. Me karika, ta isaa o voto eaaisulia etam, me karika urooroo tani tara kila.

<sup>43</sup> Nau too emaemae aue tau ngai ssateem atoa, aue la atulu aivativati eteva, me la talieinio, me la toka rungainio tale pai ekapa.

<sup>44</sup> Aue la tturungio, io me taumattu ngatoa la tokatoka elome etam. Karika aue la rati etoka tiulu atu va aue emene toka saoaa ta mene tiulu, ta poli karika ughe kilala nau eteva God ghe mae sio tani sausio.”

### *Iesu elome tale ale manga ateva*

(Mat 21:12-17; Mak 11:15-19; Jon 2:13-22)

<sup>45</sup> Iesu ghe ssola tale ale ngeleka atiulu tale ale manga ateva, me ghe ameti velu ghoala lo atoa laghe aaitauaa me laghe aaipoliaa elome.

<sup>46</sup> Me ghe uela etaira va, “Uru ngai Manga ateva eue va, ‘Aleghi eteva aue eale ailooloo sae ia,’ me ngam gheleielia va ‘aleira ale niaisulia ia tau niainao atoa.’”

<sup>47</sup> Nau ekapa atoa ghe aapasunga asease voto tale ale manga. Namu ngatoa ta pristi etoa me tau ngai aapasunga tale inangari nipaopao, me lo atoa laghe muemueaa taumattu ngatoa, laghe paepae salana tani uvi emate Iesu.

<sup>48</sup> Me karika laghe rooroo, poli taumattu ngatoa laghe aloannaaili tani nongo Iesu.

## 20

### *Nikokkolomi tale matuutulienaaane Iesu*

(Mat 21:23-27; Mak 11:27-33)

<sup>1</sup> Kateva nau Iesu ghe aapasunga ta taumattu ngatoa elome tale ale ngeleka atiulu tale ale manga ateva, ghe poppopaa masi inangari, me namu ngatoa ta pristi etoa, tau ngai aapasunga atoa tale inangari nipaopao me lo atoa la muemueaa taumattu ngatoa, laghe mae akalakala sio etana.

<sup>2</sup> Me laghe uela etana va, “See ghe tau aatu sio matuutulienaa etam, me see ghe sungiola tani mae ghelei isaa oia voto?”

<sup>3</sup> Iesu ghe liula me ghe uela va, “Aghi tee amene kolomiem, me am liu mae etaghi.

<sup>4</sup> See ghe tau lao sio matuutulienaa ta Jon tani asuu, taumattu ngatoa, o God?”

<sup>5</sup> Laghe ailoela me laghe uela va, “Marova ita ue va, ‘God,’ aue eue va, ‘Me vaalua me karika am ghe aaisesoaa ta ngetana?’

<sup>6</sup> Me marova ita ue va, ‘Taumattu ngatoa,’ taumattu ngakapa atoa aue la osaita tale atu, ta ila, la ghaaiesoaa va Jon propete ia.”

<sup>7</sup> Me laghe liula tani ue va, “Karika ami kilakila va see ghe taula matuutulienaa.”

<sup>8</sup> Me Iesu ghe uela etaira va, “Aghi tee karika aue aghauliaa va see ghe tau mae sio matuutulienaa etaghi.”

### *Kiukiu niaimatoongana tale sesa tau ngeutana atoa laghe aaitaraa utani uaeni etingiu*

(Mat 21:33-46; Mak 12:1-12)

<sup>9</sup> Me ghe tiauala tani kiukiuaa kateae kiukiu niaimatoonga. Ghe uela va, “Kateva taumattu ghe pasala utani uaeni etingiu, ghe taue lao sio ta katoa tau ngeutana tani aitarainia, me ghe kasu emasaeuilila tani laa toka see.”

<sup>10</sup> Ghe ghaala nau eteva tani pariki utani uaeni etingiu, me ghe sungila kateva kapuna tau ngai uungu tani laa ghaa righi ue uaeni tale utani uaeni etingiu, me lo atoa laghe aaitaraa utana atingiu laghe uvi emaamateala me laghe sungi aaoghiela; karika ghe ghaala righi voto.

<sup>11</sup> Ghe mene sungila mene kateva tau ngai uungu; me laghe mene uvi emaamateala, me laghe apalataielia me laghe sungi aaoghiela; ie tee karika ghe ghaala righi voto.

<sup>12</sup> Aiaakotolu eteva tau ngai uungu laghe uvi saasakieiniela me laghe sau velue ghoala eleka.

<sup>13</sup> "Me tau ngumana ghe nnaala va, 'Sa ateva agheleia? Aue asungi lo ateva natughu taita aghaailousiangaililia, me koti aue la oneoneainia.'

<sup>14</sup> "Nau eteva lo atoa laghe aaitaraa utani uaeni etingiu laghe tarala natuna ateva tau ngumana ghe maemae, laghe aailoe va, 'Ia oia taumattu ngateva, auena eghaa peina tamane. Ita uvi ematea, me ita, aue ita ghaa akapa utana atingiu.'

<sup>15</sup> Me laghe sau velue ghoala eleka me la ghe uvi emateala.

"Sa ateva tau ngumana aue egheleia ta ngetaira?

<sup>16</sup> Aue emae me evui emate akapa lo atoa laghe aaitaraa utani uaeni etingiu, me eta lao utana atingiu ta mene kasina ppae taumattu."

Me nau eteva taumattu ngatoa laghe nongola isaa oia inangari, laghe uela va, "Karika emene ghelei evalua o!"

<sup>17</sup> Iesu ghe taatara lao sio etaira me ghe kolomilala va, "Isaa oia voto laghe pitila tale Uru ngai Manga ateva, malloeanina avalue toko?

"Ia o atu eteva tau ngai atulu ale atoa laghe ratiela

ghe aitiutiula tale atu ekapa atoa tani suei ale ateva."

<sup>18</sup> See ukatuu saoaa tale ia o atu eteva, aue utakotokoto. Me arova ia oia atu eteva ekatuu saoaa sae etam, aue utaputuputu."

<sup>19</sup> Me tau ngai aapasunga tale inangari nipaopao atoa me namu ngatoa ta pristi etoa laghe kilala va Iesu ghe auliaala kiukiu niaimatoonga mausi gheeleiaairia, me angila ghe paepae va vaalua la kuneia. Karika laghe roola, ta laghe maamatauta taumattu ngatoa.

### *Tani tau lao takis ta Siisa*

(Mat 22:15-22; Mak 12:13-17)

<sup>20</sup> Tau ngalomasaanga tale inangari nipaopao atoa me namu ngatoa ta pristi etoa laghe paepae salana tani kune Iesu. Laghe suula katoa tani gheleila va voto laghe aauliaa vara mene koronna. Laghe annaa tani ghaaia tale inangari ghe aauliaa, me la rooroo tani tau la Gavana.

<sup>21</sup> Vara me laghe kolomiela va, "Tisa, ami kilakila va inangarim me llo uaapasunga koronna. Karika uaaimassiaa, me uaapasunga ngakoronna salane God.

<sup>22</sup> Vaalua uannaa? Inangari nipaopao eue va masina etaita tani tau lao takis ta Siisa o karika?"

<sup>23</sup> Iesu ang ghe kila vella kamekameaairia taumattu ngatoa oia laghe anna tani ghelei, me ghe uela etaira va,

<sup>24</sup> "Am apasungaala tivilau viliki veu etaghi. See tootoona ateva me ararina ateae o etana?"

Me laghe uela va, "Siisa."

<sup>25</sup> Iesu ghe uela etaira va, "Liuna avalua o me am tau lao llo voto kanna Siisa, me llo voto kanna God am tau lao ta God."

<sup>26</sup> Karika laghe roola tani ghaaia tale inangarina ghe aauliaa tale matavanga. Laghe soghiaala llo ghe liula me laghe paavoola.

### *Matena atoa aue la totu*

(Mat 22:23-33; Mak 12:18-27)

<sup>27</sup> Sadiusi etoa, karika la ghairesoaa tale nitotu tale nimate, katoa etaira laghe mae sio ta Iesu me laghe kolomiela kateva nikokkolomi.

<sup>28</sup> Laghe uela va, "Tisa, Moses ghe pitila va, 'Arova taita ateva emate vulu vauseenna ateva, me karika teva naturirua, teva tuena o nengane taita etani ghaa vause ateva, me ealutu righi natuna lo ateva taita ang ghe matela.'

<sup>29</sup> Ia avalua o, me ghaiitu (7) taita tue me nenga laghe tokatoka. Mua ateva ghe ghaala vause ateva, me karika teva natuna, me ghe matela.

<sup>30</sup> Aiaaghluene ateva taita,

<sup>31</sup> vara me aiaakotolu eteva ghe mene ghaala vause ateva, me ghe nim isaa avaluela o, me taita ghaiitu oio laghe mate akapala, karika laghe alutula righi aliki.

<sup>32</sup> Airuuruu, vause ateva tee ghe matela.

<sup>33</sup> Isaa avalua o, me nau la totu tale nimate, nongina uauliaa, see aue evausenna ia, poli ila akapa laghe laila etana?"

<sup>34</sup> Iesu ghe liula me ghe uela va, "Taumattu tale nau etiulu oia la lailai.

<sup>35</sup> Me lo atoa Vau ngepona ateva aue etaraila va ila ghulughuluena ila va la totu tale nimate, me la toka tale nau ekapa atoa, karika aue la mene lai,

<sup>36</sup> poli karika aue la mene mate. Aue la nongina ensolo atoa. Ila natuna ila God, poli laghe totula tale nimate.

<sup>37</sup> Moses tee ghe apasungaala etaita va taumattu la matemate aue la mene totu. Tale kiukiu eteae ghe pitiela tale nau eteva ghe tarala natu ai erighi ghe ataataia, ghe uela va, ‘Vau ngepona ateva kapuna Goto ia Abraham, me kapuna Goto ia Aisiki, me kapuna Goto ia Jekop.’

<sup>38</sup> Me God ateva, karika va kapuira ia lo atoa matena ila, karika. Kapuira ia lo atoa maulue ila, poli ta taataraane God ila akapa maulue ila.”

<sup>39</sup> Kasina tau ngai aapasunga tale inangari nipaopao laghe liula me laghe uela va, “Masinaaili, Tisa!”

<sup>40</sup> Me karika laghe mene roo poila tani kolomi mene righi nikokkolomi.

*See tuvuna ia Mesaea?*

(Mat 22:41-46; Mak 12:35-37)

<sup>41</sup> Me Iesu ghe uela etaira va, ‘Vaalua me la ue va Mesaea tuvuna ia Deivit?

<sup>42</sup> Poli ia Deivit ghe uela ta vuku eteva ta Sams va,

“Vau ngepona ateva ghe uela ta kapughu Vau eteva va,

“Toka siola tale pai muenna ativilau

<sup>43</sup> lomose ta aghatoka sio lo atoa la sessa teeio euu,

me uatingina saoaa kkem etaira.”

<sup>44</sup> Isaa avalua o, me Deivit ekolokoloa va kapuna Vau eteva. Vaalua me mene tuvuna ia?”

*Am paniem ta tau ngai aapasunga ngatoa tale inangari nipaopao*

(Mat 23:1-36; Mak 12:38-40; Luk 11:37-54)

<sup>45</sup> Nau eteva taumattu ngakapa atoa laghe nongonongo, me Iesu ghe uela ta kapuna disaepolo atoa va,

<sup>46</sup> “Am paniem tale tau ngai aapasunga atoa tale inangari nipaopao. La aloannaaili tani asae masi ghinna me nongina namu ngatoa, me la tingina kasu see, me la aloanna va taumattu ngatoa la soula tale masi inangari nongina oroi taumattu etokatoka. Me la aloannaaili tani toka tale uneira aitokatoka namu ngatoa elome tale ale nivelu eitauua me nongina namu ngatoa la namanama.

<sup>47</sup> La ghaaghha aitautuaa peiira vause raue vulu etoa, me la kamekame tani ghelei aluseaili nilooloo sae. Nau eteva la lao tale niaiskei, aue la ghaa namungaili nimmarikana.”

## 21

*Unna viliki veu vause ateva raue vulu ia ghe taula ta God*

(Mak 12:41-44)

<sup>1</sup> Tale ale manga ateva, Iesu ghe atangarola me ghe tarala taumattu ngatoa tue peipeiena ila, laghe veluvelu viliki veu tale aikaai viliki veu eteva.

<sup>2</sup> Me ghe tara teela vause ateva raue vulu ia, karikaaili righi peina, ghe velu kaaila tapiri viliki veu eluevilau.\*

<sup>3</sup> Me ghe uela va, ‘Aghaaulia ngakoronna etaimim va ia o vause ateva raue vulu ia karika peina, ange kaaili oroi viliki veu, me ngeapalala katoa.

<sup>4</sup> Poli katoa oia oroieilli uneira viliki veu etokatoka, me la nim vella nonga kasina tale aikaai eteva. Me ia o vause ateva karikaaili tivilau eoghi elokoila, ange kapaaailila viliki veu eposoposo tani poli anna inana.”

*Iesu ghe auliaala vaalua aue la tturuu ale manga ateva*

(Mat 24:1-2; Mak 13:1-2)

<sup>5</sup> Katoa laghe aaruua ale manga ateva. Laghe ue va, ‘Masinaaili taataraane atu, me kasina masi voto laghe tau lao sio ta God tani amolumolu emasina ia o ale ateva.’ Me Iesu ghe uela va,

<sup>6</sup> “Isaa o llo am aaruua — nau too emaemae karika teva atu aue etoka saoaa ta mene kateva. Aue taumattu ngatoa aue la puli reerekata isaa akapaaailila oia voto.”

*Sesa nau me niaiuvii aue mae*

(Mat 24:3-14; Mak 13:3-13)

<sup>7</sup> Me laghe kolomila va, ‘Tisa, aue lovisa isaa oia voto aue elutu? Me saa voto aue elutu tani apasunga va ange naula?’

---

<sup>20:37:</sup> Eks 3:6.    <sup>20:42:</sup> Sams 110:1.    \* <sup>21:2:</sup> Tale inangari nge Griek, *ghaluevilau leptoon*. Lepton ghaunaaili etivilau viliki veu, nongina kativilau toea, me 100 lepton erooroo kateva denarius.    <sup>21:3:</sup> 2 Ko 8:12.    <sup>21:6:</sup> Luk 19:44.

<sup>8</sup> Iesu ghe liula me ghe uela va, “Am paniem teva taumattu erau mene kameam. Poli oroi taumattu aue la mae tale ararighi eteae, me la ue va, ‘Aghi Mesaea ieghi.’ Me aue la ghouliaa va nau ange mae akalakalaasio, me am rau mene aimuli teeila.

<sup>9</sup> Am rau mene matautu nau am nongo niaiuvi me nihamakatakata. Isaa o voto etani luto ekasina me karika la ghaaimatoonga va airuuruu tale kosa ateva, ange rekatala.”

<sup>10</sup> Eghe mene auliaa tee lao sio etaira va, “Anua atoa aue la aiuvieinila, me ararimangali etoa tee.

<sup>11</sup> Kinatama rukeruke atoa aue la lutu tale kosa ateva. Maloo atoa aue la lutu tale kasina masaliki me sessa atoa aue la lutu. Aue nihamatoonga sesaaili me matautuna aue elutu elomarase.

<sup>12</sup> “Emua ta isaa akapa o voto, aue la kuneiem me aue am ghaa nimmarikana, me la laoainiem tale ale nivelu eitaua ngatoa tani aisakei, me la atokaiem tale ale mata vooovo. Aue la ghaiei tani atinginaiem emua ta mata kingi etoa me gavana ngatoa tani aisakei, mausi ararighi eteae.

<sup>13</sup> Isaa avalua o me aue eoti salaimim tani ppooaa aikaaiaaimim ta ngetaghi.

<sup>14</sup> Liuna avalua o am rau mene aimonomonosiaa va saa inangari aue am liu etaira,

<sup>15</sup> ta aghi aue atau aatu inangari tani ppooaa me alomasaanga, me tau ngai ssateeimim atoa karika aue la rooroo tani liu.

<sup>16</sup> Tamaimim me kinaimim, tueimim atoa me nengaimim atoa, me mangaliimim atoa me kapuimim atoa, ila tee aue la tauem lao ta tau ngai ssateeimim atoa, me aue la uvi emate katoa etaimim.

<sup>17</sup> Ila akapaaili aue la ssa teeiem poli ararighi eteae.

<sup>18</sup> Me karikaaili tikirighi uu nguruimim aue eraua.

<sup>19</sup> Am tingina akorokorongana, me aue am ghaa maulue ateva tokatoka liu ia.

### *Iesu ghe auliaa teela vaaluua aue la tturuu ejerusalem*

(Mat 24:15-21; Mak 13:14-19)

<sup>20</sup> “Nau eteva am tara ejerusalem tau niaiuvi etoa angila taatalieinia, aue am kila va ejerusalem nauna ange kalakalaala va la turungia.

<sup>21</sup> Tale ia o nau eteva, lo atoa elome ejiudia am ilou sae tale motouru, me see atoa elome ejerusalem am kupi ghoa me am ilou. Me see atoa am tokatoka tale paa ngutana, karika am mene kupi sso ejerusalem.

<sup>22</sup> Poli nau tani ghaa aipolipoli tale sesa gheeleiaaira aJerusalem atoa me voto laghe piti elokoila tale Uru ngai Manga ateva ange lutulutu.

<sup>23</sup> Alousiusi ta lo atoa la suusunuku me lo atoa la sussu tale isaa o nau! Poli namungaili voto sesa tale ia o masaliki eteae, me sessaiae God aue etoka tale isaa o taumattu.

<sup>24</sup> Katoa aue la uvi ematela tale baenata, me katoa aue la ghaaila nongina karavusu etoa tani lao tale kasina anua, anueira ativuu etoa, me aue anueira ativuu etoa la asa tau sio ejerusalem lomasina ta nauira eruu.

### *Maemaeeane Natuna ateva Taumattu ngateva*

(Mat 24:29-31; Mak 13:24-27)

<sup>25</sup> “Aue nihamatootoongana aue elutu tale sinaka ateva me ulana ateva me katto atoa. Tale kosa ateva, taumattu tale anua atoa aue la matautu me karika aue la alomasaanga tee lingi niaangarina manu eteva me manu ghagga ateva.

<sup>26</sup> Me taumattu aue ennangaili me la matautu poli la kila va voto sesa ange maemae tale kosa akapa ateva, poli God aue eghelei voto atoa korokorongana ila elomarase la ghaisisisia.

<sup>27</sup> Tale ia o nau eteva aue la tara Natuna ateva Taumattu ngateva esio tale urukookoo tee sarasarakaniaane me kinatama mallangina ateva.

<sup>28</sup> Nau isaa o voto etiuua tani lutu, am tingina sae me am masimasi, poli nauna Vau negepona tani asaangiem ange akalakalaala.”

### *Kiukiu nihamatoongana tale fig atea*

(Mat 24:32-35; Mak 13:28-31)

<sup>29</sup> Me Iesu ghe mene auliaala kateae kiukiu nihamatoongana, “Am tarala fig atea me mene kasina tana ai.

<sup>30</sup> Nau eteva utara ange vubbuleaa uruna, angu kilala va masi nau tale sinaka ateva ange aakalakalaas.

<sup>31</sup> Liuna avalua o me nau eteva am tara isaa o voto, aue am kila va maemaeaane Natuna ateva Taumattu ngateva nongina kingi ange aakalakalaa.

<sup>32</sup> "Aghaaulia ngakoronna etaimim va ia oia vituu eteva karika poi aue ekapa me isaa o voto aue elutu.

<sup>33</sup> Elomarase me kosa ateva aue lalu kapa, me inangarighi eteva karika poi aue ekapa.

<sup>34</sup> "Am tani taatara amasina. Am rau mene laa ropi see sesa manu va am veeveena, me am rau mene annaa voto tale kosa ateva, ta erau gheleiem va am katuu, me am nim soghi ta ia o nau eteva erekata,

<sup>35</sup> am nannaa va karika aue emae etana. Isaa o voto aue elutu tale taumattu ngakapa atoa la tokatoka tale kosa ateva.

<sup>36</sup> Nau ekapa atoa am anguu taatara me am looloo sae va aue am sarasarakanu tani saanga tale isaa oia voto ange anna tani lutu, me am rooroo tani tingina emua ta matane Natuna ateva Taumattu ngateva."

<sup>37</sup> Ellaa Iesu ghe aapasunga tale ale manga ateva, vara elo alai ghe sae asoaso tale motouru eteva eOliv.

<sup>38</sup> Vara elue talaua poopooa, taumattu ngakapa atoa laghe maemae tale ale manga ateva tani nongoa.

## 22

### *Jiudas ghe aloannala tani taula Iesu*

(Mat 26:1-5, 14-16; Mak 14:1-2, 10-11; Jon 11:45-53)

<sup>1</sup> Nau nivelu eitaua ngateae tani nama verete karika righi isti etana ang ghe aakalakalaa, la kolokoloa va "Pasova."

<sup>2</sup> Namu ngatoa ta pristi etoa me tau ngai aapasunga ngatoa tale inangari nipaopao laghe paepae righi salana tani uvi eisilia Iesu, me laghe maamatauta taumattu ngatoa.

<sup>3</sup> Satana ghe kupila Jiudas la kolokoloa va Iskariot, ia tee kateva ta kasangaulu ghalua (12) disaepolo.

<sup>4</sup> Liuna avalua o me ghe kasula tani laa aippooaa tee namu ngatoa ta pristi etoa me namu ngatoa ta polisi etoa, laghe aaitoiaa ale manga ateva, va vaalua erooroo tani tau lao Iesu etaira.

<sup>5</sup> Laghe masimasiangailiela me laghe uela etana va, "Aue ami tau aatu righi viliki veu."

<sup>6</sup> Jiudas ghe aloannala me ghe tiauala tani pae righi salana tani ghelei va la kune Iesu, nau taumattu ngatoa karika ila.

### *Niaipanipaniala tale Pasova ngateae*

(Mat 26:17-25; Mak 14:12-21; Jon 13:21-30)

<sup>7</sup> Ang ghe ghaala nau eteva tale nivelu eitauaa tale verete karika righi isti etana, me nau niuvi emate sipsipi, me la nama tale ia o Pasova ngateva.

<sup>8</sup> Iesu ghe uela ta Pita me Jon va, "Amalu kasu me amalu laa aipanipaniala ninamanama ateae ta Pasova."

<sup>9</sup> Lalu ghe kolomiela va, "Eaa uanna va angalu laa aipanipanieinia?"

<sup>10</sup> Ghe liula me ghe uela va, "Nau eteva amalu laa sosso tale masaliki taatara ateae, aue amalu sou taita ateva esusuunuki manu tale aikaai manu eteva. Nau eteva amalu tarai, amalu usie sso tale ale ateva.

<sup>11</sup> Me amalu ue ta lo ateva alena ateva va, 'Tisa ngateva eanna tani kila va eaa ia rum atiulu enama inani Pasova tee kapuna disaepolo atoa.'

<sup>12</sup> Me aue ia eapasunga rum atiulu, ia epona tale ale ateva namuu ia, voto akapa isaa etana. Amalu sae aipanipaniala inana etana."

<sup>13</sup> Lalu ghe kasula me lalu ghe lao sio, me lalu ghe tarala voto Iesu ghe auliaala etairaru, me lalu ghe aipanipaniala inana tale Pasova ngateva.

### *Disaepolo atoa laghe namanama teela Iesu*

(Mat 26:26-30; Mak 14:22-26; 1 Ko 11:23-25)

<sup>14</sup> Nau eteva ghe ghaala nau ninamanama, me Iesu me apostolo atoa laghe lao sio tale tevoo tani namanama.

<sup>15</sup> Me ghe uela etaira va, "Aghaaloonaaaili tani namanama teeiem tale lo ateva oia Pasova, me auena aghaa nimmarikana.

<sup>16</sup> Ta poli aghaauliaa etaimim va karika aue amene namanama tale mene teva Pasova lomose ta mallooeania koronna elutu tale ararimangalina ateva God."

<sup>17</sup> Iesu ghe ghaala kapa uaeni eteva, me ghe kaili emasina saela ta God, me ghe uela va, "Am ghaala, me am aikoita see elome etaimim.

<sup>18</sup> Ta poli aghaauliaa etaimim va, karika aue amene ropi righi uaeni lamosina ta God aue eaitoia ngakapa kosa ateva."

<sup>19</sup> Iesu ghe mene ghaala verete ateva, me ghe kaili emasinala, me ghe pirila, me ghe taua lao sio ta kapuna disaepolo atoa, me ghe uela va, "Isaa oia verete ateva malataughu ia, ngatautau aatu. Nau am namaia, am annainaghi nau ekapa atoa."

<sup>20</sup> Nau laghe ruula tani namanama, tale ia o salana atikirighi, ghe mene ghaala kapa ateva airopiropi ia, me ghe uela va, "Ia oia ouna ateva inangari niaippooa ngaitauua tale raeghi eteva aue eakalaa etaimim.

<sup>21</sup> Me lo ateva aue etauegghi lao ta tau ngai ssateeghi etoa, ie tee oia tale tevoo ateva.

<sup>22</sup> Ta poli Natuna ateva Taumattu ngateva aue elao nongina God ghe uela va elao, me alousiusi ta lo ateva ange tautau velua."

<sup>23</sup> Me laghe tiuala tani aikolomieinila va see etaira ange gheelei evalua o.

*See aue tani namuu?*

<sup>24</sup> Karika masau, me angila ghe mene aissakeana tee ninamu ngateae va see etaira aue tani namuu.

<sup>25</sup> Iesu ghe uela etaira va, "Kapuira kingi etoa tau ngeleka atoa, la gheelei taumattu enim uungu aanasa etaira, me lo atoa la aitarainila, la ghaaloanna va taumattu ngatoa la asaesae arariira.

<sup>26</sup> Me am, karika am mene gheelei nongina ila la gheeghelei. Ta lo ateva etaimim namuu ia, etani sio euu nongina teva aliki, me lo ateva emuemuaa niuungu, etani nongina teva tau ngai nonganongo anna.

<sup>27</sup> Am annaa va, see tani namuu ia? Lo ateva etokatoka tale tevoo me enamanama, o lo ateva ekaakaisi anna inana? Lo ateva etokatoka tale tevoo me enamanama. Aghi atokatoka elome etaimim nongina tau ngai nonganongo anna ateva.

<sup>28</sup> Am, am ghe toka teeieghila, nau aghe ghaala nitootoonga.

<sup>29</sup> Me nongina Tamagni ghe tau mae sio ararimangalina ateva tani aitarainia, ngamene tautau aatu ararimangali eteva etaimim tani aitarainia.

<sup>30</sup> Liuna avalua o me aue am namanama me am ropi tale uneghi tevoo ateva tale ararimangalighi eteva, me aue am toka tale uneira aitokatoka namu ngatoa, me am gheelei niaisakei tale kasangaulu ghalua (12) ararimangali nge Israel."

*Iesu ghe uela va Saemon Pita aue eue va karika ekilakilaia*

(Mat 26:31-35; Mak 14:27-31; Jon 13:36-38)

<sup>31</sup> Vara me Iesu ghe mene uela va, "Saemon, Saemon, aghaauliaa etam va Satana ange kolomila va etootoongainam nongina la sausau kirikiri uit.

<sup>32</sup> Me aghe looloo saela mausim Saemon, va unem niaakaiaa karika emene katuu. Me nau eteva ukiriaa mae etaghi, uakorokorongana nengam atoa."

<sup>33</sup> Pita ghe liula ta Iesu me ghe uela va, "Vau eteva, aghi aaipanipaniaa tani usio tani lao tale ale mata voovoo me tani mate teeio."

<sup>34</sup> Iesu ghe liula me ghe uela va, "Aghaauliaa etam Pita, va auena paolo ateva taita ia eaangari elopai, aue uue akasina kotoluaata va karika ukilakilaieghi."

<sup>35</sup> Vara me Iesu ghe kolomilala va, "Fa o nau eteva aghe sungiemla tani laa ppooa masi kiukiui, me karika am ghe ghaala righi aikaai viliki veu, me aikaai ghinna, o aiasae tale keke, am ghe annala mene righi voto?"

Laghe liula me laghe uela va, "Karika."

<sup>36</sup> Me ghe uela etaira va, "Isaa oia arova righi uneimim aikkaai viliki veu, am ghaa tee me uneimim aikkaai ghinna, me arova karika righi iemaimim baenata, am tau uneimim aiaasae ngeleka ateva me la polia, me am poli iemaimim."

<sup>37</sup> Ta poli Uru ngai Manga ateva eue va, "Laghe ioi teeieila va, ie tee sesa taumattu ia, me aghaauliaa etaimim va, isaaa o voto aue elutu etaghi. Nongina saa voto laghe pitila va aue elutu etaghi, ange maemae ta ekaurekati ekapa."

<sup>38</sup> Disaepolo atoa laghe ue va, "Vau eteva, tarala, ghalua toko baenata."

Me ghe uela etaira va, "Ange roola."

*Iesu ghe looloo sae tale motouru eteva eOliv*

(Mat 26:36-46; Mak 14:32-42)

<sup>39</sup> Iesu ghe kupi ghoala me ghe mene saela tale motouru eteva eOliv tani mene looloo sae nongina arau ghe gheeghelei, me disaepolo atoa laghe usiela.

<sup>40</sup> Nau eteva laghe laa sae rekata, ghe uela etaira va, “Am looloo sae va karika am mene katuu tale nitootoonga.”

<sup>41</sup> Me ghe kasu vulilala, me ghe lao tee sio, maamasauaane nongina ugheli osaosa tiulu atu, me ghe suuiaa siola patu kkena me ghe tiaala tani looloo sae.

<sup>42</sup> Ghe looloo sae avalua toko va, “Tamaghi, arova uanna, ughaa velu kapa nimarikana ateva etaghi. Me ughelei nongina aloaloannaam, me karika va aloaloannaaghi.”

<sup>43</sup> Ensolo ateva ghe kasula epona liu ghe sio mae tani akorokoronganai.

<sup>44</sup> Iesu ghe ateateala maamatana namungaili, me karika ghe aamaomao tani looloo sae. Ghe aaupaka, me aupaka ateva ghe akaakalaa sio tale kosa ateva tani nonginaaili rae ateva.\*

<sup>45</sup> Ghe tingina saela nau eteva ghe ruula tani looloo sae, me ghe lao sio ta disaepolo atoa, me ghe tarailala va laghe aseasekanua, poli nialousiusi ghe ghelei emangoolala.

<sup>46</sup> Ghe kolomilala va, “Vaalua me am aseasekanua? Am anguula, me am looloo sae va karika am mene katuu tale nitootoonga.”

### *Judas ghe aitauaala Iesu*

(Mat 26:47-56; Mak 14:43-50; Jon 18:3-11)

<sup>47</sup> Nau ghe tingina aippooaa me tana taumattu ngatoa laghe rekatala. Jiudas, kateva ta kasangaulu ghalua (12) disaepolo, ghe muemueinila. Ghe mae akalakalaa sio ta Iesu, tani ngusua.

<sup>48</sup> Me Iesu ghe uela etana va, “Aghaalousiusi teeio Jiudas, ta vara umene ngusungusueghi tale masi niaingusu, me karika ta angu aaitauaa Natuna ateva Taumattu ngateva ta tau ngai ssateena atoa.”

<sup>49</sup> Nau eteva lo atoa laghe tiitingina tee Iesu laghe tarala sa ateva aue elutu, me laghe uela va, “Vau eteva, erooro va ami aiuvii tale baenata?”

<sup>50</sup> Me kateva etaira ghe sai patela talingana muenna ativilau kapuna tau ngai nongonongo anna ateva namu ngateva ta pristi etoa.

<sup>51</sup> Iesu ghe uela va, “Ange roola!” Me Iesu ghe tulila talingana taumattu ngateva, me ghe mene masinala.

<sup>52</sup> Iesu ghe uela ta namu ngatoa ta pristi etoa, me polisi etoa laghe aaitaraa ale manga ateva, me lo atoa la muemueaa taumattu ngatoa, laghe mae sio tani kuneia va, “Am annaa va aghi amuemua tau niainao atoa, va am mae sio tee tuku ngai me baenata tani kuneieghi?

<sup>53</sup> Me isaa o nau ekapaaiali aghe tokatoka teeiem tale ale manga ateva, me karika am ghe kunekuneieghi? Nau eteva oia ange nauimmi iela, nau eteva sarasarakaniaa saurrom ateva ange muemueinamlia.”

### *Pita ghe uela va etam kilakila Iesu*

(Mat 26:57-58, 69-75; Mak 14:53-54, 66-72; Jon 18:12-18, 25-27)

<sup>54</sup> Laghe kuneiela, me laghe kasueiniela. Laghe laoainie sio tale alena ateva namu ngateva ta pristi etoa. Pita ghe aaimuli, me masuaeili ia etana.

<sup>55</sup> Katoa taumattu laghe gheleila kura ateeae elome tale valavalala ateeae, me laghe toka taliala etana. Me Pita ghe toka teeila siola.

<sup>56</sup> Vause ateva tau ngai nongonongo anna ia ghe taraiela ta ghe tokatoka nongina kura ateeae ghe ramerame, me ghe tara sossolainiela, me ghe uela va, “Ia tee, ia o taumattu ngateva ghe kasukasuu teeia.”

<sup>57</sup> Pita ghe ssakeaala me ghe uela ta vause ateva va, “Karika poi akilakilaia.”

<sup>58</sup> Karika masauna arighi me mene kateva ghe taraiela, me ghe ue etana va, “Io tee kateva etaira.”

Me Pita ghe uela ta taita ateva va, “Karika va aghi tee.”

<sup>59</sup> Kateva aoa ghe lange sio me kateva etaira ghe mene uela va, “Koronnaaili, ia oia taumattu ngateva ghe usiusia, ta ie tee aGalilii ia.”

<sup>60</sup> Me Pita ghe uela ta taumattu ngateva va, “Karika akilakila sa ateva uaaulieinia.” Nau eteva ghe tingina aippooaa me paolo ateva taita ia ghe aangarila.

<sup>61</sup> Vau eteva ghe kiriela me ghe taatara lao sio ta Pita, me Pita ghe annaala inangarina Vau eteva ghe auliaala etana ghe uela va, “Ghaine auena paolo ateva taita ia eaangari, aue kotoluaata uue va utam kilakilaieghi.”

<sup>62</sup> Liuna avalua o me ghe kupi ghoala, me ghe ngala alousiusieiliila.

\* <sup>22:44:</sup> Kasina uru ngai laghe pitila, karika laghe pitila ves 43-44.      <sup>22:54:</sup> Mak 14:53-54.

*Lo atoa laghe aaitoiaa Iesu laghe piipilosia  
(Mat 26:67-68; Mak 14:65)*

<sup>63</sup> Lo atoa laghe aaitoiaa Iesu laghe tiuaala tani pilosia, me laghe uviuvia.

<sup>64</sup> Laghe sum rungaala matane, me laghe kookolomia va, “Uauliaa inangarina God va see ange posalaiola.”

<sup>65</sup> Me laghe aauliaa oroeiili inangari karika masina tani auliaa teeia.

*Iesu ghe tinginala emua ta kansolo atoa  
(Mat 26:59-66; Mak 14:55-64; Jon 18:19-24)*

<sup>66</sup> Nau eteva ghe paila, namu ngatoa me namu ngatoa ta pristi etoa me tau ngai apasunga ngatoa tale inangari nipaopao, laghe toka aitauaala me laghe ssoaala Iesu etaira.

<sup>67</sup> Me laghe uela va, “Arova Mesaea io, uauliaa etaimami.”

Me Iesu ghe liula me ghe uela va, “Arova aghauliaa etaimim, karika poi au am aiesoaa etaghi.

<sup>68</sup> Me arova aghele kolomiem va vaalua nannaaimim tale Mesaea, karika poi au am ghele liu.

<sup>69</sup> Me nau too emaemaе karika masau me au Natuna ateva Taumattu ngateva au etoka tale pai muenña ativilau ta God ateva sarasarakananaili ia.”

<sup>70</sup> Laghe kolomiela va, “Ia avalua o, me io Natuna io God?”

Ghe liula me ghe uela va, “Ngam auliaala va aghi Natuna aghi God.”

<sup>71</sup> Laghe uela va, “Sa ateva inangari ita mene laa pae ta mene righi taumattu? Ta angita tani nongola ta paane.”

## 23

*Laghe laoaa sio Iesu ta Paelat  
(Mat 27:1-2, 11-14; Mak 15:1-5; Jon 19:28-38)*

<sup>1</sup> Vara me ilia akapa kansolo atoa laghe tingina saela me laghe kasueiniela, laghe laoainie sio ta Paelat.

<sup>2</sup> Me laghe tiuaala tani auliaa teeia. Laghe ue va, “Ngami ghe tarala taumattu ngateva etiitiuaa ppae kasina ninannaa tani ghelei saasakiaa tokatokaa taumattu. Karika eloanna va ami tau lao takis ta Siisa, me eue va ia Mesaea ngateva, kingi ia.”

<sup>3</sup> Paelat ghe kolomila Iesu va, “Io kapuira kingi io ajiu etoa?”

Iesu ghe liula me ghe uela va, “Ue, nongina uaauliaa.”

<sup>4</sup> Paelat ghe auliaala ta namu ngatoa ta pristi etoa me taumattu ngatoa va, “Karika ngatarala righi sesa gheeleiaane taumattu ngateva oia.”

<sup>5</sup> Me laghe aaulia ngasarasarakanava, “Ekasukasu ekapa see oia ejitudia, me etiitiuaa voto sesa tale voto eaapasunga tale taumattu ngatoa. Ghe tiuaala eGalilii me ange mae sio eriere.”

*Paelat ghe suu tau lao sio Iesu ta King Herot*

<sup>6</sup> Tale nongonongoaane Paelat tale isaa o voto, ghe kolomila va, “Taumattu ngateva oia aGalilii ia, o karika?”

<sup>7</sup> Nau eteva ghe kilala va Iesu ghe tokatoka tale pai etivilau King Herot ghe aitarainia, ghe sungi taue lao sio ta Herot. Isaa o nau, Herot ghe sae mae eJerusalem.

<sup>8</sup> Nau eteva Herot ghe tarala Iesu, ghe masimasieiliila, ta poli ang ghe aloanna vella tani tarai. Poli tale uuunguaane ghe nongonongo, me ghe aloannaaili tani tarai eghelei righi mirikol.

<sup>9</sup> Eghe kolomiela tale oroi nikokkolomi, me Iesu karika ghe liu poila.

<sup>10</sup> Namu ngatoa ta pristi etoa me tau ngai apasunga ngatoa tale inangari nipaopao laghe tiitingina, laghe aauliaa teeia inangari sarasarakananaili.

<sup>11</sup> Herot me kapuna tau ngai uvii etoa laghe piipilosia, laghe kangkangainia, me laghe amolomolu emasinaaili, me laghe sungiela ghe mene lao sio ta Paelat.

<sup>12</sup> Ia o nau eteva, Paelat me Herot lalu ghe aikapukapuaala, poli nau too ang ghe lao sio lalu ghe aaisessaii.

*Paelat ghe uela va Iesu emate  
(Mat 27:15-26; Mak 15:6-15; Jon 18:39-19:16)*

<sup>13</sup> Paelat ghe kolo aitauaala namuu ta pristi etoa, namu ngatoa me taumattu ngatoa.

<sup>14</sup> Me ghe uela etaira va, “Am maeeaa sio taumattu ngateva oio etaghi poli am ue va ia etiitiuaa ppae kasina ninannaa tani ghelei saasakiaa tokatokaa taumattu. Ghe tiitingina

emua etaimim me aghe kolomiela kasina nikokkolomi, me aghe tarala va karika righi gheeleiaane sesa.

<sup>15</sup> Ta nim nongina Herot ange sungi aaoghie mae sio etaita. Am taatara va karika righi sesa gheeleiaane va eghaa nimate.

<sup>16-17</sup> Liuna avalua o anim parua, me atau velua.”\*

<sup>18</sup> Katengaata nonga ta laghe aiovaova ngalokoila tani ue va, “Ukasuaa taumattu ngateva ona, me utau velu Barabas emae etaimami!”

<sup>19</sup> (Barabas laghe atokai ssola tale ale mata voovoo, ta poli ia ghe muemua niamakatakata tale masaliki taatara, me ghe aiuvi ematela.)

<sup>20</sup> Poli aaloannaane tani tau velu Iesu, Paelat ghe mene kolo taula taumattu ngatoa.

<sup>21</sup> Me laghe ovaova atingina me laghe ue va, “Avukalaia saela tale aikotoo!”

<sup>22</sup> Aiaakotonna ghe mene uela etaira va, “Poli saa? Sa ateva voto sesa taumattu ngateva oio ghe gheleila? Karika ngaghe tarala righi gheeleiaane sesa va emate, liuna avalua o apurua me atau velua.”

<sup>23</sup> Laghe ovaova me laghe akorokorongana va esae vukala tale aikotoo. Uneira niaore ghe koronnala.

<sup>24</sup> Paelat ghe mnala va eaimuli tee aaloannaairaa.

<sup>25</sup> Ghe tau vella taita ateva laghe aloannaiela ghe tokatoka tale ale mata voovoo mausi ghe muemua niamakatakata me ghe aiuvi ematela, me ghe taula Iesu tale aloannaairaa.

*Laghe avukala saela Iesu tale aikotoo*

(Mat 27:32-44; Mak 15:21-32; Jon 19:17-27)

<sup>26</sup> Nau eteva tau ngai uvii etoa laghe kaakasueinia elao lao, laghe kune atokala Saemon atala nge Saerini ia, ghe rekata sae mae me ghe aloanna tani sso tale masaliki taatara atae. Me laghe tau lao sio aikotoo ateva etana va esaua, me eaimuli tee Iesu.

<sup>27</sup> Orieili taumattu ngatoa laghe aaimuli tee Iesu, me elome etaira vause atoa laghe alousiusi teeia.

<sup>28</sup> Iesu ghe kiriela me ghe uela etaira va, “Vauseni nge Jerusalem atoa, am rau mene alousiusi teeieghi. Am alousiusi teeiem me natuim atoa.

<sup>29</sup> Ta poli kateva nau aue emae, aue am ue va, ‘Nimasimasi tale vause atoa kina ngere ilia, lo atoa karika righi naturira, me lo atoa karika laghe sussu.’

<sup>30</sup> Tale isaa o nau,

“Aue la kolo motouru etoa va, “Am katuu saoaala etaimami!”  
me saesaena atoa va, “Am akouemamila!”

<sup>31</sup> Taumattu ngatoa la gheelei teeieghi, me karika aghe gheleila righi voto sesa. Alousiusi etaimim arova auena la gheelei teeiem, poli am ghe gheleila voto sesa.”

<sup>32</sup> Mene ghalua taumattu, gheeleiaairarua sesa, laghe ghaa teelaluelu tani laa uvi emateluala.

<sup>33</sup> Nau eteva laghe lao sio tale voto ateva la kolokoloa va “Voto ateva arova Riu uru taumattu ngateva” etana, tale ia o voto ateva laghe avukalaie saela tee lo alua gheeleiaairarua sesa, kateva tale pai muenna ativilau, me kateva tale pai uaise ativilau.

<sup>34</sup> Iesu ghe uela va, “Tamaghi, ukkuluaa, ta poli karika la kilakila va voto ateva la gheeleia sesaaili ia.”† Me tau ngai uvii etoa laghe tiauala tani anamisi tani aikoita ghinnanina.

<sup>35</sup> Taumattu ngatoa laghe tingina taatara, me namu ngatoa laghe attara teeia. Me laghe ue va, “Ghe asaangila katoa, tau veluela me easaangia, kotiva kapuna Mesaea ia God, me God ghe suoitongainiela.”

<sup>36</sup> Tau ngai uvii tee atoa laghe saela, me laghe piipilosia, me laghe tau lao sio manu eteva sarasarakania ia,

<sup>37</sup> me laghe ue va, “Kotiva kapuira kingi io ajiu etoa, uasaangio.”

<sup>38</sup> Epona etana laghe pitila tuku inangari eteva va, “Ierai oia kapuira kingi ia ajiu etoa.”

<sup>39</sup> Kateva ta lo alua gheeleiaairarua sesa ghe aauliaa tee Iesu va, “Karika io va Mesaea io? Uasaangio me uasaangi teeengualu!”

<sup>40</sup> Mene kateva ghe sessaiela tani nongo, me ghe uela va, “Karika umaamatauta God? Poli kateva nonga ia aipolipoli eteva angita ghaaiela.

<sup>41</sup> Italu, italu ghaaghia aipolipoli tale gheeleiaaitalu sesa. Me ia oio taumattu ngateva karika righi sesa gheeleiaane!”

<sup>42</sup> Vara me ghe uela va, “Iesu, unnainaghi nau eteva umae tale ararimangalim ateva.”

\* <sup>23:16-17</sup>: Kasina uru ngai laghe pitila, laghe uela va <sup>17</sup> Me etani tau velu kateva taumattu elao etaira tale nivelu etaita ngateae la kolokoloa va Pasova.    <sup>23:29</sup>: Luk 21:23.    <sup>23:30</sup>: Osea 10:8; Autu 6:16.    <sup>23:34</sup>: Sams 22:18.

† <sup>23:34</sup>: Kasina uru ngai laghe pitila, karika laghe pitila isaa oia inangari.    <sup>23:35</sup>: Sams 22:7-8.    <sup>23:36</sup>: Sams 69:21.

<sup>43</sup> Iesu ghe liula me ghe uela va, “Aghaaulia ngakoronna etam, ghaine angu toka teeieghila tale umana utana atingiu God.”

### *Matemateaane Iesu*

(Mat 27:45-46; Mak 15:33-41; Jon 19:28-30)

<sup>44</sup> Pai ngelo sinaka ativilau<sup>‡</sup> ghe mae sio, me saurrom ateva ghe akou ekapala kosa ateva lomosina ta 3 kilok elo alai,<sup>§</sup>

<sup>45</sup> ta poli sinaka ateva ghe saurromienala tale ia o voto ateva. Me kalio atiulu ghe vuuvukala tale ale manga ateva ghe tarriila me ghe ghaluevilaula.

<sup>46</sup> Iesu ghe sama anamuula me ghe uela va, “Tamaghi, maamauluaaggi ngatautau aatu ta nimam.” Nau eteva ghe auliaala llo me ghe ainoana aruula me ghe matela.

<sup>47</sup> Kapuira namu ngateva tau ngai uvii etoa ghe tarala isaa o voto ghe lutula, ghe tau saela God me ghe uela va, “Koronna, ia oia taumattu ngateva tau ghulughuluena ia.”

<sup>48</sup> Oroi taumattu laghe mae sio laghe tarala sa ateva ghe lutula, laghe aalousiusi me laghe kasula.

<sup>49</sup> Me lo atoa laghe kilakilaia me vause atoa laghe usiela arau eGalilii laghe tiitingina amasau, me laghe tarala sa ateva ghe lutula.

### *Laghe kaiala Iesu*

(Mat 27:57-61; Mak 15:42-47; Jon 19:38-42)

<sup>50</sup> Kateva taita, ararina atuae ta Josep, ia kateva ta kansolo atoa me masi taumattu ia me ghulughuluena ia,

<sup>51</sup> karika ghe lao aitauua tee sio nannaaira kansolo atoa laghe mnaala me voto laghe gheleila. Tanganuena tale masaliki taatara atuae eArimatia, kateae uneira masaliki taatara ajiu etoa. Me ghe toitoi tani tara ararimangalina ateva God.

<sup>52</sup> Ghe lao sio ta Paelat me ghe kolomila Iesu etana.

<sup>53</sup> Me ghe ghaaiela me ghe sumuela tale kalio, me ghe alokoielo tale lienga atuae laghe kai essola tale atu. Karika laghe alokoi poi teva taumattu etana.

<sup>54</sup> Nau eteva oia nau niaimonomonosiaa ia, me nau manga ateva ang ghe aakalakalaa.

<sup>55</sup> Vause atoa laghe mae aitauua tee sio Iesu eGalilii laghe mene usila Josep, laghe tarala lienga atuae, me laghe tarala vaalua laghe alokoie ssola.

<sup>56</sup> Vara me laghe lao sio tanganueira, laghe aimonomonosiaala voto masi ngusungusuaane. Me laghe ainoanala tale nau manga ateva nongina inangari nipaopao eaauliaa.

## 24

### *Iesu ghe mene totula*

(Mat 28:1-10; Mak 16:1-8; Jon 20:1-10)

<sup>1</sup> Me tale aitiuti eteva nau, elue talaua poopoo, vause atoa laghe ghaala voto masi ngusungusuaane laghe aimonomonosiaala me laghe lao sio tale lienga niaikkaiia ngateae.

<sup>2</sup> Me laghe tarala atu eteva angila ghe atakiri veluela nongina laghe atingina rungaala atamani lienga niaikkaiia ngateae.

<sup>3</sup> Laghe kupi ssola me karika laghe tarala Vau eteva Iesu.

<sup>4</sup> Laghe tingina nannaa, vara me laghe tarala taita alua lalu ghe tiitingina akalakalaa etaira, mallanga ateva tale ghinnaniiraru.

<sup>5</sup> Vause atoa oia laghe matautula, me laghe tturru siola tapaa kosa, me taita alua oia lalu ghe uela etaira va, “Vaalua me am paepae taumattu sakesake nongina taumattu matena?

<sup>6</sup> Karika ia oia; ange totula! Am rooroo tani annaa nongina ghe auliaala etaimim nau eteva ghe tokatoka arau eGalilii.

<sup>7</sup> Ghe uela etaimim va, ‘Aue la tau lao Natuna ateva Taumattu ngateva ta nimaira tau ngai ghelei ssavoto atoa, me aue la avukalaie sae tale aikotoo ateva, me aue kotonna ateva nau aue emene totu.’ ”

<sup>8</sup> Me laghe nnaala isaa oia inangari Iesu ghe auliaala.

<sup>9</sup> Me laghe kasu vulila lienga niaikkaiia ngateae. Nau eteva laghe kiriaa lao sio, laghe kiukiuala isaa oia voto ta kasangaulu kateva (11) disaepolo, me mene katoa taumattu.

<sup>10</sup> Meri aMakdala ia, Joana, me Meri kinna Jeimis, me mene kasina vause, laghe auliaala isaa oia voto ta apostolo atoa.

<sup>11</sup> Me laghe nannaa va vause atoa laghe auliaa kapa atoa, me karika laghe aiesoaala inangariira.

<sup>‡</sup> **23:44:** Pai ngelo sinaka ativilau Tale inangari nge Griek, ghaonomina (6) ateva aoa.      <sup>§</sup> **23:44:** 3 kilok elo alai Tale inangari nge Griek, ta aiaaghasiona (9) ateva aoa.      **23:45:** Hib 6:19-20; 10:19-20.      **23:56:** Eks 20:10; Diut 5:14.

**24:6:** Luk 9:22.

<sup>12</sup> Vara me Pita ghe tingina saela me ghe ilou lao sio tale lienga niaikkia ngateae, ghe turruua siola me ghe tarala nonga kalio, me ghe oghiaa lao sio tanganuena, me ghe nnangailila isaa o voto ghe lutula.

*Nikasu tani lao Emmaus  
(Mak 16:12-13)*

<sup>13</sup> Ie nonga o nau eteva ghalua tana kapuna Iesu lalu ghe laolao tale kateae masaliki la asease va Emmaus, erooroo kasangaulu kateva (11) kilomita\* tani kasu eJerusalem me tani lao etana,

<sup>14</sup> me lalu ghe kiukiuaa isaa akapa oia voto ghe lutula.

<sup>15</sup> Lalu ghe aaikolomi me lalu ghe kiukiui, me Iesu ghe sokotilaluela me ghe kasu eitauaa teeilaluela;

<sup>16</sup> God ghe ghelei rungainilaluela va lalu rau mene tara kila Iesu.

<sup>17</sup> Iesu ghe uela etairarua va, "Sa eteva amalu kiukiueinia nau eteva amalu kasukasu emaemae?"

Lalu ghe tinginala, me taatarairarua ghe alousiusinnala.

<sup>18</sup> Kateva etairarua, ararina ataeae ta Kliopas, ghe liula me ghe uela etana va, "Koti io nonga kateva taumattu eJerusalem karika ukilakila saa voto ghe lutula isaa to nau ang ghe lao sio, no?"

<sup>19</sup> Iesu ghe kolomilaluela va, "Saa voto?"

Lalu ghe liula me lalu ghe uela va, "Voto ghe lutula ta Iesu aNasareti ia. Ia oia taumattu ngateva propete ia, me inangarina me gheeleiaane sarasarakanan ta matane God me taumattu ngatoo.

<sup>20</sup> Kapuita namu ngatoa ta pristi etoa me mene katoa tau ngai toitoi laghe tau veluela me laghe ubi emateala tale aiktooo.

<sup>21</sup> Ami ghe nannaa va ia oia taumattu ngateva aue ghe ghaa oghi ita aIsraeli etoa! Me tee, ghaine ange kotonna atevala nau isaa oia voto ghe lutula.

<sup>22</sup> Me tee, katoa kapuimami vause la asoghisoghiemamila; nau la siola nongina laghe alokoila Iesu,

<sup>23</sup> me karika la taraiela. La oghila, me la uela va la tara nongala ensolo alua, me ensolo alua lalu uela va ange totula.

<sup>24</sup> Me katoa kapuimami la lao sio nongina laghe alokoila Iesu, me la tarala va koronna llo vause atoa la ghauliaala, poli karika la taraiela."

<sup>25</sup> Me Iesu ghe uela etaira va, "Alokapakapa iemalua? Aanasaaili iemalua tani aiesoaa voto akapa propete atoa laghe auliaala!

<sup>26</sup> Karika amalu kilakila va Mesaea etani ghaa mua nimmarikana tale isaa o voto me auena ekupi sso tale mallangina ateva?"

<sup>27</sup> Vara me Iesu ghe kiri tau lao sio etairarua saa voto laghe auliaala ekiukiueinia elome tale Uru ngai Manga akapa ateva. Etiitiuaa tale unna vuku Moses me voto propete atoa laghe pitila.

<sup>28</sup> Vara angilotolu ghe reerekata tale masaliki eteae lalu ghe laolao etana, me Iesu ang ghe gheelei va ghe kasu vulilalua.

<sup>29</sup> Me angilalu ghe gheelei rungarungainia tani ue va, "Ita ghaso. Sinaka ateva ange laa siosio, me ghaisa ngarighi evoo." Me ghe kupi ssola tani toka teeilalua,

<sup>30</sup> Nau eteva ghe toka aitauaa teeilalue siola tale tevoo ateva, ghe ghaala verete, ghe kaili emasinala, ghe pirila me ghe tiauala tani tau lao etairarua.

<sup>31</sup> Me matairarua ghe otila, me lalu ghe tara kilaiela, me ghe aikapakapaaaiila tale taatarairarua.

<sup>32</sup> Me angilalu ghe aikolomieinilalua va, "Karika va isaa oia voto eataatala tale urunguitaniiitalua nau eteva esamasama teeitalua tapaa salana me nau ekiri tau mae sio Uru ngai Manga ateva etaitalua."

<sup>33</sup> Arvaeangaila tala lalu ghe tingina saela me lalu ghe kiriaa siola eJerusalem. Me lalu ghe tarala kasangaulu kateva disaepolo me mene katoa kapuira taumattu laghe tokatoka aitauaa

<sup>34</sup> me laghe ue va, "Koronna! Vau eteva ange totula me erekataala ta Saemon."

<sup>35</sup> Me taita alua lalu ghe kiukiuaala sa ateva ghe lutula tapaa salana, me vaalua lalu ghe tara kilala Iesu nau eteva ghe pirila verete.

*Iesu ghe rekataala ta disaepolo atoa  
(Mat 28:16-20; Mak 16:14-18; Jon 20:19-23; Apos 1:6-8)*

\* <sup>24:13:</sup> kasangaulu kateva (11) kilomita Tale inangari nge Griek, 60 stadia.    <sup>24:21:</sup> Luk 19:11; Apos 1:6.    <sup>24:24:</sup> Jon 20:3-10.    <sup>24:26:</sup> Luk 9:22.    <sup>24:27:</sup> Sams 22:1-21; Ais 53.    <sup>24:34:</sup> 1 Ko 15:4-5.

<sup>36</sup> Nau eteva laghe toka kiukiuua isaa o voto me katengaata ta Iesu ghe tingina polakila elome etaira, me ghe uela etaira va, "Luei aue etoka aitauua teeiem."

<sup>37</sup> Laghe soghila me laghe matautula, ta laghe annaa va laghe tarala raroaina ateva Iesu.

<sup>38</sup> Ghe uela etaira va, "Vaalua me am soghila? Vaalua me nannaaimim eghaaghalua?

<sup>39</sup> Am tarala nimaghi me kekeghi. Aghi oia! Am posoaghila me am tara; raroai eteva karika righi malatauna me riuna, nongina aghi!"

<sup>40</sup> Nau eteva ghe auliaala voto oia me ghe apasungaala nimane me kekena.

<sup>41</sup> Laghe masimasieilila me laghe soghila tani tara Iesu, me karika laghe aaiesoaa va voto laghe tarala koronna, me Iesu ghe kolomilala va, "Righi aneimim inana?"

<sup>42</sup> Laghe tau lao sio tuku kko arighi laghe tungi esaela tale kura,

<sup>43</sup> ghe ghaaielala, laghe taatara me ghe namaielala.

<sup>44</sup> Ghe uela etaira va, "Isaa oia voto ngaghe auliaala etaimim nau eteva aghe tokatoka teeiem. Isaa akapa voto laghe piti elokoila elome tale kanna inangari nipaopao Moses, propete atoa me Sams, etani lutu ekoronna."

<sup>45</sup> Me ghe otila nannaairaa va la tara kila Uru ngai Manga ateva.

<sup>46</sup> Ghe uela etaira va, "Isaa o voto laghe piti elokoila va: Mesaea aue emmarikana me aue emate, me aue emene totu tale nimate tale kotonna ateva nau,

<sup>47</sup> me aue la ppooaa ninna ngaioghioghiaa tale ararina atea, me nikkaluaa tale unguuaa ssavoto, aue erooa ngakapa kosa ateva, etiuua ejerusalem.

<sup>48</sup> Am oia am ghe tarala me aue am ppooaa isaa oia voto.

<sup>49</sup> Aghi aue asungi tau aatu sa ateva Tamaghi ghe aulieiniela tale inangari nialokoi; am toka arau oia tale masaliki taatara atea lomose ta am ghaa sarasarakana aue ekasu epona liu."

*Iesu ghe saela epona liu*

*(Mak 16:19-20; Apos 1:9-11)*

<sup>50</sup> Vara me ghe kasueinilala, me laghe lao sio eBetani, ghe atingina saela nimana epona me ghe arangiseilala.

<sup>51</sup> Nau eteva ghe aarangiseila, me ghe kasu vulilala me God ghe ghaiae saela epona liu.

<sup>52</sup> Me laghe kkaueiniela, me laghe oghi lao sio ejerusalem tee nimasimasi.

<sup>53</sup> Laghe nim tokala o tale ale manga ateva me laghe tautau sae ararina atea God.

**Masi kiukiu  
Jon  
ghe pitiela  
Inangari emuemua**

Jon kateva ta kasangaulu ghalua (12) disaepolo, me easeasea va “lo ateva disaepolo Iesu ghe ailousieinia”. Ghe pitila masi kiukiu tale ia oia vuku eteva poli ghe aloannala va taumattu la aiesoaa ta Iesu me la ghaar maulue ateva tokatoka liu ia (20:31). Jon epoppoaa Iesu va Inangari eteva, ghe tokatoka tee God emua arau.

Jon karika ghe pitila teva kiukiu niaimatoonga, ta ghe pitila kasina mirikol Iesu ghe gheleila, me easeasela va “niaimatoongana atoa”, me ghe pitila voto Iesu ghe apasungaala etaira. Ghe pitila orioeili inangari tale saa voto Iesu ghe apasungaala ta kapuna disaepolo atoa tale ia o voo ngateva laghe kuneiela, me oroi voto ta Spirit Manga ateva. Jon eaauliaa va ghe tarala Iesu nau ghe matela, me ghe mene taraiela nau ghe totula tale nimate.

**Tani kila amuemua**

Aitiutu inangari 1:1-18

Iesu ghe uungu me ghe apasunga 1:19-12:50

Taumattu ngatoa laghe aaulia ngaotu Iesu 1:19-51

Aitiutu tale uunguaane Iesu 2:1-4:54

Niaimatoongana atoa me taumattu la sessa tee Iesu 5:1-7:52

Vause ailai salosaloaa eteva 7:53-8:11

Iesu ghe apasungaala me ghe gheleila niaimatoongana atoa 8:12-10:42

Iesu ghe totula Lasarus tale nimate, me ghe ssola eJerusalem 11:1-12:50

Matemateane me tottotuaane Iesu 13:1-20:31

Airuuruu eteae ninamanama tee Iesu 13:1-30

Iesu ghe apasungaala ta disaepolo atoa 13:31-16:33

Iesu ghe loolo sae mausii disaepolo atoa 17:1-26

Laghe kunela Iesu, laghe gheleila niaisakei, me Iesu ghe matela 18:1-19:42

Tottotuaane Iesu 20:1-31

Iesu, Pita me Jon 21:1-25

*Inangari eteva ghe taumattu*

<sup>1</sup> Emua arau, nau karika righi voto ghe lutu, Inangari eteva ghe tokatoka. Ghe tokatoka tee God, me ie tee Goto ia.

<sup>2</sup> Emua arau, ia ghe tokatoka tee God.

<sup>3</sup> Tale ia o Inangari eteva God ghe ghelei ekapala voto. Karika righi voto God ghe gheleila aue ghe lutu arova Inangari eteva karika ia.

<sup>4</sup> Maulue ateva etokatoka ta ngetana, me maulue ateva, mallangiira ia taumattu ngatoa.

<sup>5</sup> Ia o mallanga ateva, elallaa tale saurrom ateva, me saurrom ateva karika erooroo tani ghelei epalaia.\*

<sup>6</sup> God ghe suula taumattu ngateva, ararina ateaee ta Jon.

<sup>7</sup> Ghe mae sio tani auliaa mallanga ateva oia ta taumattu ngatoa, poli ghe aloanna va ilia akapa la ghaisoaa inangarina.

<sup>8</sup> Jon karika va mallanga ia. Ia ghe nim mae sio tani ppooa ngaotu inangarina mallanga ateva.

<sup>9</sup> Mallanga ateva koronna ia ghe sso mae tale kosa ateva, me emaamallanga tale taumattu ngakapa atoa.

<sup>10</sup> Ia o Inangari eteva ghe tokala oia tale kosa ateva, me arongona ta God ghe gheleila kosa ateva tale ia o Inangari eteva, me karika teva ghe kilakilaia.

<sup>11</sup> Ghe tani mae sio tanguenua, me kapuna atoa karika laghe aikoloainiela.

<sup>12</sup> Katoa tana taumattu laghe aikoloainiela, me laghe aiesoala etana, me tale ararina ateaee. Liuna avalua o, me ghe tau lao sio niavauvau eteae va ila natuna ila God.

<sup>13</sup> Karika va natuna ila God tale raeira taumattu ngatoa, me aloannaaira taita atoa me vause atoa, me nannaa taita atoa. Nim ia God ghe gheleilala va natuna ila.

<sup>14</sup> Inangari eteva ghe taumattula, me ghe toka teeiemamila. Ami ghe tarala naana-munganiaane ateva tale ie nonga o Natuna ateva, Tamana ghe sungiela. Ia pasu ia tale maamasinaane me inangari koronna.

<sup>15</sup> Jon ghe aulieiniela nau ghe sama anamungailila me ghe uela va, "Ia oia taumattu ngateva aghe aaulieinia va ae emae. Ia namuu ia etaghi, me aghi ghauna aghi etana, poli ia ghe tokala arau, me avirina aghe lutula."

<sup>16</sup> Poli pasu ia tale maamasinaane, liuna avalua o me ita ghaaghha asease niarangise.

<sup>17</sup> Poli God ghe tau lao sio inangari nipaopao ta Moses, me Moses ghe tau mae sio etaita, me Iesu Karisto ghe tau lao sio maamasinaane me inangari koronna.

<sup>18</sup> Karika poi teva ghe tara God. Natuna nonga, ia koronna ia va Goto ia me kalakalanginaaili ia ta Tamana, ia ghe apasungaala etaita va God vaalue ia.

*Jon tau ngai aasuu ia ghe aulia ngaotula Iesu  
(Mat 3:1-12; Mak 1:2-8; Luk 3:15-17)*

<sup>19</sup> Ajiu etoa laghe suula pristi etoa me Livae<sup>†</sup> atoa eJerusalem tani laa kolomi Jon va ia see.

<sup>20</sup> Jon karika ghe aisuliaala etaira, me ghe uela etaira va, "Karika aghi va Mesaea ieghi."

<sup>21</sup> Laghe mene kolomiela va, "Io Elaija?"

Ghe liula me ghe uela va, "Karika."

Me laghe mene kolomiela va, "Io Propete io?"

Ghe mene liula me ghe uela va, "Karika."

<sup>22</sup> Vara me laghe uela etana va, "Me uee va io see? Me ami laa ghauliaa ta lo atoa la sungiemamila tani mae kolomi va io see."

<sup>23</sup> Jon ghe liula tale inangarina prope Aisaea ghe uela va, "Aghi lingi ngalo taumattu ngateva ekolokolo tale voto ateva karika righi taumattu etokatoka etana ghe ue va, 'Ghelei eghulughuluunala salane atikirighi Vau eteva.'"

<sup>24</sup> Elome tale lo atoa laghe lao sio tani kolomi Jon, katoa etaira Paresi ila.

<sup>25</sup> Laghe kolomiela va, "Vaaluua me uaasuu taumattu me karika va Mesaea etam, karika va Elaija etam me karika va Propete io?"

<sup>26</sup> Jon ghe uela etaira va, "Aghi aghaasuuem tale manu, me kateva elome etaimim karika am kilakilaia.

<sup>27</sup> Arongo ta aghi aghe muemue mae sio, me karika masi taumattu ngieghi tani pulaka velu oasa tale unna aikasukasus elua, ia ae eaimuli etaghi."

<sup>28</sup> Isaa o voto ghe lutula eBetani tale pai kativilau ejordan, nongina Jon ghe aasuu.

*Natuna sipsipi eteva God*

<sup>29</sup> Mene kateva nau me Jon ghe tarala Iesu ghe maemae aloi etana me ghe uela va, "Am tarala! Taumattu ngateva oia, natuna sipsipi ia God! Ia ae eghaa velu ssavoto tale kosa ateva.

<sup>30</sup> Ia aghe aulieiniela etaimim, nau aghe ue va, 'Kateva taumattu aue emae, ia namuu ia ta getaghi, poli ghe tokala arau, me avirina aghe lutula.'

<sup>31</sup> Karika aghe kilala va ia see, ta anim aasuu taumattu tale manu va ae aIsrael etoa la taraia."

<sup>32</sup> Jon ghe aulia ngaotula ta taumattu ngatoa, ghe uela va, "Aghi tee okae, me aghe tarala Spiriti eteva ghe kasula epona liu nonginaaili va ghila ateva valusu ia ghe mae sio toka etana.

<sup>33</sup> Karika aghe kilala va ia see, ta lo ateva ghe sungieghila tani asuuem tale manu eghe uela etaghi va, 'Aue utara Spiriti eteva esio toka tale kateva taumattu, me ae ukila va ia o taumattu ngateva aue easuuem tale Spirit Manga ateva.'

<sup>34</sup> Aghi aghe tarala isaa o voto ghe lutula. Liuna avalua o me aghaauliaa etaimim va ia Natuna ia God."

*Aitiutiu etoa kapuna disaepolo Iesu*

<sup>35</sup> Mene kateva nau Jon me ghalua tana kapuna disaepolo latolu ghe tiitingina aitauua.

<sup>36</sup> Nau ghe tarala Iesu ghe kasukasus elaoalo me ghe uela va, "Am tarala! Ia o natuna sipsipi eteva God!"

<sup>37</sup> Ilalua o disaepolo alua lalu ghe nongola, me lalu ghe lao sio tani aimuli tee Iesu.

<sup>38</sup> Iesu ghe kiriela me ghe tarailaluelu, me ghe uela va, "Sa ateva amalu aloannaia?"

<sup>1:14:</sup> Plp 2:7.    <sup>1:17:</sup> Eks 34:28; Rom 6:14.    <sup>1:18:</sup> Eks 33:20; Jon 6:46; 1 Tim 6:16.    <sup>† 1:19:</sup> *Livae* Livae etoa laghe saasausi tani uungu tale ale manga ateva.    <sup>1:21:</sup> Diut 18:15, 18; Mat 11:14.    <sup>1:23:</sup> Ais 40:3.    <sup>1:27:</sup> Jon 1:15.    <sup>1:29:</sup> Ais 53:6-7; 1 Pita 1:18-19.    <sup>1:30:</sup> Jon 1:15.    <sup>1:32:</sup> Mat 3:16.    <sup>1:34:</sup> Mat 3:17.    <sup>1:36:</sup> Jon 1:29.

Lalu ghe liula me laghe uela va, "Rabae, eaa utokatoka?" (Ta inangari nge Hibru, "Rabae" mallooeana va "tisa".)

<sup>39</sup> Iesu ghe liula me ghe uela va, "Amalu usieghila, me amalu laa tara."

Lalu ghe usiela tani laa tara nongina Iesu ghe tokatoka. Ang ghe 4 kilokola elo alai,<sup>‡</sup> me laghe toka teeielo vara me ghe voola.

<sup>40</sup> Andru, nengane ia Saemon Pita, kateva ta ilalua o taumattu ngalua lalu ghe nongola Jon, me lalu ghe usila Iesu.

<sup>41</sup> Aitiutiu eteva voto Andru ghe gheleielo, ghe kasula tani pae tuena ta Saemon Pita tani aulia etana va, "Ngami ghe tarala Mesaea ngateva." (Ta inangari nge Hibru, mallooeana "Mesaea" elaoalo aitauaa tee samasama nge Grik va "Karisto.")

<sup>42</sup> Andru ghe laoaa sio tuena ta Iesu. Me nau Iesu ghe taraiela, ghe uela va, "Saemon natuna io Jon. Aue la kolo ararim ateaetee Kepas" (mallooeana ta inangari nge Grik va Pita, atu ia).

### *Iesu ghe kolola Pilip me Nataniel*

<sup>43</sup> Vara ghe pai saela ta mene kateva nau, me Iesu ang ghe anna tani lao eGalilii. Nau ta ghe lao sio, ghe paela me ghe tarala Pilip, me ghe uela etana va, "Mae usieghi."

<sup>44</sup> Pilip atala nge Betsaida ia, tanganueirarua Andru me Pita.

<sup>45</sup> Pilip ghe paela me ghe tarala Nataniel me ghe uela etana va, "Ngami tarala taumattu ngateva Moses ghe pitila me ghe auleinieila tale inangari nipaopao, me propete atoa laghe piti emuemue alokoila maemaeane, Iesu ta ngetana, natuna ia Josep aNasareti ia."

<sup>46</sup> Me Nataniel ghe kolomelia va, "Righi masi voto elutulutu eNasareti?"

Pilip ghe liula me ghe uela va, "Mae sio me ulaa tara."

<sup>47</sup> Nau Iesu ghe tarala Nataniel ghe kasukasus emaemae etana me ghe uela va, "Tarala! Taumattu ngateva o, ia taumattu koronna ia ta aIsraeli etoa, karika egheelei me eaauliaa voto kamena."

<sup>48</sup> Nataniel ghe kolomila Iesu va, "Vaalu ughe kilaiaghila?"

Iesu ghe liula me ghe uela va, "Ngaghe taraiola nau Pilip ghe koloola ta ughe tokatoka tale liue fig ateaetee."

<sup>49</sup> Me Nataniel ghe uela va, "Tisa, io Natuna io God, me io kingi nge Israeli io."

<sup>50</sup> Iesu ghe liula me ghe uela va, "Uaikaaiaa etaghi poli auela va aghe taraiola ughe tokatoka tale liue fig ateaetee? Aue utara mene kasina voto namungaili aue elutu.

<sup>51</sup> Aghaaulia ngakoronna etaimim va aue am tara epona liu aue eotia, me kapuna ensolo atoa God aue la siosio me la saesae ta Natuna ateva Taumattu ngateva."

## 2

### *Nisigha ngateae eKena*

<sup>1</sup> Ghalua nau ghe lange sio me Meri, kinna Iesu, ghe siola tale nisigha ngateae tale masaliki eteae eKena ta pai nge Galilii.

<sup>2</sup> Laghe alloanna va Iesu me kapuna disaepolo atoa la usi sio tale nisigha ngateae.

<sup>3</sup> Nau uaeni ghe kapala, kinna ghe lao sio tani auliaa ta Iesu va, "Uaeni ange kapala."

<sup>4</sup> Iesu ghe liula me ghe uela va, "Vause ateva, urau mene auliaa voto va aghelei, ta naugha karika ghe mae."

<sup>5</sup> Kinna ghe uela ta tau ngai nonganongo anna atoa va, "Am ghelei saa voto eaauliaa etaimim."

<sup>6</sup> Elome tale ale ateva, ghaonomo (6) aikaai manu laghe gheleila tale atu ghe tokatoka, uneira ajiu etoa aiporapora nau la ghaloanna tani aimuli tee uneira lo. Kateva aikaai manu erooroo tani kaai koti kateva ai (100) lita.

<sup>7</sup> Iesu ghe uela ta tau ngai nonganongo anna atoa va, "Am aku kaai manu esae pasu tale aikaai manu." Me laghe gheleila voto ghe auliaala.

<sup>8</sup> Me Iesu ghe mene uela va, "Am akula righi me am laa tau ta lo ateva eaaitoiaa ninamanama ateaetee." Tau ngai nonganongo anna atoa laghe gheleila voto Iesu ghe auliaala.

<sup>9</sup> Taumattu ngateva ghe aaitoiaa ninamanama ateaetee ghe tootoongala manu ang ghe uaenila. Karika ghe kilala va eaa laghe ghaala; tau ngai nonganongo anna atoa laghe akula manu, ila nonga laghe kilala. Vara me tau ngaitoi ninamanama ateaetee ghe kolola lo ateva taita ghe laila,

<sup>‡</sup> **1:39:** 4 kilokola elo alai Tale inangari nge Grik, aiaakasangalua ateva aoa.    **1:40:** Mat 4:18-20.    **1:42:** Mat 16:18.

**1:45:** Diut 18:18; Ais 7:14; 9:6; Jer 23:5; Esik 34:23.    **1:49:** Mat 14:33; 16:16; Mak 3:11.    **1:51:** Aitiutiu 28:12.

**2:4:** Jon 7:30; 8:20.

<sup>10</sup> me ghe uela etana va, “Ila akapa taumattu ngatoa la ghaaikota ngakasina masi uaeni, me nau taumattu ngatoa la ropiropi, me nannaaira ange aisavisavilaala, me la vira mene tautau lao llo uaeni karika tani masina. Me io, uarongi etokala masinaaili uaeni, me angu vira mene maeaa sio.”

<sup>11</sup> Ia o niamatoongana ateva Iesu ghe gheleiela, aitiutiu ia tale isaa akapa niamatongga. Ghe gheleiela eKena ta tai ne Galilii. Tale ia o nau eteva Iesu ghe apasungaala sarasarakaniaane, me kapuna disaepolo atoa laghe aiesoala etana.

<sup>12</sup> Vara me Iesu ghe kasula eKena me ghe siola eKapenium, ia, kinna, nengane atoa me kapuna disaepolo atoa. Laghe tokala kasina nau tale ia o masaliki eteae.

*Iesu ghe ameti vella taumattu ngatoa laghe poppoli me laghe aitauua voto tale ale manga ateva*

(Mat 21:12-13; Mak 11:15-17; Luk 19:45-46)

<sup>13</sup> Nivelu eitauua ta nau Pasova uneira ajiu etoa ang ghe aakalakalaa, liuna avalua o me Iesu ghe saela ejerusalem.

<sup>14</sup> Ghe tarala taumattu ngatoa elome tale valavalala atuae tale ale manga ateva, laghe aitauua me aipoliaa vulumakao me sipsipi me valusu. Ghe tara teela lo atoa laghe aaikolikoliaa viliki veu.

<sup>15</sup> Iesu ghe ghaala uasa me ghe gheleiila uip ateva, me ghe ameti velu ghoala taumattu ngatoa tale ale manga ateva, tee me kieira ghaata kkena, me ghe sau etakila uneira tevoo atoa lo atoa laghe aikolikoliaa viliki veu, me uneira viliki veu ghe kao reerekataala.

<sup>16</sup> Me ghe uela ta lo atoa laghe aitauua ghila valusu va, “Am ghaala valusu me am kasu. Am rau mene ghelei alena ateva Tamaghi va arova maketi ia.”

<sup>17</sup> Me disaepolo atoa laghe annaala sa ateva Uru ngai Manga ateva ghe aulieiniela, ghe uela va, “Aielousiaaghi tale alem ateva eramerame elome etaghi arova kura ateeae.”

<sup>18</sup> Namuu tu ajiu etoa laghe kolomila Iesu va, “Sa ateva aimatootoongana aue ugheleia tani apasunga etaimami va io ughe ghaala matuutuliena tani ghelei isaa o voto angu gheleila ghaine?”

<sup>19</sup> Iesu ghe liula me ghe uela va, “Am rruti ale manga ateva o, me aue aghatulua ta kotolu nonga nau.”

<sup>20</sup> Me ajiu etoa laghe uela va, “Ghe roola ghaatingaulu ghaonomo (46) ninamanama laghe gheleiila ale manga ateva, me io aue unim gheleiia ta kotolu nonga nau?”

<sup>21</sup> Ta ale manga ateva Iesu ghe aaulieinia, vilikina ia.

<sup>22</sup> Liuna avalua o me nau God ghe totuela tale nimate, kapuna disaepolo atoa laghe inanagarina ghe auliaala, me laghe aiesoala tale Uru ngai Manga ateva tee me inangari Iesu ghe auliaala.

*Iesu ghe kilakila eeleiaira taumattu ngatoa*

<sup>23</sup> Nau ghe tokatoka ejerusalem tale nivelu eitauua ngateae ta nau Pasova, oroi taumattu laghe aikaiaala ta Iesu poli laghe tarala ghe gheleiila niamatoonga.

<sup>24</sup> Iesu ghe kilakila saa voto elome tale maamauluaaira, liuna avalua o me karika ghe aatoka tuutulina etaira.

<sup>25</sup> Karika teva ghe rooroo tani auliaa ta ngetana va saa taumattu ila, poli ghe kilakila urunguitaniira.

### 3

<sup>1</sup> Kateva taumattu, ararina atuae ta Nikodimas, Paresi ia me namuu ia ta ajiu etoa.

<sup>2</sup> Kateva nau, nau ang ghe aitarrauiila, Nikodimas ghe lao sio tani tara Iesu, me ghe uela va, “Tisa, ami kilakila va God ghe sungiola tani sio apasunga voto etaimami, poli karika teva erooroo tani ghelei niamatoonga ugheelei, arova God karika etokatoka teetia.”

<sup>3</sup> Iesu ghe liula me ghe uela va, “Aghaaulia ngakoronna etam va, karika teva erooroo tani kupi sso tale ararimangalina ateva God, arova karika etam lutu ppae.”

<sup>4</sup> Me Nikodimas ghe kolomila va, “Vaalua aue lo ateva taumattu ang ghe namuula emene lutu? Erooroo tani kupi sso ta kova kinna me emene lutu eghaluene?”

<sup>5</sup> Iesu ghe liula me ghe uela va, “Aghaaulia ngakoronna etam va, arova uanna tani sso tale ararimangalina ateva God, utani lutu tale manu me Spiriti eteva.

<sup>6</sup> See elutululu tale taumattu, taumattu ia, me see elutululu tale Spiriti eteva, spiriti ia.

<sup>7</sup> Urau mene soghiaa inangarighi nau aue va, ‘Am tani lutu ppae.’

<sup>8</sup> Kuukuu eteva ekuukuu ekapa see tale voto ealoanna tani lao etana. Arongona ta urooro tani nongoa, me karika ukilakila va eaa ekasukasu me eaa elaoao. See elutu tale Spiriti eteva, ia nongina kuukuu eteva, karika teva erooroo tani tara kilaia.”

<sup>9</sup> Me Nikodimas ghe kolomila Iesu va, “Vaalua isaa o voto aue elutu?”

<sup>10</sup> Iesu ghe liula me ghe uela va, “Vaalua me io tau ngai aaapasunga io ta alisraeli atoa, me karika ukilakila isaa o voto?

<sup>11</sup> Aghaaulia ngakoronna etam va ami, ami kilakila sa ateva ami aaulieinia poli ngami ghe tarala. Karika teva etaimim aue ealoanna voto ami aauliaa.

<sup>12</sup> Arova am tam aiesoaa nau aghaauliaa etaimim voto oia tale kosa ateva, vaalua aue am ghele aiesoaa nau aghele auliaa voto epona liu?

<sup>13</sup> Karika teva ghe sae epona liu. Natuna ateva Taumattu ngateva nonga ghe kasula epona liu, me ghe sio mae tale kosa ateva.

<sup>14</sup> Nongina Moses ghe avukala saela katu ngateva tale voto ateva karika righi taumattu etokatoka etana, Natuna ateva Taumattu ngateva aue esae vukala,

<sup>15</sup> tani tau lao maulue ateva etoka nau ekapa atoa ta lo atoa aue la ghaikaiaa ta Natuna ateva Taumattu ngateva.”

<sup>16</sup> Poli God ghe aaielousiangaili taumattu tale kosa ateva oia, liuna avalua o me ghe tau mae sio Natuna ateva, kateva nonga ia, me see aue eaikaiaa etana karika aue emate, ta aue eghaa maulue ateva etokatoka nau ekapa atoa.

<sup>17</sup> Karika va God ghe suula Natuna tani sio tale kosa ateva oia tani ghelei niaiskei ta taumattu tale kosa ateva. Ghe sungiela tani sio asaangi taumattu.

<sup>18</sup> Lo ateva eaikaiaa ta getana, karika aue eghaa sesa aipolipoli tale niaiskei, me lo ateva etam aikaiaa ta getana aue evira ghaa sesa aipolipoli tale niaiskei, ta poli karika eaikaiaa tale ararina ateeae Natuna ateva God.

<sup>19</sup> Niaiskei eteae ia avalua toko: Mallanga ateva ghe mae sio tale kosa ateva, me taumattu ngatoo la ghaloanna saurrom, me karika la ghaloanna mallanga, poli gheeleiaira sesa.

<sup>20</sup> Lo atoa taumattu la gheelei voto sesa la tam maamasiaa mallanga ateva, me karika la ghaloanna tani mae etana, poli mallanga ateva eaapasunga voto la gheelei.

<sup>21</sup> Me lo atoa la tokatoka tale voto koronna, aue la lao tale mallanga ateva, poli la ghaloanna va mene katoa taumattu la kila va voto la gheelei God egheelei taula.

### *Iesu me Jon tau ngai aasuu ia*

<sup>22</sup> Vara me Iesu me kapuna disaepolo atoa laghe siola eJiudia, ghe toka teeilala, me ghe aasuu taumattu.

<sup>23</sup> Jon tee ghe aasuu taumattu tale voto ateva la kolokolo Aenon ta getana, kalakalaa tale masaliki eteae eSalim, poli ia o voto ateva manu ia. Me oroi taumattu ghe mae sio ta Jon, me Jon ghe asuulala.

<sup>24</sup> (Isaa o nau Herot karika ghe atoka sso Jon tale ale mata voovoo.)

<sup>25</sup> Vara me kapuna disaepolo atoa Jon me kateva tana ajiu laghe tiuala tani aissakeana tee saa tikirighi salana nisuu me niporapora la usilaa nau la ghaloanna tani aimuli tee uneira lo.

<sup>26</sup> Kapuna disaepolo atoa Jon laghe lao sio ta Jon me laghe uela etana va, “Tisa, taumattu ngateva ghe toka teeiola ta pai kativilau tale ateo ateeae ejordan me ughe aauliaa kiukiuna, ia oia ange aasuu taumattu, me ila akapa ngeila laolao ta getana.”

<sup>27</sup> Jon ghe liula me ghe uela va, “Karika teva taumattu erooroo tani ghaa righi voto, arova God epona liu etam anna va eghaa.

<sup>28</sup> Am ghe nongoaghila nau aghe ue etaimim va, ‘Karika va aghi Mesaea ieghi. Aghi God ghe sungieghila tani muemueainia.’

<sup>29</sup> Nau taita ateva elailai vause ateva, lalu lai me ia aue vausenna ia. Me lo ateva taita euiiuitnesi, ie tee emasimasi nau enonganongo kapuna ateva elailai, nongina aghi nimasimasi eteva elome etaghi namungaili ia.

<sup>30</sup> Emaamasina va ararina ateeae esae epona, me ararighi eteae esio euu.”

<sup>31</sup> Lo ateva ghe kasula epona liu me ghe sio mae, ia epona, me elaulau isaa akapa voto. Taumattuna kosa ateva oia egheelei gheeleiaa kosa ateva, me eaaauliaa voto tale kosa ateva. Me lo ateva ghe kasula epona liu, ia epona tale taumattu ngakapa atoa.

<sup>32</sup> Eaaauliaa poi voto ghe tarala me ghe nongola, me karika teva eaaiesoaa inangarina.

<sup>33</sup> Me lo ateva eaaiesoaa inangarina eaapasunga va God koronna ia.

<sup>34</sup> Poli lo ateva God ghe sungiela eaauliaa inangarina God, me God ghe tau lao sio Spiriti eteva etana, karika erooroo tani kapa.

<sup>35</sup> Tamane eaailousiaa Natuna, liuna avalua o me ghe taula isaa akapa voto ta ngetana.

<sup>36</sup> Lo ateva eaikaiaiaa ta Natuna, maulue ateva aue etoka liu etana. Lo ateva etam nongo usilainia, karika aue eghaa lo ateva o maulue, me God sessaiaane etana aue etoka nau ekapa atoa.

## 4

### *Iesu me vauseni nge Sameria ngateva*

<sup>1</sup> Iesu\* ghe kilala va Paresi etoa ngeila ghe nongola va ia ang ghe ghaagħhaa oroi taumattu tani asuu, me Jon karika.

<sup>2</sup> Me karika va Iesu ghe aasuu, ta kapuna disaepolo atoa.

<sup>3</sup> Iesu ghe kasu vulila ejjudia, me ang ghe mene laa saesae eGalilii.

<sup>4</sup> God ghe aloanna va eusilaa salana atikirighi esosso elome eSameria.

<sup>5</sup> Ghe kasukasu elaoalo me ghe rekatala tale masaliki eteae la kolokoloa va Sika eSameria, kalakalangina ia tale tuku kosa ateva Jekop ghe tauet lao sio ta natuna ta Josep emua arau.

<sup>6</sup> Ateo kaikai eteae Jekop ghe kaiela ghe asoaso tale masaliki eteae Iesu ghe kasukasu elaoalo etana. Vara me ang ghe maamangoo poli ghe kasula tale aluse salana, me ghe toka siola kalakalangina tale ateo kaikai eteae. Ang ghe pai ngelo sinakala.<sup>†</sup>

<sup>7</sup> Kateva vauseni nge Sameria ghe mae sio tani aku, me Iesu ghe uela etana va, “Aku tau mae sio righi manu, me aropi.”

<sup>8</sup> (Kapuna disaepolo atoa laghe ssola elo masaliki tani poli inana.)

<sup>9</sup> Vauseni nge Sameria ngateva ghe uela etana va, “Io ajiu io me aghi vauseni nge Sameria ngagħi. Vaalua me ulooloo manu etaghix?” (Ghe auliaala llo poli ajiu etoa me aSameria ngatoa karika laghe samasama aitauea.)

<sup>10</sup> Iesu ghe liula me ghe uela va, “Arova ugħele kila masi voto God eanna tani tau aatu, me ugħe kila tee lo ateva ekokolomio tani ropi, aue ugħe kola tal-lu llo ateo etautu mae maulue.”

<sup>11</sup> Me vause ateva ghe uela va, “Namu ngateva, karika teva unem aiakueku, me ateo atea sio liuna ia, me eaa aue ulaa għaġia lo atea ateo etau mae maulue?”

<sup>12</sup> Tuvuimami eteva ta Jekop ghe kaiela ateoimami eteae oia, me natuna atoa me kieira għaata kkena atoa laghe ropiropi etana. Koti io namuu io ta Jekop, va?”

<sup>13</sup> Iesu ghe liula me ghe uela va, “Lo atoa aue la ropi tale ia oia ateo kaikai eteae, aue la mene aloanna tani ropi.

<sup>14</sup> Me lo ateva eropi tale atea aghi aue atauela, karika aue emene kangngata tani ropi. Lo atea ateo aue atauela aue etoka etana nonginaaili lo atea ateo enim toka akaakalaa me karika ematimat, me aue etaula maulue ateva karika ekapakapa.”

<sup>15</sup> Me vause ateva ghe uela ta Iesu va, “Namu ngateva, utau mae ia o ateo atea, me auena arau mene aloanna tani ropi va amene mae āku oia.”

<sup>16</sup> Me Iesu ghe uela etana va, “Lao sio me ulaa kolo taitanim ateva, me amalu mae.”

<sup>17</sup> Me vause ateva ghe uela va, “Karika teva taitanighi.”

Me Iesu ghe uela va, “Uaulia ngakoronna va karika teva taitanim.

<sup>18</sup> Poli angu ghe ghāa muela għalima taita, me lo ateva taita utokatoka teeia karika va taitanim ia. Liuna avalua o me inangarim uauliaa koronnaaili.”

<sup>19</sup> Me vause ateva ghe uela va, “Namu ngateva, ngakilala va io propete io.

<sup>20</sup> Tuvuimami etoa la kakkua tale ia o motouru eteva, me am ajiu etoa, am ue va masaliki nikkaua ngatiae ejerusalem.”

<sup>21</sup> Iesu ghe uela etana va, “Uaiesoaa inangarighi va aue kateva nau ta isaa to nau ernaemae karika aue am kkaua Tamaita ateva tale ia o motouru eteva me ejerusalem.

<sup>22</sup> Am aSameria ngatoa, karika am kilakila see am kaakaueinia. Ami ajiu etoa, ami kilakila God ateva ami kaakaueinia, poli ta ajiu etoa aue nisaangi emae.

<sup>23</sup> Me nau ie emaemae me ange rekatala va Spiriti eteva kanna ia God aue egħelei taumattu la rororo tani kkaua God tale koronna. Tamaita ateva ealoanna va isaa o ase taumattu la kaucheinia.

<sup>3:35:</sup> Mat 11:27; Jon 5:20.    <sup>3:36:</sup> Jon 3:16-18; 1 Jon 5:12.    <sup>4:1:</sup> Jon 3:22.    \* <sup>4:1:</sup> Iesu Kasina uru ngai lagħe pitila, lagħe uela va Vau eteva.    <sup>4:5:</sup> Aitutiu 33:19; Jos 24:32.    † <sup>4:6:</sup> pai ngelo sinaka Tale inangari nge Griki, għaonomina (6) ateva aoa.    <sup>4:9:</sup> Esra 4:1-5.    <sup>4:10:</sup> Jon 7:37-38; Autu 21:6.    <sup>4:12:</sup> Jon 8:53.    <sup>4:14:</sup> Jon 6:35.    <sup>4:20:</sup> Diut 12:5-14; Sams 122:1-5.    <sup>4:22:</sup> 2 Ki 17:29-41; Ais 2:3; Rom 9:4-5.

<sup>24</sup> God spiriti ia, me lo atoa la kaakaueinia, Spirit Manga ateva ekaakatulainila tani kkaua tale voto koronna."

<sup>25</sup> Me vause ateva ghe uela va, "Akilakila va Mesaea ngateva ae emae (la kolokoloa va Karisto etana). Nau emae ae eaulia ngamasinaaili ekapa voto etaimami."

<sup>26</sup> Me Iesu ghe uela etana va, "Aghi oia asamasama, aghi oia taumattu ngateva ualoonannaia."

<sup>27</sup> Isaa o nau me kapuna disaepolo atoa ngila ghe kiriaala, me laghe soghiaala tani tara Iesu ghe samasama tee vause ateva. Me karika teva ghe kookolomia va, "Sa ateva ualoannaia?" me, "Vaalua me usamasama teeia?"

<sup>28</sup> Vause ateva ghe velu etokala ateoona aikaai manu eteva, me ghe ilou ssola tale masaliki eteae, me ghe uela ta taumattu ngatoa va,

<sup>29</sup> "Am mae sio, me am laa tara taumattu ngateva, eaulia ngakapala voto agheelei. Koti ia Mesaea ia?"

<sup>30</sup> Taumattu ngatoa tale masaliki eteae laghe lao sio tani tarai.

<sup>31</sup> Nau isaa o voto ghe lutulutu, me kapuna disaepolo atoa Iesu laghe ue etana va, "Tisa, namanamala mua."

<sup>32</sup> Iesu ghe liula me ghe uela etaira va, "Aneghi tani inana karika am kilakila."

<sup>33</sup> Disaepolo atoa laghe tiuaala tani aikolomieinila va, "Teva taumattu emae sio tani anginia?"

<sup>34</sup> Iesu ghe uela etaira va, "Inana anamanama nau agheelei uunguaane lo ateva ghe sungieghila, me tani ruu isaa o niuungu ghe uela va aghelei.

<sup>35</sup> Am roo tani ue va, 'Kasi ghaata ulana me ita laa ghaa inana tale utana atingiu.' Aghaauliaa etaimim va am taatara sso, me am tara utana atingiu ang ghele matuela, me ang ghele roola tani ghaa inanina.

<sup>36</sup> Lo ateva taumattu euungu tani ghaa inana tapaa ngutana eghaaghhaa arau aipolina, me eghaaghhaa aitauaa inana ae etoka nau ekapa atoa. Liuna avalua o me lo ateva epasapasa inana me lo ateva eghaaghhaa, ilalua akapa lalu masimasi.

<sup>37</sup> Koronnanaili ia tuku inangari eteva eue va, 'Kateva epasapasa, me mene kateva emukemuke.'

<sup>38</sup> Ngasungsungiem tani laa ghaa inana tale utana atingiu, katoa ppae ghe matela uunguaaira etana, me am, am ghe nim ssola tani ghelei eruu uunguaaira."

<sup>39</sup> Oroi taumattu nge Sameria tale ia o masaliki erighi laghe aikaiaala ta Iesu poli vause ateva ghe uela va, "Ia oia taumattu ngateva eaulia ngakapala voto agheelei."

<sup>40</sup> Laghe lao sio tani kolomi esarasarakana Iesu va emene toka teeila mua. Liuna avalua o me Iesu ghe mene toka teeilala ghalua nau.

<sup>41</sup> Ghe mene oroi ila taumattu nge Sameria ghe aikaiaala ta Iesu poli inangarina laghe nongola.

<sup>42</sup> Me laghe ue ta vause ateva va, "Karika va ami aikaiaia ta Iesu poli isaa o inangari uauliaala etaimami. Ami tee ngami nongoala, me ngami kila akoronnala va ia aue easaangi taumattu ngatoa tale kosa ateva."

*Iesu ghe ghelei emasinala natuna taita arighi kateva namuu*

*(Mat 8:5-13; Luk 7:1-10)*

<sup>43</sup> Iesu ghe toka teela aSameria ngatoa ghalua nau, me ghe kasu vulilala tani mene sae eGalili.

<sup>44</sup> Iesu ghe auliaala va, propete ateva, la oneoneainia tale kasina ppae masaliki, me tangantuena karika.

<sup>45</sup> Liuna avalua o, nau ghe saela eGalili, laghe masimasila va etoka teeila, poli ila tee laghe saela tale nivelu eitaua ngateae ejerusalem, me laghe tarala voto Iesu ghe gheleila.

<sup>46</sup> Nau ia eGalili, Iesu ghe mene lao sio eKena, masaliki eteae ghe gheleila manu ghe uaenila. EKapenium, kateva namuu, kapuna tau ngai uungu ia kingi, natuna taita arighi ghe iisiki.

<sup>47</sup> Nau eteva ghe nongola va Iesu ang ghe kasula ejjudia me ang ghe rekatala eGalili, ghe lao sio tani tara Iesu, me tani koloa va esio ghelei emasina natuna, poli ang ghe ainasiaa tani mate.

<sup>48</sup> Iesu ghe uela etana va, "Karika am rooroo tani aikaiaia, arova am tam tara niamatoonga me mirikolo atoa."

<sup>49</sup> Me taumattu ngateva ghe uela va, "Namu ngateva, italu sio tara parasi natughu, me erau mate."

<sup>50</sup> Me Iesu ghe uela etana va, "Natum aue etoka. Kasula, me ulaa taraia."

Namu ngateva ghe aiesoala inangarina Iesu, me ghe kasula.

<sup>51</sup> Karika ghe rekata eKapenium, me kapuna tau ngai uungu etoa laghe sousouela tapaa salana tani auliaa etana va natuna ang ghe masinala.

<sup>52</sup> Me ghe kolomilala va lovisa ghe masinala, me laghe uela va, "Ghalailloo ta 1 kilok<sup>‡</sup> anasa atevo ghele kapala."

<sup>53</sup> Me tamane ghe kilala va ia o nau eteva ghalailloo Iesu ghele uela va, "Natum aue etoka." Taumattu ngateva me lo atoa elome tale paa ngalena atevo, laghe aiesoala ta Iesu.

<sup>54</sup> Aiaaghaluene atevo o niaimatoongana Iesu ghe gheleiela nau ghe kasula ejidua me ghe saela eGalilii.

## 5

*Iesu ghe ghelei emasinala tangorengorena atevo*

<sup>1</sup> Kasina nau ang ghe lao sio me Iesu ghe saela eJerusalem tale mene kateva uneira nivelu eitauaa ajiu etoa.

<sup>2</sup> EJerusalem kateae atamana laghe aseasea va Atamani Sipsipi ia. Kalakalaa tale atamana ateae, ateo talia ngateae taumattu ngatoo laghe kaiela ghe asoaso, ghalima varandaane, me ta samasamaaairaa Hibru etoa laghe aseasea va Betesda.\*

<sup>3-4</sup> Oroi tau sessa ghe asoaso akalakalaa tale ia o ateo talia ngateae, katoa mata salusalu ila me katoa tangorengore ilaa me katoa vilikiira matena.<sup>†</sup>

<sup>5</sup> Kateva taumattu ghe tangorengorela kotolungaulu ghaoaluae (38) ninamanama, ie tee ghe asoaso akalakalaa tale ateo talia ngateae.

<sup>6</sup> Iesu ghe tarala ia o taumattu ngateva ghe asoaso, ghe kilala va ang ghe tangorengorela oroi ninamanama, me ghe uela etana va, "Ualoanna tani masina?"

<sup>7</sup> Tangorengorena atevo ghe liula me ghe uela ta Iesu va, "Namu ngateva, karika teva tani sauveghi, me elaa sau velueghi sio tale ateo talia ngateae nau eaisiisia. Vara atootoonga, me karika arooroo, ta mene katoa ppae taumattu la siosio akasina."

<sup>8</sup> Iesu ghe uela etana va, "Tingina saela, usau komom, me ukasu."

<sup>9</sup> Gharavaeaaa ta taumattu ngateva ghe masinala, ghe saula komona, me ghe tiuaala tani kasu.

Isaa o voto ghe lutula tale nau manga atevo.

<sup>10</sup> Liuna avalua o me nau ajiu etoa laghe tarala ia o taumattu ngateva ghe masinala, me laghe uela etana va, "Ghaine nau manga atevo. Karika masina tani sau komom etana."

<sup>11</sup> Ghe liula me ghe uela va, "Lo atevo taumattu eghelei emasinaieghila, euela va asau komoghu me akasu."

<sup>12</sup> Me laghe kolomiela va, "See ia taumattu ngateva euela etam va usau komom me ukasu?"

<sup>13</sup> Taumattu ngateva ghe masinala karika ghe kilala va see ghe ghelei emasinaielaa, poli orioannaaili taumattu, me Iesu ang ghe aisavisavilainiela elome tale taumattu ngatoo.

<sup>14</sup> Emulina Iesu ghe ssola tale ale manga atevo, me ghe paela me ghe tarala taumattu ngateva. Me ghe uela etana va, "Tarala, angughe masinala. Isaa oio nau urau nim ghelei ssavoto va llo sesaaili emene lutu ta getam."

<sup>15</sup> Ghe lao sio me ghe laa ghauliaa sio ta ajiu etoa va Iesu ghe ghelei emasinaielaa.

<sup>16</sup> Liuna avalua o me ajiu etoa laghe tiuaala tani ghelei voto sesaaili ta Iesu, poli ghe gheelei isaa o voto tale nau manga atevo.

<sup>17</sup> Iesu ghe uela va, "Tmaghi euungu me karika ghe ruu, me aghi tee auungu."

<sup>18</sup> Ajiu etoa laghe aloannaaili tani uvi emate Iesu, poli karika va ghe gheelei laelaeaa nonga nau manga atevo, me poli ghe ue tee va Tamane ta God, ghe gheeleia va lalu ghe aairooaa me God.

*Natuna atevo God namuu ia, me ie tee erooroo tani ghelei niuungu*

<sup>19</sup> Iesu ghe uela ta ajiu etoa va, "Aghaaulia ngakoronna etaimim va Natuna atevo God karika erooroo tani ghelei voto ta nannaane, ta egheelei nonga voto etaatara ta Tamane egheelei. Isaa akapa voto Tamane egheelei, Natuna tee atevo egheelei.

<sup>4:50:</sup> Mat 8:13.    <sup>‡ 4:52:</sup> 1 kilok Tale inangari nge Grik, ghatuna (7) atevo aoa.    <sup>4:54:</sup> Jon 2:11.    <sup>\*</sup> <sup>5:2:</sup> Betesda Kasina uru ngai laghe pitila, laghe uela va, *Betsata*, me kasina laghe ue va, *Betsaida*.    <sup>† 5:3-4:</sup> Kasina uru ngai nau laghe pitila, laghe ue teela va, *laghe toitoi nau manu eteva ghe aisiisia*. <sup>4</sup> Kasina nau kapuna ensolo atevo *Vau ngepona* atevo ghe siosio, ghe aisiisia manu eteva, me lo atevo ghe siosio akasina tale ateo talia ngateae, nau ghe aisiisia, arova saa ase isiki etana, ghe maamasina.    <sup>5:8:</sup> Mat 9:6.    <sup>5:10:</sup> Jer 17:21-22; Nia 13:19.    <sup>5:18:</sup> Mat 26:4; Jon 7:1; 10:30.

<sup>5:19:</sup> Jon 5:30.

<sup>20</sup> Tamana eaaielousiaa Natuna, liuna avalua o me isaa akapa voto egheelei, eaapsunga etana. Me ealoanna va am soghiaa, liuna avalua o me aue emene apasunga taula mene kasina paka voto.

<sup>21</sup> Nongina Tamane etottotu taumattu matena, me etautau lao maulue etaira, Natuna tee etautau lao maulue ta taumattu tale aloaloannaane.

<sup>22</sup> Tamane karika egheelei niaisakei ta teva taumattu. Ghe taula ta Natuna va ie nonga eghelei niaisakei tale isaa akapa taumattu.

<sup>23</sup> Liuna avalua o me taumattu ngakapa atoa aue la tau sae ararina atea Natuna ateva God, nongina la tautau sae ararina atea Tamane. Lo ateva etam tautau sae ararina atea Natuna, karika etautau sae ararina atea Tamane, ia ghe sungiela.

<sup>24</sup> "Aghaaulia ngakoronna etaimim va lo ateva enongo inangarighi, me eaikaaiiaa ta lo ateva ghe sungieghila va asio, maamauluuaane aue etoka amasina nau ekapa atoa, me karika aue eghaa sesa aipolipoli tale niaisakei, poli ang ghe kasu vulila nimate, me ang ghe tokala tale maulue.

<sup>25</sup> Aghaaulia ngakoronna etaimim va aue kateva nau, me nau eteva oia ange rekatala, lo atoa taumattu laghe matela, aue la nongo lingi ngalona ateva Natuna ateva God, me lo atoa taumattu la nongoa, aue la ghaa maulue.

<sup>26</sup> Maulue ateva etokatoka ta Tamane, me ghe tauela ta Natuna, me maulue ateva etokatoka tee ta Natuna.

<sup>27</sup> Tamane ghe avauvauela me ghe tau lao sio niuungu tani ghelei niaisakei tale taumattu, poli Natuna ia Taumattu ngateva.

<sup>28</sup> "Am rau mene nnangaili inangari oio aghaauliaa, poli aue nau to emaema lo atoa taumattu ləasoaso tale liu, aue la nongo lingi ngalona ateva Natuna ateva Taumattu ngateva,

<sup>29</sup> me aue la totu tale liu. Lo atoa laghe gheelei masi voto, aue la totu me la ghaa maulue, me lo atoa laghe gheelei sesa voto, aue la totu me la ghaa sesa aipolipoli.

<sup>30</sup> Karika arooroo tani ghelei voto tale aloaloannaaghi. Aghaaimuli tee inangarina lo ateva ghe sungieghila. Me ia eaauliaa tau mae vaalua aghelei niaisakei. Niaisakei agheelei ghulughuluena, poli karika aghaimuli tee nannaaghi."

*Mene katoa laghe eaaulia ngaotu tee va Jesu saa taumattu ia*

<sup>31</sup> Iesu ghe mene uela va, "Arova aghi nonga aghaaulia ngaotu uunguaaghi me gheeleiaaggi, taumattu ngatoa la rau mene aiesoaa inangarighi aghaauliaa.

<sup>32</sup> Mene kateva tee eaaulia ngaotu uunguaaghi me gheeleiaaggi, me akilakila va inangarina koronna.

<sup>33</sup> "Am ghe suula taumattu tani laa kolomi Jon, me Jon ghe auliaala voto koronna etaira.

<sup>34</sup> Aghi karika atututili inangariira taumattu ngatoa, mausina me aghaauliaa inangari oia poli aghaaloanna va am saanga.

<sup>35</sup> Jon nongina lama atea eramerame me emaamallanga, me am ghe masimasi tani ghaa isaa o mallanga, vara karika masau me ngam ghe maamangoo.

<sup>36</sup> "Isaa o voto Jon ghe auliaala eaaimatoonga mae etaghi, me karika erooroo tale voto isaa oia nau agheelei. Isaa akapa o niuungu, Tamaghi ghe tau mae sio va aghelei me aruu. Isaa o niuungu agheelei eaaulia ngaotu ta taumattu ngatoa va Tamaghi ghe sungieghila tani sio oia.

<sup>37</sup> Tamaghi, ia o ghe sungieghila tani sio, ie tee eaaulia ngaotueghi. Am karika am ghe nongo poi lingi ngalona ateva, me karika am ghe tara taataaraane,

<sup>38</sup> me inangarina tee karika elome tale maamauluuaaimim, poli karika am aiesoaa tale taumattu ngateva ghe sungiela, me ghe sio mae oia.

<sup>39</sup> Tale nannaaimim am annaa va inangari tale Uru ngai Manga ateva aue etau aatu maulue tokatoka liu ia, liuna avalua o me am paepae me am ritiritia. Me Uru ngai Manga ateva eaaulieinagihi,

<sup>40</sup> me karika am aloanna tani mae etaghi va am ghaa maulue.

<sup>41</sup> "Karika aghanha va taumattu ngatoa la arueinaghi.

<sup>42</sup> Akilakilaem va aielousiaane ateva God karika ia etaimim.

<sup>43</sup> Aghe sio mae ta ararina atea Tamaghi, me karika am anna inangarighi, me arova teva ghele mae tale aloaloannaane, arovaeaata ta aue am ghele anna tani nongo inangarina.

<sup>44</sup> Vaalua aue am aikaaiiaa? Poli am anna nonga va kapuimim atoa la arueinam, me karika am anna niaruaa God nonga erooroo tani tau aatu.

<sup>45</sup> "Karika am mene nnaa va aghi aue aghauliaa gheeleiaaimim sesa ta Tamaghi. Ia o Moses am annaa va aue esausiem, ia aue eauliaa sesa gheeleiaaimim.

<sup>46</sup> Arova am ghele aiesoaa tale inangarina Moses, aue am ghele aiesoaa tee tale inangarighi, poli inangari ghe pitila eaaulieinagi.

<sup>47</sup> Arova karika am aiesoaa tale inangari ghe pitila, vaalua aue am aiesoaa inangarighi?"

## 6

*Iesu ghe anginila 5,000 taumattu  
(Mat 14:13-21; Mak 6:30-44; Luk 9:10-17)*

<sup>1</sup> Vara me Iesu ghe mene lao sio ta pai kativilau tale ateo talia ngateae eGalilii, mene kateae ararina ta Taiberias.

<sup>2</sup> Oroiannaaili taumattu laghe usiela, poli laghe taraiela ghe gheleila niamatoonga tani ghelei emasina tau sessa atoa.

<sup>3</sup> Iesu ghe saela tale motouru tani toka tee kapuna disaepolo atoa.

<sup>4</sup> Pasova ngateva, nivelu eitauaa ia ta ajiu etoa, ang ghe aakalakalaa.

<sup>5</sup> Nau Iesu ghe atangarola me ghe tarala taumattu ngatoa laghe maemae etana, me ghe uela ta Pilip va, "Eaa ita laa ghaa verete me ita angini isaa oia taumattu?"

<sup>6</sup> Ghe auliaala isaa o voto tani tootoonga unna niaikaaia Pilip, me Iesu ang ghe kila vella sa ateva aue egheleia.

<sup>7</sup> Pilip ghe uela va, "Arova ita ghele poli verete ta ghalua ai (200) silva koen,\* karika aue ghele roo. Marova ita ghele taula tuku gharighi ta kateva kateva taumattu, karika aue ghele roo akapa etaira."

<sup>8</sup> Kateva kapuna disaepolo, Andru etana, tue me nenga ilalua me Saemon Pita, ghe uela ta Iesu va,

<sup>9</sup> "Kateva aliki oia anna bali verete ghalima me anna kko ghalua. Me karika aue eroo tani sausii tani angini ekapa taumattu oia oroiannaaili."

<sup>10</sup> Iesu ghe uela ta kapuna disaepolo atoa va la ghaluaa ta taumattu ngatoa me la toka sio. Oroiannaaili rarrasa etana ia o voto ateva, me oroi tee taita atoa, ghe rororo ghalima airari (5,000).

<sup>11</sup> Nau laghe toka siola, Iesu ghe ghaala verete, me ghe kaili emasina saela ta God, me ghe taula ta kapuna disaepolo atoa va la laa ghaikota. Ghe ghelei evalue teela o tale kko. Me ila akapa laghe roola tale inana.

<sup>12</sup> Nau ghe ssoilala tani namanama, Iesu ghe uela ta kapuna disaepolo atoa va la kaai eitauaa tapiri nginana, me erau nim vulla nonga.

<sup>13</sup> Disaepolo atoa laghe ghaa aisokosokoiala tapiri nginana laghe nama vulla tale verete ghalima, me laghe kaaila kasangaulu ghaluae (12) laka isaa o inana ghe oghila ta ghe ssoilala.

<sup>14</sup> Taumattu ngatoa laghe tarala isaa o niamatoonga Iesu ghe gheleila, me laghe ue va, "Koronna, ia propete ateva laghe uela va aue emae tale kosa ateva oia."

<sup>15</sup> Iesu ghe kilala va laghe anna tani ghelelia va ghe kapuira kingi ia, me karika aloannaane Iesu. Liuna avalua o me ghe kasu vulilala, me ie nonga ghe saela tale motouru.

*Iesu ghe kasula epona tale manu  
(Mat 14:22-27; Mak 6:45-54)*

<sup>16</sup> Pai ngelo alai, kapuna disaepolo atoa Iesu laghe siola elamana tale ateo talia ngateae.

<sup>17</sup> Laghe aikaaila tale paanaka ateva, me laghe tiuala tani ose tani lao eKapenium. Ang ghe aaitarrauii me Iesu ghe tam laa rekata etaira.

<sup>18</sup> Kuukuu eteva ghe tiuala, me ttasi eteva ghe lutula tale paamanu eteva.

<sup>19</sup> Nau ta disaepolo atoa laghe osela ghe roola 5-6 kilomita<sup>†</sup> me laghe tarala Iesu ghe kasukasu epona tale paamanu eteva. Ghe kasukasu emaemae etaira me neila ghe maamatautu etingina.

<sup>20</sup> Me Iesu ghe uela etaira va, "Aghi oia. Am rau mene matautu."

<sup>21</sup> Me disaepolo atoa laghe vira mene masimasila tani kaaia, me arovaeaata ta paanaka ateva ghe ssola elae nongina eaa laghe aloanna tani lao.

*Taumattu ngatoa laghe paepae Iesu*

\* 5:46: Apos 3:22. \* 6:7: silva koen Silva koen ativilau (denarius) aipolina kateva nau. 6:15: Jon 18:36. † 6:19: 5-6 kilomita Tale inangari nge Grik, 25 o 30 stadia.

<sup>22</sup> Vara ghe paila ta mene kateva nau, me taumattu ngatoa elamana ta pai nge sinaka sae tale ateo talia ngateae laghe kilala va ghalailloo kateva nonga paanaka ghele vuuvukala, me nau disaepolo atoa laghe aikaaila, Iesu ghe tam aikaai teeilala.

<sup>23</sup> Mene katoa tani paanaka nge Taiberias laghe mae sio nongina Vau eteva ghe kaili emasinala tale verete me laghe namala.

<sup>24</sup> Taumattu ngatoa laghe tarala va Iesu me kapuna disaepolo atoa karika ila, liuna avalua o me laghe aikaaila tale isaa o paanaka me laghe lao sio eKapenium tani pae Iesu.

*Iesu verete maulue ia*

<sup>25</sup> Laghe laa rekata sio tale pai kativilau tale ateo talia ngateae, me laghe tarala Iesu, me laghe kolomiila va, "Tisa, lovisaa umae sio oia?"

<sup>26</sup> Iesu ghe liula me ghe uela etaira va, "Aghaaulia ngakoronna etaimim va karika am paepaeaghi poli am taatara niaimatoonga agheelei, ta nim mausi inana am namanama me esossoiem. Liuna avalua o me am paepaeaghi.

<sup>27</sup> Am rau mene uungu tani ghaa llo inana esesa. Am uungu tani ghaa lo ateva inana etautau aatu maulue etokatoka liu, Natuna ateva Taumattu ngateva aue etau aatu ia o inana ateva, poli Tamane ta God ghe anamunamungainiela tani ghelei isaa o voto."

<sup>28</sup> Vara me laghe uela etana va, "Saa righi voto ami ghelei, me aeue ami roo tani ghelei niuungu God ealoanna?"

<sup>29</sup> Me Iesu ghe liula me ghe uela etaira va, "Kateva nonga niuungu God ealoannaia, va am aikaaiiaa tale taumattu ngateva God ghe sungiela tani mae."

<sup>30</sup> Liuna avalua o me laghe mene uela va, "Sa ateva niaimatoonga aue ughelei me aeue ami tara, me ami aikaaiiaa ta ngetam? Me saa niuungu aue ugheelei?"

<sup>31</sup> Nongina tuvuihami etoa, nau ila tale voto ateva karika righi taumattu etokatoka etana, laghe namanama mena, nongina Uru ngai Manga ateva eue va, 'Moses ghe tau lao sio inana ngepona liu eteva va la namaia.'

<sup>32</sup> Liuna avalua o me Iesu ghe uela etaira va, "Aghaaulia ngakoronna etaimim va karika va Moses ghe tau aatu sio isaa o verete ngepona liu. Tamaghi nonga etautau aatu lo ateva verete ngepona liu koronna ia.

<sup>33</sup> Lo ateva verete God etautauela, ia o taumattu ngateva ghe kasula epona liu tani tau lao maulue tale taumattu tale kosa ateva."

<sup>34</sup> Me laghe uela etana va, "Namu ngateva, utau mae ia o verete ateva tale nau ekapa atoa."

<sup>35</sup> Iesu ghe liula me ghe uela va, "Aghi ia o verete ateva etautaula maulue. Lo ateva emae etaghi, karika aue emaloo, me lo ateva eaikaaiiaa etaghi, karika aue eanna tani mene ropi.

<sup>36</sup> Ngaghe auliaala etaimim me ngam ghe tarieghila, me karika am aikaaiiaa etaghi.

<sup>37</sup> Isaa akapa taumattu Tamaghi etautau mae etaghi, aue la mae etaghi, me karika poi arooro tani sungi velu teva.

<sup>38</sup> Karika aghe kasula epona liu tani sio ghelei nannaaghi. Aghe sio mae tani ghelei nannaane lo ateva ghe sungieghila.

<sup>39</sup> Nannaane lo ateva ghe sungieghila va karika teva ta lo atoa ghe taula mae sio etaghi emene raua. Eanna va atotula, me la ghaa maulue nau airuuruu tale kosa ateva.

<sup>40</sup> Aloannaane Tamaghi wa ila akapa lo atoa la tara Natuna me la ghaikaaiaa etana, la ghaa maulue ateva etokatoka nau ekapa atoa me aghi aue atotula me la ghaa maulue tale airuuruu tale kosa ateva."

<sup>41</sup> Vara me ajiu etoa laghe tiuala tani olueinia tale inangari, poli Iesu ghe uela va, "Aghi verete ateva ghe kasula epona liu."

<sup>42</sup> Laghe ue va, "Taumattu ngateva oia Iesu etana, natuna ia Josep, ami kilakila tamana me kinna, vaalua me eue va ghe kasula epona liu?"

<sup>43</sup> Iesu ghe uela etaira va, "Am rau mene olueinaghi.

<sup>44</sup> Karika teva erooroo tani mae etaghi arova Tamaghi, ia o ghe sungieghila, etam gheleia tani mae etaghi. Me arova teva emae etaghi, aghi aue atotula, me eghaa maulue tale airuuruu eteva nau.

<sup>45</sup> Kateva propet ghe pitila ghe uela va, 'God aue eapasinga voto tale isaa akapa taumattu.' Liuna avalua o me lo atoa la nonganongo usilaa Tamaghi me la ghaaghah alomasaanga etana, aue la mae etaghi.

<sup>46</sup> Karika mene teva taumattu ghe tarala Tamaghi, ta llo nonga ateva ghe tokatoka teeia, me ghe sio mae. Nim ie nonga, me mene karika teva.

**6:27:** Jon 6:48-58.    **6:29:** 1 Jon 3:23.    **6:30:** Mat 16:1; Jon 2:18.    **6:31:** Eks 16:14-15; Nam 11:7-9; Sams 78:24.

**6:35:** Jon 4:14.    **6:39:** Jon 10:28-29; 17:12.    **6:42:** Mat 13:55.    **6:44:** Jon 6:65.    **6:45:** Ais 54:13.    **6:46:** Jon 1:18.

<sup>47</sup> Aghaaulia ngakoronna etaimim va lo ateva eaikaaiaa etaghi, maulue ateva tokatoka liu ia etokatoka etana.

<sup>48</sup> Aghi verete ateva etautau maulue ateva.

<sup>49</sup> Tuvuimim atoa laghe namala mena tale voto ateva karika righi taumattu etokatoka etana, vara me laghe matela.

<sup>50</sup> Me lo ateva verete ghe kasula epona liu me ghe sio mae, lo ateva enamaia, karika aue emate.

<sup>51</sup> Aghi verete maulue ieghi, aghe kasula epona liu. Lo ateva enama ia o verete ateva aue etoka nau ekapa atoa. Me ia o verete ateva aue atauela, malataughu eteva. Aghe tauue lao sio tale taumattu tale kosa ateva oia, me aue la roo tani ghaa maulue."

<sup>52</sup> Nau etera ajiu etoa laghe nongola isaa o inangarina, ghe sessailala, me laghe ue va, "Vaalua aue etaue mae malatauna, me ita nama?"

<sup>53</sup> Iesu ghe liula me ghe uela etaira va, "Aghaaulia ngakoronna etaimim va karika am rooroo tani ghaa maulue, arova am tam nama malatauna Natuna ateva Taumattu ngateva, me am tam ropi raena ateva.

<sup>54</sup> Lo ateva taumattu enama malataughu, me eropi raeghi eteva, aue eghaa maulue ateva tokatoka liu ia, me aue atotua, me eghaa maulue tale airuuruu tale kosa ateva.

<sup>55</sup> Poli malataughu eteva inana tuungia, me raeghi eteva ateo tuungia.

<sup>56</sup> Lo ateva enama malataughu, me eropi raeghi, etokatoka teeieghi, me aghi atokatoka teeia.

<sup>57</sup> Tamaghi, aitau maulue ia, ghe sungieghila tani sio, me atokatoka poli Tamaghi etautau mae maulue. Liuna avalua o me lo ateva enamaieghi, mausighi me aue eghaa maulue.

<sup>58</sup> Lo ateva o verete ghe kasula epona liu karika nongina lo ateva verete tuvuimim atoa laghe namaiela, me ngeila ghe matela. See enama lo ateva oia verete aue etoka nau ekapa atoa."

<sup>59</sup> Isaa o inangari Iesu ghe aauliaa me ghe aapasunga tale aleira ale nivelu eitauaa ajiu etoa eKapenium.

### *Inangari maulue ateva*

<sup>60</sup> Oroi ila lo atoa disaepolo laghe nongola me laghe uela va, "See aue enongo, poli aanasaailli inangari eaauliaa?"

<sup>61</sup> Iesu ghe kilala sa ateva kapuna disaepolo atoa laghe annainia, liuna avalua o me ghe kolomilala va, "Vaalua me isaa o inangari ange ghelei saasakiaala aikaaiiaimim?"

<sup>62</sup> Vaalua ta arova am ghele tara Natuna ateva Taumattu ngateva ghele sae nongina ghe kasula?

<sup>63</sup> Spirit Manga nonga ateva etautau lao maulue tale taumattu. Sarasarakaniaa taumattu karika aue eghalei righi llo. Isaa o inangari aghaauliaa etaimim ekasukasu tale Spirit Manga ateva, me etautau aatu maulue ateva.

<sup>64</sup> Me katoa etaimim karika am aikaaiiaa." (Iesu ghe auliaa llo poli ang ghe kila vella va see karika aue eikaaiiaa etana, me ang ghe kila teela see aue etaue lao ta nimaira tau ngai ssateena atoa.)

<sup>65</sup> Me Iesu ghe uela etaira va, "Mausina avalua o me aghaauliaa etaimim, va karika teva erooro tani mae etaghi, arova Tamaghi etam gheleia tani mae."

<sup>66</sup> Poli isaa o inangarina Iesu ghe auliaala me oroi kapuna disaepolo laghe liula viliira ta Iesu, me laghe ruula tani usia.

<sup>67</sup> Iesu ghe kolomila kapuna kasangaulu ghalua (12) disaepolo va, "Am tee am aloanna tani kasu vulieghi?"

<sup>68</sup> Saemon Pita ghe liula me ghe uela va, "Vau etera, ami mene lao ta see? Poli inangari maulue ateva tokatoka liu ia, ia etam.

<sup>69</sup> Ami aikaaiiaa etam, me ami kilakilaaili va io taumattu ngateva manga ia kapuna ia God."

<sup>70</sup> Iesu ghe liula me ghe uela va, "Am oia kasangaulu ghalue iem aghe suitoongainiema, me kateva etaimim nongina raroai eteva!"

<sup>71</sup> Iesu ghe aauliaa Jiudas, natuna ia Saemon Iskariot, ie tee elome ta kasangaulu ghalua kapuna disaepolo, me ia aue etaue lao Iesu ta tau ngai ssateena atoa.

### *Nengane atoa Iesu karika laghe aaiesoaa etana*

<sup>1</sup> Vara me Iesu ghe kasu seela eGalilii, me karika ghe aloanna tani sae eJiudia, poli ajiu

etoa laghe anna tani uvi ematea.

<sup>2</sup> Nau ang ghe aakalakalaa tani velu eitauaa me ajiu etoa laghe ghelei lutu ale kamekame.\*

<sup>3</sup> Nengane atoa Iesu laghe ue etana va, “Kasula me usae ejidua, me kapum disaepolo atoa aue la tara uunguaam ugheelei.

<sup>4</sup> Lo ateva eanna va taumattu ngatoa la kilaia karika eaaisulia va egheelei voto. Liuna avalua o me emasina va ughelei tale tummatavanga me kosa akapa ateva aue ekilao.”

<sup>5</sup> Nengane atoa laghe aulia ngavaluela o, poli ila tee karika laghe aaikaaiaa ta Iesu.

<sup>6</sup> Iesu ghe uela etaira va, “Naughu karika ghe mae. Am nauimim etokatoka arau.

<sup>7</sup> Taumattu tale kosa ateva oio karika aue la ssa teeiem. Aue esessaila nonga etaghi, poli aghaulia ngaotu gheeleiaira karika masina.

<sup>8</sup> Am saela tale nivelu eitaua ngateae. Karika aue asae poli naughu karika ghe mae.”

<sup>9</sup> Ghe auliaala isaa o inangari, me ghe tokala eGalilii.

*Iesu ghe lao sio tale nivelu eitaua ngateae nau laghe gheelei ale kamekame*

<sup>10</sup> Vara nengana atoa laghe kasula tani sae tale nivelu eitaua ngateae, me Iesu ghe vira aimulila. Kasukasuaane karika toa laghe kilaiela, ghe nim kasu einaola tani sae.

<sup>11</sup> Tale ia o nivelu eitaua ngateae, namuu ta ajiu etoa ngila ghe paepae Iesu, me laghe aikolomainee see va, “Eaa ia?”

<sup>12</sup> Ta polina me taumattu ngatoa ngila ghe auliulieinia. Katoa laghe ue va, “Iesu masi taumattu ia.” Me katoa laghe ue va, “Enim kamekame taumattu ngatoa.”

<sup>13</sup> Karika teva ghe auliaa isaa o inangari ta mata ngoroi etoa, poli laghe maamatauta kapuira namu ngatoa ajiu etoa.

<sup>14</sup> Laghe ghaa longotila tale ia o nivelu eitaua ngateae, me Iesu ghe tiuala tani apasunga voto ta taumattu ngatoa tale ale ngeleka atiulu tale ale manga ateva.

<sup>15</sup> Namuu ta ajiu etoa laghe soghiala tani nongoa, me laghe ue va, “Vaalua me ekilakila oroi voto nau karika teva ghe apasungaala etana?”

<sup>16</sup> Iesu ghe liula me ghe uela va, “Karika aghapasunga nim nannaaghi. Voto aghapasunga kanna lo ateva ghe sungieghila.

<sup>17</sup> Arova teva eannaaili tani aimuli tee aloannaane God, aue ghele kila va voto aghapasunga ekasukasu ta God, me karika va nim kalughu.

<sup>18</sup> Lo ateva taumattu eauliaa nannaane enim aloanna tani ghelei ararina atae, me lo ateva ealoanna tani tau sae ararina atae lo ateva ghe sungielia, voto eauliaa koronna, karika kamena.

<sup>19</sup> Moses ghe tau aatu sio inangari nipaopao etaimim, me karika teva etaimim eaaimuli tee. Mausi saa me am anna tani uvi emateaghi?”

<sup>20</sup> Taumattu ngatoa laghe ue etana va, “Raroai eteva etam. See eanna tani uvio?”

<sup>21</sup> Iesu ghe liula me ghe uela va, “Aghe gheleila kateva voto, me am ghe soghieiniela.

<sup>22</sup> Moses ghe uela etaimim va am iso natuimim taita atoa (karika va tani Moses ghe auliaala, ta tuvuimim atoa). Me am isoisoila tale nau manga ateva.

<sup>23</sup> Arova am rooroo tani iso aliki eteva tale nau manga ateva, tani nongo usilaa inangari nipaopao kanna Moses ghe auliaala, o vaalua esessaiem etaghi, poli aghe ghelei emasina akapala vilikina taumattu ngateva tee tale nau manga ateva?

<sup>24</sup> Am rau mene auliaa gheeleia taumattu tale taataraimim, am ghelei niaisakei tale ghulughuluena salana.”

*Taumattu ngatoa laghe anna tani kila va Iesu tani saa taumattu ia*

<sup>25</sup> Katoa tana taumattu nge Jerusalem laghe ue va, “Ia oia taumattu ngateva la paepaea tani uvia?

26 Tarala, epoppooaa ta mata ngoroi etoa, me karika la gheelei righi voto etana. Koti namu ngatoa la kilakila akorrona va ia Mesaea ia.

<sup>27</sup> Me iekai ita kilakila tanganuena, me Mesaea ngateva, karika aue ita kila va eaa tanganuena.”

<sup>28</sup> Iesu ghe aapasunga tale ale manga ateva, me ghe sama anamungailiila, me ghe uela va, “Am annaa vara am kilakilaieghi, me vara am kilakila tanganueghi. Aghi karika aghe mae sio tale aloaloannaaghi. Lo ateva ghe sungieghila koronna ia, me am, karika am kilakilaia.

---

<sup>7:2:</sup> Lev 23:34.    \* <sup>7:2:</sup> *ale kamekame* Ajiu etoa laghe gheelei lutu ale kamekame tani aso etana tani nnaa vaalua tuvuira atoa laghe tokatoka nau laghe kasukasu tee Moses. Utara Levitikos 23:33-43.    <sup>7:5:</sup> Apes 1:14.    <sup>7:15:</sup> Mat 13:54; Luk 2:47.    <sup>7:16:</sup> Jon 12:49; 14:10.    <sup>7:18:</sup> Jon 8:50.    <sup>7:19:</sup> Apes 7:53; Rom 2:21-24.    <sup>7:20:</sup> Jon 8:48; 10:20.    <sup>7:22:</sup> Lev 12:3; Aitiutiu 17:9-13.    <sup>7:23:</sup> Jon 5:8-10, 16.    <sup>7:27:</sup> Jon 7:41; 9:29.    <sup>7:28:</sup> Mat 11:27; Jon 8:55.

<sup>29</sup> Aghi akilakilaia, poli aghe tokatoka teeia, me ghe sungieghila tani sio."

<sup>30</sup> Katoa taumattu laghe anna tani kuneia, me karika laghe roola tani kuneia, poli nauna karika ghe mae.

<sup>31</sup> Oroi taumattu ghe aikaiaala etana, me laghe ue va, "Arova Mesaea ngateva esio, koti voto aue eghelei aue elau llo ia oia taumattu ngateva egheelei?"

#### *Laghe suula polisi etoa tani mae kune Jesu*

<sup>32</sup> Nau Paresi etoa laghe nongola taumattu ngatoa laghe aissakeana, laghe lao sio tani tara namuu ta pristi etoa, ila me namuu ta pristi etoa laghe suula polisi etoa tani laa kune Jesu.

<sup>33</sup> Me Jesu ghe uela etaira va, "Karika oroi nau aue atoka teeiem, me amene kasu tani sae ta lo ateva ghe sungieghila.

<sup>34</sup> Ave am pae poieghi, me karika aue am taraieghi, poli voto ateva alao etana am karika am rooroo tani lao etana."

<sup>35</sup> Taumattu nge Jiu etoa laghe tiuaala tani aikolomieinila va, "Eaa aue elao me karika aue ita tarai? Koti aue elao tale llo masaliki aGrik atoa la ghaitoiaa, me katoa tani kapuita la tokatoka etana. Koti aue mene laa ghapasunga ta aGrik atoa.

<sup>36</sup> Saa malloéana inangarina nau eue va, 'Aue am pae poieghi, me karika aue am taraieghi', me 'Voto ateva alao etana am karika am rooroo tani lao etana'?"

#### *Iesu ghe auliaala ateo atea maulue ia*

<sup>37</sup> Airuuruu tale ia o nivelu eitaua ngateae, kinatama nauira ateva, Iesu ghe tinginala, me ghe sama anamungailila me ghe uela va, "Lo ateva ukaakangngata tani ropi, umae etaghi me uropi.

<sup>38</sup> Lo ateva eaikaiaia etaghi, aue ateo atea maulue ia aue eakalaa elome tale urunguitanina ateva, nongina Uru ngai Manga ateva eaauliaa."

<sup>39</sup> Iesu ghe aauliaa Spirit Manga ateva va lo atoa la aikaiaia etana aue la ghaaia. Isaa o nau Spirit Manga ateva karika ghe mae, poli God karika ghe tau sae Iesu.

#### *Taumattu ngatoa ghe ghalueilala*

<sup>40</sup> Katoa taumattu laghe nongola isaa o inangari Iesu ghe aauliaa etaira me laghe uela va, "Koronna, taumattu ngateva oia, ia o propete ateva Moses ghe aulieiniela."

<sup>41</sup> Mene katoa laghe ue va, "Ia oia taumattu ngateva Mesaea etana." Mene katoa laghe ue va, "Karika va Mesaea ngateva aue ekasu eGalilii.

<sup>42</sup> Uru ngai Manga ateva eue va Mesaea ngateva aue elutu ta mangalina atoa Deivit, me aue elutu eBettlehem, ia o masalikina ia Deivit."

<sup>43</sup> Taumattu ngatoa ghe ghalueilala tale ninannaa ta poli Iesu.

<sup>44</sup> Katoa ngila ghe anna tani kuneia, me karika teva ghe roola.

#### *Namu ngatoa karika laghe aikaiaala ta Iesu*

<sup>45</sup> Polisi etoa laghe laa rekata sio, me namuu ta pristi etoa me Paresi etoa laghe kolomilala va, "Vaaluua me am tam maeaa sio Iesu?"

<sup>46</sup> Polisi etoa laghe liula me laghe uela va, "Karika teva taumattu erooroo tani aippooaa nongina taumattu ngateva okae."

<sup>47</sup> Me Paresi etoa laghe uela va, "Ae! Am tee ange kamekameam?

<sup>48</sup> Ngam tarala va teva namuu ta ajiu etoa me Paresi etoa eaaikaiaia etana?

<sup>49</sup> Lo atoa la ghaikaiaia etana karika la kilakila inangari nipaopao, me God ang ghe kasikienainilala."

<sup>50</sup> Nikodimas, ia o ghe lao akasina sio ta Iesu, ie tee ghe tokatoka me ghe uela va,

<sup>51</sup> "Uneita inangari nipaopao eue va, ita rau mene ghelei righi voto ta teva taumattu, ita tani nongo mua va sa ateva ghe gheleliela."

<sup>52</sup> Me laghe uela etana va, "Koti io tee aGalilii io? Uriti Uru ngai Manga ateva, me utara va karika teva propete aue ekasu eGalilii."

<sup>53</sup> <sup>†</sup> Me laghe tiu reerekataala tani lao tanganueira.

## 8

<sup>1</sup> Iesu ghe saela tale motouru eteva ararina atea eOliv.

**7:30:** Jon 7:44.    **7:34:** Jon 8:21; 13:36.    **7:37:** Lev 23:36; Ais 55:1; Jon 4:14.    **7:38:** Ais 58:11.    **7:39:** Jon 16:7; 20:22; Apos 2:4.    **7:40:** Jon 6:14.    **7:41:** Jon 1:46.    **7:42:** Sams 89:3-4; Maeka 5:2.    **7:46:** Mak 1:22.    **7:48:** Jon 12:42.    **7:50:** Jon 3:1-2.    **7:52:** Jon 7:41-42.    <sup>†</sup> **7:53:** Llo akasina uru ngai laghe pitila, karika laghe pitila Jon 7:53-8:11. Oroi ila lo atoa laghe pitila kiukiu etea ta Jon 7:53, me kasina laghe pitiela. Kasina laghe pitiela elome ta Jon 7:36 me Jon 7:37, me kasina laghe pitiela ta airuuruu ta Jon 21:25, me mene kasina laghe pitiela emuli ta Luk 21:38.

<sup>2</sup> Elue talaua poopooa ghe mene ssola tale ale manga ateva, me taumattu ngakapa atoa laghe mene mae sio tani tarai, me ghe toka siola, me ghe tiuaala tani apasunga etaira.

<sup>3</sup> Vara me Paresi etoa me tau ngai aapasunga ngatoa tale inangari nipaopao ngila ghe reerekataa vause ateva etana. Laghe taraiela ghe aso teela taita ateva karika manna ia, me laghe atinginaiela elome ta mata taumattu ngatoa.

<sup>4</sup> Me laghe uela ta Iesu va, "Tisa, ia oia vause ateva easoaso tee taita ateva karika manna ia, me ami ghaaiela.

<sup>5</sup> Tale inangari nipaopao Moses ghe uela va ia oia ase vause ateva egheelei evalua o pei nikumu ematea. Me io, aue uee va saa?"

<sup>6</sup> Laghe aaulia ngavalua o tani tootoonga Iesu, me saa llo ghe auliaa aue laghe tingina etana tani ghelei niaiseakei etana.

Iesu ghe tturru siola euu, me ghe tiuaala tani pitipiti tale vuuvuu nimane ateva nonginaaili va karika ghe nongonongola.

<sup>7</sup> Laghe mene kookolomia, me Iesu ghe tinginala, me ghe uela etaira va, "Lo ateva elome etaimim etam gheelei righi voto sesa, ughaa tiulu atu, me io uaitiutiu tani kumua."

<sup>8</sup> Vara me ghe mene tturru siola euu, me ghe mene tiuaala tani pitipiti.

<sup>9</sup> Me lo atoa laghe nongola, laghe tiuaala tani kasu kateva kateva, ghe tiuaala ta namu ngatoa, me ghe laa ruu sio tale airuuruu eteva taumattu. Me Iesu nonga me vause ateva lalu ghe tokala.

<sup>10</sup> Iesu ghe mene tingina saela, me ghe uela etana va, "Eaa ila? Karika teva eanna tani tau aatu sesa aipolipoli etam?"

<sup>11</sup> Ghe liula me ghe uela va, "Karika teva, namu ngateva."

Me Iesu ghe uela va, "Aghi tee atam anna tani tau aatu sesa aipolipoli etam. Kasula, me unim ruu tani ghelei ssavoto."

Iesu mallanga ia tale kosa ateva

<sup>12</sup> Iesu ghe mene uela ta taumattu ngatoa va, "Aghi mallanga ieghi tale kosa ateva oia. Lo ateva eaimuli teeieghi, karika aue ekasu tale saurrom ateva, ta aue eghaa lo ateva o mallanga etautau aatu maulue."

<sup>13</sup> Paresi etoa laghe nongola, me laghe uela ta Iesu va, "Io nonga uaaulia ngaotu gheeleiaam me uunguaam. Liuna avalua o me inangarim karika koronna."

<sup>14</sup> Iesu ghe liula me ghe uela va, "Koronna va aghaulieinaghi nonga, me inangarighi koronna. Ta poli akilakila tanganueghi me eaa alao, me am, am tam kilakila tanganueghi me eaa aue alao.

<sup>15</sup> Am, am gheelei niaiseakei tale taumattu nongina gheeleiaa kosa ateva, me aghi karika. Karika agheelei niaiseakei tale teva taumattu.

<sup>16</sup> Arova aghele ghelei niaiseakei aue aghele ghelei ekoronna poli karika va aghi nonga aue aghele ghelei, ta aghi me Tamaghi ghe sungieghila aue angulu ghele ghelei.

<sup>17</sup> Uneimim inangari nipaopao eue va, arova ghalua taumattu lalu auliaa inangariarua me elao aitaua, isaa o inangari am vira kaili ekoronna.

<sup>18</sup> Aghi aghaaulia ngaotu uunguaaghi me gheeleiaaghi, me Tamaghi, ia o ghe sungieghila, ie tee eaauliaa uunguaaghi me gheeleiaaghi."

<sup>19</sup> Vara me laghe kolomiela va, "O eaa ia tamam?"

Iesu ghe liula me ghe uela va, "Arova am kilakilaieghi, aue am ghele kila Tamaghi, me poli am tam kilakilaieghi, karika aue am kila Tamaghi."

<sup>20</sup> Iesu ghe aauliaa isaa o inangari kalakalaa tale ale atiulu laghe kaakaai viliki veu etana tale ale manga ateva. Karika teva taumattu ghe anna tani kurenia, poli nauna karika ghe mae.

Karika am rooroo tani lao nongina alao

<sup>21</sup> Iesu ghe mene uela etaira va, "Aue akasus vuliem, me aue am pae poieghi, me am mate tee kaluimim ssavoto. Karika am rooroo tani lao nongina aue alao."

<sup>22</sup> Ajiu etoa laghe aikolomieinila va, "Vaalua me eue va, 'Karika am rooroo tani lao nongina aue alao?' Koti enim aloanna tani uvi ematea, no?"

<sup>23</sup> Iesu ghe uela etaira va, "Am, tanganueimim oia euu, me aghi, tanganueghi epona liu, me am taumattu tale kosa ateva oia, me aghi karika."

<sup>24</sup> Aghaauliaa etaimim va aue am mate tee kaluimim ssavoto, poli arova am tam aiesoaa va aghi see, aue am mate tee kaluimim ssavoto."

<sup>25</sup> Me laghe kolomiela va, "Io see io?"

Me Iesu ghe uela etaira va, "Aghi ia o taumattu ngateva aghe aulieiniela etaimim emua arau.

<sup>26</sup> Oroiannaaili voto arooroo tani auliaa tani aotu gheeleiaaimim karika masina, me tani ghelei niaiskei etaimim. Ta lo ateva aghaaulieinia koronna ia, poli lo ateva ghe sungieghila koronna ia, me aghi aghaulia ngaotu tale taumattu tale kosa ateva saa voto aghe nongola etana."

<sup>27</sup> Karika laghe kilakila va Iesu ghe aauliaa Tamane.

<sup>28</sup> Iesu ghe ue etaira va, "Nau eteva aue am avukala sae Natuna ateva Taumattu ngateva, me aue am vira mene kila va aghi see. Me karika agheelei righi voto ta nannaaghi, ta agheelei nonga voto Tamaghi ghe apasungaala.

<sup>29</sup> Lo ateva ghe sungieghila etokatoka teeieghi. Karika etautau velueghi va aghi nonga atokatoka, poli nau ekapa atoa agheeghelei llo voto ealoanna."

<sup>30</sup> Nau taumattu ngatoa laghe nongola inangarina, oroi ila lo atoa laghe aikaiaala etana.

#### *Koronna inangari aue egheleiem am toka amasina*

<sup>31</sup> Vara me Iesu ghe uela ta lo atoa ajiu laghe aaiesoaa etana va, "Arova nau ekapa atoa am aimuli tee inangarighi, am aue kapughi disaepolo tuungi iem,

<sup>32</sup> me aue am kila koronna inangari, me llo koronna aue gheleiem am ruu tani nim ungu ta katoa me karika am tokatoka tale aloannaaimim."

<sup>33</sup> Laghe liula me laghe uela va, "Ami tuvuimami ta Abraham, karika teva etaimami enim uungu me karika etokatoka tale aloaloannaane. Vaalua me uue va, 'Aue am ruu tani uungu ta katoa?'"

<sup>34</sup> Iesu ghe liula me ghe uela va, "Aghaaulia ngakoronna etaimim va lo ateva enim toka gheelei voto sesa, ia tau ngai uungu ia tale voto llo sesa, karika etokatoka tale aloannaane.

<sup>35</sup> Tau ngai nonganongo anna ateva enim tokatoka tau tee vauna ateva. Natuna nonga ateva vauna ateva aue etoka teeia nau ekapa atoa.

<sup>36</sup> Arova natuna ateva egheleiem am ruu tani uungu ta katoa, aue am vira ruu tani uungu ta katoa.

<sup>37</sup> Akilakila va tuvuna am Abraham, me poli inangarighi karika elome tale urunguitanim, me am aloanna tani uvi emateaghi.

<sup>38</sup> Voto aghe tarala ta Tamaghi, aghaauliaa. Voto am ghe nongola ta tamaimim ateva am gheeghelei."

#### *Am tamaimim ateva ta Satana*

<sup>39</sup> Laghe liula me laghe uela ta Iesu va, "Ami tuvuimami eteva ta Abraham."

Me Iesu ghe uela etaira va, "Arova tuvuna am Abraham aue am ghele ghele voto nongina Abraham ghe gheelei.

<sup>40</sup> Nau eteva aghaauliaa voto koronna aghe nongola ta God, am aloanna tani uvi emateaghi. Abraham karika ghe gheelei evalua o.

<sup>41</sup> Am, am tani gheelei nonginaaili tamaimim ateva."

Me laghe uela etana va, "Vara natu ngerengere iemami? Ami kateva nonga tamaimami God ta getana."

<sup>42</sup> Iesu ghe uela etaira va, "Arova natuna iem God, aue am ghele aielousieinagh, poli aghe kasula nongina etokatoka. Karika nim nannaaghi va aghe sio mae, ia ghe sungieghila tani sio.

<sup>43</sup> Vaalua me karika am nonganongo kila inangarighi? Poli karika am rooroo tani nongo inangarighi,

<sup>44</sup> am tamaimim ateva ta Satana, poli am aloanna tani ghelei voto ealoanna. Ia emua arau ghe aiuvi ematela, me karika eaauliaa righi koronna poli karika righi koronna etana. Nau eaauliaa kamena, euusila ngarau gheegheleiaane kamena. Poli ia ekamekame, o tamaira akapa ia lo atoa la kamékame.

<sup>45</sup> Ta poli aghaauliaa voto koronna, karika am aikaiaia etaghi.

<sup>46</sup> Teva etaimim erooroo tani auliaa righi gheeleiaaghi karika masina? Arova aghauliaa koronna, vaalua me am tam aikaiaia ta ngetaghi?

<sup>47</sup> Lo atoa natuna ila God, aue la nongo usilaa inangarina, me am, karika am aloanna tani nongo inangarina, poli karika va natuna am God."

#### *Iesu me Abraham*

<sup>48</sup> Me ajiu etoa laghe liula me laghe uela ta Iesu va, "Inangariimami ami aauliaa koronna va io aSameria io, me raroai eteva etokatoka etam, va?"

<sup>49</sup> Iesu ghe liula me ghe uela va, "Karika teva raroai etaghi, ta anim tautau sae ararina atae Tamaghi, me am aasiosio ararighi eteae.

<sup>50</sup> Me aghi karika aghanna tani ghelei ararighi eteae. Kateva nonga eanna tani tau sae ararighi eteae, me ia tau ngai ghelei niaiskei ia.

<sup>51</sup> Aghaulia ngakoronna etaimim va arova lo ateva enongo usilaa inangarighi, ia o taumattu ngateva karika aue etara nimate."

<sup>52</sup> Me ajiu etoa laghe uela etana va, "Ia oia ngami kilala va raroai eteva etokatoka etam, poli Abraham me mene katoa propete ngila ghe matela. O me uue va, 'Lo atoa la nongo usilaa inangarighi karika aue la ateateaa nimate.'

<sup>53</sup> Vara io va namuu io ta tuvuimami eteva ta Abraham me mene katoa propete ngila ghe matela? Vara mene see etam?"

<sup>54</sup> Iesu ghe liula me ghe uela va, "Arova aghele tau sae ararighi eteae, ararighi eteae nim kapia ia. Me Tamaghi, ia o am ue va kapuimim Goto ia, etautau sae ararighi eteae."

<sup>55</sup> Am karika am kilakilaia. Aghi nonga akilakilaia. Arova aghele ue va karika akilakila, aue aghele kamekame nongina am tau nikamekame iem. Aghi akilakilaia, me anongonongo usilaa inangarina.

<sup>56</sup> Tuvuimim ateva ta Abraham ghe masimasieiliila tani tara isaa oia naughu. Nau eteva ghe tarala ghe masimasieiliila."

<sup>57</sup> Me ajiu etoa laghe uela etana va, "Meie! Anem ninamanama karika ghe nim sae ta ghalimangauluae (50), me vaalua ughe tarala Abraham?"

<sup>58</sup> Iesu ghe uela etaira va, "Aghaulia ngakoronna etaimim va auena Abraham ghe lutu, aghi ngaghe toka vella arau!"\*

<sup>59</sup> Me ngila ghe reirei atu tani kumua. Iesu ghe aisuliaala, me ghe kupi ghoala tale ale manga ateva.

## 9

### *Iesu ghe ghelei emasinala mata salusalu eteva*

<sup>1</sup> Iesu ghe kasukasus elaoalo, me ghe tarala taumattu ngateva ghe lutu emata salusalula.

<sup>2</sup> Kapuna disaepolo atoa laghe kolomiela va, "Tisa, vaalua me ghe mata salusalunala, poli ia kanna ssavoto, o tamana me kinna?"

<sup>3</sup> Iesu ghe liula etaira me ghe uela va, "Karika va ia kanna ssavoto, o tamana me kinna, ta mausi aue taumattu ngatoa la tara uunguaane God etana.

<sup>4</sup> Ave ita ghelei uunguaane lo ateva ghe sungieghila tani mae ghelei. Ellaa ita tani uungu, va nau eleivoo, karika teva eroororo tani uungu.

<sup>5</sup> Nau atokatoka oia tale kosa ateva, aghi mallanga aghi tale kosa ateva."

<sup>6</sup> Nau ghe aippooaa, me ghe kanusuila tuku kosa ateva, va ghe maramarakanala, me ghe atavainie saela tale matana alua,

<sup>7</sup> me ghe uela etana va, "Kasula, me ulaa pora matam tale ateo atae kaikaina ia, ararina atae ta Siloam." (Malloeana Siloam va "sungiela".) Ghe porala matana, me ghe kiriala, me ghe taatara.

<sup>8</sup> Kapuna atoa me lo atoa laghe taataraia ta ghe toka looloo, laghe ue va, "Karika va ia okae taumattu ngateva ghe toka looloo nonga tapaa ngatamana tale ale manga ateva?"

<sup>9</sup> Katoa laghe ue va, "Ia oio taumattu ngateva."

Mene katoa laghe ue va, "Karika, arova taataraane va ia okae."

Ia ghe uela va, "Aghi oia."

<sup>10</sup> Laghe kolomiela va, "Vaalua me matam ghe taatarala?"

<sup>11</sup> Ghe liula me ghe uela va, "Taumattu ngateva la kolokoloa va Iesu etana, ghe ghelei emaramarakanala tuku kosa ateva, me ghe atavainie saela ta mataghi, me ghe uela etaghi va, 'Ulaa pora matam tale ateo atae eSiloam.' Aghe lao sio va aghe porala mataghi, me ghe taatarala."

<sup>12</sup> Laghe kolomiela va, "Eaa ia, ia ona taumattu ngateva uauleinian?"

Ghe liula me ghe uela etaira va, "Karika anga kilala."

<sup>13</sup> Laghe laoaa sio taumattu ngateva mata salusalu ia ta Paresi etoa.

<sup>14</sup> Ia o nau eteva nau manga ia Iesu ghe ghelei emaramarakanala tuku kosa ateva, me ghe gheleila matana alua lalu ghe taatarala.

<sup>15</sup> Paresi tee atoa laghe kolomiela va, "Vaalua utaatarala?"

Ghe uela etaira va, "Ghe atava saela kosa maramarakanala ta mataghi, me aghe lao sio tani pora mataghi, me aghe taatarala."

<sup>8:51:</sup> Jon 5:24.    <sup>8:58:</sup> Jon 1:1.    \* <sup>8:58:</sup> Iesu ghe ghaala ararina atae God, nongina Eksodis 3:14 eaauliaa.

<sup>9:2:</sup>

Esik 18:20; Luk 13:2, 4.    <sup>9:3:</sup> Jon 11:4.    <sup>9:5:</sup> Mat 5:14; Jon 8:12.    <sup>9:6:</sup> Mak 8:23.

<sup>16</sup> Katoa Paresi laghe ue etana va, “Taumattu ngateva oia karika va God ghe sungiela, poli etam aitaraa nau manga ateva.”

Mene katoa laghe ue va, “Vaaluua sesa taumattu ngateva erooroo tani ghelei righi niaimatoonga?” Ghe ghaluela nannaaira me laghe aitiuala.

<sup>17</sup> Laghe mene ue ta mata salusalu eteva va, “Io, vaaluua nannaam etana, ta poli ghe otile matam alua?”

Ghe uela va, “Ia propete ia.”

<sup>18</sup> Poli ajiu etoa laghe tam aikaiaa inangarina mata salusalu eteva, va ia mata salusaluna ia, me ghe mene taatarala, laghe suula inangari ta tamana me kinna va lalu mae.

<sup>19</sup> Angila ghe kookolomi tamana me kinna va, “Ierai natuimalue ia? Amalu ghe ue va ghe lutu emata salusalunala? Me vaaluua me ghaine etaatara?”

<sup>20</sup> Tamana me kinna lalu ghe liula etaira va, “Angalu kilakilaia va natungalue ia ta ghe lutu emata salusalunala.

<sup>21</sup> Vaaluua me ghaine etaatara, angalu tam kilakila va see ghe otile matana alua. Am kolomia, ta namuu ia, me ia aue eauliaa etaimim.”

<sup>22</sup> Lalu ghe auliaa ngavalua o poli lalu ghe maamatauta namuu ta ajiu etoa, ta namuu ta ajiu etoa laghe ue va arova lo atoa la ue va Iesu Mesaea ia, aue la tiu vella tale ale nivelu etaua ngateva, me karika aue la mene mae kkaua teeila.

<sup>23</sup> Liuna avalua o tamana me kinna lalu ghe uela va, “Am kolomia, ta namuu ia.”

<sup>24</sup> Laghe mene kolola mata salusalu eteva ghe mae sio. Me laghe uela etana va, “Utua sae God,\* poli ami kilakila taumattu ngateva ona va tau ngai gheelei ssavoto ia.”

<sup>25</sup> Ghe liula etaira va, “Arova tau ngai gheelei ssavoto ia o karika, atam kilakila. Kateva nonga voto akilakilaia va, aghi mata salusalu ieghi, me isaa oia ngataatarala.”

<sup>26</sup> Laghe mene kolomiela va, “Saa llo ghe gheleila etam, me vaaluua ghe otile matam?”

<sup>27</sup> Ghe liula etaira va, “Ngaghe auliaa muela etaimim, me karika am ghe aloanna tani nongo. Vaaluua me am aloanna tani mene nongo? Koti am tee, am anna va ekapuna disaepolo iem?”

<sup>28</sup> Paresi etoa laghe auliaa saasakiaala etana. Laghe uela etana va, “Io nonga kapuna disaepolo io, ami kapuna disaepolo iemami Moses.

<sup>29</sup> Ami kilakila va God ghe aippooaa teela Moses. Me ia ona taumattu ngateva, ami tam kilakila tanganuena.”

<sup>30</sup> Taita ateva oia ghe liula etaira va, “Ngasogchiaala inangariim! Am ue va am tam kilakila tanganuena, me ia oia taumattu ngateva ghe otile mataghi elua.

<sup>31</sup> Ita kilakila va God etam rooroo tani nongo usilaa tau ngai gheelei ssavoto atoa, me arova lo ateva ekakkaua God me eaimuli usi tee aloannaane God, ia aue God enongo usilainia.

<sup>32</sup> Emua arau nau kosa ateva ghe tiauala, karika ita ghe nongo poila righi taumattu ghe lutu esalusalunala me matana ghe mene otila.

<sup>33</sup> Arova ghe tam kasula ta God, karika erooroo tani ghelei righi voto.”

<sup>34</sup> Me laghe liula me laghe uela etana va, “Ughe lutula tale ssavoto, me vaaluua me uanna tani apasunga voto etaimami!” Me laghe tiu veluela va karika emene mae kkaua teeila.

<sup>35</sup> Iesu ghe nongola va ngila ghe tui veluela. Nau ta ghe paeala me ghe taraiela, ghe uela etana va, “Uaikaiaa ta Natuna ateva Taumattu ngateva?”

<sup>36</sup> Me taumattu ngateva o ghe kolomila va, “Namu ngateva, auliaala etaghi va see ia, ia ona taumattu ngateva, me aue aghaikaiaa ta getana.”

<sup>37</sup> Iesu ghe uela etana va, “Angu ghe taraiela, me ia oia esamasama teeio.”

<sup>38</sup> Me taumattu ngateva o ghe uela va, “Vau eteva, aghaikaiaa,” me ghe suuiala ta liue kkena Iesu me ghe kaeiniela.

<sup>39</sup> Iesu ghe uela va, “Aghe sio mae tale kosa ateva tani ghelei niaisakei ta taumattu ngatoa, me aue lo atoa mata salusaluna ila la taatara, me lo atoa la taatara la mata salusaluna.”

<sup>40</sup> Katoa Paresi laghe tokatoka me laghe nongola llo Iesu ghe auliaala, me laghe kolomiela va, “O ami tee mata salusalu iemami?”

<sup>41</sup> Iesu ghe liula me ghe uela va, “Arova mataimim salusaluna, karika aue ghelei righi kaluimim ssavoto, me poli am ue va, ‘Ami taatara,’ liuna avalua o me kaluimim ssavoto, ie etokatoka etaimim.”

**10**

*Iesu masi tau ngai toi sipsipi ia*

<sup>1</sup> Iesu ghe mene uela va, “Aghaaulia ngakoronna etaimim va lo ateva taumattu, karika ekupikupi sso tale atamani valavala sipsipi eteae, ta etattakole tale valavala atae, tau niainao ia, me aisari katoa ghinnaniira ia.

<sup>2</sup> Lo ateva taumattu ekupikupi sso tale atamana atae, ia tau ngai toi sipsipi ia.

<sup>3</sup> Tau ngai toi atamana atae etaatara kila tau ngai toi sipsipi eteava, me eotioti atamana atae, me tau ngai toi sipsipi eteava ekupikupi sso, me sipsipi etoa la nonganongo kila lingi ngalona ateva. Ekolokoloa arariira kiena sipsipi etoa, me ekuukupieinila ghoa eleka.

<sup>4</sup> Nau eteava ekuukupia ngakapa ghoa kiena sipsipi, me emuemueinila, me kiena sipsipi etoa la ghaaimuli teeia, poli la nonganongo kila lingi ngalona ateva.

<sup>5</sup> Karika la roro rooro tani usi mene teva ppae taumattu. Me aue la ghele ilou vuli teeia, poli karika la nonganongo kila lingi ngalona ateva.”

<sup>6</sup> Iesu ghe auliaala ia o kiukiu niaimatoongana atae, me nannaaira karika ghe masalike teela voto ghe auliaala etaira.

<sup>7</sup> Liuna avalua o me Iesu ghe mene uela etaira va, “Aghaaulia ngakoronna etaimim va aghi atamani sipsipi etoa ieghi.

<sup>8</sup> Lo atoa laghe muemue mae akasina sio etaghi, tau niainao ila me aisari ghinna ila, me sipsipi etoa karika laghe nongo kilailala.

<sup>9</sup> Aghi atamana ieghi. Lo ateva ekupikupi sso etaghi aue esaanga. Aue esso me eghoa, me aue eghaa masi inana.

<sup>10</sup> Tau niainao ateva emaema tani ainao, me tani aiuvii emate, me tani tturuu. Me aghi aghe mae sio va la ghaa maulue, me maamauluuaaira epasu tale masi voto.

<sup>11</sup> Aghi masi tau ngai toi sipsipi ieghi. Masi aitoi sipsipi eteava, etautau maamauluuaane tani sausi kiena sipsipi etoa.

<sup>12</sup> Polipolina ateva taumattu, nau eteava sesa paua ngetapaa tuvui eteva emaema tani nama sipsipi etoa, aue eilou vuli sipsipi etoa, poli karika va tau ngai toi sipsipi ia, me karika va kiena tuungi ila. Me paua ateva aue ghele namaila me ghele ameti reerekatainila.

<sup>13</sup> Ia o taumattu ngateva eilou vuli sipsipi etoa poli enim uungu tani ghaa viliki veu, me karika nannaane tani aitaraa sipsipi.

<sup>14</sup> “Aghi masi aitoi sipsipi ieghi. Akilakila kieghi sipsipi, me ila la kilakilaieghi,

<sup>15</sup> nongina Tamaghi ekilakilaieghi, me aghi akilakila Tamaghi, me atautau maamaulu-aaghi tani sausi kieghi sipsipi etoa.

<sup>16</sup> Mene katoa tana kieghi sipsipi, karika ila elome tale ia oia valavala atae. Aue atani ghaaila, me la mae kupi sso, me ila tee aue la nongo lingi ngaloghu eteava, me aue ekateva nonga ila, me ekateva nonga tau ngai toira.

<sup>17</sup> Tamaghi eailousieinaghi, poli aue atau velu maamauluuaaghi, me auena amene ghaa.

<sup>18</sup> Karika teva erooroo tani ghaa velu maamauluuaaghi. Aghi atautau velu maamaulu-aaghi, me aghi nonga matuutulienia aghi tani tau velu maamauluuaaghi me matuutulienia aghi tani mene ghaa. Tamaghi ghe auliaa tau mae isaa oia inangari va aghelei.”

<sup>19</sup> Isaa o inangarina ghe gheleila me ajiu etoa ghe ghalueilala.

<sup>20</sup> Oroi ila taumattu ngatoa laghe ue va, “Raroai eteava etokatoka etana, me veeveena ia. Vaalua me am anna tani nongo inangarina?”

<sup>21</sup> Me katoa laghe ue va, “Lo ateva raroai eteava etokatoka etana karika erooroo tani auliaa isaa o voto. Raroai eteava karika erooroo tani oti mataira salusaluna atoa.”

*Ajiu etoa karika laghe aaiesoaa ta Iesu*

<sup>22</sup> Nau eteava tani nnaa lao nau laghe tau saela ale manga ateva ghe rekatala. Ia o nivelu eitaa ngateae ghe lutulutu tale nau kkaili ejerusalem,

<sup>23</sup> me Iesu eleka tale ale manga ateva ghe kasukasu tale varanda ngateva laghe asease Solomon etana. <sup>24</sup> Me ajiu etoa laghe mae sio tani tingina talieinia me ngila ghe ue etana va, “Lovisa uaulliaa kiemami? Ange matemate toitoiaaimami. Arova io Mesaea ngateva, uaullia ngamasina etaimami.”

<sup>25</sup> Iesu ghe liula me ghe uela etaira va, “Aghaauliaa etaimim, me karika am aaiesoaa. Niungu aghe gheelei tale ararina atae Tamaghi eaauliaa va aghi see ieghi.

<sup>26</sup> Am tam aaiesoaa poli karika va kieghi sipsipi iem.

<sup>27</sup> Kieghi etoa sipsipi la nonganongo kila lingi ngaloghu eteava. Akilakilaila me la ghaaimuli teeieghi.

<sup>28</sup> Atautaula maulue ateva etokatoka nau ekapa atoa, me karika aue la mate. Karika teva erooroo tani ghaa vella ta nimaghi.

<sup>29</sup> Tamaghi, ghe taula mae sio etaghi, enaanamuu vulu isaa akapaaili taumattu, me karika teva erooroo tani ghaa vella ta nimane Tamaghi.

<sup>30</sup> Aghi me Tamaghi kateva nonga iengalua.”

<sup>31</sup> Me ajiu etoa ngila ghe mene reirei atu tani kumua.

<sup>32</sup> Me Iesu ghe uela etaira va, “Aghe apasungala oroiannaaili masi niuungu kanna Tamaghi. Am anna tani kumueghi tale mausi sa ateva tale isaa o niuungu?”

<sup>33</sup> Ajiu etoa laghe liula me laghe uela va, “Karika ami anna tani kumuo poli isaa o voto, ta poli uaauliaa saasakiaa tee God, poli nim taumattu io, me uue va io God.”

<sup>34</sup> Me Iesu ghe liula me ghe uela etaira va, “Karika am ghe ritila tale uneimim inangari nipaopao, eue va, ‘Aghe uela va am goto iem?’

<sup>35</sup> Emua arau God ghe ppooalaal inangarina ta taumattu ngatoa me ghe uela va goto ila. Inangarina God tale Uru ngai Manga ateva karika eaikolikoliaa.

<sup>36</sup> Me aghi, Tamaghi ghe amangaieghila me ghe sungieghila tani sio tale kosa ateva oia. Liuna avalua o me aue va Natuna ieghi God. Vaalua me am ue va aghaauliaa saasakiaa ta God?

<sup>37</sup> Am rau mene aiesoaa etaghi arova atam gheelei uunguaane Tamaghi.

<sup>38</sup> Arova am tam aiesoaa etaghi, am aiesoaa tale niuungu agheelei, poli agheelei unguane Tamaghi, me aue am kila va Tamaghi etaghi me aghi ta Tamaghi.”

<sup>39</sup> Laghe mene anna tani kuneia, me karika laghe roola.

<sup>40</sup> Me Iesu ghe mene oghi lao sio, me ghe lau longotila ejordan, me ghe lao sio tale voto ateva Jon ghe aasuu taumattu etana, me ghe tokala tale ia o voto ateva.

<sup>41</sup> Me orioeili taumattu ghe mae sio etana. Laghe ue va, “Koronna va Jon ghe tam gheleila teva niaimatoonga, me voto ghe auliaala tale ia oia taumattu ngateva koronna akapa.”

<sup>42</sup> Tale ia o voto ateva oroi taumattu ghe aiesoala ta Iesu.

## 11

### *Lasarus ghe matela*

<sup>1</sup> Kateva taumattu, Lasarus etana, ghe iisiki. Ghe tokatoka eBetani, tanganueirarua Meri me tuena ta Mata.

<sup>2</sup> Meri ia o vause ateva ghe kaola voto masi ngusungusuaane ta kkena Vau eteva, me ghe ulula tale uu nguruna, ia o Meri kapuna taita ateva oia ta Lasarus ghe iisiki.

<sup>3</sup> Liuna avalua o me kapuna vause alua lalu ghe suula inangari ta Iesu tani auliaa kienava, “Vau eteva, unongo, masi kapum ateva eiisiki.”

<sup>4</sup> Nau eteva Iesu ghe nongola, ghe uela va, “Ia okae isiki eteva karika aue eruu tale nimate. Enim lutula tani apasunga sarasarakaniaane God, me la tau tee sae ararina ateaet Natuna ateva God.”

<sup>5</sup> Iesu ghe aielousiangaili Mata me nengane ta Meri me Lasarus.

<sup>6</sup> Liuna avalua o, nau eteva Iesu ghe ghaala inangari va Lasarus eiisiki, ghe mene tokala ghalue nau nongina ghe tokatoka arau.

<sup>7</sup> Vara me ghe uela ta kapuna disaepolo atoa va, “Ita kasu me ita mene sae ejjudia.”

<sup>8</sup> Me kapuna disaepolo atoa laghe uela etana va, “Tisa, vaalua me umene anna tani sae ejjudia, ajiu etoa okae ghalavon nonga laghe anna tani kumu emateo tale atu?”

<sup>9</sup> Iesu ghe uela etaira va, “Karika am kilakila va kasangaulu ghalua (12) aoa ta kateva nau? Arova lo ateva ekasu ella, karika aue etaghueinia, poli etaatara tale mallanga ateva tale kosa ateva.

<sup>10</sup> Me arova lo ateva taumattu ekasu eleivoo, aue etaghueinia, poli karika etaatara teva mallanga.”

<sup>11</sup> Vara ghe ruula tani auliaa llo me ghe mene uela etaira va, “Kapuita ateva ta Lasarus enim sio aseasekanua, me anga laa siosio oia tani angunia.”

<sup>12</sup> Me disaepolo atoa laghe uela etana va, “Vau eteva, arova enim sio aseasekanua, aue emasina.”

<sup>13</sup> Iesu ghe aauliaa va ang ghe matela, me ila laghe annaa va ghe aauliaa niasekanue ateaet ta ghainoana etana.

<sup>14</sup> Me Iesu ghe vira mene aulia ngamasinala va, “Lasarus ang ghe matela.

<sup>15</sup> Nau eteva aghannainam anim masimasi va karika aghe toka teeielaa, poli isaa o voto aue egheleiem am aiesoaa. Ita kasu, me ita sio taraiia.”

<sup>16</sup> Vara me Tomasi, kateae ararina laghe kolokoloa va Palue ia, ghe uela ta disaepolo akapa atoa va, "Elauo! Ita akapa ita usia, me ita laa mate teeia."

*Iesu etottotu taumattu matena me etautaula maulue*

<sup>17</sup> Nau eteva Iesu ghe laa rekata sio eBetani, ghe nongola va ang ghe asola ghaata nau tale lienga niaikkaia.

<sup>18</sup> Betani kalakalangina ia eJerusalem, maamasauaane erooroo nim kotolu nonga kilomita.

<sup>19</sup> Oroi ajiu etoa laghe mae sio tani aippooaa me toka tee Mata me Meri tani aale amate, poli kapuirarua taita ateva ghe matela.

<sup>20</sup> Nau eteva Mata ghe nongola va Iesu ang ghe rekatala, ghe lao sio tani soua, me Meri ghe tokala elo ale.

<sup>21</sup> Me Mata ghe uela ta Iesu va, "Vau eteva, arova ughe tokatoka oia, kapughu taita ateva karika aue ghe mate.

<sup>22</sup> Me ia oia akilakila va arova ughele kolomi righi voto ta God, aue ghele tau aatu."

<sup>23</sup> Iesu ghe uela etana va, "Kapum taita ateva aue emene sakesake."

<sup>24</sup> Mata ghe uela etana va, "Akilakila va aue etotu tale nau taumattu ngatoa aue la totu tale liu, tale airurruu tale nau."

<sup>25</sup> Iesu ghe uela etana va, "Aghi atottotu taumattu matena, me atautau lao maulue. Lo ateva eaiesoaa etaghi, arova emate, aue emene sakesake."

<sup>26</sup> Lo ateva etokatoka me maulue ia, arova eaikaaiaa etaghi, karika aue emate. Uaaiiesoaa tale isaa oia inangari?"

<sup>27</sup> Mata ghe uela ta Iesu va, "Ue, Vau eteva. Aghaaiesoaa va io Natuna io God, me io Mesaea io, ia o laghe uela va aue emae."

*Iesu ghe alousiusi teela Lasarus me ghe ngalaiela*

<sup>28</sup> Mata ghe ruula tani pppooaa isaa o inangari me ghe lao sio tani tara Meri, me ghe aulia ngainaola etana va, "Tisa ange rekatala, me eanna tani tarao."

<sup>29</sup> Nau eteva Meri ghe nongola, arovaeata ta ghe tinginala, me ghe lao sio tani tara Iesu.

<sup>30</sup> Iesu karika ie ghe mae rekata. Ghe aaitoka see tale voto ateva Mata ghe lao sio tani soua etana.

<sup>31</sup> Ajiu etoa laghe tokatoka tee Meri elo ale tani alousiusi eitauaa teeia. Vara me laghe taraiela ta ghe tinginala, me ghe ailuulila tani kupi ghoa. Laghe usiela, poli laghe annaa va ang ghe laolao tani ngala nongina laghe alokoila taumattu ngateva matena ia.

<sup>32</sup> Nau eteva Meri ghe laa rekata sio nongina Iesu ghe tiitingina, ghe taraiela, me ghe suuiuala ta liue kkena, me ghe uela va, "Vau eteva, arova ughe tokatoka oia, kapughu taita ateva karika aue ghe mate."

<sup>33</sup> Iesu ghe tarala Meri me ajiu etoa laghe ngangngala me ghe sessaiela, me ie tee ang ghe anna tani ngala.

<sup>34</sup> Me ghe uela va, "Eaa am ghe alokoiola?"

Me laghe uela etana va, "Vau eteva, mae sio me ulaa tara."

<sup>35</sup> Me Iesu ghe ngalala.

<sup>36</sup> Ajiu etoa laghe ue va, "Am tarala, Iesu eailousiangaili Lasarus."

<sup>37</sup> Me katoa laghe ue va, "Ghe ghelei emasinala mata salusaluna ateva, me vaalua me karika ghe roola va ghe sausi Lasarus va karika ghe mene mate?"

*Iesu ghe totula Lasarus tale nimate*

<sup>38</sup> Iesu ghe mene sessaiela nau eteva ghe kasukasu elaolao nongina laghe alokoila Lasarus. Tale voto ateva liengani niaikkaia ia me laghe atoka rungaala atu eteva etana.

<sup>39</sup> Iesu ghe uela va, "Am ghaa vella atu eteva."

Me Mata, kapuna vase ia tau raua, ghe uela va, "Vau eteva, aiaaghaatane ateva oia nau ang ghe asola tale liu. Nei mauuna ateva ang ghe tiauala."

<sup>40</sup> Me Iesu ghe uela etana va, "Auela va saa etam? Auela va arova uaaiiesoaa, ghaine utara sarasarakanianee God."

<sup>41</sup> Vara me laghe ghaa vella atu eteva. Me Iesu ghe taatara saela epona me ghe uela va, "Tamaghi, akaakaili emasinalaili ta ughe nongola kalughu nikokkolomi.

<sup>42</sup> Me akilakila va nau ekapa atoa unonganongoaghi, me poli mausi taumattu toko la tiitingina, liuna avalua me ngamene aauliaa isaa oia inangari me aue la ghaiesoaa va io ughe sungieghila tani sio."

<sup>43</sup> Nau eteva ghe ruula tani auliaa llo, me ghe kolokolo anamungailila me ghe uela va, "Lasarus, kupi ghoa mae!"

<sup>44</sup> Me ia o taumattu ngateva ghe matela ghe kupi goha mae. Nimane me kkena sumsum tale kalio la sumsumaa matena atoa, me matane sumsum tale mene tuku kateva kalio.

Iesu ghe uela va, "Am pulaka vella tapiri kalio, me am tau velua me ekasus."

*Namu ngatoa laghe tingina aitaauaala  
tani uvi emate Iesu*

(Mat 26:1-5; Mak 14:1-2; Luk 22:1-2)

<sup>45</sup> Oroi ila ajiu etoa laghe mae sio tani alousiusi tee Meri, laghe tarala ia o voto ateva Iesu ghe gheleielia, me laghe aiesoala etana.

<sup>46</sup> Me katoa etaira laghe lao sio tani tara Paresi etoa tani auliaa etaira sa ateva Iesu ghe gheleielia.

<sup>47</sup> Namu ngatoa ta pristi me Paresi etoa laghe lao sio tani kolo kansolo atoa.

Me laghe velu eitauuaal me laghe uela va, "Sa ateva ita gheleia, poli taumattu ngateva oia ange gheelei oroi niamatoonga?"

<sup>48</sup> Arova ita tau velua, me ita tam ghelei rungainia, taumattu ngakapa atoa aue la ghaiakaiaa etana, me aue aRom atoa la mae, me la uvi tuuturungita, me la ghaa velu ale manga ateva."

<sup>49</sup> Kateva taumattu elome etaira, ararina ataeae ta Kaeapas, ia namuu ia ta pristi etoa tale ia o ninamanama ataeae, ghe uela va, "Am oia, karika am kilakila righi voto!"

<sup>50</sup> Am tee, karika am kilakila va emaamasina arova kateva nonga taumattu ghele mate tani ghaa liiura akapa taumattu ngatoa, me karika masina arova taumattu ngakapa ghele mate."

<sup>51</sup> Karika Kaeapas ghe nim aauliaa isaa o inangari tale aloannaane, poli ia namuu ia ta pristi etoa tale ia o ninamanama ataeae, me ghe aulia ngamuemua alokoila inangari o va Iesu aue emate tani sausi taumattu ngakapa atoa.

<sup>52</sup> Karika va aue emate ta ajiu nonga atoa, ta mene katoa tani natuna God la tokatoka see, aue egheleila la velu eitauuaal me ekateva nonga ila.

<sup>53</sup> Ghe tiuuala tale ia o nau eteva, namu ngatoa laghe tiuuala tani aippooaa tee salana vaalua tani uvi ematea.

<sup>54</sup> Poli isaa o voto me Iesu ghe ruula tani kasu ta mata ngoroi etoa elome ta ajiu etoa. Ghe ssola tani toka tau tale masaliki eteae eEpraim, kalakalangina tale voto ateva karika righi taumattu ta getana, ia me kapuna disaepolo atoa.

<sup>55</sup> Pasova ngateva ang ghe aakalakalaa. Oroieili taumattu nge Jiu etoa la tokatoka amasau ejerusalem laghe tiuuala tani rekata ejerusalem tani ghelei eraarangisaila me auena Pasova ngateva ghe tiuua.

<sup>56</sup> Laghe paepae Iesu me laghe ssola kona ale manga ateva, me laghe tiuuala tani aikolomieinila. Laghe ue va, "Am annaa va aue emae tale ia oia nivelu eitauua ngateae?"

<sup>57</sup> Namuu ta pristi etoa me Paresi etoa laghe uela ta taumattu ngatoa va, arova lo ateva etara Iesu, elaa ghaulienia etaira. Ia o salana atikirighi laghe annaa va aue la kune Iesu ta getana.

## 12

*Meri ghe kaola voto ateva masi ngusungusuaane ta kkena Iesu eBetani  
(Mat 26:6-13; Mak 14:3-9)*

<sup>1</sup> Kasi ghaonomo (6) nau ghe tokatoka me ghe laa ghaa nau Pasova, Iesu ghe mene siola eBetani, tanganue Lasarus, ia o Iesu ghe totuela tale nimate.

<sup>2</sup> Laghe gheleila ninamanama ataeae tani amasimasi Iesu. Mata ghe aaikoita see inana, me Lasarus ghe tokatoka tee taumattu ngatoa laghe mae sio tani namanama tee Iesu.

<sup>3</sup> Meri ghe ghaala botolo ateva ghe kaakaai voto masi ngusungusuaane laghe gheleielia nonga tale oane natu ai erighi la aseasea va nadi ia me aipolina namungaili, me ghe kaoala ta kkena Iesu, me ghe uluulu kekena tale uu nguruna, me masi neina ateva ghe rooaala ale ateva tani aao.

<sup>4</sup> Me kateva kapuna disaepolo, Jiudas Iskariot etana, ia aue etau lao Iesu ta tau ngai ssateena atoa, ghe uela va,

<sup>5</sup> "Vaalua me karika am rooroo tani tauela va la poli ia okae voto ateva masi ngusungusuaane ta kotolu ai (300) silva koen,"\* me am ghele taula ta lo atoa karika righi peiira?"

<sup>6</sup> Jiudas ghe aauliaa isaa o inangari karika va poli ghe annaa llo taumattu karika righi peiira, ghe auliaa poli ia tau niainao ia, me ia ghe posoposo aikaai viliki veu eteva, me kasina nau ghe aainao etana.

<sup>7</sup> Iesu ghe liula me ghe uela etana va, “Tau veluela, poli eaatoka ia oia voto ateva masi neina, me aue elaa ghiaa nau eteva aue amate, me la laa kaeinagh.

<sup>8</sup> Lo atoa karika righi peiira, la tokatoka teeiem nau ekapa atoa, me aghi, karika aue atoka teeiem nau ekapa atoa.”

*Namuu ta pristi etoa laghe aailoe tani uvi emate Lasarus*

<sup>9</sup> Oroieili ajiu etoa laghe kilala va Iesu eBetani. Liuna avalua o me laghe lao sio karika mausi Iesu nonga va laghe lao sio. Laghe lao tee sio poli laghe aloanna tara tee Lasarus, ia o Iesu ghe totuела tale nimate.

<sup>10</sup> Liuna avalua o me namuu ta pristi etoa laghe aailoe va la uvi emate tee Lasarus,

<sup>11</sup> ta mausii Lasarus me oroieili ajiu etoa ngeila ghe liuliu viliira ta pristi etoa, me ngeila ghe aakaiaiaa ta Iesu.

*Iesu ghe kupi ssola ejerusalem nonginaaili kingi eteva*

(Mat 21:1-11; Mak 11:1-11; Luk 19:28-40)

<sup>12</sup> Vara mene kateva nau, me oroieili taumattu laghe saela ejerusalem tale Pasova ngateva, me laghe nongo teela va Iesu aue emae tee tale ia o nivelu eitaua ngateae.

<sup>13</sup> Liuna avalua o me laghe ghaala uru ootou, me laghe lao sio tani sou Iesu tapaa salana. Laghe aaore me laghe ue va, “Ita tau sae ararina atae God! God aue eghelei masi voto ta ia oia taumattu ngateva ghe mae sio tale ararina atae! Ia kingi ia ta alsraeli etoa!”

<sup>14</sup> Iesu ghe ghaala donki eteva, me ghe laa sae toka etana, nongina inangari laghe pitila tale Uru ngai Manga eteva va,

<sup>15</sup> “Natuna aliki vause ateva Saeon, urau mene matautu.

Am tara kapuimim kingi eteva emaemae  
eilou tale natu donki eteva.”

<sup>16</sup> Isaa o nau kapuna disaepolo atoa karika laghe kilakila mallooeana isaa o voto, me nau eteva God ghe vira mene tau saela ararina atae Iesu, me laghe vira mene nnaala voto Uru ngai Manga eteva ghe auliaala, me vaalua me taumattu ngatoa laghe gheleila isaa o voto ta getana.

<sup>17</sup> Lo atoa taumattu laghe tarala Iesu ghe kolola Lasarus tani kupi ghoa tale lienga niaikkaia ngateae, laghe aauliaa isaa o voto laghe tarala.

<sup>18</sup> Taumattu ngatoa laghe nongola ia o niaimatoongana ngateva ghe gheleiela, liuna avalua o me laghe ghoala tani soua tapaa salana.

<sup>19</sup> Paresi etoa laghe tarala isaa o voto me laghe ue va, “Tarala! Llo ita anna tani ghelei karika ita rooroo, poli taumattu ngakapa tale kosa eteva ngila usiusia.”

*Katoa taumattu nge Grik laghe anna tani tara Iesu*

<sup>20</sup> Katoa taumattu nge Grik laghe sae teela ejerusalem tani kkaua ta nau nivelu eitaua ngateae.

<sup>21</sup> Laghe lao sio tani tara Pilip aBetsaida ia eGalilii, me laghe kolomiela va, “Namu ngateva, ami aloanna tani sama tee Iesu.”

<sup>22</sup> Pilip ghe lao sio tani auliaa ta Andru, me lalu ghe lao sio tani tara Iesu, me lalu ghe auliaala etana.

<sup>23</sup> Iesu ghe liula me ghe uela va, “Ange ghaala nauna God tani tau sae ararina atae Natuna eteva Taumattu ngateva.

<sup>24</sup> Aghaaulia ngakoronna etaimim va, arova la tam pasa katu uiti eteva tale kosa eteva va emate, aue nim kateva nonga aue etoka. Me arova emate, aue eapinosa oroiannaaili uit.

<sup>25</sup> Lo ateva eaaielousiaa maamauluaane, aue eraua. Me lo ateva etam aloanna maamauluaane tale kosa eteva oia, egheelei tani ghaa maulue eteva etokatoka liu ia.

<sup>26</sup> Lo ateva taumattu esaasausieghi, eaaimuli teeieghi me voto eteva atokatoka etana, ie tee aue etoka aitauua teeieghi etana. Lo ateva taumattu esaasausieghi, Tamaghi etautau sae ararina etae.

*Aue la avukala sae Natuna eteva  
Taumattu ngateva*

<sup>27</sup> "Ia oia voto maateaili ange lutulutu tale maamauluaaghi, me nganannangaili, me karika akilakila sa ateva atani aulieinia. Koti aue va, 'Tamaghi, ughaa velu isaa o llo voto maamaatana.' Karika! Ta poli isaa o voto maamaatana me aghe sio mae va elutu etaghi.

<sup>28</sup> Tamaghi, utau sae ararim atea!"

Vara Iesu ghe aauliaa isaa o inangari me lingi ngalo ateva ghe kasula epona liu ghe uela va, "Ngaghe tau saela ararighi eteae me aue amene ghele."

<sup>29</sup> Taumattu ghe tiitingina teeia laghe nongola, me katoa laghe uela va palapalanga ateva, me katoa laghe ue va, "Ensolo ateva ghe sama teeelia."

<sup>30</sup> Me Iesu ghe uela etaira va, "Ia o lingi ngalo ateva eppooala inangari tani sausiem, karika va esaasausiegħi.

<sup>31</sup> Taumattu tale kosa ateva oia, God ange tiitiuaa tani ghelei niaisakei ta ngetaira. Me vau tapaa kosa ateva oia, God aue esau velue sio.

<sup>32</sup> Me aghi, nau la ghavukalaiegħi sae tale kosa ateva oia, aue aghelei taumattu ngakapa atoa la mae etaghi."

<sup>33</sup> Iesu ghe aauliaala inangari o tani auliaa vaalua aue emate.

<sup>34</sup> Me taumattu ngatoa laghe uela ta Iesu va, "Inangari nipaopao eue va Mesaea ngateva aue etoka nau ekapa atoa. Vaalua me uee va aue la avukala sae Natuna ateva Taumattu ngateva? See ia Natuna ateva Taumattu ngateva?"

<sup>35</sup> Iesu ghe liula me ghe uela va, "Nauna mallanga ateva tani toka teeiem karika aluse. Liuna avalua o me nau etokatoka teeiem am kasu teeia, poli saurrom ateva erau akouem. Poli lo ateva ekasukasu tale saurrom etam kilakila va eaa elaoħao.

<sup>36</sup> Am aikaiaa tale mallanga ateva nau etokatoka teeiem, me aue natuna am mallanga ateva." Nau eteva Iesu ghe ruula tani ppooaa isaa o inangari, ghe kasu vulilala me ghe lao sio tani aisulja.

#### *Taumattu ngatoa laghe tam anna tani aikaiaa ta Iesu*

<sup>37</sup> Ghe gheleila oroiannaaili niaimatoonga elome ta mata ngoroi etoa, me karika laghe aikaiaa ta ngetana.

<sup>38</sup> Isaa o voto ghe lutula tani ghelei ekoronna inangarina Aisaea propete ia ghe uela va, "Vau eteva, karika teva ghe aikaiaa inangarii mami,  
me karika teva ang ghe tarala sarasarakaniaam."

<sup>39</sup> Taumattu ngatoa karika la rororo tani aiesoaa ta Iesu, nongina Aisaea ghe mene uela va,

<sup>40</sup> "Vau ngepona ateva ghe ghelei emata salusaluna ilala  
me urunguitaniira korokoronganaili

poli la rau taatara ta mataira

me la kila tale urunguitaniira

me la mae etaghi me agheleila va la mene masina."

<sup>41</sup> Aisaea ghe tarala sarasarakaniaane Iesu, liuna avalua o me ghe auliaala isaa o voto ta ngetana.

<sup>42</sup> Me oroi ila kapuira namu ngatoa laghe aikaiaala ta Iesu, me karika laghe aaotu, poli Paresi etoa laghe uela va lo ateva eaikaiaa ta Iesu, aue la tiu velua tale ale nivelu eitħau ngateva,

<sup>43</sup> poli laghe annaaili va taumattu earueinila, me karika va God.

#### *Iesu ghe mae sio tani asaangi kosa ateva*

<sup>44</sup> Iesu ghe sama anamungailiila me ghe uela va, "Lo ateva eaaikaiaa etaghi, eaaikaiaa tee ta lo ateva ghe sungieghila.

<sup>45</sup> Me lo ateva etaraieghи, etaatara tee lo ateva ghe sungieghila.

<sup>46</sup> Agħi agħe mae sio tale kosa ateva oia arova mallanga ateva va lo ateva eaaiesoaa etagħi, karika aue etoka tale saurrom.

<sup>47</sup> "Arova lo ateva enongo inangarighi me etam aimuli tee, karika aue agħeileia va eaisakei, poli karika agħe mae sio tani ghelei niaisakei tale taumattu tale kosa ateva oia, ta agħe mae sio tani asaangila.

<sup>48</sup> Lo ateva etam annaiegħi, me erati inangarighi, aue isaa o inangari aue egħeileia eaisakei nau airuuruu tale kosa ateva.

<sup>49</sup> Karika aghaauliaa righi voto tale nim nannaagħi. Tamagħi għe sungieghila għe auliaala sa ateva tani aulieinia me vaalua tani auliaa.

<sup>50</sup> Akilakila va llo ghe auliaala aue etau mae maulue ateva tokatoka liu ia. Liuna avalua o me atani auliaa voto Tamaghi ghe auliaa tau mae sio."

## 13

*Iesu ghe porala kkeira kapuna disaepolo atoa*

<sup>1</sup> Nau Pasova ngateva karika ghe mae, me Iesu ang ghe kilala va nauna ange aakalakalaa tani kasu vuli kosa ateva, me emene sae ta Tamane. Ghe aielousiangaili kapuna atoa tale kosa ateva oia. Aielousiaane etaira ghe laa ghaa sio nau ghe mate vululala.

<sup>2</sup> Nau laghe namanama ta pai ngelo alai, Satana ang ghe atoka ssola ninanna ngateva ta Jiudas, natuna ia Saemon Iskariot, tani laoaa Iesu ta tau ngai ssateena atoa.

<sup>3</sup> Iesu ghe kilakila va God ghe tau ekapala voto ta nimane, me ia ghe kasula ta God, me aue emene sae ta God.

<sup>4</sup> Liuna avalua o me Iesu ghe tingina saela nongina laghe namanama, me ghe ghaa vella unna aiaasae ngeleka ateva, me ghe ainavitaala taolo ateva.

<sup>5</sup> Ghe kao kaaila manu tale aikaai manu etivilau, me ghe tiuuala tani pora kkeira disaepolo atoa, me ghe uluulu tale taolo ateva ghe aainavitainia etana.

<sup>6</sup> Ghe rekatala ta Saemon Pita, me Pita ghe uela etana va, "Vau eteva, uaanna tani pora kkeghi?"

<sup>7</sup> Me Iesu ghe liula me ghe uela etana va, "Voto agheelei, karika aue ukila ghaine, auena uvira mene kila."

<sup>8</sup> Me Pita ghe uela etana va, "Karikaallil umene pora kkeghi!"

Me Iesu ghe uela va, "Arova atam pora kkem, karika urooroo tani toka teeieghi."

<sup>9</sup> Saemon Pita ghe uela etana va, "Vau eteva, karika umene pora nonga kkeghi ta upora tee nimaghi me urughu eteva!"

<sup>10</sup> Me Iesu ghe uela va, "Lo ateva ang ghe suusuula karika erooroo tani mene suusuu, ta enim pora nonga kkena, me aue eraarangisana. Am raarangisana am, karika va am akapa."

<sup>11</sup> Poli Iesu ghe kilakila va see aue etaue lao ta tau ngai ssateena atoa, liuna avalua o me ghe uela va, "Karika va am akapa raarangisana am."

<sup>12</sup> Nau eteva ghe ruula tani pora kkeira, me ghe mene asaela unna aiaasae ngeleka ateva, me ghe toka siola nongina aillai inana ateva, me ghe uela etaira va, "Ngam tara kilala voto ngagheleila?

<sup>13</sup> Am ue etaghi va kapuimim tisa ieghi me Vauimmi ieghi. Isaa o voto am asease etaghi masinaaili, ta koronna.

<sup>14</sup> Arova aghi, vauimmi ieghi me tisa ieghi, me ngaporala kkeimim, am tee am pora kkeira mene katoa etaimim.

<sup>15</sup> Ngaghaapasungtau aatu voto am ghelei, am ghelei nongina ngagheleila.

<sup>16</sup> Aghaaulia ngakoronna etaimim va tau ngai nonganongo anna ateva karika namuu ia ta vauna ateva, me tau ngai kasuua inangari eteva karika tee enaanamuu ta lo ateva esungsungia.

<sup>17</sup> Arova am kila isaa o voto me am ghelei, aue emasinaaili etaimim.

<sup>18</sup> "Karika va aghaauliaa inangari oia etaimim akapa, ta poli akilakila lo atoa aghe suoongainiema, me llo Uru ngai Manga ateva ghe auliaala aue ekoronna. Ghe uela va, 'Lo ateva enamanama teeieghi aue essa teeieghi.'

<sup>19</sup> "Aghaaulia ngamuemue aalokoi llo oia, me nau aue elutu aue am aiesoaa etaghi va aghi ia o taumattu ngateva.

<sup>20</sup> Aghaaulia ngakoronna etaimim va lo ateva egahaaghhaa lo ateva aghe sungiela, egahaaghhaieghi, me lo ateva egahaaghhaieghi, egahaaghhaa lo ateva ghe sungieghila."

*Iesu ghe auliaala voto aue elutu etana*

(Mat 26:20-25; Mak 14:17-21; Luk 22:21-23)

<sup>21</sup> Nau eteva Iesu ghe ruula tani auliaa isaa o inangari, nannaane ghe maatela me ghe siuailili euu, me ghe uela va, "Aghaaulia ngakoronna etaimim va kateva etaimim aue etaueghi lao ta nimaira tau ngai ssateeghi etoa."

<sup>22</sup> Aloira disaepolo atoa ghe kaakapa va ghe auliaa tee see, liuna avalua o me laghe aitara atokala.

<sup>23</sup> Me lo ateva disaepolo Iesu ghe ailousiangailia ghe tokatoka akalakalanginaaili ta Iesu.

**13:2:** Luk 22:3; Jon 13:27.    **13:3:** Jon 3:35; 16:28.    **13:10:** Jon 15:3; 6:64, 70-71.    **13:14:** Mat 20:28; Luk 22:27.

**13:15:** Plp 2:5; Kol 3:13; 1 Pita 2:21.    **13:16:** Mat 10:24.    **13:18:** Sams 41:9.    **13:19:** Jon 14:29; 16:4.    **13:20:**

Mat 10:40.

<sup>24</sup> Saemon Pita ghe matamatai elao va ghe kolomi Iesu va see aue ghe ghelei isaa o voto ghe aaulia.

<sup>25</sup> Ia o disaepolo ateva ghe valaa lao sio ta Iesu me ghe kolomiela va, "Vau eteva, see aue eghelei isaa o voto?"

<sup>26</sup> Iesu ghe liula me ghe uela va, "Lo ateva aue aghasuu verete me ataula etana." Me ghe asuula verete me ghe taula ta Jiudas, natuna ia Saemon Iskariot.

<sup>27</sup> Jiudas ghe ghaala isaa o inana me Satana ghe valaielia. Me Iesu ghe uela etana va, "Voto uanna tani ghelei, ughelei parasi."

<sup>28</sup> Lo atoa laghe tokatoka tale ia o ninamanama ateae laghe tam kilala malloeanina inangari Iesu ghe aaulia etana.

<sup>29</sup> Katoa laghe annaa va poli Jiudas ghe posoposo uneira viliki veu, o Iesu ghe sungisungia tani laa poli righi voto eaimonomonosiaa tale nivelu eitaua ngateva, o tani laa tau righi voto ta lo atoa karika peiira.

<sup>30</sup> Jiudas ghe ghaala tuku verete ateva me ghe kopi ghoala. Ang ghe voola.

*Iesu ghe taula ouna tana inangari niloeloe*

<sup>31</sup> Vara Jiudas ghe kasula me Iesu ghe uela va, "Ia oia Natuna ateva Taumattu ngateva ararina ateae ange saela epona, me God tee ararina ateae ange saela epona tale Natuna ateva Taumattu ngateva.

<sup>32</sup> Arova ararina ateae God esae epona tale Natuna ateva Taumattu ngateva, God nonga aue emene asaesae ararina ateae Natuna ateva Taumattu ngateva, me isaa o voto aue eghelei parasi.

<sup>33</sup> "Kapughu aliki etoa! Karika oroi nau aue atoka teeiem, me ghaisa ngarighi am tiuua tani paeaghi. Aghaauliaa llo nongina aghe aauliaa ta ajiu etoa, 'Karika am rooroo tani lao nongina ngalaolao.'

<sup>34</sup> "Ngatautau aatu ouna inangari niloeloe: elome etaimim am aielousi. Nongina aghi aghe aielousieiniemla, elome etaimim am tani aielousi.

<sup>35</sup> Arova elome etaimim va am aielousi, ila akapa aue la kila va am kapughu disaepolo iem."

*Iesu ghe uela va Pita aue eliu vilina etana*

(Mat 26:31-35; Mak 14:27-31; Luk 22:31-34)

<sup>36</sup> Saemon Pita ghe kolomila Iesu va, "Vau eteva, eaa aue ulao?"

Iesu ghe liula me ghe uela va, "Karika urooroo tani lao nongina ngalaolao tale isaa oia nau. Auena aue uaimuli."

<sup>37</sup> Pita ghe liula me ghe uela va, "Vau eteva, vaalua me karika arooroo tani usio tale isaa oia nau? Aghi aue amate ta polim."

<sup>38</sup> Iesu ghe kolomiela va, "Uannaa va aue umate ta mausighi? Aghaaulia ngakoronna etam va aue uaulia ngakasina kotoluata va karika ukilakilaieghi, me auena taita ateva paolo eaangari.

## 14

*Iesu salana ia tani lao ta Tamane*

<sup>1</sup> "Am rau mene alousiusi. Am aiesoaa ta God, me am aiesoaa tee etaghi.

<sup>2</sup> Tanganuena Tamaghi orioannaaili voto tani toka etana, me ngalaolao tani aimonomonosiaa isaa o voto aue kaluimim. Karika aue aghele auliaa arova isaa o voto kamena.

<sup>3</sup> Poli ngalaolao tani aimonomonosiaa tanganueimim, me aue amene sio ghaiem, me am laa toka teeieghi tale voto ateva atokatoka etana.

<sup>4</sup> Ngam ghe kilala salana atikirighi tani lao tale voto ateva ngalaolao etana."

<sup>5</sup> Me Tomasi ghe uela etana va, "Vau eteva, karika ami kilakila va eaa aue ulao. Vaalua aue ami kila salana atikirighi?"

<sup>6</sup> Iesu ghe uela etana va, "Aghi salana aghi, koronna ieghi me maulue ieghi. Karika teva aue erooroo tani lao ta Tamaghi ta emae mua etaghi.

<sup>7</sup> Arova ngam ghe kilaleghila, ngam ghe kilala Tamaghi. Etiitiuaa ghaine ngam kilaiela, me ngam ghe taraiela."

<sup>8</sup> Pilip ghe uela etana va, "Vau eteva, ami anna va uapasunga Tamam etaimami, me aue vira mene masina etaimami."

<sup>9</sup> Iesu ghe uela etana va, “Ei Pilip! Vaalua me ngaghe toka teeiemla oroi nau, me karika ughe kilaieghi? Lo ateva ang ghe taraiemila, ang ghe tarala Tamaghi. Vaalua me uue va, ‘Uapasunga Tamam etaimami?’

<sup>10</sup> Karika uaiesoaa va aghi ta Tamaghi, me ia etaghi? Inangari aghaauliaa etaimim karika nim nannaaghi, ta Tamaghi etokatoka etaghi, me ia eghelei isaa o niuungu.

<sup>11</sup> Am aiesoaa nau eteva ave va aghi ta Tamaghi, me ia etaghi. Arova karika, am annaa niuungu aghe gheleila me ave eakorokorongana uneimim niaikaiaia.

<sup>12</sup> Aghaaulia ngakoronna etaimim va lo ateva eaiesoaa etaghi, isaa o niuungu agheelei ie tee ave eghelei me voto ave eghelei ave elau llo oia agheelei, ta poli ngalaa saesae ta Tamaghi.

<sup>13</sup> Me saa voto am kolomi tale ararighi eteae ave aghelei. Tale ia o salana atikirighi, Natuna ave etau sae ararina ateae Tamane.

<sup>14</sup> Arova righi voto am kolomi etaghi, tale ararighi eteae, ave aghelei.

*Iesu ghe uela va ave etau sio Spirit Manga ateva*

<sup>15</sup> “Arova am aielousieinieghi, ave am nongo usilaa inangarighi ave va am ghelei.

<sup>16</sup> Ave akolomi Tamaghi, me ave etau aatu mene kateva tau ngai sausi ave etoka teeiem nau ekapa atoa,

<sup>17</sup> Spiriti eteva ave eapasunga voto koronna. Taumattu tale kosa ateva oia karika la roro ro tani ghahaia, poli karika la kilakilaia, me karika laghe tarai. Me am, am kilakilaia, poli etokatoka teeiem, me auena ave etoka elome etaimim.

<sup>18</sup> Karika ave anim kasu vuliem arova aliki raue vulu eto; ave amene mae taraiem.

<sup>19</sup> Karika ave emasau, me taumattu tale kosa ateva oia la ruu tani taraiem, me am ave am taraiem. Poli aghi maulue ieghi, am tee ave am maulue.

<sup>20</sup> Me ia o nau eteva ave am kila va aghi ta Tamaghi, me am etaghi, me aghi etaimim.

<sup>21</sup> Lo ateva taumattu ekila inangarighi niloeloe me enongo usilaa, eaielousieinaghi. Me Tamaghi eaielousieinia, me aghi tee ave aghaielousieinia, me ave aghapasungainagi etana.”

<sup>22</sup> Mene kateva Jiudas (karika va Iskariot) ghe uela ta Iesu va, “Vau eteva, vaalua me ave uapasungainio nonga etaimami, me karika va taumattu tale kosa akapa ateva?”

<sup>23</sup> Iesu ghe liula me ghe uela etana va, “Lo ateva taumattu eaielousieinaghi, ave enongo usilaa inangarighi, me Tamaghi ave eaielousieinia, me ave angalu mae etana tani toka aitauaa teeia.

<sup>24</sup> Lo ateva etam aielousieinaghi, karika ave enongo usilaa inangarighi. Isaa oia inangari am nonganongo karika inangarighi, ta inangarina Tamaghi, ia ghe sungieghila tani sio.

<sup>25</sup> “Isaa oia inangari aghaauliaa nau atokatoka teeiem.

<sup>26</sup> Me Tau ngai sausi eteva, Spirit Manga ia, ave Tamaghi esungia tani sio tale ararighi eteae, ave eapasunga ngakapa voto etaimim me ave esausiem tani mene nnaa llo voto aghe auliaala etaimim.

<sup>27</sup> Luei eteva aghalokoia etaimim. Kalughu luei eteva ngatautau aatu etaimim. Lo ateva o luei karika nongina lo ateva luei kosa ateva etautau aatu. Am rau mene alousiusi me am matautu.

<sup>28</sup> “Ngam ghe nongola ngaghe auliaala etaimim va, ‘Aue akasu, me ave amene mae taraiem.’ Arova am ailiusieinaghi, ave am ghele masimasi poli ave asae ta Tamaghi, ta poli Tamaghi namuu ia etaghi.

<sup>29</sup> Auena isaa o voto elutu, me anim aulia ngakasina alokoi kieimim, poli nau isaa o voto elutu, ave am aikaiaia etaghi.

<sup>30</sup> Karika ave aghaippooa ngaoroi teeiem, poli vau tapaa kosa ateva ange reerekata. Me karika righi sarasarakaniaane tani ghelei righi voto ta ngetaghi,

<sup>31</sup> me ave taumattu tale kosa ateva la kila va aghaielousiaa Tamaghi, poli llo Tamaghi ghe auliaa tau mae sio aghelei.

“Am tingina saela me ita kasu.”

## 15

*Iesu koronna ateeae uasa uaeni*

<sup>1</sup> Iesu ghe mene uela va, “Aghi koronna ateeae uasa uaeni, me Tamaghi umana paa ngutana atingiu. <sup>2</sup> Lo atikirighi tuuna etaghi etam kuukuneaa righi uenenna,

esaisai velua, me llo tuuna ekunekune, esaisai velu lutu llo tuuna karika masina, me eraarangisana tani mene kuneaa mene righi uenena.

<sup>3</sup> Inangari aghe ppooala etaimim ghe gheleiemla ngam ghe raarangisanala.

<sup>4</sup> Am toka etaghi me aue atoka etaimim. Laa ngai eteva karika aue righi uenenna arova etam tuutuu tale aina ateva. Nongina am, arova am tam toka etaghi, karika aue am kuneaa righi ue ngai.

<sup>5</sup> "Aghi aina aghi me am laangina iem. Lo ateva etoka etaghi me aghi atoka etana, aue ekuneaa oroi ue ngai. Poli karika urooroo tani ghelei teva voto arova karika ieghi.

<sup>6</sup> Lo ateva taumattu karika etokatoka etaghi, aue la ghaa velua nongina la ghaaghhaa velu laa ngai, me nau ange mmatela, la ghaaghhaa me la tautau sae tale kuraa.

<sup>7</sup> Arova am toka etaghi me inangarighi etoka etaimim, nau am kolomi righi voto, aue am ghaa.

<sup>8</sup> Arova am kuneaa oroi ue ngai, aue la tau sae ararina atae Tamaghi, me am aue ekapughu disaepolo iem.

<sup>9</sup> "Nongina Tamaghi ghe aielousieinaghila, aghi tee aghe aielousieinamla. Am toka tale ia o niaielousi eteva kalughu ia.

<sup>10</sup> Arova am nongo usila inangarighi niloeloe, aue am toka tale aielousiaaghi eteva, nongina aghi aghe nongo usilaala inangarina niloeloe Tamaghi, me aghe tokatoka tale aielousiaane ateva.

<sup>11</sup> Aghannaili va lo ateva nimasimasi kalughu ia etoka etaimim, me epasu tale maamaulauaaimim. Liuna avalua o me aghaauliaa isaa oia inangari etaimim.

<sup>12</sup> Inangarighi niloeloe isaa avalua toko: am aielousiaa mene kateva elome etaimim nongina aghi aghe aielousieinamla.

<sup>13</sup> Arova teva taumattu eaielousiangaili kapuna atoa me ghele tau velu maamaulauaane tani sausila, ia o lo ateva ase niaielousi, namungaili ia elaulau ekapa mene kasina ase niaielousi.

<sup>14</sup> Aue kapughu iem arova am ghelei voto aloeloeam etana.

<sup>15</sup> Ia oia karika ngakolokoloam va tau ngai nonganongo anna iem, poli tau ngai nonganongo anna ateva etam kilakila voto vauna ateva eanna tani ghelei. Ngakolokoloam va kapughu iem poli isaa akapa voto aghe nongola ta Tamaghi ngaghe aulia ngaotula etaimim.

<sup>16</sup> Karika va am, am ghe suoongainiegħila, ta aghi aghe suoongainiema, me aghe tau aatu sio niuungu tani kasu, me am kuneaa oroi llo ue ngai etokatoka liu. Liuna avalua o me nau eteva am kolomi righi voto ta Tamaghi tale ararighi eteae, aue Tamaghi eta aatu.

<sup>17</sup> Isaa o inangari niloeloe aghaauliaa etaimim: am aielousiaa mene kateva elome etaimim.

#### *Taumattu tale kosa ateva aue la ssa tee disaepolo atoa*

<sup>18</sup> "Arova taumattu tale kosa ateva oia la ssa teeiem, am nim annaa va laghe ssa tee akasina teeiegħila.

<sup>19</sup> Arova kosa ateva oia tanganueimim tuungia, aue la ghele masieinam va kapuira iem, me poli ngagħe suoongainamla tale kosa ateva oia, liuna avalua o me la sessa teeiem.

<sup>20</sup> Am annaa llo aghe auliaala etaimim va, 'Tau ngai nonganongo anna ateva karika namuu ia ta vauna ateva.' Arova lagħe għeelei saasakiaa etagħi, aue la ghelei tee etaimim. Arova lagħe nongo usilaala inangarighi, aue la ghele nongo usila tee inangariimim.

<sup>21</sup> Aue la ghelei teeiem isaa o voto poli mausi ararighi eteae, ta poli karika la kilakila lo ateva għe sungieġħila tani sio.

<sup>22</sup> Arova agħe tam sio mae tani auliaa inangari etaira, karika aue la ghele tara kila va għeegħeileiħa aira sesa, me ia oia karika la roroor tani ue va la tam kilakila va għeegħeileiħa aira sesa.

<sup>23</sup> Lo ateva esessa teeiegħi, esessa tee Tamaghi.

<sup>24</sup> Arova agħe tam toka teelilā me agħe tam għe-leila niuungu elome etaira, nongina karika mene teva taumattu għe għe-leila emua arau, karika aue la ghele tara kila va għeegħeileiħa aira sesa. Me poli lagħe tarala, liuna avalua o me la sessa teeiegħla me Tamaghi.

<sup>25</sup> Isaa oia voto elutulutu tani asokoi inangari lagħe pitila tale uneira inangari nipaopao, eue va, 'Karika esuisui kkai tale teva voto me la nim sessaile etagħi.'

26 "Nau tau ngai sausi eteva emae, aue eauliaa uunguaaghi etaimim. Aue asungia tani sio etaimim, ia o Spiriti eteva eaapasunga voto koronna, aue ekasu ta Tamaghi.

27 Me am tee, aue am aulia ngaotueghi poli am ghe toka teeieghila nau aghe tiuala uunguaaghi.

## 16

1 "Aghaauliaa isaa o voto etaimim poli am rau mene oghi vulu aikaiaaimim.

2 Aue la tiu veluem tale aleira ale nivelu eitauaa, me aue nau emaemae lo atoa la uvi emateam, aue la ghanna va la ghelei uunguaane God.

3 Isaa o voto aue la ghelei etaimim poli karika la kilakilaiengalua me Tamaghi.

4 Aghaauliaa isaa o voto etaimim me nau isaa o voto etiuaa tani lutu, aue am nnaa va ngaghe auliaala kieimim.

### *Uunguaane Spirit Manga ateva*

"Aghe tokatoka teeiem, liuna avalua o me karika aghe aauliaa isaa o voto emua arau.

5 Me ia oia ngamene laa saesae ta lo ateva ghe sungieghila tani sio, me karika teva etaimim ekokolomieghi va, 'Eaa ulao?'

6 Nau ngaghaauliaa me ngam nongonongo isaa o inangari ngam nim aalousiusi.

7 Aghaaulia ngakoronna etaimim va emamasina va akasu, poli arova atam kasu, tau ngai sausi eteva karika aue esio etaimim, me poli ngakasukasu aue asungia tani mae etaimim.

8 Nau eteva emae aue eghelei taumattu tale kosa ateva oia la kila amasina ssavoto me ghulughuluena me niaiskei.

9 Tale ssavoto, poli la tam aiesoaa etaghi,

10 me tale ghulughuluena, poli ngalaa saesae ta Tamaghi, me karika aue am mene taraieghi.

11 Me tale niaiskei, poli vau tapaa kosa ateva oia ang ghe aisakeila, me ghe tam roola.

12 "Oriannaaili voto aghanana tani auliaa etaimim, me poli isaa oia nau karika aue am kila amasina.

13 Nau Spiriti eteva eaapasunga voto koronna aue emae, aue eauliaa voto koronna etaimim. Karika aue eauliaa righi voto nim nannaane. Aue eauliaa llo ghe nongola me aue eauliaa kieimim tale voto auena emae.

14 Aue easaesae ararighi eteae, poli aue eghaa inangarighi me eauliaa etaimim.

15 Isaa akapannaaili voto kann Tamaghi, kalughu. Liuna avalua o me aue va, 'Aue eghaa inangarighi, me eauliaa etaimim.'

### *Nialousiusi me nimasimasi*

16 "Karika masauna arighi me aue am lungieghi, me karika aue emasau me aue am mene taraieghi."

17 Me katoa tani kapuna disaepolo laghe aikolomieinila va, "Vaalua me eue va, 'Karika masauna arighi me aue am lungieghi, me karika masau me aue am mene taraieghi,' me eue tee va, 'Alao ta Tamaghi?'"

18 Laghe aikolomieinila va, "Vaalua mallooeana nau eue va 'karika masauna arighi'? Karika ita kilakila amasina llo eauliaa."

19 Iesu ghe kilakila saa voto ateva laghe anna tani kolomia. Liuna avalua o me ghe uela etaira va, "Ngauela va, 'Karika masauna arighi me aue am lungieghi, me karika masau me aue am mene taraieghi.' Isaa o llo am aikolomainiem etana?

20 Aghaaulia ngakoronna etaimim va aue am ngala me am alousiusieili, me taumattu tale kosa ateva oia aue la masimasi. Me am, aue am alousiusieili, me alousiusiaaimim aue am mene masimasi etana.

21 Nau aliki eteva ange anna tani lutu, vause ateva ealousiusi poli ekilakila va nau nimmarikana ange rekatala, me nau aliki eteva elutulutu, eaiKKaluaa nimmarikana ghe ghaala, poli emasimasi va aliki eteva ange lutula tale kosa ateva.

22 Ia o voto ateva nonginaaili am. Ia oia am alousiusi me aue amene taraiem, me aue am masimasi. Lo ateva nimasimasi, karika teva aue eghaa velua etaimim.

23 Ia o nau eteva karika aue am kolomieghi tale teva voto. Aghaaulia ngakoronna etaimim va Tamaghi aue etaau voto am kolomi tale ararighi eteae.

24 Nau too ang ghe lao sio karika am ghe kookolomi righi voto tale ararighi eteae. Am kolomi me aue am ghaa me aue am pasu tale nimasimasi.

### *Iesu ghe apalala kosa ateva*

<sup>25</sup> "Isaa o voto aghaauliaa etaimim tale inangari niaimatoonga, me aue nau too enaemae, karika aue aghauliaa voto etaimim tale inangari niaimatoonga. Aue aghaulia ngamasalikangaili Tamaghi etaimim, me aue am kila amasinaaililia.

<sup>26</sup> Ia o nau eteva aue am kokkolomi tale ararighi eteae, me karika aue va aghi aue akolomi Tamaghi tani sausiem,

<sup>27</sup> poli Tamaghi tee eaielousieinam ta am, am ghe aielousieinaghila me am aiesoaa va aghi aghe tokatoka tee God, me aghé sio mae.

<sup>28</sup> Aghe kasula ta Tamaghi, me aghé sio mae tale kosa ateva oia, me aue amene kasu vuli kosa ateva oia tani mene sae ta Tamaghi."

<sup>29</sup> Me kapuna disaepolo atoa laghe uela va, "Ngami vira mene ghaagħha amasina inangarim, poli karika umene poppoaa inangari niaimatoonga.

<sup>30</sup> Ia oia ngami kilakila va ukilakila akapa voto, me karika teva aue ekolomio tale righi nikokkolomi, poli ukilakila akapa nannaīmami. Liuna avalua o me ami aiesoaa va ugħe kasula ta God."

<sup>31</sup> Iesu ghe liula me ghe uela etaira va, "Angam vira aikaiaa etagħi?

<sup>32</sup> Nau ange aakalakala me ange rekatala va aue la ghamedi reerekatainam, me kateva kateva etaimim aue eilou lao tanganuena. Aue am ilou vulieghi me aue ekapa kapugħu, me karika va aue ekapaili kapugħu, ta poli Tamaghi aue etoka teeieghi.

<sup>33</sup> "Aghe aauliaa isaa oia inangari etaimim, poli aghħanna va am toka etagħi, me aue luei eteva etoka etaimim. Kosa ateva oia oroiell ħimmarikana am għaagħha, me am rau mene sio asoaso, poli ngagħe apalala voto tale kosa ateva oia."

## 17

*Iesu ghe pureaala kapuna disaepolo atoa*

<sup>1</sup> Nau Iesu ghe ruula tani aippooaa me ghe taatara saela epona liu me ghe uela va, "Tamaghi, ange għala nau. Utu sae ararina ateeae natum, me natum tee etaū sae ararim ateeae.

<sup>2</sup> Poli ugħe tau lao sio ninamu ngateva etana tani aitħara taumattu ngakpaaili, va aue etaula maulue aħeva tokatoka liu ia ta lo atoa taumattu ugħe taula lao sio etana.

<sup>3</sup> Maulue aħeva tokatoka liu ia, jaavalu toko, va taumattu ekilaio, va io God koronna io, me la kila tħix Iesu Karisto ugħe sungiela tani sio.

<sup>4</sup> Agħe asaesaela ararim ateeae me sarasarakaniaam tale kosa ateva; ngagħe ruula niuungu ugħe tau mae sio etagħi va agħelei.

<sup>5</sup> Isaa oia Tamaghi, tale voto aħeva utokatoka, utu mae ninamu ngateae għe tokatoka teeieġi emua arau, nau kosa ateva karika għe lutu.

<sup>6</sup> "Ngagħe aulia ngaotula ararim ateeae tale taumattu tale kosa ateva oia ugħe taula mae sio etagħi. Kapum ila me ugħe taula mae sio etagħi, me ngila għe nongo usilaala inangarim.

<sup>7</sup> Ia oia ngila għe kilala va isaa akapa voto ugħe tau mae sio etagħi kalum.

<sup>8</sup> Ngagħe auliaa tau lao sio inangari ugħe auliaa tau mae sio etagħi me ngila għe għħala, me ngila għe akorronnailila va aghi agħe kasula etam me ngila għe aikaiaala va io ugħe sungieġħila.

<sup>9</sup> Akookolomi sae mausiira. Karika akookolomio sae tale taumattu ngakpa atoa tale kosa ateva oia. Akookolomio sae mausi taumattu ugħe tau mae sio, poli kapum ila.

<sup>10</sup> Taumattu ngakpa kapugħu, kapum tee, me lo kapum kapugħu tee īla, la għaap-sunga masi għeeleiaagħi.

<sup>11</sup> Me ia oia karika aue amene toka tale kosa ateva ta ngamene laa saesae etam. Me ila ngila tokatoka. Tamaghi manga io, uaitarainila tale ararim ateeae sarasarakania ia, ia o ararim eteeae ugħe taue mae sio etagħi, me aue ekateva nonga ila, nongina italua eksaakteva nonga italua.

<sup>12</sup> Nau agħe tokatoka tieeli, agħe aitħra ngamxinaila tale sarasarakania ararim ateeae, ia o arar eteeae ugħe taue mae sio. Agħe aitarainilala, karika teva għe rauela, llo nong aħeva taumattu elaloaq tale salana nitturuu għe rauela. Isaa avalua o me inangari tale Uru ngai Manga aħeva għe koronnal.

<sup>13</sup> "Ia oia ngamene mae saesae etam. Isaa oia voto aghħaauliaa tale nau oia atokatoka tale kosa ateva, me aue la għħa kalugħu nimasimasi, me aue epasu tale urunguitanira.

<sup>14</sup> Agħe auliaa tau lao sio inangarim, me taumattu ngatoo tale kosa ateva oia esessaila etair, poli karika va mene taumattu tale kosa ila, nongina aghi karika va taumattu tale ia oia kosa ateva.

<sup>15</sup> Karika va akookolomio sae va ughaa vella tale kosa ateva oia. Akookolomio tani aitarainila tale sesa taumattu ngateva.

<sup>16</sup> Karika va taumattu tale kosa ila, nongina aghi karika va taumattu tale kosa ieghi.

<sup>17</sup> Uamangaila tale llo voto koronna; poli inangarim koronna.

<sup>18</sup> Nongina ughe sungieghila tani sio tale kosa ateva, aghi ngamene sungisungila tani lao akapa see tale kosa ateva.

<sup>19</sup> Mausira me aghe tau ekapa aatu sio maamauluaaghi etam, me ila tee aue la tau ekoronna lao maamauluaairia etam.

<sup>20</sup> "Karika apuupure nonga etaira, ta apuupure tee ta lo atoa aue la ghaikaaiaa etaghi nau eteva la nongo inangariira.

<sup>21</sup> O Tamaghi, apuupure etaira va ekateva nonga ila, nongina io utokatoka etaghi, me aghi etam. Aghaloanna va ila tee la toka etatalua, me taumattu ngatoa tale kosa ateva oia aue la ghaikaaiaa va io ughe sungieghila.

<sup>22</sup> Ughe tau mae sio sarasarakana etaghi, me aghi, ngaghe tau lao sio isaa o sarasarakana etaira va aue ekateva nonga ila, nongina italua ekaakateva nonga italua,

<sup>23</sup> aghi etaira me io etaghi, me aue ugheleila la tani kateva nonga ila, me aue taumattu tale kosa ateva oia la kila va io ughe sungieghila tani sio, me uailousieinila nongina uailousieinagi.

<sup>24</sup> "Tamaghi, aghaloannaaili va taumattu ughe tau mae sio etaghi, la toka teeieghi tale masaliki eteae alaa toka etana, me aue la tara sarasarakana ughe tau mae sio etaghi nau ughe tam ghelei kosa ateva, poli ughe uailousieinagi.

<sup>25</sup> O Tamaghi, eeleiaam ghulughuluena, me taumattu tale kosa ateva la tam kilakilaio, ta aghi akilakilaio, me kapughu etoa la kilakila va io ughe sungieghila tani sio.

<sup>26</sup> Aghe auliaala me apasungaala eeleiaam etaira, me aue amene auliaa etaira. Me aue lo ateva niaielousi ugheleia etaghi aue etoka tee etaira, me aghi tee atoka etaira."

## 18

### *Laghe kunela Iesu*

(Mat 26:47-56; Mak 14:43-50; Luk 22:47-53)

<sup>1</sup> Nau eteva Iesu ghe ruula tani looloo sae, ia me kapuna disaepolo atoa laghe laula tale ateo arighi Kidron ta ngetana, me laghe lao sio tale paa ngutana atingiu.

<sup>2</sup> Judas, ia o taumattu ngateva aue etaula Iesu ta tau ngai ssateena atoa, ghe kilakila nongina Iesu ghe lao sio, poli oroi nau ia me kapuna disaepolo atoa laghe laolao tale ia o voto ateva.

<sup>3</sup> Judas ghe lao sio tale paa ngutana atingiu tee soldia ngatoa me polisi etoa, namuu ta pristi etoa me Paresi etoa laghe sungilala. Laghe sausau lam me usulu me voto aiaaiuvii.

<sup>4</sup> Iesu ange kila akapala voto aue elutu tale maamauluaane. Liuna avalua o me ghe tingina ghoala etaira me ghe uela etaira va, "Am paepae see?"

<sup>5</sup> Laghe liula me laghe uela va, "Ami paepae Iesu aNasareti ia."

Me Iesu ghe uela va, "Aghi oia." Judas, ia o ghe tau lao sio Iesu, ghe tiitingina teeila.

<sup>6</sup> Nau eteva ghe ruula tani ue va, "Aghi oia," me laghe kaakatungaala viliira etapaa kosa.

<sup>7</sup> Me Iesu ghe mene kolomilala va, "Am paepae see?"

Me laghe uela va, "Iesu aNasareti ia."

<sup>8</sup> Iesu ghe liula me ghe uela etaira va, "Ngaghauiala etaimim va aghi oia. Arova am paepaeaghi, am tau velu lo atoa toko, me la kasu."

<sup>9</sup> Isaa o voto ghe lutula me inangari ghe aulia ngakasina alokoila ghe koronnala va, "Karika teva ughe tau mae sio etaghi ghe raela."

<sup>10</sup> Saemon Pita ghe sausau baenata ateva. Ghe kapeala, me ghe patoala kapuna tau ngai nongonongo anna ateva Namu ngateva ta pristi etoa, me ghe sai patela talingane ativilau tale pai muenna atelange. Ararina ateaie ia o tau ngai nongonongo anna ateva ta Malkus.

<sup>11</sup> Me Iesu ghe uela ta Pita va, "Kaaila baenata ateva tale aikakkaaina ateva. Uannaa va karika arooroo tani ropi kapa ateva Tamaghi ghe taue mae sio?"

### *Laghe laoaa sio Iesu ta Annas*

(Mat 26:57-58; Mak 14:53-54; Luk 22:54)

<sup>12</sup> Me kapuira namu ngateva soldia me kapuna soldia ngatoa me polisi etoa me kapuira namu ngatoa ajiu etoa laghe kunela Iesu, me laghe irila nimana.

<sup>13</sup> Me laghe laoa ngakasinaie sio mua ta Annas. Annas alumuna ta Kaeapas, Kaeapas namuu ia ta pristi etoa tale ia o ninamanama ateaie.

<sup>14</sup> Kaeapas ia o taumattu ngateva ghe uela ta ajiu etoa va emamasina arova kateva nonga taumattu ghele mate tani ghaa liuira akapa taumattu ngatoa.

*Aitiutiu ta Pita tani ue va etam kilakila Iesu  
(Mat 26:69-70; Mak 14:66-68; Luk 22:55-57)*

<sup>15</sup> Saemon Pita me mene kateva disaepolo lalu ghe aimuli tee Iesu. Poli namu ngateva tana pristi ekilakila ia o disaepolo ateva, liuna avalua o me ia o disaepolo ateva ghe sso teela Iesu elome tale unna valavala atae ia o namu ngateva tana pristi.

<sup>16</sup> Me Pita nonga ghe toitoi eleka tale atamana atae. Ia o disaepolo ateva, namu ngateva tana pristi ghe kilakilaia, ghe oghi ghoala, me ghe aippooaa teela aliki vause ateva ghe aitoiaata amana atae, me ghe kolola Pita, me lalu ghe kupi ssola.

<sup>17</sup> Me aliki vause ateva ghe aitoiaata amana atae ghe uela ta Pita va, “Io tee kateva kapuna disaepolo ia okae taumattu ngateva, ya?”

Pita ghe liula me ghe uela va, “Karika va aghi tee.”

<sup>18</sup> Poli kkaili eteva me tau ngai nonganongo anna atoa me polisi etoa laghe aisokosokolaala kura atae, me laghe maamaruu. Pita tee ghe tiitingina teeila tani maruu.

*Namu ngateva tana pristi ghe kolomila Iesu tale nikokkolomi  
(Mat 26:59-66; Mak 14:55-64; Luk 22:66-71)*

<sup>19</sup> Namu ngateva tana pristi ghe kolomila Iesu ta kapuna disaepolo atoa me tale voto ghe aapasunga.

<sup>20</sup> Iesu ghe liula me ghe uela va, “Aghe aapasunga voto ta mata ngoroi etoa. Aghe aapasunga tale ale nivelu eitauaa me tale ale manga, isaa o voto ajiu etoa laghe mae velvelu eitauaa etana. Karika aghe aisulia righi voto.”

<sup>21</sup> Vaalua me ukookolomieghi? Ukolomi lo atoa laghe nonganongoaghi, poli ila la kilakila sa ateva aghe aaulieiniania.”

<sup>22</sup> Nau ta Iesu ghe aulia ngavaluela o, me kateva polisi ghe tiitingina akalakalaa etana ghe posalaelia me ghe uela va, “Vaalua me uliuliu ase imangari eteva o ta namu ngateva tana pristi?”

<sup>23</sup> Iesu ghe liula me ghe uela va, “Arova aghauliaala righi voto sesa, uaulia ngaotu, me arova aghauliaa voto koronna, vaalua me uposalaieghila?”

<sup>24</sup> Me Annas ghe sungiela va elao ta Kaeapas, ia namuu ia ta pristi etoa. Iriiri ia me laghe laoainie sio.

*Pita ghe mene uela va karika ekilakila Iesu  
(Mat 26:71-75; Mak 14:69-72; Luk 22:58-62)*

<sup>25</sup> Saemon Pita ghe tingina maamaruu me laghe kolomiela va, “Io tee kateva kapuna disaepolo, va?”

Ghe liula me ghe uela va, “Karika va aghi tee.”

<sup>26</sup> Kateva kapuna tau ngai nonganongo anna namu ngateva ta pristi etoa, kapuna ia ia o taumattu ngateva Pita ghe patooa vella talingane atelange, ghe uela va, “Aghe tara teeiola tapaa ngutana nau eteva am me ia, va?”

<sup>27</sup> Me Pita ghe mene uela va, “Karika.” Me paolo ateva taita ia ghe aangarila.

*Laghe laoaa sio Iesu ta Paelat  
(Mat 27:1-2, 11-14; Mak 15:1-5; Luk 23:1-5)*

<sup>28</sup> Vara me ajiu etoa laghe ghaala Iesu ta Kaeapas, me laghe laoainie sio tanganuena Gavana ngateva. Elue talaua poopooa. Laghe tam aloanna tani kupi sso tanganuena, poli laghe rau gheleila va laghe tam raarangisana, poli laghe aloanna va la usi tani namanama ta Pasova ngatiaeae.

<sup>29</sup> Paelat ghe kupi ghoa mae me ghe uela va, “Vaalua me am maeaa sio taumattu ngateva oia va eaisakei?”

<sup>30</sup> Me laghe uela va, “Arova karika ghe gheelei righi sesa voto, karika aue ami ghele maeainia etam.”

<sup>31</sup> Me Paelat ghe uela etaira va, “Am ghiaielia, me am laa ghelei niaiskei etana nongina uneimim lo eaauliaa.”

Me ajiu etoa laghe liula me laghe uela va, “Karika erooroo va ami, ami uvi emate teva taumattu.”

<sup>32</sup> Isaa o voto ghe lutula me inangarina Iesu ghe aaimatoonga ase nimate atae aue eghaaiaa ghe lutu ekoronnala.

<sup>33</sup> Paelat ghe mene kupi ssola tale ale ateva me ghe uela va la kolo mae Iesu, me ghe kolomila Iesu va, “Io kapuira kingi io ajiu etoa?”

<sup>34</sup> Me Iesu ghe kolomiela va, “Nannaam llo ona, o toa laghe auliaa tau aatu sio etam?”

<sup>35</sup> Paelat ghe liula me ghe uela va, “Vara ajiu eghi? Kapum atoa me namuu ta pristi etoa la maeainio sio etaghi. Sa ateva ughe gheleielo?”

<sup>36</sup> Iesu ghe uela va, “Ararimangalighi eteva karika va pei tale kosa ateva oia. Arova pei tale kosa ia, aue kapughu tau ngai nonganongo anna atoa la ghele aiuuvi tani ghelei runga ajiu etoa, me karika aue la ghele kuneieghi. Me ia oia, ararimangalighi eteva karika pei tale kosa ateva ia.”

<sup>37</sup> Paelat ghe uela va, “O io kingi io, va?”

Me Iesu ghe uela va, “Uaulia ngakoronna tani ue va aghi kingi eghi, poli mausina avalua o me aghe lutula, me aghe sio mae tale kosa ateva tani aulia ngaotu voto koronna. Lo atoa tale pai koronna ativilau, la nonganongo usilainagi.”

<sup>38</sup> Paelat ghe kolomiela va, “Saa ia koronna ateva voto?”

Ghe aulia ngavaluelo o me ghe ghoala eleka nongina ajiu etoa, me ghe uela va, “Karika ngatarala righi voto esuisui kkai va sesa voto ghe ghelei.

<sup>39</sup> Kateva ase voto agheelelia nau Pasova, atautau velu kateva taumattu etokatoka tale ale mata voovoo ekupikupi ghoa. Am aloanna va atau velu kapuimim kingi eteva ajiu etoa?”

<sup>40</sup> Laghe ovaova anamuu tani liu va, “Karika mene ia! Utaw velu Barabas!” Barabas tau niaiuvi ia.

## 19

*Paelat ghe uela va la uvi emate Iesu*

(Mat 27:15-31; Mak 15:6-20; Luk 23:13-25)

<sup>1</sup> Me Paelat ghe uela va la ghaa Iesu me la uetaia.

<sup>2</sup> Me soldia ngatoa laghe navitaala uasaorroana tani ghelei unna kou nguru eteva, me laghe atokae saela ta uruna, me laghe amolumolu la tale aiaasae ateva ghuaghuania ia.

<sup>3</sup> Laghe laolao akalakalaa etana me laghe ue va, “Ei, kapuira kingi eteva ajiu etoa!” Me laghe pooposala pasipasi matane.

<sup>4</sup> Paelat ghe mene kopi ghoala me ghe uela ta ajiu etoa va, “Am tarala, ngamene aatingina ghoa etaimim tani auliaa kieimim va karika ngatarala righi voto esuisui kkai va sesa voto ghe gheelei.”

<sup>5</sup> Nau ta Iesu ghe kopi ghoa mae, ghe aatoka kou nguru eteva rorroana ia me ghe aasae aiaasae ateva ghuaghuania ia. Me Paelat ghe uela etaira va, “Taumattu ngateva ie toko, am taraiela.”

<sup>6</sup> Nau eteva namuu ta pristi etoa me polisi etoa laghe taraiela, laghe ovaova atingina tani ue va, “Esae vukala tale aikotoo, esae vukala tale aikotoo!”

Me Paelat ghe uela va, “Am ghaiela, me am laa ghavukalaie sae tale aikotoo. Ta netaghi, karika ngatarala righi voto sesa ghe gheleila.”

<sup>7</sup> Ajiu etoa laghe liula me laghe uela va, “Tale uneimami inangari nipaopao, eauliaa va etani mate, poli eue va Natuna ia God.”

<sup>8</sup> Nau Paelat ghe nongola isaa o inangari, maamatautuaane ghe mene lao tee sio,

<sup>9</sup> me ghe mene kopi ssola tanganue Gavana ngateva, me ghe kolomila Iesu va, “Eaa ughe kasula?” Me Iesu karika ghe liula unna nikokkolomi eteva.

<sup>10</sup> Me Paelat ghe uela va, “Karika uanna tani sama teeieghi, va? Karika ukilakila va aghi matututulienia aghi tani auliaa, me aue ughele kasu, o la ghele avukalaio sae tale aikotoo?”

<sup>11</sup> Iesu ghe liula me ghe uela va, “Karika aue ghele righi sarasarakaniaa inangarim ta netaghi arova God epona liu ghe tam tau aatu sio. Liuna avalua o me lo ateva etautaueghi atu etam, kanna ssavoto elaulau kalum tani ssavoto, me namungaili.”

<sup>12</sup> Ghe tiauala o, Paelat ang ghe paepae salana vaalua tani ghelei, me etau velu Iesu me ekasu, me la rau mene uvi ematea. O me karika ta ajiu etoa laghe ovaova atingina, me laghe ue va, “Arova utau velua va ekasu, karika kapuna io Siisa. Poli lo ateva taumattu eue va kingi ia, ia tau ngai ssateena ia Siisa.”

<sup>13</sup> Nau Paelat ghe nongola isaa o voto, ghe kupiaa ghoa mae Iesu, me ghe toka siola tale aitokatoka ateva aighelei niaiskei ia, tale voto ateva eleka la kolokoloa va “Atu ia”, me tale inangari nge Aramaik la ue va “Gabbata”.

<sup>14</sup> Ia o nau eteva laghe aimonomonosiaa Pasova ngateva, me sinaka ateva ange tokatoka polaki, \* me Paelat ghe uela ta ajiu etoa va, “Kapuimim kingi eteva toko!”

18:35: Jon 1:11.

19:2: Luk 23:11.

19:9: Mat 27:12.

19:11: Jon 10:18; Apes 2:23; Rom 13:1.

19:12: Luk 23:2; Apes 17:7.

\* 19:14: sinaka ateva ange tokatoka polaki Tale inangari nge Griek, nongina aiaaghaonomina (6) aoa ngateva.

<sup>15</sup> Laghe ovaova atingina me laghe ue va, “Kasueiniela! Kasueiniela me elaa vukala tale aikotoo!”

Me Paelat ghe kolomilala va, “Alaa ghavukala sae kapuimim kingi eteva tale aikotoo?”

Me namuu ta pristi etoa laghe liula me laghe uela va, “Karika mene teva kapuimami kingi, ta nim Siisa nonga.”

<sup>16</sup> Liuna avalua o me Paelat ghe tauve lao sio etaira va la laa ghavukalaie sae tale aikotoo.

#### *Laghe nili evukala saela Iesu tale aikotoo*

(Mat 27:32-44; Mak 15:21-32; Luk 23:26-43)

Me laghe ghaala Iesu me laghe kasueiniela.

<sup>17</sup> Ghe saula unna aikotoo ateva me ghe kupi ghoala, me ghe lao sio tale voto ateva arova Riu uru taumattu ngateva, tale inangari nge Aramaik la aseasea va Golgota.

<sup>18</sup> Tale ia o voto ateva laghe nili evukala saela Iesu tale aikotoo ateva, ia me mene ghalua taumattu, kateva ta kativilau, me kateva ta mene kativilau, me Iesu elome.

<sup>19</sup> Paelat ghe aimonomonosiaala inangari ghe pitila, me laghe nili evukala tee saela tale aikotoo. Inangari isaa avalua toko va, “Iesu aNasareti ia, kapuira kingi ia ajiu etoa.”

<sup>20</sup> Oroi ila ajiu etoa laghe ritila isaa o inangari, poli voto ateva laghe avukalala Iesu etana kalakalangina ia tale masaliki taatara, me inangari laghe pitila tale inangari nge Aramaik, Latin me Grik.

<sup>21</sup> Namuu ta pristi etoa ajiu ila laghe lao sio tani tara Paelat, me laghe uela etana va, “Urau mene piti va que va ‘Kapuira kingi ia ajiu etoa,’ ta upiti va ‘Ghe ue va, ‘Aghi kingi ieghi ta ajiu etoa.’”

<sup>22</sup> Paelat ghe liula me ghe uela va, “Llo ngapitila, etoka nongina ngapitila.”

<sup>23</sup> Soldia ngatoa laghe ruula tani nili evukala sae Iesu tale aikotoo, me laghe ghaala ghinnanina, me laghe aikoitaala ghe rooaala taumattu ghaata. Me aiasae ngelome nonga ateva ghe oghila, me laghe tarala va karika laghe saikiela tale oroi tuku kalio, ta laghe gheleielia tale tuku kateva nonga kalio, karika saasaiki ia.

<sup>24</sup> Liuna avalua o me soldia ngatoa laghe uela va, “Ita rau mene rasia, ta ita anamisi tani kila va see eghaa.”

Isaa o voto ghe lutula tani asokoi inangari Uru ngai Manga ateva ghe aulia ngamuemua alokoila va,

“Aue la ghaikoita uneghi aiaasae ngelome ateva etaira,

me aue la anamisi tani kila va see eghaa uneghi koloso ateva.”

Soldia ngatoa laghe ghelei evaluela o.

<sup>25</sup> Kinna ghe tiitingina akalakalangina tale aikotoo ateva Iesu ghe vuuvukala etana, ia me nengane vause ateva kinna, me Meri vausenna ia Klopas, me mene kateva Meri aMakdala ia.

<sup>26</sup> Nau eteva Iesu ghe tarala kinna me disaepolo ateva ghe ailousiangailia, lalu ghe tiitingina akalakalaa, me ghe uela ta kinna va, “Kinagli, ierai o natum ia.”

<sup>27</sup> Me ta disaepolo ateva ghe uela va, “Kinam o.” Ghe tiuala ta ia o nau eteva ia o disaepolo ateva ghe ghaaiela me ghe laoainie sio tanganuena.

#### *Matemateaane Iesu*

(Mat 27:45-56; Mak 15:33-41; Luk 23:44-49)

<sup>28</sup> Nau eteva Iesu ghe kilala va isaa akapa voto ang ghe ruula, me tani ghelei voto Uru ngai Manga ateva ghe auliaala ekorrona, ghe uela va, “Aloghu etiulu ange kangngatala.”

<sup>29</sup> Aikaai uaeni kaakaalina ghe tokatoka. Liuna avalua o me laghe asuula tuku spans ateva me laghe tueiela tale tuu ngai eteva isopi ia, me laghe ssueinie saela ta paane Iesu.

<sup>30</sup> Nau Iesu ghe ropila uaeni kaakaalina, me ghe uela va, “Ngaruu ekapala uunguaaghil!” Me ghe tturruula, me ghe tau vella maamauluaane.

#### *Soldia ngateva ghe soala kativilau ta Iesu*

<sup>31</sup> Ia o nau eteva nau niaipanipaniaa ia, me aue ghe pai sae nau manga ia. Poli ajiu etoa laghe tam aloanna va vilikiira ghe vukala tale nau manga ateva tale aikotoo, liuna avalua o me laghe kolomila Paelat va la paru kotokotoo kkeira, me la ghaa velu sio vilikiira.

<sup>32</sup> Soldia ngatoa laghe lao sio tale aitiutu eteva taumattu, me laghe paru kotoola kekena, me laghe mene lao sio ta mene kateva ta ilalua o taumattu ngalua laghe avukala teeilalue saela me Iesu.

<sup>33</sup> Nau eteva laghe mae sio ta Iesu va laghe tarala va ang ghe matela, karika laghe paru kotoola kkema.

<sup>34</sup> Kateva soldia ghe soala kativilau ta Iesu tale vaalau eteva, me arovaeaata ta rae me manu ghe akalala.

<sup>35</sup> Lo ateva taumattu ghe tarala eaauliaa voto ghe tarala, me inangarina koronna. Ekilakila va voto eaauliaa koronna, me aue am aikaaiia.

<sup>36</sup> Isaa o voto ghe lutula tani ghelei inangari tale Uru ngai Manga ateva laghe aulia ngalokoila ekoronna va, "Karika aue la paru kotoo teae riuna."

<sup>37</sup> Me mene kasina inangari tale Uru ngai Manga ateva ghe uela va, "Aue la tara lo ateva taumattu laghe soaieia."

### *Laghe kaiala Iesu*

(Mat 27:57-61; Mak 15:42-47; Luk 23:50-56)

<sup>38</sup> Vara me Josep, tanganuena tale masaliki taatara atae eArimatia, ghe lao sio tani kolomi Paelat va ghe ghiaa Iesu ang ghe matela. Josep kateva kapuna disaepolo Iesu, me ghe aaisulia poli ghe maamatauta ajiu etoa. Paelat ghe uela va eghaaia, liuna avalua o me Josep ghe lao sio tani ghiaa Iesu me ghe kasueiniela.

<sup>39</sup> Me Nikodimas tee ghe mae sio. Ia, ia o taumattu ngateva ghe lao sio tani tara Iesu eleivoo. Nikodimas ghe ghiaa lao sio voto masi ngusungsusaane la gheelei tale murr me aloi laghe kao aitauaala, maamataniaane erooroo kotolungaula ghaata (34) kilogram.

<sup>40</sup> Lalu ghe ghaala Iesu me lalu ghe rariaala voto masi ngusungsusaane, me lalu ghe sumuela tale masi kalio, nongina ajiu etoa laghe gheelei.

<sup>41</sup> Voto ateva laghe avukala saela Iesu etana tale aikotoo, utana atingiu ta ngetana, me liengani niaikkaia ngateae ouna ia etana, karika laghe alokoi teva taumattu ta ngetana.

<sup>42</sup> Me poli nau niaipanipanlia ia tale nau manga ateva, me liengani niaikkaia ngateae kalakalangina ia, laghe alokoila Iesu tale ia o voto ateva.

## 20

### *Iesu ghe totula tale nimate*

(Mat 28:1-10; Mak 16:1-8; Luk 24:1-12)

<sup>1</sup> Elue talaua poopooa tale aitiutu eteva nau tale uiki, nau ghe tam pai emasina, Meri aMakdala ia ghe ssola tale liengani niaikkaia ngateae, me ghe tarala va ngeila ghe atakiri vella atu eteva tale atamani liengani niaikkaia ngateae.

<sup>2</sup> Liuna avalua o me Meri ghe ilou lao sio ta Saemon Pita me lo ateva disaepolo Iesu ghe ailousiangailia, me ghe uela etairarua va, "Ngeila sau vella Vau eteva tale liengani niaikkaia ngateae, me karika ngami kilala va eaa ngeila alokoioi!"

<sup>3</sup> Liuna avalua o me Pita me mene kateva disaepolo ngilalu ghe laolao tale liu eteva.

<sup>4</sup> Lalua akapa lalu ghe ilou, me kateva etairarua ghe ilou emuemuela ta Pita, me ghe laa sso rekata akasina.

<sup>5</sup> Ghe tturruaala tani taatara sso, me ghe tarala kalio laghe sumuela etana, me karika ghe kupi ssola.

<sup>6</sup> Vara me Saemon Pita ghe aaimuli etana ghe rekatala me ghe kupi ssola tale liengani niaikkaia ngateae me ghe tara alokoila kalio ghe asoaso.

<sup>7</sup> Me lo atiulu kalio laghe sumla uruna ateva etana groughou ia, me ghe asoaso ppae.

<sup>8</sup> Vara me ia o disaepolo ateva ghe rekata akasinala ghe kupi ssola, ghe tarala issa o voto me ghe aikaaiiaala.

<sup>9</sup> Karika aloira ghe maamasaanga llo Uru ngai Manga ateva ghe auliaala va Iesu aue emene totu tale nimate.

### *Iesu ghe rekataala ta Meri aMakdala ia*

(Mak 16:9-11)

<sup>10</sup> Me disaepolo alua lalu ghe lao sio nongina laghe tokatoka,

<sup>11</sup> me Meri ghe tingina ngangngala eleka tale liu eteva. Ghe ngangngala, me ghe tturruaala tani taatara sso elome tale liengani niaikkaia ngateae,

<sup>12</sup> me ghe tarala ensolo alua tale usousoana ghinna lalu ghe tokatoka nongina Iesu ghe asola, kateva ta komo ghruruna, me kateva ta komo kkrena.

<sup>13</sup> Me lalu ghe kolomiela va, "Vause ateva, vaalua me ungangngala?"

Meri ghe liula me ghe uela va, "Ngeila sau vella Vaughu eteva, me karika akilakila va eaa ngeila alokoioi."

<sup>14</sup> Ghe aauliaa llo me vara ghe kiriela, me ghe tarala Iesu ghe tiitingina, me karika ghe kilakila va Iesu etana.

<sup>15</sup> Me Iesu ghe uela etana va, "Vause ateva, vaalua me ungangngala, me upaepae see?"

Meri ghe annaa va tau ngai toi utana ia, ghe liula me ghe uela va, "Namu ngateva, arova io ughe ghiaielaa, uauliaa va eaa ughe alokoielaa me alaa ghaaia."

<sup>16</sup> Iesu ghe uela etana va, "Meri."

Ghe kiriela me ghe uela va, "Rabboni!" (Inangari nge Aramaik, mallooeana va "Tisa".)

<sup>17</sup> Iesu ghe uela va, "Urou mene posoaghi, poli karika aghe sae ta Tamaghi. Lao sio me ulaa ghuliaa ta nengaghi etoa va, 'Ngalaas saesae ta Tamaghi me Tamaaimim teeia, me kapughu Goto ia me am tee kapuimmi ia.'"

<sup>18</sup> Meri aMakdala ia ghe laoaa sio masi kiukiu ta disaepolo atoa, me ghe uela va, "Aghe tarala Vau eteva!" Me ghe auliaala inangari Iesu ghe auliaala etana.

*Iesu ghe rekataala ta kapuna disaepolo atoa*

(Mat 28:16-20; Mak 16:14-18; Luk 24:36-39)

<sup>19</sup> Elo alaina ateva aitutiu eteva nau tale uiki, nau disaepolo atoa laghe lao aitauua sio, me laghe aikavati runga poli laghe maamatauta ajiu etoa, Iesu ghe rekataala me ghe tinginala elome etaira, me ghe uela va, "Luei etoka etaimim."

<sup>20</sup> Ghe aulia ngavaluela o me ghe apasungaala nimane me lo ativilau pai laghe soaieila. Disaepolo atoa laghe masimasi etinginala nau laghe tarala Vau eteva.

<sup>21</sup> Me Iesu ghe mene uela va, "Luei etoka etaimim. Nongina Tamaghi ghe sungieghila, aghi ngamene sungisungiem."

<sup>22</sup> Ghe aulia ngavaluela o, me ghe inoaa tau lao sio etaira me ghe uela va, "Am għaa Spirit Manga eteva.

<sup>23</sup> Arova am kkaluaa sesa għeeleiaira mene katoa, aue isaa o voto aue ekapa, me arova am tam kkaluaa, isaa o voto karika aue ekapa."

*Iesu ghe rekataala ta Tomasi*

<sup>24</sup> Ia o nau eteva Iesu ghe rekataala ta disaepolo atoa, Tomasi (la kolokoloa va Palue ia), kateva ta kasangaulu għalua (12) disaepolo, karika ia.

<sup>25</sup> Liuna avalu o me katoa tani disaepolo laghe uela etana va, "Ami tarala Vau eteva!"

Me Tomasi ghe uela va, "Arova atani tara liu nili ta nimane, me atuli liu nili ta nimane tale vuuvuu nimagħi, me apuso lo ativilau pai laghe soaieila, aue avira mene aikaaia."

<sup>26</sup> Ghaitu (7) nau għe lange sio me disaepolo atoa laghe mene tokatoka tale ale eteva, ilia me Tomasi, me laghe aikavati runga, me Iesu ghe tinginala elome etaira me ghe uela va, "Luei etoka etaimim."

<sup>27</sup> Me ghe uela ta Tomasi va, "Posola toko, me utara nimagħi. Ssuaa mae sio nimam, me uposo lo ativilau pai laghe soaieila etagħi. Erau mene għalua nannaam, unim aiesoaa."

<sup>28</sup> Tomasi ghe uela etana va, "Vaughu io me kapughu Goto io!"

<sup>29</sup> Me Iesu ghe uela etana va, "Poli angu tararieghila, uaaiesoaa. Niarangise ta lo atoa karika ta taṭtar, me la nim aiaiesoaa."

<sup>30</sup> Iesu ghe għeilela oroi mene kasina niaimatoongana ta mataira disaepolo atoa, me karika agħe pitila tale ia oħra vuka eteva.

<sup>31</sup> Me llo oia agħe pitila va am aiesoaa etana va Iesu Mesaea ia, me Natuna ia God, me nau am aiesoaa, aue am għaa maulue tale ararina ateae.

## 21

*Għaitu (7) disaepolo laghe tarala Iesu*

<sup>1</sup> Vara me Iesu ghe mene rekataala ta kapuna disaepolo atoa tale manu talia ngateae e Taiberias. Ghe rekataala etaira avalue toku va:

<sup>2</sup> Saemon Pita, Tomasi (la kolokoloa va Palue ia), me Nataniel aKena ia ta pai nge Galilii, me natuna taita alua Sebedi, me mene għalua tana disaepolo laghe mae aitauua sio.

<sup>3</sup> Me Pita għe uela etaira va, "Agho luku." Me lagħe uela etana va, "Ami usio." Liuna avalu o me lagħe saesaela tale paanaka eteva, me lagħe għoħla tani luku, me ia o voo ngateva, karika lagħe lukula righi kko.

<sup>4</sup> Elue talaua poopoo me lagħe tarala Iesu għe tiitingina elosamarra, me karika lagħe tara kilaiela.

<sup>5</sup> Għe ue għoħla etaira va, "Kapughu aliki etoa, am għaalā righi kko?"

Me lagħe ue sso va, "Karika."

<sup>6</sup> Għe uela etaira va, "Am velu uenaimim uvena ateae tale pai muenna ativilau tale olimo paanaka eteva, me aue am għaa righi kko." Nau lagħe għeilela isaa o voto karika ngħil għe rororo tani ae uvena ateae, poli kko għe orċi annaaili ila.

<sup>7</sup> Me lo ateva disaepolo Iesu ghe ailousieiniaaili ghe uela ta Pita va, “Vau eteva okae!” Nau eteva Saemon Pita ghe kilala va Iesu okae, ghe mene asaela unna aiaasae ngeleka ateva (poli ghe ghaa velu elokoila) me ghe aoso velu siola tapaa manu.

<sup>8</sup> Me mene katoa etaira tana disaepolo laghe aaimuli tale paanaka ateva, laghe aeae uvena ataeae pasu ia tale kko. Karika masau ila elae, ghe rooroo kateva ai (100) mita nonga.

<sup>9</sup> Nau eteva laghe sokolaala, me laghe tarala kura ataeae me kko etoa laghe asoaso etana me verete.

<sup>10</sup> Me Iesu ghe uela etaira va, “Am ghaa mae sio righi kko avirina am lukula.”

<sup>11</sup> Saemon Pita ghe saesaela me ghe ae alokoi saela uvena ataeae elae, pasu ia tale kko namuu, ghe roola kateva ai ghalimangaulu kotolu (153). Arongona ta oroi kko me uvena ataeae karika ghe marala.

<sup>12</sup> Iesu ghe uela etaira va, “Am mae namanama.” Disaepolo atoa laghe anna tani kolomia va ia see, me karika teva ghe rooroo tani ue va ekolomia, poli laghe kilakila va ia Vau eteva.

<sup>13</sup> Iesu ghe lao sio tale kura ataeae me ghe suraki saela verete me ghe tau lao sio etaira. Me ghe ghelei evalue tee lao o tale kko.

<sup>14</sup> Aiaakotonna ateva o nau Iesu ghe rekataala ta disaepolo atoa nau eteva ghe totula tale nimate.

#### *Iesu ghe uela ta Pita va eaitaraa kiena sipsipi etoa*

<sup>15</sup> Nau eteva laghe ruula tani namanama me Iesu ghe uela ta Pita va, “Saemon natuna io Jon, tani koronna va uailousieinagh?” Me ailousiaam etaghi elaulau mene katoa disaepolo?

Me Pita ghe uela va, “Ue, Vau eteva, ukilakila va aghailousieinio.”

Iesu ghe uela etana va, “Uangini kieghi lutu sipsipi etoa.”

<sup>16</sup> Me Iesu ghe mene uela etana va, “Saemon natuna io Jon, koronnaaili va uailousieinagh?”

Me Pita ghe liula me ghe uela va, “Ue, Vau eteva, io ukilakila va aghailousieinio.”

Iesu ghe uela etana va, “Uaitaraa kieghi sipsipi.”

<sup>17</sup> Aiaakotonna ta Iesu ghe mene uela etana va, “Saemon natuna io Jon, uailousieinagh?”

Pita ghe tam masimasila poli ghe mene kolomiela aiaakotonnaata ateva va koronna va eaielousiaa Iesu. Pita ghe liula me ghe uela va, “Vau eteva, ukilakila akapa voto, me ukilakila va aghailousieinio.”

Iesu ghe uela etana va, “Uangini kieghi sipsipi.

<sup>18</sup> Aghaaulia ngakoronna etam va nau eteva aliki taita io, uaaititio, me ulaolao nongina aloanam, me nau utaata namuu, aue ussuuaa sae nimam, me kateva ppae aue eaititio, me ekatulainio lao nongina utam aloanna tani lao.”

<sup>19</sup> Iesu ghe aaulia ngavalua o tani apasunga ase nimate ateva Pita aue ghaaia tani tau sae God. Vara me Iesu ghe uela ta Pita va, “Uaimuli teeieghi!”

#### *Inangarina lo ateva disaepolo Iesu ghe ailousieinia*

<sup>20</sup> Pita ghe kiriela me ghe tarala lo ateva disaepolo Iesu ghe ailousieinia ghe aimuli teeilalua. (Ia, ia o ghe tani vaavalaa lao ta Iesu nau laghe namanama me ghe ue va, “Vau eteva, see aue etauo lao ta nimaira tau ngai ssateem atoa?”)

<sup>21</sup> Nau Pita ghe taraiet lao sio me ghe kolomila Iesu va, “Vau eteva, vaalua ta ierai o?”

<sup>22</sup> Iesu ghe liula me ghe uela va, “Arova aghanna va ghele tokatoka me aghele mene kiriaa mae, vaalua ta ngetam? Unim aimuli teeieghi.”

<sup>23</sup> Poli isaa o inangari me kiukiu ghe kasu ekapa seela ta tue me nenga atoa va ia o lo ateva disaepolo karika aue emate. O me Iesu karika va ghe uela va karika aue emate, ta ghe nim ue va, “Arova aghanna va ghele tokatoka me aghele kiriaa mae, vaalua ta ngetam?”

<sup>24</sup> Ia o disaepolo ateva, ia oia eaaulia ngaotu isaa o voto me ghe piti elokoila. Ami kilakila va inangarina koronna.

<sup>25</sup> Iesu ghe gheleila mene oroieili voto. Aghannaa va arova la ghele piti kateva kateva tale vuku, aue karika righi voto tale kosa ateva oia tani alokoi isaa o vuku.

## Gheegheleiaaira Apostolo Atoa Inangari emuemua

Luk ghe mene pitila righi tana kiukiu ghe tiuaala tale Masi Inangarina ghe pitiela. Etiuaa tale saesaeaane Iesu epona liu me nau God ghe tau lao sio Spirit Manga ateva tale Nau Pentikos. Aitiutiu etoa sapta la kiukiuaa masi kiukiui ghe kasu ekapa seela, ejerusalem me ejjudia ta ajiu etoa, vara me eSameria me eAntiok ta lo atoa karika ajiu ila. Tale ila o sapta ngatoo, Luk ekiukiuaa Pita, Jon, Stipen me Pilip. Sapta 13-28 ekiukiuaa unguuaane atoa Pol, tale kotoluae nikasu see tani ppooaa masi kiukiui, tale patunganua eSaepras, me ta llo namuu patunganua alua ghaine ita aseaselalua va Teki me Gris. Ekiukiuaa tale nau Pol ghe saela ejerusalem, ajiu etoa laghe kuneiela, me aRom atoa laghe gheleila niaiskei etana ghaluaata, me vaalua ghe saela eRom. Luk ghe kasukasuu eitauua tee Pol kotoluuaata, me ghe pitila va "ami" ta 16:10-17; 20:5-21:18 me 27:1-28:16 tani apasunga va ia ghe tokatoka tee Pol.

### Tani kila amuemua

Aitiutiu tale ale manga 1:1-5:42

Nau sesa me tau ngairesoa ngatoo laghe oroila 6:1-9:31

Pita me aitiutiu tau ngeleka atoa laghe aiesoaa 9:32-12:25

Pol ghe kasukasuu tee Banabas 13:1-16:5

Pol ghe lao sio eTeki me eGris 16:6-19:20

Pol ghe saela ejerusalem, laghe kuneiela, me ghe saela eRom 19:21-28:31

### *Iesu ghe saela epona liu*

<sup>1</sup> Tiopilus, tale lo ateva to vuku aghe piti ekasinaiela, aghe auliaala niuungu Iesu ghe tiuaala tani ghelei me tani apasunga,

<sup>2</sup> nau ghe ruula tani aippooaa tee kapuna apostolo atoa ia o ghe suitoongainilala, me tale sarasarakaniaane Spirit Manga ateva ghe auliaa tau lao sio vaalua la uungu me ghe ghaala nau eteva ghe oghi saela epona liu.

<sup>3</sup> Emuli tale nimmarikana ghe ghaala, ghe apasungaala oroieili voto tani apasunga va ia maulue ia ta ila o apostolo atoa. Ghe kaurekatila etaira ghe roola ghaatingaulu (40) nau, me tani auliaa ararimangalina ateva God.

<sup>4</sup> Kateva nau laghe namanama aitauua me ghe uela etaira va, "Karika am mene kasu vuli mua ejerusalem. Am toi kateva voto Tamaghi ghe aulieiniela tale inangari nialokoi va aue enim tau aatu etaimim, ia o aghe aulieiniela.

<sup>5</sup> Jon ghe aasuu taumattu tale manu, me karika masau me aue am ghaa niaasuu tale Spirit Manga ateva."

<sup>6</sup> Nau laghe velu eitauuaala me laghe kolomiela va, "Vau eteva, tale isaa oia nau erooroo va umene asaesae arariira ateeae alsraeli etoa?"

<sup>7</sup> Ghe uela etaira va, "Karika unguuaaimim tani kila nau Tamaghi ghe atokala tale sarasarakanianane.

<sup>8</sup> Me am, aue am ghaa sarasarakania nau Spirit Manga ateva emae etaimim, me saa llo am ghe tarala me nongola, aue am laa ppooaa tale masaliki taatara ejerusalem, tale provinsi eteva ejjudia, eSameria me tale kosa akapa ateva."

<sup>9</sup> Nau ghe ruula tani auliaa llo me God ghe ghaiae saela epona liu emua ta mataira, me urukookoo ateva ghe aisulieiniela tale taataraira.

<sup>10</sup> Nau laghe taatara usiusie sae elomarase nongina ghe laa saesae, arovaeaata ta taumattu ngalua lalu ghe aasae kalio usousoana lalu ghe kaurekatila me lalu ghe tingina teilala.

<sup>11</sup> Me lalu ghe uela va, "Taumattu nge Galilii etoa, vaalua me am tingina taatara sae elomarase? Ia o Iesu God ange ghaiae saela epona liu aue emene oghi sio nongina ngam taraiela elaa saesae."

### *Mataeasi ghe ghaala liuna ateva Jiudas*

<sup>12</sup> Nau ensolo alua lalu ghe kasula, laghe oghi sio mae ejerusalem ta laghe laa sae kasu tale motouru eteva la aseasea va eOliv, maamasauaane erooroo kasukasuaaira ta sambati.\*

**1:1:** Luk 1:3.    **1:2:** Mak 16:19; Luk 24:49-51.    **1:3:** Luk 24:36-49; Apos 10:41.    **1:4:** Luk 24:49; Jon 14:16-17;

Apos 2:33.    **1:5:** Mat 3:11.    **1:6:** Luk 24:21.    **1:7:** Mak 13:32.    **1:8:** Mat 28:19; Luk 24:48.    **1:11:** Mat

26:64; Luk 21:27.    **1:12:** Luk 24:50-53.    \* **1:12:** kasukasuaaira ta sambati Ajiu etoa la uue va urooroo tani kasu tale sambati ta kateva kilomita nonga.

<sup>13</sup> Nau laghe rekatala, laghe saela tale ale ngepona atiulu nongina laghe tokatoka. Lo atoa laghe mae sio, Pita, Jon, Jeimis me Andru me Pilip, Tomas, Batolomiu, Matiu, Jeimis natuna ia Alpeas, me Saemon laghe aseasea va Selot ia, me Jiudas natuna ia Jeimis.

<sup>14</sup> Ila me vause atoa, me Meri kinna ia Iesu, me tuena atoa me nengane atoa Iesu, laghe maemae aitauaa nonga tani looloo sae.

<sup>15</sup> Tale isaa o nau Pita ghe tingina saela elome ta lo atoa laghe aaiesoaa, ila akapaaili erooro kateva ai me ghaluengaulu (120).

<sup>16</sup> Ghe uela va, "Tueghi me nengaghi etoa, Spirit Manga ateva ghe auliaala emua arau ta paane Deivit va Jiudas aue emuemua lo atoa aue la laa kune Iesu. Isaa o inangari Uru ngai Manga ateva ghe tani lulu ekoronnala.

<sup>17</sup> Poli Iesu ghe suoongainiela tani uungu teeita, Jiudas ia kateva elome etaita."

<sup>18</sup> (Ia o taumattu ngateva ghe ghaala aipolipoli tale sesa gheeleiaane me ghe polila kosa ateva, ghe katuula ghe akasa ngamateala, me kovane ateva ghe tapolakala, me tinena ghe ghoa mae eleka.

<sup>19</sup> Ila akapa Jerusalem laghe nongola me laghe asela voto ateva o tale inangari tanganueira va Akeldama, malloeana va "Kosa ateva rae etana".)

<sup>20</sup> Pita ghe uela va, "Laghe pitila tale vuku eteva ta Sams va,

" 'Alena ateva aue enim toka  
me karika teva tani toka etana'

me,

" 'Liuna ateva tani muemua niuungu kateva ppae aue eghaaia.'

<sup>21</sup> Liuna avalua o me ita tara teva taumattu ghe kasukasuu teeita nau ekapa atoa nau Vau eteva Iesu ghe tokatoka teeita,

<sup>22</sup> etiituaa nau Jon ghe aasuu me ghe laa ghaa sio nau God ghe ghaa saela Iesu epona liu. Ita ghaa teva ghe tani tarala isaa o voto me tottotaane Iesu."

<sup>23</sup> Laghe asela ghala taumattu, Josep laghe aseasea va Barsabas, me laghe asease teeia va Jastas,<sup>†</sup> me mene kateva taumattu, Mataeasi etana.

<sup>24</sup> Me laghe looloo saela, laghe uela va, "Vau ngepona ateva, io ukilakila akapa urunguitaniira taumattu ngatoa, uapasunga va see etairarua ughe suoongainiela va

<sup>25</sup> eghaa niuungu eteva va eapostolo me eghaa niuungu eteva Jiudas ghe katuu vuluela tani lao nongina aue elao."

<sup>26</sup> Laghe kaaila voto aluepai eaimatoonga arariirarua aluae. Nau laghe senusenuaala, ararina atae Mataeasi ghe katuu ekasinala, me ie tee ghe lao aitauaa tee sio kasangaulu kateva apostolo.

## 2

### *Spirit Manga ghe sio mae ta Nau Pentikos*

<sup>1</sup> Ghe ghaala nau ta Pentikos, taumattu ngatoa laghe aaikaiaa, ila akapa laghe mae sio tani velu eitauaa tale kateva voto.

<sup>2</sup> Katengaata nonga ta laghe nongola niaangari eteva arova paka kuukuu eteva, ghe sio mae epona liu me ghe pasula elome tale ale ateva.

<sup>3</sup> Laghe tarala lo ateva ghe sio mae arova kura ataata atae, me ghe poliae seela nonginaaili ramuramuti paa atoa, me ghe tokala epona ta kateva kateva etaira.

<sup>4</sup> Laghe pasula tale Spirit Manga ateva, me laghe tiuaala tani aippooaa tale asease nisama karika samasama tanganueira, ta Spirit Manga ateva ghe tau lao sio.

<sup>5</sup> Tale ia o nau eteva oroi ajiu etoa laghe aaiesoaa ta God, laghe mae akapa see sio tale kosa akapa ateva tani velu eitauaa ejerusalem.

<sup>6</sup> Nau laghe nongola mangalia ateva, laghe mae sio tani velu eitauaa, me laghe soghila tani nongo inangari tanganueira, disaepolo atoa laghe aauliaa.

<sup>7</sup> Mataira ghe otila me laghe kolomila va, "Taumattu ngatoa oia la aippooaa ila akapa laghe mae sio eGalilii.

<sup>8</sup> Vaalua me kateva kateva etaita ita nongonongo kila inangari tanganueita?

<sup>9</sup> Ita taumattu tale Patia, Midia, Elam, me taumattu nge Mesopoteimia, Jiudia, Kapanosis, Pontus me Eisia,

<sup>10</sup> Prigia me Pampilia, Ijip, me katoa laghe mae sio tale kasina masaliki eLibia kalakalangina tale masaliki eteae eSaerini, me katoa laghe mae sio eRom,

<sup>1:13</sup>: Mat 10:2-4.    <sup>1:16</sup>: Sams 41:9.    <sup>1:18</sup>: Mat 27:3-8.    <sup>1:20</sup>: Sams 69:25; 109:8.    <sup>1:22</sup>: Mak 1:9; 16:19; Jon 15:27.

<sup>† 1:23</sup>: Josep arari nge Hibru ia, me Jastas arari nge Latin ia. Barsabas malloeana va ghe lutula ta sambati.

<sup>2:1</sup>: Lev 23:15-21; Diut 16:9-11.    <sup>2:3</sup>: Mat 3:11.    <sup>2:4</sup>: Apos 4:31; 10:44-46; 19:6; Mak 16:17.

11 ita ajiu etoa me lo atoa ghavirina laghe mene aiesoaa teeitala, aKrit me aArabia, ita akapa ngita nongola kinatama voto ateva God nge gheleila nau ngila ppooala tale inangari tanganueita.” 12 Laghe soghila me aloira ghe kapaala me laghe aikolomieinila va, “Sa malloeano llo oia?”

13 Katoa laghe aanamisainila tani ue va, “La ropila manu eteva sarasarakana ia.”

*Pita ghe ppooala ta taumattu ngatoa*

14 Pita ghe tingina aitauaa teela kasangaulu kateva (11) apostolo, ghe sama anamuula me ghe uela va, “Am ajiu etoa me lo atoa am tokatoka eJerusalem, am nongo amasina inangari aghauliaa.

15 Taumattu oia karika la ropila nongina am aauliaa. Elue talaua arau oia ta 9 kilok.\*

16 Isaa oia voto am taatara, propet Joel ang ghe aulia ngalokoila,

17 ghe uela va,

“God eue va, Airuuruu tale kosa ateva,  
aue atau sio kapughu Spirit Manga ateva tale taumattu ngatoa.

Natuimim taita atoa me vause atoa aue la aulia ngaotu inangarighi.

Aliko taita atoa aue la tara nitaatara,  
me taita namu ngatoa aue la asoasopoi.

18 Me kapughu tau ngai uungu etoa, taita ila me vause ila,  
aue atau sio tee Spirit Manga ateva etaira,  
me aue la aulia ngaotu inangarighi.

19 Aghi aue aghapasunga aimatootoongana elomarase  
me epona tale kosa ateva,  
rae, kura atae, me paka asu eteva.

20 Sinaka ateva aue saurrom,  
ulana ateva aue eraeraeana,  
me auena kinatama nau eteva emae, ia o nau eteva, aue aghi Vau ngepona ateva aue enaughia.

21 Me lo atoa la kolo tau  
ararina atae Vau ngepona ateva aue la saanga.’”

22 Pita ghe mene uela va, “Israeli etoa, am nongo. Iesu aNasareti ia God ghe sungie mae sio etaimim, ghe gheleila paka mirikol me aimatootoongana elome etaimim tani apasunga etaimim va ia ghe kasula ta God. Am akapa am kilakila isaa oia voto.

23 Ia o taumattu ngateva emua arau God ghe kilaiela me ghe loela tani taue sio etaimim, am me ssa taumattu ngatoa am ghe uvi emateala tale aikotoo.

24 God ang ghe totuela tale mammarikana nimate atae, poli nimate atae karika righi sarasarakanianane tani poso aoghi.

25 Deivit ghe pitila va Mesaea ghe auliaala va,

“‘Aghe taatara Vau ngepona ateva emua ta ngetaghi tale nau ekapa atoa,  
poli ia etokatoka tale pai muenna ativilau etaghi,  
me karika arooroo tani katuu.

26 Liuna avalua o me urunguitanighi eteva emasimasi me paaghi eteva ekkinari tau sae ararina atae,  
me vaulanighi eteva aue etoka tale voto anannaa va aue aghaa maulue etana.

27 Poli io karika urooroo tani tau velueghi va alao tanganueira matena atoa,  
me karika aue utau velu kapum taumattu manga va emauu.

28 Ughe apasungaala va aue amene sakesake,  
me tokatokaam teeieghi aue eapasueghi tale nimasimasi.’

29 “Tueghi me nengaghi etoa, aghi aghaaulia ngakorokoronganaaili etaimim va, tuvuita ateva ta Deivit ghe matela, laghe kaieiniela, me liuna ateva, etokatoka teeita tale isaa oia nau.

30 Ia propete ia, me God ghe gheleila kinatama inangari nialokoi eteva va teva tuvuna aue ekingi nongina ia.

31 Me ia ghe taatara lao sio emua, me ghe auliaala tottotuaane Mesaea, poli karika ghe tau veluela va ghe aso tanganueira matena atoa, me vilikina karika ghe mauula tale liu.

32 Ia o Iesu, God ghe totuela tale nimate, ami oia ami ghe taraiela, me ami aaulia ngaoutua.

\* **2:15:** 9 kilok Tale inangari nge Grik, *tale aiaakotoluna ateva aoa.*      **2:17:** Joel 2:28-32.      **2:25:** Sams 16:8-11.  
**2:29:** 1 Ki 2:10.      **2:30:** 2 Sam 7:12; Sams 89:3-4; 132:11.      **2:31:** Sams 16:10.

<sup>33</sup> God ghe asaesaeala tani toka tale pai muenna ativilau, me ghe tau sio mae Spirit Manga ateva nongina ghe auliaala tale inangari nialokoi. Me Iesu ghe tau sio mae Spirit Manga ateva etaimami, ghaine am taataraira me am nonganongoa.

<sup>34</sup> Poli Deivit karika ghe saela epona liu, me ghe uela va,

“Vau ngepona ateva ghe uela ta kapughu Vau eterva va,

“Toka siola tale pai muenna ativilau

<sup>35</sup> lomosi ta aghatoka sio lo atoa la sessa teeio euu,

me uatingina saoaa kkem etaira.”<sup>1</sup>

<sup>36</sup> “Liuna avalua o me Israeli ekapa atoa am tani kila amasina va ia o taumattu ngateva am ghe avukalaie saela tale aikotoo, Iesu etana, God ghe gheleielu va Vau ia me Mesaea ia.”

<sup>37</sup> Nau laghe nongola inangarina Pita ghe ppooala, ghe pasala urunguitaniira me laghe uela ta Pita me mene katoa apostolo va, “Kapumami eto, sa ateva ami gheleia?”

<sup>38</sup> Pita ghe liula etaira me ghe uela va, “Am nna ngaioghioghiaa, me am ghaa niaasuu tale ararina atea Iesu Karisto, me kaluimim ssavoto aue ekapa, me God aue etau aatu Spirit Manga ateva etaimim.

<sup>39</sup> Inangari nialokoi uneimim me natuimim atoa me taumattu ngeleka atoa, lo akapa atoa oia Vau ngepona ateva kapuita Goto ia aue ekolola.”

<sup>40</sup> Orioilei inangari Pita ghe aulia ngasarasarakananailila etaira tani ue va, “Am asaangiem tale vituu eterva oia sesa ia.”

<sup>41</sup> Lo atoa laghe aikaaiala inangari laghe ghaala niaasuu, ghe roola kotolu airari (3,000) taumattu taita me vause tale ia o nau eterva.

### *Tau ngaikaia ngatoa laghe velu eitauaa*

<sup>42</sup> Nau ekapa atoa tau ngaikaia ngatoa laghe veluvelu eitauaa tee apostolo atoa, me laghe nongonongo me laghe taatara voto apostolo atoa laghe aapasunga, me laghe namanama, me laghe looloo sae aitauaa.

<sup>43</sup> Ilu akapa laghe taatara sarasarakaniaane God tale mirikol me aimatootoongana apostolo atoa laghe gheelei, liuna avalua o me laghe oneoneaa God.

<sup>44</sup> Me ghe kateva nonga ilala, me laghe aitauaa peiira.

<sup>45</sup> Laghe tautau velu kasina kosa me peiira laghe polipoli me viliki veu laghe kookoitaat a lo atoa laghe tuutukuna tale kasina voto.

<sup>46</sup> Nau ekapa atoa laghe veluvelu eitauaa tale ale ngeleka atiulu tale ale manga, me laghe aaikasuaa see elome tale paa ngaleira tani namanama<sup>†</sup> me laghe masimasi eitauaa,

<sup>47</sup> laghe tautau sae ararina atea God, me taumattu ngatoa laghe oneoneainila. Me tale nau ekapa atoa Vau ngepona ateva ghe mene tautau sso ouna taumattu ghe aasaangi, tani lao aitauaa tee lo atoa akasina.

## 3

### *Pita ghe ghelei emasinala tangorengorena ateva tau nilooloo ia*

<sup>1</sup> KATEVA nau Pita me Jon lalu ghe laa saesae tale ale manga ateva tani looloo sae ta 3 kilok elo alai,<sup>\*</sup> nau nilooloo sae.

<sup>2</sup> Taumattu ngateva, ghe lutu etangorengorenala, laghe sausaue sae tale atamani ale manga ateva la ghaseasea va Masi Taataraane. Laghe aatokaia nau ekapa atoa tani loo viliki veu tale taumattu ghe kupikupi sso tale ale manga ateva.

<sup>3</sup> Nau ghe tarala Pita me Jon ta lalu ghe mae soso tale ale manga ateva, ghe looloo viliki veu etairaru.

<sup>4</sup> Pita ghe tara sossolainiela, me tee Jon, me Pita ghe uela etana va, “Utariengalue mae.”

<sup>5</sup> Nau ghe taatarailalua ghe annaa va ghe ghaa righi voto etairaru.

<sup>6</sup> Me Pita ghe uela etana va, “Karika righi viliki veu etaghi. Voto auunusi aue atau aatu etam. Tale ararina nonga atea Iesu Karisto aNasareti ia aghaauliaa etam va, tingina saela me ukasukasuu.”

<sup>7</sup> Pita ghe kunela nimana muenna atelange me ghe kune atinginaie saela me katengaata nonga ta kkena me kunikuni kkena ghe sarasarakanala.

<sup>8</sup> Ghe alosa me ghe tingina saela me ang ghe kasukasuu, ghe kupi eitauaa tee ssola taita alua tale ale manga ateva, ghe aaooso me ghe kakkaua sae ararina atea God.

<sup>2:33:</sup> Apos 5:32; 7:55-56.    <sup>2:34:</sup> Sams 110:1.    <sup>2:36:</sup> Apos 5:30-31.    <sup>2:39:</sup> Ais 57:19.    <sup>2:41:</sup> Apos 2:47; 4:4.

<sup>2:42:</sup> Apos 20:7.    <sup>2:44:</sup> Apos 4:32-35.    <sup>†</sup> <sup>2:46:</sup> Katoa la annaa va malloeana va la ghe gheelei Losapa.    <sup>2:47:</sup>

Apos 6:7; 11:21.    <sup>\*</sup> <sup>3:1:</sup> 3 kilok elo alai Tale inangari nge Griek, tale aiaaghasiona (9) ateva aoa.    <sup>3:4:</sup> Apos 14:9.

<sup>3:6:</sup> Apos 4:10; 16:18.

<sup>9</sup> Nau taumattu ngatoa laghe taraiela ta ghe kasukasula me ghe kakkaua ararina atea God,

<sup>10</sup> laghe kilaiela va ia oia taita ateva ghe tokatoka nonga tale atamani ale manga ateva la ghaseasea va Masi Taataraane tani loo viliki veu, laghe soghiaala tani taraia va ghe kasukasula.

<sup>11</sup> Nau laghe nongola kiukiuna tangorengorena ateva va ang ghe kasukasula, ila akapaaaili taumattu ngatoa laghe lao sio tani taraia elome tale ale manga ateva tale varanda ngateva laghe asease va Solomon etana. Ghe kunekune atingina ta taita alua tale ale manga ateva.

<sup>12</sup> Nau Pita ghe tara avaluela o, ghe uela ta taumattu ngatoa va, "Am Israeli etoa, vaalua me am mammanuena voto oia elutula, me vaalua me am taatara sossolainangalua? Am nannaa va taumattu ngateva oia emasinala tale sarasarakaniaangalua o masi tokatokaangalua?

<sup>13</sup> Kapuira Goto ateva Abraham, Aisiki me Jekop, kapuira Goto ateva tuvuita ia, ia ghe asaesaella ararina atea kapuna tau ngai nongonongo anna ateva ta Iesu. Am ghe tauela ta aRom atoa va la uvi ematea, me am ghe ratiela va ia king ia emua ta Paelat, arongona ta Paelat ghe kilala va Iesu karika righi sesa gheegheleiaanae.

<sup>14</sup> Iesu raarangisana ia me ghulughuluena ia, me am, am ghe ratiela, me am ghe aloannala va tau ngai uvii emate ateva etoka.

<sup>15</sup> Lo ateva etautau mae maulue, am ghe uvi emateala, me God ghe totuela tale nimate. Angalua oia angalu ghe taraiela ta mataingalua me angalu aaulieinia etaimim.

<sup>16</sup> Tale niaakaiaa ta ararina atea Iesu, taumattu ngateva am taataraia me am kilakilaia, ange korokoronganala. Lo ateva o niaakaiaa ta Iesu ghe ghelei emasina akapaaailila tale taataraimim.

<sup>17</sup> "Me anga kilaiemla, tueghi me nengaghi etoa, va voto am me kapuim namu ngatoa am ghe gheelei karika am ghe aalomasaanga tee.

<sup>18</sup> Aviri am ghe gheleila, me God ang ghe kila vella emua arau sa ateva auena elutu. Kapuna propete atoa laghe aulia ngamuemue alokoila va Mesaea aue emae ghaa nimmarikana.

<sup>19</sup> Am aikolikoliaa me am nna ngaioghioghiaa tale kaluimim ssavoto, me God aue ekkaluaa, me esei velu kaluimim ssavoto.

<sup>20</sup> Me Vau ngepona ateva aue etau aatu nau tani mene akorokoronganmaamaulu-aaimim, me aue emene suu Mesaea, eghe suimatoongainiela tani sausiem, Iesu etana.

<sup>21</sup> Ia etani toka epona liu lomosina ta emene oghi sio tani mene ghelei eouna voto akapaaaili. Ghe auliaala ta propet manga atoa emua arau.

<sup>22</sup> Llo Moses ghe auliaala va, 'Vau eteva kapuimim Goto ateva aue etau mae teva propete aue enongina ghe atinginaieghi saela, elome ta ngetaimim. Nau propete ateva emae, am roro tani nongo usilainia, me am ghelei voto eauliaa.

<sup>23</sup> Arova see atoa la tam nongo usilaa voto eauliaa aue God etturuu vella elome ta kapuna atoa.'

<sup>24</sup> "Etiitiuaa ta Samuel me elao lao ta mene katoa propete, laghe aulia ngaotu teela isaa oia nau.

<sup>25</sup> Am natuira iem propete atoa, me tale niaippooa ngaitaua ngateva God ghe gheleielta tuvuimim atoa nau ghe uela ta Abraham va, 'Ta tuvum ateva isaa akapaaaili taumattu tale kosa ateva aue la ghaa niarangise.'

<sup>26</sup> Nau eteva God ghe atingina saela kapuna tau ngai nongonongo anna ateva, ghe sungi ekasinaie mae sio etaimim tani arangiseiem me tani ghelei eoghiem tale gheeleiaaimim sesa."

## 4

### *Laghe atoka ssola Pita me Jon tale ale mata voovoo*

<sup>1</sup> Pita me Jon karika lalu ghe ruu tani aippooaa tee taumattu ngatoa, me pristi etoa, me namu ngateva ghe aaitoiaa polisi etoa tale ale manga ateva, me Sadiusi etoa laghe rekatala.

<sup>2</sup> Laghe kilakila va lalu ghe aauliaa ta taumattu ngatoa me aapasinga va Iesu ang ghe totula tale nimate, me ila akapa taumattu ngatoa ngila ghe matela ila tee aue la totu. Liuna avulua o me ghe sessaileiliua etairarua.

<sup>3</sup> Me laghe kuneilaluela tani laoainilalua tale niaiskei. Poli ang ghe elo alaila, laghe atokailalua ssola tale ale mata voovoo, me laghe toi ta ghe pai sae ta mene kateva nau.

<sup>4</sup> Oroiannaaili ila lo atoa laghe nongola me laghe aikaaiaala ta Iesu, me lo atoa taita laghe aikaaiaala erooroo ghalima airari (5,000).

*Laghe tau lao sio Pita me Jon va lalu aisakei ta mata kansolo atoa*

<sup>5</sup> Ghe paila ta mene kateva nau, tau ngai toitoi etoa, namu ngatoa me tau ngai aapasunga atoa tale inangari nipaopao laghe velu eitauaala ejerusalem.

<sup>6</sup> Annas, namuu ia ta pristi etoa, ghe toka teeilala. Ila me Kaeapas, me Jon, Aleksanda, me mene katoa taumattu mangalina ila Annas, laghe toka teeilala.

<sup>7</sup> Laghe atinginala Pita me Jon emua etaira, me laghe kolomilueluva, "See ghe tau aatu sio sarasarakana etaimalua tani ghelei isaa oia voto? Me ta see ararina atae amalu gheghelei isaa o voto?"

<sup>8</sup> Spirit Manga ateva ghe pasula ta Pita me ghe uela etaira va, "Am tau ngai toitoi me namuu nge Israeli etoa,

<sup>9</sup> ngam aloanna tani kolomiengalua ghaine poli angalu ghe gheleila masi niuungu ta tangorengorena ateva, me am aloanna tee tani kila va vaalua taumattu ngateva ghe masinala.

<sup>10</sup> Me isaa oia am me Israeli ekapa atoa am rooroo tani kila va tale ararina atae Jesu Karisto aNasareti ia, am ghe avukalaie saela tale aikotoo, me God ghe totuela tale nimate, ia gheleila me ia o taumattu ngateva ghele masinala, me ange tinginala emua etaimim.

<sup>11</sup> Ia Iesu, 'Atu eteva am tau ngai atulu ale atoa am ghe uela va sesa ia me am ghe ratiela, ia ghe aitiutiula tale atu ekapa atoa tani suei ale ateva.'

<sup>12</sup> Karika teva taumattu erooroo tani mene asaangita, karika poi. Nim ararina atae nonga Jesu taumattu ngatoya tale kosa ateva oia ita rooroo tani saanga."

<sup>13</sup> Namu ngatoa laghe kilakila va Pita me Jon karika lalu ghe sikulula, nim taumattu ilalua, me laghe taatara ta karika ghe moimoilalua. Liuna avalua o me laghe soghiala tani tara, me laghe kilala va lalu ghe toka teela Iesu.

<sup>14</sup> Me laghe tarala ia o taumattu ngateva, vilikina ghe masinala, ghe tiitingina eitaua teeilalua, liuna avalua o me ghe karikala righi inangariira tani liu etairaru.

<sup>15</sup> Isaa avalua o me namu ngatoa laghe uela etairotolu va lotolu kupi vulu ghoa kansolo atoa. Nau angilotolu ghe kupi ghoala, laghe aaikolomi va,

<sup>16</sup> "Vaalua aue ita ghelei taita alua oia? Ngilalu gheleila kateva ppae ase niamatootoongana, me taumattu ngakapa atoa ejerusalem angila ghele kilaiela, ita tee karika poi ita rooroo tani ue va kamena.

<sup>17</sup> Me inangari erau namungaili va elao akapa see ta taumattu ngatoa. Liuna avalua o me ita aulia ngasarasarakana etairarua va lalu rau mene ppooaa tale ararina atae ia o taumattu ngateva tale mene katoa tana taumattu."

<sup>18</sup> Emulina laghe kololaluelu, me laghe paolaluelu va lalu rau mene ppooaa me apasunga tale ararina atae Iesu.

<sup>19</sup> Pita me Jon lalu ghe liula me lalu ghe uela va, "Vaalua, emamasina ta matane God tani nongo usilaa inangariimim me karika va inangarin God? Am tani laa anna ngamasina.

<sup>20</sup> Karika aue angalu rooroo tani matuua, angalu tani aulia ngakapa voto angalu ghe tarala me angalu ghe nongola."

<sup>21</sup> Kansolo atoa laghe mene tau lao sio inangari sarasarakana etairarua, me laghe sungi veluluelu, poli laghe maamatauta taumattu ngatoa. Ila akapa taumattu ngatoa laghe nnaala voto ateva oia God ghe gheleila, me laghe tautau sae ararina atae God. Liuna avalua o me karika righi salaira kansolo atoa tani ghelei teeilalua.

<sup>22</sup> Ia o taumattu ngateva lalu ghe gheleila niamatooonga etana me ghe masinala, anna ninamanama ang ghe laula ghaatingauli (40).

*Laghe kokkolomi sae tani ghiaa sarasarakana tani ppooaa inangarin Iesu*

<sup>23</sup> Kansolo atoa laghe tau vella Pita me Jon me lalu ghe oghi lao sio ta mene katoa tau ngaisesoaa, me lalu ghe aulia ngakapaaliiila inangariira namu ngatoa ta pristi etoa me namu ngatoa laghe auliaala etairarua.

<sup>24</sup> Nau laghe nongola, me nannaairaa ghe kateva nongala me laghe kakkaauaa sae tale kaluira nilooloo sae ta God va, "Vau palepale, ughe gheleila eunaakookoo me kosa ateva me manu etoa me isaa akapaaili voto etokatoka etana.

<sup>25</sup> Emua arau kapum Spirit Manga ateva ghe tau lao sio inangari eteva ta tuvuimami eteva, ia o kapum tau ngai uungu ia ta Deivit, me Deivit ghe uela va,

“Vaalua me tau ngeleka atoa esessaieiliila?

Vaalua me taumattu ngatoa la loeloe asease salana atoa, me karika God etautau vella va la ghelei?

<sup>26</sup> Kingi etoa tale kosa akapa ateva la ghaimonomonosiaa tani aiuvii  
me namu ngatoa la velvelu eitauaa  
tani tau sio Vau ngepona ateva  
me tani tau sio kapuna Mesaea ngateva.’

<sup>27</sup> Koronnaaili Herot me Pontius Paelat me katoa tau ngeleka me Israeli etoa, laghe velu eitauaala tale ia o masaliki taatara ataeae tani loe Iesu tani uvi ematea, ia o kapum tau ngai uungu eteva manga ia ughe suitoongainiela va ia Mesaea ia.

<sup>28</sup> Nau laghe gheleila isaa o voto laghe nim aimulisi teela nannaam me aloaloannaam. Tale sarasarakaniaam emua arau ughe suimatoongaala va isaa o voto aue elutu.

<sup>29</sup> Me ghaine, Vau eteva, urooroo tani annaa inangari isaa o laghe gheelei tani amatautuemami, me usausiemami kapum tau ngai uungu etoa, me ami rooroo tani ppooa ngasarasarakanina inangarin me karika ami mene matautu.

<sup>30</sup> Me urooroo tani saoaa nimam ta tau sessa atoa tani gheleila me la mene masina, me urooroo tani ghelei asease aimatoonga me mirikolo tale ararina ataeae Iesu, ia kapum tau ngai uungu eteva manga ia.”

<sup>31</sup> Nau eteva laghe ruula tani looloo sae, ale ateva laghe velu eitauaala etana ghe aisiisiaala, me laghe pasula tale Spirit Manga ateva, me laghe ppooa ngaotula inangarinia God. Laghe aippooa ngasarasarakanina me karika laghe maamatautu.

*Tau ngaisesoa ngatoa laghe aitauaala peirira*

<sup>32</sup> Ila akapa tau ngaisesoa ngatoa laghe kateva nonga ilala tale ninanna me nialoanna. Karika teva taumattu ghe ue va peina kanna nonga. Karika, isaa akapaaili voto laghe aitauaa elome etaira.

<sup>33</sup> Tale kinatama sarasarakanina atoa, apostolo atoa laghe aulia ngaotula tottotuaane Vau eteva Iesu. Me oroeilli maamasinaane God ghe tokala etaira akapa,

<sup>34</sup> me karika teva taumattu elome ta ngetairaa ghe tuutukuna tale inana me voto. Kasina taumattu kosaira me aleira laghe tau lao sio va la poli. Nau eteva laghe polipoli, isaa o viliki veu laghe ghaaghhaa laghe laolaoa

<sup>35</sup> ta apostolo atoa, me apostolo atoa laghe alkoita ta lo atoa laghe tuutukuna tale kasina voto.

<sup>36</sup> Kateva taumattu tale ararimangalina ateva Livae, ararina ataeae ta Josep, ghe lutula tale patunganua ateva eSaeparsi me ghe tokatoka ejerusalem, apostolo atoa laghe kolokolo Banabas etana (malloedea va tau ngai sausia ia tale masi ninannaa),

<sup>37</sup> ghe taula tuku kosane ateva me laghe poliela, me ghe ghaala viliki veu me ghe laoaa sio ta apostolo atoa.

## 5

*Ananaeas me Sapaera lalu ghe matela*

<sup>1</sup> Taita ateva ararina ataeae ta Ananaeas me vausenna ateva ta Sapaera, lalu ghe tau vella tuku kosairarua ateva laghe poliela.

<sup>2</sup> Ananaeas me vausenna ateva lalu ghe ghaa oghila kasina viliki veu. Ananaeas ghe laoaa sio nonga kasina viliki veu ta apostolo atoa.

<sup>3</sup> Vara me Pita ghe uela ta Ananaeas va, “Vaalua me utau vella Satana eapasula urunguitanim ateva me angu kamela Spirit Manga ateva, me angu ghaa oghila kasina aipolipoli tale kosa ateva?

<sup>4</sup> Nau ghe asoaso kosami ia, ughe ghelei aloannaam etana, me nau ughe aitauaeniela me laghe poliela, viliki veu ghe unem. Me vaalua me ughe aloannala tani mene ghelei evalua o? Karika ukamekame nonga taumattu ngatoa, ta ukamekame tee God.”

<sup>5</sup> Nau Ananaeas ghe nongola, ghe matela me ghe katuua. Kinatama nimatautu ghe ghaala taumattu ngatoa laghe nongola sa ateva ghe lutula.

<sup>6</sup> Vara me aliki taita atoa laghe kupi sso mae me laghe ghiisainiela me laghe sauvela, me laghe lao sio tani kaieinia.

<sup>7</sup> Koti erooroo kotolu aoa ghe lange sio me vausenna ateva ghe kupi ssola. Karika ghe kilala sa ateva ang ghe lutula.

<sup>8</sup> Pita ghe kolomiela va, “Auliaala etaghi, va isaa nonga oia aipolipoli tale tuku kosa ateva?”

Me ghe liula me ghe uela va, "Ue, nim isaa nonga o."

<sup>9</sup> Pita ghe uela etana va, "Vaalua amalu aloanna tani kame kapuna Spiriti eteva Vau eteva? Tarala! Lo atoa la lao sio tani kaiaa taitanim ateva, ila etapaa ngatamana, me aue la mene sau teeio."

<sup>10</sup> Me katengaata nonga ta vause ateva ghe matela me ghe katuula ta liue kkena Pita. Aliko taita atoa laghe sso mae me laghe saopiela ta ang ghe matela. Laghe sauela tani laa kaiaa valainia ta taitanna ateva.

<sup>11</sup> Kinatama nimatautu ghe lutula ta tau ngaisesoa ngatoa, me see ila lo atoa laghe nongola llo kiukiu.

#### *Asease voto ouna ghe lutula*

<sup>12</sup> Ta ngetaira apostolo atoa, oroeiili niaimatootoongana me mirikolo laghe gheelei. Tau ngaisesoa ngakapa atoa laghe tokatoka aitauaa tale varanda ngateva laghe asease Solomon etana.

<sup>13</sup> Lo atoa karika tau ngaisesoaa ila laghe maamatautu tani mae aitauaa tee tau ngaisesoa ngatoa, me karika, ta taumattu ngatoa laghe oneoneainila.

<sup>14</sup> Me oroeiili taita me vause laghe aiesoala ta Vau ngepona ateva laghe lao aitauaa tee sio kapuna atoa.

<sup>15</sup> Taumattu ngatoa laghe tarala oroeiili voto apostolo atoa laghe gheelei, o laghe sausau tau sessa atoa laghe ghoa aalokoila tapaa salana tale aisalo me tale komo va nau Pita ghe kasukasu emaemae, tootoona ateva ghe tulila.

<sup>16</sup> Oroeiili taumattu ngatoa tanganueira kalakalaa eJerusalem, laghe maemaeaa tau sessa atoa me lo atoa raroai etoa laghe ghelei saasakieinila, ila akapa laghe maamasina.

#### *Laghe atoka ssola apostolo atoa tale ale mata voovoo*

<sup>17</sup> Namu ngateva ta pristi etoa me kapuna akapa atoa, ila elome tale pati eteva ta Sadiusi, laghe nannahaa saasakiaa tee apostolo atoa.

<sup>18</sup> Liuna avalua o me laghe kunela apostolo atoa, me laghe atokaila ssola tale ale mata voovoo.

<sup>19</sup> Nau eleivoo ensolo ateva kapuna ia Vau ngepona ateva ghe otira atamana atoa tale ale mata voovoo ateva me ghe kupieinila ghoala. Me ghe uela va,

<sup>20</sup> "Am kasula, me am laa tingina tale ale ngeleka atiulu tale ale manga ateva me am ppoaa ta taumattu ngatoa inangari tale ia oia maulue ateva."

<sup>21</sup> Elue talaua poopoaa tale mene kateva nau laghe ssola tale ale ngeleka atiulu tale ale manga, nongina ensolo ateva ghe auliaala etaira, me laghe tiuuala tani apasunga ta taumattu ngatoa.

Vara me namu ngateva ta pristi etoa me kapuna atoa laghe kolo aitauaala kansolo atoa, namu ngatoa ta natuna atoa Israeli. Laghe suu lao sio inangari tale ale mata voovoo va la maeaa apostolo atoa.

<sup>22</sup> Nau polisi etoa tale ale manga ateva laghe rekataala tale ale mata voovoo, laghe tara luulala. Laghe oghi lao sio tani auliaa va,

<sup>23</sup> "Ale mata voovoo ateva kaakavati emasinaaili ia, tee tau ngai totoi etoa la tiitingina etapaa ngatamana. Nau ami otira karika ami tarala toa elome."

<sup>24</sup> Nau laghe nongola kiukiu namu ngateva ghe aitoiaa polisi etoa tale ale manga ateva, me namu ngatoa ta pristi etoa laghe annaa sossolaa va sa ateva aue elutu.

<sup>25</sup> Kateva taumattu ghe mae sio etaira me ghe uela va, "Am nongola! Taumattu am ghe atoka ssola tale ale mata voovoo, ila tale ale manga ateva la sso aapasunga ta taumattu ngatoa."

<sup>26</sup> Liuna avalua o, polisi etoa me lo ateva ghe aitoieinila laghe ssola tani kuneila, karika laghe karatainilala poli laghe maamatauta taumattu ngatoa, va la rau kumla arova la uvi apostolo atoa.

<sup>27</sup> Nau laghe maeainila sio tale liu niaisakei, namu ngateva ta pristi etoa ghe tiuuala tani kolomila.

<sup>28</sup> Ghe uela va, "Ami ghe tau aatu sio inangari sarasarakanva va karika am mene laa ghasungu see tale ararina atea ia o taumattu ngateva. Me karika, ta ngam ghele rooa ngakapa seela eJerusalem, me am aaliu teeiemamu va ami, ami ghe uvi emateela."

<sup>29</sup> Vara me Pita ghe ghaala liuira apostolo atoa tani liu inangariira, me ghe uela va, "Ami nongo usilaa nonga God me karika taumattu.

<sup>30</sup> Kapuira Goto ateva tuvuita atoa ghe totula Iesu tale nimate. Ia o am ghe avukalaie saela tale aikotoo.

<sup>31</sup> Ia God ghe asaesaeala me ghe atokaiela tale pai muenna ativilau va ia Vauita ia me tau

ngai asaangiita ia, tani taula ninna ngaioghioghiaa me nikkaluaa kaluira ssavoto Israeli etoa.

<sup>32</sup> Ami tee ami aauliaa voto oio, me tee Spirit Manga ateva, ia o God ghe nim taue lao sio ta lo atoa laghe nongo usilainiela.”

<sup>33</sup> Nau laghe nongola llo ghe sessailala etaira, me laghe aippooa ngaitauaala tani uvi ematela.

<sup>34</sup> Me kateva etaira ghe tingina saela, ararina ateae ta Gamaliel, ie tee Paresi ia, tau ngai aapasunga ia tale inangari nipaopao me taumattu ngakapa atoa laghe oneoneainia, ghe uela va, “Tau vellala me la kasu mua.”

<sup>35</sup> Me ghe uela etaira va, “Am taumattu nge Israeli etoa, am paniem arova am aaloanna tani ghelei righi voto etaira.

<sup>36</sup> Poli kasina nau ang ghe lange sio taumattu ngateva ghe tingina saela, ghe poppoaa va ia namuu ia, ararina ateae ta Tiudas. Ghe ghaala kapuna ghaata ai (400) taumattu. Me aRom atoa laghe uvi emateala me kapuna atoa laghe ilou reerekataa seela. Uunguaaira ghe nim kapala.

<sup>37</sup> Emuli etana, Jiudas nge Galili ghe mene kaurekatila, ta nau nimene ghelei sensis, me oroi taumattu ghe mene usiela. Vara me laghe mene uvi emateala. Me kapuna atoa laghe mene ilou reerekataa seela.

<sup>38</sup> Liuna avalua o me tale lo ateae oia niaisakei aghaauliaa etaimim va am tau vellala me la kasu, ta arova nim uunguaira taumattu ngatoa, aue enim peisaane.

<sup>39</sup> Va arova kanna God, karika am rooroo tani paola. Am rau nim aiuvii tee nonga God.” Me ila akapa laghe aimulu teela inangarinia Gamaliel.

<sup>40</sup> Laghe kolola apostolo atoa laghe kopi ssola, me laghe uela va la parula me laghe uela etaira va karika la mene laa ppooaa see tale ararina ateae Iesu, me laghe sungi vellala.

<sup>41</sup> Nau laghe kasula laghe masimasila, poli God ghe tarailala va la rooroo tani ghaa nimmarikana tale ararina ateae Iesu.

<sup>42</sup> Tale nau ekapaaili elome tale ale ngeleka atiulu tale ale manga ateva me tale ale akapaaili, apostolo atoa karika laghe ruula tani ppooaa me apasunga va Iesu Mesaea ia.

## 6

### *Ghaitu tau ngai sausi*

<sup>1</sup> Tale isaa o nau, disaepolo atoa ngila ghe ooroi me lo atoa etaira laghe samasamaa nge Grik laghe aauliuiliaa aHibru etoa ta poli karika laghe aikoita ngamasina voto ta kapuira vause rauve vulu etoa tale nau ekapa atoa.

<sup>2</sup> Liuna avalua o me kasangaulu ghalua (12) apostolo laghe kolo aitauaala tau ngaikaia ngakapa atoa me laghe uela etaira va, “Karika masina arova ami ruu tani ppooaa inangarinia ateva God me ami mae koita inana.

<sup>3</sup> Isaa avalua o tuemami me nengamami etoa, am tara elome etaimim ghaitu (7) taita pasu ila tale Spirit me alomasaanga, me ami suitoongainila tani ghelei ia o niuungu eteva,

<sup>4</sup> me ami uungua nonga tani looloo sae me tani ppooaa inangarinia God.”

<sup>5</sup> Isaa o inangari ghe masinala ta taumattu ngakapa atoa, me laghe asela Stipeni pasu ia tale niaikaiaa me Spirit Manga ateva, me Pilip, Prokorus, Nikano, Timon, Pamenas, Nikolasi atala nge Antioko ia, karika ajiu ia nau ghe lutula, vara me ghe aiesoala me ghe ajiola, me emulina ghe mene aiesoala ta Karisto.

<sup>6</sup> Laghe laoainila sio ta apostolo atoa, me laghe looloo saela me laghe saoaala nimaira etaira tani amangaila va la ghelei ia o niuungu eteva.

<sup>7</sup> Inangarinia ateva God ang ghe naanamuu me ejerusalem orioieili taumattu laghe aiesoala, me orioieili pristi tee atoa laghe nongo usilaala masi inangari.

### *Laghe kuneala Stipeni*

<sup>8</sup> Stipeni pasu ia tale sarasarakania me maamasinaane God. Ghe gheelei mirikolo me niaimatoonga sarasarakania elome tale taumattu ngatoa.

<sup>9</sup> Me katoa taumattu karika laghe laolao aitauua tee aloannaane Stipeni. Isaa o taumattu laghe velu eitauuaala tale kateva ale nivelu eitauua la kolokoloa va aleira ia lo atoa emua akasina karika laghe tokatoka tale aloannaaira. Isaa o taumattu atala nge Saerini ila me Aleksandria ila, me provinsi elua ta eSilisia me eEisia. Katoa ta ngetaira laghe sessaila ta Stipeni.

<sup>10</sup> Spirit Manga ateva ghe tau lao sio alomasaanga ta Stipeni, liuna avalua o me karika laghe rooroo tani apala inangari Stipeni ghe poppooaa.

<sup>11</sup> Kasina taumattu laghe polilala tani aikamea tee Stipeni va laghe nongoala ghe poppoaa saasakiaa ta Moses me God.

<sup>12</sup> Tale isaa o inangari, taumattu ngatoa laghe sessailala, me taumattu ngatoa me namu ngatoa me tau ngai aapasunga atoa tale inangari nipaopao laghe kunela Stipeni me laghe liaoainie sio ta Kansolo atoa.

<sup>13</sup> Laghe ghaala kasina taumattu va eakamea teeia, ila o taumattu ngatoa laghe uela va, "Ia oia taumattu ngateva enim toka aauliaa saasakiaa tee voto ateva oia manga ia me kanna inangari nipaopao Moses.

<sup>14</sup> Poli ami ghe nongola ta ghe uela va ia o Iesu atala nge Nasareti ia ghe uela va aue etturuu ale manga ateva me eakolikoliaa voto emua arau Moses ghe tau mae sio."

<sup>15</sup> Me taumattu ngatoa tale ia o nivelu eitaua ngateae laghe taatara lao sio ta Stipeni, me laghe tarala matane ghe nonginala ensolo ateva.

## 7

### *Inangarina Stipeni*

<sup>1</sup> Namu ngateva ta pristi etoa ghe kolomila Stipeni va, "Koronna llo oia?"

<sup>2-3</sup> Stipeni ghe liula me ghe uela va, "Tueghi me nengaghi me tamaghi etoa, am nongoaghi va God ateva pasu ia tale mallanga ghe rekataala ta tuvuita ateva ta Abraham nau eteva ghe tokatoka eMesopoteimia. Ghe uela etana va, 'Ukasu vuli tanganuem me kapum atoa, me ulao tale kosa ateva aue aghapasingainia etam.' Me auena ghe laa toka eHaran.

<sup>4</sup> "Me ghe kasu vulila tanganue aKaldia ngatoa me ghe lao sio tani toka eHaran, me varu tamane ghe matela me ghe mene mae sio tani toka tale kosa ateva oia am tokatoka etana.

<sup>5</sup> God karika ghe tau lao sio teva tuku kosa etana va ghe kanna. Karikaaili tuku teva. God ghe alokoila inangari nialokoi etana va ia me tuvuna atoa emuli etana aue la ghaa kosa ateva oia, arongona ta ia o nau eteva Abraham karika righi natuna.

<sup>6</sup> God ghe uela etana va, 'Aue tuvum atoa aue la ativuu tale mene kateae ppae masaliki me la nim tau ngai uuungu me taumattu ngatoa tale ia o masaliki eteae aue la ghelei saasakiaa etaira aue eroo ghaata ai (400) ninamanan.

<sup>7</sup> Me aue aghi aghattara matana lo ateva anua eghaaiala va la nim tau ngai uuungu.' Me God ghe mene uela va, 'Emulina aue la kasu vuli ia o anua ateva me aue la mene mae kkaueinaghi tale masaliki eteae oia.'

<sup>8</sup> God ghe gheleila inangari niaippooa ngaitauua tee Abraham tale ni-isoiso atea me Abraham ghe tamane iela Aisiki me vara ghaiut nau ghe lange sio me Abraham ghe isola Aisiki. Vara me Aisiki ghe natunala ta Jekop me Jekop ghe natunala kasangaulu ghalua (12) ghe tuvuitala.

<sup>9</sup> "Me tuena taita namu ngatoa Josep laghe nannaa saasakiaa teeia, liuna avalua o me laghe tau lao sio me ghe siola eljip me laghe ghaala aipolipoli, me God ghe tokatoka aitaauaa teeia,

<sup>10</sup> me ghe aasaangia tale isaa akapaaili voto sesa, me ghe tau lao sio alomasaanga etana va Peroo kingi nge Ijip ateva ghe maamasiaa uuunguaane me ghe gheleielia ghe namuula eljip me tale alena akapa ateva.

<sup>11</sup> "Vara me kinatama maloo ateva ghe lutula eljip me eKeinan me voto sesa ghe lutu teeilala, me tuvuita atoa karika laghe roola tani ghaa righi inana.

<sup>12</sup> Nau Jekop ghe nongola va inana eljip, ghe suula tuvuita atoa tani sio eljip tale aitiutiui ateva uneira nisio.

<sup>13</sup> Aiaaghaliene atea nisio, Josep ghe aulia ngaotula ta tuena atoa va ia see, me liuna avalua o me Peroo ghe kilala kapuna atoa.

<sup>14</sup> Josep ghe suula inangari va tamane ta Jekop me kapuna akapa atoa la sio. Ila akapaaili erooroo ghaitungaulu ghaliha (75) taumattu.

<sup>15</sup> Vara me Jekop ghe siola eljip, ia me tuvuita atoa laghe matela okae.

<sup>16</sup> Nau laghe matela laghe mene saeinilala eSekem tale liu niaikkaia ngateva Abraham ghe polie lao sio ta natuna atoa Hamor tale kasina ase viliki veu.

<sup>17</sup> "Nau ang ghe aakalakalaa va God ghe ghelei rooroaa inangari nialokoi ghe auliaala ta Abraham, me alsraeli etoa eljip laghe oroienaaili ila.

<sup>18</sup> Vara me kingi eteva ghe tam kilakila Josep ghe tiuaala tani aitoiaa eljip.

**7:2-3:** Aitiutiui 11:31; 12:1.    **7:5:** Aitiutiui 12:7; 15:18; 17:8.    **7:6:** Aitiutiui 15:13-14; Eks 12:40.    **7:7:** Eks 3:12.

**7:8:** Aitiutiui 17:9-14; 21:4.    **7:9:** Aitiutiui 37:11, 26-28; 39:1-3, 21-23.    **7:10:** Aitiutiui 41:37-44.    **7:11:** Aitiutiui

41:54; 42:1-2.    **7:13:** Aitiutiui 45:1-4, 16.    **7:14:** Aitiutiui 45:9-11; 46:27.    **7:15:** Aitiutiui 46:1-7; 49:33.    **7:16:**

Aitiutiui 23:2-20; 33:19; Jos 24:32.    **7:17:** Eks 1:7-8.

<sup>19</sup> Ghe tiuaala tani pae salana tani ghelei saasakiaa tuvura atoa me tani ghelei voto karika masina etaira. Tee ghe uela va la sau velu natuira aliki etoa me aue la mate.

<sup>20</sup> "Tale isaa o nau Moses ghe lutula. Masi taataaraane ta matane God me laghe aitarainiela elo ale erooroo kotolu (3) ulana.

<sup>21</sup> Me nau laghe ghaa velue ghoala eleka tanganueira, natuna vause ateva king ghe ghaaiela, me ghe aitarainiela va natuna ia.

<sup>22</sup> Ghe ghaa akapala alomasaangania nge Ijip me inangarina me gheeleiaane sarasarakananai.

<sup>23</sup> "Nau anna ninamanama ghe ghaatingaulua (40), ghe nnaala tani laa tara kapuna atoa, tuvuna atoa Jekop.

<sup>24</sup> Ghe tarala kateva aIsraeli, aljipi eteva ghe gheelei saasakieinia me ghe sausila kapuna ateva, me tani liu, ghe uvi ematela aljipi eteva.

<sup>25</sup> Ghe annaa va kapuna atoa aue laghe kila va God ang ghe tiitiuaa tani sausila tani asaangila tale niungu Moses ang ghe tiitiuaa tani ghelei, me aloira karika laghe maamasaanga.

<sup>26</sup> Mene kateva nau ghe mene tarala kapuna alua aIsraeli ilalua lalu ghe aaiuvii me ghe tootoongaala tani ghelei rungainilalua me ghe uela etairarua va, 'Amalua, aHibru nonga iemalua, me vaalu me amalu aaiuvieinamalu?

<sup>27</sup> "Me lo ateva ghe tiuaala tani aiuvii ghe bbi velu lao sio Moses me ghe uela etana va, 'See ghe uela va io unamu me ughelei niaiskei etaimami?

<sup>28</sup> Ualoanna tani uvi emateaghi nongina ughele uvi ematela aljipi eteva ghalailloo?"

<sup>29</sup> Nau Moses ghe nongola llo, ghe iloula eljip me ghe lao sio tani ativuu etoka eMidien me isaa okae me ghe natunala ghalua.

<sup>30</sup> "Nau ghaatingauluae (40) ninamanama ghe ruula me ensolo ateva ghe otuotula ta ngetana tale voto ateva karika righi taumattu etana kalakalaa ia tale motouru eteva eSaenae, tale ramerame kura atae ghe ataata ai erighi.

<sup>31</sup> Moses ghe soghiaala nau ghe tarala me ghe lao akalakalangina sio tale ai erighi tani tara amasinaia me ghe nongola lingi ngalonra ateva Vau eteva.

<sup>32</sup> Ghe uela va, 'Aghi kapuira Goto ieghi tuvum atoa me kapuna Goto ieghi Abraham, Aisiki me Jekop.' Moses ang ghe reterete poli ghe matautula, me karika ghe aloanna tani taatara lao.

<sup>33</sup> "Vau eteva ghe uela etana va, 'Ghaa vella unem aikasukasu ta kkem ta voto ateva uititingina etana, manga ia.

<sup>34</sup> Aghe tarala sesa nimmarikana kapughu etoa laghe ghaala eljip me ngaghe nongola ngangngalaara me ngasio mae tani ghaa vella tale karavusu. Mae sio me asungio me umene oghi sio eljip.'

<sup>35</sup> "Nim ie nonga o lo ateva Moses aIsraeli etoa laghe ratiela me laghe auliaa teeia inangari va, 'See ghe uela va unamu me ughelei niaiskei?' Ta God nonga, tale ensolo ateva eghe aotuotula etana tale ai erighi ghe ataata, ghe sungiela va ia namuu ia me tau ngai ghaa oghi ia.

<sup>36</sup> Ia ghe ghaa vellala eljip me ghe gheleila niaimatoongana me ase mirikolo atoa eljip me eRet Sii me ghaatingauluae (40) ninamanama tale voto ateva karika righi taumattu etana.

<sup>37</sup> "Ie nonga o Moses ghe uela ta Israeli etoa va, 'God aue etau aatu propete ateva aue enongina ghe atinginaieghi saela, elome ta ngetaimim.'

<sup>38</sup> Moses ghe tokatoka aitauaa teeila tale voto ateva karika righi taumattu etana, me ensolo ateva ghe sama teeila tale motouru eteva eSaenae me ghe ghaala inangari maulue tani asaoki etaita.

<sup>39</sup> "Me tuvuita atoa laghe tam nongo usilainiela me laghe ratiela me elome tale urunguitanira, laghe mene oghiaa lao sio eljip.

<sup>40</sup> Laghe uela ta Eron va, 'Gheleila righi kapuita goto me emuemueinita, poli ia oia taumattu ngateva ta Moses ghe kolo velutala eljip, karika ngami ghe kilala va sa ateva ang ghe lutula etana.'

<sup>41</sup> Isaa o nau laghe gheleila natu tootoo vulumakao arighi me laghe gheleila aiaavusu-vusuena etana, me laghe gheleila paka maakilkii eteva tani tau sae voto nimaira ghe gheleila.

<sup>42</sup> God ghe oghi vululala me ghe tau vellala tani kkaua voto elomarase. Isaa o voto ghe asokoila llo propete atoa laghe pitila tale uneira vuku va,

“ ‘Am Israeli etoa karika am ghe tau mae sio righi aiaavusuvusuena etaghi nau am ghe kasula ghaatingauluae (40) ninamanama tale voto ateva karika righi taumattu etana.

<sup>43</sup> Am ghe sausau see alena ale kandisi eteva kapuimim goto ateva ta Molok me kapuimim katto goto ateva ta Repan tootoo ateva am ghe gheleielia va am kkaueinia.

Liuna avalua o me aue atau veluem me la ghajiem sio eBabilon.’

<sup>44</sup> “Tuvuita atoa laghe tokatoka tee ale manga kandisi eteva ia o laghe sausaua see tani apasunga va God etokatoka elome etaira nau laghe kasukasu tale voto ateva karika righi taumattu etana. Laghe gheleielia nongina vaalua God ghe auliaala ta Moses me vaalua ghe tarala tootoona ateva.

<sup>45</sup> Mene kateva vituu ta tuvuita atoa laghe ghajieila, me nau Josua ghe mene aitarainilala, laghe sau teeie mae sio nau laghe mae sio tani ghia ia oia kosa ateva tale llo anua God ghe karati vellala. Ghe tokala o lomosina ta ghe laa ghia sio nau ta Deivit.

<sup>46</sup> God ghe masimasieiniela, liuna avalua o me Deivit ghe kolomila va eghelei teva ale aitokatokane kapuna Goto ateva Jekop.

<sup>47</sup> Me karika, ta Solomon ghe atulula alena ateva.

<sup>48</sup> “Me lo ateva Iaaili Epona karika etokatoka tale ale taumattu ngatoa la gheelei, nongina propete ateva ghe uela va,

<sup>49</sup> “Vau ngepona ateva ghe uela va, “Epona liu aitokatokaghi ia me kosa ateva, aiatingina kkegħi ia.

Sa ateva ale am mene anna tani atulu me ealegħi?

O saa mene teva voto aue aghainoana etana?

<sup>50</sup> Karika va nimagħi ghe gheleila isaa akapa o voto?” ’

<sup>51</sup> “Am aakorokorongana nannāaimim me urunguitaniimim me nongonongoaaimim nongina tau ngeleka atoa. Nau ekapa atoa karika am aaloanna tani nongo Spirit Manga ateva nongina tuvuim atoa.

<sup>52</sup> Am annaa teva propete tuvuim atoa karika laghe ghelei saasakiaa teeieila? Laghe uvi emate teela lo atoa laghe aaulia ngamuemua ngalokoi, maemaeaane lo ateva ghulughuluena ia. Me isaa oia nau ngam ghe aitaueiniela me ngam ghe uvi emateala.

<sup>53</sup> Am oia am ghe għala inangari nipaopao ensolo atoa laghe taula ta Moses me karika am aimuli tee!”

### *Laghe kumla Stipeni tale atu*

<sup>54</sup> Nau laghe nongola llo ghe sessai etinginailala me laghe aingeresia ngalungaluira etana.

<sup>55</sup> Me Stipeni, pasu ia tale Spirit Manga ateva, ghe taatara saela epona liu me ghe tarala mellangina ateva God me Iesu ghe tiitingina tale pai muenna ativilau ta God.

<sup>56</sup> Me ghe uela va, “Am tarala, ngatarala epona liu ange otiela me Natuna ateva Taumattu ngateva etiitingina tale pai muenna ativilau ta God.”

<sup>57</sup> Tale isaa o inangarina me laghe rrungi rungala talingaira me laghe aaore atingina me ila akapa laghe ilou lao sio etana.

<sup>58</sup> Laghe ae velue għoala tale masaliki taatara atae me laghe tiuaala tani kumua tale atu. Me lo atoa laghe nongoala laghe alokoila ghinnaniira ta liue kkena aliki taita ateva, Sol ta ngetana.

<sup>59</sup> Nau laghe kumkumua, Stipeni ghe looloo saela me ghe uela va, “Vau eteva Iesu, ughaq maamauluaaggi.”

<sup>60</sup> Me ghe suuiaala ta patu kkena me ghe sama anamuula me ghe uela va, “Vau eteva, urau mene annaa kaluira ssavoto.” Nau ghe aulia ngavaluela o me ghe asekanuela.

## 8

<sup>1</sup> Me Sol ie tee okae, me ta matane Sol, voto laghe gheleil teela Stipeni ghe tarala va masina.

### *Sol ghe tiuaala tani tturuu tau ngaisesoa ngatoa*

Tale nau eteva Stipeni ghe matela etana, laghe tiuaala o tani uvi saasakiaa tau ngaisesoa ngatoa eJerusalem. Liuna avalua o me tau ngaisesoa ngatoa laghe iloula eJerusalem me laghe lao sio tale masaliki etoa ejjudia me eSameria. Me apostolo atoa laghe tokala.

<sup>2</sup> Kapuna taita atoa laghe tani aikaaia ta God laghe kaiala Stipeni me laghe kaarasila tani ngalaia.

<sup>3</sup> Me Sol ghe tiuaala tani tturuu tau ngaisesoa ngatoa. Ghe kupikupi kateva kateva ale me ghe kunekevelu ghoa taita me vause atoa me ghe laa ghaatokaila sso tale ale mata vooovo.

*Pilipi ghe poppooaa eSameria*

<sup>4</sup> Lo atoa laghe ilou reerekataa seela laghe poppooaa inangarina ateva Iesu ta kona laghe laolao.

<sup>5</sup> Pilipi ghe lao sio tale kateae masaliki taatara eSameria me ghe ppooala Mesaea etaira.

<sup>6</sup> Oroi ila taumattu ngatoa nau eteva laghe nongola inangarina Pilipi, me laghe tarala niaimatootoongana ghe gheleila me laghe nongo amasinaailila inangari ghe auliaala.

<sup>7</sup> Laghe tarala Pilipi ghe tiu vella raroai etoa tale oroi taita me vause. Raroai etoa laghe aaore anamuu nau eteva laghe kupikupi vulu ghoa taumattu ngatoa. Me oroi ila lo atoa vilikiira matena me tangorengorena laghe masinala.

<sup>8</sup> Isaa avalua o me paka nimasimasi eteva ghe lutula elome tale ia o masaliki taatara ataeae.

*Saemon tau raroai ia*

<sup>9</sup> Kateva taumattu ghe tokatoka elome tale masaliki taatara ataeae, ararina ataeae ta Saemon, muennaaili ia tani ghelei nialala. ASameria ngatoa laghe soosoghiaa voto laghe taatara ta ghe gheeghelei, me ghe saasaea nannaa va ia namuu ia.

<sup>10</sup> Tau ngaitoitio etoa me nim taumattu ngatoa, ila akapa laghe nongonongo inangarina, me laghe ue va, "Taumattu ngateva oia sarasarakaniaa ngepona liu namungaili etana."

<sup>11</sup> Laghe nongononga poli orooiata laghe soosoghiaa nialala ghe gheelei.

<sup>12</sup> Me nau eteva Pilipi ghe poppooaa masi inangari tale ararimangalina ateva God me ararina ataeae Iesu Karisto, lo atoa laghe aikaiaia, taita atoa me vause atoa, laghe ghaala niaasuu.

<sup>13</sup> Saemon ia tee eghe aikaiaala me ghe ghaala niaasuu. Ghe aimuli teela Pilipi me ghe taatara kinatama niaimatootoongana me mirikolo Pilipi ghe gheelei me ghe soosoghiaa.

<sup>14</sup> Nau apostolo atoa eJerusalem laghe nongola va aSameria ngatoa laghe aikaiaala inangarina God, laghe suula Pita me Jon tani laa taraila.

<sup>15</sup> Nau lalu ghe rekatala, lalu ghe looloo saela ta God va Spirit Manga ateva esio ta aSameria ngatoa,

<sup>16</sup> poli Spiriti eteva karika ghe mae etaira. Laghe nim ghaala niaasuu tale ararina ataeae Vau eteva Iesu.

<sup>17</sup> Nau eteva lalu ghe ruula tani looloo sae, lalu ghe saoaala nimairarua etaira me laghe ghaala Spirit Manga ateva.

<sup>18</sup> Saemon ghe tarala va apostolo alua lalu ghe saoaala nimairarua etaira me laghe ghaala Spiriti eteva. Liuna avalua o me eghe ghaala viliki veu me ghe laoaa sio etairarua, me ghe uela va,

<sup>19</sup> "Amalu tau mae sarasarakania ateva ona tee etaghi, me arova asaoaa tee nimaghi ta toa taumattu, la roro tani ghaa Spirit Manga ateva."

<sup>20</sup> Pita ghe liula ta Saemon me ghe uela va, "Aue God eturungi eitauua teeio me unem viliki veu, poli unannaa va upoli tale viliki veu voto God enim tautau mae.

<sup>21</sup> Karika righi uunguaam tale niuungu eteva oia, ta nannaam karika ghulughuluena ta matane God.

<sup>22</sup> Unna ngaioghioghiaa me uvelu sesa ninanna me ulooloo sae ta Vau ngepona ateva va marova ealoanna, aue ekkaluaa isaa o sesa ninanna tale urunguitanim ateva.

<sup>23</sup> Ataataara va nannaam epasupasu tale nissaii, liuna avalua o ssavoto ateva ang ghele iri etokaiola."

<sup>24</sup> Vara me Saemon ghe uela va, "Amalu looloo sae ta Vau ngepona ateva me amalu aulieinaghi sae me isaa o voto amalu auliaala erau mene lutu etaghi."

<sup>25</sup> Nau lalu ghe ruula tani ppooa ngaotu inangarina ateva Vau ngepona ateva, lalu ghe kiriaa saela eJerusalem, lalu ghe kasu poppooaa elaa saesae masi kiukiu tale oroi masaliki eSameria.

*Pilipi me aItiopia ngateva*

<sup>26</sup> Kateva kapuna ensolo Vau ngepona ateva ghe uela ta Pilipi va, "Ukasu me ulao tale pai saot ativilau tale salana atikirighi karika righi taumattu etana, ia o salana atikirighi eksakusatu eJerusalem me esiosio eGaza."

<sup>27</sup> Pilipi ghe tiuaala tani kasu, ghe laolao me ghe soula taumattu nge Itiopia ngateva, namuu ia, uunguaane tani aitara isaa akapaaaili unna viliki veu Kandake, kuiini nge Itiopia ia. Ia o taumattu ngateva ghe saela tani kkaua eJerusalem,

<sup>28</sup> me ghe oghiaala tani lao tanganuena, ghe tokatoka epona tale ai-ilou eteva, me ghe ritiriti vuku eteva ta propete ateva ta Aisaea.

<sup>29</sup> Me Spiriti eteva ghe uela ta Pilipi va, "Ulaa kasu karanga tale unna ai-ilou eteva."

<sup>30</sup> Liuna avalua o me Pilipi ghe ilou lao sio tale unna ai-ilou eteva, me ghe nongola taumattu ngateva ghe ritiriti inangari tale vuku eteva ta propete ateva Aisaea. Me Pilipi ghe kolomiela va, "Vaaluua, ukilakila llo ona uritiriti?"

<sup>31</sup> Ghe uela ta Pilipi va, "Vaaluua akila, nau eteva karika teva tani asaoki tau mae me akila? Lau sae mae tale ai-ilou eteva me usae toka teeieghi."

<sup>32</sup> Namu ngateva ghe ritiriti inangari tale Uru ngai Manga ateva eue va,

"Laghe ghahaia lao sio tani uvia nongina sipsipi eteva,  
me nonginaaili tee natu sipsipi erighi nau la ghaaloanna tani sunapi velu uuna tale vilikina,  
karika ghe otilla paane ateva tani ppooaa righi inangari.

<sup>33</sup> Laghe gheleila ararina atae ghe siola eeu me ghe sesala. Karika laghe gheleie eghulughuluuenala unna naisakei eteae.

Isaa avalua o me karika aue la kiukiuaa natuna atoa,  
poli laghe ruula maamauluaane tale kosa ateva."

<sup>34</sup> Namu ngateva ghe kolomila Pilipi va, "Uauliaa etaghi va propete ateva oia ghe aauliaa see? Eaulieinia, o mene kateva ppae taumattu?"

<sup>35</sup> Vara me Pilipi ghe otilla paane ateva me ghe tiauala tani auliaa isaa o inangari tale Uru ngai Manga ateva me ghe auliaala masi kiukiuna Iesu etana.

<sup>36-37</sup> Lalu ghe ilou elaoalao tale salana atikirighi me lalu ghe rekatala tale ateo atae, me ghe uela namu ngateva oia va, "Tarala, ateo atae o. Vaaluua, karika urooroo tani asuuueghi?"\*

<sup>38</sup> Namu ngateva ghe auliaala ta lo ateva ghe iilouua ai-ilou eteva va etoka mua. Pilipi me namu ngateva lalu ghe kkure siola me lalu ghe siola tale ateo atae me Pilipi ghe asuuuela.

<sup>39</sup> Nau eteva lalu ghe lau sae mae tale ateo atae, kapuna Spiriti eteva Vau ngepona ateva ghe ghaala Pilipi me ghe kasueiniela. Namu ngateva ghe tam mene tara poila Pilipi. Ghe pasula tale nimasimasi poli ghe aiesoala ta God, me ghe lao sio tanganuena.

<sup>40</sup> Pilipi ghe rekataala tale masaliki taatara atae eAsotus, me ghe kasu ekapa seela tale mene kasina masaliki tani ppooaa masi inangari lomosi ta ghe laa rekata sio eSisaria.

## 9

### Sol ghe aikolikoliaala

<sup>1</sup> Tale isaa o nau Sol ghe kakkului tani uvi emate lo atoa laghe aaimuli tee Vau eteva. Liuna avalua o me ghe lao sio tani tara namu ngateva ta pristi etoa,

<sup>2</sup> me ghe kolomiela va epiti uru ngai me Sol esau sio ta namu ngatoya tale ale nivelu eitaua ngakapaailli eDamaskas. Me uru ngai eauliaa va arova Sol etara lo atoa, taifa me vause, la uusilaa salane Iesu, aue ekuneila me esaeainila tale ale mata voovoo ateva eJerusalem.

<sup>3</sup> Nau Sol ghe kasu vulila eJerusalem me ang ghe kalakalaa eDamaskas me arovaeaaata nonga ta mallanga ateva ghe sio mae epona liu me ghe akouela.

<sup>4</sup> Me Sol ghe katuu siola tapaa kosa me ghe nongola lingi ngalo ateva ghe uela va, "Sol, Sol, vaaluua me ugheelei saasakieinagh!"

<sup>5</sup> Me Sol ghe kolomila va, "Namu ngateva, io see?"

Lingi ngalo ateva ghe liula me ghe uela va, "Aghi Iesu ugheelei saasakieinagh."

<sup>6</sup> Totula me usso tale masaliki taatara atae me aue uso kila sa ateva aue ugheleia."

<sup>7</sup> Taita atoa laghe kasukasuu tee Sol laghe matautu etinginala me karika righi nisama etaira. Laghe nongola lingi ngalo ateva me karika laghe taatara teva taumattu.

<sup>8</sup> Sol ghe totu saela tapaa kosa me nau ghe otilla matane karika ghe roola tani tara teva voto. Liuna avalua o me laghe kunela nimane me laghe katulainie ssola eDamaskas.

<sup>9</sup> Kotolu nau ghe mata salusalula me karika ghe namanamala me karika ghe ropi poila.

<sup>10</sup> Kateva disaepolo eDamaskas, ararina atae ta Ananaeas, Iesu ghe sama teeielaa tale nitaatara atae, ghe uela etana va, "Ananaeas!"

Ananaeas ghe liula me ghe uela va, "Ue Vau eteva, aghi toko."

<sup>8:32:</sup> Ais 53:7-8.    <sup>8:36-37:</sup> Apol 10:47.    \* <sup>8:36-37:</sup> Kasina uru ngai laghe pitila laghe piti teela va, <sup>37</sup> Pilipi ghe liula me ghe uela va, "Arova uuaikaaiaa tale urunguitanm ateva, urooroo tani ghaa niaasuu." Namu ngateva ghe liula me ghe uela va, "Aghaaikaaiaa va Iesu Karisto Natuna ia God."    <sup>8:40:</sup> Apol 21:8.    <sup>9:1:</sup> Apol 8:3.

<sup>11</sup> Me Vau eteva ghe uela etana va, "Aimanomanosiaala me ukasu lao tale salana atikirighi la kolokoloa va Ghulughuluena etana, me tangantuena Jiudas ukolomi taumattu ngateva atala nge Tases ia, ararina atae ta Sol. Ia okae esso looloo sae,

<sup>12</sup> me tale nitaatara atae Sol ghe tarala taita ateva ararina atae ta Ananaeas ghe kupi ssola me ghe saoaala nimane etana me matana ghe mene taatarala."

<sup>13</sup> Ananaeas ghe liula me ghe uela va, "Vau eteva, oroi taumattu ghe auliaala etaghi kiununa Sol me voto sesa ghe gheleila ta kapum taumattu ngatoa ejerusalem.

<sup>14</sup> Me ghe sio mae oia eDamaskas ta ghe ghaala matutuulirena ta namu ngatoa ta pristi etoa tani kune lo atoa la kolokolo tau ararim atae."

<sup>15</sup> Vau eteva ghe uela ta Ananaeas va, "Lao sio poli ngaghe suoongainiela va ia aue eghelei uunguaaghi tani aulia ngaotu ararighi etae ta taumattu ngeleka atoa me kingi etoa me taumattu nge Israeli tee atoa.

<sup>16</sup> Aue aghapasunga etana va aue etani ghaa oroi nimmrikana ta poli ararighi etae."

<sup>17</sup> Vara me Ananaeas ghe lao sio me ghe ssola tale ale ateva Sol ghe tokatoka etana me ghe saoaala nimane ta Sol me ghe uela va, "Nengaghi Sol, Vau eteva esungieghila, ia o Iesu etana ghe aotuotula etam etapaa salana nau ughe mae siosio. Esungieghil mae sio etam va io urooroo tani mene taatara, me aue upasu tale Spirit Manga ateva."

<sup>18</sup> Arovaeata nonga ta llo arova vaka kko ghe kao vella ta matane Sol me ghe mene taatarala. Ghe totu saela me ghe ghaala niaasuu.

<sup>19</sup> Me nau eteva ghe namanamala me ghe mene sarasarakanala.

#### *Sol ghe poppoaa eDamaskas*

Sol ghe mene tokala kasina nau tee disaepolo atoa eDamaskas.

<sup>20</sup> Arovaeata ta ghe tiuala tani ppooaa Iesu tale aleira ale nivelu eitauaa, ghe aaulia ngeautu va Iesu Natuna ia God.

<sup>21</sup> Taumattu ngakapa atoa laghe nongola me laghe soghieiniela me laghe aippooaa elome etaira va, "Ia oia taumattu ngateva ghe uviuvi lo atoa ejerusalem la kolokolo tau ararina atae Iesu. Me ghe sio mae oia tani kune tau ngaisesoa ngatoa va esaemainila ta namu ngatoa ta pristi etoa."

<sup>22</sup> Me nau eteva Sol ghe poppoaa inangarina ateva Iesu, ghe tuttukueili ajiu etoa laghe tokatoka eDamaskas, me laghe soghiaala me karika laghe roola tani kaili ekamena va Iesu Mesaea ia.

<sup>23</sup> Oroi nau ghe lange sio me ajiu etoa laghe velu eitauaa me ngila ghe loeloe Sol tani uvi ematea.

<sup>24</sup> Me karika, ta Sol ghe kilala voto laghe loela. Ellaa me eleivoo laghe lollosainia tale issaa akapa paa ngatamana elome tale masaliki taatara atae tani uvi ematea.

<sup>25</sup> Kateva eleivoo, kapuna disaepolo atoa Sol laghe ghaala kinatama keru eteva me laghe kaaila Sol me laghe rekatila uasa eluekirighi, me laghe tau siola elekta tale valata me ghe kasula.

#### *Sol ghe saela ejerusalem*

<sup>26</sup> Nau eteva Sol ghe rekatala ejerusalem ghe tootoonga tani lao aitauaa tee disaepolo atoa, me ila akapa laghe maamatautainia ta karika laghe aaiesoaa va Sol ang ghe disaepolola.

<sup>27</sup> Vara me Banabas ghe mae sio tani sausia. Ghe ghaala Sol me ghe laoainie sio ta apostolo atoa tani aulia ngamasalika etaira vaalua Sol ghe tarala Vau eteva etapaa salana me Vau eteva ghe sama teeila, me ghe mene lao tee sio tani auliaa vaalua Sol karika ghe maamatautu tani ppooaa tale ararina atae Iesu eDamaskas.

<sup>28</sup> Liuna avalua o me Sol ghe toka aitauaa teeilala me ghe kasukusu ekapa see ejerusalem me karika ghe maamatautu tani ppooaa tale ararina atae Vau eteva.

<sup>29</sup> Sol me lo atoa ajiu ila la samasama nge Grik laghe aissakeanaala me ngila ghe loeloe tani uvi ematea.

<sup>30</sup> Nau katoa disaepolo laghe kilala, laghe sioaala Sol eSameria me laghe sungie lao sio eTases.

<sup>31</sup> Liuna avalua o me ale manga akapaaili ejidua, eGalilii me eSameria laghe tokala tale luei me Spirit Manga ateva ghe akorokoronganailala tani toka me tani tau sae Vau eteva, me ghe aisauseinilala me laghe oroieili ila.

#### *Aenias me Dokas*

<sup>32</sup> Nau Pita ghe kasu ekapa seela ghe lao tee sio eLida tani tara katoa kapuna taumattu God laghe tokatoka okae.

<sup>33</sup> Isaa eLida me ghe tarala taumattu ngateva ararina atae ta Aenias tangorengorena ia me ghe asola tale komo ghaoluae (8) ninamanama.

<sup>34</sup> Pita ghe uela etana va, "Aenias, Iesu Karisto aue eghelei emasinaio. Totu saela me ughou komom." Arovaengaili ta Aenias ghe totu saela.

<sup>35</sup> Taumattu ngakapa atoa laghe tokatoka eLida me eSeron laghe taraiela me laghe tuiuala tani aiesoaa ta Vau ngepona ateva.

<sup>36</sup> Isaa ejopa kateva disaepolo vause ia ararina atae ta Tabita (tale aseasea nge Grik, Dokas, mallooeana va, kateva ghaata kkema la aseasea va dia). Tale nau ekapaaili ghe gheleeli masi niuungu me ghe saasausi taumattu karika righi peiira.

<sup>37</sup> Tale isaa o nau Pita ghe tokatoka eLida, me Tabita ghe isikila me ghe matela. Laghe suusiela me laghe saeainiela tale ale ngepona atiulu.

<sup>38</sup> Ejopa kalakalangina ia eLida, liuna avalua o me nau disaepolo atoa laghe nongola va Pita eLida, laghe suila taumattu ngalua tani laa kolo Pita va emae parasi.

<sup>39</sup> Isaa arau o Pita ghe usiluelua. Nau lotolu ghe rekatala ejopa lotolu ghe saela epona tale ale ngepona atiulu me ghe tarala vause atoa raue vulu ila pasueili ila tale ale atiulu, me laghe tiitungina emua ta Pita me laghe ngangngala, me laghe aapasunga ghinna Dokas ghe gheleila nau maulue ia.

<sup>40</sup> Pita ghe sungi vella ghoala eleka me ghe suuaala tani looloo sae. Vara me ghe taatara lao sio tale vause ateva matena ia me ghe uela va, "Tabita, totu saela." Tabita ghe otila matane, me nau ghe tarala Pita me ghe totu etokala.

<sup>41</sup> Pita ghe posola nimane atelange me ghe sausielia tani tingina sae. Vara me ghe kolola vause atoa raue vulu ila tee mene katoa tau ngaisesoaa me ghe tau lao sio Tabita etaira maulue ia.

<sup>42</sup> Kiuki ghe rooaala ejopa me oroeiili taumattu ghe aikaaiala ta Vau ngepona ateva.

<sup>43</sup> Pita ghe mene tokala oroi nau ejopa tee taumattu ngateva ararina atae ta Saemon uunguaane tani kuluki viliki ghaata kkema tani gheleli mene kasina asease voto.\*

## 10

### *Konilies ghe kolola Pita*

<sup>1</sup> Isaa eSiisaria, taumattu ngateva, ararina atae ta Konilies, ghe tokatoka. Ia kateva namuu ghe muemuaa kateva ai (100) tau ngai uvii tale Kohot ateva laghe aseasea va Kohot nge Itali ia.\*

<sup>2</sup> Ia me vausenna ateva me natuna atoa laghe aikaaiaa ta God me laghe oneoneainia. Ghe tautau lao voto tale taumattu karika righi peiira me ghe looloo sae ta God nau ekapa atoa.

<sup>3</sup> KATEVA nau ta 3 kilok elo alai† ghe tarala kateva nitaatara. Ghe tarala kapuna ensolo ateva God ghe mae sio etana me ghe uela etana va, "Konilies!"

<sup>4</sup> Konilies ghe taatara lao sio etana me ghe matautula me ghe uela va, "Vau eteva, vaalua?"

Me ensolo ateva ghe uela etana va, "Unem nilooloo sae me masi uunguaam tale taumattu karika peiira, God ghe masimasiaala.

<sup>5</sup> Ghaine usuu righi taumattu tani lao ejopa me la laa kolo taumattu ngateva Saemon la kolokoloa va Pita etana.

<sup>6</sup> Etokatoka tee mene kateva Saemon uunguaane tani kuluki viliki ghaata kkema tani gheleli mene kasina asease voto, me alena ateva etokatoka kalakalangina ghoa elamana."

<sup>7</sup> Nau ensolo ateva ghe kasula, me Konilies ghe kolola ghalua tana kapuna tau ngai nongonongo anna me kateva kapuna tau ngai uvii ie tee ghe aaiesoaa ta Vau ngepona ateva,

<sup>8</sup> me ghe aulia ngakapala voto ghe lutula me ghe sungilotolla me laghe lao sio ejopa.

### *Unna nitaatara atae*

<sup>9</sup> Mene kateva elo sinaka, nau ngila ghe kalakalangina tale masaliki taatara atae ejopa, me Pita ghe saela epona tale ale ateva‡ tani looloo sae.

<sup>10</sup> Ghe maamaloo me ghe anna tani nama righi inana. Nau laghe aaimonomonosiaa inana me ghe tarala nitaatara atee.

<sup>11</sup> Ghe tarala epona liu ghe otelia me ghe tarala voto ateva namuu ia nongina tiulu kalio reerekati aighoughouna ghaata me ghe sio mae tale kosa ateva.

\* **9:43:** Voto atoa nongina aikasukasus, aikaaif ghinna, kou nguru, paisi, me mene kasina ase voto. \* **10:1:** Kohot nge Itali ia Tau ngai uvii tale Kohot nge Itali ia, ila atala nge Itali ila. † **10:3:** 3 kilok elo alai Ta inangari nge Grik, tale aiaaghasiona (9) ateva aoa. ‡ **10:9:** Ale atoa eisraeli karika righi pungane nongina ale ghaine.

<sup>12</sup> Elome etana asease ghaata kkena atoa me llo erarraa euu me ghila atoa la looloo elomarase.

<sup>13</sup> Vara me lingi ngalo ateva ghe uela va, "Pita! Totu saela me ughuvi emate llo me unama."

<sup>14</sup> Pita ghe liula me ghe uela va, "Karika poi arooroo, Vau ngepona ateva! Karika poi aghe nama righi voto karika raarangisana."

<sup>15</sup> Lingi ngalo ateva ghe mene mae sio ghaluene etana me ghe uela va, "Urau mene ue va karika raarangisana llo God ang ghe ghelei eraarangisanala."

<sup>16</sup> Ghe lutula kotoluuaata vara me arovaeeata ta kalio atiulu ghe mene saela epona liu.

<sup>17</sup> Nau Pita ghe annaa poi va saa mallooeana ia o nitaatara ataeae me taumattu Konilies ghe suula laghe tarala alena ateva Saemon me laghe tingina ssola tapaa ngatamana.

<sup>18</sup> Laghe kolokolola me laghe kolomila va, "Saemon Pita etokatoka oia?"

<sup>19</sup> Pita karika ghe ruu tani nmaa nitaatara ataeae me Spiriti eteva ghe uela etana va, "Saemon, taumattu kotolu lotolu paepaeo."

<sup>20</sup> Tingina saela me usio tarailotolu me urau mene rati tani usilotolu ta aghi asungilotolu."

<sup>21</sup> Pita ghe siola me ghe uela ta taita kotolu va, "Aghi oia, am paepaeaghi. Vaalua me am mae sio?"

<sup>22</sup> Taita kotolu lotolu ghe liula va, "Ami kasula tanganue Konilies, kateva namuu, tau ghulughuluena ia me eoneoneaa God. Taumattu nge Jiu ekapa atoa la oneoneainia. Ensolo manga ateva ghe auliaala etana va ekoloo me ulao tanganuena me ulaa ghauliaa saa llo voto aue uauliaa me aue enongo."

<sup>23</sup> Pita ghe uela etairotolu va, "Ita ghaso."

#### *Pita tale alena ateva Konilies*

Ghe pai saela ta mene kateva nau, me Pita me mene katoa tau ngaisesoa nge Jopa laghe usila taita kotolu me laghe kasula.

<sup>24</sup> Vara aiaaghluene ateva nau, laghe rekataala eSiisaria. Konilies ghe kolo aitauaala mangalina atoa me kapuna atoa, me laghe toitoi Pita.

<sup>25</sup> Nau eteva Pita ghe maemae, Konilies ghe souela me ghe suuiala ta liue kkena tani oneoneainia.

<sup>26</sup> Pita ghe kune atinginaie saela me ghe uela etana va, "Tingina saela! Aghi nim taumattu ieghi nongina io."

<sup>27</sup> Nau lalu ghe samasama, me lalu ghe kupi ssola me Pita ghe tarala oroi taumattu ngatoa ngila ghe velu etauaala.

<sup>28</sup> Ghe uela etaira va, "Am kilakilaaili uneimami inangari nipaopao va ajiu etoa karika la rooroo tani aighui tee tau ngeleka atoa me tani laa taraila. Me God ghe apasungaala etaghi va karika amene ue va kasina taumattu karika raarangisana.

<sup>29</sup> Liuna avalua o me nau eteva am ghe suula inangari etaghi va amae, karika aghe ratila tani mae. Erooroo va am auliaa vaalua me am ghe uela va amae?"

<sup>30</sup> Konilies ghe liula me ghe uela va, "Kotolu nau ang ghe lange sio, aghe tokatoka tanganueghi me ta 3 kilok elo alai, § nongina ghaine, aghe looloo sae me taumattu ngateva ghinnanina ghe maamallanga ghe tinginala emua etaghi.

<sup>31</sup> Me ghe uela etaghi va, 'Konilies, unem nilooloo sae me masi uunguaam tale taumattu ngatoa karika peiira, God ghe masimasiaala.

<sup>32</sup> Usungi righi taumattu elao ta Saemon Pita ejopa etokatoka tanganuena Saemon uunguane tani kuluki viliki ghaata kkena tani ghelei mene kasina asease voto, me alena ateva etokatoka akalakalangina ghoa elamana.

<sup>33</sup> Liuna avalua o me arovaeeata ta aghe suula inangari etam me masinaaili etam ta angu mae sio. Vau ngepona ateva aue etoka aitaua teeita nau eteva uauliaa sa ateva ghe sungiola tani mae auliaenia me ami nongoa."

<sup>34</sup> Vara me Pita ghe tiuala tani aippooaa, ghe uela va, "Ghaine ngatarala va koronna God karika eaaimassiaa.

<sup>35</sup> Me tale isaa akapaaili patunganua namuu, God ealoanna lo atoa la oneoneaa nonga God, me la gheelei voto masina.

<sup>36</sup> Am kilakila inangarina God ghe suula ta taumattu nge Israeli etoa, masi inangari va luei ekasu ta Iesu Karisto, ia Vau ia tale ila akapaaili taumattu ngatoa.

<sup>37</sup> Am kilakila sa ateva ghe ailtuuala ejudia. Jon ghe aippooaa tale niaasuu eteae, me emulina, Iesu ghe tiuala tani uungu eGalilii.

<sup>38</sup> Me am kilakila vaalua God ghe tau lao sio Spirit Manga ateva me sarasarakanata ta Iesu aNasareti ia, me vaalua ghe kasu ekapa seela me ghe gheeghelei masi niuungu me ghe gheeghelei emasina lo atoa taumattu sesa taumattu ngateva ghe ghelei saasakieinilala, ta poli God ghe tokatoka teeia.

<sup>39</sup> "Ami, ami ghe tara akapala voto ghe gheleila tale masalikiira ajiu etoa me ejerusalem. Laghe avukalaie saela tale ai eteae tani uvi ematea.

<sup>40</sup> Tale aiaakotonna ateva nau, God ghe totuela tale nimate va taumattu ngatoa la tarai.

<sup>41</sup> Karika va ila akapa taumattu ngatoa laghe taraiela ta llo nonga atoa God ang ghe suitoongainilala. Nau ghe totula tale nimate, ami, ami ghe namanama me ami ghe ropi teeielaa.

<sup>42</sup> Ghe uela etaimami va ami ppooaa ta taumattu ngatoa me aulia ngaotu etaira va ia God ghe suitoongainiela va eghelei niaisakei ta lo atoa sakesake ila me lo atoa matena ila.

<sup>43</sup> Ila akapa propete atoa laghe aaulieinia va lo atoa la ghairesoaa etana God aue ekkaluaa kaluira ssavoto tale ararina ateae Iesu."

<sup>44</sup> Nau eteava Pita ghe poppoaa isaa o inangari me Spirit Manga ateva ghe sio mae ta lo akapa atoa laghe nonganongo isaa o inangari.

<sup>45</sup> Tau ngaisesoa ngatoa isoisona ila laghe mae aitauaa tee sio Pita laghe soghila tani tara va Spirit Manga ateva ghe sio mae tee ta taumattu ngeleka atoa.

<sup>46</sup> Laghe nongolala ta laghe aippooaa tale asease nisama karika samasama tanganueira me tee laghe tautau sae God.

Me Pita ghe uela va,

<sup>47</sup> "Teva erooroo tani ue va isaa oia taumattu erau mene ghaa niaasuu tale manu? Poli ngila ghaala Spirit Manga ateva nongina ita."

<sup>48</sup> Me Pita ghe uela va la ghaa niaasuu tale ararina ateae Iesu Karisto. Me laghe kolomila Pita va emene toka teeila mua mene righi nau.

## 11

### *Pita ghe auliaala malloeana voto ghe gheleila*

<sup>1</sup> Vara me apostolo atoa me tau ngaisesoa ngakapa atoa ejidua laghe nongola va taumattu ngeleka atoa tee laghe aikaaiala inangarina ateva God.

<sup>2</sup> Liuna avalua o me nau Pita ghe saela ejerusalem lo atoa isoiso ila tau ngaisesoa ila laghe sama anamuu teeielaa,

<sup>3</sup> me laghe ue va, "Io ughe lao sio tanganueira lo atoa karika isoiso ila me ughe namanama teeilala."

<sup>4</sup> Me Pita ghe tiuuala tani aulia ngamasalika saa voto ghe lutula.

<sup>5</sup> "Aghe tokatoka tale masaliki taatara atea ejopa me aghe looloo sae me aghe tarala nitaatara atea. Aghe tarala voto ateva namuu ia nongina tiulu katio reerekati aighoughouna ghaata me ghe kasula epona liu me ghe sio mae nongina aghe tokatoka.

<sup>6</sup> Nau aghe taatara ssola elome tale katio atiulu aghe tarala asease ghaata kkena atoa, lo atoa ita aaitarinila me lo atoa karika ita aitarainila, me llo erarraa eeu me ghila atoa la looloo elomarase.

<sup>7</sup> Vara me aghe nongola lingi ngalo ateva ghe ue etaghi va, 'Pita, utotu me ughuvi emate llo me unama.'

<sup>8</sup> "Aghe liula me aghe uela va, 'Karika poi, Vau ngepona ateva! Karika poi aghe nama righi voto karika raarangisana.'

<sup>9</sup> "Lingi ngalo ateva ghe mae sio epona liu ghe mene aippooala ghaluene me ghe uela va, 'Urau mene ue va karika raarangisana llo God ang ghe ghelei eraarangisanala.'

<sup>10</sup> Llo oia ghe lutula kotoluata me isaa akapa llo ghe mene saela epona liu.

<sup>11</sup> "Karika masau me taita kotolu laghe sungilotolla eSiisaria tani mae taraiieghi, lotolu ghe mae sio tale ale ateva ami ghe tokatoka etana.

<sup>12</sup> Me Spiriti eteva ghe uela etaghi va, 'Urau mene rati tani usilotolu ta aghi aghe sungilotolla,' me isaa toko ghaonomo (6) kapughu laghe usiegħila ami ghe kupi ssola tale alena ateva taumattu ngateva.

<sup>13</sup> Ghe auliaala etaimami vaalua ghe tarala ensolo ateva ghe lao sio tanganuena me ghe uela va, 'Suula inangari ta Saemon la kolokoloa va Pita etana, ia ejopa.'

<sup>14</sup> Ia aue emaeaa inangari egheleio me lo atoa tee tanganuem aue am saanga.'

<sup>15</sup> "Nau eteva aghe tiuala tani aippooaa, Spirit Manga ateva ghe sio mae etaira nongina ghe sio mae etaita nau ta Pentikos.

<sup>16</sup> Me aghe annaala sa ateva Vau ngepona ateva ghe aulieiniela nau ghe uela va, 'Jon ghe aasuu taumattu tale manu me am ae am ghaa niaasuu tale Spirit Manga ateva.'

<sup>17</sup> Liuna avalua o me poli God ghe tau lao sio kateva nonga ia voto ateva karika ita polipolia nongina ang ghe tauve mae sio etaita lo atoa ita aikaiaa ta Iesu Karisto, aghi tee karika arooro tani ghelei runga unguaane God."

<sup>18</sup> Nau eteva laghe nongo avaluela o karika laghe mene auliaala righi voto. Ta ngila ghe nim tautau sae God me laghe ue va, "God ange tau lao sio ninna ngaioghioghiaa ta taumattu ngeleka atoa va la kiri mae etana me la saanga."

### Ale manga eAntiok

<sup>19</sup> Nau eteva lo atoa laghe ilou reerekata seela nau laghe ubi ematela Stipeni, laghe lao sio arau tale distriki eteva ePoenia me patunganua ateva eSaeparsi me tale masaliki taatara eAntiok tale provinsi eteva eSiria me laghe poppoaa ta ajiu nonga atoa.

<sup>20</sup> Katoa etaira atala nge Saeparsi ila me tale masaliki taatara ateeae eSaerini laghe lao sio eAntiok me laghe tiuala tani ppooaa ta aGrik tee atoa. Laghe aauliaa masi inangarina Vau eteva Iesu.

<sup>21</sup> Sarasarakaniaane Vau eteva ghe tokatoka teeila, mausina avalua o me orioeili taumattu ghe aikaiaala me laghe kiri mae sio ta Vau eteva.

<sup>22</sup> Tau ngaisesoa ngatoa eJerusalem laghe nongola voto o me laghe suula Banabas tani lao eAntiok.

<sup>23</sup> Nau eteva ghe rekatala me ghe tarala vaalua maamasinaane God namungaili, ghe masimasicilila me ghe asarasarakailala tani toka akorokorongana ta Vau eteva tale urunguitaniira.

<sup>24</sup> Ia masi taumattu ia me pasu ia tale Spirit Manga ateva me korokorongana ia tale niakaiaia, me orioeili lo atoa laghe mene sso mae tani aimuli tee Vau eteva.

<sup>25</sup> Vara me Banabas ghe lao sio eTases tani pae Sol.

<sup>26</sup> Nau eteva ghe taraiela ghe koloala me ghe laoainie sio eAntiok. Tale kasangaulu ghalua (12) ulana lalu ghe toka teela ale manga atoa me lalu ghe aapasunga inangarina ateva God ta oroi taumattu ngatoa. Me isaa eAntiok laghe ase akasinala disaepolo atoa va Kristen ila.

<sup>27</sup> Tale isaa o nau katoa propete laghe kasula eJerusalem me laghe sio mae eAntiok.

<sup>28</sup> Kateva etaira, ararina ateeae ta Agabas, ghe tinginala tale korokoronganiaane Spiriti eteva me ghe aulia ngaotula va maloo ateva sesaaili ia aue erooa ngakapa kosa ateva, me nau Klaodies Siisa ghe aaitoiaa eRom, maloo ateva ghe lutula.

<sup>29</sup> Nau laghe nongola inangarina Agabas, laghe annaala va la sausi lo atoa ejudia, me kateva kateva ta disaepolo atoa laghe aisokosokoala viliki veu tale aloannaaira.

<sup>30</sup> Banabas me Sol lalu ghe ghaala viliki veu me lalu ghe laoaa sio ta namu ngatoa tale ale manga eJerusalem.

## 12

### Laghe ubi ematela Jeimis, me Pita laghe atokae ssola tale ale mata voovoo

<sup>1</sup> Isaa o nau king Herot ghe tiuala tani kune katoa tale ale manga, tani ghelei saasakieinila.

<sup>2</sup> Ghe auliaala me laghe sai pulela alona atiulu Jeimis tuena Jon tale baenata ateva.

<sup>3</sup> Nau Herot ghe tarala va ajiu etoa laghe masimasiciala llo ghe gheleila, me ghe mene auliaala me laghe mene kunela Pita, tale nau nivelu eitaua ngateae tani nama verete karika righi isti etana.

<sup>4</sup> Ghe atoka ssola Pita tale ale mata voovoo me ghe atinginala kasangaulu ghaonomo (16) soldia laghe aaijoli tani aitoeinia, ghaata mua soldia ta kateae nittoitoi. Herot ghe anna va eaisakei tale tummatavanga nau Pasova eruu.

<sup>5</sup> Nau Pita ghe tokatoka tale ale mata voovoo me tau ngaisesoa ngatoa tale ale manga laghe looloo asarasarakana sae ta God va esausia.

### Pita ghe kupi ghoala tale ale mata voovoo

<sup>6</sup> Ia o voo ngateva me ghe pai Herot ghe atinginala emua ta mata ngoroi etoa me ghe aiskei, Pita ghe aseasekanua ta mallomeiraruu soldia ngalua iriiri ia tale sene alua, me mene ghalua soldia lalu ghe aaitoiaa atamana ateeae. <sup>7</sup> Vara me kapuna ensolo ateva Vau ngepona ateva ghe rekatala me mallanga ateva ghe lutula tale ale mata voovoo me ensolo

ateva ghe posola usuena ativilau Pita tani angunia me ghe uela etana va, "Totu parasila," me sene alua lalu ghe kao vellaluelu ta nimane.

<sup>8</sup> Me ensolo ateva ghe uela etana va, "Asaela ghinnanim me unem aikasukasu ta kkem." Me Pita ghe gheleila llo ensolo ateva ghe auliaala. Vara me ensolo ateva ghe uela va, "Uasae unem aiaasae ngeleka ateva me uaimuli teeieghi."

<sup>9</sup> Liuna avalua o me Pita ghe kasu vulila ale mata voovoo atiulu me ghe aimuli teela ensolo ateva. Ghe annaa va ghe nim asoasopoi. Karika ghe kilakila va isaa o voto ghe lutulutu ekoronna.

<sup>10</sup> Lalu ghe laula aitiutu eteva soldia ghe toitoi atamana atae me mene aiaaghaliene ateva me lalu ghe rekatala tale atamana atae aeana ia tale ale mata voovoo tale ia o masaliki taatara atae, me ia o atamana atae ghe otiela, karika teva ghe otiela, me lalu ghe kupi ghoala. Lalu ghe kasu tee siola tale mene katikirighi salana, vara me arovaeaata nonga ta ensolo ateva ghe kasu vulila Pita.

<sup>11</sup> Vara me Pita ghe vira kilala sa ateva ghe lutula etana me ghe uela va, "Koronnaaili Vau ngepona ateva esuula kapuna ensolo ateva tani sio asaangieghi ta nimane Herot me voto Ajiu etoa la ghanna tani ghelej etaghi."

<sup>12</sup> Ghe tinginala ghe nnaala mua me ang ghe laolao tanganue Meri kinna ia Jon, kateae ararina ta Mak, nongina oroi taumattu ghe velvelu eitauua tani looloo sae.

<sup>13</sup> Ghe mirimirila tale atamani ngeleka atae me vause ateva Roda etana tau ngai nongonongo anna ia ghe ghoa mae tani nongo.

<sup>14</sup> Nau eteva ghe nongo kilala lingi ngalonha ateva Pita ghe masimasi etinginala me karika ghe otila atamana atae ta ghe ilou ssola elome me ghe uela ta taumattu ngatoa va, "Pita eleka tale atamana atae eghoa tiitingina."

<sup>15</sup> Me laghe ue teejela va, "Angu veeveela?" Me nau ghe sarasarakanu tani auliaa me laghe nnaala va, "Koti kapuna ensolo ateva okae."

<sup>16</sup> Pita ghe mene mirimirila me laghe ghoala tani oti atamana atae me laghe soghiaala tani tarai.

<sup>17</sup> Me Pita ghe paopaoa ta nimane va la rau mene sama, me ghe auliaala sa ateva ghe lutula me vaalua Vau ngepona ateva ghe ghaa velue ghoa mae tale ale mata voovoo, me ghe uela etaira va, "Am auliaa ta Jeimis me mene katoa kapuita, sa ateva ghe lutula." Me ghe mene lao ppae sio.

<sup>18</sup> Vara ghe paila me soldia ngatoa nannaairaa ghe aisavisavilaala me ngila ghe aakolomieiniila va, "Sa ateva ghe lutula ta Pita?"

<sup>19</sup> Herot ghe uela va la laa paea. Nau eteva karika laghe roola tani tarai, ghe kolomila soldia ngatoa laghe aaitoieiniela, me karika laghe roola tani liu, me ghe uela va la uvi ematela.

### *Matemateaane Herot*

Vara me Herot ghe kasula ejjudia tani mene laa toka tau eSisiaria.

<sup>20</sup> Herot ghe sessaia ta taumattu nge Taer me Saedon, me laghe aloannala luei etana, poli laghe ghaagħha inana tale llo masaliki king ghe aaitaraa. Liuna avalua o me katoa etaira laghe mae aitauua sio me laghe siola tani tarai. Laghe lao akasina sio ta Blastus, ia ghe aaitaraa tangantuena king, va ghe sausila, me laghe vira lao sio tani tara king.

<sup>21</sup> Tale nau eteva laghe suoingainiela, Herot ghe asaela ase aiaasae ateva tani apasunga va ia kingi ia me ghe tokala tale unna aitokatoka ateva uneira ia kingi etoa me ghe gheleila kateva niaippooaa ta taumattu ngatoa.

<sup>22</sup> Me taumattu ngatoa laghe aaore tani ue va, "Karika va lingi ngalo taumattu ia, ta lingi ngalo goto ia."

<sup>23</sup> Arovaeaa nonga ta kapuna ensolo ateva Vau ngepona ateva ghe taula sessa ateva etana me ttolli etoa laghe nama amateala, poli taumattu ngatoa laghe kaakaeinia tani arueinia me karika ghe tautau sae ararina atae God.

<sup>24</sup> Me masi inangarina ateva God ang ghe laolao akapa see me ang ghe piipinosa anamuu.

<sup>25</sup> Banabas me Sol lalu ghe ruula uunguairarua tani taula viliki veu ejerusalem me lalu ghe mene lao sio eAntiock me lalu ghe kolo teela Jon Mak.

## 13

*Tau ngaisesoa ngatoa laghe suula Banabas me Sol tani laa ppooaa*

<sup>1</sup> Tale ale manga ateva eAntiok katoa propete me tisa laghe aapasunga masi nitoka God ghe aloanna: Banabas, me Simion, mene kateae ararina ta Niger,\* me Lusias aSaerini ia, me Sol, me Manain, lalu ghe namu ngaitauaala me Herot, gavana ia.

<sup>2</sup> Kateva nau laghe kakkaua Vau ngepona ateva, me laghe naenae, me Spirit Manga ateva ghe uela va, "Am amanga Banabas me Sol me lalu ghelei niuwungu eteva oia, aghe suitoongainilaluela tani gheleia."

<sup>3</sup> Liuna avalua o me nau laghe mene naela me laghe looloo saela, me laghe saoaala nimaira etairaru, me laghe sungilaluela tani kasu.

#### eSaepras

<sup>4</sup> Spirit Manga ateva ghe sungi taulalue ghoala eSeleusia, lalu ghe aikaaila me lalu ghe lao sio tale patunganua ateva eSaeprasi.

<sup>5</sup> Nau eteva lalu ghe rekatala tale masaliki taatara ateeae eSalamis, lalu ghe ppooala inangarina ateva God elome tale aleira ale nivelu eitauaa ajiu etoa. Jon Mak ghe toka teelaluela tani sausilalu.

<sup>6</sup> Lotolu ghe kasu ekapa seela tale patunganua ateva me lalu ghe mae sio ePapos. EPapos lalu ghe tarala kateva ajiu, tau nigheli nialaala ia me propete kamekame ia, ararina ateeae ta Bar-Jesu.

<sup>7</sup> Ia oia taumattu ngateva ghe tokatoka tee gavana ngateva, ararina ateeae ta Sejias Polus. Gavana tee alomasaanga ia. Ghe kolola Banabas me Sol ta ghe aaloanna tani nongo inangarina God.

<sup>8</sup> Ia o ase taumattu ngateva ghe ghelei nialaala, tale inangari nge Grik la aseasea arariira ateeae ta Elimas. Elimas ghe aloanna tani ghelei saasakiaa uunguairarua Banabas me Sol, ta karika ghe aloanna va gavana ngateva eaisoaa ta Iesu.

<sup>9</sup> Me Sol, mene kateae ararina ta Pol, pasu ia tale Spirit Manga ateva, ghe alumila Elimas me ghe uela va,

<sup>10</sup> "Io natuna io Satana. Me tau ngai ssateeira io voto llo ghulughuluena! Me isaa akapa gheeleia nikamekame me ssavoto epasupasu etam. Erooro va uruu tani ghelei saasakiaa salane Vau ngepona ghulughuluena?

<sup>11</sup> Ghaine nimane atelange Vau ngepona ateva esae etam, me umata salusalu. Karika aue utara sinaka ateva me aue utoka mala ngaluse nau."

Pol ghe nim ruuruu poi tani auliaa me matane Elimas ghe saurorromienala me ghe mata salusalula me ang ghe paepae teva taumattu tani posoa me ekatulainia.

<sup>12</sup> Nau eteva gavana ngateva ghe taraiela, ghe aiesoala, me ghe soghiangailiila kanna niapasunga Vau ngepona ateva.

#### Banabas me Pol lalu ghe lao sio tani ppooaa eAntiok elome ePisidia distrik

<sup>13</sup> Pol me kapuna atoa laghe kasu vulila ePapos, me anua ateva ghe kaaillala me laghe lao sio tale masaliki taatara ateeae ePerga tale provins ateva ePampilia. Me Jon Mak ghe oghi vululaluela me ghe oghi lao sio ejerusalem.

<sup>14</sup> Lalu ghe kasu vulila ePerga, me laghe kasu lao sio eAntiok elome ePisidia Distrik. Me ta nau manga ateva, laghe kopi ssola tale aleira ale nivelu eitaua ngateva ajiu etoa me laghe toka siola.

<sup>15</sup> Vara katoa laghe ruula tani riti inangari tale inangari nipaopao me propete atoa me namu ngatoa tale ale nivelu eitaua ngateva laghe suula inangari ta Pol me kapuna atoa va, "Kapuimami etoa, marova righi inangari niasarasarakana am aaloanna tani auliaa etaimami, masina am rooroo tani sso auliaa."

<sup>16</sup> Pol ghe tingina saela me ghe paolala tale nimane atelange va karika la mene toka samasama, me ghe uela va, "Am Israeli etoa me am tau ngeleka atoa am tautau sae ararina ateeae God, am nongoagh!

<sup>17</sup> Kapuira Goto ateva Israeli etoa, ghe suitoongaala tuvuita atoa va kapuna ila. Me nau eteva laghe kasu vulila kosaira me laghe siola eljip, ghe gheleilala laghe oroienaailliila. Vara me tale sarasarakanianae, ghe mene ghaa vellala eljip.

<sup>18</sup> Me nau eteva laghe tokala tale voto ateva karika righi taumattu etana, karika ghe liula sesa ta ngetaira erooro ghaatingauluae (40) ninamanama.

<sup>19</sup> Ghe tturuula ghaitu (7) ararimangali nge Keinan, me ghe tau lao sio isaa o kosa va ekosaira kapuna atoa.

<sup>20</sup> Isaa akapa voto o ghe lutula erooro ghaata ai me ghalimangauluae (450) nina-manama.

\* **13:1:** Niger Tale inangari nge Latin, malloeanva va veroveronganva. **13:2:** Apis 9:15. **13:3:** Apis 6:6. **13:5:** Apis 12:12; 15:39. **13:11:** Apis 9:8. **13:13:** Apis 15:38. **13:17:** Eks 1:7; 6:6; 12:51. **13:18:** Nam 14:34; Diut 1:31-32. **13:19:** Diut 7:1; Jos 14:1. **13:20:** Aitoi 2:16; 1 Sam 3:20.

“Vara me God ghe tau lao sio kapuira namu ngatoa tani aitarainila erooroo nau eteva propete Samuel ghe tinginala.

<sup>21</sup> Vara me taumattu ngatoa angila ghe kookolomi teva kingi, me God ghe tau lao sio Sol natuna ia Kish, tale ararimangali eteva ta Benjamin. Ghe aitarainilala ta ghaatingaulue (40) ninamanama.

<sup>22</sup> Vara ghe ghaa vella Sol, me ghe gheleila Deivit ghe kingila. Ghe auliaa tootoongaala va, ‘Ngatarala Deivit, natuna ia Jesi, ia lo ateva taumattu aghaloannaaililia tale urunguitanighi eteya. Ia aue eghelei ekapa voto aghaloanna va eghelei.’

<sup>23</sup> \*Nongina God ang ghe auliaala tale inangari nialokoi, va ghe tau lao sio tau ngai asaangi eteva ta Israeli etoa, tuvuna ia Deivit, Iesu etana.

<sup>24</sup> Auena Iesu ghe mae, Jon ghe ppooala ninna ngaioghiohgiaa me niaasuu ta taumattu nge Israeli ekapa atoa.

<sup>25</sup> Jon ang ghe maemae ta ghe ruu uunguaane, me ghe uela va, ‘Am annaa va aghi see etaghi? Karika va aghi Mesaea am toitoia. Karika, ia eaaimuli etaghi, me aghi karika tani masina aghi tani pulaka unna ai-iri aikasukasus ta kkenna.’

<sup>26</sup> \*Kapughu etoa, tuvuna atoa Abraham, me am tau ngeleka atoa am kakkaua God, God ghe tau mae sio isaa oia inangari niasaangi etaita!

<sup>27</sup> Taumattu nge Jerusalem atoa me kapuira namu ngatoa karika laghe tara kilala Iesu, aloira karika ghe masaangaala inangariira propete atoa isaa o laghe ritiriti tale isaa akapa nau manga, laghe ghelei roorooala nau laghe uela va aue ematea.

<sup>28</sup> Karika laghe tarala righi masi salana tani tingina etana me la uvi ematea, me laghe kolomila Paelat va la uvi ematea.

<sup>29</sup> Nau eteva laghe ghelei ekapala voto Uru ngai Manga ateva ghe uela va la ghelei, laghe ghaa veluela tale ai eteae me laghe lao sio tani alokoie sso tale lienga niaikkaia ngateae.

<sup>30</sup> God ghe mene totuela tale nimate

<sup>31</sup> me oroeili nau, ghe otuotula ta lo atoa laghe kasu teeiola eGalilii tani sae ejerusalem nau maulue ia. Ila lo atoa laghe taraiela, ghaine la aaulia ngaotu ta kapuita taumattu ngatoa.

<sup>32</sup> \*Me angalu aauliaa masi kiukiu etaimim: Sa ateva God ghe aulieiniela tale inangari nialokoi ta tuvuita atoa

<sup>33</sup> ang ghe ghelei eroorooala etaita, nau ghe totula Iesu. Nongina laghe piti elokoila ta aiaaghala atevo Sam, va

“Io natughu io,

Ghaine nge tamami ieghila.”

<sup>34</sup> Koronna inangari va God ghe totuela tale nimate, karika aue emene mate, nongina ghe auliaala tale isaa toko inangari, va

“Aue atau aatu etaimim niarangise ateva manga ia me koronna ia tale inangari nialokoi aghe auliaala ta Deivit.”

<sup>35</sup> Nongina ghe auliaala tale mene kateva inangari va,

“Karika aue utau velu kapum taumattu ngateva manga ia va emauu.”

<sup>36</sup> “Nau eteva Deivit ghe ruula tani ghelei uunguaane God tale unna ateva vituu, ghe matela; me laghe kiaeiniela nongina tuvuna atoa me vilikina ghe mauula.

<sup>37</sup> Me lo ateva taumattu God ghe totuela tale nimate karika ghe mauula.

<sup>38</sup> \*Liuna avalua o, kapughu etoa, aghaloanna tani aulia ngaotu me am kila va ta Iesu, God aue ekkaluaa kaluita ssavoto.

<sup>39</sup> Ta netetana lo atoa la ghaikaaia aue egheleila va karika righi kaluira ssavoto. Isaa avalua o me inangari nipaopao kanno Moses karika erooroo tani asaangiem tale kaluimim ssavoto.

<sup>40</sup> Am paniem! Saa voto God ghe auliaala ta propete atoa erau lutu etaimim, laghe uela va,

<sup>41</sup> “Am tarala, lo atoa taumattu am aattara nonga tani sama,

aue am soghiaa sa ateva aue agheleia, me aue am mate,

Tale nau oia aue aghelei kasina voto,

karika aue am nnaa va koronna,

arongona ta marova kasina taumattu aue eauliaa poi etaimim!” ”

<sup>42</sup> Nau eteva Pol me Banabas angilalu ghe kasukasu vuli ale nivelu eitaua ngateva, taumattu ngatoa laghe mene aloannailaluvela va lalu mene ppooaa isaa oia voto tale lo ateva too nau manga.

<sup>43</sup> Nau eteva lo atoa laghe mae sio tani velu eitauua laghe kasu reerekatala, oroi ajiu etoa me mene katoa taumattu avirina laghe vira aiesoala tee ajiu etoa, laghe usilaa Pol me Banabas. Lalu ghe tani aippooaa teeila tale inangari niaisausiaa tani poso parasi maamasinaane God.

<sup>44</sup> Tale mene kateva nau manga, ghaisa ngarighi me taumattu ngakapa atoa tale lo atae o masaliki taatara laghe velu eitauua tani nongo inangarina ateva Vau ngepona ateva.

<sup>45</sup> Nau eteva ajiu etoa laghe tarala oroieili taumattu, me angila ghe nannaa saasakiaa me angila ghe aauliaa tee Pol me ssa a voto ghe aauliaa.

<sup>46</sup> Pol me Banabas, karika lalu ghe matautula, lalu ghe liula me lalu ghe uela etaira va, "Ami tani ppooaa inangarina ateva God akasina etaimim. Ta am, am ghe ratiela me eaapasunga va God karika ghe suimatoongainiema tani ghaa maulue ateva etokatoka liu. Liuna avalua o, koti ami lao ta tau ngeleka atoa.

<sup>47</sup> Vau ngepona ghe uela ta kateva kateva etaingalua va,

"'Aghe gheleiola va io mallanga io ta taumattu ngeleka atoa,  
me urooroo tani sausila tani ghaa niasaangi tale kosa akapa ateva.'"

<sup>48</sup> Nau eteva taumattu ngeleka atoa laghe nongola llo oia, laghe masimasieiliila me laghe tau saela inangarina ateva Vau ngepona ateva, me lo atoa God ghe suimatoongainila va la ghaa maulue ateva etokatoka nau ekapa atoa, laghe aiesoala.

<sup>49</sup> Inangarina ateva Vau ngepona ateva ghe rooa ngakapaaillila ia o voto ateva.

<sup>50</sup> Vara me ajiu etoa laghe ghelei saasakiaala nannaairia lo atoa vause laghe oneoneaa God me ila namuu ila, me lo atoa taita namuu ila tale lo atae o masaliki taatara, me laghe tiuaala tani ghelei saasakiaa tee Pol me Banabas, me laghe tiu vellaluela tale ia o voto ateva.

<sup>51</sup> Lalu ghe rariaa vella au kosa ta kkeirarua tani apasunga va gheeleiaaira sesa. Me lalu ghe lao sio elkoniam.

<sup>52</sup> Me disaepolo atoa eAntiok elome tale distriki eteva ePisidia laghe pasula tale nimasimasi me tale Spirit Manga.

## 14

### *Elkoniam*

<sup>1</sup> Elkoniam Pol me Banabas lalu ghe mene gheleila uunguaairarua nongina lalu ghe gheelei eAntiok elome tale distriki eteva ePisidia. Lalu ghe ssola tale aleira ale nivelu eitauua ngateva ajiu etoa me lalu ghe aippooala me tale poppoaaairarua sarasarakananaili, oroieili taumattu ngatoa ajiu ila me aGrik ila laghe aiesoala.

<sup>2</sup> Katoa tana ajiu karika laghe aikaaiala laghe tau lao sio sesa ninannaa ta katoa tana taumattu ngeleka me laghe ghelei esessaila tau ngaisesoa ngatoa.

<sup>3</sup> Lalu ghe tokala oroi nau elkoniam me karika lalu ghe maamatautu tani aulia ngaotu Vau ngepona ateva, me Vau eteva ghe tau lao sio sarasarakanetairarua me lalu ghe gheelei oroieili ase niamatootoongana me mirikolo atoa, me tale isaa o voto lalu ghe gheelei, Vau eteva ghe aapsangua ta taumattu ngatoa va voto o lalu ghe aulia ngaotu tale maamasinaane koronna akapa.

<sup>4</sup> Me taumattu tale ia o masaliki taatara atae ghe ghalua atokailala; katoa laghe lao aitauua tee sio ajiu etoa, me katoa laghe lao aitauua tee sio apostolo alua.

<sup>5</sup> Emulina ajiu etoa me mene katoa tana taumattu ngeleka laghe tingina aitauua teela kapuira namu ngatoa, me laghe aaloanna tani uvi taita alua me tani kumlalua tale atu va lalu mate.

<sup>6</sup> Pol me Banabas lalu ghe nongola me lalu ghe iloula. Lalu ghe lao sio tale distriki eteva eLikaonia, tale masaliki taatara aluae eListra me eDebi me mene kasina lutu masaliki.

<sup>7</sup> Me lalu ghe mene ppooala masi kiukiu.

### *eListra me eDebi*

<sup>8</sup> EListra kateva tana taita, tangorengorena ia, tokatoka ngeuu ia nau ghe lutula, karika ghe kasukasula.

<sup>9</sup> Ghe tokala me ghe nongola nau Pol ghe aippooala. Pol ghe taatara lao sio etana me ghe tarala va aikaaiane erooroo tani ghelei emasinaia,

<sup>10</sup> me ghe sama anamula etana me ghe uela va, "Tingina saela," me taita ateva ghe aoso atingina saela me ghe kasukasula.

<sup>11</sup> Nau eteva taumattu ngatoa laghe tarala isaa o voto Pol ghe gheleila, laghe tiuaala tani sama me aore atingina tale inangari tanganueira eLikaonia, laghe ue va, "Goto atoa ngila nonginala taumattu ngatoa me ngila sio mae etaita."

<sup>12</sup> Banabas laghe asela ararina atea ta Sius me Pol laghe asela ararina atea ta Hermes poli ia ghe muemuua niaippooaa.

<sup>13</sup> Alena ale manga ateva goto ateva Sius ghe tokatoka akalakalangina eleka tale masaliki taatara atea. Pristi eteva ta goto ateva ta Sius ghe maeaa sio vulumakao me pusii ngai tale namu ngatea atamana poli ia me taumattu ngatoa laghe anna tani ghelei aiaavusuvusuena etairarua.

<sup>14</sup> Apostolo alua ta Banabas me Pol lalu ghe nongola voto o laghe aaloanna tani ghelei etairarua me lalu ghe rasila uneirarua aiaasae tani apasunga va karika lalu ghe masimasi me lalu ghe ilou ssola elome ta taumattu ngatoa me lalu ghe tiuaala tani sama anamuu.

<sup>15</sup> Lalu ghe ue va, "Vaalu me am anna tani ghelei isaa ona voto? Angalua nim taumattu iengalua nongina am. Angalu ghe mae sio taniauli ngaotu masi kiukiu va am kiri tale votu kamena me am taatara lao tale Goto ateva tokatoka liu ia ghe gheleila elomarase me kosa ateva, paamanon eteva me isaa akapaailei voto elome tale isaa o voto.

<sup>16</sup> Emua arau taumattu ngeleka atoa karika laghe kilakila God, liuna avalua o me God ghe tau vellala tani kasu tale aloaloannaairaa.

<sup>17</sup> Me ghe aapasunga voto tani aimatoonga va ia etautau masi voto, me eaapasunga maamasinaane ta etautau sio vaoo ateva epona liu, me inana tale nauna, me etautau atutu inana, me eaapasuu urunguitaniim tale nimasimasi."

<sup>18</sup> Tale isaa o inangari, ghaisa ngarighi karika lalu ghe roo tani ghelei runga taumattu ngatoa tani ghelei aiaavusuvusuena lao ta ngetairarua.

<sup>19</sup> Katoa tana ajiu laghe kasula eAntioch elome ePisidia Distrik me elkoniam laghe pasalila taumattu ngatoa me laghe kumla Pol tale atu me laghe ae velue ghoala tale masaliki taatara atea poli laghe annaa va ang ghe matela.

<sup>20</sup> Nau disaepolo atoa laghe tingina talieiniela me ghe totu saela me ghe kiriaa ssola tale masaliki taatara atea. Eghe paila tale mene kateva nau, ia me Banabas lalu ghe lao sio eDebi.

### *Lalu ghe oghi lao sio eAntioch eSiria*

<sup>21</sup> Pol me Banabas lalu ghe ppooaala masi kiukiu eDebi me oroieili taumattu laghe aiesoala. Vara me lalu ghe oghiaa siola eListra, elkoniam me eAntioch elome ePisidia Distrik.

<sup>22</sup> Lalu ghe aasarasaranakanala tau ngaisesoa ngatoa me lalu ghe auliaala va la poso parasi lo ateva o niaikaaia. Lalu ghe ue ta taumattu ngatoa va, "Tani kupi sso tale aramangalina ateva God, aue ita tani sou oroieili voto aanasa."

<sup>23</sup> Tale kateva kateva ale manga, lalu ghe suimatoongaala elda ngatoa me lalu ghe naela me lalu ghe looloo saela tani taulue lao ta nimane Vau ngepona ateva, ia laghe aatoka tuutuliira etana.

<sup>24</sup> Nau lalu ghe lao akapa see sio tale distriki eteva ePisidia me lalu ghe mae sio tale distriki eteva ePampilia.

<sup>25</sup> Isaa o lalu ghe aippooaala tale masaliki taatara atea ePerga vara me lalu ghe siola tale masaliki taatara atea eAtalia.

<sup>26</sup> EAtalia lalu ghe aikaaila tale anua ateva me lalu ghe lao sio eAntioch tale provinsi eteva eSiria nongina laghe taulalue lao sio ta God va tale maamasinaane God lalu ghelei isaa o niungu lalu ghe kasula tani ghelei, me lalu ghe ruula, me lalu ghe kiriaa mae sio.

<sup>27</sup> Nau lalu ghe rekataala eAntioch lalu ghe kolo aitauaala taumattu ngatoa tale ale manga ateva me lalu ghe auliaala voto God ghe sausiluelu tani ghelei me vaalua ghe otilla salaira taumattu ngeleka atoa tani aiesoaa.

<sup>28</sup> Lalu ghe tokala oroi nau tee lo atoa laghe aikaiaia tale ia o masaliki eteae.

## 15

### *Nivelu eitaua ngateae ejerusalem*

<sup>1</sup> Katoa taumattu laghe kasula ejidua me laghe sio mae eAntioch tani mene apasunga ta tau ngaisesoa ngatoa. Laghe ue va, "Karika am rooroo tani saanga marova am tam aimuli tee inangari nipaopao kanna Moses va la iso taita atoa."

**14:11:** Apes 28:6.    **14:15:** Apes 10:26; Sams 146:6.    **14:16:** Apes 17:30.    **14:17:** Jer 5:24.    **14:19:** Apes 17:13;

2 Ko 11:25.    **14:22:** Apes 15:32; 1 Tes 3:3.    **14:26:** Apes 13:1-2.    **14:27:** Apes 15:4, 12.    **15:1:** Gal 5:2.

<sup>2</sup> Isaa oia inangari ghe gheleila kinatama niaisamaaii tee Pol me Banabas. Elda ngatoa laghe suoongaala Pol me Banabas tee mene katoa tana tau ngaisesoa tani sae ejerusalem tani sae tara apostolo atoa tee elda ngatoa tale isaa o inangari.

<sup>3</sup> Tau ngaisesoa ngatoa tale ale manga ateva laghe sungilala tani sae ejerusalem me nau laghe laa saesae, laghe sso teela ePoenisia me eSameria me laghe kiukiuaala vaalua taumattu ngeleka atoa laghe aikolikoliaala. Nau laghe nongola isaa o inangari, laghe masimasiciliila.

<sup>4</sup> Nau laghe rekatala ejerusalem, tau ngaisesoa ngatoa, apostolo atoa me elda ngatoa laghe masimasiciliila tani soula, me Pol me Banabas lalu ghe auliaala vaalua God esaasausilalua tale uunguairarua.

<sup>5</sup> Katoa tana tau ngaikaiaia laghe aimuli usi tee katoa tana Paresi, laghe tingina saela me laghe uela va, "Am tani iso taumattu ngeleka atoa me la tani usilaa inangari nipaopao kannaa Moses."

<sup>6</sup> Apostolo atoa me elda ngatoa laghe toka siola tani aisakeiaa isaa o inangari.

<sup>7</sup> Oroieilli niaippooaa ghe lange sio me Pita ghe tingina saela me ghe uela va, "Kapughu etoa, am kilakila kasina nau ang ghe lao sio God ghe suoongainaghila elome etaimim va aghaulia ngaotu lo ateva oia masi kiukiu ta taumattu ngeleka atoa me ila tee aue la roo tani nongo me la aikaiaia.

<sup>8</sup> God ekilakila akapa urunguitaniira taumattu ngatoa, liuna avalua o me tani apasunga va eaaloanna tee taumattu ngeleka atoa, me etautau lao Spirit Manga ateva, nongina ghe taue mao sio ta ngetaita.

<sup>9</sup> God etaatara taumattu ngeleka atoa me ita ajiu etoa va kateva nonga ita. Poli ang ghe kkaluaala kaluira ssavoto nau laghe aiesoaa.

<sup>10</sup> Vaalua me am aaloanna tani toooonga God me am tautau lao maamatana ta mene katoa tau ngaisesoaa me emua arau ita me tuvuita atoa ita ghe tam rooroo tani sau?

<sup>11</sup> Karika emene isaa avalua o! Ita aiesoaa va ita me ila aue ita saanga tale maamasinaane ateva Vau eteva Iesu."

<sup>12</sup> Ila akapa taumattu ngatoa laghe matua ngatokala me laghe nongola Banabas me Pol lalu ghe auliaala llo aimatootoongan me mirikolo God ghe sausilaluela tani ghelei nau lalu ghe uungu ta taumattu ngeleka atoa.

<sup>13</sup> Nau lalu ghe ruula tani aippooaa, Jeimis ghe liula me ghe uela va, "Kapughu etoa, am nongoaghi.

<sup>14</sup> Saemon Pita ghe auliaala etaita vaalua God ghe apasunga ngakasinala ailousiaane ateva ta taumattu ngeleka atoa me ghe gheleila katoa etaira va kapuna tuungi ila.

<sup>15</sup> Inangariira propete atoa elao lao aitauua tee isaa oia inangari va taumattu ngeleka atoa la aiesoaa, nongina Uru ngai Manga ateva eaauliaa va,

<sup>16</sup> "Emuli tale isaa oia voto aue aoghi

me alaa ghatulu alena ateva Deivit\* ghe katuula  
me voto ghe sesala, aue amene atulu

me aue aghelei nongina arau.

<sup>17</sup> Poli aghaloanna va mene kasina taumattu aue la mene pae Vau ngepona ateva,  
tee ila o taumattu ngeleka atoa aghe kololala va ekapughu ila,'

ghe uela Vau eteva ia egheelei isaa oia voto.

<sup>18</sup> Ngila ghe kilala oroi ninamanama ang ghe lange sio."

<sup>19</sup> Jeimis ghe uela va, "Nannaaghi va ita rau mene ghelei voto eaanasaaili ta ngetaira taumattu ngeleka atoa la maemae ta God.

<sup>20</sup> Ita roo tani piti tikirighi uru ngai elao etaira me ita auliao isaa oia voto va la rau mene nama inana la tautau lao tale kapuira tootoo goto atoa, me la rau mene ghelei uunguua nialai salosaloaa see ateeae, me la rau mene nama ghaata kkena la kiikii pule aloira, me la rau mene nama malatau rae ta ngetaian.

<sup>21</sup> Ta emua arau inangari nipaopao kannaa Moses laghe aaulia ngaotu tale isaa akapaaili masaliki taatara, me laghe ritiritu tale ale nivelu eitaua ngatoa tale isaa akapaaili nau manga."

*Uru ngai etikirighi laghe pitiela ta tau ngaikaiaia ngeleka atoa*

<sup>22</sup> Vara me apostolo atoa me elda ngatoa me ila akapa tale ale manga ateva laghe uela va la suoongaa righi taumattu me la sungila sio eAntioek tee Pol me Banabas. Laghe asela

**15:2:** Gal 2:1.    **15:4:** Apo 14:27.    **15:7:** Apo 10:1-43.    **15:8:** Apo 10:44; 11:15.    **15:10:** Mat 11:30; Gal 3:10.

**15:11:** Gal 2:16; Ips 2:5-8.    **15:13:** Gal 2:9.    **15:16:** Eimos 9:11-12.    \* **15:16:** Alena ateva Deivit eaimatoonga kingi etoa tuvuna ila Deivit.    **15:20:** Eks 34:15-17; Lev 17:10-16.

Jiudas (la aseasea va Barsabas) me Saelas. Taita alua oia lalu ghe muemuaa tau ngaisesoa ngatoa.

<sup>23</sup> Laghe pitila uru ngai etikirighi eue va,

Ami apostolo atoa me elda ngatoa, ita aiesoa ngaitauaa,

Ami tautau aatu masimasiaaimami etaimim akapa taumattu ngeleka atoa am ghe aiesoala isaa ona tale masaliki taatara atae eAntiok me tale provinsi elua eSiria me eSilisia.

<sup>24</sup> Ami ghe nongola va katoa ta ngetaimami laghe sio atu ta ngetaimim me laghe aauilia inangari egheelei saasakiaa tokatokaaimim me egheelei saasakiaa nannaaimim me karika ami ghe sungilala.

<sup>25</sup> Ami masimasi eitauuala tani suu katoa ta ngetaimami tani kasu eitauaa tee masi kapuita alua ta Banabas me Pol tani sio taraiem.

<sup>26</sup> Taumattu ngalua oia angilalu ghe tau lao sio maamauluairarua tale ararina atae kapuita Vau eteva Iesu Karisto.

<sup>27</sup> Liuna avalua o ngami sungisungi tee Jiudas me Saelas tani akorokorongana inangari ami ghe pitila.

<sup>28</sup> Ngami mae aitauaa sio nonga tale kateva nonga ninannaa me Spirit Manga ateva va emaamasina va karika ami mene saoaa sae mene righi inangari maate tee isaa toko inangari nipaopao:

<sup>29</sup> Karika am mene nama malatau la gheelei sae aiaavusuvusuena tale tootoo atoa, me am rau mene nama llo ghaata kkena la kiikii pule aloira, me malatau rae ta ngetana, me am rau mene ghelei uunguua nialai salosalooa see atae. Aue am toka amasina marova am usilaa isaa oia inangari.

Masinaaili.

<sup>30</sup> Apostolo atoa me elda ngatoa laghe sungila isaa oia taumattu tani sio eAntiok, me laghe kolo aitauuala taumattu ngatoa laghe aiesoaa me laghe taula uru ngai etikirighi.

<sup>31</sup> Nau laghe nongola uru ngai etikirighi, laghe pasula tale nimasimasi poli laghe nongola inangari niaisausiaa.

<sup>32</sup> Jiudas me Saelas ilalua tee propete ilalua me lalu ghe kaarasila tani aippooaa teeila me tani asarasarakanalua tale masi inangari.

<sup>33-34</sup> Laghe tokala kasina nau me ghe ghaala naurarua taita alua tani mene oghiaa sae nongina laghe sungilaluelu. Laghe sungilaluelu tee kaluiria niarangise me luei.<sup>†</sup>

<sup>35</sup> Pol me Banabas lalu ghe tokala eAntiok tee mene katoa me laghe aapasunga me laghe aaulia ngoutu inangarina ateva Vau eteva.

### *Pol me Banabas lalu ghe aitiuala*

<sup>36</sup> Oroi nau ghe lange sio me Pol ghe uela ta Banabas va, “Italu mene oghi lao ta kapuitalua atoa tale masaliki taatara atoa nongina italu ghe ppooala inangarina ateva Vau eteva, me ita laa taraila va vaalua aikaai aaira.”

<sup>37</sup> Banabas ghe aloanna va Jon Mak eusilalua,

<sup>38</sup> me Pol karika ghe aaloanna poli eghe oghi vululaluelu ePampilia me karika ghe usilaluelu tani laa ghelei niuungu.

<sup>39</sup> Taita alua lalu ghe aisavalaa teela tuku ninanna ngateva o me lalu ghe aitiuala. Banabas ghe kolola Jon Mak me lalu ghe aikaaila me lalu ghe lao sio eSaeparsi.

<sup>40</sup> Me Pol ghe kolola Saelas me tau ngaisesoa ngatoa laghe taulalue lao sio tale maamasinaane Vau ngepona ateva, me lalu ghe kasula.

<sup>41</sup> Lalu ghe lao sio eSiria, eSilisia me lalu ghe aasarasarakana taumattu ngatoa tale ale manga atoa.

## 16

### *Timoti ghe usila Pol me Saelas*

<sup>1</sup> Pol me Saelas lalu ghe lao sio eDebi me lalu ghe mene lao tee sio eListra. Tale masaliki etae o, kateva disaepolo ghe tokatoka, ararina atae ta Timoti, kinna ateva ajiu ia me ghe aaiesoaa, me tamane ateva aGrikia ia.

<sup>2</sup> Tau ngaisesoa ngatoa eListra me elkoniam laghe aarueinia.

<sup>3</sup> Pol ghe anna tani koloa va lotolu ghe kasu, liuna avalua o me ghe isoelia poli ghe nnaala ajiu etoa nongina lotolu ghe laolao me laghe kilakila va tamane ateva aGrikia ia.

---

<sup>15:28:</sup> Mat 23:4.   <sup>†</sup> <sup>15:33-34:</sup> Kasina uru ngai laghe pitila laghe mene piti teela va, <sup>34</sup> *Me Saelas ghe anna tani toka, me Jiudas nonga ghe oghi sae ejerusalem.*   <sup>15:37:</sup> Apos 12:12, 25.   <sup>15:38:</sup> Apos 13:13; Kol 4:10.   <sup>16:1:</sup> Apos 14:6; 2 Tim 1:5.   <sup>16:2:</sup> Plp 2:19-22.

<sup>4</sup> Nau eteva laghe laolao tale isaa akapa masaliki taatara laghe aauliaa saa ninannaa apostolo atoa me elda ngatoa eJerusalem laghe mae aitauaa sio etana va taumattu ngatoa la aimuli tee.

<sup>5</sup> Liuna avalua o me isaa akapa ale manga ghe sarasarakanala tale aikaai aaira me nau ekapa atoa tau ngaiesoa ngatoa laghe ooroi.

*Pol ghe tarala nitaatara atae eTroas*

<sup>6</sup> Pol me kapuna atoa laghe kasu ekapa seela tale voto alua ePrigia me Galaisia poli Spirit Manga ateva ghe paolala va la rau mene ppooaa inangari eteva tale provinsi eteva eEisia.

<sup>7</sup> Nau laghe rekatala tale aiolaa ngeateva eMaesia laghe anna tani sso eBitinia me kapuna Spiriti eteva Iesu ghe tam annala va laghe sso.

<sup>8</sup> Liuna avalua o me laghe kasu ssola eMaesia me laghe siola eTroas.

<sup>9</sup> Vara eleivoo me Pol ghe tarala, tale unna nitaatara atae, taumattu nge Mesedonia ngeateva ghe tiitingina me ghe kolokolo Pol, ghe ue va, "Umae eMesedonia me umae sausiemami."

<sup>10</sup> Nau eteva Pol ghe ruula tani tara unna nitaatara atae, arovaea nonga ta ami\* ghe aimonomonosiaala tani lao eMesedonia. Ami ghe kilala va God ang ghe koloamamila tani laa ppooaa masi kiukiu etaira.

*Lidia ghe aikolikoliaala ePilipae*

<sup>11</sup> Ami ghe tiu ghoala eTroas me ami ghe kautula tale patunganua ateva eSamotres, vara mene kateva nau, ami ghe lao sio tale masaliki taatara atae eNiapolis.

<sup>12</sup> Ami ghe kasula o me ami ghe mene lao sio ePilipae, aRom atoa laghe aaitarainia me ia masaliki namuu ia ta masaliki taatara atoa tale ia o distriki eteva eMesedonia. Me ami ghe tokala o kasina nau.

<sup>13</sup> Vara nau manga ateva, me ami ghe kupi vulu ghoala atamana atae tale masaliki taatara atae, me ami ghe lao sio tale ateo atae. Ami ghe annaa va ami ghe tara teva voto, me ami ghe looloo sae etana. Vause atoa laghe velu eitauaala tale ia o voto ateva me ami ghe toka siola, me ami ghe tiuaala tani aippooaa teeila.

<sup>14</sup> Kateva ta ila o lo atoa laghe nongonongo inangari, kateva vause, ararina atae ta Lidia, ia tau ngai kkaua ia ta God me karika va ajiu ia, laghe polipoli ghinna ghueghuenna etana, tanganuena tale masaliki taatara atae eTaeataera. Vau ngepona ateva ghe otila urunguitanata ateva tani nongo amasina voto Pol ghe ppooaa.

<sup>15</sup> Vara me ia me lo atoa laghe tokatoka aitauaa nonga tale kateva ale, laghe ghaala niaasuu, me ghe koloamamila va ami lao tanganuena. Ghe uela va, "Arova am aaisesoaa va aghaaikai aiaa ta Vau ngepona ateva, am mae toka tanganueghi." Ghe tani kolokolo rerrekainainiemami, liuna avalua o me ami ghe toka teeila.

*Pol me Saelas tale ale mata voovoo*

<sup>16</sup> Kateva nau, ami ghe laolao tale voto ateva ailooloo sae ia, me ami ghe soula aliki vause ateva, karika ghe tokatoka tale aloannaane, me kateva spiriti ghe tokatoka etana me ghe aaulia ngamuemue voto, me ghe vira mene lutulutu. Ghe gheelei orioieili uneira viliki veu lo atoa laghe aaitarainia poli ghe aauliaa voto auena eluti.

<sup>17</sup> Ia o aliki vause ateva ghe aaimuli teeiemami me Pol, me ghe ovaova ghe ue va, "Isaa oia taumattu, kapuna tau ngai nongonongo anna ila Goto ateva iaaili epona, me la ghaauliaa etaimim salana tani saanga."

<sup>18</sup> Ghe gheelei evaluela o oroi nau, me Pol ang ghe maamangoo teeia, liuna avalua o me ghe kiriela me ghe uela ta spiriti eteva va, "Tale ararina atae Iesu Karisto, aghaauliaa etam va ukupi vulue ghoa!" Tale ia o tuku nau erighi, spiriti eteva ghe kasu vuliela.

<sup>19</sup> Nau eteva lo atoa laghe aaitaraa ia o aliki vause ateva, karika ghe tokatoka tale aaloannaane, laghe kilala va salaira tani ghaa viliki veu ang ghe kapala, laghe kunela Pol me Saelas me laghe aelalue lao sio tale matavanga tani laa tingina ta mataira namu ngatoa.

<sup>20</sup> Laghe laoainilalue sio ta lo atoa laghe gheelei niaiskei me laghe uela va, "Taumattu ngalua oia ajiu ilalua, me lalu ghe gheleila me niaissessai ang ghele namuula tale masaliki etae oia.

<sup>21</sup> Lalu ghe aapasunga voto karika masina va ita aRom atoa ita aimuli tee."

<sup>22</sup> Taumattu ngatoa laghe usila kaluira tani gheleila tee Pol me Saelas, me tau ngai ghelel niaiskei etoa laghe auliaala me polisi etoa laghe ghaa vella ghinnaniiruarua me laghe parulaluelaa.

**16:4:** Apos 15:23-29.    **16:6:** Apos 18:23.    \* **16:10:** Luk ghe usilaala eTroas, liuna avalua o me ghe pitila va "ami".  
**16:17:** Mak 1:24.    **16:20:** Mak 13:9.    **16:22:** 2 Ko 11:25; 1 Tes 2:2.

<sup>23</sup> Laghe paru emaamaatelaluela me laghe atokailalue ssola tale ale mata voovoo ateva, me laghe auliaala ta tau ngai toitoi eteva va, "Ukaarasi tani tara rungarungainilalua."

<sup>24</sup> Nau ghe ghaala inangari matuutulieni, ghe atokailalue tale ale ngelome atiulu me ghe sikilaala kkeirirua tale aikakkamoti eteva me ghe kamotila kkeirirua.

<sup>25</sup> Elomatuua voo me Pol me Saelas ngilalu ghe looloo sae me kikkini sae ta God me karavusu etoa laghe nongonongolalu.

<sup>26</sup> Vara me kinatama rukeruke ateva ghe rukela. Nau eteva rukeruke ateva ghe rukela ale mata voovoo ateva, atamana akapa atoa ghe otilala me sene ta karavusu etoa ghe kaola.

<sup>27</sup> Tau ngai toi ale mata voovoo ateva ghe totula me ghe tarala ta atamana tale ale mata voovoo ghe otala, me ghe ghaala iemane baenata ateva me vara ghe pasa amatea poli ghe annaa va karavusu etoa ngila ghe iloula.<sup>†</sup>

<sup>28</sup> Pol ghe kolokolo anamungainiela me ghe uela va, "Urau mene pasa amateo ta ami ekapa ami tokatoka!"

<sup>29</sup> Me tau ngai toi ale mata voovoo ateva ghe reterete poli ghe matautula, me ghe kolokolola va la maeaa teae lam, ghe ilou velu ssola, me ghe suviaala emua ta Pol me Saelas.

<sup>30</sup> Vara me ghe ghoainilaluele eleka me ghe kolomilalueva, "Namu ngalua, sa ateva arooroo tani gheleia me asaanga?"

<sup>31</sup> Lalu ghe liula me lalu ghe uela etana va, "Uaiesoaa ta Vau ngepona Iesu, me aue usaanga, io me kapum atoa tangantuem."

<sup>32-34</sup> Tale ia o voo ngateva, tau ngai toi ale mata voovoo ateva ghe ghaailalue lao sio tangantuena me ghe porala usaiiraru, me ghe anginilalue. Me lalu ghe auliaala inangarina Vau ngepona ateva etana, me tee ta lo atoa laghe tokatoka tangantuena. Ia ghe aiesoala, me arovaeaa ta lalu ghe asuuela me lo atoa tee tangantuena. Emuli tale nau laghe suula, ghe pasula tale nimasimasi poli ghe aiesoala ta God, ia me natuna akapa atoa me vausenna ateva.

<sup>35</sup> Vara ghe paila, me tau ngai ghelei niaiskei etoa laghe suula inangari ta kapuira polisi etoa va la laa ue ve va la tau velu taita alua.

<sup>36</sup> Vara me tau ngai toi ale mata voovoo ateva ghe uela ta Pol va, "Tau ngai ghelei niaiskei etoa la uela va ami tau veluemalua. Amalu rooroo tani kasu, me aue amalu kasu tale luei."

<sup>37</sup> Pol ghe uela ta polisi etoa va, "Angalua sitisen nge Rom iengalua, me karika laghe ghelei muela niaiskei etaingalua me laghe paruengaluelu ta mata ngoroi etoa. Me tee laghe atokaiengalue ssola tale ale mata voovoo. Me isaa oia ngila nim anna tani sungieinangalua va angalu kasu? Karika poi! Ila la tani mae ghaiengalua, me la kasueinangalua."

<sup>38</sup> Polisi etoa laghe lao sio tani auliaa inangarina Pol ta tau ngai ghelei niaiskei etoa. Me nau laghe nongola va Pol me Saelas sitisen nge Rom ilalua, ghe moilala tale llo laghe ghelei teeilalue.

<sup>39</sup> Laghe lao sio tale ale mata voovoo tani kkaluaa etairarua me laghe kololalue me laghe kasu eitauaa teeilalue ghoala eleka, me laghe uela etairarua va, "Masina, amalu rau mene toka oia, amalu kasu."

<sup>40</sup> Nau lalu ghe kupi ghoala tale ale mata voovoo, lalu ghe lao sio tangantu Lidia, me lalu ghe saopila lo atoa laghe aiesoala ta Iesu me lalu ghe aippooaa teeilala tani asarasarakanaila, me lalu ghe mene kasula.

## 17

### eTesononika

<sup>1</sup> Pol me kapuna atoa laghe kasu eloi lao sio tale masaliki taatara aluae eAmpipolis me eApolonia tani lao tale masaliki taatara ateae eTesononika. Isaa okae ale nivelu eitaua ngateva aleira ia ajiu etoa ghe tokatoka.

<sup>2</sup> Pol ghe kupi ssola tale ale nivelu eitaua ngateva me ghe tiuuala tani ppooaa nongina nau etoa ghe gheelei. Kotolu nau manga ghe toka teeilala me laghe aippooa ngaitauaa teela Uru ngai Manga ateva.

<sup>3</sup> Ghe aulia ngamasalikangailila etaira me ghe aapasinga tale Uru ngai Manga ateva va koronaa Mesaea aue eghaa nimmarikana me emate me aue emene totu tale nimate. Me ghe uela va, "Iesu ia Mesaea ia, aghi apoppooainia etaimim."

<sup>16:27:</sup> Apos 12:18-19.    <sup>†</sup> <sup>16:27:</sup> Marova karavusu etoa laghe iloulu, namu ngatoa aue laghe uvi emate tau ngai toi ale mata voovoo ateva.    <sup>16:30:</sup> Apos 2:37.

<sup>4</sup> Katoa tana ajiu laghe aiesoala, me laghe aimuli teela Pol me Saelas. Oroi tee aGrik atoa laghe aiesoala ta God, me oroi namuu tale vause atoa laghe usila Pol me Saelas.

<sup>5</sup> Katoa tana ajiu karika laghe aaiesoaa, laghe annaa saasakiaala. Liuna avalua o me laghe kolo aitauaala kasina taumattu makatakatanna, me tee taumattu tale matavanga, me laghe aaiikkalui see tale masaliki taatara ateae. Laghe aaore atingina, me laghe lao sio laghe ilou ssola tale alena ateva Jeson tani ae velu ghoa Pol me Saelas etaira.

<sup>6</sup> Me nau eteva karika laghe tarailaluelu, laghe aela Jeson me mene katoa tau ngaisesoaa me laghe laoainila sio emua ta namu ngatoa tale masaliki taatara ateae. Laghe ovaova me laghe ue va, “Isaa oia taumattu laghe ghelei saasakia ngakapala voto tale kosa akapa ateva, ila oia ngila mae sio.

<sup>7</sup> Me Jeson ghe masimasiaala Pol me kapuna atoa, me ghe ghaailala laghe ssola tale alena ateva. Ila akapa la sassakeaa inangarina Siisa, la ue va kateva kingi, ararina ateae ta Iesu.”

<sup>8</sup> Nau eteva taumattu ngatoa me namuu tale masaliki taatara atoa laghe nongola ghe sessaeiliilala.

<sup>9</sup> Vara me laghe uela ta Jeson me tau ngaisesoaa ngatoa va, “Ange roola mua tani aisakei me am tau mae sio viliki veu, me am kasu. Arova la matua atoka auena am mene mae ghaa uneimim viliki veu.”

### eBeriia

<sup>10</sup> Nau eteva ghe voola, tau ngaisesoaa ngatoa laghe suula Pol me Saelas tani lao eBeriia. Nau lalu ghe laa rekata sio, lalu ghe ssola tale ale nivelu eitaua ngateva, aleira ia ajiu etoa.

<sup>11</sup> ABERIIA ngatoa, masi taumattu ila, me nannaaira masalikeaili ta eTosalonika ngatoa, poli laghe aloannaaili tani nongo inangari Pol ghe poppooa, me isaa akapa nau laghe taatara tale Uru ngai Manga ateva tani tara va voto Pol ghe poppooa koronnaaili.

<sup>12</sup> Liuna avalua o me oroi taumattu nge jiu etoa laghe aiesoala, me oroi vause me taita nge Grik tee, namuu ila tale ia o masaliki taatara ateae, laghe aiesoala.

<sup>13</sup> Nau ajiu etoa eTosalonika laghe nongola va Pol ghe poppooa inangarina ateva God eBeriia, ila tee laghe lao sio. Laghe tiuuala tani ghelei aisavisavilaa nannaaira taumattu ngatoa va la rau mene nongo inangarina God Pol ghe poppooa.

<sup>14</sup> Lo atoa laghe aaiesoaa ngaitauaa laghe suula Pol tani sio elamana tani sio pae teva anua. Saelas me Timoti lalu ghe tokala eBeriia.

<sup>15</sup> Me lo atoa taumattu laghe laoaa sio Pol tale masaliki taatara ateae eAten, auena laghe kasu, Pol ghe suula inangari etaira va, “Am lao me Saelas me Timoti lalu mae tara parasieghi, me ngotolu uungu eitauaa.”

### Pol eAten

<sup>16</sup> Nau eteva Pol ghe toitoi Saelas me Timoti eAten, ghe alousiusieiliila tani tara va masaliki taatara ateae pasu ia tale tootoo goto atoa.

<sup>17</sup> Liuna avalua o me ghe ssola tale ale nivelu eitaua ngateva tani aippooaa tee ajiu etoa me aGrik atoa laghe kakkaua God tee ajiu etoa,\* me tee nau ekapaili ghe poppooa ta taumattu ngatoa tale matavanga.

<sup>18</sup> Tau ngai aapasunga ngatoa ta Epikuria me Stoik laghe tiuuala tani aissakeana teeia. Katoa etaira laghe kokkolomi va, “Vara eue va saa, ia oia taumattu ngateva etam kilakila sa ateva eaulieinia?” Katoa laghe ue va, “Eanna tani aulia ngaotu mene kasina ase goto.” Laghe aauliaa isaa o inangari poli Pol ghe aaulia ngaotu masi inangarina Iesu me tottotuaaira matena atoa.

<sup>19</sup> Vara me laghe koloala me laghe ssoainiela tale voto ateva eAreopagas, kansolo atoa la velvelu eitauaa etana, me laghe uela etana va, “Eerooroo va ami kila isaa oia voto ouna uaaulia ngaotu?

<sup>20</sup> Ta io angu ghaaghhaa mae ouna voto tale nonganongoaaimami, me ami anna tani kila malloeanina isaa o voto.”

<sup>21</sup> (Ila akapa taumattu nge Ateni etoa, me mene katoa tana taumattu karika tanganueira okae laghe mae sio tani toka eAten, karika la ghelei righi voto, karika, ta laghe nim aloannaaili tani nongo me auliah kiukiu ouna.)

<sup>22</sup> Vara me Pol ghe tingina saela elome ta namu ngatoa tale ia o masaliki taatara ateae tale motouru eteva eAreopagas me ghe uela va, “Taumattu nge Ateni etoa, ataatara va nannaaimim namungaili tale isaa akapa uuungua nikkaua.

<sup>23</sup> Poli nau akasukasu see ataatara voto am kakkaua etana, me aghe tara teela kateva liu nighelei aiaavusuvusuena, laghe pitila inangari etana laghe uela va, “Ta Goto ateva karika

\* **17:7:** Luk 23:2; Jon 19:12.    **17:17:** Apes 18:19.    \* **17:17:** aGrik atoa laghe kakkaua God tee ajiu etoa Katoa aGrik laghe kakkaua ngaitauaa tee ajiu etoa, me karika laghe aaimuli ekapa tee inangari nipaopao kanna Moses.

ami kilakilaia.' Am nongo, God am kakkauenia me karika am kilakilaia, ghaine aghaulia ngaotu etaimim. <sup>24</sup>Ia o Goto ateva, ia ghe gheleila kosa ateva me isaa akapaaili voto etana. Ia Vau ia tale kosa ateva me epona liu. Karika etokatoka tale ale manga taumattu ngatoa la gheelei.

<sup>25</sup>Karika etuutukuna poi tale teva voto, me ita taumattu ngatoa karika ita gheelei teva voto ta nimaita tani sausia, karikaaili, poli ia nonga etaute mae maulue me ainoaita me tee isaa akapaaili mene kasina voto.

<sup>26</sup>Tale kateva nonga taumattu ghe gheleila ararimangali ekapa atoa, va la toka akapa see me la apasu kosa ateva. Me ghe suoongala nauira aue la toka, me ghe apasunga teela aioghioghie tale kosaira.

<sup>27</sup>God ghe gheleila isaa oia voto va taumattu ngatoa aue la paea. Me nau la paepae, koti aue la taraia, me ia karika emene masau tale kateva kateva etaita.

<sup>28</sup>'Poli ta getana ita tokatoka me ita aikasua, me taumattu ita.'<sup>†</sup> Nongina kasina inangariimim am ghe pitila eue va, 'Ita tee natuna ita.'<sup>‡</sup>

<sup>29</sup>"Liuna avalua o, poli ita natuna ita God, ita rau mene annaa va ia nongina tootoo gol, silva me atu, taumattu ngatoa la gheelei tale aalomasaanganiaaira.

<sup>30</sup>Tale nau ang ghe lao sio, God ghe nim taatara avalua o gheeleiaaira taumattu ngatoa, poli karika laghe kilakila amasina aloannaane God. Me ghaine eaaulia ngakorokorongan tale taumattu ngakapa atoa tani oghi vulu gheeleiaaira sesa.

<sup>31</sup>Poli ang ghe suila nau eteva, aue egelei naisakei ghulughuluena tale kosa ateva tale uunguaane ia o taumattu ngateva ang ghe suoongainiela. Ang ghe apasungaala isaa oia voto tale taumattu ngatoa nau ghe totula ia o taumattu ngateva tale nimite."

<sup>32</sup>Nau laghe nongola va matena atoa aue la mene totu, katoa etaira laghe tiuuala tani pilosia, me katoa laghe ue etana va, "Ami aaloanna va umene auliaa isaa o voto etaimami."

<sup>33</sup>Vara me Pol ghe kasu vulilala.

<sup>34</sup>Karika tani oroi ila lo atoa laghe aiesoala, me laghe tiuuala tani usilaa Pol. Elome etaira Dionisius tee ghe usilaa, kateva tana namuu tale kansolo ateva ta Areopagas, tee me kateva vause ararina atae ta Damaris, me mene katoa taumattu.

## 18

### eKorint

<sup>1</sup>Vara me Pol ghe kasula eAten, me ghe lao sio tale masaliki taatara atae eKorint.

<sup>2</sup>Isaa eKorint Pol ghe soula taumattu ngateva ajiu ia, ararina atae ta Akuila, ia atala nge provinsi eteva ePontus. Karika oroi nau ia me vausenna ateva ta Prisila lalu ghe kasula elitali me lalu ghe lao sio eKorint, poli Klaodies Siisa ghe uela va ajiu ekapa atoa la kusu vuli eRom. Vara me Pol ghe lao sio tani tara Akuila me vausenna ateva ta Prisila.

<sup>3</sup>Me poli uunguaane tani ghelei tenti nongina ilalua o lailai elua, liuna avalua o me ghe toka teelaluela me ghe uungu teelilua.

<sup>4</sup>Me tale isaa akapa nau manga, Pol ghe laa ghaippooaa tale ale nivelu eitaua ngateva, ghe tootoonga tani ghaa nannaaira aGrik me ajiu etoa va la ghairesoaa ta Iesu.

<sup>5</sup>Nau Saelas me Timoti lalu ghe kasu vulila provinsi eteva eMesedonia me lalu ghe rekatala eKorint, Pol ghe ruula tani uungu tani ghelei tenti, me ghe poppooa nonga masi kiukiu ta taumattu ngatoa, me ghe aaulia ngaotu ta ajiu etoa va Iesu Mesaea ia.

<sup>6</sup>Me nau eteva ajiu etoa laghe tam aaloannaia me laghe tiuuala tani auliaa teeia, Pol ghe kakaoaa vella kosa tale ghinnanina tani apasunga va karika ghe laolao aitauaa tee nannaaira, me ghe uela etaira va, "Marova am tam saanga, rangane ateva aue etoka etaimim. Ngaghe gheleila uunguaaghi etaimim. Nge tiitiuaa oia, ngalaolao ta taumattu ngeleka atoa."

<sup>7</sup>Vara me Pol ghe kasu vulila ale nivelu eitaua ngateva, me ghe lao sio tale kateva ale kalakalaa ia tale ale nivelu eitaua ngateva, alena ia kateva taumattu ararina atae ta Titias Jastas, ia aGrik ia me ghe kakkaua ngaitauaa tee ajiu etoa.

<sup>8</sup>Krispas, namuu ia tale ale nivelu eitaua ngateva, ia me ila akapanaaili taumattu ngatoa laghe tokatoka tanganuena laghe aiesoala ta Vau eteva, me tee oroi mene katoa aKorint laghe nongola Pol ghe poppooa, laghe aiesoala me laghe asuulala.

**17:24:** 1 Ki 8:27; Apos 7:48.

**17:25:** Sams 50:12.

**17:27:** Sams 145:18; Jer 23:23.

<sup>†</sup> **17:28:** Pol ghe auliaala

nongina Epimenidis aKrit ia ghe pitila. <sup>‡</sup> **17:28:** Pol ghe mene auliaala nongina Aratus aSilisia ia ghe pitila.

Ais 40:18-20; 44:10-17; Apos 19:26.

**17:31:** Sams 96:13.

**18:2:** Rom 16:3.

**18:3:** Apos 20:34.

**18:5:** Apos

17:14-15. **18:6:** Apos 13:46, 51; 20:26.

<sup>9</sup> Kateva eleivoo Vau eteva ghe aippooaa teela Pol tale nitaatara atae. Ghe uela ta Pol va, "Karika umene matautu! Uppooa ngasarasarakan ta taumattu ngatoa me karika umene ruu tani ppooaa.

<sup>10</sup> Ta aghi aue atoka teeio, me karika teva aue eroo tani ghelei saasakieinio. Poli oroi ila kapughu taumattu ngatoa tale lo atae oia masaliki taatara."

<sup>11</sup> Liuna avalua o me Pol ghe tokala eKorint erooroo kateae ninamanama me ghaonomo (6) ulana, tani apasunga inangarina ateva God etaira.

<sup>12</sup> Me nau Galio ghe gavanaala tale provinsi eteva eAkaia, ajiu etoa laghe tingina aitauaala tani kune atoka Pol, me laghe laoainie sio tale liu niaiskei nongina Galio ghe ghelei niaiskei.

<sup>13</sup> Laghe ue va, "Taumattu ngateva oia ghe aauliaa ta taumattu ngatoa va la kkaua God tale llo salana karika eaaimuli tee loo."

<sup>14</sup> Nau Pol ghe anna tani sama, Galio ghe uela ta ajiu etoa va, "Marova lo ateva oia taumattu ghe gheleila righi voto sesaili, aghi aue aroo tani nongo inangariimim.

<sup>15</sup> Me isaa o nikokkolomi tale inangari, arari me tale uneimim inangari nipaopao, am, am ghelei me am toka amasina. Karika va aghi aue aghelei niaiskei tale isaa o ase voto."

<sup>16</sup> Liuna avalua o me Galio ghe sungi vellala tale liu niaiskei.

<sup>17</sup> Vara me ila akapanaaili laghe poso atokala Sostenes, ia namuu ia tale ale nivelu eitaua ngateva me laghe uviela emua tale liu niaiskei. Galio karika ghe aisauseinilala.

### *Prisila, Akuila me Apolos*

<sup>18</sup> Pol ghe mene toka taula eKorint oroi nau. Vara me ghe kasu vulila tau ngaisesoa ngatoa me ghe lao sio tale masaliki taatara atae eKenkria tani aikaai tale anua ateva tani lao eSiria, me Prisila me Akuila lalu ghe usiela. Auena ghe aikaai ghe ggalila uu nguruna eKenkria mausi inangari nialokoi ghe gheleila ta God.

<sup>19</sup> Laghe rekatala eIpises, me Prisila me Akuila lalu ghe tokala. Me Pol ghe lao sio tale ale nivelu eitaua ngateva tani aippooaa tee ajiu etoa.

<sup>20</sup> Nau laghe kolomiela va etoka teeila tale mene kasina nau, Pol karika ghe aloannala.

<sup>21</sup> Nau ang ghe kasukasu, ghe gheleila inangari nialokoi eteva, ghe uela va, "Aue<sup>\*</sup> amene mae etaimim arova aloannaane God." Vara me ghe saesaela tale anua ateva tani kasu.

<sup>22</sup> Nau ghe rekatala eSiisaria, ghe saela eJerusalem, me ghe soula taumattu ngatoa tale ale manga ateva tale nimasimasi, me ghe aippooaa teeilala. Vara me ghe siola eAntiok tale provinsi eteva eSiria.

<sup>23</sup> Pol ghe tokala kasina nau okae eAntiok, vara me ghe kasula tani lao akapa see tale provinsi elua eGalaisia me ePrigia, tani asarasarakana tau ngaisesoa ngakapa atoa.

<sup>24</sup> Kateva tana ajiu, ararina atae ta Apolos, ghe lutula tale masaliki taatara atae eAleksandria, me ghe mae sio tani toka eIpises. Alomasaanga ia tale Uru ngai Manga ateva, me muenna ia tee tani aippooaa.

<sup>25</sup> Auena ghe mae eIpises, laghe apasungaala salane Vau ngepona ateva etana, me nannaane sarasarakanaili tani mene apasunga ta mene katoa. Ghe aaulia ngamasinaaili voto Iesu ghe gheleila, arongona ta ghe kilakila nonga niaasuu kanna Jon.

<sup>26</sup> Ghe tiauala tani ppooa ngasarasarakan tale ale nivelu eitaua ngateva, me karika ghe maamatautu. Nau Prisila me Akuila lalu ghe nongoala, lalu ghe koloala va elao tanagueirarua me lalu tani aulia ngamasinaaili salane God etana.

<sup>27</sup> Nau Apolos ghe aloanna tani lao eAkaia, tau ngaisesoa ngatoa laghe asarasarakanaiel, me laghe pitipiti lao sio ta lo atoa okae disaepolo laghe tokatoka eAkaia va la soua me la ghaia. Nau ghe laa rekataa sio, ghe saasausi emasinaaili lo atoa taumattu tale maamasinaane God me laghe aiesoala.

<sup>28</sup> Ghe apalala ajiu etoa, nau laghe aissakeanaala tale tummatavanga, poli ghe aapasunga tale Uru ngai Manga ateva va Iesu Mesaea ia.

## 19

### *eIpises*

<sup>1</sup> Nau Apolos ghe tokatoka eKorint, Pol ghe usilaala salana ngelae atikirighi. Emulina ghe rekatala tale masaliki taatara atae eIpises me ghe saopila katoa tana disaepolo.

<sup>2</sup> Me ghe kolomilala va, "Ngam ghe ghaala Spirit Manga ateva nau eteva am ghe aikaaiaila?"

---

<sup>18:10:</sup> Jos 1:9; Ais 41:10.    <sup>18:18:</sup> Nam 6:18; Apol 21:24.    \* <sup>18:21:</sup> Kasina uru ngai laghe pitila, laghe mene pitila va Aue atani lao eJerusalem tani toka tale nivelu eitaua ngateae.    <sup>18:28:</sup> Apol 9:22.    <sup>19:1:</sup> 1 Ko 3:6.    <sup>19:2:</sup> Apol 8:16.

Laghe liula me laghe uela va, "Karika, me karika ami ghe nongo poi va teva Spirit Manga etokatoka."

<sup>3</sup> Me Pol ghe kolomilala va, "Saa talo niaasuu eteva am ghe ghaiela?"

Me laghe liula me laghe uela va, "Kanna niaasuu Jon."

<sup>4</sup> Pol ghe uela va, "Lo ateva niaasuu Jon ghe gheeleia, pei ninna ngaioghioghia ia. Me ghe uela ta taumattu ngatoa va la ghaisoaa tale lo ateva taumattu aue emae emuli etana, ia o taumattu ngateva Iesu ta ngetana."

<sup>5</sup> Nau eteva laghe nongola isaa o inangari, me laghe ghaala niaasuu tale ararina atae Vau eteva Iesu.

<sup>6</sup> Nau Pol ghe saoaala nimane etaira, me Spirit Manga ateva ghe sio mae etaira me laghe samala tale asease nisama me laghe aauliaa inangarina God.

<sup>7</sup> Ila o disaepolo atoa ooroiaira erooroo kasangaulu ghalua (12).

<sup>8</sup> Pol ghe ssola tale aleira ale nivelu eitaua ngateva me ghe poppoaa inangarina Iesu me aririmangalina ateva God, me karika ghe maamatautu, me kotolu ulana ghe ppooala isaa o inangari me ghe tootoonga tani ghaa oghi nannaairia.

<sup>9</sup> Me katoa laghe tam anna tani nongo me laghe tam aikaiaa. Laghe poppoaa saasakiaa tale salane Vau ngepona ateva ta tummatavanga. Isaa avalua o me Pol me disaepolo atoa laghe ruula tani lao tale aleira ale nivelu eitaua ngateva. Pol ghe poppoaa inangari tale kateva kateva nau elome tale unna sikulu eteva Tiranus.

<sup>10</sup> Ghe roola ghaluae ninamanama Pol ghe ghelei evaluela o, liuna avalua o me ila akapa taumattu ngatoa tale provinsi eteva eEisia, ajiu ila me aGrik ila, laghe nongola inangarina ateva Vau eteva.

### *Natuna atoa Skeva*

<sup>11</sup> God ghe gheelei mirikolo ouna tale uunguaane Pol.

<sup>12</sup> Taumattu ngatoa laghe mae ghaaghia unna aiaasae ateva Pol aiungu ia me unna aiulua matane, me emulina laghe laa ghaatulituli ta kapuira tau sessa atoa, me laghe maamasina me lo atoa raroai etoa laghe kupilala, raroai etoa laghe kasukasuvulila.

<sup>13</sup> Katoa ajiu laghe uungu ekapa see tani tiu velu raroai etoa, me laghe asease ararina atae Vau eteva Iesu tani toongi tani tiu velu raroai etoa tale taumattu ngatoa. Laghe ue va, "Tale ararina atae Iesu, ia o Pol epoppoaa inangarina ateva, ami aauliaa etaimim va am kupi ghoa mae."

<sup>14</sup> Natuna taita ghaitu (7) Skeva, ia namuu ia ta pristi etoa, laghe gheelei isaa o voto.

<sup>15</sup> Kateva nau laghe gheleila ase nippooa ngateva o me raroai eteva ghe liula me ghe uela va, "Akilakila Iesu me akilakila Pol, me am tani see am?"

<sup>16</sup> Me taumattu ngateva oia raroai eteva elome etana ghe aoso atoka saela etaira me ghe uvi saasakieinilala. Ase niuviuvi eteva ghe uvilala etana sesaaili ia, laghe ilou velu ghoala tale ale ateva karika ghinnaniira me vilikiira ghe raerae.

<sup>17</sup> Ila akapa ajiu etoa me Grik etoa elpises laghe nongo avaluela o me laghe matautu saasakiala me laghe tau saela ararina atae Vau eteva lesu.

<sup>18</sup> Orioeli lo atoa laghe aikaiaa laghe mae sio tale matavanga me laghe aulia ngaotula sesa gheeleiaairia.

<sup>19</sup> Me oroi ila taumattu ngatoa laghe gheelei nialaala laghe maeaa tee sio uneira vuku isaa o inangari nialaala elome etana me laghe tuula vuku ta mata taumattu ngatoa. Laghe ira akapala aipolipolina isaa o voto laghe tuula ghe roola ghalimangaulu airari (50,000) silva koen.\*

<sup>20</sup> Tale ia o salana atikirighi me inangarina ateva Vau ngepona ateva ghe kasu ekapa seela me ghe pinosa akorokoronganala.

<sup>21</sup> Nau llo ghe lutula, me Pol ghe mnaala tani lao ejerusalem me ghe annaa va elao mua tale provinsi elua eMesedonia me eAkaia, me ghe uela va, "Nau eteva atara ejerusalem, atanii lao tee eRom."

<sup>22</sup> Pol ghe suula kapuna tau ngai sausi elua ta Timoti me Erastus tani muemue lao eMesedonia me ia Pol ghe toka taula tale provinsi eteva eEisia.

### *Niaikkaluii eteae elpises*

<sup>23</sup> Tale isaa o nau kinatama niaikkaluii eteae ghe lutula mausi salane Vau eteva.

<sup>24</sup> Tau ngai gheelei toootoo voto tale silva, ararina atae ta Demetrius, ghe gheelei isaa o lutu toootoo ale, alena ia o goto ateva vause ia, ararina atae ta Atemis. Ia me lo atoa laghe gheelei isaa o voto, laghe ghaaghia orioeli viliki veu. <sup>25</sup> Demetrius ghe kolo aitauaala lo

\* 19:4: Mat 3:11. 19:6: Apos 8:17; 10:44, 46.

19:11: Apos 14:3.

19:12: Apos 5:15.

19:17: Apos 5:11.

\* 19:19: silva koen Silva koen aipolina kateva nau.

19:21: Apos 23:11; Rom 1:13.

19:23: 2 Ko 1:8.

atoa la uungu eitauua tale ia o niuungu eteva me ghe uela etaira va, "Kapughu etoa, am kilakila va ita ghaagħha masi viliki veu tale ia oia niuungu eteva.

<sup>26</sup> Me am taatara me am nongonongo vaalua taumattu ngateva oia ta Pol nge għala oroi taumattu elpis sae provinsi ekapa ateva eEisia. Eue va tootoo goto atoa taumattu ngatħo la għeelei karika va goto ila.

<sup>27</sup> Aue ita sesa, karika nonga tale niuungu eteva oia ta tee tale uunguua nikkaua, tale alena nikkaua ngateva goto ateva vause ia ta Atemis, me karika aue la oneoneainia, me karika masau me lo atoa tee la tautue sae eEisia me tale kosa akapa ateva aue la ruu tani tħalli.

<sup>28</sup> Nau lagħe nongola llo oia, għe sessai saasakieinlala me lagħe tiuала tani ovaova. Lagħe ue va, "Atemis, kapuita ia alpis sae atoa, namuu ia."

<sup>29</sup> Karika masau me ia akpa masaliki taatara atae ēIppis lagħe tiuала tani aisamaa iċċi etingina, me katengaata nonga ta lagħe kunela Gaeas me Aristakus, taumattu ngalua oia aMaledonia ilalua, me lalu għe kasukasu tee Pol, me lagħe ssoainilaluelu tale liu ngai velu eitħi ngateva uneira ia alpis sae.

<sup>30</sup> Pol għe anna tani lao ta taumattu ngatħo me disaepolo atoa lagħe aarongia.

<sup>31</sup> Me tee katoa namuu ta gavman kapuna ila Pol lagħe suula inangari ta Pol va erau mene laa sso elome tale liu ngai velu eitħi ngateva.

<sup>32</sup> Taumattu ngatħo lagħe aaisamaa iċċi. Lagħe ovaova me lagħe aauliaa inangari karika issaa aitħuwa me oroi ila lo atoa lagħe lao sio karika lagħe kilakila vaalua me lagħe lao sio tale ia o nivelu eitħi ngateva.

<sup>33</sup> Ajju eto lagħe bbi tau ssola Aleksanda emua ta taumattu ngatħo me katoa lagħe ovaova me lagħe auliaa teeffa inangari va egħeilei righi voto. Me għe paopaq ta nimane val matu atingħi poli għe anna tani aulia ngħażu inangari ta taumattu ngatħo.

<sup>34</sup> Nau eteva lagħe kilala va ajju ia lagħe ovaovala għe roola għalua aoa. Lagħe ue va, "Atemis, kapuita ia alpis sae atoa, namuu ia."

<sup>35</sup> Kapuira tau ngapipitipi eteva kansolo atoa għe paola taumattu ngatħo me għe uela va, "Taumattu nge īppis atoa, kosa akpa ateva ekkilakila va masaliki taatara atae ēIppis eaġġitħa ale nikkaua ngateva kinatma għo ateva Atemis me tootona ateva għe katuula elomarase me għiex sio mae.

<sup>36</sup> Liuna avalua o me voto oia karika teva eue va kamena. Am tani matu atingħi me am rau mene ailului tani għeilei righi voto me aue masi ninannha emma.

<sup>37</sup> Am maċċaa sio taumattu ngalua oia me karika lagħe ainao poila righi voto tale ale manga me karika lagħe auliaa saasakia teela kapuita goto ateva vause ia.

<sup>38</sup> Arova Demetrius me kapuna atoa righi sessa aiaira ta teva taumattu, la laoa tale niaisakei, me gavħanaa etokatoka aue erooroo tani għeilei eghulugħi luu niaisakei.

<sup>39</sup> Arova righi voto am mene anna tani auliaa, am laoa tale nivelu eitħi ngateeb nau namu ngatħo la koloam wa am lao me la nongoam.

<sup>40</sup> Isaa avalua o me ngħiex tokala tale voto sesa me ita roro oħalli va ita aisakei poli marova la kolomi wa mausi saa ita għeilela isaa o voto, karika aue ita għe auliaa righi liuena."

<sup>41</sup> Nau għe ruula tani auliaa isaa o voto me għe sungi vellala.

## 20

### Isaa eMaledonia me eGħis

<sup>1</sup> Nau niaikkalui għe kapala me Pol għe kolo aitħuwa disaepolo atoa me għe aippooaa teelila tani asarasaraknaila, me għe kasu vu lill tħalli tani sio eMaledonia.

<sup>2</sup> Għe kasu seela tale lo ateva o provins me għe kaarasilha tani aippooaa teefiha tħalli tħalli orieħi masi inangari tani asarasarakana isaa o taumattu, me għe rekatala eGħis,

<sup>3</sup> me għe tokala kotolu ulana. Nau għe anna tani lao eSīra tħalli anu aħnej, ajju eto lagħe loeloe tani uvi ematea. Liuna avalua o me għe mene aikolikolha nannaane va emmene oħġi sae eMaledonia.

<sup>4</sup> Għe kasu eitħuwa teela Sopata natuna ia Pirus, aBerrija ja, me Aristakus me Sekundus aTsalonika ilalua, Gaeas aDebi ja, Tikkus me Tropimus tħallix irarua eEisia, me Timoti.

<sup>5</sup> Isaa o taumattu lagħe muemuela tani sio toħiengħalua eTroas.

<sup>6</sup> Me anglu\* għe tiu għoala ePilipae nau nivelu eitħi ngateeb tale verete karika righi isti etħan għe ruula. Għalima (5) nau anglu għe iloula tħalli anu aħnej, me anglu għe siġla tani tħalli isaa o taumattu għe toħiengħalua eTroas. Ami għe tokala għħaliu (7) nau eTroas.

*Iutikas ghe totula tale nimate eTroas*

<sup>7</sup> Airuuuu tale nau manga ateva, ami ghe toka aitauaala tani piri verete<sup>†</sup> me Pol ghe ppooala ta taumattu ngatoo. Ta ave ghe pai me ghe kasu, ghe ppooala lomosi ta ghe ghaala elomatuua voo.

<sup>8</sup> Oroieili lam aitaatare tale ale ngepona atiulu ami ghe tokatoka etana.

<sup>9</sup> Tale uindoaa ngateae aliki taita ateva ararina ateeae ta Iutikas ghe asekanue atokala. Nau Pol ghe aippooaa Iutikas ghe llusu etokala, me ghe laa sae katuu arau epone tale aiaakotonna atiulu ale tale ale ngepona ateva, me ghe siola arau etapaa kosa. Laghe siola tani sauua me matena ia.

<sup>10</sup> Pol ghe kkure siola me ghe tturru siola me ghe saula aliki taita ateva me ghe uela va, "Am rau mene matautu, ta sakesake ia."

<sup>11</sup> Vara ghe mene saela epone me ghe pirila verete me laghe namanamala. Laghe aippooala lomosi ta ghe paila me ghe kasula.

<sup>12</sup> Taumattu ngatoo laghe ghaala aliki taita ateva oia me laghe laoainie sio tanganuena sakesake ia me laghe masimasieiliila.

*Pol ghe aippooa ngaruula ta elda ngatoa eIpises*

<sup>13</sup> Ami ghe muemuela tale anua ateva me ami ghe ssola tale masaliki eteeae eAsos tani kaai Pol ta ghe uela va ave enim kasuua me ami mae kaaia okae.

<sup>14</sup> Nau ta ghe souemamila eAsos ami ghe kaaielaa me ami ghe lao sio tale masaliki taatara ateeae eMiletini.

<sup>15</sup> Mene kateva nau ami ghe tiu ghoala me ami ghe rekatala tale patunganua ateva ekios. Lo ateva o nau ghe lange sio me ami ghe ssola tale patunganua ateva eSamos, me ghe paila ta mene kateva nau, me ami ghe rekatala tale masaliki taatara ateeae eMiletus.

<sup>16</sup> Pol ghe nnaala tani lau etoka eIpises ta la rau mene appataia tale provinsi eteva eEisia. Ta ghe aailuilui tani lao parasi ejerusalem nau ta Pentikos, arova ghe rooroo.

<sup>17</sup> Isaa o eMiletus Pol ghe suula inangari ta elda ngatoa tale ale manga eIpises va la mae taraiia eMiletus.

<sup>18</sup> Nau ta laghe rekatala ghe uela etaira va, "Am kilakila vaalua aghe toka teeiemla tale mata ngemua ateva nau, nau aghe tani rekatala tale lo ateva oia provinsi eEisia lomosi ta nau oia.

<sup>19</sup> Auungu ta Vau ngepona ateva tale nisiooa ninanna, me rarum mata me maate ta poli loeloeaairia ajiu etoa tani uvi emateaghi.

<sup>20</sup> Am kilakila va karika aghe sio asoasoaa poi tani ppooaa voto llo erooro tani sausiem. Aghe aippooaa tale matavanga me elome tale paa ngaleimim.

<sup>21</sup> Aghaaulia ngaotu ta ajiu etoa me Grik atoa va la kiri mae ta God tale ninna ngaioghioghiaa me la aiesoaa ta kapuita Vau eteva ta Iesu.

<sup>22</sup> "Me ghaine Spiriti eteva ange tau esarasarakana mae sio ninanna va asio ejerusalem me karika akilakila va saa llo ave elutu etaghi.

<sup>23</sup> Me akilakila nonga va, tale masaliki taatara akapa atoa, Spirit Manga ateva eaauliaa kieghi va ave ale mata voovoo me sesa voto etoitioeghi.

<sup>24</sup> Amasimasi tani mate mausi Vau ngepona ateva, arova aghele ruu uunguua Vau eteva Iesu ghe sungieghila tani ghelei, va appooa ngaotu masi kiukiu tale maamasinaane God.

<sup>25</sup> Aghe kasu ekapa seela etaimim tani ppooaa ararimangalina ateva God me ghaine akilakila va karika teva etaimim ave emene taraieghi.

<sup>26</sup> Agħħauliaa etaimim ghaine va, marova toa etaimim karika la saanga, karika righi uunguagħi etaimim,

<sup>27</sup> poli karika aghe maamatatu tani aulja ngaotu aloannaane akapa God etaimim.

<sup>28</sup> Am aitara ngamasinaiem me isaa o llo taumattu Spirit Manga ateva ang ghe għeleiemla va am tau ngai toitoi iem tale ale manga ateva. Ia o ale manga ateva God għoli poliela tale raena ateva.

<sup>29</sup> Akilakila va nau akasu vuliem katoa taumattu nongina sesa paua ngetapaa tuvui etoa aue la kupi sso tani tootoonga tani ghelei saasakiaa taumattu.

<sup>30</sup> Me elome ta ngetaimim katoa aue la tingina sae tani auljaa voto llo kamena me oroi ila lo atoa etaimim la aikaiaa aue la oghi tani laa aimuli teeila.

<sup>31</sup> Liuna avalua o me am paniem. Me am rau mene kkaluaa va kotoluae ninamanama karika aghe aamaomao tani auljaa kie kateva kateva ta ngetaimim, ellaa me eleivoo rarum matagħi ghe kaokao ta poliim.

<sup>†</sup> **20:7:** *piri verete* Katoa la nannaa va malloeana va ninamanama ateeae nongina Iesu me disaepolo atoa laghe għeileha tale ale ngepona atiulu, me katoa la nannaa va nim ninamanama ateeae. **20:17:** Apos 18:21. **20:18:** Apos

18:19-19:10. **20:23:** Apos 9:16; 21:11. **20:24:** Apos 21:13; 2 Tim 4:7. **20:28:** 1 Tim 4:16; 1 Pita 5:2-4. **20:29:**

Mat 7:15; Jon 10:12. **20:31:** 1 Tes 2:11.

<sup>32</sup> "Ghaine ngatautauem lao ta God me inangarina tale maamasinaane erooroo tani atuutulu ta ngetaimim me etaau aatu voto akapa ghe aulia ngalokoila ta lo atoa ang ghe suilala va ila manga ila.

<sup>33</sup> Karika aghe sassai poi lo atoa uneira viliki veu me ghinnaniira.

<sup>34</sup> Am kilakila vaalua aghe uungu tale nimaghi eluelange tani ghaa aloannaaghi me kapughi etoa.

<sup>35</sup> Tale voto akapa agheelei, aghaapasunga etaimim va ita uungu aanasa avalua o tani aisausiaa lo atoa karika sarasarakanila, me anannaa inangarina Vau eteva Iesu ghe auliaala va, Oroeili nimasimasi emaemaet ta lo ateva taumattu epaaparruu, elaulau lo ateva enim anna tani toka ghaaghha."

<sup>36</sup> Nau ghe ruula tani auliaa llo, me ghe suuiala me tee lo atoa laghe usiusia me ghe looloo saela.

<sup>37</sup> Ila akapa laghe tiuuala tani ngala me laghe llotiela me laghe ngusuela.

<sup>38</sup> Voto ateva ghe tani gheleilala me laghe alousiusieilila, ia o tuku inangarina ateva ghe uela va karika aue la mene tarai. Vara me laghe kasu eitauaa teeielala tani sio tale anua ateva.

## 21

### *Pol ghe saela eJerusalem*

<sup>1</sup> Ami ghe kasu vulilala me ami ghe laa ghoa aikaai tale anua ateva me ami ghe tiu ekorokoro ghoala tani lao tale patunganua ateva eKos. Ghe pai saela me ami ghe rekatala tale masaliki taatara atuae eRodis me ami ghe mene lao sio tale masaliki taatara atuae ePatara.

<sup>2</sup> Ami ghe tarala anua ateva ghe laolao ePoenia me ami ghe aikaaila etana me ami ghe tiu ghoala.

<sup>3</sup> Ami ghe kautula eSaeparsi me karika ami ghe ssola, ta ngami ghe laa siosio tale pai saot ativilau me ami ghe lao sio eSiria. Ami ghe ssola tale masaliki taatara atuae eTaer me anua ateva ghe kapela ghinna.

<sup>4</sup> Ami ghe tarala disaepolo atoa me ghaitu (7) nau ami ghe toka teeilala. Spiriti eteva ghe auliaala ta taumattu me laghe aaulia ngasarasarakana ta Pol va erau mene sae eJerusalem.

<sup>5</sup> Nau eteva naumami tani toka ghe kapala, ngami ghe mene tiutiu gho. Disaepolo atoa, vauseniiro atoa me natuira atoa laghe ghoala tani oghi eleka tale masaliki taatara atuae me ami ghe suuiala tani looloo sae elosamarra.

<sup>6</sup> Laghe oghi ghoala etaimami me ami ghe aikaaila tale anua ateva me ila laghe oghi lao sio tanganeueira.

<sup>7</sup> Ami ghe tiu ghoala eTaer me ami ghe lao sio tale masaliki taatara atuae eTolimais. Ami ghe soula katoa laghe aaiesoa ngaitauaa teeiemami, me ami ghe toka teeilala kateva nonga nau.

<sup>8</sup> Ghe pai saela me ami ghe kasula tani lao eSiisaria. Ami ghe tokala tangantuena Pilipi, tau ngai ppooaa masi kiukiu ia, me kateva ta ghaitu (7) tau ngai uungu laghe suitoongainilala eJerusalem.

<sup>9</sup> Ghaata natuna vase karika lailai laghe poppoaa inangarina Vau ngepona ateva.

<sup>10</sup> Ami ghe tokala mene kasina nau me kateva propete ararina atuae ta Agabas ghe kasula ejjudia ghe sio mae.

<sup>11</sup> Ghe mae sio etaimami me ghe ghaala ai-irina atuae Pol me ghe irila nimane me kkena etana. Me ghe uela va, "Spirit Manga ateva euela va nongina nga irieghila, aue ajiu etoa eJerusalem la iri etoka lo ateva ai-irina atuae oia me la taeu lao ta tau ngeleka atoa."

<sup>12</sup> Ami ghe nongo avaluela o me ami me taumattu nge Siisaria ngatoa ami ghe aaulia ngakorokoronganala ta Pol va, "Urau mene sae eJerusalem."

<sup>13</sup> Vara me Pol ghe liula me ghe uela va, "Vaalua me am ngangngala me am gheelei nannaaghi eaalousiusi? Karika aghaimonomonosiaa nonga tani karavusu ta tani mate tee eJerusalem tale ararina atuae Vau eteva Iesu."

<sup>14</sup> Nau eteva karika ghe roola tani nongoamami, ami ghe ruula tani aippooaa, me ami ghe uela va, "Masina, aloannaane Vau ngepona ateva aue eghelei."

<sup>15</sup> Kasina nau ghe lange sio me ami ghe aimonomonosiaala ghinnaniimami me ami ghe saela eJerusalem.

<sup>16</sup> Katoa disaepolo eSiisaria laghe usiemamila laghe laoainiemami sio tanganue Nason, me ami ghe tokala o. Ia atala nge Saeparsi ia, me ia kateva disaepolo ghe tiuaa ngakasinala tani aikaiaia.

*Pol ghe rekatala eJerusalem*

<sup>17</sup> Nau eteva ami ghe rekatala eJerusalem tau ngaisesoa ngatoa laghe masimasieiliila tani souemami.

<sup>18</sup> Ghe pai saela, ami me Pol ami ghe lao sio tani tara Jeimis, me elda ngakapa atoa laghe mae tee sio.

<sup>19</sup> Pol ghe soulala tale nimasimasi me ghe aulia ngakapaailila voto God ghe gheleila elome tale taumattu ngeleka atoa tale uunguaane.

<sup>20</sup> Nau eteva laghe nongola kiukiu, laghe tau saela ararina ateeae God. Vara me laghe uela etana va, "Kapumami, angu tarala ghaisa airara taumattu nge Jiu ngila ghe aiesoala me ila akapa la sarasarakanal tale inangari nipaopao.

<sup>21</sup> Ngila ghe nongola va io Pol ughe uela ta ajiu etoa la tokatoka tee taumattu ngeleka atoa va la liu viliiira tale inangarina Moses me ughe ue teela etaira va la rau mene iso natura taita atoa me la rau mene aimuli tee gheeleiaira tuvuuta atoa.

<sup>22</sup> Aue la kila va angu ghe mae sio. Me sa ateva ami gheleia?

<sup>23</sup> Ughelei sa ateva ami auleiniae etam. Taumattu ghaata laata tokatoka teeiemami laata ghe gheleila inangari nialokoi ta God.

<sup>24</sup> Ughaa isaa o taumattu me am lao tale ale manga ateva me ughusilaa me am uunguaa niraarangisana, me upoli voto la ghelei pei nipli me aue la ggali uruira tani ghelei rooroaa inangari nialokoi, me ila akapa aue la kila va kiukiu la aauliaa teeio kamena ta io uaaimuli tee inangari nipaopao.

<sup>25</sup> Me ta tau ngeleka atoa la ghaaiakaia, ngami ghe pitipitila etaira tani auliaa nannaaimami va la rau mene nama malatau la gheelei sae aiaavusuvusuena tale tootoo atoa, me tale rae, me malatau tale asease ghaata kkema atoa la kiikii pule aloira, me la rau mene lai salosalooa see."

<sup>26</sup> Ghe pai saela me Pol ghe ghaala isaa o taumattu me laghe lao sio tani ghelei eraarangisanaila me ghe ssola tale ale manga ateva tani auliaa ta pristi etoa va saa nau eteva uunguaa tani ghelei eraarangisanaila eruu me kateva kateva etaira etaula opring.

*Laghe kunela Pol*

<sup>27</sup> Ghaitu (7) nau ghe ruuruu me katoa ajiu tale provinsi eteva eEisia laghe tarala Pol tale ale manga ateva me laghe sulungila taumattu ngatoa me laghe poso atokala Pol.

<sup>28</sup> Laghe aaore tani ue va, "Taumattu nge Israeli etoa, am sausiemami, poli ia oia taumattu ngateva eaapasunga ngakapa see tani akupi kapuita taumattu me uneita inangari nipaopao me ia oia ale manga ateva. Me ange kupiaa tee sso mae taumattu nge Grik atoa tale ale manga ateva tani avulutu voto ateva manga ia."

<sup>29</sup> Kasina nau ang ghe lange sio laghe tarala Tropimus alpises ia tale masaliki taatara ateeae tee Pol me laghe annaa va Pol ghe kupieinie ssola tale ale manga ateva.

<sup>30</sup> Taumattu ngatoa laghe nongola isaa o inangari me ila akapa eJerusalem ghe sessailala me laghe aisokosokoila me laghe posola Pol, me laghe ae velue ghoala eleka me laghe kavatila atamana atoa tale ale manga ateva.

<sup>31</sup> Nau laghe tootokaa tani ubi emate Pol, inangari ghe ghaala namu ngateva ghe aaitoiaa tau ngai uvii nge Rom akapa atoa eJerusalem va ila akapa eJerusalem laghe aaiKKalui.

<sup>32</sup> Gherangia nonga ta ghe ghaala tau ngai uvii etoa me namu ngatoa laghe aaitoiaa kateva ai (100) tau ngai uvii me laghe ilou siola kona taumattu ngatoa laghe tokatoka. Me nau taumattu ngatoa laghe tarala tau ngai uvii etoa, laghe ruula tani ubi Pol.

<sup>33</sup> Namuu tale tau ngai uvii etoa ghe lao sio me ghe kunela Pol me ghe uela va la iri etotkaia tale sene alua me ghe kolomilala va, "Saa taumattu ia me sa ateva ghe gheleielia?"

<sup>34</sup> Ila akapa taumattu ngatoa laghe aisaamaii me namu ngateva ghe tam rooro tani nongo, ta laghe aisavalaii poli kateva etaira ghe auliaa nannaane. Me ghe uela ta kapuna atoa va, "Am ghaiielia me elao tale ale ateva tau ngai uvii etoa la tokatoka etana."

<sup>35</sup> Nau Pol ghe rekata lao sio tale aisaesae ateva me tau ngai uvii etoa laghe tarala va taumattu ngatoa laghe annaaili tani ubi ematea, liuna avalua o me laghe sauvela.

<sup>36</sup> Taumattu ngatoa laghe aaimuli me laghe aippooa ngasarasarakanalili va emate.

*Pol ghe aippooa teela taumattu ngatoa*

<sup>37</sup> Tau ngai uvii etoa laghe aainasiaa tani ghaa Pol me ghe lao tale ale ateva tau ngai uvii etoa laghe tokatoka etana me Pol ghe ue lao sio ta namu ngateva va, “Erooroo va aghaippooaa teeio?”

Me namu ngateva ghe uela va, “Ukilakila inangari nge Grik?

<sup>38</sup> Aghannaa va io kateva aljip kasina nau ang ghe lange sio ghe tiuuala niaiuvi eteae me ghe muemuaala ghaata airari (4,000) tau niaiuvi tale iema me laghe ssola tale voto ateva karika righi taumattu etana.”

<sup>39</sup> Pol ghe liula me ghe uela va, “Aghi ajiu ieghi me tanganueghi eTases tale provinsi eteva eSilisia, me karika va nim taumattu ieghi tale teae ghauna masaliki taatara. Utan velueghi me aghaippooaa tee taumattu ngatoa.”

<sup>40</sup> Nau namu ngateva ghe tau veluela tani aippooaa me Pol ghe tingina saela tale aisaesae ateva me ghe paolala ta nimane va la rau mene sama. Laghe matua ngatinginala me ghe aippooaa teeilala tale inangari nge Hibru.

## 22

<sup>1</sup> “Tamaghi etoa, tueghi me nengaghi etoa, am nongo! Isaa oia nga ghaloanna tani aulia ngamasalika etaimim va aghi karika aghe ghelei saasakiaala teva voto.”

<sup>2</sup> Nau laghe nongola Pol ghe samasamaa nge Hibru teeilala laghe matua ngatinginala.

Me Pol ghe uela va,

<sup>3</sup> “Aghi ajiu ieghi, aghe lutula eTases, tale provinsi eteva eSilisia, me aghe namuu oia ejerusalem. Aghi kapuna tau ngai ghaa alomasaanga ieghi Gamaliel. Ia ghe apasunga ngamasinaailila inangari nipaopao ghe ghaala ta tuvura atoa, me aghe tauueghi lao sio tani ghelei uunguaane God, nongina am akapa am uunguaa ghaine.

<sup>4</sup> Aghe gheelei saasakiaa ta lo atoa laghe uusilaa salane atikirighi Iesu tani atokaila tale nimate. Aghe kunekune taita me vasee atoa tani atokaila sso tale ale mata vooovo.

<sup>5</sup> Namu ngateva ta pristi etoa me Kansolo akapa atoa aue la aulaa etaimim va koronna llo oia aghaaulaa. Laghe pitila uru ngai ta namu ngatoa ta ajiu etoa eDamaskas va asio kune katoa kapuita okae tani sae attara matanaila ejerusalem.”

### *Pol ghe kiukiuaala vaalua ghe aikolikoliaala*

<sup>6</sup> Pol ghe mene uela va, “Aghe kasukasu elaa siosio eDamaskas, elo sinaka, ngaghe akalakalalaa me arovaeaa ta kinatama mallanga ateva ghe sio mae epona liu, mallangina ateva ghe ghaaieghila.

<sup>7</sup> Me aghe katuula tapaa kosa, me aghe nongola lingi ngalo ateva ghe uela va, ‘Sol, Sol, vaalua me ugheelei saasakieinaghi?’

<sup>8</sup> “Me aghe liula me aghe uela va, ‘Io see, vau eteva?’

“Me ghe uela etaghi va, ‘Aghi Iesu nge Nasareti ugheelei saasakieinaghi.’

<sup>9</sup> Taumattu ngatoa ami me ila laghe tarala mallanga ateva, me karika laghe nongola lingi ngalo ateva ghe aippooaa teeieghi.

<sup>10</sup> “Aghe kolomila va, ‘Sa ateva agheleia, Vau eteva?’

“Me ghe uela etaghi va, ‘Totula me usio eDamaskas, me kateva taumattu aue eauliaa niuungu ngaghe aimonomonosiaala va ugheleii.’

<sup>11</sup> Aghe mata salusalula poli mallanga ateva namungaili ia. Lo atoa ami me ila laghe katulainaghila tani sso eDamaskas.

<sup>12</sup> “Kateva taumattu ghe tokatoka eDamaskas, ararina atuae ta Ananaeas, ghe aaimuli tee inangari nipaopao, me laghe aanamunamunganeia ajiu etoa laghe tokatoka okae eDamaskas.

<sup>13</sup> Ananaeas ghe mae sio tani tingina teeieghi, me ghe uela va, ‘Kapughu Sol, taatarala!’ Me arovaeata ta mataghi ghe otile me aghe taraiela.

<sup>14</sup> “Me ghe uela va, ‘Kapuira Goto ateva tuvura atoa ghe suoongainiola va ukila aloannaane me utara Taumattu ngateva Ghulughuluena ia me unongo llo eaauliaa ta paane.

<sup>15</sup> Io aue uaulia ngaotua ta taumattu ngakapa atoa tale llo voto ughe tarala me ughe nongola.

<sup>16</sup> Sa ateva umene toia? Tingina saela! Ulaa ghaa niaasuu me ukolo tau ararina atuae, me aue epora velu kalum ssavoto.”

### *Vau eteva ghe suula Pol tani laa ppooaa ta mene katoa*

<sup>17</sup> Pol ghe mene uela va, “Nau aghe oghi saela ejerusalem aghe ssola tani looloo sae tale aleira atiulu ajiu etoa tale ale manga ateva, me aghe tarala kateva nitaatara.

<sup>18</sup> Aghe tarala Vau eteva ghe uela etaghi va, ‘Gherangia ta ukasu vuli eJerusalem, poli karika aue la nongo usilainio nau uppooaa inangarighi.’

<sup>19</sup> “Aghe liula va, ‘Vau eteva, la kilakilaailieghi va aghe laolao tale oroi ale nivelu eitauaa, aghe kune kune me aghe paruparu lo atoa laghe aaiesoaa etam.

<sup>20</sup> Nau laghe uvi ematela Stipeni, kapum tau ngai aulia ngaotu ia, aghi aghe tiitingina me aghe tarala uvivviaane me aghe asokoila, me aghe aaitaraa ghinnaniira tau ngai uvina atoa.”

<sup>21</sup> “Vau eteva ghe uela etaghi va, ‘Kasula, ta aue asungio ulao amasaueili ta tau ngeleka atoa.’”

<sup>22</sup> Taumattu ngatoa laghe nongonongo Pol ghe samala lomosi ta ghe uela va elao ta taumattu ngeleka atoa, vara me laghe tiaala tani aore anamungaili. Laghe ue va, “Uvi emateala! Karika masina va etoka!”

<sup>23</sup> Laghe aaore me laghe leelieaa uneira aiaasae ngeleka me laghe veluelu sae au eteva epona.

<sup>24</sup> Liuna avalua o me namuu ta tau ngai uvii etoa ghe auliaala va la ghaa Pol me esso elome tale ale ateva tau ngai uvii etoa la tokatoka etana, me ghe uela va la uetaia me la kolomia va vaalua me taumattu nge Jiu etoa la aaore atingina.

<sup>25</sup> Nau laghe iriria tani uetaia, Pol ghe uela ta kateva namuu eaaitoiaa kateva ai (100) tau ngai uvii ghe tiitingina akalakalangina va, “Emaamasina va am ueta teva sitisen nge Rom karika ghe aisakei?”

<sup>26</sup> Nau ghe nongola isaa o inangari, ghe lao sio tani auliaa ta lo ateva namuu ia etaira akapa. Namu ngateva eaaitaraa kateva ai tau ngai uvii ghe uela va, “Sa ateva ugheleia? Ta taumattu ngateva oia sitisen nge Rom ia.”

<sup>27</sup> Namu ngateva eaaitara ngakapa tau ngai uvii etoa ghe mae sio ta Pol tani kolomia va, “Io sitisen nge Rom io?”

Pol ghe liula me ghe uela va, “Ue.”

<sup>28</sup> Namu ngateva eaaitara ngakapa tau ngai uvii etoa ghe uela ta Pol va, “Aghi aghe vella oroieili viliki veu tani sitisen nge Rom.”

Me Pol ghe uela va, “Aghi sitisen nge Rom ieghi poli tamaghi sitisen nge Romi ia.”

<sup>29</sup> Nau lo atoa tau ngai uvii laghe anna tani kolomi righi nikokkolomi ta Pol laghe nongola va Pol sitisen nge Rom ia laghe matautula me arovaeeata ta laghe tapaila, me kapuira namu ngateva eaaitara ngakapa ie tee ghe matautula, ta ia ghe sungilala tani iri Pol.

<sup>30</sup> Namu ngateva eaaitara ngakapa tau ngai uvii etoa ghe aaloanna tani kila amasina va Pol ghe tani gheleila saa voto sesa. Me ghe pai saela ghe ghaa vella sene laghe irielia etana. Namu ngateva ghe suula inangari ghe lao sio ta namu ngatoa ta pristi etoa me Kansolo atoa tani velu eitauaa. Me eghaa Pol me esio atinginaa ta mataira.

## 23

### *Pol ghe aulia ngaotula inangari ta Kansolo atoa*

<sup>1</sup> Pol ghe pasiala matane ta Kansolo atoa me ghe uela etaira va, “Tueghi me nengaghi etoa, aghe uuungu eitauaa teela God, nannaaghi masinaaili, me gheeleiaaghi masina ange mae ghaa sio ghaine.”

<sup>2</sup> Ghe aulia ngavaluela o me namu ngateva ta pristi etoa, Ananaeas etana, ghe uela ta taumattu ngatoa laghe tiitingina akalakalangina ta Pol va, “Am posalala paane ateva.”

<sup>3</sup> Pol ghe uela etana va, “God aue euvio, poli io nongina aivativati eteva sesa ia, laghe usingiela tale ususoana.\* Unannaa va uaaimuli tee inangari nipaopao? O umae sio tani toka tani ghelei niaiskei etaghi me io ugheelei saasakiaa inangari nipaopao, me uue va la posalaieghi.”

<sup>4</sup> Lo atoa laghe tiitingina akalakalangina laghe uela va, “Vaalua me uppooaa saasakiaa ta namu ngateva ta pristi etoa kapuna ia God?”

<sup>5</sup> Me Pol ghe uela va, “Tueghi me nengaghi etoa, karika akilakila va namuu ia ta pristi etoa. Arova aghe kilakila, karika aue aghele ppooaa teeia, poli tale Uru ngai Manga ateva laghe pitila va, ‘Karika umene ppooaa saasakiaa tee lo ateva eaaitoiaa kapum taumattu ngatoa.’”

<sup>22:18:</sup> Apo 9:29-30.    <sup>22:19:</sup> Apo 8:3; 26:9-11.    <sup>22:20:</sup> Apo 8:1.    <sup>22:21:</sup> Apo 9:15.    <sup>22:25:</sup> Apo 16:37.

<sup>22:29:</sup> Apo 16:38.    <sup>23:2:</sup> Jon 18:22-23.    <sup>23:3:</sup> Mat 23:27.    \* <sup>23:3:</sup> Malloeana inangarina Pol va Ananaeas usimaghalue ia.    <sup>23:5:</sup> Eks 22:28.

<sup>6</sup> Nau Pol ghe kilala va katoa etaira Sadiusi ila, me katoa Paresi ila, ghe sama anamuula tani ue va, “Tueghi me nengaghi etoa, aghi Paresi ieghi, natuira aghi Paresi etoa. Aghaiesoaa va lo atoa laghe matela ave la totu. Liuna avalua o me nga ghaaisakei.”

<sup>7</sup> Nau Pol ghe aulia ngavaluela o me Paresi etoa me Sadiusi etoa laghe tiuaala tani aisamaa. Me laghe tiu reerekataala.

<sup>8</sup> Ta Sadiusi etoa la ghairesoaa va lo atoa la matemate karika la rooroo tani mene totu, me karika righi ensolo me spiriti. Me Paresi etoa la ghairesoaa isaa akapa o voto.

<sup>9</sup> Laghe tiuaala tani aisamaaii enamuu, me katoa tana tau ngai aapasunga tale inangari nipaopao Paresi ila, laghe tiuaala tani aikiso. Laghe ue va, “Taumattu ngateva ona karika righi kanna sesa. Ta koti koronna lo eaauliaa koti spiriti o teva ensolo ghe auliaala etana.”

<sup>10</sup> Me namu ngateva ta tau ngai uvii etoa ghe tarala me ghe nongola niaikkaluii eteae, me ghe matautula. Ghe maamatautu va pai eluevilau lalu rau aisariaa pakapakasi Pol va emate. Maisina avalua o me ghe suula tau ngai uvii etoa tani ghaa velu Pol ta ajiu etoa, me laghe laa ghatokaia tanganueira tau ngai uvii etoa.

<sup>11</sup> Eleivoo me Vau ngepona ateva ghe tingina valaala ta Pol me ghe uela etana va, “Utingina asarasarakana me urau mene matautu. Nongina ughe aulia ngaoetueghila eJerusalem, umene laa ghulia ngepona eRom.”

#### *Ajiu etoa laghe aippooa ngaitauaala tani uvi emate Pol*

<sup>12</sup> Elue talaua me ajiu etoa laghe toka aippooa ngaitauaala va la tani uvi emate Pol. Laghe gheleila inangari nialokoi va karika la mene namanama me la mene ropi ta la tani uvi emate mua Pol.

<sup>13</sup> Ila akapa lo atoa laghe gheleila inangari nialokoi, elaulau ghaatingaulu (40+) taumattu.

<sup>14</sup> Laghe lao sio ta namu ngatoa ta pristi etoa me namu ngatoa tani auliaa kieira va, “Ngami auliaala inangari nialokoi va ami rau mene namanama me ropi ta ami tani uvi emate mua Pol.

<sup>15</sup> Liuna avalua o me am me Kansolo atoa, am suu sae inangari ta namu ngateva ta tau ngai uvii etoa va eghaaie sio me am kame va am mene anna tani ghaa amasina righi inangarina. Auena emae rekataa etaimim, ave ami uvi ematea.”

<sup>16</sup> Me nau aloana ateva Pol ghe nongola inangari laghe aaloanna tani ghelei tee Pol, ghe sela tanganueira tau ngai uvii etoa tani auliaa kie Pol.

<sup>17</sup> Pol ghe kolola kateva namuu ghe aaitoiaa kateva ai (100) tau ngai uvii me ghe uela va, “Ghaala aliki eteva toko me ulaoainia ta kapum namu ngateva me ave elaa ghuliaa inangari etana.”

<sup>18</sup> Liuna avalua o me ghe ghaala aliki eteva me ghe laoainie sio ta namu ngateva ta tau ngai uvii ekapa atoa.

Me ghe uela va, “Pol, tau karavusu eteva, euela va amaeaa aliki eteva etam tani auliaa inangarina etam.”

<sup>19</sup> Liuna avalua o me namu ngateva ta tau ngai uvii ekapa atoa ghe kuneiela, me lalu ghe laa tingina ppae sio, me ghe kolomiela va, “Sa ateva inangari uaaloanna tani aulieinia etaghi?”

<sup>20</sup> Me aliki taita ateva ghe uela va, “Ajiu etoa la ghaippooa ngaitauaala va la kolomio me utau sio Pol ta Kansolo atoa nimanaa. Ave la kameo va la ghaaloanna tani pae amasina liue inangarina Pol.

<sup>21</sup> Me urau mene usilaa inangariira. Katoa etaira elaulau ghaatingaulu (40+), ave la llosu atoka tani uvi ematea. Laghe alokoila inangari nialokoi va la tani uvi emate Pol me la vira namanama me la ropi. O isaa oia la sio toitoi va sa ateva ave uliuia tale inangariira.”

<sup>22</sup> Me namu ngateva ghe uela etana va, “Karika umene auliaa ta teva va angughe mae auliaa sio etaghi.” Me ghe sungi veluela.

#### *Laghe sungiela tani sio ta Peliks*

<sup>23</sup> Liuna avalua o me namu ngateva ta tau ngai uvii etoa ghe kolola ghalua tana namuu me ghe uela va, “Amalu ghaa ghalua ai (200) tau ngai uvii me ghaitungaulu (70) llo ave eilou tale ooso me ghalua ai (200) aisau vaalau me am aimonomonosiaa tani lao eSiisaria ghaine eleivoo ta 9 kilok.<sup>†</sup> <sup>24</sup> Am aimonomonosiaa unna tani ooso Pol me am kasueinia tani siooa ngamasinaia ta Gavana Peliks.”

<sup>25</sup> Me namu ngateva ta tau ngai uvii etoa ghe pitila uru ngai etikirighi ghe uela va,

<sup>26</sup> Aghi Klaodias Lisiás,

Apitipiti sio uru ngai etikirighi etam, Gavana Peliks,

Masi ngelo sinaka etam.

27 Ajiu etoa laghe poso atokala ia o taumattu ngateva me la aloanna tani uvi ematea. Me aghe nongola va ia aRom ia. Liuna avalua o me aghi me tau ngai uvii etoa ami ghe lao sio tani ghaa oghia tale nimaira.

28 Aghe aloanna tani kila va vaalua liuene inangari me aghe laoainie sio ta kapuira Kanso atoa.

29 Me aghe kolomilala, me aghe kilala va laghe nim ghaaiela ta poli uneira inangari nipaopao, me karika ghe gheleila righi voto va emate o esso tale ale mata voovoo.

30 Me ghaine nga nongola va ila aaloanna tani uvi ematea. Liuna avalua o me nga sungi parasie sio mae etam. Me nga ghauliala ta taumattu ngatoa la ghauliaa teeia inangari va la sio tingina ta matam me unongo inangariira.

31 Me tau ngai uvii etoa laghe nongo usilaala namu ngateva me laghe ghaala Pol eleivoo me laghe sioainiel aAntipatris.

32 Ghe paila ta mene kateva nau, tau ngai uvii etoa laghe iloula tale ooso me laghe laoaa sio Pol eSiisaria. Me lo atoa tau ngai uvii laghe nim kaakasuaa ta kkeira laghe oghi saela tale ale ateva tau ngai uvii etoa la tokatoka etana eJerusalem.

33 Me tau ngai uvii etoa la ghe iilou tale ooso laghe laa sio rekataa eSiisaria me laghe taula uru ngai etikirighi ta gavana ngateva me laghe tau tee lao sio Pol etana.

34 Gavana ngateva ghe ritila uru ngai etikirighi, me ghe kolomila Pol va, "Aliaa io?"

Me Pol ghe uela va, "Aghi aSilisia ieghi."

35 Vara me Peliks ghe uela va, "Nau lo atoa la auliaa teeio inangari la rekata, aue avira nongo inangarim." Me ghe uela va, "Am ghaa Pol me esso tale ale mata voovoo ateva tanganuena King Herot."

## 24

### *Pol ghe tinginala emua ta Peliks*

1 Ghalima (5) nau ghe lange sio me Ananaeas, namuu ia ta pristi etoa, me mene katoa namuu me loea ngateva ararina ateeae ta Tetallas, laghe siola eSiisaria tani ghelei niaiskei ta Pol emua ta gavana ngateva.

2 Nau Pol ghe tinginala emua, me Tetallas ghe tiuala tani auliaa teeia inangarina kamena. Eghe ue va, "Namu ngateva Peliks, ami ghe tokatoka tale luei tale oroi nau, poli io ughe aitarainiemami tale alomasaanganiaam, me ughe ghelei emasinala oroi voto karika laghe ghelei emasinala tale lo ateva oia provins.

3 Tale isaa akapaaili voto ughe ghelei seela, ami maamasieinio me ami ue va masinaaili etam.

4 Karika aghaaloonna tani nim rungiaa naum, liuna avalua o aghaloonna va umasimasi me unongo tuku inangariimami erighi.

5 "Ami ghe tarala va ia oia taumattu ngateva egheeeli saasakiaa tokatokaaimami. Etitiuuaa nisessai elome te ajiu etoa tale kosa akapa ateva oia, me emuemua lo atoa la aimuli tee tau ngai aapasunga ngateva aNazareti ia.

6-7 Ghe aloanna tani ghelei saasakiaa ale manga ateva. Liuna avalua o me ami ghe poso atokaiela.\*

8 Arova ukolomia, aue io unongo kila isaa oia voto ami auliaa teeia, koronna."

9 Ila akapa ajiu etoa laghe tingina aitaaua teela lo atoa laghe auliaa teela Pol, me laghe akoronnala va isaa akapa inangari Tetallas ghe auliaala koronna.

### *Pol ghe auliaala nannaane ta Peliks*

10 Gavana ghe nakonakaoala Pol tani aippooaa me Pol ghe uela va, "Akilakila va io ughe aitarala anua ateva oia oroeili ninamanama, liuna avalua o aghaiesoaa va urooroo tani nongo tee inangarighi.

11 Urooroo tani kila amasina va karika ghe laa ghaa kasangaulu ghalua (12) nau me aghe saela eJerusalem tani kkaua.

12 Ila o taumattu ngatoa karika laghe tarala righi voto ami ghe aissakeana teela tale ale manga ateva, o aghe ghelei taumattu va ghe sessaila tale ale nivelu eitauaa me tale masaliki taatara.

13 Me isaa oia inangari la auliaa teeieghi etana, karika la rooroo tani apasunga etam va koronna.

**23:27:** Apo 21:30-33; 22:25-27.    **23:28:** Apo 22:30.    **23:30:** Apo 23:16-23; 24:1-9.    **24:5:** Apo 17:6.    **24:6-7:**

Apos 21:28-30.    \* **24:6-7:** Kasina uru ngai laghe pitila, laghe ue va, *me ami ghe aloanna tani ghelei niaiskei etana tale kaluimami inangari nipaopao.* <sup>7</sup> *Me namu ngateva ta tau ngai uvii etoa, Lisias, ghe mae sio me namungaili ta ghe kune veluela me ghe ghiaa veluela ta nimaimami.* <sup>8</sup> *Me ghe auliaala va ami mae etam.*

<sup>14</sup> Aghaloanna tani auliaa koronna etam va akakkaua Goto ateva kapuira ia tuvuimami etoa me aghaimulusi tee salane Vau eteva Iesu, la ue va kamenia ia. Me aghaiesoa ngakapa inangari nipaopao me inangari propete atoa laghe pitila.

<sup>15</sup> Aghi tee aghaiesoaa God nongina isaa oia taumattu, va aue emene totu isaa akapa ghulughuluena me sesa taumattu tale nimate.

<sup>16</sup> Liuna avalua o atootoonga tani ghelei sa ateva akilakila va ghulughuluena ia nau ekapa atoa ta matane God me taumattu.

<sup>17</sup> "Aghe mene kiri mae sio tani saus kapughu taumattu ngatoa karika righi peiira tale viliki veu, me tani ghelei aiaavusuvusuena, poli ngaghe kasu vella me ang ghe oroila ninamanama me ngaghe vira mene mae sio tani rekataa.

<sup>18</sup> Laghe tarala va raarangisana ieghi nau eteva aghe gheelei isaa oia niuungu elome tale ale manga ateva. Karika oroi taumattu ghe toka teeieghila, me tee karika righi naisamaaiii.

<sup>19</sup> Me kasina ajiu tale provinsi eteva eEisia, arova la nannaa teeieghi righi voto, la ghele mae tingina emua etam me la ghele auliaa nannaaira.

<sup>20</sup> Me isaa o taumattu etokatoka oia la ghele mae aaulia ngaotu righi voto sesa laghe tarala aghe gheleila nau ateva aghe tinginala emua ta Kansolo atoa.

<sup>21</sup> Akilakila nonga kateva voto aghe sama anamuula nau eteva aghe tinginala ta mataira: Aghe ue va, 'Aghaiesoaa ta God va aue emene totu taumattu matena. Me mausi isaa oia ninannaa me ghaine angila atinginaieghila tale naisakei.' "

<sup>22</sup> Vara me Peliks, ia o ang ghe kila muela salane Iesu, ghe alokoi taula naisakei eteae, me ghe uela va, "Ita toi Lisis, me nau emae, amene ghelei naisakei."

<sup>23</sup> Ghe uela ta namu ngateva ghe aaitoiaa kateva ai tau ngai uvii va, "Am atoka sso Pol tale ale mata voovoo, me am tau velua me etingina kasu see. Me am rau mene ghelei rungarunga kapuna atoa tani mae taraia."

<sup>24</sup> Kasina nau ang ghe lange sio, Peliks me vausenna ateva ta Drusila, ajiu ia, ghe suula inangari va Pol emae. Ghe nongola inangari niaikaaiaa ta Karisto Iesu.

<sup>25</sup> Nau eteva Pol ghe tiuala tani auliaa inangari tale voto ghulughuluena me tani aitaraa tokatokaam me naisakei eteae aue emae, Peliks ghe matautula me ghe uela va, "Ange roola me kasula mua. Auena marova mene righi nau, aue amene koloo."

<sup>26</sup> Ia oia nau eteva tee, Peliks ghe nannaa va Pol aue ghe tau lao righi viliki veu etana. Liuna avalua o oroieili nau ghe kolokoloa me ghe aippooaa teetia.

<sup>27</sup> Airuuruu tale ninamanama aluae lalu ghe lange sio me Pokias Pestas ghe koliala Peliks. Peliks ghe aloanna tani aipoopolia ta ajiu etoa, liuna avalua o me karika ghe uela va Pol ekupi ghoa tale ale mata voovoo.

## 25

### *Pol ghe kolomila va Siisa enongo unna naisakei eteae*

<sup>1</sup> Pestas ghe rekatala tale provins ateva ejitudia tale masaliki taatara ateae eSiisaria. Kotolu nau ghe lange sio me ghe saela ejerusalem.

<sup>2</sup> Me namuu ta pristi etoa, me kapuira tau ngai toitoi etoa ajiu etoa laghe lao sio tani auliaa tee Pol ta Pestas, me laghe kolomila Pestas

<sup>3</sup> va eghelei aloannaairaa tani saeaa Pol ejerusalem ta ngila ghe nnaala va la uvi ematea sae etapaa salana.

<sup>4</sup> Pestas ghe liula va, "Pol tale ale mata voovoo eSiisaria, me karika masau me amene oghi sio eSiisaria.

<sup>5</sup> Am tau velu righi kapuimim tau ngai toitoi me la usieghi sio eSiisaria, me la sio auliaa arova Pol ghe gheleila righi sesa voto."

<sup>6</sup> Pestas ghe mene tokala ghaoalu (8) va kasangaulu (10) nau me ghe oghi siola eSiisaria. Ghe paila tale mene kateva nau me ghe laa sso toka tale liu naisakei eteva, me ghe auliaala va Pol emae tale naisakei.

<sup>7</sup> Nau Pol ghe rekatala, lo atoa ajiu laghe kasula ejerusalem laghe tingina taliala Pol, me laghe tiuala tani aikamea tani auliaa oroieili voto sesa Pol ghe gheleila, me karika laghe rooroo tani apasunga tale naisakei va koronna.

<sup>8</sup> Pol ghe liula inangariira me ghe uela va, "Karika aghe gheleila righi sesa voto tani ghelei saasakiaa uneira inangari nipaopao ajiu etoa, me tale ale manga ateva me ta Siisa."

<sup>9</sup> Pestas ghe anna va ajiu etoa la masieinia, liuna avalua o me ghe kolomila Pol va, "Umasimasi tani sae ejerusalem, me aghi aue arooroo tani sae nongo unem naisakei eteae ejerusalem?"

<sup>10</sup> Pol ghe liula me ghe uela va, "Atiitingina oia tale unna liu niaiskei eteva Siisa, me atani aisakei oia. Karika righi gheeleiaaghi sesa ta ajiu etoa, me io tee ukilakilaaili.

<sup>11</sup> Arova aghe tam aimuli teela inangari nipaopao, me righi gheeleiaaghi sesa me erooroo va amate, karika aratirati tani mate. Me arova inangariira kamena, karika teva erooroo tani tauueghi lao etaira. Aghaloanna va Siisa enongo uneghi niaiskei eteae!"

<sup>12</sup> Nau Pestas me kapuna tau ngalomasaanga atoa laghe aippooa ngaitauaala me Pestas ghe uela va, "Ualoannala Siisa va enongo unem niaiskei eteae, liuna avalua o me ulao ta Siisa."

### *Pestas ghe auliaa tootoongaala Pol ta King Agripa*

<sup>13</sup> Kasina nau ghe lange sio King Agripa me nengane vause ateva ta Beniis lalu ghe siola eSiisaria tani tara me tani tau masimasiairarua ta Pestas.

<sup>14</sup> Nau lalu ghe tokala oroi nau eSiisaria, Pestas ghe auliaala unna niaiskei eteae Pol ta king. Ghe uela va, "Ia oia taumattu ngateva Peliks ghe tam aaloanna tani tau velua tale ale mata voovoo.

<sup>15</sup> Nau aghe saela ejerusalem, namuu ta pristi etoa me namuu ta ajiu etoa laghe uela va gheleila voto sesaial, me laghe aaloanna va aghi aghauliaa va emate.

<sup>16</sup> "Aghe auliaala etaira va gheegheleiaa nge Rom, karika ami rooroo tani nim uvi emate teva taumattu karika ghe aisakei tee tau ngai ssateena atoa, me erooroo tani liu inangariira tale uneira nikokkolomi.

<sup>17</sup> Nau laghe usieghi sio mae, karika aghe aitoila, ta ghe pai saela tale mene kateva nau, aghe auliaala va Pol emae tale liu niaiskei.

<sup>18</sup> Nau tau ngai ssateena atoa laghe tiuuala tani sama, karika laghe ppooaala righi gheegheleiaane sesa aghe annaa va laghe rooroo tani auliaa.

<sup>19</sup> Laghe nim sessa teeia tale uneira inangari nipaopao la ghairesoa etana, me taumattu ngateva ararina ateae ta Jesu, ang ghe matela me Pol ghe poppopoaa va maulue ia.

<sup>20</sup> Karika aloghu ghe masaangaala vaalua ue apae aitiutiu tale inangari, liuna avalua o me aghe kolomila marova ghe masimasi tani sae ejerusalem tani sae aisakei.

<sup>21</sup> Vara me Pol ghe aloannala me ghe kolomila va namu nge Rom ateva enongo unna niaiskei eteae, liuna avalua o me aghe uela va Pol etoka lamosina ta aghi aue asungi tau lao ta Siisa."

<sup>22</sup> Vara me Agripa ghe uela ta Pestas va, "Aghaloanna tani nongo ia ona taumattu ngateva."

Pestas ghe liula me ghe uela va, "Nimana unongoa."

### *Pol ghe tinginala emua ta King Agripa*

<sup>23</sup> Ghe pai saela Agripa me Beniis lalu ghe ssola tale ale atiulu la mae veluvelu eitauua etana, me laghe gheleila voto tani oneoneainilalua. Lalu ghe sso teela namu ngatoa la aitoiaa namuu tale tau ngai uvii etoa, me namu ngatoa tale masaliki taatara ateae, me Pestas ghe uela va, "Am ssoaa mae Pol elome."

<sup>24</sup> Pestas ghe uela va, "King Agripa me lo atoa ngam mae aitauua teeiemami sio, ngam tarala taumattu ngateva oia! Ila akapaaaili ajiu etoa ejerusalem me isaa oia eSiisaria laghe aulia ngakorokorongana etaghi me laghe aaore tani ue va karika erooroo tani mene toka tee lao ta ia erooroo tani mate.

<sup>25</sup> Aghe tarala va karika righi voto ghe gheleila va erooroo tani mate. Me poli ghe loola va namu nge Rom ateva enongo unna niaiskei eteae, liuna avalua o aghe annala va asungie lao eRom.

<sup>26</sup> Karika aloghu ghe masaangaala va tani sa ateva apitie lao ta kapuita vau eteva, liuna avalua o aghe ghaiae mae sio etaimim akapa, me tani io, King Agripa, va ita nongo kilakila inangarina me aue akila sa ateva apitia.

<sup>27</sup> Poli aghannaa va karika masina tani sungi karavusu eteva me karika righi inangari koronna tani aulia ngaotu gheeleiaane sesa."

## 26

<sup>1</sup> King Agripa ghe uela ta Pol va, "Urooroo tani auliaa inangarim."

Pol ghe takala niimane me ghe tiuuala tani ppooaa inangarina tani sausia.

<sup>2</sup> Ghe uela va, "King Agripa! Amasimasi tani tingina emua etam ghaine tani liu inangari niaiskei ajiu etoa la gheelei etaghi.

<sup>3</sup> Io ukilakilaaili ajiu etoa me gheeleiaira me voto la ghaissa tee, liuna avalua o aghanna va uatae atoka me unongoaghi.

<sup>4</sup> "Ajiu etoa la kilakila tokatokaaghi nau aliki ieghi, me aitiutiu tale maamauluaaghi nau aghe tokatoka tangueueghi me tee ejerusalem.

<sup>5</sup> Laghe kilakilaailieghi me, arova la masimasi, la roro tani auliaa va, tale aitiutiu, aghi kateva tana Paresi, lo atoa la tani uusilaa inangari nipaopao.

<sup>6</sup> Ghaine nga tinginala tale niaiskei poli uneghi niaikaiaa tale inangari nialokoi God ghe auliaala ta tuvuita atoa.

<sup>7</sup> Isaa oia inangari nialokoi, kasangaulu ghalua (12) ararimangaliita la aloanna tani tara va etani lutu ekoronna, nau la kakkaau God llaa me voo. King Agripa, mausi ia o niaikaia ngateva me ajiu etoa la ghaauliaa teeieghi.

<sup>8</sup> Vaalua me katoa etaimim karika am roro tani aiesoaa va God aue etotu matena atoa?

<sup>9</sup> "Aghi tee aghe anna tani ghelei oroieili voto tani rati ararina ataei Jesu aNasareti ia.

<sup>10</sup> Aghe gheelei llo oia voto ejerusalem. Aghe ghaaghhaa sarasarakan ta namu ngatoa ta pristi etoa me aghe atoka sso kapuna taumattu ngatoo God tale ale mata voovoo, me nau laghe aaisakei, aghi tee aghe aauliaa va la mate.

<sup>11</sup> Orioata nau aghe laolao tale ale nivelu eitauaa tani laa kuneila me tani atokaila sso tale ale mata voovoo, me aghe tootoonga tani gheleila va la rati aikaiaair. Tale sessaiaaghi namungaili, aghe laolao tee tale masau etoa masaliki taatara tani ghelei saasakieinila.

#### *Pol ghe auliaala vaalua ghe aikaiaala*

<sup>12</sup> "Tale kateae nikasu aghe laa siosio eDamaskas ta namuu ta pristi etoa laghe sungieghila me laghe tau mae sio matutuliena etaghi.

<sup>13</sup> King Agripa, elo sinaka nau aghe laa siosio etapaa salana, aghe tarala mallanga ateva ghe kasula epona liu, maamallangiaane elaulau sinaka ateva, ghe mallangieghila me kapughu etoa.

<sup>14</sup> Ami ekapa ami ghe katuula tapaa kosa me aghe nongola lingi ngalo ateva ghe samasamaa nge Hibrula, ghe uela va, 'Sol, Sol! Vaalua me ugheelei saasakieinagi? Aue ughaa vakovako nau uauiuvii tee aaloannaagi.'

<sup>15</sup> "Me aghe kolomila va, 'Io see, vau eteva?'

"Vau eteva ghe liula me ghe uela va, 'Aghi Iesu ugheelei saasakieinagi.'

<sup>16</sup> Totula me utingina sae. Ngarekataala etam tani suitoongainio va ughuhungu etaghi; uppoaa voto angu tarala etaghi me voto auena aghapasunga.

<sup>17</sup> Aue aghasaangio ta kapum atoa me taumattu ngeleka atoa nongina ngasungsungi tauo lao etaira.

<sup>18</sup> Uoti mataira tale saurrom me la għaa mallanga ateva, me la kasu vuli sarasarakaniaane ateva Satana me la lao ta God, me God aue ekkluua kaluira ssavoto me la toka teeieghi me lo atoa God ghe amangailala tale uneira niaikaiaa etaghi.'

<sup>19</sup> "Liuna avalua o, King Agripa, karika aghe nongo vulula lo ateva o nitaatara ghe kasula epona liu me ghe mae sio etaghi.

<sup>20</sup> Aghe tiuuala eDamaskas vara me ejerusalem me ejidu ngakapa me ta taumattu ngeleka atoa aghe poppoaa va la kiri tale għeeleiajra sesa me la mae ta God me la għapasunga tale masi uunguaairra va ngila ghe aikolikolaala.

<sup>21</sup> Poli aghe poppoaa ngavalua o me ajiu etoa laghe posoaghila tale ale ngeleka atiulu tale ale manga ateva me laghe anna tani uvi emateagħi.

<sup>22</sup> God għe sausieghila lomosi ta ghaine ngatinginala tani ppooaa ta ila akpa aлиki me namuu. Karika aghħaauliaa righi ouna inangari. Inangari oia propete atoa me Moses lagħe ppooa ngalokoila arau va aue elutu:

<sup>23</sup> Mesaea aue eghħa nimmarikana me etotu ekasina tale nimate me ia aue eppooa ngejtu mallangħan ateva ta ajiu etoa me auena ta taumattu ngeleka atoa."

<sup>24</sup> Pol għe aippooaa me Pestas għe savaliniela, għe uela va, "Pol! Veeveena io? Kinatama alomasaanganiaam atoa ngila għeelei eveeveenao."

<sup>25</sup> Pol għe liula me għe uela va, "Namu ngateva Pestas! Karika veeveena iegħi. Voto aghħaauliaa koronna me malloċeana masina.

<sup>26</sup> King Agripa ekilakilaaili isaa oia voto, me karika amaamatautu tani ppooaa ta ngetana. Akilakilaaili va īa ekilakila isaa oia voto, poli karika aaisliuanna."

<sup>27</sup> Pol għe kolomila va, "King Agripa, uairesoaa inangariira propete atoa? Akilakila va uairesoaa."

<sup>28</sup> Me King Agripa għe uela ta Pol va, "Uannaa va ia oia tuku nau erighi ugħeleieghi va ausila Karisto?"

<sup>29</sup> Pol ghe liula me ghe uela va, “Arova tukuna me aluse nau, alooloo sae ta God va karika io nonga ta am akapa lo atoa am nonganongoaghi ghaine, am ghele tau ngaisesaa nongina aghi, me karika va tale sene.”

<sup>30</sup> King, me gavana, me Beniis, me lo atoa laghe tokatoka teeila, laghe tingina saela.

<sup>31</sup> Me laghe kupi vulu ghoala ale atiulu me nau laghe aippooala elome ta ngetaira laghe uela va, “Taumattu ngateva oia karika ghe gheleila righi sesa va esso tale ale mata vooovo me emate.”

<sup>32</sup> King Agripa ghe uela ta Pestas va, “Ughe rooroo tani tau velu taumattu ngateva oia arova karika ghe aloannala va Siisa ghe tani nongo unna niaiskei eteae.”

## 27

### *Pol ghe laolao eRom tale anua ateva*

<sup>1</sup> Nau laghe uela va ami\* lao eItali, laghe taula Pol me katoa tani karavusu ta nimane kateva namuu ta tau ngai uvii etoa ghe aaitoiaa kateva ai (100) tau ngai uvii, ararina atae Juiies, ia kateva ta Kohot ateva ta Siisa.

<sup>2</sup> Ami ghe aikaaila tale anua ateva anueira ia taumattu ngatoa tale masaliki taatara atae eAdramitium, ghe anna tani ilou lao tale kasina sao tale provinsi eteva eEisia. Ami ghe tiu ghoala, me Aristakus aTesalonika ia tale provinsi eteva eMesedonia ghe usiemamila.

<sup>3</sup> Vara mene kateva nau me ami ghe rekatala eSaendon. Me poli Juiies masinaaili ia ta Pol, ghe tau veluvela tani laa tara kapuna atoa me laghe tau lao righi llo ghe aloanna.

<sup>4</sup> Me ami ghe tiu ghoala eSaendon me ami ghe ilou vaavalala tale patunganua ateva eSaeprasi poli ami ghe soula kuukuu eteva.

<sup>5</sup> Ami ghe selela tale tuku mara ateva eSilia me Pampilia me ami ghe rekatala eMaera tale provinsi eteva eLisia.

<sup>6</sup> Tale ia voto ateva, tau ngai uvii eteva ghe aaitoiaa kateva ai (100) tau ngai uvii ghe tarala anua ateva ghe kasula tale masaliki taatara atae eAleksandria ghe laolao eItali me ghe kaaiemami ghoala etana.

<sup>7</sup> Ghe oriola nau me karika ami ghe ilou enamuu poli ami ghe soula kuukuu eteva, me aanasaaili tani lao me ami ghe nim sele akalakalaala tale masaliki taatara atae eNidus. Me anua ateva karika ghe rooroo tani usilaa nongina ami ghe anna tani lao, poli kuukuu eteva sarasarakanaili ia, liuna avalua o me ami ghe sele vaavalala tale patunganua ateva eKrit kalakalaala tale ngusunguna ateva eSalmone, poli pallunge ia.

<sup>8</sup> Ghe tattasiemami nau ami ghe ilou vaavalaa me ami ghe rekatala tale saoa atae la kolokoloa va Masi Sao ia, kalakalaala tale masaliki taatara atae eLasea.

<sup>9</sup> Oroi nau ang ghe lange sio me ang ghe ghaala nau nittasi poli Nau Ninae ang ghe ruula, me Pol ghe aulia ngakorokoronganalata etaira va,

<sup>10</sup> “Taita atoa! Ataatarra va, arova ita kasu karika aue ita masina me aue ita velu anua ateva me ghinna me maamauluaaita tee.”

<sup>11</sup> Namu ngateva ta tau ngai uvii etoa ghe nongo vulula inangarina Pol me ghe nongo usilaala nannaairarua kapteni me tau nganuena.

<sup>12</sup> Poli sao atikirighi karika masina ia tani vukala nau ttasi, oroi ila lo atoa laghe aloannala tani kasu vuli ia o sao atikirighi me laa vukala ppae. Arova masina laghe aaloanna tani lao tee ePiniks poli sao atikirighi okae masina ia nau ttasi eteva. Piniks kateae sao eKrit epaapallu tale kuukuu eteva tale nau ttasi.

### *Ttasi eteva*

<sup>13</sup> Nau masi kuukuu erighi ta pai saot ghe tiuaala tani kuukuu, laghe annaala va ngila tani ghaaghhaa voto la ghaaloanna, liuna avalua o me laghe ae kaaila angga ngateva me laghe tiuaala tani sele vaavalaa eKrit.

<sup>14</sup> Karika masau me salamisana ateva laghe aseasea va “notista” ghe sio aloi mae tale patunganua ateva eKrit.

<sup>15</sup> Ttasi eteva ghe tiuaala tani uvi anua ateva me karika ghe rooroo tani mene ilou poli ghe sousou kuukuu eteva. Liuna avalua o me ami ghe nim tiuaala tani usi kuukuu eteva.

<sup>16</sup> Nau ami ghe sele vaavalala tani pallu tale patunganua arighi eKauda, ghaisa ngarighi karika ami ghe roo tani ae kaai paanaka ateva, me karika ta ami ghe aee kaaiela.

<sup>17</sup> Liuna avalua o me nau kuruu etoa laghe aee kaaiela me laghe keoaa siola kasina uasa tale vusu nganua ateva me laghe irielaa tani posoa akorokorongana anua ateva. Laghe maamatautu va ami ghe rau toka sae tale muerra elamana eLibia, liuna avalua o me

\* <sup>27:1</sup>: Luk ghe kasukasu tee Pol, liuna avalua o me ghe pitila va “ami”. <sup>27:2</sup>: Apos 19:29.

laghe velu siola voto ateva tani aoghi anua ateva tale kuukuu eteva, nau ami ghe usiusi kuukuu eteva.

<sup>18</sup> Ttasi eteva ghe kaarasila tani ubi saasakiaa anua ateva, liuna avalua o me vara mene kateva nau me kuruu etoa laghe tiuaala tani sau veluvelu sio kasina ghinna elamana.

<sup>19</sup> Vara aiaakotonna ateva nau, me laghe tiuaala tani sau veluvelu sio kasina voto peina anua ateva.

<sup>20</sup> Oroi nau ghe lange sio karika ami ghe tara poila sinaka ateva me katto atoa, me ttasi eteva ghe tam kapakapa poi, me ami ghe kilala va karika aue ami saanga.

<sup>21</sup> Oroi nau ghe lange sio me taumattu ngatoka karika laghe namanama me Pol ghe tinginala elome etaira me ghe uela va, "Taita atoa! Arova am ghe nongo usilaala llo aghe auliaala va ita rau mene tiu ghoa mua nau ita eKrit, karika aue ita ghele sou isaa oia voto ange lutu teetitala, me karika aue ita ghele sau velu sio righi ghinna avalua o.

<sup>22</sup> Me ia oia aghaauliaa etaimim va am mene masimasi poli karika teva etaita aue eraua. Anua ateva nonga aue evulla ia.

<sup>23</sup> Eleivoo kapuna ensolo ateva Goto ateva kapuna ieghi me auungu etana etingina valaala etaghi

<sup>24</sup> me euela va, 'Pol, urau mene matautu, poli aue utingina emua ta Siisa me uaisakei, me God ange alousiusi teela lo atoa am aikaai eitauaa, me poli mausim me aue easaangi maamauluaaira.'

<sup>25</sup> Liuna avalua o me, taita atoa, am rau mene annangaili poli aghaaikaiaa ta God va voto eauliaala aue ekoronna.

<sup>26</sup> Me ita tani laa toka sae tale teva patunganua."

#### *Anua ateva ghe toka saela me ghe tapolapolakala*

<sup>27</sup> Aiaakasangaulu ghaatanina ateva (14) voo me kuukuu eteva ghe kuukueinamami elaoelao tale kinatama paamanu eteva eAdriatik. Elomatuaa voo, me kuruu etoa laghe ateateaala va ngami ghe reerekata elae.

<sup>28</sup> Laghe velu siola uasa ateva me laghe toongila va ghaatingaulu (40) mita maamasauaane sio. Vara karika masau me laghe mene toongila me laghe tarala va kotolungaulu (30) mita maamasauaane sio.

<sup>29</sup> Poli laghe maamatatautu va ami rau ssu toka sae tale teva voto atu, liuna avalua o me laghe vella ghaata angga emuli me laghe tiuaala tani looloo sae va epai parasi.

<sup>30</sup> Kuruu etoa ngila ghe paepae salana tani ilou vuli anua ateva, liuna avalua o me laghe avukala siola paanaka ateva ta paamanu me laghe kamekame va vara laghe mene anna tani velu llo angga emua.

<sup>31</sup> Vara me Pol ghe uela ta namu ngateva ta tau ngai uvii etoa va, "Arova kuruu etoa la tam toka tee anua ateva, karika aue ita saanga."

<sup>32</sup> Liuna avalua o me tau ngai uvii etoa laghe toa patela uasa atikirighi laghe naue lao sio tale paanaka ateva me uasa me paanaka ateva ghe kasuaala.

<sup>33</sup> Auena ghe pai eraarangisana me Pol ang ghe ue etaira akapa va la namanama. Ghe ue va, "Ang ghele roola kasangaulu ghaata (14) nau am ghe vukalala me karika poi am ghe namanama.

<sup>34</sup> Aghanna va am ghaa righi inana me am nama me aue am toka. Karika poi teva aue tikirighi uu nguruna aue ekao ta uruna."

<sup>35</sup> Nau eteva ghe ruula tani aippooaa, ghe ghaala kasina verete me ghe kkaili emasina saela ta God emua etaira me ghe pirila me ghe tiuaala tani nama.

<sup>36</sup> Ila akapaailli nannairaa ghe mene masinala me laghe ghaala inana me laghe tiuaala tani nama.

<sup>37</sup> Ami ekapaailli tale anua ateva erooroo ghalua ai ghaitungaulu ghaonomo iemami (276).

<sup>38</sup> Nau laghe namanamala va ghe ssoilala, me laghe tiuaala tani sau veluvelu sio beke uit tani ghelei oeakana anua ateva.

<sup>39</sup> Vara ghe paila me laghe tarala vilikoule ateva samarra ia me karika laghe kilakila va elae tale sa ateva voto, me laghe annaala va laghe sso atoka sae anua ateva tale ia o voto ateva arova la rooroo.

<sup>40</sup> Laghe toa patela angga ghe tokala o elamana, me laghe pulakala uasa ghe naghinaghi etoka paka ose aluulu ghe aloaloa anua ateva, me laghe avukala saela sele ngemua ateva va ghe kuueinila me laghe sso elae.

<sup>41</sup> Karika laghe sso rekata elae me anua ateva ghe ilou sauuala tale muerra me ghe toka saela. Emua ghe kaarasila tani sae toka karikaaili ghe aaisiisia, me kinatama kotoo atoa laghe tiuaala tani ghelei polapolaki emuli.

42 Me tau ngai uvii etoa ngila ghe loeloe katikirighi salana va la uvi emate karavusu etoa poli laghe rau sso saoko va laghe ilou.

43 Me poli kapuira namu ngateva tau ngai uvii etoa ghe anna tani asaangi maamaulu-aane Pol, ghe paolala va la rau mene ghelei voto laghe aailoearaa va la ghelei. Ghe uela va lo atoa la rooroo tani asa la love velu sio elamana me la suu sso elae.

44 Mene katoa ave la ghasa sso tale palanga me righi tapiri voto ghe taruurutila tale anua ateva me la sso elae. Tale isaa o salana ami ekapa ami ghe laa sso rekata amasina elae.

## 28

### *Pol ghe tokala tale patunganua ateva eMolta*

1 Nau eteva ami ghe ssola elae, ami ghe kilala va patunganua ateva laghe asease Molta etana.

2 Taumattu ngatoa tale lo ataeae o masaliki laghe masimasila tani taraiemami. Laghe kuula kura ataeae me ami ghe tiaualana tani maruu, ta poli ghe vaavaao me kkaimi eteva.

3 Nau Pol ghe lao sio tani ghaa see kasina tana laa kura, ghe sau teela sesa katu ngateva, vara ghe alokoi sae laa kura tale kura ataeae, me kura ataeae ghe llangi vella katu ngateva, me ghe kata avukalala nimana atelange.

4 Nau taumattu ngatoa laghe tarala sesa katu ngateva ghe vuuvukala ta nimana Pol, laghe aauliaa elome etaira va ia tau niuvi emate taumattu ia, liuna avalua o arongona ta ang ghe saangala elamana, me kapuira god ateva ararina ataeae ta Niaiskei Ghulughluena ave eliu me euvii ematea.

5 Pol ghe repataa velu saela sesa katu ngateva tale kura ataeae, me karika righi voto ghe lutula etana.

6 Nau taumattu ngatoa laghe toitoi poi vara nimane atelange ghe rrongo, me ghe mate me ghe katuu, me laghe aikolikoliaala nannaaira va Pol goto ia.

7 Karika masau tale lo ataeae o masaliki, kasina kosa, kosane namu ngateva tale patunganua ateva, ararina ataeae ta Publius. Ghe koloamamila me ami ghe lao sio tangantuena, me ghe aitarainamamila tale kotolu nau.

8 Tale ia o nau eteva, tamana ghe isiki elokoila, vilikina ghe aanasa me kovane ateva ghe iloueinila. Pol ghe ssola tani tarai, me ghe looloo saela me ghe saoala nimane, me ghe masinala.

9 Nau isaa o voto Pol ghe gheleila, mene katoa tana tau sessa tale lo ateva o patunganua laghe mae sio, me laghe masinala.

10 Laghe gheleila oroieili voto masina etaimami, me laghe tau mae sio kasina voto karika etaimami, nau ami ghe kasukasu.

### *Pol ghe rekataala eRom*

11 Emuli tale ulana kotolu, ami ghe aikaaila tale anua ateva ghe vuuvukala okae, poli nau ttasi. Anue nge Aleksandria ia, emua tale anua ateva, tootoo god alua palue ilalua, Kastor me Polluks.\*

12 Ami ghe laa rekataa sio tale masaliki taatara ataeae eSirakius, me ami ghe tokala kotolu nau.

13 Ami ghe tiu ghoala, ami ghe selela ami ghe rekatala tale masaliki taatara ataeae eRegium. Me emulina kuukuu eteva ghe mae aroi sio ta pai saot, me anua ateva ghe ilou parasila, me mene kateva nau ami ghe lao sio tale masaliki taatara ataeae ePuteoli.

14 Tale lo ataeae o masaliki taatara, ami ghe saopila katoa taumattu tau ngaisesoa ila. Laghe koloamamila tani toka teeila tale ghaitu (7) nau, me ami ghe kasu vulilala tani lao eRom.

15 Nau tau ngaisesoa ngatoa laghe nongoamamila, laghe kasu emasaula tani mae souvemami, katoa tale maket eApious, me katoa tale masaliki eteae la ghe aseasea va Kotolu Ale Aiasoso. Nau Pol ghe tarailala, Pol ghe kaili emasinala ta God, me laghe asarasarakanaielia.

16 Nau ami ghe rekatala eRom,† laghe tau vella Pol va etoka ie nonga ta kateva ale me tau ngai uvii eteva tani toia.

### *Pol ghe poppoaaa eRom*

28:2: 2 Ko 11:27.

28:5: Mak 16:18.

28:6: Apos 14:11.

\*

28:11: Uru tootoo taumattu ngalua laghe atokala

emua, me laghe kakkaua etairaru. † 28:16: Kasina uru ngai laghe pitila, laghe mene pitila va *namuu ta tau ngai uvii etoa ghe aaitoiaa kateva ai* (100) *tau ngai uvii ghe tau lao sio karavusu etoa ta lo ateva emuemuua tau ngai uvii etoa tale ia o voto ateva,*

<sup>17</sup> Pol ghe tokala kotolu nau, me ghe kolo aitauaala namuu ta ajiu etoa, me ghe uela va, “Tueghi me nengaghi etoa, arongona ta karika aghe gheleila righi sesa voto ta taumattu ngatoa, me ta gheeleiaira tuvuita atoa, me laghe kuneieghila eJerusalem me laghe taueghi lao sio ta nimaira aRom atoa.

<sup>18</sup> Nau laghe kolomieghila me ngila ghe aloanna tani tau velueghi, poli karika righi voto sesa aghe gheleila va la uvi emateaghi.

<sup>19</sup> Nau ajiu etoa karika laghe aaloannala va la tau velueghi, liuna avalua o aghe aloanna va Siisa ghe tani nongoaghi, karika aghe annaala va aghe ghelei me kapughu etoa laghe aisakei.

<sup>20</sup> Liuna avalua o aghaloannaiemla va am mae me ataraiem, me atani sama teeiem. Ta poli apoppoaa Mesaea, ita alIsraeli etoa ita aaisesoaa va aue easaangita, liuna avalua o me laghe iri etokaieghila tale isaa oia sene.”

<sup>21</sup> Me laghe liula va, “Karika toa ajiudia laghe piti mae sio righi uru ngai tani aulieinio, me karika teva ajiudia ghe mae auliaa righi kiukiu etaimami, me tani auliaa righi sesa kiukium.

<sup>22</sup> Me ami aaloanna tani nongo righi nannaam, ta poli ami kilakila va taumattu tale kosa akapa ateva la auliaa saasakiaa tale ia o niaikaaia ngateva.”

<sup>23</sup> Laghe asela nau eteva, me oroi taumattu laghe mae sio tale voto ateva Pol ghe tokatoka etana. Elue talaua me ghe laa ghaa sio elo alai, Pol ghe aulia ngamasalikaala ararimangalina ateva God. Ghe aaulia ngaotu Iesu tale inangari nipaopao ta Moses me propete atoa, poli ghe aloanna tani kiri nannaairia me laghe aikaaiia ta Iesu.

<sup>24</sup> Katoa laghe akoronnala inangari ghe auliaala, me katoa karika laghe aikaaiiaala.

<sup>25</sup> Laghe tiuaala tani aisavalaa see me laghe tiuaala tani kasu. Pol ghe uela va, “Spirit Manga ateva ghe aulia ngakoronnala ta tuvuimim atoa<sup>‡</sup> ta propete Aisaea va,

<sup>26</sup> “ ‘Kasula me ulaa ue etaira va,

“Aue am nongo me karika aue am kila;

me aue am tara me karika aue am alomasaanga tee.”

<sup>27</sup> Urunguitaniira aue ekorokorongan,

me talingaira aue evololongina tani nongo,

me laghe akoula mataira va karika la taatara.

Ta la rau tara nonga ta mataira,

me la nongo ta talingaira,

va la kila tale urunguitaniira,

me la kiri mae va aghelei emasinaila.’

<sup>28-29</sup> “Me aue am kila va niasaangi kannna God ang ghe lao sio ta taumattu ngeleka atoa, me aue ila la nongo!”<sup>§</sup>

<sup>30</sup> Pol ghe tokala ghaluae ninamanama tale ale ateva ghe polipolia, me ghe masimasi tani tara taumattu ngakapa atoa laghe mae taataraia.

<sup>31</sup> Nau ghe poppoaa inangari ararimangalina ateva God me ghe aapasunga Vau ngepona ateva Iesu Karisto, karika ghe maamatatautu, ta poli karika teva tani ghelei rungainia.

<sup>28:18:</sup> Apos 26:31.

<sup>28:19:</sup> Apos 25:11.

<sup>28:20:</sup> Apos 26:6-7.

<sup>28:22:</sup> Apos 24:14.

<sup>‡ 28:25:</sup> tuvuimim

atoa Kasina uru ngai laghe pitila, laghe uela va tuvuita atoa. <sup>28:26:</sup> Ais 6:9-10; Apos 25:13; 26:2, 6; 27:24; Rom 1:5.

<sup>§ 28:28-29:</sup> Kasina uru ngai laghe pitila, laghe mene pitila va,<sup>29</sup> *Me nau eteva ghe auliaala isaa o voto, ajiu etoa laghe kasu vuliela, me emuli ta ngetana laghe aissakeanaa.*

## Uru ngai etikirighi Pol ghe pituela ta aRom atoa Inangari emuemua

Pol ghe tokatoka eKorint nau ghe pitila uru ngai ta aRom atoa. Karika ghe saela eRom, liuna avalua o me ghe pitipiti lao siola tale ale manga ateva karika ghe uungula etana. Ghe aulia ngamasalikala masi kiukiu ghe aippooaa teela, me ghe liula katoa nikokkolomi lo atoa karika la aiesoaa laghe kkolomila tale masi kiukiu. Voto namuu tale ia oia uru ngai etikirighi, ia avalua toko: taumattu ngatoo karika la rooroo tani asaangila tale uunguaaira, me, arova la aiesoaa ta Iesu, God aue easela va ghulughuluuila ila. Me tee, Pol ghe auliaala vaalua ghe aloanna va ajiu etoa la mae tani aiesoaa va Iesu Mesaea ia. Nongina oroi uru ngai Pol ghe pitila, ghe ruula tani aulia ngaotu vaalua ita tau ngaisesoaa tani toka, me ghe suula masimasiaane ta lo atoa ghe kilailala eRom.

### **Tani kila amuemua**

Aitituti tale inangari *1:1-17*

Karika teva ghulughuluena ta matane God *1:18-3:20*

Ita akapa ita rooroo tani saanga arova ita aiesoaa ta Iesu Karisto *3:21-4:25*

Niaiesoaa ta Karisto *5:1-8:39*

Ajiu etoa me masi kiukiu *9:1-11:36*

Vaalua tani toka nau ita aiesoaa ta Karisto *12:1-15:13*

Uungaane Pol me eaa ealoanna tani kasu *15:14-23*

Pol ghe suula masimasiaane *16:1-27*

<sup>1</sup> Aghi, Pol, kapuna tau ngai uungu ieghi Karisto Iesu. Ia ghe suimatoongainaghila tani apostolo me ghe suitoongainaghila tani ppooaa masi kiukiuna God.

<sup>2</sup> Emua arau, God ghe auliaala masi kiukiu tale inangarina nialokoi ta kapuna propete atoa, laghe pitila tale Uru ngai Manga ateva.

<sup>3</sup> Masi kiukiu eaauliaa Natuna, ia ghe lutula tale taumattu, me ia tuvuna ia Deivit.

<sup>4</sup> Nau God ghe totuela tale nimate, Spirit Manga ghe apasungaala etaita va ia natuna ia God me sarasarakanaili ia, me ia Iesu Karisto Vauita ia.

<sup>5</sup> Ta ngetana, ami ghe ghaala maamasinaane tani kasuua see masi inangarina, poli ealoanna va taumattu tale kosa akapa ateva la ghaisoaa tale ararina atae Iesu me la nongo usilainia.

<sup>6</sup> Me am tee, am elome ta lo atoa God ghe kololala va kapuna ila Iesu Karisto.

<sup>7</sup> Apitipiti atu ta ngetaimim lo akapa atoa ona eRom, God eaielousieinam, ia ghe koloamla va manga am.

Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

### *Pol ghe antani laa tara lo atoa eRom*

<sup>8</sup> Emua akasina akaakaili emasina ta God tale ararina atae Iesu Karisto ta ngetaimim akapaili, ta poli taumattu ngatoo la kiukiuaa aiesoaimim tale kosa akapa ateva.

<sup>9</sup> God ateva auungu etana tale urunguitanighi ekapa ateva tani ppooaa masi kiukiuna Natuna, eroroo tani aulia ngaotu vaalua aghannainam

<sup>10</sup> nau ekapa atoa tale kalughi nilooloo sae. Kateva voto alooloo sae nonga etana ia evalua toko va, arova aloaloannaane God, aue eghelei righi salana me aroo tani mae taraiem.

<sup>11</sup> Aghaloannaaili tani taraiem me aghele sausiem tale kasina masi niuungu Spirit Manga ateva ghe tau mae sio etaghi tani asarasarakanaiem.

<sup>12</sup> Aghannaaili tani asarasarakana aikaaiiaimim me aikaaiiaimim tee aue easarasarakanaieghi. Tale isaa o salana, aue ita aisausieinita tale isaa o riarangise.

<sup>13</sup> Aghanna va am kila, tueghi me nengaghi etoa, va orioataa aghe anna tani mae taraiem me asease voto atoa laghe ghelei rungarungainaghi lomose ta ghaine. Me aue arooroo tani ghaa masi uene elome etaimim nongina aghe gheleila ta mene katoa taumattu karika ajiu ila.

<sup>14</sup> Aghi atani uungu ta lo atoa aGriki ila me lo atoa karika aGriki ila, me lo atoa alomasaangaaili ila me lo atoa alokapakapa ila.

<sup>15</sup> Liuna avalua o me aghannaaili tani mae ppooaa masi kiukiu etaimim lo atoa tee ona eRom.

*Sarasarakaniaane masi kiukiu*

<sup>16</sup> Karika apaapalataa masi kiukiu, poli sarasarakaniaana God etana tani asaangi lo akapa atoa la ghaaiesoaa etana, ajiu mua atoa me auena lo atoa karika ajiu ila.\*

<sup>17</sup> Isaa o masi kiukiu eauliaa nighulughuluena ateva emaemae ta God. Ase nighulughuluena ateva ita ghaaghaia nau ita tiitiuaa tale niaikaaiaa, me ita ruuruu tale niaikaaiaa, nongina Uru ngai Manga ateva eaauliaa va, "Lo atoa la ghaaiesoaa, God aue easela va ghulughuluena ila, me aue la maulue."

*Taumattu ngakapa atoa sesaaili ila*

<sup>18</sup> Sessaiaane God esio epona liu tani ssa tee voto akapa atoa la sessa tee God, me tale sesa gheeleiaira taumattu ngatoa la gheeghelei rungarunga inangarina God koronna.

<sup>19</sup> Poli voto la rooroo tani kila God etana karika masukasukale etaira, poli God ang ghe ghelei emasalike akapala etaira.

<sup>20</sup> Karika ita rooroo tani tara God, me ghe tiuuala nau ghe gheleila kosa ateva, sarasarakaniaane tokatoka liuna me gheeleiaane pei ngepona liu, masalikeaili tani tara, poli ita kilakila nau ita taatara voto ghe gheleila. Liuna avalua o me taumattu ngatoa karika la rooroo tani ue va la tam kilakila God.

<sup>21</sup> Arongona ta la kilakila God, me karika la oneoneainia va ia Goto ia, karika la kaakaili emasina etana, me alokapakapa ila me nannaaira karika masalike.

<sup>22</sup> Arongona ta la uue va alomasaanga ila, me karika, ta alokapakapa ila.

<sup>23</sup> Karika la kakkaua God ateva etokatoka liu, me la kakkaua tootoo goto atoa me la gheelei tootoo taumattu karika eroroo tani toka liu, me tee ghila atoa, ghaata kkena atoa me otuena atoa me lo atoa la rarraa tapaa kosa.

<sup>24</sup> Liuna avalua o me God ang ghe tau vella isaa o taumattu tani ghelei voto karika raarangsana urunguitaniira ealoannaaili tani ghelei, me la ghelei voto pei nipalataa tale vilikiira tee.

<sup>25</sup> Laghe ratila inangarina ateva God koronna ia, me laghe aloannala inangari kamena. Laghe kakkaua me laghe tuuturru tale voto llo God ghe gheleila. Karika laghe kakkauua God ateva ghe gheleila voto akapaaili, ia nonga ita tau sae ararina ataeae nau ekapa atoa, koronna!

<sup>26</sup> Liuna avalua o me God ghe tau vellala tani toka gheelei isaa o voto sesa ta nannaaira. Vause atoa laghe sau vella masi salana tani lai, me la gheelei voto ita taumattu ngatoa karika ita rooroo tani ghelei.

<sup>27</sup> Tale isaa o ase salana taita atoa ngeila ghe ratila tani lai vause atoa, poli aloaloannairia namungaili tani lai ta mene kateva taita. Taita atoa la gheelei voto palatana ta mene katoa taita. Liuna avalua o me la ghaaghaa aipolipoli sesa tale maamauluaaira.

<sup>28</sup> Nau eteva la tam anna tani kila God, God etautau velu nannaaira sesa tani nnaa me ghelei voto karika masina etaira tani ghelei.

<sup>29</sup> Laghe pasula tale voto karika ghulughuluena, voto sesa, mata ngnana ila me la ghialoannaaili tani ghelei voto sesa ta mene katoa, me tani tara ssaii, niaiuvi emate me tani aissakeana me nikamekame, me ninannaa pasu tale voto llo sesa, me la ghaauliulia.

<sup>30</sup> La ghuliaa saasakiaa tee mene katoa, la sessa tee God, me la tautaula nimmarikana ta mene katoa, me la tautau sae nannaaira me la ghaasake, me laghe nannaa oroi salana tani ghelei sesa voto. La tam nongonongo usilaa tamaira me kinaira atoa.

<sup>31</sup> Karika righi masi nannaaira tani ghelei masina. Karika la ailokoiaa inangari nialokoi laghe auliaala, karika la ghaapasunga gheeleia nialousiusi tee mene katoa, me karika la ghialoanna tani sausi mene katoa.

<sup>32</sup> Laghe kilakila va God kanna inangari nipaopao eue va taumattu egheelei isaa o voto eroroo tani mate, me karika isaa nonga o llo la gheelei, ta la asarasarakana mene katoa tani mene ghelei isaa o voto.

## 2

*Ghulughuluena niaisakei kanna God*

<sup>1</sup> Liuna avalua o me karika masina va uauliaa tee mene kasina taumattu. Aghauliaa etam va karika urooroo tani ue va karika righi gheeleiaam sesa, ta nau uauliaa tee mene kasina taumattu, unim aauliaa teeio tale gheeleiaam, ta poli niuungu sesa la gheelei, io tee ughusiusi tani ghelei.

\* **1:16:** Mak 8:38; 1 Ko 1:18-24; Apos 13:46.      **1:16:** *lo atoa karika ajiu ila* tale inangari nge Grik, *aGriki etoa*.      **1:17:** Rom 3:21-22; Abak 2:4.      **1:19:** Apos 14:15-17; 17:24-28.      **1:20:** Job 12:7-9; Sams 19:1.      **1:21:** Ips 4:17-18.      **1:22:** Jer 10:14; 1 Ko 1:20.      **1:23:** Diut 4:15-19; Sams 106:20.      **1:27:** Lev 18:22; 20:13; 1 Ko 6:9.      **2:1:** Mat 7:1-2; Jon 8:7.

<sup>2</sup> Ita kilakila va kanna niaiskei God ghulughuluena. Nau taumattu egheelei sesa niuungu, etautau lao sesa ngaipolipoli.

<sup>3</sup> Uannaa va uaauliaa tee katoa tale voto io tee ugheelei, aue easaangi io tale kanna niaiskei God?

<sup>4</sup> Karika utaatara kila vaalua God pasu ia tale nialousiusi, me toitoiaane etam aluse, me karika emaamangoo vuluo? Uannaa va isaa voto God egheelei sesaaili? Me karika utaatara maamasinaane vaalua etautau aatu nau me aue uroo tani oghi vulu gheeleiaam sesa?

<sup>5</sup> Urunguitanim ateva korokoronganaaili ia. Karika ualoanna tani nna ngaioghioghiaa, liuna avalua o me io ugheelei sesa aipolipolim enaanamuu tale nau eteva God eapasunga sessaiaeane tale kanna niaiskei eteae ghulughuluena ia.

<sup>6</sup> God “aue etaula aipolipoli ta taumattu ngakapa atoa tale niuungu la gheelei.”

<sup>7</sup> Lo atoa la aimuli esarasarakana tee masi niuungu me masi nitoka tee God epona liu, me la paepae salana va God easaesae arariira me eoneoneainila, me tani ghaa maulue ateva tokatoka liu ia nau ekapaaili etoa, God aue etaeu lao etaira.

<sup>8</sup> Me, ta lo atoa la nannainila nonga, me karika la aloanna tani aimuli tee inangarina ateva God koronna ia, me la aimuli tee sesa voto, sessaiaeane ateva God etaira aue namungaili.

<sup>9</sup> Aue namungaili nialousiusi me nimmarikana elutu ta taumattu ekapa atoa la gheelei ssavoto, ta ajiu etoa mua, me tee lo atoa karika ajiu ila.\*

<sup>10</sup> Me God aue etau lao masi nitoka epona liu me easaesae arariira me eoneoneainila me etau lao luei ta lo atoa la gheelei masi voto, ta ajiu etoa mua, me tee lo atoa karika ajiu ila.†

<sup>11</sup> Ta God karika ealoanna nonga katoa ta ealoanna akapaita.

<sup>12</sup> Lo atoa taumattu la tam kilakila inangari nipaopao me la gheelei ssavoto, aue la tturungila, arongona ta la tam kilakila inangari nipaopao. Me lo atoa taumattu la kilakila inangari nipaopao, me la gheelei ssavoto, God aue egheelei niaiskei tee etaira, poli la kilakila inangari nipaopao me karika la aimuli tee.

<sup>13</sup> Karika va lo atoa la nonganongo inangari nipaopao ghulughuluena ila ta matane God. Lo atoa la nonganongo usilaa inangari nipaopao, isaa o taumattu aue la ghaa arari ghulughuluena atae.

<sup>14</sup> Nau taumattu ngeleka atoa, karika la kilakila inangari nipaopao kanna God, me tale nannaaira la aimuli tee voto inangari nipaopao eauliaa, tale urunguitaniira eapasunga va la kilakila voto masina me sesa.

<sup>15</sup> Tale gheeleiaaira eaapasunga va inangari nipaopao elome tale urunguitaniira. Nannaaira tee eaapasunga voto koronna nau nannaaira ghe aauliaa etaira va kasina voto la gheelei sesa me kasina laghe gheelei masina.

<sup>16</sup> Liuna avalua o me tale masi kiukiuna Iesu apoppooaa, tale ia o nau eteva aue God, ta Iesu Karisto, aue egheelei niaiskei tale nannaaira eaisulia.

#### *Ajiu etoa me inangari nipaopao*

<sup>17</sup> Vaalua etam? Uue va ajiu io, uatoka tuutulim tale inangari nipaopao me uaasake va ukilakila God,

<sup>18</sup> ukilakila aloannaane God me ngughe kilakila voto koronna tale inangari nipaopao isaa o voto ghulughuluena.

<sup>19</sup> Uannaa va io uitaraa mata salusalu etoa, me mallanga io tale lo atoa la tokatoka tale saurrom,

<sup>20</sup> tau ngai loeloe io tale lo atoa alokapakapa ila, me tau ngai aapasunga io tale lo atoa karika righi masi ninanna etaira nongina lutu ngaliki etoa, io uannaa va tale inangari nipaopao kanna God, voto akapaaili koronna erooroo tani apasunga ta taumattu ngatooa.

<sup>21</sup> Uapasunga ta katoa, me vaalua me karika urooroo tani apasunga etam? Me upoppooaa va la rau mene ainao, me io tee uainaao.

<sup>22</sup> Me uee va lailai etoa la rau mene lai sari kateva manna ateva, me ulailai sari kateva manna ateva. Karika ualoanna tani oneoneaa mene kasina tootoo goto, uainao voto tale ale nikkaua aleira taumattu ngeleka atoa.

<sup>23</sup> Utautau sae nannaam va ukilakila inangari nipaopao, me nau utam aimuli tee, tale isaa o salana, karika uoneoneaa God.

<sup>2:4:</sup> Ips 1:7; 2 Pita 3:15.    <sup>2:6:</sup> Sams 62:12; Nitoka 24:12; Mat 16:27; 2 Ko 5:10.    <sup>2:8:</sup> 2 Tes 1:8.    \* <sup>2:9:</sup> lo atoa karika ajiu ila tale inangari nge Grik, *aGriki etoa*.    † <sup>2:10:</sup> lo atoa karika ajiu ila tale inangari nge Grik, *aGriki etoa*.

<sup>2:14:</sup> Apos 10:35.    <sup>2:20:</sup> 2 Tim 3:5.    <sup>2:21:</sup> Mat 23:3-4.

<sup>24</sup> Isaa avalua o me nongina Uru ngai Manga ateva eaauliaa va, “Mausiimim me kosa ateva eauliaa saasakiaa tale ararina ateae God.”

<sup>25</sup> Arova uaimuli tee inangari nipaopao, salana tani isoiso, aue ghele tue mallooeana manee, va arova utam aimuli tee inangari nipaopao, aue ghele masina arova laghe tam isoiola.

<sup>26</sup> Arova lo ateva taumattu karika isoiso ia me eaimuli emasina tee sa ateva inangari nipaopao eaulieinia, ia o taumattu ngateva, God aue etaraia va nongina taumattu ngateva laghe isoioela.

<sup>27</sup> Liuna avalua o me am ajiu etoa, taumattu ngeleka atoa la aimuli tee inangari nipaopao, arongona ta karika isoiso ila, aue la ratiem, ta karika am aimuli tee inangari nipaopao, arongona ta am uunusi vuku eteva laghe pitila inangari nipaopao me laghe isoimela.

<sup>28</sup> Taumattu ngateva karika ajiu ia nonga eleka ta vilikina, me ni-isoiso atae karika va pei ngeleka nonga ia.

<sup>29</sup> Lo ateva taumattu urunguitanina ateva ghulughuluena ia ta God, ia ajiu tuungia, me koronna atae ni-isoiso elutulutu nau urunguita ateva eaaikolikoliaa me kanna Spiriti eteva God egheeleia, karika va nau la isoiso vilikina. Lo ateva eghaghhaa ia o ase niaikolikolia ngateva karika taumattu earueinia, ta God earueinia.

### 3

*God aue eusilaa inangarina ghe auliaala*

<sup>1</sup> Liuna avalua o me saa maamasinaane tani ajiu? Me saa righi masi voto aue elutu tale ni-isoiso atae?

<sup>2</sup> Oroieili aseasee voto atoa! Aitiutiu eteva voto, God ghe taula inangarina tuu ta ajiu etoa tani aitarainia.

<sup>3</sup> Me vaalua arova katoa karika laghe uusilaa inangarina? Am annaa va God karika aue eusilaa inangarina?

<sup>4</sup> Karika poi! God eauliaa koronna, me taumattu ngakapa atoa tau nikamekame ila, nongina Uru ngai Manga ateva eauliaa va,  
“Uapasunga koronna nau uaippoooa,  
me aue uapala tale niaiskei.”

<sup>5</sup> Vaalua? Arova kaluita ssavoto eapasunga aotu gheegheleiiaane God ghulughuluena tale tummatavanga, sa ateva ita aulieinia? Nau God eattara mataneita tale kaluita ssavoto, aue ita ue va God karika masina ia, va? (Anim poppooaa nongina taumattu ngatoa la ghaippooaa.)

<sup>6</sup> Karika poi! Arova God karika masina ia, vaalua aue erooroo tani ghelei niaiskei ta taumattu tale kosa ateva?

<sup>7</sup> Keteva aue eue va, “Arova inangarighi kamena eapasunga aotu inangarina God koronna, tani asaesae ararina atae God, vaalua me easeaseaghi va tau ssavoto aghi me eattara mataneaghi?”

<sup>8</sup> Vaalua me ita tam ue va, “Ela! Ita gheelei voto sesa me aue masi voto eotu.” Tale ia o salana atikirighi kasina tana taumattu eaaliu teeieghi va aghauliaa isaa o voto, auena God aue eghelei eghulughuluena niaiskei etaira tale voto sesa la gheelei.

*Karika teva ghulughuluena ia*

<sup>9</sup> Vaalua? Am annaa va ita ajiu etoa muennaaili ita ta mene katoa taumattu? Karika poi! Poli ngeita ghe apasungala va taumattu ngakapa atoa, ajiu etoa me lo atoa karika ajiu ila, la tokatoka elome tale sarasarakaniaa ssavoto ateva.

<sup>10</sup> Nongina Uru ngai Manga ateva eaauliaa va:

“Karika teva ghulughuluena ia, karika poi;

<sup>11</sup> karika teva alomasaanga,  
me karika teva epaepae God.

<sup>12</sup> Ila akapa laghe liula viliira ta God,  
me ila akapa laghe nim peisaanelia;  
karika teva egheelei masina,  
karikaaili teva.”

<sup>13</sup> “Aloira nongina paa liu niaikkiaa ngateva enim toka otioti ia;  
me ramuramuti paairia ateva eaauliaa orioieili inangari nikamekame.”  
“Poppooaa musiki paairia sesa nongina lo ateva katuu eikata amate.”

- 14 "Paaira pasueili tale inangari sesa tani ghelei saasakiaa kateva taumattu."
- 15 "Arovaeangaili nonga ta esessaila me la aiuvi emate;
- 16 nongina eaa la laolao, la ghelei saasakiaa me la tuuturungi maamaulue katoa taumattu,
- 17 me karika la kilakila masi salana luei."
- 18 "Karika la maamatauta sessaiaane God."
- 19 Ita kilakila va isaa akapa voto inangari nipaopao eaauliaa, eaauliaa ta lo atoa God ghe taula inangari nipaopao etaira, poli God ghe aloanna va karika teva taumattu erooroo tani ue va, "Aghi ghulughuluena ieghi." Karika poi! Ita akapa taumattu ngatoa tale kosa ateva oia, aighelei ssavoto ita ta matane God.
- 20 Liuna avalua o me karika teva erooroo tani ue va ia ghulughuluena ia ta matane God, poli eaaimuli tee inangari nipaopao, karika poi! Inangari nipaopao eapasunga sesa gheeleiaaita.

#### *Ghulughuluena tale niaikaaiaa*

21 Isaa oia God ang ghe apasungaala katikirighi ppae salana vaalua tani ghulughuluena ta matane. Karika va tani aimuli tee inangari nipaopao, ta emaema ta God, ghe asola tale inangari nipaopao kanna ia Moses me vuku etoa propete atoa laghe pitilala.

22 Tale isaa o masi uunguanne God, ila akapaaili taumattu ngatoa la ghaisesoaa ta Iesu Karisto, God easeasela va, "Ila ghulughuluena ila." Ita akapaaili kateva nonga ita, me karika ita aaipola,

23 ta poli ita akapaaili ita ghe gheleila ssavoto, liuna avalua o me ita akapaaili masauueili ita tale salana ghulughuluena kanna God.

24 Me God ghe ghelei eghulughuluena akapaailiitala me karika ekookolomi righi aipolipoli, me ghe nim tau mae sio Karisto Iesu tani mae poli aoghita.

25 God ghe tau mae sio Iesu tani mae mate me tani ghelei niaiaavusuvusuena, me raena ateva aue eakalaat tani ghaa velu kaluira ssavoto taumattu ngatoa la ghaisesoaa etana. Ghe gheleila isaa o voto tani apasunga ghulughulueniaane va tale nau ang ghe lao sio, God ghe nim taatara kaluira ssavoto me karika ghe attara mataneila, tale toitoiaane God, karika esessai parasi ia.

26 God ghe gheleila voto oia tale isaa oia nau tani apasunga va egheelei eghulughuluena niaisakei, poli ia ghulughuluena ia, me egheelei eghulughuluena lo atoa la ghaisesoaa ta Iesu.

27 Vaalua? Ita roro rooroo tani aasake va ita ghe gheleila righi voto me God ghe masieinitala? Karika poi! Nau ghe uela va ghulughuluena ita, karika va poli ita ghe aimulisi tee inangari nipaopao, ta poli nim uneita niaikaaiaa.

28 Liuna avalua o me ita ue va, taumattu ngateva eghulughuluena ta matana God tale uunguaa niaikaaiaa nonga, me karika va tani aimuli emasina tee inangari nipaopao.

29 Vaalua? Ia oia God ateva kapuira God nonga ia ajiu etoa, me karika kapuira God tee ia lo atoa karika ajiu ila? Koronnaaili ia kapuira God tee ia lo atoa karika ajiu ila.

30 Poli kateva nonga ia God ateva, egheelei eghulughuluena lo atoa isoiso ila tale niaiesoaa me lo atoa karika isoiso ila elome tale ie nonga o niaiesoaa ngateva.

31 Vaalua tale ia o niaiesoaa ngateae? Ita sau velu inangari nipaopao? Karika poi! Ta ita akorokorongana inangari nipaopao.

## 4

#### *God ghe asela Abraham va ghulughuluena ia*

1 Sa ateva ita mene aulieinia ta tuvuita ateva ta Abraham? Sa ateva ghe taraiela tale isaa o voto?

2 Arova God ghe aseala va ghulughuluena ia mausi gheeleiaane, aue erooroo tani aasake, me karika ta matane God.

3 Poli sa ateva Uru ngai Manga ateva eauliaa? Eue va, "Abraham ghe aaiesoaa ta God. Liuna avalua o me God ghe aseala va ghulughuluena ia."

4 Taumattu ngateva egheeghelei niuungu me eghaaghaa aipolipoli. Isaa o aipolina karika ita ue va la nim tautau lao, karika. La tautau lao tani liu niuungu euunguaa.

5 Ta lo ateva etokatoka tale niaiesoaa me karika va tale niuungu, eaaiesoaa tale God ateva eaaulia ngaotu lo atoa sesa gheeleiaairia va ila ghulughuluena ila, poli ia o niaiesoaa ngateae God easeasea va ghulughuluena ia.

<sup>6</sup> Deivit ghe aulia ngavaluela o, nau ghe aauliaa nimasimasi eteae tale taumattu ngateva God easeasea va ia ghulughuluena ia karika va tale uunguaane.

<sup>7</sup> "Aue emasinaaili

ta lo atoa gheeleiaaira sesa ang ghe kkaluaala,  
me kaluira ssavoto ang ghe ghaa vella.

<sup>8</sup> Aue emasinaaili ta lo ateva taita

gheeleiaane sesa me Vau ngepona ateva karika aue emene annaa."

<sup>9</sup> Vaalua? Ia o nimasimasi eteae uneira nonga lo atoa isoiso ila, o uneira tee ia lo atoa karika isoiso ila? Poli ita ue va God ghe uela va Abraham ghulughuluena ia poli unna niaiesoaa.

<sup>10</sup> Vaalua unna niaiesoaa ghe sausiela? God ghe uela va ghulughuluena ia nau laghe vira mene isoiela, o auena laghe isoia? Nau karika laghe isoia me God ghe uela va ghulughuluena ia.

<sup>11</sup> Nau karika laghe isoia, God ghe aseala va ghulughuluena ia ta poli unna niaiesoaa ta ngetana, me God ghe taula ni-isoiso atea tanai aimatootoongana va ia ghulughuluena ia. Liuna avalua o me Abraham tuvuira akapa ia taumattu ngatoa karika isoiso ila me la aiesoaa ta God, me God easeaselva va ghulughuluena ila.

<sup>12</sup> Me ia tee tuvuira ia lo atoa isoisona ila me la kasukasu tale salana niaiesoaa ta God nongina Abraham karika laghe isoia me ghe aiesoala ta God.

<sup>13</sup> Karika tale inangari nipaopao va Abraham me tuvuna atoa laghe ghaala inangari nialokoi va kosa akapa ateva oia kaluira ia, me karika, ta tale nighulughuluena ekasukasu tale niaiesoaa.

<sup>14</sup> Arova koronna va llo taumattu eaimuli tee inangari nipaopao, ila nonga aue la ghaa isaa akapaaili voto God ghe auliaala tale kanna inangari nialokoi va aue etau mae, unguaa niaiesoaa aue peisaane. Me isaa o kanna inangari nialokoi God aue peisaane tee.

<sup>15</sup> Ita kilakila va inangari nipaopao emaemaee aipolipoli tale ssavoto ateva, me eaa karika righi inangari nipaopao, karika ita rooroo tani ue va taumattu ngatoa la tam aimuli tee inangari nipaopao.

<sup>16</sup> Liuna avalua o me, tale niaiesoaa, tuvuna atoa Abraham la ghaaghaa voto God ghe auliaala tale inangari nialokoi va aue etaula etaira. Tale ia o salana atikirighi, maamasinaa God erooroaa va ila akapa aue la ghaa isaa o voto, karika va ghinnanira nonga lo atoa la aimuli emasina tee inangari nipaopao, karika. Ta ila akapaaili taumattu ngatoa uneira niaiesoaa nonginaaili Abraham, ia mata ngemua ateva tuvuuta.

<sup>17</sup> Nongina Uru ngai Manga ateva eaauliaa va, "Ngaghe gheleiola va tuvuira io oroeili taumattu ngatoa." Ia o inangari nialokoi eteva masinaaili ia ta taataraane God, ia o Abraham ghe aiesoaa etana. Ia o God ateva etautau maulue ta matena atoa me enim aippooaa me voto karika ghe tokatoka, elutulutu.

<sup>18</sup> Abraham ghe aiesoaa me ghe anna ngakorokoronganana, arongona ta ghe tam kilakila vaalua God aue eghelei erooroaa inangari nialokoi etana, liuna avalua o me tuvuira ia oroeili taumattu ngatoa nongina God ghe auliaa va, "Tuvum atoa aue la oroeili nongina katto atoa."

<sup>19</sup> Koti Abraham anna ninamanama erooroo kateva ai (100), me unna niaiesoaa karika ghe maomaona nau ghe annaa va ia ang ghe taita namuula, me karika erooroo tani mene alakuti teva aliki, me Sera tee kina ngere ia.

<sup>20</sup> Unna niaiesoaa karika ghe kasu vuliela, me karika ghe ghaaghalua nannaane tale kanna inangari nialokoi God; unna niaiesoaa ghe sarasarakanala me ghe tau saela God.

<sup>21</sup> Ghe atoka asarasaranakanala nannaane va God aue erooroo tani ghelei inangarina nialokoi aue koronna.

<sup>22</sup> Liuna avalua o me God ghe nnaala unna niaiesoaa Abraham me "ghe aseala va ghulughuluena ia."

<sup>23</sup> Ia o masi inangari ateva koronna ia God ghe aulieiniela ta Abraham va ghulughuluena ia, karika laghe pitila tani sausi nonga Abraham, karika!

<sup>24</sup> Ta ita tee me eakorokoronganaita va God aue eue etaita tee va ghulughuluena ita, arova ita aiesoaa ta God ia ghe totula Iesu Vauita ia tale nimate.

<sup>25</sup> God ghe tauve lao sio va emate poli kaluita ssavoto me ghe totuela tale nimate tani ghelei eghulughuluenaita ta matane God.

## 5

*Nighulughuluena ta matane God*

<sup>1</sup> Liuna avalua o, nau angita ghe ghulughuluenal ta matane God tale niaiesoaa, ngita ghe tokala tale luei tee God, poli uunguaane Vauita ateva Iesu Karisto.

<sup>2</sup> Tale kalutu niaiesoaa, Karisto ghe otila salana atikirighi etaita tani kupi sso tale ia o maamasinaane ateva God, ghaine ita tokatoka etana. Me ita toitoi God tani ghaaita, me aue egheleita nongina ia. Ia o voto ateva egheegheleita ita masimasi.

<sup>3</sup> Me karika ita masimasiaa nonga isaa o voto, karika. Ita masimasi tee nau ita ghaaghaa maamatana, ta poli ita kilakila va isaa o voto masina etaita, me esaasausita tani tingina akorokorongana.

<sup>4</sup> Me arova ita tingina akorokorongana me ita tam mangoo vulu voto ita aikaaiata etana, isaa o voto aue esausi gheeleiaaita, me gheeleiaaita aue esausita tale voto masinaaili ita taatara lao emua etaita.

<sup>5</sup> Me nau ita aiesoaa ngavalua o, uneita niaiesoaa karika eaapalataita poli ita kilakila va God aue eghelei isaa o voto, poli God ghe tau mae sio Spirit Manga ateva etaita tani apasu urunguitaniita tale kanna niaielousi eteva God.

<sup>6</sup> Ta nau eteva karika righi sarasarakaniaaita tani aisausieinita, God ghe suitoongaala nau eteva ta Karisto me ghe matela tani ghaa aoghita tau ngai ghelei ssavoto atoa.

<sup>7</sup> Koronnaaili, aanasaaili tani tara teva taumattu erooroo tani mate tani sausi teva taumattu ghulughuluena. Me marova ita tara kateva taumattu egheelei masi voto, koti teva erooroo tani asarasarakanaia me emate tani sausia.

<sup>8</sup> Me God ang ghe apasungaala namungaili ailousiaane etaita tale voto ateva toko: nau eteva ita ghe gheelei ssavoto, Karisto ghe matela etaita.

<sup>9</sup> Raena ateva ghe akalala me ghe ghelei eghulughuluenaitala, me God ang ghe assetala va ghulughuluena ita. Liuna avalua o, ita kilakilaaili va, Iesu aue emene aisausieinita me aue ita saanga nau eteva God eapasunga sessaaane ta tau ngai ghelei ssavoto atoa.

<sup>10</sup> Tale nau ang ghe lange sio, ita tau ngai ssateena ita God me ghe gheleitala ghe kapuna itala tale matemateaane Natuna. Ia oia ang ghe kapuna itala God, ita kilakilaaili va maamauluuaane Iesu aue easaangita.

<sup>11</sup> Me karika isaa nonga o, ta ita masimasi ta poli sa ateva God ghe gheleila mausi Vau eteva ta Iesu Karisto, ia Iesu Karisto ghe gheleitala va kapuna ita God.

*Adam me Karisto*

<sup>12</sup> Ssavoto ateva ghe mae sio tale kateva nonga taumattu, me ghe tau mae sio nimite. Liuna avalua o me nimite atea ghe ghaa akapala taumattu ngatoa tale kosa ateva, ta poli ila akapa laghe gheleila ssavoto.

<sup>13</sup> Ssavoto ateva ang ghe aso vella tale kosa ateva me avirina God ghe tau mae sio inangari nipaopao. Me eaa karika righi inangari nipaopao, karika God enannaa kaluira ssavoto taumattu ngatoa la gheelei.

<sup>14</sup> Ghe tiuaala ta nau Adam me ghe mae sio ta nau Moses, nimite atea ghe ghaa akapailila taumattu ngatoa, arongona ta uneira ssavoto karika nongina unna ssavoto Adam, ghe tam nongo usilaala God. Adam toootona ia taumattu ngateva aue emae.

<sup>15</sup> Ilalua o voto alua karika va ilalua aitauua, kanna voto God ghe nim tau mae sio, me kanna ssavoto ateva Adam. Kateva nonga taumattu ngateva ghe gheleila ssavoto me oroieili taumattu ngatoa laghe matela. Me kanna voto God ghe nim tau mae sio ghe namungailila, me ghe nim tau lao sio masi voto ta oroieili taumattu ngatoa tale maamasinaane kateva nonga taumattu ngateva, Iesu Karisto.

<sup>16</sup> Me tee kanna voto God ghe nim tau mae sio me kanna ssavoto kateva nonga taumattu, karika lalu lao aitauua. Karika poi! Ia o kanna ssavoto ateva ghe gheleila me God ghe gheleila niaiskei ta taumattu ngatoa, me ghe uela va, "Aue la ghaa sesa aipolipoli." Me kanna voto God enim tautau mae isaa avalua toko, nau eteva oroi taumattu ngatoa laghe gheleila ssavoto, God ghe aselala va ghulughuluena ila.

<sup>17</sup> Kateva nonga taumattu ngateva ghe tam nongo usilaala God, me tale ia o kanna ssavoto ateva, nimite atea ghe aitoiala taumattu ngakapa atoa. Me maamasinaane ateva God ghe nim tau mae sio ghe apalala sarasarakaniaane nimite atea, me ghe namungailila. Liuna avalua o me lo akapa atoa laghe ghaala maamasinaane God, me God ghe aselala va ghulughuluena ila, aue la maulue, me la toka nongina tau ngai toitoi etoa tale uunguaane kateva nonga taumattu, Iesu Karisto.

<sup>18</sup> Liuna avalua o me poli kateva nonga karika ghe usilaala God, me God ghe uela va taumattu ngakapa atoa aue la ghaa sesa aipolipoli. Tale ie nonga o ase salana atikirighi, kateva nonga ghe gheleila voto ghulughuluena me ghe ghelei eghulughuluenailala, me ghe tau lao sio maulue etaira.

<sup>19</sup> Nongina taumattu ngakapa ghe tau ssavotola mausi kateva nonga taumattu ghe tam nongo usilaala God, tale ie nonga o ase salana atikirighi nau kateva nonga taumattu ghe nongo usilaala God, oroeili taumattu aue God egheleila va ghulughuluena ila.

<sup>20</sup> God ghe taula inangari nipaopao ta Moses tani apasunga ta taumattu ngakapa atoa me la rooroo tani tara va voto la gheelei sesa. Nau ssavoto ateva eooroi maamasinaane God emene ooroi tee lao.

<sup>21</sup> Nongina ssavoto ateva eaaitoiaa uunguaa nimate ateva, maamasinaane God tee eororoo tani aitoiaa tale uunguaa nighulughuluena tani tau lao maulue ateva tokatoka liu ia, aue ita ghaaia ta Iesu Karisto Vauita ia.

## 6

### *Ssavoto karika eaitoieinita*

<sup>1</sup> Sa ateva ita mene roo tani aulieinia? Aue ita mene ghelei oroeili ssavoto poli ita aloanna va maamasinaane ateva God aue emene lao tee?

<sup>2</sup> Karika poi! Poli ngita ghe matela, me ssavoto karika mene sarasarakaniaa etaita, me vaalua ita mene ghelei llo niuungu sesa?

<sup>3</sup> Karika am kilakila va lo akapa atoa laghe ghaala niaasuu me la kateva nonga teela Karisto Iesu, me laghe ghaala niaasuu tale matemateaana?

<sup>4</sup> Liuna avalua o me poli laghe kiaeinita teela Karisto tale niaasuu me tale sarasarakaniaane Tamane ghe totuela tale nimate, ita tee aue ita mene toka tale ouna nitoka.

<sup>5</sup> Karisto ghe matela, me ita ghe kateva nonga teeila tale matemateaane. Liuna avalua o me aue ita kateva nonga teeia tale totottuaane.

<sup>6</sup> Ta ita kilakila va maamauluaaita pokane ang ghe matela nau Iesu ghe matela tale aikotoo, tani apala sarasarakaniaane ssavoto tale maamauluaaita, liuna avalua o me karika ita mene tau ngai uungu tale ssavoto.

<sup>7</sup> Nau taumattu ngateva ematemate, ssavoto ateva karika eroroo tani mene aitarainia.

<sup>8</sup> Ita ghe mate teela Iesu Karisto, liuna avalua o me ita aiesoaa tee va aue ita toka teeia.

<sup>9</sup> Poli ita kilakila va Karisto ghe totula tale nimate me karika aue emene mate. Liuna avalua o me nimate ateva karika righi sarasarakaniaane tani mene aitarainia.

<sup>10</sup> Nau eteva ghe matela, katengaata ta ghe matela tani apala sarasarakaniaane ssavoto nau ekapa atoa. Me maamauluaane ghaine etokatoka tani tau sae God.

<sup>11</sup> Tale ia o salana atikirighi, am tani toka me am tani annaa va am ghe matela tale sarasarakaniaane ssavoto ateva me am maamaulue ta God poli Karisto Iesu.

<sup>12</sup> Liuna avalua o me karika am mene tau veluem va ssavoto ateva emuemueinam tale vilikiimim aue emate, poli am rau usilaa aloannaane vilikiimim.

<sup>13</sup> Karika am mene tau lao kasina vilikiimim ta ssavoto va evoto tani ghelei llo sesaaili. Am tauem lao ta God nongina lo atoa laghe totula tale nimate. Me am tau lao vilikiimim ta God, va evoto tani ghelei llo ghulughuluena.

<sup>14</sup> Me ssavoto ateva karika emene muemueiniem, poli karika va am tokatoka tale inangari nipaopao, ta tale maamasinaane God.

### *Tau ngai uungu tale voto ghulughuluena*

<sup>15</sup> Sa ateva ita mene gheleia? Ita ghelei ssavoto poli karika ita tokatoka tale inangari nipaopao, ta ita tokatoka tale maamasinaane God? Karika poi!

<sup>16</sup> Am kilakila va marova am tau veluem tani tau ngai uungu me nongo usilaa mene kateva aue am tau ngai uungu etana. Karika am kilakila va lo ateva unonganongo usilainia, ia kapum namuu ia? Arova ssavoto ateva emuemueiniem, aue am mate, me arova am nongo usilaa God, aue am ghulughuluena.

<sup>17</sup> Me akaakaili emasina ta God, poli kasina nau ang ghe lao sio am tau ngai uungu iem tale ssavoto, me tale urunguitaniimim akapa ateva am ghe nongo usilaala salana niapasunga am ghe ghaala.

<sup>18</sup> Ngam ghe ruula tani tau ngai uungu tale ssavoto ateva, me ngam ghe tau ngai uungula tale salana ghulughuluena.

<sup>19</sup> Aghaaulaa inangarighi tale kiukiu niaimatoonga poli karika alomasaanga iem tani kila. Nongina am ghe tautaula kasina voto tale vilikiimim tani ghelei niuungu karika

raarangisana me ghe aasaesae llo karika masina, isaa oia, am taula tani ghelei niuungu tale llo voto ghulughuluena, aue eamangaiem.

<sup>20</sup> Nau am ghe tau ngai uungu tale uunguaa ssavoto ateva, salana ghulughuluena karika ghe muemueinam.

<sup>21</sup> Saa righi masi voto am ghe ghaala tale ase nitoka atea nau ghaine am paapalatainia? Aipolipoli tale isaa o voto nim nimate ateva.

<sup>22</sup> Me ia oia ngam ghe ruula tani tau ngai uungu tale ssavoto ateva, me ngam ghe tau ngai nongonongo annala ta God ateva, me voto ngam ghaaghaa aue ekatulainam lao tale nimanga, me airruuruu am ghaa maulue ateva tokatoka liu ia.

<sup>23</sup> Poli aipolipolina ssavoto ateva nimate ia, me voto ateva God enim tautaue mae, maulue ateva tokatoka liu ia, ie ta Karisto Iesu Vauita ia.

## 7

### *Inangari niaimatoonga tale nilai*

<sup>1</sup> Kapughu etoa, aghaippooaa tee lo atoa la kilakila inangari nipaopao. Karika am kilakila va inangari nipaopao ateva matuutuliena ia ta lo ateva nonga taumattu karika ghe mate?

<sup>2</sup> Nongina avalua toko, vause ateva lailai ia, inangari nipaopao egheelei rungainia tee taitanna ateva nau taitanna ateva karika ghe mate, me arova taitanna ateva emate, isaa o inangari nipaopao karika mene righi uunguaane etana.

<sup>3</sup> Me arova vause ateva ange mene lai ppaela ta mene kateva taita, me taitanna ateva karika ghe mate, aue la ue va ghe lai sarila kateva manna ateva. Me arova taitanna ateva ang ghe matela, isaa o inangari nipaopao karika mene righi uunguaane etana, me karika aue la ue va ghe lai sarila kateva manna ateva arova elai ta mene kateva ppae taita.

<sup>4</sup> Am tee, kapughu etoa, am ghe kateva nongala tale vilikina ateva Karisto, me am ghe mate teela Karisto, me inangari nipaopao karika mene righi uunguaane etaimim, me ngam ghe mene toka ppaela, tale kateva ppae taumattu, ia o ghe totula tale nimate, liuna avalua o me aue ita kuneaa masi uene esae ta God.

<sup>5</sup> Nau eteva ita ghe tokatoka tale aloaloanna vilikiita, aloaloanna vilikiita ghe mue-mueinita. Inangari nipaopao ateva ghe gheelei nannaaита ghe aloannaili tani ghelei voto sesa. Liuna avalua o me voto ita ghe gheelei ghe tautau mae uene nimate atea.

<sup>6</sup> Me isaa oia angita ghe mate vulula llo voto eposoposo rungainita, me inangari nipaopao karika eroo tani mene ghelei rungainita, me ita uungu tale ouna atikirighi salana kanna ia Spirit Manga ateva, me karika tale pokane atikirighi salana laghe pitila tale inangari nipaopao.

### *Niaissarakaa tee ssavoto*

<sup>7</sup> Sa ateva ita mene aulieinia? Inangari nipaopao ateva ssavoto ia? Karika poi! Poli karika aue aghele kila ssavoto arova karika inangari nipaopao. Me karika aue aghele kila va tani saa ia nissaii eteae arova inangari nipaopao karika eaauliaa va, "Urau mene ssaii."

<sup>8</sup> Poli ssavoto ateva ghe tarala salana atikirighi tale inangari nipaopao, me ghe alutula asease nissaii etaghi. Me arova karika inangari nipaopao, ssavoto ateva karika righi sarasarakaniaane.

<sup>9</sup> Nau karika teva inangari nipaopao aghe maamaulue, me nau inangari nipaopao ghe mae sio, ssavoto ateva ghe mauluelu

<sup>10</sup> me aghi aghe matela. Aghe nannaa va ia o inangari nipaopao ateva, aue ghe rooroo tani tau mae maulue, me karika, ta ghe nim tau mae sio nimate.

<sup>11</sup> Ssavoto ateva ghe tarala salana atikirighi tani kameaghi tale inangari nipaopao tani gheleieghi me amate.

<sup>12</sup> Ia avalua o me inangari nipaopao ateva manga ia, me kateva kateva tale inangari nipaopao, manga, ghulughuluena me masina.

<sup>13</sup> Vaalua, emaamloeana va voto masina etatau mae nimate etaghi? Karika poi! Ta ssavoto ateva taumattu ngatoa la tara kliaia va ssavoto ia, etatau mae nimate etaghi tale voto masina. Isaa avalua o me tale inangari nipaopao, ssavoto ateva sesaaili ia, elaulaueili lao.

<sup>14</sup> Ita kilakila va inangari nipaopao liuena ta God; me aghi, nim taumattu ieghi tale kosa ateva oia, me aghi tau ngai uungu ieghi tale ssavoto ateva.

<sup>15</sup> Karika aghaalomasaanga tee voto agheelei, poli voto aghaloanna tani ghelei, karika agheeghelei, me voto karika aghaloanna tani ghelei agheeghelei.

<sup>16</sup> Me arova aghelei voto karika aghaloanna tani ghelei, aghasokoi va inangari nipaopao masina ia.

<sup>17</sup> Nongina avalua o, karika va aghi agheeghelei, ta poli ssavoto ateva etokatoka etaghi egheeghelei.

<sup>18</sup> Akilakila va karika righi masi voto etokatoka etaghi, gheeleiaaghi sesa, poli aghaloanna tani ghelei voto masina, me karika arooroo tani ghelei.

<sup>19</sup> Poli aghaalonna tani ghelei masi voto me karika agheelei; me karika aghaalonna tani ghelei sesa voto, me anim toka gheelei.

<sup>20</sup> Arova agheeghelei voto karika aghaloanna tani ghelei, karika va aghi agheelei, ta ssavoto ateva etokatoka etaghi, ia egheeghelei.

<sup>21</sup> Liuna avalua o, aghe tarala va isaa o ninannaa emuemueinaghi: nau aghaloanna tani ghelei masina, karika arooroo tani ghelei, ta voto sesa etokatoka etaghi.

<sup>22</sup> Isaa avalua o me tale nannaaghi, aghailousiangaili inangari nipaopao kann God.

<sup>23</sup> Me amene taatara mene kateva ppae voto sarasarakania ia euungu tale kasina vilikighi, eaaiuvii tee nannaaghi, me egheegheleieighi akaakaravusu tale ssavoto euungu elome tale vilikighi.

<sup>24</sup> Alousiusi ta getaghi! See aue eroo tani asaangieghi tale ia oia viliki eteva etautau mae nimate?

<sup>25</sup> Akaakaili emasina ta God poli ghe asaangieghila tale uunguaane Iesu Karisto Vauita ia! O tale nannaaghi, aghi akaakaravusu tale kanna inangari nipaopao God, me tale vilikighi, aghi akaakaravusu tale sarasarakaniaane ssavoto ateva.

## 8

*Nitoka tale sarasarakaniaane kanna Spiriti eteva God*

<sup>1</sup> Liuna avalua o me ghaine lo atoa la tokatoka ta Iesu Karisto, God karika emene tautaula sesa aipolipoli etaira.

<sup>2</sup> Poli ta Karisto Iesu, sarasarakaniaa Spiriti eteva etautau aatu maulue ateva, me ghe ghaa veluulo\* tale sarasarakaniaa ssavoto ateva etautau aatu nimate.

<sup>3</sup> Ta kanna inangari nipaopao Moses karika ghe roola tani asaangita, poli sesa gheeleiaaita ghe gheleila inangari nipaopao karika sarasarakania, me karika ita rooroo tani aimuli tee. Liuna avalua o me God ghe mene tau mae sio kateva voto tani asaangita, ghe suula Natuna tuunga ateva tani toka nongina ita taumattu ngatoa tale kosa ateva oia, tani mate tale kaluita ssavoto. Liuna avalua o me God ghe attara matanelia ssavoto ateva tale vilikina Karisto, me ghe ruula sarasarakaniaa ssavoto ateva.

<sup>4</sup> Karisto ghe ghelei ekapala voto ghalughuluena inangari nipaopao eue va ita ghelei, me karika ita mene toka tale nim sesa gheeleiaaita, ta ita aimuli tee Spiriti eteva.

<sup>5</sup> Lo atoa taumattu la nim tokatoka tale sesa gheeleiaairaa ue la nnaa nonga sesa aloannaairaa, me lo atoa Spirit Manga ateva emuemueinila la nnaa nonga masi niuungu Spirit Manga ateva ealoanna va la ghelei.

<sup>6</sup> Marova sesa aloannaita emuemueinita tale ninannaa, aue ita mate. Me marova Spiriti eteva emuemueaa aloannaita, aue ita ghaa maulue me luei.

<sup>7</sup> Poli sesa aloannaita eaaiuvii tee aloannaane God, poli karika erooroo poi tani nongo usilaa kanna inangari nipaopao God.

<sup>8</sup> Ia avalua o me lo atoa la aimuli tee sesa aloannaairaa karika la rooroo tani amasimasi God.

<sup>9</sup> Am karika va am mene tokatoka tale sesa aaloannaimim, ta tale Spirit Manga ateva kanna ia God, arova ia etaimim. Me marova lo atoa taumattu Spiriti eteva kanna ia Karisto karika ia etaira, karika poi va kapuna ila Karisto.

<sup>10</sup> Aue vilikiimim emate poli ssavoto, me marova Karisto ia elome etaimim, aue Spiriti eteva etau aatu maulue, poli Karisto ghe ghelei eghalughuluenaemla.

<sup>11</sup> Me marova Spiriti eteva kanna ia lo ateva ghe totula Iesu tale nimate etokatoka etaimim, ia o God ateva ghe totula Karisto tale nimate, aue emene tau aatu tee maulue tale isaa o vilikiimim ematemate, tale kanna Spiriti eteva ia etaimim.

<sup>12</sup> Liuna avalua o, kapughu etoa, kateva voto ita gheelei, ita rau mene usilaa sesa aloannaita.

<sup>13</sup> Ta marova am toka tale sesa aloannaimim aue am mate, me marova, tale sarasarakaniaa Spiriti eteva, am uvi emate sesa gheeleiaa vilikiimim, me aue am maulue,

<sup>14</sup> poli lo atoa kapuna Spiriti eteva God ekaakatulainila, ila natuna ila God.

<sup>15</sup> Poli karika va am ghe ghaala Spiriti eteva tani gheleiem va am mene tau ngai uungu tani matautu, ta am ghe ghaala Spiriti eteva eaapasunga va am natuna am God, me ta ngetana ita aseasea va, "Abba, Tamaghi."<sup>†</sup>

<sup>16</sup> Poli kapuna Spiriti eteva God emaemae aitauaa tee uneita ateva spirit tani aulia naaotu va ita natuna ita God.

<sup>17</sup> Me poli ita natuna ita, aue ita ghinaghina masi voto God ghe tau lao sio ta Natuna ta Karisto, me marova ita ghaa tee nimmarikana nongina Iesu, auena ita toka teeia tale ararimangalina ateva God.

### *Masi nitoka auena*

<sup>18</sup> Aghi akilakila va isaa oia nimmarikana ghaine ita ghaaghaa, karika poi erooroo tale masi voto auena God eapasinga etaita.

<sup>19</sup> Poli voto akapaaili God ghe gheleila la toitoi me la aloannaaili tee tani tara nau eteva God aue eapasinga va see atoa natuna ila God.

<sup>20</sup> Poli voto akapaaili ghe gheleila ang ghe tokala tale kanna nikasikiena God, karika va tale aloannaaira, ta tale aloannaane God. God ghe atokailala tale kanna nikasikiena nau eteva ghe kilala va

<sup>21</sup> voto akapaaili ghe sesala aue emene toka amasina, me aue la ghaa aitauaa tee natuna atoa God voto masinaaili me karika aue la mene mauu.

<sup>22</sup> Ita kilakila va isaa akapaaili voto God ghe gheleila la ngangngalaan nimmarikana nonginaaili vause ateva eanna tani molena, lomosina ta nau ghaine.

<sup>23</sup> Me karika va ila nonga, ta ita tee lo atoa ita ghe ghaala tee Spiriti eteva, aitiutiu ia tale kanna inangari nialokoi God. Ita ngangngalaan nimmarikana elome etaita, nau ita toitoi God tani apasunga va ita ang ghe natuna itala, me aue eghaa oghi vilikiita.

<sup>24</sup> Nau ghe asaangitala, ghe tau mae sio isaa o inangari nialokoi, me ita toitoi isaa o inangari nialokoi va etani lutu ekoronna etaita. Me marova ngita ghe ghaala sa ateva ita aloannaemaenue emua, karika righi malloeanan tani toka toitoi voto emaemae emua. Karika teva etoitoi voto ang ghe ghaala.

<sup>25</sup> Me marova ita aiesoangaili tale saa voto llo ita ghe tam ghaa, ita kaarasi tani toitoi me aue ita ghaa.

<sup>26</sup> Ta ia nonga o salana atikirighi, Spiriti tee ateva esaasausita nau ita tam sarasarakana, poli karika ita kilakila tee saa voto tani loo sae, me ia Spiriti eteva eloooloo sae mausiiita tani aulia ngamasinaaili inangari ita tam rooroo tani aulia ngamasina.

<sup>27</sup> Me God ekilakilaaili voto tale urunguitanita, me ekilakila tee nannaane Spiriti eteva, poli Spiriti eteva eaaimotoonga kapuna taumattu ngatoa God tani looloo sae tani kkolomi voto tale aloannaane God.

<sup>28</sup> Me ita kilakila va isaa akapaaili voto God euunguaa tale maamasina lo atoa la ailousieinia me ghe suimatoongainilala, tani ghelei voto tale masi aaloannaane.

<sup>29</sup> Ta isaa o llo taumattu God ghe kila akasinailala me ghe suoongainilala va aue la nongina Natuna ateva, liuna avalua o me Iesu aue tueira mue ia me aue oroi nengane.

<sup>30</sup> Ta lo atoa God ghe suimatoongainilala, ghe kololala tani mae etana, me lo atoa ghe kololala, ghe ghelei eghulughuluenuaila, me lo atoa ghe ghelei eghulughuluenuaila, ghe gheleilala wa nongina Natuna ta Iesu.

### *Karika righi voto erooroo tani atoka apolapolaita tale aielousiaane ateva God*

<sup>31</sup> Liuna avalua o me tale isaa o voto, sa ateva ita roo tani mene aulieinia? Marova God etokatoka aitauaa teeita, see aue eroo tani tau ngai ssateeta?

<sup>32</sup> God karika ghe arongila Natuna ateva, ta ghe tauue sio mae nongina aiaavusuvusuuen ateva etaita akapaaili. Liuna avalua o me ta ngetana, God aue etau mae isaa akapaaili voto masinaaili etaita.

<sup>33</sup> See aue eghelei niaiskei ta lo atoa God ang ghe suimatoongainilala? Poli God ang ghe ghelei eghulughuluenuaila.

<sup>34</sup> O see aue emene tau mae etaita sesa aipolipoli mausi ssavoto? Poli Karisto Iesu ghe matela me God ghe totuela, me ia ghaine etokatoka tale pai muenna ativilau ta God tani sama tee God mausiiita.

<sup>8:13</sup>: Gal 6:8; Kol 3:5.    <sup>8:15</sup>: 2 Tim 1:7; Mak 14:36; Gal 4:5-7; Aotu 21:7.    <sup>† 8:15</sup>: Tale inangari nge Aramaik, "Abba" malloeanan wa "Tamaghi".    <sup>8:16</sup>: 2 Ko 1:22.    <sup>8:20</sup>: Aitiutiu 3:17-19.    <sup>8:23</sup>: 2 Ko 5:2-4.    <sup>8:27</sup>: Sams 139:1.    <sup>8:28</sup>: Ips 1:11.    <sup>8:29</sup>: Kol 1:18; Hib 1:6.    <sup>8:31</sup>: Sams 118:6.    <sup>8:33</sup>: Ais 50:8-9.

<sup>35</sup> See aue eroo tani atoka apolapolaita tale aielousiaane ateva Karisto? Karika teva, nongina sesa nau, o nau ita ateateaa nimmarikana, o nau la gheelei saasakiaa ta ngetaita, o nimaloo, o nau karika rooroona ia kalioita, o voto sesaaili eanna tani amataututa tale nimmarikana, o nimate.

<sup>36</sup> Nongina Uru ngai Manga ateva eaauliaa va,  
“Mausim me ami sousou nimate tale isaa akapa o nau,  
ami laghe annaa va ami nongina sipsipi etoa tani uvi ematela.”  
<sup>37</sup> Tale isaa akapaaili o voto, ita tau ngai apala ita ta ngetana lo ateva ghe aielousieinala.  
<sup>38</sup> Ta aghi aghaiesoangaili va karika nimate, o maulue, o ensolo atoa, o spiriti etoa, me tee tale isaa oia nau o auena, me aseasee nisarasarakana,  
<sup>39</sup> me karika va tale elomarase o isaa oia euu tale kosa ateva, o isaa akapaaili voto God ghe gheleila eroo tani atoka apolapolaita tale aielousiaane ateva God, ghe mae sio ta Karisto Iesu kapuita Vau palepale ia.

## 9

### *Taumattu ngatoa God ghe suimatoongainilala*

<sup>1</sup> Aghi apoppoaa voto koronna isaa ta Karisto, karika va akamekame, me Spirit Manga ateva eaasokoi tee tale nannaaghi.

<sup>2</sup> Urunguitanighi eteva namungaili nialousiusi me mmarikana etokatoka etana.

<sup>3</sup> Aghaloanna va God eghaa oghi kapughu etoa, mangalighi ila, me arova God eghelei evalua o, amasimasi tani ghaa nikasikiena kanna God, tani atoka apolaienghi ta Karisto, tani ghaa liuira.

<sup>4</sup> Taumattu nge Israeli etoa, God ghe suimatoongainilala va natuna etoa, me ghe apasunga ngaotula sarasarakaniaane ateva etaira, me ghe tau lao sio inangari niaippooa ngaitaua ngatoa, inangari nipaopao, salana koronna tani kkaua, me inangari nialokoi etoa.

<sup>5</sup> Tuvuna ila Abraham, Aisiki me Jekop, me ta ngetaira, Mesaea ngateva ghe lutu eloi mae sio etaira. Karisto Goto ia, eaaitoiaa voto akapaaili, liuna avalua o me ita tani taue sae nau ekapa atoa. Koronna!

<sup>6</sup> Poli karika va God ghe tam aimuli teela inangarina. Karika va taumattu ngakapa atoa laghe lutula tale ararimangali eteva eIsrael, va kapuna ila God.

<sup>7</sup> Me karika va tuvuna akapa atoa Abraham koronnaaili va natuna ila Abraham. Ta God ghe uela ta Abraham va, “Tuvum atoa aue la lutu eloi mae ta Aisiki.”

<sup>8</sup> Malloeana inangari va karika va lo atoa la nim lululutu nongina arau va natuna ila God. Ta lo atoa God ghe auliaala inangari nialokoi va aue etaula mae, ila aue natuna ila.

<sup>9</sup> Ta God ang ghe auliaala inangari nialokoi va, “Aue amene mae llo too ninamanama nongina ghaine ngamae sio, me Sera aue eghaa lo ateva o aliki taita ia.”

<sup>10</sup> Me karika va isaa nonga o, ta Rebeka tee natuna ghalua tamairarua nonga kateva, Aisiki tamaita ia.

<sup>11</sup> Auena palua alua lalu ghe lutu o ghelei righi voto sesa o masina, God ghe auliaala inangari eteva ta Rebeka. Ia o inangari eteva eaapasunga va God esuisuimatoongaa taumattu tale aloannaane,

<sup>12</sup> karika va tale niuungu, ta poli kolokoloaane God. God ghe uela ta Rebeka va, “Aue natum mua ateva euungu ta natum aiaaghalauee ateva.”

<sup>13</sup> Nongina Uru ngai Manga ateva eaauliaa va, “Jekop aghe ailousieiniela, me Iso aghe ratiela.”

<sup>14</sup> Sa ateva ita mene aulieinia? Aue ita ue va God egheeghelei voto karika ghulughulena? Karika poi!

<sup>15</sup> Ghe uela ta Moses va,  
“Aue aghapasunga alousiusiaaggihi tale lo ateva taumattu aghaloanna tani apasunga etana, me aue aghalousiusi tee lo ateva aghaloanna tani alousiusi teeia.”

<sup>16</sup> Liuna avalua o me God egheelei tale alousiusiaane, karika va tale saa llo taumattu ngatoa la ghanna o la ghanna tani ghelei.

<sup>17</sup> Tale Uru ngai Manga ateva God ghe uela ta Peroo va, “Aghi aghe gheleiola va io namuu io, poli aghe aloannala va uapasunga sarasarakaniaaggihi, me taumattu tale ia akapa kosa ateva la roo tani ppooa ngaotu ararighi eteae.”

<sup>18</sup> Liuna avalua o me God eaapasunga alousiusiaane ta lo ateva eanna tani apasunga ailousiusiaane, me egheelei ekorokorongana urunguitanina lo ateva ealoanna tani akorokoronganaia.

<sup>19</sup> Kateva etaimim aeue etaghi va, "Vaalua me etaatara kaluita ssavoto? Karika teva ae erooroo tani usilaa nannaane me etam usilaa nannaane God."

<sup>20</sup> Me io see, taumattu io, ualoanna tani sau paane God? "Voto ateva kateva egheelei, erooroo tani ue ta lo ateva ghe gheleila va, 'Vaalua me ughe ghelei evalueieghi o?'

<sup>21</sup> Tau ngai ghelei sospena ateva egheelei sospena ateva tale kosa erooroo tani ghelei ghalua sospena tale ia nonga o tuku kosa ateva, kateva tale kasina ase nivelu eitauaa, me kateva tale nim nau etoaa.

<sup>22</sup> Tale ia o salana atikirighi God ealoanna tani apasunga sessaiaane me etau velu taumattu ngatoa la tara sarasarakaniaane me karika, ta ekaakaarasi tani toi isaa o taumattu esessaia etaira. Isaa o taumattu God ghe aimonomonosiaala va eturungila.

<sup>23</sup> God egheelei isaa o voto tani apasunga ngaotu oroieili kanna mallanga ta lo atoa ghe apasungaala alousiusiaane etaira, ghe aimonomonosia ngakasinailala va ila tee aue la toka teeia tale mallanga ngepona liu.

<sup>24</sup> Me ita tee elome ta lo atoa ghe suitoongainilala, karika va ajiu nonga atoa, me lo atoa karika va ajiu ila.

<sup>25</sup> Nonginaaili God ghe auliaala ta vuku eteva ta Osea va,  
"Aghi aue aghaselva va 'kapughu ila' lo atoa karika va kapughu ila,  
me aghi aue akoloa va aghailousieinia, lo ateva karika aghe ailousieniela."

<sup>26</sup> Me ghe mene auliaa teela va,  
"Me tee tale ia o voto ateva aghe uela etaira va,  
'karika va kapughu taumattu iem,'

aghi aue amene asela va  
'natuna ila God ateva etautau maulue.'

<sup>27</sup> Aisaea ghe sama anamuula tani ppoaa ta Israeli etoa va,  
"Arongona ta taumattu nge Israeli etoa oroieili ila nongina rira ateva elosamarra,  
karika oroi ila lo atoa aue la saanga.

<sup>28</sup> Poli Vau palepale ateva aue eailuilui  
tani ghelei niaiskei me tani turungi ekapaaili taumattu tale kosa ateva."

<sup>29</sup> Nongina Aisaea ang ghe auliaala emua arau va,  
"Marova Vau ngepona ateva sarasarakaniaaili ia  
ghe turungi ekapala tuvuita atoa  
me ghe tam asaangila toa  
aeu ita ghe nongina eSodom me eGomorra."

#### *Israeli etoa laghe tam aikaiaia*

<sup>30</sup> Sa ateva ita mene aulieinia? Arongona ta taumattu ngeleka atoa laghe tam paepae salana tani ghulughuluena ta God, me karika, ta laghe ghulughuluena ta God, poli tale uneira niaikaiaia isaa oia voto ghe lutula.

<sup>31</sup> Me ta Israeli etoa laghe uungu aanaasaaili tani aimuli tee inangari nipaopao tani ghulughuluena, me karika laghe rooroo.

<sup>32</sup> Ta poli saa? Poli laghe anna nighulughuluena tale niuungu laghe gheelei, me karika va tale niaiesoaa ta God. Laghe ttukainilala tale atu eteva etapaa salana.

<sup>33</sup> Nongina Uru ngai Manga ateva eaauliaa va,  
"Tarala, aghe atokala atu eteva eSaeon va eghelei taumattu ngatoa tani ttukainila  
me atu eteva eghelei taumattu ngatoa la katuu.  
Me lo ateva eatoka tuutulina etana karika aue eghaa nipalata."

## 10

<sup>1</sup> Kapughu etoa, tale urunguitanighi eteva, anannangaili me alooloo sae va God easaangi Israeli etoa.

<sup>2</sup> Poli akilakilaailiila, liuna avalua o me aue va sarasarakaniaaili ila tani aimuli tee niuungu God ealoanna, me karika la kilakila amasina aloannaane God tani ghelei.

<sup>3</sup> Karika laghe kilakila salane God tani ghelei eghulughuluena ta matane God, me laghe aloanna tani ghulughuluena tale sarasarakaniaaira, liuna avalua o me karika laghe usilaala salane God tani ghulughuluena.

<sup>4</sup> Karisto ang ghe ghelei ekoronnala me ghe ghelei roorooala inangari nipaopao, liuna avalua o me lo akapa atoa la aikaiaia ta Karisto, ila ghulughuluena ila ta matana God.

<sup>5</sup> Moses ghe aulia ngamasalikala vaalua tani ghulughuluena tale uunguua inangari nipaopao va, "Taumattu ngateva egheeghelei isaa akapa o voto tale inangari nipaopao, aue eghaa maulue tale isaa o voto."

<sup>6</sup> Tani ghulughuluena tale uunguua niaikaiaa eue va, "Urau mene ue tale urunguitanim ateva va, 'See erooroo tani sae epona liu?' " (Ia o malloeana va usiosioaa Karisto tale kosa ateva oia.)

<sup>7</sup> "O, 'See erooroo tani sio arau euu tale voto ateva liuira ia matena atoa?' " (Ia o malloeana va ughaaghhaa oghi Karisto tale nimate.)

<sup>8</sup> Sa ateva eaulieinia?

"Inangari oia kalakalanginaaili etaimim,  
isaa elome tale paaimim me urunguitaniimim,"  
va, inangari niaikaiaa isaa oia ami aaulia ngaotu.

<sup>9</sup> Va, arova uaulia ngaotu tale paam ateva va, "Iesu ia Vau ngepona ia," me uaikaiaa tale urunguitanim ateva va God ghe totuela tale nimate, aue usaanga.

<sup>10</sup> Poli tale urunguitanim uaiesoaa me ughulughuluena ta matane God, me tale paam ateva uaulia ngaotu me aue usaanga.

<sup>11</sup> Nongina Uru ngai Manga ateva eaulia va, "Lo atoa taumattu la atoka tuutuliira etana, karika la rooroo tani ghaa nipalata."

<sup>12</sup> Poli karika teva voto epolapola ajiu etoa me taumattu ngeleka atoa. Kateva nonga ia kapura namu ngateva Vauita akapaaili ia. Me earangise taumattu ngakapa atoa nau la kolokolo tau ararina ateeae,

<sup>13</sup> poli, "Lo akapa atoa taumattu la kolokolo tau ararina ateeae Vau ngepona ateva, aue la saanga."

<sup>14</sup> Me, arova la tam aikaiaa etana, vaalua aue la kolomia tani sausila? Me vaalua aue la aikaiaiaa ta lo ateva karika laghe nongoa? Me vaalua aue la nongo arova karika poi teva ghe aulaa etaira?

<sup>15</sup> Me vaalua aue la ppooaa arova la tam sungila? Nongina Uru ngai Manga ateva eaaulia va, "Masinaaili tani tara taumattu ngatoa la mae sio tani ppooaa masi kiukiuna God."

<sup>16</sup> Me karika va aIsraeli ekapa atoa laghe nongo usilaala isaa oia masi kiuki. Poli Aisaea ghe uela va, "Vau eteva, see ang ghe aikaiaala inangariimami?"

<sup>17</sup> Liuna avalua o me ita kilakila va niaikaiaa emaemae nau ita nonganongo inangari, inangarinata ateva Karisto.\*

<sup>18</sup> Aghanna tani kolomi va, koti karika laghe nongo isaa oia inangari? Va karika, angila ghe nongola:

"Lingi ngaloira ang ghe lao akapa see sio tale kosa ateva  
me inangariira ang ghe lao akapa see sio tale airuuruu tale kosa ateva."

<sup>19</sup> Mene kateva uneghi nikokkolomi, koronna va aIsraeli etoa karika la kilakila malloeana isaa oia inangari? Moses ghe aitiutiula tani auliaa va,

"Aue aghaa lo atoa taumattu karika tue ngarariira, ila arau euu, me tale ia o salana atikirighi aue agheleim am aittureaa teeila,

me karika tani masina alomasaanganiaaira, me tale ia o salana atikirighi aue aghelei nannaaimim esessaaili."

<sup>20</sup> Aisaea ghe aulia ngasasarakanaailila va,

"Taumattu ngatoa karika laghe paepaeaghi, angila ghe sakaiiegħila.

Ngagħe apasungainaghila ta taumattu ngatoa, karika lagħe paepaeaghi."

<sup>21</sup> Me ta aIsraeli etoa ghe uela va,

"Nau ekapa atoa, agħe pulapula nimagħi tani koloa

taumattu ngatoa karika la nonganongo usilaa me makatakatanna ila."

## 11

*God ghe apasungaala ailousiaane ta aIsraeli etoa*

<sup>1</sup> Aghanna tani kolomi, koronna va God ang ghe ratila kapuna taumattu ngatoa? Karika poi! Ta aghi tie aIsraeli iegħi. Abraham tuvugħi ia, aghi tie elome tale ararimangali eteva ta Benjamin.

**10:5:** Lev 18:5.    **10:6:** Diut 30:12-14.    **10:11:** Ais 28:16.    **10:12:** Apos 15:9.    **10:13:** Joel 2:32.    **10:15:** Ais 52:7.    **10:16:** Ais 53:1.    \* **10:17:** Karisto Kasina uru ngai lagħe pitila, lagħe ue va, *God*.    **10:18:** Sams 19:4.

**10:19:** Diut 32:21.    **10:20:** Ais 65:1.    **10:21:** Ais 65:2.    **11:1:** 1 Sam 12:22; Sams 94:14; Plp 3:5.

<sup>2</sup> God karika ghe ratila kapuna taumattu ngatoa, ta ghe suimatoongainilala emua arau, me avirina ghe gheleila kosa ateva. Am kilakila sa ateva Uru ngai Manga ateva eaulieinia nau eaaulia Elaija, nau ghe auliaa sae ta God gheeleiaira Israeli etoa karika masina.

<sup>3</sup> Ghe ue va, "Vau ngepona ateva, ngila ghe uvi emate akapala kapum propete atoa me laghe tturuula unem liu nighelei aiaavusuvusuena atoa. Me aghi nongaaili ngaghele oghi etokala me ghaine la aloannaaili tani uvi emateaghii tee."

<sup>4</sup> Me saa ailiuliu God ghe tau lao sio etana? Ghe uela va, "Karika. Kapughu ghaitu airari (7,000) taita karika poi laghe suuiua patu kkeira tani kkaua goto ateva ta Baal kamenia ia."

<sup>5</sup> Tale ie nonga o salana atikirighi tale nau etiulu oia, katoa alrsraeli la nonganongo usilaa God, poli ghe suilala va kapuna ila, me ghe apasungaala maamasinaane etaira.

<sup>6</sup> God esuisuitoongaa taumattu tale maamasinaane ateva, me karika tale voto laghe uunguuala. Poli arova God esuisuitoongaa taumattu tale voto la gheelei, maamasinaane ateva karika va nongina voto ateva enim tautau mae.

<sup>7</sup> Liuna avalua o me sa ateva ita mene aulieinia? Taumattu nge Israeli etoa karika laghe ghaala sa ateva laghe paepaea. Katoa nonga taumattu God ghe suitoongainilala laghe saopiela; me lo akapa atoa God karika ghe suitoongainilala, ghe gheleilala va la volvolongina nau eteva ekolokolola.

<sup>8</sup> Nongina Uru ngai Manga ateva eaauliaa va,

"God ang ghe tau lao sio niasekanue atea la lullus saasakiaa etana,  
ang ghe sum rungaala mataira, va karika la mene taatara,  
me ghe ghelei evolovolonginailala me la tam rooroo tani nonganongo,  
lomosina ta ange ghaala ghaine."

<sup>9</sup> Me Deivit ghe uela va,

"Tau vella uneira tevoo ateva pasu ia tale inana enongina va airrekatia ia,  
me tarapa ateva etaira aue eghelei nannaaira la nnaa va voto akapa masina.  
Tau vella isaa o inana la namanama egheleila me la katuu  
me la ghaa aipolipoli tale sesa voto laghe gheelei.

<sup>10</sup> Tau vella mataira esaurrom me karika aue la roo tani taatara,  
me tau vellala la tau ngai uungu nau ekapa atoa."

#### *Taumattu ngeleka atoa aue la saanga*

<sup>11</sup> Isaai avalua o me, aghanna tani mene kolomi va, nau ta ajiu etoa laghe katuula, laghe katuu laalaa liula? Karika poi! Poli laghe gheelei ssavoto, me God ghe asaangila taumattu ngeleka atoa. God ghe ghelei evaluelo o poli ghe aloannala va tale isaa o voto ajiu etoa la ssaila.

<sup>12</sup> Poli ajiu etoa laghe gheleila ssavoto me laghe katuu vulla, niarangise ateva namungaili ia ghe mae sio tale kosa ateva me ta taumattu ngeleka atoa tee. Me nau eteva ajiu etoa God ghe suilala la oghi mae ta God, God aue eghelei voto masinaaili ta taumattu ngakapa atoa aue elau ia o niarangise ateva.

<sup>13</sup> Tale voto aghaloanna tani auliaa ghaine, elaoao etaimim taumattu ngeleka atoa. Aghi auungu ta apostolo ieghi ta taumattu ngeleka atoa, me amasimasiangaili niuungu eteva agheeleia.

<sup>14</sup> Me koti arooroo tani ghelei nannaaira kapughu ajiu etoa me la tara ssaiila me aue arooroo tani asaangi kasina etaira.

<sup>15</sup> Poli nau God ghe tam aloannailala, God me kosa ateva lalu ghe mae aitauaa sio me ghe lueilaluela. Me vaalua aue nongina, nau eteva God aue emene ghaaila? Aue enim nonginaaili matena ateva taumattu emene maamauile!

<sup>16</sup> Arova tuku mata ngemua ateva verete la tau lao ta God me ange amangaiela, ia akapaaaili verete eteva manga ia. Me arova oa ngai eteae manga ia, laangina tee atoa manga ila.

<sup>17</sup> Taumattu nge Israeli etoa nongina ai oliv atea laghe pasaiela tapaa ngutana, me God ghe sai vella kasina tana laangina. Me am taumattu ngeleka atoa nongina ai oliv atea ghe nim pinosal, God ghe ghaala kasina laangina me ghe atokaila lao sio tale ai oliv atea me aue la roo tani ghaa niarangise tale oane ia o ai oliv atea.

<sup>18</sup> Am rau mene saeaa nannaaimim poli God ghe sai vella kasina laa ngai me ghe atokaiemla tani ghaa liuira. Am nongina va nim laangina am, karika va am, am aasarasarakana oane, ta oane easasararakanaiem.

<sup>19</sup> Me katoa etaimim aue la ue va, "Ue, ta laane ai eteae ghe sai vella eaapasunga va aue ami ghaa liuira ila o taumattu ngatoa."

<sup>20</sup> Koronnaaili, me God ghe sai vella poli karika laghe aaiesoaa. Me am poli am aaiesoaa, isaa avalua o me am tokatoka tale voto ateva laghe tokatoka akasina etana. Me am rau mene saeaa nannaaimim, poli ngam ghe ghaala liuira; ta am matauta voto God erooroo tani ghelei.

<sup>21</sup> Am nnaa va emua arau God karika ghe tau vella isaa o laa ngai ghe aipatolaa lao tale ia o ai eteae va la toka nongina laghe tokatoka akasina. Am nongo! Tale ia o salana atikirighi God erooroo tani tau velu teeiem.

<sup>22</sup> Am tani nna ngamasina va God eghelei masi voto me erooroo tani ghelei tee kasina voto tani attara mataneiem. Eaattara matane lo atoa la ghelei ssavoto, me aue eghelei masina etaimim — arova am toka akorokorongana tani atoka tuutuliimim tale alousiusiaane; arova karika, am tee aue eghaa veluem.

<sup>23</sup> Me aIsraeli etoa, arova la aikolikoliaa me la aiesoaa, God aue mene atokaila nongina laghe sai vellala, ta poli God erooroo tani mene atokaila lao.

<sup>24</sup> Am taumattu ngeleka atoa, am nongina isaa o laa ngai tale ai oliv atea karika laghe pasaiela, ta ghe nim pinosalta etapaa tuvui, me God ghe sai veluemla, me ghe atokaiem lao sio tale kateae ppae ai oliv, God ghe pasaiela tapaa ngutana. Liuna avalua o me koronnaaili erooroo tani ghaa isaa o llo tani laangina ai eteae me emene aipatolaala lao tale aina tuunga atea nongina laghe tokatoka akasina.

### *Ila akapa aIsraeli etoa aue la saanga*

<sup>25</sup> Kateva voto koronna ia, aisulianna ia, karika ita ghe kilaiela emua arau. Kapughu etoa, aghaloanna va am kilaia. Me karika am mene tau sae nannaaimim. Ia avalua toko va, kasina tana taumattu nge Israeli, urunguitaniira korokorongana, me isaa oia voto aue enim toka lomosi ta ila akapa taumattu ngeleka atoa God ghe kololala, la mae ta Karisto.

<sup>26</sup> Me ia akapa ararimangali eteva eIsraeli aue la saanga avalua toko, nongina Uru ngai Manga ateva eaauliaa va,

“Lo ateva tau ngai asaangiita ia, aue emae eSaeon,  
me aue eghelei tuyuna atoa Jekop la kiri tale uunguua nitam nongo usilaa God,

<sup>27</sup> me aue aghalei ia oia niaippooa ngaitaua ngateva teeila,  
nau aghaa velu kaluira ssavoto.”

<sup>28</sup> Ta poli laghe ratila masi kiukiu, aIsraeli etoa tau ngai ssateena ila God, me isaa o voto aue emasina etaimim taumattu ngeleka atoa. Me poli God ghe suoiongainilala, ila kapuna ila mausi tuvuira atoa ta Abraham, Aisiki me Jekop.

<sup>29</sup> Poli God karika eaikolikoliaa nannaane tale taumattu ekolokolo, me eaarangiseila.

<sup>30</sup> Me ta ngetaimim taumattu ngeleka atoa, am ghe tam nongo usilaala God tale isaa too nau ang ghe lao sio, me ghaine ngam ghe ghaala alousiusiaane God, poli aIsraeli tee atoa laghe tam nongo usilaala.

<sup>31</sup> Nim nongina avalua o, poli tale alousiusiaane God am ghe ghaaiela, aIsraeli etoa angila ghele liula viliira ta God, me aue ila tee la rooroo tani ghaa alousiusiaane ateva God.

<sup>32</sup> Ta poli God ang ghe tau vella uunguua nitam nongo usilainia va aue eakaravusu taumattu ngakapa atoa, me aue eapasunga alousiusiaane etaira akapa.

### *Ita kkaua God*

<sup>33</sup> Koronnaaili, God masinaaili ia ta taumattu ngakapa atoa,  
me tee God alomasaangaaili ia,  
me ekilakila voto akapaaili!

See erooroo tani aulia ngaotu voto ange aaloanna tani ghelei?  
Karika poi ita rooroo tani kila salane.

<sup>34</sup> Nongina Uru ngai Manga ateva eaauliaa,  
“Karika teva ekilakila vaalua Vau ngepona ateva enannaa.  
See erooroo tani taula alomasaanga me niloeloe etana?”

<sup>35</sup> “See ghe nim tau lao sio righi voto ta God,  
me aue God eliu isaa o voto etana? Karika poi.”

<sup>36</sup> Ta poli God nonga ghe ghelei akapaailila voto atoa,  
me voto akapaaili etokatoka tale sarasarakaniaane,  
me ia kannaa akapaaili isaa o voto.

Ita tau sae ararina atea nau ekapa atoa! Koronnaaili.

## 12

*Aiaavusuvusuena atoa maulue ila*

<sup>1</sup> Liuna avalua o, aghaaulia ngakorokorongana etaimim, kapughu etoa, mausi alousiusiaane ateva God, me am tani taula vilikiimim ta God nongina va aiaavusuvusuena ateva maulue ia, manga ia me God emasimasiangailia. Tale ia o salana atikirighi aue am kkua ngakoronna ta God.

<sup>2</sup> Karika am mene kasu nongina taumattu tale kosa ateva oia la kasukasu. Karika, am tau velu God ealkolikolieinam nau eghelei nannaaimim eouna, me am roo tani kila amasinaaili aloannaane God. Me aue am kila saa ase voto masina me egheelei emasimasi God, me ghulughuluenaaili.

<sup>3</sup> Poli tale maamasinaane ateva ghe tauue mae sio etaghi tani ghelei uunguaane ateva, aghaaulia ngakapa etaimim va, am rau mene nnaa va aalomasaangaimim me gheegheleiaaimim elaulau mene katoa tana taumattu. Karika, ta am nna ngamasinaaili mua saa voto am gheelei erooroo eitauaa tee niaiesoaa God ghe tau aatu sio etaimim.

<sup>4</sup> Nim nonginaaili kateva kateva etaita, asease aissopiaoa tale vaulaniita ateva, me isaa akapaaaili o voto karika la gheelei nonga kateva niuungu,

<sup>5</sup> liuna avalua o me ta Karisto ita tee oroi ita me ita tokatoka nongina va kateva nonga vaulani, me kateva kateva etaita eaipatola la mene kateva.

<sup>6</sup> Ita akapaaili tale maamasinaane God, ia ghe nim tau mae sio asease niuungu karika va isaa aitauaa. Arova taumattu ngateva uunguaane tani auliah inangarina ateva God, tau veluela me eauliah nongina vaalua eairooaa tee aiesoaaane.

<sup>7</sup> Arova kateva taumattu uunguaane tani sausi mene kateva taumattu, tau veluela me esausi. Arova tani apasunga, tau veluela me apasunga.

<sup>8</sup> Arova tani asarasarakana taumattu, tau veluela me easarasarakana mene katoa. Arova taumattu ngateva uunguaane tani parruu, tau veluela me etaula tale nimasimasi. Arova tani muemueaa niuungu, esarasarakana tani aitara ngamasina ia o niuungu eteva. Arova tani alousiusi tee mene katoa me esausila, tau veluela me eghelei tale nimasimasi.

*Niaielouisi*

<sup>9</sup> Am ailousia ngakoronnaaili mene katoa tana taumattu. Am liu viliimim tale voto karika masina, me am poso parasi tale voto masina.

<sup>10</sup> Am ailousiaa kateva kateva ta kapuna atoa God, me am ailousieinila nonginaaili va kapuimim tuungi ila. Am oneoneainila me karika va am, am ghaa nioneoneeaa.

<sup>11</sup> Am rau mene mangoo, ta am sarasarakanan tani tau velu Spirit Manga ateva tani katulaniam, me am ghelei uunguaane ateva Vau eteva.

<sup>12</sup> Am masimasi nau am toitoi God va eaisausieinam, me am tani tingina akorokorongana nau maamatana eghaaiem, me am looloo sae nau ekapa atoa.

<sup>13</sup> Am parruu kapuna taumattu ngatoa God arova la tuutukuna tale righi voto. Am aikoloa ativuu etoa nau la mae tanganueimim.

<sup>14</sup> Am arangise lo atoa la gheelei saasakieinam. Am looloo sae va God eghelei emasina etaira, am rau mene looloo sae va God eghelei saasakieinila.

<sup>15</sup> Am masimasi eitauaa tee lo atoa la masimasi, me am alousiusi eitauaa tee lo atoa la alousiusi.

<sup>16</sup> Am annaa kateva nonga ia masi ninannaa erooaa taumattu ngakapaaili etoa. Am rau mene saeaa nannaimim. Am masimasi tani toka tee llo taumattu karika arariira. Am rau mene asaesae arariimim me am ue va am nonga alomasaanga am.

<sup>17</sup> Am rau mene liu sesa tale voto la gheelei etaimim, karika. Isaa akapaaili nau am anna tani gheelei masi niuungu ta mataira taumattu ngakapa atoa.

<sup>18</sup> Arova erooroo, am gheelei voto akapa tani toka aitauaa tee taumattu ngakapa atoa tale luei.

<sup>19</sup> Kapughu etoa, am rau mene liu sesa voto la gheeghelei teeiem. Am tau velu me God aue etaula sessaiaane etaira. Poli angila ghe pitii elokoila inangari eue va, Vau palepale eaauliaa va, "Aghi uunguaaghi tani liu sesa voto la gheeghelei, me aue aliu."

<sup>20</sup> Me karika ta,

"Arova tau ngai ssateem ateva emaamaloo, uanginia.

Arova ekaakangngata tee ateo, utau lao me eropi.

Arova ughelei isaa o voto, aue ugheleia epalataa sesa uunguaane egheeghelei.\*"

**12:1:** Rom 6:11, 13; 1 Pita 2:5.    **12:3:** 1 Ko 12:11; Ips 4:7; Plp 2:3.    **12:4:** 1 Ko 12:12, 27.    **12:6:** 1 Ko 12:4-11; 1 Pita 4:10-11.    **12:10:** 1 Pita 1:22.    **12:12:** 1 Tes 5:16-18.    **12:13:** Hib 13:2.    **12:14:** Mat 5:44; 1 Ko 4:12.    **12:16:** Nitoka 3:7.    **12:17:** 1 Tes 5:15.    **12:19:** Diut 32:35; Mat 5:39.    **12:20:** Nitoka 25:21-22; Mat 5:44.    \* **12:20:** Tale inangari nge Grik, aue uatoka sae parikanga ataata epona ta uruna ateva.

21 Urau mene tau velu sesa voto va etaou sio euu, karika, ta ughelei masi voto me aue etaou sio sesa voto euu.

## 13

### *Uunguaaita ta gavmani*

<sup>1</sup> Am akapaaili, am oneoneaa gavmani me lo atoa la uungu etana, poli karika teva erooroo tani aitoiaa arova God etam ue va eaitoiaa. God ghe suoingaala taumattu ngatoo la uungu ta gavmani.

<sup>2</sup> Llo taumattu etam nongo usilaa gavmani me kapuna tau ngai uungu etoa, ila la nongonongo vulu saa voto God ghe atokala. Me lo atoa la gheelei evalua o, aue la ghaa sesa aipolipoli ta poli karika la aimuli tee inangariira.

<sup>3</sup> Poli gavmani karika ghe tokala va lo atoa la gheeghelei masi niuungu la matautainia. Karika poi, ta lo atoa la gheelei sesa voto. Arova karika ualoanna tani matauta isaa o taumattu euungu ta gavmani, ughelei masi voto me aue easaesae ararim atae.

<sup>4</sup> Poli ila kapuna tau ngai uungu ila ta God, me la rooroo tani gheleio me utoka amasina, me arova ughelei voto karika masina, aue umatautainila, poli ila sarasarakaniaira erooroo tani ghelei sesa voto ta lo ateva egheelei saasakia. Ila tau ngai uungu ila ta God tani ghelei saasakia ta lo ateva egheelei sesa voto.

<sup>5</sup> Liuna evalua o, am nongo usilaa lo atoa la aitoieinam, poli ita maamatauta sesa voto aue la tau lao ta lo atoa la tam nongonongo usilaa, me tee, ta poli ita kilakila va emaamasina tani nongo usilainila.

<sup>6</sup> Mausina evalua o me am tee am poli lao viliki veu tale takis, poli lo atoa la uungu ta gavmani, la uungu ta God nau la gheelei rooroaa uunguaaira.

<sup>7</sup> Saa llo voto pei nitau lao ta gavmani, am tau lao. Am tau lao asease takis tale taumattu ngateva ia uunguaane tani ghaa takis, me am matauta me am oneoneaa lo atoa matuutulienila ila.

### *Ita aielousiaa mene kateva taumattu*

<sup>8</sup> Am tani liu voroi dinao am gheelei ta mene kateva taumattu. Ta kateva nonga dinao erooroo tani toka nau etoa, niaielousi. Poli lo ateva eaielousiaa mene kateva taumattu, euusilangaili inangari nipaopao.

<sup>9</sup> Inangari nipaopao eue va, "Karika umene lai sari kateva manna ateva, karika umene aiuvii emate, karika umene ainao, karika umene ssaii." Isaa akapa llo oia me mene kasina, ita nongo usila ngakapa arova ita nongo usilaa kateva nonga inangari nipaopao eue va, "Uaielousiaa mene kateva taumattu nonginaaili uaielousieinio."

<sup>10</sup> Lo ateva eaielousiaa mene kateva taumattu, karika erooroo tani ghelei righi voto sesa etana. Liuna evalua o me, arova uaielousiaa mene katoa, unonganongo usila ngakapaaili inangari nipaopao.

<sup>11</sup> Am ghelei voto oia, poli am kilakila saa ase nau ghaine ita tokatoka etana. Ang ghele naula tani anguu taatara atoka tale uneimim niasekanua, poli nauna God tani asaangita ang ghele kalakalanginala, me karika va nongina ita ghe tani aikaaia ngakasinala.

<sup>12</sup> Ghaisangaili erighi voo ngateva ekapa, me mallanga ateva emae. Ita ruu tani ghelei niuungu kannia surrom ateva me ita ghaa ghinna niaiuuvii tale uunguaa mallanga ateva.

<sup>13</sup> Ita kasu emasina nongina taumattu ngateva ekasukasu ella, ita rau mene aighui tee lo atoa sesa gheeleiaira me ita ropi sesa manu, ita rau mene ailai salosaloaa nongina ghaata kkena atoa karika masi nannaaira. Ita rau mene aikiso see me ita rau mene ssa tee kateva poli ange apalaitala.

<sup>14</sup> Am ghinaghinnaa Vau palepale Iesu Karisto, me am rau mene nnaa tani usilaa sesa aloannaimim.

## 14

### *Am rau mene ue va katoa nonga gheegheleiaira sesa*

<sup>1</sup> Am ghaa isaa o taumattu karika tani sarasarakania uneira niaikaaiaa, me am rau mene aissakeana teeila tale voto ita nannaai tale saa ase voto ita ghelei me saa ase voto ita rau mene ghelei.

<sup>2</sup> Kateva kateva taumattu enamanama asease inana nongina vaalua aikaaiaane, me taumattu ngateva, aikaaiaane karika tani sarasarakania, enamanama nonga ase inana ngeutana me karika enamanama asease malatau etoa.

<sup>3</sup> Taumattu ngateva enamanama isaa akapaaili asease inana erau mene nnaa saasakiaa me esessaia ta lo ateva taumattu karika enamanama asease inana me malatau. Me taumattu ngateva karika enamanama malatau, erau mene auliaa saasakiaa me ennaa saasakiaa tee taumattu ngateva enamanama isaa akapaaili asease inana. Poli God ghe ghaa teeielia.

<sup>4</sup> Saa taumattu io me uaauliaa tee tau ngai nongonongo anna ateva kapuna ia kateva ppae taumattu va ia ang ghelei saasakiala? Uunguaane vauna ateva tani auliaa va masina voto egheelei o karika. Me aue etingina akorokorongana me vauna ateva aue auliaa va uunguaane masina, poli Vau palepale sarasarakania ia tani gheleia me aue eroo tani tingina akorokorongana.

<sup>5</sup> Kateva taumattu eannaa va, "Kateva tana nau maamasinaane elaulau mene kasina tana nau." Me mene kateva tana taumattu enannaa va, "Isaa akapaaili nau enim aairooaa." Kateva kateva taumattu etani kila amasinaaili tale nannaane saa voto erooroo tani gheleia.

<sup>6</sup> Lo ateva taumattu enannaa sossola kateva nau va nau nikkaua ia, ia o taumattu ngateva enannaa Vau ngepona ateva me egheelei llo o voto tani oneoneainia. Lo ateva enamanama asease inana, enamanama tani oneoneaa Vau eteva, poli ekaakaili emasina ta God tale inana. Lo ateva taumattu eratirati tani nama kasina tana asease voto, egheelei tani oneoneaa Vau ngepona ateva, me etautau lao nikaili emasina ta God.

<sup>7</sup> Karika teva etaita eroo tani nnaa va maamauluaane isaa nonga etana, me karika teva etaita erooroo tani nnaa tee va ia erooroo tani mate etana.

<sup>8</sup> Arova ita maulue, ita maulue tani oneoneaa Vau palepale, me arova ita mate tee, ita mate tani oneoneaa Vau palepale. Me arova ita mate o maulue, kapuna ita Vau palepale.

<sup>9</sup> Poli Karisto ghe matela me ghe mene totula tale maulue, God ghe aloannala va ia kapuira Vau ia matena atoa me maulue tee atoa.

<sup>10</sup> Vaalua me uaauliaa tee kapum atoa va ila la gheelei voto karika masina, me vaalua me upiilosii kapum atoa? Poli ita akapaaili aue ita tingina emua ta God nongina liu niasakei eteva me egheelei niasakei etaita.

<sup>11</sup> Poli nongina Uru ngai Manga ateva eue va,  
"Vau palepale eue va, 'Koronna nongina va aghi maulue ieghi,  
taumattu ngakapaaili etoa aue la tturru etaghi,  
me ila akapaaili, aue la aulia ngaotu va aghi God.' "

<sup>12</sup> Isaa avalua o me kateva kateva aue ita auliaa ta God isaa akapaaili asease niuungu ita gheleila tale kosa ateva oia.

<sup>13</sup> Liuna avalua o, ita ruu tani auliaa tee mene kasina tana kapuita va ila nonga la gheelei sesa voto, ta ita nna ngavalua toko va karika ita mene ghelei righi ase voto va egheelei ekatungila tale uunguaa ssavoto ateva.

<sup>14</sup> Vau ngepona ateva Iesu ghe gheleila nannaaghi ghe soallaala me ghe masalikaala, me aghe kila amasinala va karika poi teva voto kulukulutana ta matana God. Me arova taumattu ngateva eaiesoaa va ia o voto ateva karika raarangisana ia, ia o voto ateva karika raarangisana ia nonga etana.

<sup>15</sup> Arova ughelei saasakiaa ta kapum ateva nau etaraio ta unamanama asease inana, karika ugheelei uunguaa niaelousi. Urau mene tau velu inana etaatara io unamanama va eturungi ia ta taumattu ngateva, ta Karisto ghe matela tani asaangia.

<sup>16</sup> Arova am annaa va kateva voto masina ia, am aipanipaniaa, ta gheegheleiaaimim erau ghelei me katoa tana taumattu aue la ue va isaa o voto karika masina.

<sup>17</sup> Poli ararimangalina ateva God karika pei tale inana me ateo, karika, ta tale nighulughuluenia, luei, me nimasimasi. Isaa voto Spirit Manga ateva etautau mae.

<sup>18</sup> Taumattu ngateva euungu ta Karisto tale ia o salana atikirighi, egheelei God emasimasi me tee egheelei taumattu ngatoa la oneoneainia.

<sup>19</sup> Isaa avalua o me ita atoka nannaaitea tale saa voto etautau mae nonga luei, me erooroo tani asarasarkanaita me mene katoa tana taumattu.

<sup>20</sup> Am rau mene ghelei saasakiaa voto God ghe gheleila, poli ita rooroo tani nama isaa akapaaili asease nginana atoa. Isaa akapaaili asease nginana atoa raarangisana ila, me la rooroo tani ghelei kasina tana taumattu la katuu tale ssavoto, liuna avalua o me karika masina tani nama isaa akapaaili voto.

<sup>21</sup> Masina ateva voto tani gheleia, ia avalua toko va, am ruu tani nama malatau, ropi sesa manu me tani ghelei asease voto atoa la rooroo tani ghelei kapuimim atoa la katuu tale ssavoto.

<sup>22</sup> Saa voto uaikaaiaa etana tale isaa o voto, aue amalua nonga me God. Aue emasinaaili ta lo ateva taumattu enannaa va voto egheelei masina, me nannaane karika eue va egheelei sesa.

<sup>23</sup> Arova eannaa va saa voto enamanama, God eue va karika masina tani nama, egheelei ssavoto, poli gheegheleiaane karika elao lao eitauua tee unna niaikaaiaa. Me arova am gheelei voto me karika am aiesoaa va masina, am gheelei ssavoto.

## 15

*Tani amasimasi katoa ppae me karika va ita*

<sup>1</sup> Ita lo atoa korokorongana ita tale niaikaaiaa, emamasina etaita tani saus i lo atoa aikaiaiaira maomaona, me karika ita mene ghelei nonga saa voto aue egheleita me ita masimasi.

<sup>2</sup> Ta, kateva kateva etaita ita roo tani ghelei saa ase voto masina ta isaa o taumattu ita aiesoaa ngaitauua ta Karisto tani gheleia emasimasi, me aue eghelei ekorokoronganaia.

<sup>3</sup> Poli Karisto karika ghe gheelei voto aue ghe rooroo tani ghelei emasimasia nonga. Ta, nongina Uru ngai Manga ateva eaauliaa va, "Saa voto taumattu ngatoa laghe auliaa saasakiaa teeiola God, ang ghele mae sio tee etaghi."

<sup>4</sup> Poli isaa akapaaili voto laghe pitila tale Uru ngai Manga ateva emua arau, laghe pitila tani apasunga etaita, tani akorokorongana nannaaита, me egheleita tani tingina akorokorongana, me ita toitoi masi voto God aue etau mae.

<sup>5</sup> Me alooloo sae va aue God, lo ateva eaakorokorongana nannaaита, me egheleita ita tam sessai parasita, aue egheleiem am toka amasinaaili tale luei, nau am aimuli tee Karisto Iesu.

<sup>6</sup> Liuna avalua o am akapaaili, tale kateva nonga ninannaa aue am tau sae God, ia Tamana kapuia Vau ngepona ateva Iesu Karisto.

<sup>7</sup> Liuna avalua o me am masimasi tani ghaa mene katoa nongina va tue me nenga am, nonginaaili Karisto ghe masimasila tani ghaiem. Am ghelei evalua o me aue taumattu ngatoa la tau sae God.

<sup>8</sup> Poli aghaauliaa etaimim va Karisto ghe nonginala va kapuira tau ngai nonganongo anna ia ajiu etoa tani apasunga va God aue eghelei saa voto ghe auliaala va aue eghelei, tani ghelei rorooodaa kannia inangari nialokoi God ta tuvuiraa atoa,

<sup>9</sup> me tee tani ghelei taumattu ngeleka atoa tani tau sae God, poli alousiusiaane. Nongina Uru ngai Manga ateva eaauliaa va,

"Isaa avalua o me nau atokatoka elome ta taumattu ngeleka atoa aue atauo sae, aue atau sae ararim ateae tale nikkinari."

<sup>10</sup> Emene ue va,

"Am taumattu ngeleka atoa, am mae aitauua tee kapuna taumattu ngatoa God tale nimasimasi."

<sup>11</sup> Me emene ue va,

"Tau saela ararina atae Vau ngepona ateva, taumattu ngeleka akapa atoa.

Am kkaueinia, am akapa taumattu tale kosa ateva."

<sup>12</sup> Me Aisaea tee ghe mene uela va,

"Tuvuna ateva Jesi aue emae,

aue eaitaraa taumattu ngeleka atoa.

Me aue la atoka tuutuliira etana."

<sup>13</sup> Me alooloo sae va aue God, ia etautau mae inangari nialokoi etaita, aue egheleiem me am pasu tale nimasimasi me luei ta poli am aiesoaa etana. Liuna avalua o me kaluimim niaiesoaa tale inangari nialokoi, aue ekorokorongana tani pinosa tale sarasarakaniaane Spirit Manga ateva.

*Pol ghe uungula ta taumattu ngeleka atoa*

<sup>14</sup> Kapughu etoa, ta ngetaghi akilakilaaili va, am masinaaili iem. Am kilakila amasinaaili isaa o voto, me am rorooodaa tani apasunga ta mene katoa tana taumattu.

<sup>15</sup> Elome tale uru ngai etikirighi oia, aghe auliaala kasina voto sarasarakaniaaili, me aue am roo tani mene nnaa. Aghe aulia ngakapaailili isaa o voto, poli God ghe tau mae sio maamasinaane etaghi

<sup>16</sup> va aghi atau ngai uungu ta Karisto Iesu, tani uungu ta taumattu ngeleka atoa. Auungu nongina pristi eteva, tani ppoaa masi kiukiu kanna God. Poli aghaloanna va taumattu

ngeleka atoa la nongina aiaavusuvusuena ateva God emasimasieinia, poli Spirit Manga ateva ghe amangala ia o aiaavusuvusuena ateva.

<sup>17</sup> Poli aghi auungu tee Karisto Iesu, liuna avalua o, amasimasi ta poli auungu ta God.

<sup>18</sup> Me aghi, karika aghaasakeaa righi voto ta llo nonga Karisto ghe gheleila nau ghe asarasarakana nannaaghi tani katulaa taumattu ngeleka atoa tani nongo usilaa God. Euungu etaghi tale inangari apoppoaa me voto agheeghelei,

<sup>19</sup> tale sarasarakaniaa niamatootoongana me mirikol atoa, me tale saa voto Spirit ghe gheleila tale salana atikirighi sarasarakanaaili ia. Liuna avalua o, me masaliki ekapaa ili aghe laolao etana, ghe tiuala tale masaliki taatara ateae ejerusalem, me ghe laa oghioighi arau tale distriki eteva ellirkum, ngaghe ruu ekapala isaa o distriki tani ppooaa masi kiukiuna Karisto.

<sup>20</sup> Kateva nonga nannaaghi eteva tani aulia ngaotu masi kiukiu tale masaliki taumattu ngatoa karika laghe nongo poi Karisto, karika aghaaloanna tani uungu tale voto kasina ppaе taumattu laghe uungula etana.

<sup>21</sup> Nongina Uru ngai Manga ateva eaauliaa va,

“Lo atoa karika laghe aulieinia etaira, aue la tara,

me lo atoa karika laghe nongo, aue la nongo kila.”

<sup>22</sup> Mausina avalua o me oroieili nau karika aghe rooroo tani mae taraiem.

### *Pol ghe aaloanna tani lao eRom*

<sup>23</sup> Me isaa oia ta ngaghe ruula voto aghe nannangaili tani ghelei tale isaa oia voto, me oroi ninamanama aghe aaloanna tani mae taraiem.

<sup>24</sup> Aghaloanna tani lao tee eSpein, me nau eteva amae avalua ona, aue akkure atoka eRom, me ita itaira. Aghanna tani toka teeiem ghaisa nonga ulana tani masimasi eitauua, me nau isaa o voto eruu, am sausieghi tale kasukasuaaghi tani lao okae.

<sup>25</sup> Me isaa arau oia, ngakasukasuu tani lao ejerusalem tani laa sausi kapuna taumattu ngatoa God okae.

<sup>26</sup> Poli ale manga atoa eMersedonia me eAkaia laghe masimasiaiili tani taula viliki veu tani sausi kapuna taumattu ngatoa God karika tue peipeiena ila la tokatoka ejerusalem.

<sup>27</sup> Ila nonga laghe nnaala tani ghelei tale nimasimasi. Ajiu etoa laghe tautau tee lao ta taumattu ngeleka atoa masi voto kannaa God, me emaamasina va taumattu ngeleka atoa tee la liu tale viliki veu tani sausila.

<sup>28</sup> Nau eteva ngaruula ia o niuungu eteva tani taula viliki veu tau ngaisesoaa eMersedonia me eAkaia laghe aisokosokoiala tani lao ejerusalem, me avira mene kasu tani lao eSpein me aue atoka mua ona tani taraiem.

<sup>29</sup> Me akilakila va nau eteva aghatu, aue Karisto ekaarasi tani arangiseita tale uneita nivelu eitauua.

<sup>30</sup> Poli tale kaluita niaikaiaa ta Vau ngepona ateva Iesu Karisto me tee poli niaielousi eteva Spirit Manga ghe tauve mae sio etaita, aghaaulia ngasarasarakanetaaimim, kapughu etoa, tani uungu esasarakanetaeeieghi tani looloo sae ta God mausighi.

<sup>31</sup> Ita looloo sae va, lo atoa taumattu la tokatoka eJiudia la tam aaiesoaa ta Iesu Karisto, karika aue la ghelei righi sesa voto etaghi, me uunguaaghi ejerusalem, aue kapuna atoa God la aloannaaili.

<sup>32</sup> Me aue amae etaimim tee nimasimasi eteva, arova aaloannaane God, me ita masimasi, ita ainoana, ta poli amae etaimim.

<sup>33</sup> Alooloo sae va God, ia etautau mae luei, aue etoka aitauua teeiem akapa. Koronna.

## 16

### *Pol ghe tau lao sio masimasiaane ta kapuna atoa*

<sup>1</sup> Aghaloanna tani auliaa etaimim va, kapuita vaseateva ta Fiibi, tau ngai uungu ia tale ale manga ateva eKenkria, am rooroo tani atoka tuutulimim etana.

<sup>2</sup> Akolomiem tani ghaaia tale ararina ateae Vau ngepona, nongina taumattu kapuna taumattu ngatoa God la aioneoneainila, me am sausia arova ealoanna righi niaisausi etaimim, poli ghe sausila oroieili taumattu ngatoa, me aghi tee.

<sup>3</sup> Am asaoki masimasiaaghi ta Prisila me Akuila, lalu uungu eitauua teeieghi ta Karisto Iesu.

<sup>4</sup> Lalu ghe tam matautula tani mate mausi tani asaangi maamauluaghi. Akaakaili emasinaaili etairarua, me karika va aghi nonga, ta tee isaa akapaa ili ale manga atoa, aleira ila taumattu ngeleka atoa.

**15:20:** 2 Ko 10:15-16.    **15:21:** Ais 52:15.    **15:22:** Rom 1:13.    **15:25:** 1 Ko 16:1-4.    **15:26:** 1 Ko 16:1; 2 Ko 8:1;

9, 2, 12; Apes 24:17.    **15:27:** 1 Ko 9:11.    **15:29:** Rom 1:11.    **15:30:** 2 Ko 1:11; Kol 4:3; 2 Tes 3:1.    **16:3:** Apes 18:2.

<sup>5</sup> Am asaoki tee masimasiaaghi ta lo atoa laghe aiesoala me la nim laa aisouii tanganueirarua tani kkauua.

Am sou tee masi kapughu eteva ta Epenetus, aitiutiu ia tani aikaiaia ta Karisto tale provinsi eteva eEisia.

<sup>6</sup> Am sou tee Meri, ghe uungu aanaasaaili tani sausiem.

<sup>7</sup> Am sou tee Andronikus me Jiunia tale nimasimasi, ilalua tee ajiu ilalua, me ami ghe karavusu eitauaala. Apostolo ilalua, me taumattu ngakapa atoa la oneoneainilalua, me lalu ghe kila akasinala Iesu, me aghi avirina.

<sup>8</sup> Am taula masimasiaaghi ta Ampliatus, ia aghielousieinia mausi Vau palepale.

<sup>9</sup> Am sou tee Urbanus, ita uungu eitauaa ta Karisto, me masi kapughu eteva Stakis.

<sup>10</sup> Am sou tee Apelis, ghe ghaala nitootoonga me ghe apasunga teela ta taumattu ngatoa vaalua ghe kaakaarasi tani uungu eitauaa tee Karisto.

Am sou tee kapuna atoa Aristobulus.

<sup>11</sup> Am sou tee Herodion, ia tee ajiu ia.

Am sou tee kapuna atoa Nasisus la ghahaesooa ta Vau ngepona ateva.

<sup>12</sup> Am sou tee Tripena me Triposa, vause alua lalu ghe uungu aanaasa ta Vau ngepona, me am sou tee mene masi kapughu eteva Pesis. Ia tee kateva vause ghe uungu aanaasa ta Vau ngepona ateva.

<sup>13</sup> Am sou tee Rupus, Vau ngepona ateva ghe suitoongainiela, me tee kinna, ghe saasausi emasinaailieghi, nonginaaili va natuna tuungi eghi.

<sup>14</sup> Masimasiaaghi ta Asinkritus me Flegon me Hermes, me Patrobas, me Hermas, me kapuira atoa la velvelu eitauaa tani kkaua.

<sup>15</sup> Am taula masimasiaaghi ta Pilologus me Julia, me ta Nereus me kapuna vause ateva, me Olimpas, me ila akapaaili kapuna taumattu ngatoa God, la velvelu eitauaa tani kkaua teeila.

<sup>16</sup> Am aisouii tee mene katoa la aiesoa ngaitauaa tale niaielousi.\* Me ila akapaaili ale manga atoa ta Karisto la tautau aatu masimasiaairia etaimim.

<sup>17</sup> Amene aulia ngakorokoronganeta etaimim kapughu etoa: Am aimonomonosiaa tee lo atoa la gheelei taumattu la tokatoka apolapola, me la gheelei taumattu la kaakatuu tale niaikaaia, me la aauliaa saasakiaa tee niapasunga koronna ngam ghe kila akasinala. Am rou mene toka me kasu ekalakalaa teeila.

<sup>18</sup> Poli lo atoa laghe gheelei isaa o ase voto, karika la uungu ta Karisto Vauita ia, ta la nim nannaa nonga aaloannaaira. La auliaa inangari masinaaili nonganongoane, me la kamekame taumattu ngatoa, me la gheelei saasakiaa urunguitanira, taumattu ngatoa karika la kilakila amasina masina me sesa.

<sup>19</sup> Taumattu ngakapa atoa angila ghe nongola vaalua masinaaili nonganongo usilaimim tale masi kiukiu. Liuna avalua o amasimasiangailiim. Aghaaulia ngavalua o poli aghaloanna va am alomasaanga tale saa voto masina, me am toka amasau tale voto karika masina.

<sup>20</sup> Me God, ia liue luei ia, ghaisa ngarighi aue easa putuputu Satana ta kkeimim. Alooloo sae va Vauita ateva ta Iesu Karisto aue etam ruu tani apasunga etaimim maamasinaane ateva.

<sup>21</sup> Timoti, euungu eitauaa teeieghi, etautau aatu masimasiaane, me tee Lusias, Jeson, me Sosipata, ajiu tee ila.

<sup>22</sup> Aghi Tetius, aghe pitila tale uru ngai etikirighi oia saa voto Pol ghe auliaala, atautau aatu masimasiaaghi mausi Vau ngepona ateva.

<sup>23-24</sup> Gaeas, ia o taumattu ngateva atokatoka teeia tanganuena, me esaasausi lo akapa atoa la aiesoaa tale ia oia masaliki taatara ateeae, etautau aatu masimasiaane.

Erastus, ia eaaitaraa viliki veu tale ia oia masaliki taatara ateeae, me kapuita ateva ta Kuatus, lalu tautau aatu masimasiaairarua etaimim.<sup>†</sup>

<sup>25</sup> Ita taula nikkaua ta God, poli ia erooroo tani gheleiem me am tingina akorokoronganata tale masi kiukiu apoppoaa, isaa o masi kiukiu eaaulia ngaotu Iesu Karisto, me tee ia oia voto ateva koronna ia ghe aaisuliaala orioeili nau,

<sup>26</sup> me ghaine ang ghele otuela, nongina inangari propete atoa laghe pitila, me nongina God ateva tokatoka liu ia ghe aulia ngakoronnala va, taumattu ngeleka akapa atoa tale voto akapa laghe nongola isaa o inangari, me aue la rooroo tani aiesoaa me nongo usilaa.

**16:13:** Mak 15:21.    **16:16:** 1 Ko 16:20; 1 Pita 5:14.    \* **16:16:** Tale inangari nge Grik, *tale niaingusu eteva manga ia*.    **16:17:** Mat 7:15; Tts 3:10.    **16:18:** Plp 3:19; 2 Pita 2:3.    **16:19:** Rom 1:8; 1 Ko 14:20.    **16:20:** Aitiutiu 3:15.

**16:21:** Apos 16:1-2; 19:22; 20:4.    **16:23-24:** Apos 19:22; 1 Ko 1:14.    † **16:23-24:** Kasina uru ngai laghe pitila, la ghe piti teela,<sup>24</sup> Alooloo sae va maamasinaane ateva kapuita Vau ngepona ateva Iesu Karisto aue etoka aitauaa teeiem akapa. Koronna.    **16:25:** Ips 1:9; 3:5, 9; Kol 1:26; Rom 1:5.

<sup>27</sup> God ia nongaaili Goto ia me alomasaanga ia tale voto akapaaili. Ita taue sae nau ekapa atoa poli uunguaane Iesu Karisto! Koronna.

## Aitiutiu etikirighi uru ngai Pol ghe pitiela ta aKorint atoa Inangari emuemua

Korint namuu masaliki taatara ia tale provinsi eteva eAkaia, tale namuu patunganua ateva ghaine ita aseasea va eGris. Oroi anua laghe mae soso tale saoa atikirighi eKorint, me oroi tau ngelamana atoa laghe tokatoka okae. Oroi voto sesa, nongina tani ropi sesa manu me niailai salosaloaa, ghe lutulutu eKorint. Pol ghe aitiutiua tani ppooa masi kiukiu eKorint (Apostolo 18). Nau Pol ghe kasula eKorint tani ppooa tale mene katoa masaliki taatara, oroi voto ghe lutula tale ale manga eKorint, me Pol ghe pitila ia o uru ngai etikirighi tani liu kaluira nikkolomi.

### Tani kila amuemua

Aitiutiu tale inangari 1:1-9

Niaissa me niaipolapola tale tau ngaisesoaa 1:10-4:21

Gheeleiaa ssavoto me nikkolomi tale nilai 5:1-7:40

Tani toka nongina tau ngaisesoaa ngatoa 8:1-11:1

Vaaluva vaulanina ateva Karisto ta ale manga etani kkauua 11:2-14:40

Karisto ghe totula tale nimate, me tau ngaisesoaa ngatoa aue la totu tee 15:1-58

Pol ghe suula masimasiaane 16:1-24

<sup>1</sup> Aghi Pol, God ghe koloaghila tale aloannaane va ekapuna apostolo ieghi Iesu Karisto, tee me Sostenes, eaaiesoaa ngaitauua teeita.

<sup>2</sup> Angalu pitipi mae tale alena ale manga ateva God eKorint, ta lo atoa God ghe amangaiemla ta Karisto Iesu, me ang ghe koloamla va am manga am, tee me lo akapa atoa la tokatoka akapa see tale mene kasina masaliki la looloo sae tale ararina atea Vau eteva Iesu Karisto, kapuira Vau ia, me ita tee.

<sup>3</sup> Alooloo sae va maamasinaane me luei ekasukasau ta God Tamaita ia me Vau ngepona ateva Iesu Karisto aue etoka teeiem.

*Pol ghe kaili emasina saela ta God*

<sup>4</sup> Anim toka kaakaili emasina sae ta God nau ekapa atoa mausiimim, poli ta Karisto Iesu God ghe tau aatu sio maamasinaane ateva.

<sup>5</sup> Poli ta Karisto, ngam ghe pasula tale voto akapaaili, nongina tale aippooaaimim, me tale alomasaaanganiaaimim.

<sup>6</sup> Tale isaa o salana, God ang ghe apasungaala va nau ami ghe aaulia ngaotu Karisto, ami ghe aaulia ngakoronnaia.

<sup>7</sup> Liuna avalua o, karika am tuutukuna tale voto God etautau mae tani ghelei uun-guaane, nau earieriem tani toi kapuira Vau ngepona ateva Iesu Karisto nau ekauerekat.

<sup>8</sup> Ave eaitara ngakorokoronganaiem lomosina ta airuuruu eteva nau, me karika aue la ue va sesa am tale nau eteva kapuira Vau eteva Iesu Karisto emene mae.

<sup>9</sup> God aue eghelei isaa o voto etaimim poli egheelei voto eue va aue eghelei, me ghe suoiongainamla tani aighui eitauua tee Natuna, ia kapuira Vau ngepona ia, Iesu Karisto etana.

*Niaipolapolaii tale ale manga ateva*

<sup>10</sup> Kapughu etoa, tale ararina atea kapuira Vau eteva Iesu Karisto, akookolomiem va am kateva nonga, me aue karika righi niaipolapolaii elutu elome etaimim, me aue am toka aitauua tale kateva nonga ninannaa me aloannaaimim.

<sup>11</sup> Kapughu etoa, katoa laghe tokatoka tanganue vause ateva Kloui, laghe auliaala kieghi va niaissakeana elutulutu elome etaimim.

<sup>12</sup> Mallooeane inangari aghaauliaa isaa avalua toko, va katoa etaimim la ue va "Aghi kapuna disaepolo ieghi Pol," me katoa la ue va, "Aghi kapuna disaepolo ieghi Apolos," me katoa la ue va, "Aghi kapuna disaepolo ieghi Pita,"\* me katoa la ue va, "Aghi kapuna disaepolo ieghi Karisto."

<sup>13</sup> Am annaa va Karisto aipolane ia? Va Pol ghe matela etaimim tale aikotoo? Me am ghe ghaala niaasuu tale ararina atea Pol?

<sup>14</sup> Akaakaili emasina, poli karika aghe asuula toa etaimim ta Krispas nonga me Gaeas,

---

\* **1:8:** 1 Tes 3:13; 5:23.    **1:9:** 1 Jon 1:3; 1 Tes 5:24.    **1:10:** Plp 2:2.    **1:12:** 1 Ko 3:4; Apos 18:24-28.    **1:12:** Pita  
Pol ghe pitila va Kepas. Tale inangari nge Aramaik, Kepas mallooeana va atu. Tale inangari nge Grik, Pita tee mallooeana va atu.    **1:14:** Apos 18:8; Rom 16:23.

<sup>15</sup> liuna avalua o me karika teva urooroo tani ue va ughe ghaala niaasuu tale ararighi eteae.

<sup>16</sup> (Aghe asuu teela Stepanas me kapuna atoa tanganuena, me karika aghannaa va aghe asuula mene righi taumattu.)

<sup>17</sup> Poli Karisto karika ghe sungieghila tani asuu, ta ghe sungieghila tani ppooa masi kiukiu, me nau appoaa inangarinata, arau mene aulieinia tani apasunga va alomasaanga ieghi, ta unna aikotoo ateva Karisto erau nim peisaane.

*Karisto alomasaanganiaane ia me sarasarakaniaane ia God*

<sup>18</sup> Poli kiukiuna aikotoo ateva alokapakapa ia ta lo atoa ngila raaraua, me ta lo atoa etaita God easaangita, aikotoo ateva sarasarakaniaane ia God.

<sup>19</sup> Ta Uru ngai Manga ateva eue va,

“Aue aghaa velu alomasaangania lo atoa taumattu la annaa va alomasaanga ila, me aue aghapasunga va alokapakapa nannaaira lo atoa taumattu la annaa va la kilakila oroi voto.”

<sup>20</sup> Tau ngalomasaanga ateva karika erooroo tani kila God tale alomasaanganiaane. Tau ngai aapasunga ateva tale inangari nipaopao karika erooroo tani kila God tale sa ateva ekilakilaia. Tau nisama ateva karika erooroo tani kila God tale samasamaane. God ghe apasungaala va alomasaangania taumattu tale kosa ateva oia alokapakapanna.

<sup>21</sup> God alomasaanga ia, me ghe annala va alomasaanganiaira taumattu tale kosa ateva oia karika erooroo tani sausila tani kila God. Liuna avalua o me God ghe annala tani asaangi lo atoa la aiesoaa tale inangari ami aulia ngaotu, me taumattu tale kosa ateva la annaa va isaa o inangari alokapakapanna.

<sup>22</sup> Poli ajiu etoa karika la aiesoaa poli la kookolomi aimatootoongana ngepona liu, me lo atoa aGriki ila karika la aiesoaa poli la paepae alomasaanga ateva.

<sup>23</sup> Me karika, ta ami, ami poppooaa matemateaane ateva Karisto, ajiu etoa karika poi la aloanna tani nongoa, me ta lo atoa karika va ajiu ila, alokapakapa ia etaira.

<sup>24</sup> Me ta lo atoa God ghe kololala, lo atoa ajiu ila me lo atoa karika va ajiu ila, Karisto sarasarakaniaane ia me alomasaanganiaane ia God.

<sup>25</sup> Ta poli inangarinata aikotoo ateva, aGrik atoa la annaa va alokapakapa ia, eaapasunga va alomasaanganiaane God elaulau alomasaangania taumattu. Me aikotoo ateva, ajiu etoa la annaa va saghuighuina ia, eaapasunga va sarasarakaniaane God elaulau sarasarakaniaa taumattu.

<sup>26</sup> Kapughu etoa, am mene nnaa lao vaalue iem nau God ghe koloamla. Katoa nonga etaimim alomasaanga iem tale taatara taumattu ngatoa tale kosa ateva oia. Me katoa nonga etaimim sarasarakanam am, me katoa nonga etaimim am ghe lutula tale llo pamili tue ngararina manee.

<sup>27</sup> Poli God ghe suitoongaala voto alokapakapanna tale kosa ateva oia tani apalata lo atoa la annaa va alomasaanga ila, me ghe suitoongaala lo atoa karika sarasarakanata ilan tani apalata lo atoa la annaa va sarasarakanata ila.

<sup>28</sup> God ghe suitoongaala voto tale kosa ateva pisikeaili, me voto taumattu tale kosa ateva la ratirati, me voto taumattu tale kosa ateva karika la taatara kkai, God euungu etana tani ghaa velu isaa o voto kosa ateva eannahaa va masina me eanamunamungane.

<sup>29</sup> Liuna avalua o me karika teva erooroo tani aasake ta matane God.

<sup>30</sup> Poli mausi God am ghe kateva nonga iemla ta Iesu Karisto. Ghe maeaa sio alomasaanga etaita, me ita ghe ghulughuluunala me ita ghe mangala, me ghe ghaa ogihitala tale gheeleiaa ssavoto atoa.

<sup>31</sup> Liuna avalua o, nongina Uru ngai Manga ateva eaauliaa va, “Arova teva eannahaa tani aasakea righi voto, eaasakea voto Vau ngepona ateva ang ghe gheleila.”

## 2

<sup>1</sup> Kapughu etoa, nau aghe mae sio tani aulia ngaotu inangarinata teva God etaimim, karika aghe poppooaa righi asease kinatama inangari tani apasunga va alomasaanga ieghi.

<sup>2</sup> Poli aghe nnaala tani kkaluaa voto akapa nau aghe tokatoka teeiem, ta aghe annaa nonga Iesu Karisto, ghe matela tale aikotoo.

<sup>3</sup> Nau aghe mae sio etaimim, karika aghe sarasarakanata, me aghe reterete tale nimatautu.

<sup>4</sup> Inangarighi me uneghi nippooaa karika aghe poppooaa tale aalomasaangania taumattu tani ghaaiem, ta aghe apasunga ngaoatu sarasarakaniaane Spiriti eteva.

<sup>5</sup> Isaa avalua o me uneimim niaakaiaa erau mene toka tale aalomasaangania taumattu, ta etoka tale sarasarakaniaane ateva God.

*Alomasaanga ateva emaemae tale Spiriti eteva*

<sup>6</sup> Ami aauliaa inangari alomasaanga ta lo atoa nonga ngila ghe korokoronganala tale uneira niaakaiaa, karika va aalomasaangania taumattu tale kosa ateva oia, o tale tau ngai totoi tale kosa ateva oia, poli ghaisa ngarighi aue uunguaaira enim kapa.

<sup>7</sup> Me karika! Ta ami auliaa alomasaanganiaane God aisuliane emua arau, me ghaine ngami aaotu. God ghe nnaala emua arau va aue eghelei, me aue ita ghaa voto masinaaili etana.

<sup>8</sup> Karika toa tau ngai totoi tale kosa ateva oia aloira ghe masaangainiela, poli marova laghe kilakilaia, karika aue laghe uvi emate Vau eteva sarasarakaniaane ia tale aikotoo.

<sup>9</sup> Nongina Uru ngai Manga ateva eaauliaa va,

“Sa ateva karika righi mata ghe taraiia,  
me karika righi talinga ghe nongoa,  
me karika ghe lutu tale nannaaira taumattu,

isaa o voto, God ghe aimanomanosiaala ta lo atoa la aielousieinia.”

<sup>10</sup> Ta God ang ghe apasungaala isaa o voto etaimami tale kapuna Spiriti eteva.

Ta Spiriti eteva etaatara me ekilakila voto akapaailei, tee ninannaa me voto aisulian-naailei kanna God.

<sup>11</sup> Poli karika teva taumattu ekilakila nannaane kateva taumattu, ta kapuna nonga ateva spiriti etokatoka elome etana, ekilakila. Me tale ia o salana atikirighi me karika teva erooroo tani kila nannaane God, ta kapuna nonga ateva Spiriti God ekilakila.

<sup>12</sup> Ia o lo ateva Spirit Manga ami ghe ghiaielia, kanna ia God. Karika ami ghe kilala God tale nannaaira taumattu tale kosa ateva oia. Liuna avalua o me aloimami ghe masaangaaala masi voto God ghe nim tau mae sio.

<sup>13</sup> Nau ami auliaa isaa o inangari, karika ami auliaa tale aalomasaangania taumattu, ta Spirit Manga ateva etautau mae inangari ami poppooaa. Ami auliaa inangari oia tale llo taumattu Spirit Manga ateva etokatoka etaira.

<sup>14</sup> Me lo atoa taumattu Spiriti eteva karika ia etaira, karika la rooroo tani ghaa ia oia inangari eteva emaemae ta Spiriti eteva. Inangari eteva oia alokapakapa ia etaira. Karika la rooroo tani kilaia, ta poli Spiriti eteva karika ia elome etaira tani ghelei emasalika nannaaira.

<sup>15</sup> Llo taumattu Spirit Manga ateva etokatoka tale maamauluaaira, aue la kila tani aitalataluaa voto akapaailei sesa me masina elutululu tale maamauluaaira. Mene kasina taumattu, karika la rooroo tani kila nannaaira lo atoa Spiriti eteva etokatoka etaira.

<sup>16</sup> Ta Uru ngai Manga ateva eue va,

“Karika teva erooroo tani kila nannaane Vau ngepona ateva,  
me karika teva erooroo tani loea.”

Me ta ngetaita, ngita ghe kilala nannaane Karisto.

### 3

*Pol me Apolos kapuna  
tau ngai uungu ilalua God*

<sup>1</sup> Koronnaaili, kapughu etoa, karika aghe roo tani sama teeiem nongina aghe samasama tee lo atoa Spirit Manga ateva etokatoka elome etaira, ta aghe sama teeiemla nongina aghe samasama tee taumattu ngatoa la uusilaa aaloannaaira, poli aikaiaaimim ta Karisto nongina raaraina ateva.

<sup>2</sup> Aghe anginainamla tale rarumi ssu, me karika va tale inana korokorongan, ta karika am ghe aimanomanosiaa tani ghaa. Me isaa tee oia nau, karika am ghe roo poi tani ghaa,

<sup>3</sup> ta poli am tokatoka nongina taumattu ngatoa la uusilaa aaloannaaira. Am nannaas aasakiaa tee mene katoa etaimim, me am aissakeana elome etaimim. Isaa o voto eaapasunga va am taumattu tapaa kosa am, me am nongina taumattu ngatoa karika la kilakila God.

<sup>4</sup> Nau kateva etaimim eue va, “Aghi kapuna disaepolo ieghi Pol,” me mene kateva eue va, “Aghi kapuna disaepolo ieghi Apolos,” eaapasunga va am nim taumattu tale kosa ateva am.

<sup>5</sup> See ia Apolos, me see ia Pol? Angalua nim kapuna tau ngai uungu iengalua God.

Angalu ghe gheelei niuungu God ghe tau mae sio etaingalua, me am ghe aiesoaala. Kateva etaingalua egheelei niuungu God ghe tau mae sio etaingalua tani ghelei.

<sup>6</sup> Aghi aghe pasala katu ue ngai eteva, me Apolos ghe aitarainiela, me God ghe apinosala ia o katu ue ngai eteva.

<sup>7</sup> Liuna avalua o me lo ateva epasapasa me lo ateva eaaitara katu ue ngai eteva, karika righi arariirarua, ta God nonga ararina atae, ta ia eaapinosa ue ngai eteva.

<sup>8</sup> Lo ateva epasapasa me lo ateva eaaitara katu ue ngai eteva, kateva nonga nanairarua, me aue God etau lao aipolipoli etairarua erooaa niuungu lalu gheelei.

<sup>9</sup> Angalua angalu uungu eitauua ta God, me am nongina umana utana atingiu God, me tee am nongina ale ateva God eatuutulua.

<sup>10</sup> Tale maamasinaane God, ghe tau mae sio etaghi va aghelei uunguaane lo ateva muennaaili ia tani atuutulu. Aghe kaiaala suena tani tiuaa ale ateva, me auena mene kateva eatulu saoaa tani rungia. Me kateva kateva etani aitoka vaalua eatulu saoaa tale isaa o suena.

<sup>11</sup> Ta poli God ang ghe atoka amuemuela Iesu Karisto va ie nonga suena ia, me karika mene teva erooroo tani tingina va esuena.

<sup>12</sup> Arova teva ealoanna tani atulu saoaa sae tale suena, esaooaa sae golo me silva me masi atu, me katoa aue la saoaa sae voto erooroo tani marokase, nongina ai, valaena me uru makere.

<sup>13</sup> Me maamasinaa uunguaa kateva kateva aue la tara tale nau eteva Karisto ekaurekati. Tale ie nonga o nau eteva niaiskei nongina kura atae aue etoongi me eapasinga uunguaaira va masina o sesa.

<sup>14</sup> Me marova saa voto laghe atulu etoka saela tale isaa o suena etam ata, ia o tau ngai atulu eteva aue eghaa aipolipoli.

<sup>15</sup> Me marova see uunguaane eata akapa, karika aue eghaa aipolipoli, me ia karika aue eraua, ta aue etoka nongina taumattu ngateva ghe saangala tale kura atee.

<sup>16</sup> Karika am kilakila va am alena ale manga am God, me kapuna Spiriti eteva etokatoka elome etaimim?

<sup>17</sup> Liuna avalua o me arova lo ateva taumattu etuuturungi alena ale manga ateva God, God aue eturungia, poli alena ateva manga ia, me am alena ale manga am God.

<sup>18</sup> Marova teva elome etaimim uannaa va io alomasaanga io tale nannaa taumattu tale kosa ateva oia, urau mene kameo, poli karika alomasaanga io tale voto kanna God. Tani toka va God etaraio va alomasaanga io, aue emasina va taumattu tale kosa ateva la tara va io alokapakapa io.

<sup>19</sup> Ta alomasaangania taumattu tale kosa ateva oia nim alokapakapanna ta taataraane God, nongina Uru ngai Manga ateva eue va, "Katoa taumattu la nannaa va alomasaanga ila, me God eaareainila tale alomasaanganiaira tani taula sio euu."

<sup>20</sup> Uru ngai Manga ateva emene ue va, "Vau ngepona ateva ekilakila va nannaaira taumattu ngatoa la nannaa va alomasaanga ila, ila nim lao ila."

<sup>21</sup> Liuna avalua o me karika toa la mene saeaa nannaaira tale saa taumattu la ghaimuli tee, poli God ghe tau aatu sio voto akapaaili tani sausiem:

<sup>22</sup> ta arova Pol, Apolos me Pita, \* o kosa ateva oia, o maulue ateva me mate ateva, me voto etokatoka ghaine me voto auena emae, isaa akapaaili o voto uneimim.

<sup>23</sup> Ta am, kapuna am Karisto, me Karisto kapuna ia God.

## 4

### *Kapuna apostolo atoa Karisto*

<sup>1</sup> Liuna avalua o me am tani nnaa va, ami kapuna tau ngai uungu iemami Karisto. God ghe atokaiemamilia tani aulia ngaotu voto aisuliane kanna God.

<sup>2</sup> Kateva voto tau ngai uungu eteva etani gheeleia, va etani ghelei emasina uunguaane vauna ateva.

<sup>3</sup> Karika anannaa marova am poppoaa teeieghi tale uunguaaghi, me saa llo taumattu epoppoaa teeieghi, ta aghi tee karika aghauliaa teeieghi.

<sup>4</sup> Karika anannaa va righi voto sesa aghe gheelei, me karika eaapasinga va karika aghe gheleila righi sesa voto, ta Vau ngepona ateva egheelei niaiskei etaghi.

<sup>5</sup> Liuna avalua o me am rau mene ppooaa tee katoa, ta nau eteva aue emae Vau ngepona ateva aue emae me ia aue eghelei niaiskei. Ia aue eaotu voto taumattu ngatoa laghe

**3:8:** Mat 16:27; Ips 2:20-22.    **3:11:** Ais 28:16; 1 Pita 2:4-6.    **3:13:** 1 Ko 4:5.    **3:16:** 1 Ko 6:19; 2 Ko 6:16.    **3:19:**

Job 5:13.    **3:20:** Sams 94:11.    \* **3:22:** Pita Tale inangari nge Grik, Kepas.    **4:2:** Luk 12:42.    **4:5:** 1 Ko 3:8.

aaisulia tale urunguitaniira me karika la ghauliaa ta mene toa. Ia o nau eteva kateva kateva aue eghaa niaruaa kanna God.

<sup>6</sup> Kapughu etoa, aghe pitila llo oia tani aulieiniengalua me Apolos me tani apasunga voto etaimim. Tani annainiengalua, aue am roo tani kila amasina va am tani aimuli tee llo inangari laghe pitila tale Uru ngai Manga ateva, me am rau mene ghelei mene righi asease voto. Tale ia o salana atikirighi, am rau mene aturru kateva tau ngai aapasunga.

<sup>7</sup> See ghe atokaiemila va am namuu iem ta mene katoa? Voto akapa am ghe ghaala, God ghe tau aatu. Me marova am ghaaghaa voto ta God, vaalua me am aasaesae nannaaimim nongina va am, am gheelei isaa o voto?

<sup>8</sup> Am gheelei nongina va ngam ghe ghaala voto akapaaili, me ngam ghe ghaala niuungu ekapa Spiriti eteva enim tautau mae, me am annaa va am sarasarakana am ta Spiriti eteva nongina va ngam ghe kingila, me ami karika! Aghanna va am ghele toka nongina kingi etoa, me ami tee ami ghele nongina am.

<sup>9</sup> Poli ta getaghi aghannaa va God ghe atokaiemila apostolo atoa tani airuuruu. Ami nongina taumattu ngatoa ngila aisakeila me ngila uela va aue la mate tale tummatavanga, ta mataira ensolo atoa, me taumattu ngatoa, me tale kosa akapaaili eteva.

<sup>10</sup> Ami, ami tokatoka va alokapakapa iemami poli ami uungu ta Karisto, me am, am annaa va alomasaangaaili iem ta Karisto. Ami tokatoka va karika sarasarakana amami, me am, am annaa va sarasarakana am, me am la oneoneainam, me am annaa va taumattu ngatoa la rau mene oneoneainamami.

<sup>11</sup> Tale isaa too nau me isaa oia nau ami maamaloo, me ami kaakangngata, me ami aasae ghinna marane, me la tuutumariemami, me ami kasukasu see me karika righi aleimami tani toka.

<sup>12</sup> Ami uungu aanasa tale nimaimami. Nau la auliaa saasakiaa teeiemami, ami aarangiseila. Nau la gheelei voto sesa etaimami ami aapala isaa o voto.

<sup>13</sup> Nau la poppoa saasakiaa teeiemami, ami liuliu inangariira tale masi inangari. Me karika taumattu ngatoa la oneoneainiemami, me la taataraiemami nongina va kinangulut eteva la laa kaokao velua.

<sup>14</sup> Karika apitipiti llo oia tani apalataiem, ta aghanna tani apasunga llo voto am tani kila, nongina va masi natuguhu tuungi iem.

<sup>15</sup> Arongona ta marova oroielli kapuimim tau ngai toitoi tani aitarainam tale uunguaane Karisto, me kateva nonga ia tamaimim ateva, poli ta Karisto aghi tamaimmi ieghi, poli aghe mae sio tani auliaa masi kiukiu etaimim.

<sup>16</sup> Liuna evalua o aghaauliaa etaimim va, am usilaa gheeleiaaghi.

<sup>17</sup> Me ngasungisungi tau aatu Timoti, ia natuguhu ia ta Karisto, me aghaailousieinia me aghaatoka tuutulighi etana tani ghelei uunguaa Vau ngepona ateva, me ia aue eghelei nannaaimim tani mene annaa gheeleiaaghi tani usilaa Karisto Jesu. Ia aue eapasunga ngakapa voto aghaapasunga ngakapa see tale ale manga akapaaili etoa.

<sup>18</sup> Katoa etaimim la nannaa va karika aue amae taraiem, me la aasake.

<sup>19</sup> Me ghaisa ngarighi amae taraiem, marova Vau ngepona ateva eaaloanna. Me aue akila sa ateva lo atoa la tautau sae nannaairia la gheeleia. Me aue akila va la gheelei tale sarasarakanianee God, o la nim samasama.

<sup>20</sup> Poli God eaapasunga va eaaitoiaa taumattu tale voto la gheelei, me karika va voto la aauliaa.

<sup>21</sup> Sa ateva am aloanna va agheleia? Arova am tam ruu tani ghelei evalua o, aue amae paruem tale inangari, o arova am nna ngaioghioghiaa, aue aghapasunga va aghielousieinam tale inangari saghuighuina.

## 5

### Voto sesaaili tale ale manga ateva

<sup>1</sup> Karika aghe roola tani aiesoaa kiukiu aghe nongola tale uunguaa nialai salosalooa see ataeelome etaimim, voto sesaaili taumattu ngatoa karika la aiesoaa tee karika la gheelei. Laghe auliaala etaghi va taumattu ngateva ona tale aleimim ale manga ateva ghe aso teela kinna talae ateva, vausenna ia tamana.

<sup>2</sup> Me arongona va kateva etaimim egheelei isaa o voto, me am tautau sae nannaaimim! Vaalua me karika am ngangngala tani alousiusi me am palata? Me vaalua me karika am ghe ghaa vella ia o taumattu ngateva tale uneimim nivelu eitauua?

<sup>3-4</sup> Arongona ta karika atokatoka aitauua teeiem, me tale ninannaa atokatoka aitauua teeiem. Me ta lo ateva taumattu gheleila ia o ssavoto ateva ngaghe gheleila niaiskei etana tale ararina atae Vau palepale Iesu. Am kolo teva nivelu eitauua tale ale manga, me aue atoka aitauua teeiem ona tale ninannaa, me aue sarasarakaniaane namu ngateva Iesu etoka aitauua teeiem nau am velu eitauua.

<sup>5</sup> Me am ghaa velu ia o taumattu ngateva tale ale manga, nonginaaili va am mene tautaue lao ta Satana. Aue eghaa nimmarikana me aue enna ngaioghioghiaa, me aue eroo tani saanga nau Vau eteva esio.

<sup>6</sup> Karika masina va am aasake. Karika am kilakila kateva inangari eue va, "Ghaunaaili tuku isti erighi egheelei erranga ia akapa palaoa ngateva"? Marova ia o taumattu ngateva etokatoka elome etaimim, aue egheleiem am usi gheeleiaana.

<sup>7</sup> Am ghaa velu ia o ssavoto ateva elome etaimim nongina ajiu etoa la ghaaghhaa velu isti auena ta nau Pasova, me aue am raarangisana, poli God ghekkaluuala kaluiim ssavoto. Ta poli Karisto ghe matela etaita nongina ia o sipsipi eteva laghe uviivi ematea ta Pasova.

<sup>8</sup> Liuna evalua o me ita nnaa ia o namananama atae ta Pasova, karika ita namanama verete pokane laghe gheelei isti etana, mallooeana va karika ita aimuli usi tee gheeleiaa ngemua arau, ta ita namanama verete karika righi isti etana, mallooeana va ita aimuli tee llo God ghe auliaala etaita. Ita rau mene kamekame, ta ita auliaa llo koronna.

<sup>9</sup> Tale nau ang ghe lao sio, aghe pitipitila etaimim va am rau mene aighui tee taumattu ngatoa la gheelei uunguua nialai salosalooa see atae.

<sup>10</sup> Karika aghe aauliaa taumattu ngeleka atoa, la anna nialai salosalooa see atae, me la aloanna nonga tani toka ghaaghhaa oroi voto, me tau niainao ila, me la kakkauua voto tale kosa ateva oia. Arova am aloanna tani kasu vuli isaa o ase sesa taumattu, am tani kasu vuli kosa ateva oia.

<sup>11</sup> Mallooeanina voto aghe aauliaa isaa evalua toko va, am rau mene aighui tee toa taumattu la ue va kapuna ila Iesu me la anna tani ailai salosalooa see, me tau nissaii ila, me la kakkauua voto tale kosa ateva, me la poppoaa sesa inangari tee mene kateva, me la ropiropi sesa manu eteva, me la aainao. Am rau mene nim namanama poi tee ila o ase taumattu ngatoa.

<sup>12</sup> Karika uunguuaita tani ghelei niaiskei tale taumattu ngeleka atoa, ta uunguaimim tani ghelei niaiskei ta lo atoa elome tale ale manga la gheelei ssavoto tale isaa o salana.

<sup>13</sup> Nongina Uru ngai Manga ateva eue va, "Am ghaa velu sesa ateva taumattu elome etaimim." God egheelei niaiskei tale taumattu ngeleka atoa.

## 6

### *Uunguua tani ghelei niaiskei*

<sup>1</sup> Nau eteva kateva etaimim ange ghelei teela mene kateva taumattu ekakkaua, vaalua me elaoaoa inangarinia tale taumattu karika ekilakila God va ila la ghelei niaiskei etairarua, me karika elaoaoaa ta kapuna taumattu ngatoa God va la nongo?

<sup>2</sup> Karika am kilakila va kapuna atoa God aue la ghelei niaiskei tale taumattu tale kosa ateva oia? Poli aue am ghelei evalua o, vaalua me karika am roo tani ghelei niaiskei tale voto pisike elutulutu elome etaimim?

<sup>3</sup> Karika am kilakila va aue ita ghelei niaiskei ta ensolo atoa? Isaa evalua o me ita roo tani ghelei pisike niaiskei tale kosa ateva oia.

<sup>4</sup> Liuna evalua o, me marova righi uneimim niaissa, vaalua me am tuutuli taumattu ngeleka atoa va la nongo uneimim niaiskei nau ale manga karika eoneoneainila?

<sup>5</sup> Aghaaulia ngavalua o tani apalataiem. Va karika teva taumattu etaimim elome tale ale manga alomasaanga ia va erooroo tani ghelei luei tale isaa o niaissa?

<sup>6</sup> Vaalua me kateva tau ngaisesoa umene laoloaoa mene kateva tau ngaisesoa tale niaiskei va taumattu ngateva karika eaiesoaa elaa ruu uneimalua niaiskei eteae?

<sup>7</sup> Nau kateva etaimim elaoaoa kateva tale niaiskei, eaapasunga va karika am aimuli tee salane God. Arova tau ngaisesoa ngateva ekamekameo me eainao peim, urau mene laoainia tale niaiskei.

<sup>8</sup> Me karika, ta am tee, am gheelei voto sesa me am kamekame me am ainao peiira katoa, me isaa o voto sesa am gheelei elome etaimim.

<sup>9</sup> Karika am kilakila va lo ateva egheelei sesa voto karika aue eghaa niarangise tale ararimangalina ateva God? Am rau mene aikameainam: Lo atoa la gheelei uunguua

nialai salosalooa see atae, me la kakkauua voto tale kosa ateva oia, me lo atoa la lailai sari maneira katoa, me lo atoa taita la asoaso tee mene katoa taita,

<sup>10</sup> me lo atoa tau niainao ila, me lo atoa tau nissaii ila, me lo atoa la ropiropi sesa manu eteva me la poppooaa sesa inangari tee mene katoa, me lo atoa la ghaiuvii tani ghaa ghinna, karika teva etaira aue eghaa ararimangalina ateva God.

<sup>11</sup> Tale nau ang ghe lao sio, katoa etaimim am avalua o, me isaa oia ngam ghe raarangisanala tale uunguua ssavoto ateva, me God ghe amangaiemla, me Spiriti eteva kanna ia kapuita God ateva ghe ghelei eghulughuluenaemla tale ararina atae Vau ngepona ateva Iesu Karisto.

### *Tani ailai salosalooa see*

<sup>12</sup> Katoa etaimim am ue va, "Ami rooroo tani ghelei aloannaaimami tale asease voto atoa." Koronna, me karika va tani koronna akapa. Karika va voto akapaaili va masina etaimim. "Ami rooroo tani ghelei aloannaaimami tale asease voto atoa," me karika aghaloanna tani tau velu teva voto va emuemueinaghi.

<sup>13</sup> Me am ue va, "Inana pei tale kova ateva me kova ateva aighaa inana ia." Ia o inangari eteva koronna ia, me am tani nnaa va God aue eturungi ekapailalua. Ta vilikiita ateva karika God ghe gheleielia va ita ungueinia tale uunguua nialai salosalooa see, ta peina ia Vau ngepona ateva me ia eaitaraa ia o vilikiita ateva.

<sup>14</sup> Ta tale sarasarakaniaane ateva God aue etotuta tale nimate nongina ghe totula Vau eteva tale nimate.

<sup>15</sup> Karika am kilakila va vilikiimim peina Karisto? Erooroo va taumattu ngateva eghaa vilikina ateva peina ia Karisto me eatoka aitauua tee vilikina vause ngetapaa salana ateva? Karika poi!

<sup>16</sup> Karika am kilakila va marova lo ateva elao aitauua tee ia o ase vause ngetapaa salana ateva, ngeilalu kateva nongala tale vilikiirua? Ta Uru ngai Manga ateva eue va, "Ilalua aue lalu kateva nonga tale vilikiirua."

<sup>17</sup> Me lo ateva taumattu eaipatolaa tee Vau ngepona ateva, ekaakateva nonga ilalua tale spirit.

<sup>18</sup> Am ilou vuli uunguua nialai salosalooa see atae. Mene kasina ssavoto taumattu ngateva egheelei isaa eleka tale vilikina, me tale uunguua nialai salosalooa see atae ugheelei saasakiaa vilikim tuunga ateva.

<sup>19</sup> Karika am kilakila va vilikiimim ateva alena ale manga ia Spirit Manga ateva, am ghe ghiaielia ta God? Me karika am kilakila va karika va io uaaitarainio, ta io peina io God?

<sup>20</sup> Ghe poliemla tale aipolipoli eteva, liuna avalua o me am oneoneaa God tale vilikiimim.

## 7

### *Nikokkolomi tale nilai*

<sup>1</sup> Ghaine aghaloanna tani auliaa voto am ghe piti mae sio etaghi. Kateva ta isaa o inangari, am ghe pitila va, "Taita ateva erau mene lai, me arova elai, erau mene aso tee vausenna ateva."

<sup>2</sup> Poli oroeilei uunguua nialai salosalooa see, liuna avalua o me tani ghelei runga, emasina arova kateva taita eghaa vausenna ateva, me emasina arova kateva vause eghaa taitanna ateva.

<sup>3</sup> Taita ateva erau mene raungaa vilikina ta vausenna ateva me vause ateva erau mene raungaa vilikina ta taitanna ateva. Ilalua akapa lalu roo tani ghelei erooaa alonnaairarua.

<sup>4</sup> Vause ateva karika va ia nonga eaaitaraa vilikina, ta taitanna tee ateva. Tale ia o salana atikirighi, taita ateva tee karika ia nonga eaaitaraa vilikina, ta vausenna tee ateva.

<sup>5</sup> Kateva urau mene raungaa vilikim ta kateva. Marova amalu mae tale kateva ninannaa va amalu ainoana amua tani aso aitauua, me amalu ghelei mua uunguua nilooloo sae, me nau nilooloo sae erau mene aluse. Arovaeaata ta amalu mene mae aitauua, ta Satana erau ghelei nitootoonga etaimalua, poli karika amalu rooroo tani ghelei runga aloaloanna niaso aitauua ngateae.

<sup>6</sup> Isaa oia inangari aghauliaa karika va inangari sarasarakana tani aimuli tee, ta anim auliaa me aloannaaimim.

<sup>7</sup> Aloannaaghi va marova am akapaaili am ghele rau mene lai nongina aghi, me karika, ta kateva kateva taumattu eghaaghaa voto God ghe nim tautau lao sio; katoa la lai, me mene katoa karika.

<sup>8</sup> Ta ngetaimim lo atoa tam lai iem, me ta lo atoa vause raue vulu em, emamasina va am ghele nim toka nongina aghi.

<sup>9</sup> Me arova karika urooroo tani aitaraa aaloannaam tani aso aitauaa, uroo tani lai me urau mene toka annaa aaloannaam tani aso aitauaa.

<sup>10</sup> Me ta lo atoa lailai iem, aghaulia ngasarasarakana etaimim inangari, karika va inangarighi ta inangarina Vau ngepona ateva: Vause ateva erau mene kasu vuli taitanna ateva.

<sup>11</sup> Ta marova ekasu vulia me karika eoghi lao ta taitanna ateva, erau mene lai. Me taita ateva erau mene rati vausenna ateva.

<sup>12</sup> Me ta mene lo atoa am lailai ta lo atoa karika tau ngaisesoaa ila, aghanna tani mene ppooaa nim inangarighi, karika va inangarina Vau ngepona ateva. Marova taita ateva, vausenna ateva karika eaiesoaa, me ealoanna tani toka tee taita ateva, taita ateva erau mene ratia.

<sup>13</sup> Me marova vause ateva ekakkauaa me taitanna ateva karika, marova taita ateva ealoanna tani toka tee vause ateva, vause ateva erau mene tiu velua.

<sup>14</sup> Poli taita ateva karika eakaiaia, God ghe arangiseiela poli vausenna ateva eakaiaia. Me vause ateva karika eakaiaia, God ghe arangiseiela poli taitanna ateva eakaiaia. Marova isaa o voto karika koronna, aue naturarua atoa karika aue la raarangsana. Me karika, ta isaa oia nau, manga ila.

<sup>15</sup> Marova lo ateva karika eaiesoaa eanna tani kasu, tau veluela. Tau ngaiseso ngateva, uroo tani mene lai, karika teva egheelei rungainio. Poli God ghe kolotala tani toka tale luei.

<sup>16</sup> Am vause atoa, vaalua am rooroo tani kila va taitanim atoa la rooroo tani aikolikoliaa me la saanga, me am tee taita atoa, vaalua am rooroo tani kila va vausenim atoa la rooroo tani aikolikoliaa me la saanga?

<sup>17</sup> Emaamasina arova kateva etaimim eroo tani toka nongina vaalua Vau eteva ang ghe atokaiela, me nongina God ghe tani kolo akasinaiela. Ia oia inangari nipaopao ateva aghaulieinia tale ale manga akapaaili etoa.

<sup>18</sup> Marova lo ateva ngila ghe isoielo, erau mene tootoonga tani aikolikolieinia va arova karika laghe isoielo. Me marova lo ateva karika laghe isoia, karika emene tau velua va la isoia.

<sup>19</sup> Ni-isoiso ataeae nim peisaane ia, me nitam isoiso ataeae tee nim peisaane ia. Ta tani aimuli tee kanna inangari sarasarakana God namuu ia.

<sup>20</sup> Am rau mene tootoonga tani aikolikoliaa sa ateva am ghe tokatoka etana nau God ghe koloamla.

<sup>21</sup> Marova lo ateva tau ngai uungu io karika utokatoka tale aloannaam nau God ghe koloola, urau mene nannangaili. Ta marova tikirighi salana eoti tani mene toka tale aloaloannaam, uaimuli tee.

<sup>22</sup> Poli lo ateva euungu me karika etokatoka tale aloannaane, me Vau palepale ghe koloala, God ang ghe gheleielo nongina va taumattu ngateva etokatoka tale aloaloannaane. Me mene isaa aitauaa nongina lo ateva taumattu ghe tokatoka tale aloannaane nau God ghe koloala, ia nim tau ngai uungu ia etokatoka ta aloannaane Karisto.

<sup>23</sup> God ghe poliemla tale aipolipoli eteva. Liuna avalua o me am rau mene aimuli tee katoa la auliaa sa ateva am tani gheleia tani amasimasi God.

<sup>24</sup> Kapughu etoa, kateva kateva etaimim etani toka nongina God ghe kolo akasinaiela, poli God etokatoka teeiem me aue esausiem.

<sup>25</sup> Me tale lo atoa taumattu tam lai iem, karika aghe ghaala righi inangari sarasarakana ta Vau ngepona tani auliaa etaimim. Tale alousiusiaane, Vau eteva ghe tau mae sio alomasaanga etaghi me am rooroo tani atoka tuutuliiim etaghi, me aue aghauliaa sa ateva anannainia.

<sup>26</sup> Poli tale isaa oia nau, ange aanasaili me aghannaa va masina etaimim tani nim toka va karika lailai iem.

<sup>27</sup> Marova lailai iem, am rau mene airatii, me arova karika lailai iem, am rau mene tootoonga tani ghaa righi vauseniim.

<sup>28</sup> Me arova taita ateva ulai, karika ugheelei ssavoto, me marova vause ateva ulai, karika ugheelei ssavoto. Me ta lo atoa lailai ila aue la sau voto aanasa tale maa-maulueaaira. Karika aghanna va isaa o voto aanasa elutu etaimim.

<sup>29</sup> Kapughu etoa, malloeana inangarighi isaa avalua toko, va nau ange tuutukunaaili, me tale nau too emaemae, lo atoa vauseniira atoa nannaaira ta vauseniira atoa erau mene lau uunguaane God.

<sup>30</sup> Nimasimasi, nialousiusi me peira erau mene ghelei erungainila tani ghelei uun-guaane God.

<sup>31</sup> Tau ngaisesoa ngatoa am ghinaghina voto tale kosa ateva oia, am rau mene atoka nannaaimim tale isaa o voto. Poli kosa ateva oia am taatarai ghaine aue ekapa.

<sup>32</sup> Aghaloanna va am rau mene nnangaili vaalua tani toka. Lo ateva taita tam lai ia eanannangaili uunguaane Vau ngepona ateva, nongina vaalua erooroo tani ghelei emasimasia.

<sup>33</sup> Me lo ateva lailai ia enannangaili voto tale kosa ateva oia nongina vaalua erooroo tani ghelei emasimasi vausenna ateva,

<sup>34</sup> me nannaane eghaaghalua. Me lo ateva vause tam lai ia enannangaili uunguaane Vau ngepona ateva. Aloannaane tani taula maamaulueaane ta Vau ngepona ateva tale vilikina me tale spirit. Me tale vause ateva lailai ia, enannangaili voto tale kosa ateva nongina vaalua aue eghelei emasimasi taitanna ateva.

<sup>35</sup> Aghaauliaa isaa oia voto tani sausiem me karika va tani ghelei rungainam. Ta aghaloanna tani sausiem va am toka tale masi salana, me erau mene ghalua nannaaimim nau am uungu ta Vau ngepona ateva.

<sup>36</sup> Arova unannaa va karika angu gheelei emasina ta vause ateva la ue va ulai etana, me angu nannangaili tani lai, amalu lai, karika sesa voto amalu nanna tani ghelei.

<sup>37</sup> Me marova angu nnaala va karika amalu mene lai, karika umene usilaa katoa nannaaira, ughusilaa saa ninannaa angu nnaala, masina.

<sup>38</sup> Isaa avalua o me lo ateva elai ta vause ateva, egheelei masina voto, me lo ateva etam lai ta vause ateva, egheelei voto masinaaili.\*

<sup>39</sup> Vause ateva etani toka tee taitanna ateva lamosina ta taitanna ateva emate, me evira roo tani mene lai ta mene teva taita eanna. Me ia o taita ateva eghaaia etani tau ngaisesoa ta Vau ngepona ateva.

<sup>40</sup> Tale nannaaghi, arova vause ateva enim toka, me etam lai, aue emasimasi, me aghananaa va kapuna Spiriti eteva God elaoalo aitauua tee nannaaghi.

## 8

*Malatau laghe gheelei sae aiaavusuvusuena tale tootoo atoa*

<sup>1</sup> Me tale malatau la gheelei sae aiaavusuvusuena tale tootoo atoa: Ita kilakila va, nongina am ghe pitila va, "Ita akapaaaili ita kilakila oroi voto," me ia o nikila voto ateaerooroo tani gheleita va ita tau sae nannaaita. Me nialousi eteva egheleita tani mene sausi kateva.

<sup>2</sup> Lo ateva taumattu eannaa va ekilakila akapa voto, karika ekilakila nongina God eloanna va ekila.

<sup>3</sup> Ta lo ateva taumattu eailousiaa God, God etaatara kilaia.

<sup>4</sup> Tani nama malatau la gheelei sae aiaavusuvusuena tale tootoo atoa,\* "Ita kilakila va tootoo atoa karika va koronna ila tale kosa ateva oia," ta ita kilakila va, "Kateva nonga ia God ateva."

<sup>5</sup> Me arongona ta oroi voto epona liu me tale kosa ateva la kolokolola va goto ila me vauila,

<sup>6</sup> me etaita kateva nonga ia God ateva Tamaita ia, ia ghe gheleila voto akapaaili, me ita maamaulue tani oneoneainia. Me kateva nonga ia Vau ngepona ateva Iesu Karisto, ta getanana God ghe gheleila kosa ateva, me ia etautau mae maulue etaita.

<sup>7:31:</sup> 1 Jon 2:17. \* <sup>7:38:</sup> Katoa tau ngalomasaanga la annaa va malloeana isaa avalua toko va: <sup>36</sup> Arova unannaa va karika angu gheelei emasina ta natum aliki vause ateva nau ange roo poila tani lai, me uvira anna va elai, utau velua me elai, karika sesa voto ugheelei. <sup>37</sup> Me marova angu nnaala va natum aliki vause ateva erau mene lai, karika umene usilaa katoa nannaaira, ughusilaa saa ninannaa angu nnaala, isaa o voto angu nnaala, masina. <sup>38</sup> Isaa avalua o me lo ateva etau velu natuna aliki vause ateva va elai, egheelei masina voto, me lo ateva etam tautau velu natuna aliki vause ateva va elai, egheelei voto masinaaili. <sup>7:39:</sup> Rom 7:2-3. <sup>8:1:</sup> Apes 15:29. <sup>8:2:</sup> Gal 6:3. <sup>8:4:</sup> Gal 4:8; Diut 4:39; 6:4. <sup>\*</sup> <sup>8:4:</sup> Katoa aGrik laghe gheelei sae sua ghaata kkena aiaavusuvusuena tale tootoo atoa tale aleira ale nikkuua, me laghe vira laolaoaa malatau tale maketi va la poli. <sup>8:6:</sup> Ips 4:5, 6.

<sup>7</sup> Me karika va tau ngaisesoa ngakapa atoa la kilakila isaa o voto koronna, ta katoa laghe namuu teela niaiesoaa va tootoo atoa maulue ila. Liuna avalua o me nau la namanama malatau taumattu ngatoa laghe ghelei saela aiaavusuvusuena etana tale tootoo atoa, karika aloira ghe maamasaangala, la aateateaa va voto la gheelei karika masina.

<sup>8</sup> Karika va inana ae elaoa ngakalakalanginaita ta God, me God karika ae etaraio va masina io arova unamanama, me karika ae etaraio va sesa io arova utam namanama.

<sup>9</sup> Am paniem, am kila va voto am aloanna tani ghelei tale alomasaangaaimim erau ghelei lo atoa saghuguinha ila tale niaiesoaa va la katuu.

<sup>10</sup> Poli marova lo ateva ukilakila isaa oia voto me unamanama elome tale teva ale nikkaua alena ateva tootoo goto, me teva karika korokorongana ia tale niaiesoaa etaraio, isaa o voto ugheelei ae easarasarakanai tani nama malatau la ghelei sae aiaavusuvusuena tale tootoo atoa.

<sup>11</sup> Liuna avalua o me ia o kapum ateva karika korokorongana ia tale ninannaa, Karisto ghe matela etana, angu turungila unna niaikaaiaa tale voto ugheelei tale alomasaanganiaam.

<sup>12</sup> Io angu gheleila sesa voto ta Karisto nau angu gheleila voto sesa ta kapum ateva, tale ia o salana atikirighi, me ugheelei saasakiaa nannaane.

<sup>13</sup> Liuna avalua o me marova malatau anamanama egheelei kapughu eteva ekaakatuu, karika poi ae amene nama malatau, poli arau mene gheleia va ekatuu.

## 9

### *Pol nongina mene katoa apostolo*

<sup>1</sup> Arooroo tani ghelei voto God eaauliaa va masina tani ghelei. Am nanna va aghi karika apostolo ieghi? Me karika am kilakila va aghi tee aghe tarala Iesu Vauita ia? Poli uunguaaghi am, ang ghe kapuna iemla Vau ngepona ateva.

<sup>2</sup> Arongona ta marova katoa la annaa va aghi karika apostolo ieghi, me poli am ghe aiesoala tale uunguaaghi, eaapasunga va aghi apostolo ieghi elome ta Vau ngepona ateva.

<sup>3</sup> Nau taumattu ngatoa la aauliaa teeieghi va karika apostolo ieghi, aliuli evalua etaira tokovo:

<sup>4</sup> Emaamasina va angalua me Banabas angalu ghaa inana me ateo etaimim.

<sup>5</sup> Mene katoa apostolo, me kapuna atoa Vau ngepona ateva, me Pita,\* la kasukasu tee vaseuniira atoa, me am anginginila, me am annaa va angalua karika am mene anginiengalua?

<sup>6</sup> Ta am annaa va angalua nonga me Banabas ngalu tani uungu tani aisausiaa tokatokaingalua?

<sup>7</sup> Sa ateva soldia euungu me ia emene paepae voto eghelei tani sausi tokatokaane? Sa ateva taumattu epasapasa eutana me etam namanama inanina? Me sa ateva taumattu eaitoia kienasipsipi me etam ropiropi rarumi ssuira?

<sup>8</sup> Karika aghaauliaa voto oia tale aalomasaangania taumattu, ta inangari nipaopao tee eaauliaa.

<sup>9</sup> Poli Moses ghe pitila tale inangari nipaopao va, “Nau vulumakao ateva euungu tani ghaa velu viliki raisi, am rau mene ghelei runga paane ateva va karika emene nama isaa o raisi.” Koti am annaa va God ghe nanna vulumakao atoa me ghe auliaala isaa o voto, no? <sup>10</sup> Am annaa va ghe auliaa etaita nau ghe aulia ngavalua o? Ue! Poli ghe pitila va aloita emasaanga. Lo ateva esaisai utana ateva me lo ateva epasapasaia, lalu uungu poli lalu aiesoaa va auena lalu ghaa inana tale niuungu o lalu gheelei.

<sup>11</sup> Poli ami ghe pasala masi ue ngai elome etaimim kannia Spirit Manga, ami annaa tani mene ghaa ghinna etaimim tani sausiemami.

<sup>12</sup> Marova emasina va katoa la ghaaghhaa voto etaimim, ae emasinaaili marova ami tee ami ghaa voto etaimim.

Me karika ami ghe ghaaghhaa llo voto erooroo va am tau mae tani sausiemami, me ami ghe maamatua maate ghe maemae tale maamaulueaaimami poli ami ghe rau ghelei runga masi kiukiuna Karisto.

<sup>13</sup> Am kilakilaili va lo atoa la uungu tale ale manga, la ghaaghhaa aneira inana tale ale manga. Me lo atoa la gheelei sae aiaavusuvusuena la namanama kasina malatau la gheelei aiaavusuvusuena etana.

**8:9:** Rom 14:13-15; Gal 5:13.    **8:11:** Rom 14:15, 20.    **8:13:** Rom 14:21.    **9:1:** Apes 22:17-18; 26:16; 1 Ko 15:8-9.

**9:2:** 2 Ko 3:2-3.    **9:4:** Luk 10:8.    \* **9:5:** Pita Tale inangari nge Griek, Kepas.    **9:9:** Diut 25:4; 1 Tim 5:18.    **9:10:**

2 Tim 2:6.    **9:11:** Rom 15:27.    **9:12:** Apes 20:34; 2 Ko 11:9.    **9:13:** Diut 18:1-3.

<sup>14</sup> Tale ia o salana atikirighi Vau ngepona ateva ghe aulia ngasarasarakanala va lo atoa la poppoaa masi kiukiu, la ghaa aipolipoli tani sausi tokatokaaira ta lo atoa la nongonongo isaa o masi kiukiu.

<sup>15</sup> Me karika aghe kolomi poila righi voto erooroo va am tau mae tani sausieghi, me karika apitipiti isaa oia inangari poli aghanna va am tau mae righi voto etaghi. Karika aue aghannaa arova amate tee nimaloo me tani velu gheeleiaaghi va apoppoaa masi kiukiu me karika teva etautau mae aipolipoli.

<sup>16</sup> Nau eteva apoppoaa masi kiukiu, karika arooroo tani asaesae nannaaghi, poli niuungu eteva tani ppooaa, God ghe taue mae sio etaghi tani gheleia. Aue esesaaili etaghi marova atam gheleia!

<sup>17</sup> Marova anim ppooaa tale aloannaaghi, aue aghaa aipolipoli, me marova karika va tale aloannaaghi, aghi nim gheelei niuungu eteva God ghe taue mae sio etaghi,

<sup>18</sup> me saa aipolipoli aue aghaa? Uneghi aipolipoli eteva, ia evalua toko va: amasimasi tani ppooaa masi kiukiu me karika amene nnaa tani ghaa viliki veu, me karika amene kolomi voto erooroo va aghaa tale uunguaghi eteva tani ppooaa masi kiukiu.

<sup>19</sup> Arongo ta anim tokatoka tale aloannaaghi, me karika teva eaitoieinaghi, ngaghe nim nonginala tau ngai nongonongo anna ateva tani ghaa oroileili taumattu va la mae ta Karisto.

<sup>20</sup> Nau auungu tee ajiu etoa, atokatoka nongina ila, tani ghaaila. Arongona ta aghi atam usilaa inangari nipaopao kanna Moses, atokatoka nongina lo ateva euusilaa inangari nipaopao, tani ghaaila.

<sup>21</sup> Tale ia o salana atikirighi, nau auungu tee taumattu ngeleka atoa, karika la posoposo inangari nipaopao kanna Moses, atokatoka nongina taumattu ngateva karika eposoposo inangari nipaopao. Agheelei evalua o tani ghaa oroi taumattu ngeleka atoa. Karika malloeane va atam nongonongo usilaa salane God, karika, ta anonganongo usilaa salane Karisto.

<sup>22</sup> Nau atokatoka tee lo atoa karika korokorongana uneira niaikaiaa, asease voto la nannaa va karika masina ta tau ngaisesoa ngatoa, karika agheelei isaa o voto, poli arau turungi uneira niaikaiaa. Atokatoka nongina tokatokaaira taumattu ngatoa tani pae ase salana kona vaalua aroo tani asaangi righi taumattu.

<sup>23</sup> Agheelei isaa o voto maus i masi kiukiu, me ila me aghi aue ami ghaa niarangise kanna God etautaula ta lo atoa la aikaiaiaa tale masi kiukiu.

<sup>24</sup> Am kilakila va lo atoa la aaikarati, kateva nonga ia lo ateva aue eghaa aipolipoli. Am ilou esarasarakana tani ghaa aipolipoli.

<sup>25</sup> Lo atoa la aikarati tale niaikarati eteae, la aaimonomonosiaa tale niaikarati eteae tani ghelei vilikiira esarasarakana tani ilou. La gheelei isaa o llo tani ghaa aipolipoli karika aue toka liu, me ita, ita uuungu tani ghaa lo ateva aipolipoli tokatoka liu ia.

<sup>26</sup> Liuna evalua o me karika va anim ilou rorrou, me karika va aghaaitumari nongina taumattu ngateva ekekkelii tau ngai ssateena ateva me enim tuutumari kuukuu.

<sup>27</sup> Karika! Ta agheelei vilikighi tani ghelei va eaimuli tee aloannaaghi, ta God erau ue va atam rororo tani ghaa aipolipoli, arongona ta aghe poppoaa masi kiukiu ta katoa.

## 10

### Nipaopao tani rau mene kkauaa tootoo goto

<sup>1</sup> Me tee, kapughu etoa, karika aghanna va am kkaluaa va tuvuita akapa atoa laghe aimuli tee kookoo ngateva me laghe kasu longotila eRet Sii.

<sup>2</sup> Tale kookoo ngateva me tale paa manu eteva, ila akapaaili laghe ghaala niaasu me laghe kapuna disaepolola Moses.

<sup>3</sup> Ila akapa laghe namanama kateva nonga ia inana God ghe taue lao sio,

<sup>4</sup> me laghe ropiropi kateva nonga ia manu eteva God ghe taue lao sio. Me laghe ropiropi tale atu eteva God ghe taue lao sio, ghe kasukasu teeila. Ia o atu eteva Karisto etana.

<sup>5</sup> Me oroi lo atoa God karika ghe masimasieinilala, liuna evalua o me laghe matela tale voto ateva karika righi taumattu etokatoka etana, me vilikiira ghe rooa ngakapa seela ia o voto ateva.

<sup>6</sup> Isaa o voto ghe lutula va eaimatootoongana tani ghelei rungainita tani rau mene tau velu urungutaniita va elao tale ssavoto nongina ila laghe gheelei.

<sup>7</sup> Am rau mene toka kakkauua tootoo atoa nongina katoa etaira. Uru ngai Manga ateva eue va, "Taumattu ngatoa laghe tokatoka sio tani namanama me tani ropi, me laghe tiitingina sae tani loku me laghe gheelei ssavoto."

<sup>8</sup> Ita rau mene gheelei nialai salosalooaa see ateae nongina katoa etaira, me tale kateva nau, ghaluengaulu kotolu airari (23,000) etaira laghe matela.

<sup>9</sup> Ita rau mene tootoonga Karisto nongina katoa etaira laghe gheelei, me katu ngatoa laghe katakata amatela.

<sup>10</sup> Me am rau mene aululia nongina katoa etaira laghe gheelei, me ensolo ateva tau ngai tturuu ia ghe uvi ematelala.

<sup>11</sup> Isaa o voto ghe lutula etaira va uneita aimatootoongana, me laghe piti elokoi siola tani auliaa kieita lo atoa ita tokatoka tale airuuruu tale kosa ateva.

<sup>12</sup> Liuna avalua o me marova am annaa va am tiitingina akorokorongana, am aikinikinitaa tokatokaaimim ta am rau katuu.

<sup>13</sup> Karika righi nitootoonga am ghaaghaa va isaa ppae, ta nim isaa aitauua tale mene kasina nitootoonga elutulutu ta taumattu ngakapa atoa. Me God egheelei voto eue va aue egelei, karika erooroo tani tau veluem va am ghaa namungaili nitootoonga karika am rooroo tani apala. Ta nau am sou nitootoonga, aue eapasunga salana esausiem tani tingina akorokorongana.

*Ninamanama tale tootoo me unna ateva ninamanama Vau ngepona ateva*

<sup>14</sup> Liuna avalua o, masi kapughu etoa, am kasu vuli uunguua nikkauua tale tootoo goto atoa.

<sup>15</sup> Asamasama tee taumattu alomasaanga va am tani nna ngamasina va llo aghaauliaa koronna o kamena.

<sup>16</sup> Nau ita ropiropi tale kapa ateva nau niLosapa, ita kaakaili emasina etana, ita aighui tale raena ateva Karisto. Me nau ita namanama verete isaa o ita aipiria, ita aighui tale vilikina Karisto.

<sup>17</sup> Poli ita orioiili ita me kateva nonga ia verete ateva, kateva nonga ia viliki ita, poli ita akapaaili ita namanama tale ie nonga o verete ateva.

<sup>18</sup> Am annaa taumattu tale Israeli etoa: Lo atoa laghe namanama aiaavusuvusuena laghe kaakateva nonga tale ia o nikkaua ngateae.

<sup>19</sup> Malloeane inangarighi isaa avalua toko va aiaavusuvusuena taumattu ngatoa la gheelei lao tale tootoo atoa nim malatau ila, me tootoo goto atoa nim tootoo ila.

<sup>20</sup> Ta uneira aiaavusuvusuena lo atoa la tam aiesoaa, la gheelei lao ta raroai etoa, me karika va ta God, me karika aghalona va am aighui tee raroai etoa.

<sup>21</sup> Karika am rooroo tani ropi tale unna kapa ateva Vau ngepona ateva me unna tee ateva Satana. Karika am rooroo tani namanama tale tevoo alua, unna ateva Vau ngepona ateva me unna ateva Satana.

<sup>22</sup> Vaalua? Ita tootoonga tani gheelei Vau ngepona ateva va esessaia? Ita nannaa va ita sarasarakania ita etana?

<sup>23</sup> Katoa etaimim am ue va, "Ami rooroo tani gheelei aloannaaimami," me aghaauliaa etaimim va karika va isaa akapaaili voto aue erooroo tani sausiem. Am ue va, "Ami rooroo tani gheelei aloannaaimami," me karika va isaa akapaaili voto egheelei ekorokoronganaita.

<sup>24</sup> Karika teva emene nnainia nonga, ta ennaa maamasinaaira mene katoa.

<sup>25</sup> Am nim nama malatau am polipoli tale maketi, me am rau mene kolomi righi nikokkolomi eghelei nannaaimim eghaaghluua va malatau o eaa ekasula.

<sup>26</sup> Poli, "Kosa ateva kanna ia Vau palepale me voto akapaaili etokatoka etana."

<sup>27</sup> Marova toa taumattu la tam aiesoaa la koloam tani laa namanama, me am anna tani usilaa, am nama sa ateva ngila atokaiela emua etaimim. Am rau mene nnaa va am kolomi righi nikokkolomi eghelei nannaaimim eghaaghluua va malatau o eaa ekasula.

<sup>28</sup> Me marova teva eue etaimim va, "Isaa oia malatau laghe gheleila aiaavusuvusuena etana tale tootoo," am rau mene nama isaa o malatau, mausi ia o taumattu ngateva eaauliaa, me poli enannaa va karika masina tani nama.

<sup>29</sup> Karika aue va am nnaa va karika masina tani nama, ta ia o taumattu ngateva enannaa va karika masina tani nama. Poli vaalua me vara aghelei aloaloannaaghi, me am gheelei rungainaghi me am muemueaa aloaloannaaghi?

<sup>30</sup> Marova ausi tani namanama tale ia o ninamanama atae, me akaili emasina sae ta God, vaalua me mene kateva taumattu eaauliaa teeieghi inangari sesa tale isaa o voto ngakaili emasinala ta God va anama?

<sup>31</sup> Liuna avalua o me nau am namanama, o am ropi, o sa ateva am gheleia, am ghelei tani tau sae ararina atae God.

<sup>32</sup> Am rau mene ghelei taumattu va la katuu: ajiu etoa, aGrik atoa o taumattu ngatoa tale alena ale manga ateva God.

<sup>33</sup> Nongina aghi atootoonga tani ghelei voto emasina tale mataira taumattu ngakapaaili tale isaa akapa salana, poli karika anannainieghi nonga, ta aghanna tani sausi oroi taumattu va la roo tani saanga.

## 11

<sup>1</sup> Am usilaa gheeleiaaghi nongina auusilaa gheeleiaa Karisto.

*Salana nikkauaa ta taita atoa me vause atoa*

<sup>2</sup> Amasimasieinam ta am annainaghi tale voto akapa, me am posoposo parasi voto aghe apasungaala etaimim.

<sup>3</sup> Me aghanna va am tara kila va Karisto uruira ia taita akapaaili etoa, me taita ateva uruna ia vausenna ateva, me God uruna ia Karisto.

<sup>4</sup> Isaa akapaaili taita elooloo sae me eaauliaa inangarina God, me la akou uruira, karika la oneoneaa uruira.

<sup>5</sup> Me vause atoa la looloo sae me la auliaa inangarina God, me karika la aakou uruira, karika la oneoneaa uruira; nonginaaili va la ghaggali uruira.

<sup>6</sup> Marova vause ateva etam akou uruna ateva, emaamasina arova ghele ggali uruna ateva, me poli epaapalata tani sunapi etukuna o tani ggali velu uu nguruna, eakou uruna ateva.

<sup>7</sup> Me taita ateva erau mene akou uruna ateva, poli ia eaapasunga taataraane me maamasinaane God. Me vause ateva eaapasunga maamasina taitanna ateva.

<sup>8</sup> Poli karika va God ghe gheleila taita ateva tale vause ateva, ta God ghe gheleila vause ateva tale taita ateva,

<sup>9</sup> me karika God ghe gheleila taita ateva mausi vause ateva, ta God ghe gheleila vause ateva mausi taita ateva.

<sup>10</sup> Liuna avalua o me mausi ensolo atoa\* me vause ateva eaakou uruna ateva tani apasunga va ia matutulienia ia.

<sup>11</sup> Ta Vau ngepona ateva, vause ateva karika ie nonga etokatoka, me taita tee ateva karika ie nonga etokatoka.

<sup>12</sup> Poli nongina vause ateva, God ghe gheleielia ta taita ateva, taita ateva ghe lutula ta vause ateva, me voto akapa ghe mae sio ta God.

<sup>13</sup> Am annaa va masina ta vause ateva elooloo sae ta God, me karika eaakou uruna ateva?

<sup>14</sup> Tale gheeleiaaita, ita kilakila va marova taita ateva aluse uu nguruna aue epalata,

<sup>15</sup> me vause ateva uu nguruna aluse, aimolumoluna ia tani ghelei emasimasia, poli uu nguruna aluse God ghe tau lao sio etana tani akou uruna ateva.

<sup>16</sup> Marova teva eanna tani aissakeana teeieghi tale isaa oia inangari, eroo tani kila va ami, ami tam aimuli tee mene kasina asease salana tani kkauua, tee me mene kasina alena ale manga God.

*Unna ninamanama atae Vau ngepona ateva*

<sup>17</sup> Tale isaa o inangari karika aghanna tani asaesae gheeleiaaimim, poli nau am velovelu eitauua, am gheelei oroieili voto sesa me karika am gheelei voto masina.

<sup>18</sup> Aitiutiu eteva voto, aghe nongola va nau am maemae aitauua tani kkauua, karika am kaakateva nonga, me aghaiessoa va isaa oia inangari anonganongo mala koronna.

<sup>19</sup> Koti ghele masina arova am ghelei aipolaii, me aue ita tara va see etani uusilaa gheeleiaane God.

<sup>20</sup> Nau am maemae aitauua tani namanama tale Losapa ateva, karika va ia o ninamanama atae am gheeleia va unna ia Vau ngepona ateva,

<sup>21</sup> poli nau am namanama, karika am roo tani toi mene katoa, ta kateva kateva etaimim emuemue tani ghaa anna inana. Liuna avalua o me katoa la maamaloo me lo atoa la tutuvetu tani namanama me ropi, nannaairaa eaaisavisavila.

<sup>22</sup> Vaalua? Karika righi aleimim va am toka etana me am namanama me am ropi? Vaalua me karika am oneoneea kapuna taumattu God, me am mae aapalata lo atoa karika righi peiira? Sa ateva aue aghaulieinia etaimim? Am annaa va agharueinam tale isaa oia votu? Karika poi!

<sup>23</sup> Poli saa llo voto aghe ghaala ta Vau ngepona ateva ngaghe apasungaala ta ngetaimim. Isaa avalua toko va: Vau eteva Iesu, tale ia o voo ngateva laghe tauela ta tau ngai ssateena atoa, ghe ghaala verete,

<sup>24</sup> me ghe kaili emasina saela ta God, me ghe pirila, me ghe uela va, "Isaa oia verete malataughu ngatautau aatu mausiumim. Am ghelei isaa o voto tani nnainaghi." <sup>25</sup> Tale ie nonga o salana atikirighi, vara laghe ruula tani namanama me ghe ghaala kapa ateva, me ghe uela va, "Ia oia kapa ateva eaaimatoonga raeghi eteva, egheelei lo ateva inangari niaippoa ngaitauua ouna ia. Nau ekapa atoa nau am ropia, am ghelei isaa o voto tani nnainaghi."

<sup>26</sup> Tale nau ekapaaili, nau am nama ia oia verete ateva me am ropi ia oia kapa ateva, am aaulia ngaotu matemetaane Vau eteva lomosina ta esio.

<sup>27</sup> Liuna avalua o me see unama verete me uropi tale unna kapa ateva Vau ngepona ateva tale salana atikirighi etam oneoneea Karisto, ugheelei voto sesa tale vilikina me raena ateva Vau ngepona ateva.

<sup>28</sup> Taumattu ngateva etani tara mua maamauluaane, me auena enama verete me eropi tale kapa ateva.

<sup>29</sup> Poli lo ateva enamanama me eropi tale kapa ateva, me karika eoneoneaa vilikina Vau ngepona ateva, enim tutturungi maamauluaane.

<sup>30</sup> Isaa avalua o me oroi lo atoa elome etaimim karika la sarasarakana me la iisiki, me katoa ngila ghe asekanuela.

<sup>31</sup> Marova ita tara akasina mua maamauluaaita, God karika aue eturungita.

<sup>32</sup> Nau Vau ngepona ateva egheelei niaiskei etaita, eparuparuta nongina aliki etoa. Liuna avalua o me karika aue ita ghaa sesa aipolipoli eitauua tee taumattu tale kosa ateva oia.

<sup>33</sup> Liuna avalua o, kapughu etoa, me nau am mae aitauua tani namanama, am toi mene katoa.

<sup>34</sup> Me see emaamaloo enamanama tanganuena, erau alutu righi niaiskei etaimim nau am veluelu eitauua poli karika eoneoneaa vilikina ateva Karisto. Me tale mene kasina voto, aue aghaulia ngamasina etaimim nau amae.

## 12

*Asease niuungu Spiriti eteva enim tautau mae*

<sup>1</sup> Kapughu etoa, tale kannaa asease niuungu Spiriti eteva enim tautau mae, karika aghalona va aloimim etam masaanga.

<sup>2</sup> Am kilakila va nau am ghe tokatoka va taumattu ngeleka am, am ghe tau vella maamauluaaimim tani usilaa oroi salana tani kkauua tootoo atoa karika la samasama.

<sup>3</sup> Isaa avalua o me aghauliaa etaimim va karika teva eaaioppoaas tale aisausiaa kapuna Spiriti eteva God erooroo tani ue va, "Nikasikienaa esae ta Iesu," me karika teva eroo tani ue va, "Iesu Vau ngepona ia," arova Spirit Manga ateva karika emuemueinia.

<sup>4</sup> Oroi asease niuungu Spirit Manga ateva etautau mae etaita, me kateva nonga ia Spiriti eteva.

<sup>5</sup> Me oroi asease niaisausi, me kateva nonga ia Vau ngepona ateva.

<sup>6</sup> Me oroi asease salana tani ghelei niuungu, me kateva nonga ia God ateva etautau sarasarakana tani ghelei isaa o niuungu.

<sup>7</sup> God eaapasunga kapuna Spiriti eteva ta kateva kateva tani sausi tau ngaisesoa ngakapa atoa tale ale manga ateva.

<sup>8</sup> Ta kateva taumattu, Spiriti eteva etautau roorooaala tani aulia ngamasalika alo-masaangania God. Ta mene kateva, ia nonga o Spiriti eteva emene tautau inangari pasu tale alomasaanga.

<sup>9</sup> Ia o Spiriti eteva etautau niaiesoaa ta kateva, me ta mene kateva, etautau sarasarakana tani ghaa velu isiki.

<sup>10</sup> Ta mene kateva, etautau sarasarakana tani ghelei mirikolo atoa, ta mene kateva uunguaa tani auliaa inangaria God, ta mene kateva etautau alomasaanga tani kila va voto kannaa kapuna Spiriti eteva God o karika, me ta mene kateva etautau alomasaanga tani aippooaa tale mene kasina ase niaippooaa kanna Spiriti eteva, me ta mene kateva

etautau lao alomasaanga tani aulia ngamasalika malloeane isaa o ase niaippooaa kanna Spiriti eteva.

<sup>11</sup> Kateva nonga ia Spiriti eteva, ia egheelei ekapaaili isaa o niuungu, me tale aloannaane etaautaula ta kateva kateva taumattu.

*Kateva nonga ia vaulanina ateva Karisto me oroi voto etana*

<sup>12</sup> Vaulaniita ateva kateva nonga ia, me oroi voto etana. Arongona ta oroi voto etana, me isaa akapaaili o voto, egheelei va kateva nonga ia vaulaniita ateva. Vaulanina ateva Karisto ia avalue ia o: oroi taumattu la tokatoka etana.

<sup>13</sup> Poli ita akapaaili ita ghe ghaala niaasuu ta kateva nonga ia Spiriti eteva, me ghe gheleitala va kateva nonga ita. Arongona ta katoa ajiu ila me katoa karika ajiu ila, me tau ngai uungu etoa karika la tokatoka tale aloannaaira, me lo atoa la tokatoka tale aaloannaaira, ita akapaaili God ghe tau mae sio kateva nonga ia Spiriti eteva etaita.

<sup>14</sup> Vaulaniita ateva karika God ghe gheleielu va kateva nonga ia, ta oroi voto eaipatolaa lao etana.

<sup>15</sup> Marova kekem eue va, "Karika va aghi tee tale ia o vaulani eteva, poli karika va nima ieghi," nau eaaulia ngavalua o, karika egheelei rungainia va karika va ie tee tale ia o vaulani eteva.

<sup>16</sup> Me marova talinga atelange eue va, "Karika va aghi tee tale ia o vaulani eteva, poli karika va mata ieghi," nau eaaulia ngavalua o, karika egheelei rungainia va karika va ie tee tale ia o vaulani eteva.

<sup>17</sup> Marova ia akapa vaulaniita ateva mata ia, karika aue eroo tani nonganongo, me marova ia akapa vaulaniita ateva talinga ia, karika aue eroo tani ngusungusu.

<sup>18</sup> Me karika, ta koronnaaili va God ghe atoka aitauaala isaa akapaaili voto tale vaulaniita ateva tale salana ghe annaala va masina.

<sup>19</sup> Me marova vaulaniita ateva nim nima ia nonga, karika aue ghele teva vaulaniita.

<sup>20</sup> Me isaa o voto oroi eaipatolaa etana, me ekaakateva nonga ia vaulaniita ateva.

<sup>21</sup> Mata ateva karika eroroo tani ue ta nima atelange va, "Karika righi uunguaaghi etam," me uruita ateva karika eroo tani ue ta kekeita atelange va, "Karika righi uunguaaghi etam."

<sup>22</sup> Kasina voto tale vaulaniita ateva saghuighuina. Me karika ita rooroo tani maulue arova isaa o voto karika.

<sup>23</sup> Me llo voto tale vaulaniita ateva ita annaa va karika masina taatarane, ita aitaru ngamasinaaili, me lo ateva voto tale vaulaniita ateva ita paapalatainia, ita kaarasi tani aisuliainia,

<sup>24</sup> me mene kasina voto tale vaulaniita ateva, karika ita mene nnangaili tani aisulia. Ta God ghe atoka aitauaala vaulaniita ateva, me ghe taula namuu nioneoneaa ta llo voto karika eroo tani ghaa nioneoneaa.

<sup>25</sup> Isaa evalua o me ita rau mene ghelei righi niaipola tale vaulaniita ateva, ta isaa akapaaili aseasee voto tale vaulaniita ateva la aitaraa mene kateva.

<sup>26</sup> Marova kateva voto tale vaulaniita ateva emamarikana, isaa akapaaili voto tale vaulaniita ateva aue emmarikana aitauaa teeia. Me marova kateva voto tale vaulaniita ateva eghaa nioneoneaa, isaa akapaaili voto tale vaulaniita ateva aue emasimasi.

<sup>27</sup> Am akapaaili vaulanina am Karisto, kateva kateva etaimim eaipatolaa tale vaulanina ateva Karisto.

<sup>28</sup> Elome tale ale manga, God ghe atokala taumattu ngatoa tani ghelei niuungu. Ghe atoka akasinala apostolo atoa, aiaaghluu atoa propete atoa, me aiaakotonna atoa tau ngai aapasunga ngatoa, vara me lo atoa la gheelei mirikol, me lo atoa la sarasarakanu tani ghaa velu isiki, me tani sausi mene katoa, o tani muemueainila, me tani aippooaa tale mene kasina ase niaippooaa kanna Spiriti eteva.

<sup>29</sup> Am annaa va ila akapaaili apostolo ila me propete ila me tau ngai aapasunga ila? Me am annaa tee va ila akapaaili la roo tani ghelei mirikol?

<sup>30</sup> Vaalua, ila akapaaili la rooroo tani ghaa velu isiki? Me ila akapaaili la roo tani aippooaa tale mene kasina ase niaippooaa kanna Spiriti eteva? Me ila akapaaili la roo tani aulia ngamasalika malloeane isaa o ase niaippooaa kanna Spiriti eteva?

<sup>31</sup> Aghaloannaaili va am tani alona lo ateva niuungu Spirit Manga etaautau emae tani aisausiaa tau ngaisesoa ngakapa atoa. Me aghaapasunga etaimim masi salana elaulau mene kasina salana.

## 13

### *Niaielousi eteva*

<sup>1</sup> Marova Spirit eteva etautau mae sarasarakan me aghaioppoaa tale samasamaaira taumattu ngatoa me ensolo atoa, me karika aghaielousi, aghi nongina veloo ateva o karoiroi etoa la nim aangari.

<sup>2</sup> Marova muenna ieghi tani auliaa inangarina God, me aroo tani kila isaa akapaaile voto me voto aisuliaane kanna God, me marova kalughu niaiesoaa erooroo tani ghaa velu motouru etoa, me karika aghaielousi, aghi nim lao ieghi.

<sup>3</sup> Marova atau ekapa lao peighi ta lo atoa karika tue peipeina ila, me vilikighi eghaa maate me aghele tau sae nannaaghi,\* me karika aghaielousi, karika aue aghaa righi voto.

<sup>4</sup> Taumattu ngateva eaaielousi etam sessai parasia, me taumattu ngateva eaaielousi egheelei masi voto, me karika etaatara ssaii, me karika eaaisakeana, me karika etautau sae nannaane.

<sup>5</sup> Karika eaamakatakata, me karika enannainia nonga, karika eaaiuvii, me ekakkaluua voto ang ghe lao sio.

<sup>6</sup> Taumattu ngateva eaaielousi karika emasimasia ssavoto, ta emaamasiaa voto ghu-lughuluenia.

<sup>7</sup> Taumattu ngateva eaaielousi karika esio asoasoaa, me karika eruuruu tani aiesoaa, ta eaatoka tuutulina ta God, me etokatoka akorokorongana tale sesa nau.

<sup>8</sup> Niaielousi eteva karika ekaakattuu. Uunguua tani auliaa inangarina God aue ekapa, me uunguua tani aippooaa tale mene kasina ase niaippooaa kanna Spiriti eteva aue ekapa, me uunguua alomasaanga ateva tee aue ekapa.

<sup>9</sup> Malloeane isaa avalua toko va aalomasaanganiaita karika ekilakila akapa voto, me muumuenaaaita tani auliaa inangarina God tukuna.

<sup>10</sup> Me nau ghulughuluena emae, voto tukuna aue ekapa.

<sup>11</sup> Nau aliki ieghi, aghe aippooaa nongina aliki eteva, me nannaaghi nongina aliki eteva, me aalomasaanganiaaghi nongina aliki eteva. Nau aghe namuula, aghe tau lange siola gheeleiaira aliki etoa emuli etaghi.

<sup>12</sup> Ghaine karika ita kilakila amasina voto kanna God, nongina karika ita taatara amasina voto tale ghalasi eteva karika masalike taataraane, me auena ita kila amasina, nongina va ita taatara matane God. Ghaine akilakila kasina nonga voto kanna God, me auena akila akapaaile, nongina God ghe kilaieghila.

<sup>13</sup> Me ghaine kotolu voto etokatoka: Niaiesoaa, nitaatara lao emua, me niaielousi. Me lo ateva namuu ia etairotolu, niaielousi eteva.

## 14

### *Tani auliaa inangarina God me asease niaippooaa ngatoa kanna Spiriti eteva*

<sup>1</sup> Am usilaa salana tani aielousi, me am aloannaaili niuungu kanna Spirit Manga enim tautau mae. Me mata ngemua ateva tale isaa o niuungu, niauliaa inangarina God.

<sup>2</sup> Ta lo ateva epoppoaa tale mene kasina ase niaippooaa kanna Spiriti eteva, poli karika teva taumattu alona emaamasaanga llo eauliaa, karika esamasamaa tee taumattu, ta ie nonga me God, ta Spirit Manga ateva eaasaoki etana tani auliaa voto aisuliaane.

<sup>3</sup> Ta lo ateva epoppoaa inangarina God eaasarasarakana taumattu, me eaippooaa ngaisausia tani auliaa inangari nimasimasi etaira.

<sup>4</sup> Me lo atoa la aippooaa tale mene kasina ppae ase niaippooaa kanna Spiriti eteva, la saasausila nonga, me ta lo atoa la poppoaa inangarina God, la saasausi ekapa taumattu ngatoa tale ale manga.

<sup>5</sup> Aghalonaaili va arova am akapaaile am ghele aippooaa tale kasina ppae ase niaippooaa kanna Spiriti eteva. Me atani annaaili va am ppooaa inangarina God. Marova karika teva tani aulia ngamasalika sa ateva la aulieinia, lo atoa la nim poppoaa tale mene kasina ase niaippooaa kanna Spiriti eteva karika la saasausi ale manga ateva. Liuna avalua o me lo atoa la poppoaa inangarina God, ila epona ta lo atoa la poppoaa tale mene kasina ase niaippooaa kanna Spiriti eteva.

<sup>6</sup> Kapughu etoa, marova amae taraiem me appoaa tale mene kasina ase niaippooaa kanna Spiriti eteva, me karika aghaaulia ngamasalika saa malloeainina, vaalua aue asausiem? Ta atani auliaa etaimim sa ateva God ghe apasungainiela etaghi, me atau aatu righi alomasaanga me appoaa inangarina God tani loeam.

---

\* 13:2: Mat 17:20. \* 13:3: vilikighi eghaa maate me aghele tau sae nannaaghi Kasina uru ngai laghe pitila, laghe uela va arova atau velu vilikighi eata tani ghelei aiaavusuvusuena. 13:6: Rom 12:9. 13:7: 1 Pita 4:8. 13:13: 1 Tes 1:3. 14:1: 1 Ko 12:31; 14:39.

<sup>7</sup> Nim nongina voto ateva karika righi maulue etana me egheelei niaangari, nongina flut ateva me aikaukau eteva, marova uneirarua niaangari karika masalike, karika aue ukila va saa kkinari eteae la kaukaua.

<sup>8</sup> Me marova taueteva karika masalike aangariaane, see aue aimonomonosiaa tale niaiuvii eteae?

<sup>9</sup> Am tee am avalua o. Marova am aippooaa tale mene kasina ase niaippooaa taumattu ngatoa karika la kilakila, vaalua taumattu aloira aue masaanga sa ateva am aulieinia? Ta inangari aue nim peisaane.

<sup>10</sup> Oroieli ase nisama tale kosa ateva oia karika isaa aitauua. Isaa o ase nisama, isaa akapaaili tue malloeanina.

<sup>11</sup> Marova teva taumattu ghele sama teeieghi me karika akila malloeane inangari eaauliaa, aghi ativuu ieghi tale ia o taumattu ngateva eaippooaa, me ie tee ativuu ia etaghi.

<sup>12</sup> Liuna avalua o, poli am aloannaaili niuungu Spirit Manga ateva enim tautau mae, am tani kolomi tani ghaa llo niuungu eroroo tani asarasarakana ale manga ateva.

<sup>13</sup> Liuna avalua o me lo ateva eaippooaa tale mene kasina ase niaippooaa kanna Spiriti eteva etani looloo sae tani ghaa alomasaanga tani aulia ngamasalika isaa o inangari.

<sup>14</sup> Marova aoololo sae tale kateva ase niaippooaa kanna ia Spiriti eteva, kapughu spiriti eteva eloooloo sae, me nannaaghi karika ekilakila sa ateva aghaaulieinia.

<sup>15</sup> Sa ateva aue agheleia? Ave aoololo sae tale kapughu spiriti eteva, me aue aoololo sae tee ta nannaaghi, me aue akkinari tee kapughu spiriti eteva, me aue akkinari tee ta nannaaghi.

<sup>16</sup> Marova utau sae God tale kapum spiriti eteva, lo atoa aloira karika emaamasaanga, karika la roo tani ue va, "Koronna," tale unem nilooloo sae tani kaili emasina, poli karika la kilakila sa ateva uaaulieinia.

<sup>17</sup> Ave uroo tani kaili emasina sae ta God tale masi salana, me ta mene kateva taumattu karika ange ghaala niaissausi.

<sup>18</sup> Akaakaili emasina ta God ta alaulau ekapaailiem tani aippooaa tale asease niaippooaa kanna Spiriti eteva.

<sup>19</sup> Me tale ale manga, aghaaloanna tani auliaa ghalima tuku mata nginangari aloghu emaamasaanga tani apasunga ta katoa, me vulla tani auliaa orioeili airari mata nginangari etoa tale mene kasina ppae ase niaippooaa kanna Spiriti eteva.

<sup>20</sup> Kapughu etoa, nannaimim erau mene nongina aliki etoa. Tale uunguaa ssavoto, am tani nongina raaraina arighi aliki karika eannahaa ssavoto. Me isaa o voto aghe auliaala etaimim, va nannaimim etani nongina namu ngatoa taumattu.

<sup>21</sup> Laghe pitila tale Uru ngai Manga ateva va,

"Tale lo atoa la poppoaa tale asease nisama,

me ta ativuu etoa,

ave appooaa ta kapughu etoa,

me karika poi aue la nongoaghi,"

ghe uela Vau ngepona ateva.

<sup>22</sup> Ase niaippooaa kanna Spiriti eteva, aimatootoongana ia ta lo atoa karika la aiesoaa, me karika ta lo atoa la aimuli tee Vau ngepona ateva. Me tani auliaa inangarinia God, aimatootoongana ia ta lo atoa la aiesoaa, me karika ta lo atoa karika la aiesoaa.\*

<sup>23</sup> Liuna avalua o me marova taumattu ngakapaaili etoa la velu eitauua tale ale manga me la aippooaa tale ase niaippooaa kanna Spiriti eteva, me marova toa tau ngaisesoaa karika laghe ghaala niasuu o taumattu karika la aiesoaa la kupi sso, aue la nongo me aloira karika aue masaanga, aue la ue va ngam veeveela.

<sup>24</sup> Me marova teva tau ngaisesoaa karika ghe ghaala niasuu o teva taumattu karika eaisesoaa ekupi sso, me enongo va am akapaaili am poppoaa inangarinia God, aue etara kila va ia tau ssavoto ia, me voto am aauliaa egheelei niaiskei tale maamauluane,

<sup>25</sup> me aue etara kila voto aisuliaane elome tale urungutanina. Liuna avalua o me aue etiterru swo euu me ekkauua God, me aue eue va, "Koronnaaili God etokatoka aitauua teeiem!"

### *Salana tale masi nikkauaa*

<sup>26</sup> Sa ateva ita mene aulieinia, kapughu etoa? Nau am mae aitauua, kateva kateva etaimim eaimonomonosiaa voto aue esausi ekapaailiem, kateva emaeaa unna kkinari

<sup>14:20:</sup> Ips 4:14.    <sup>14:21:</sup> Ais 28:11-12.    \* <sup>14:22:</sup> Pol ghe annaa nau ta Aisaea, samasamaaира Asiria ngatoa, alsraeli etoa karika laghe kilakila, me ghe aimatoonga niaiskei kanna God. Liuna avalua o me ghe aauliaa va ase niaippooaa kanna Spiriti eteva aimatoonga niaiskei ta lo atoa karika la aiesoaa. Tani nongo inangarinia God eaimatoonga va tau ngaisesoaa ngatoa karika la tokatoka tale niaiskei kanna God.    <sup>14:23:</sup> Apes 2:13.    <sup>14:24:</sup> Jon 16:8.    <sup>14:26:</sup> 1 Ko 12:8-10.

eteae, me kateva eaimonomonosiaa tani apasunga, me kateva eaulia ngaotu inangari aisuliaane kanna God, me kateva eaippooaa tale mene kasina ppae ase niaippooaa kanna Spiriti eteva, me ia, o mene kateva ekiri malloeana isaa o ase niaippooaa. Isaa akapaaili o voto am tani ghelei tani akorokorongana ale manga ateva.

<sup>27</sup> Marova toa la anna tani aippooaa tale mene kasina ase niaippooaa kanna Spiriti eteva, enim ghalua o kotolu nonga. Me kateva mua eaippooaa me auena mene kateva, vara me mene kateva ekiri malloeana tani ghelei emasalika isaa o ase niaippooaa.

<sup>28</sup> Marova karika teva tani kiri malloeana isaa o ase niaippooaa, lo ateva eaippooaa tale ase niaippooaa kanna Spiriti eteva enim matua atoka me eaippooaa nonga ta getana me ta God.

<sup>29</sup> Ghalua o kotolu propete la auliaa inangarina God, me katoa la tani nongo amasina tani nnaa va inangari emaema ta God o karika.

<sup>30</sup> Me marova inangari eteva kanna ia God ngemae sio ta teva propete etokatoka, aiutiutu eteva propete eaippooaa eruu tani sama.

<sup>31</sup> Poli am akapaaili am roo tani auliaa inangarina God, kateva mua, vara me mene kateva. Tale ia o salana atikirighi, am akapaaili aue am ghaa alomasaanga me sarasarakana tale aikaiaaimim.

<sup>32</sup> Poli propete atoa la roo tani ruu tani aippooaa me la tau velu mene katoa tani propete la sama.

<sup>33</sup> Poli God karika va ia aisavisavilana ia ta Goto ia tale luei.

Nongina katoa ale manga,

<sup>34</sup> vause atoa la rau mene toka samasama tale ale manga. Karika am mene tau vella va la toka aisamaaii, ta la matua atoka, nongina inangari nipaopao eaulia.

<sup>35</sup> Marova la anna tani kila voto, la rooroo tani kolomi taitanira atoa tanganueira, poli karika masina ta vause ateva tani toka samasama tale ale manga.

<sup>36</sup> Vaalua, inangarina ateva God ghe tiuala etaimim? Me ang ghe tokala nonga etaimim?

<sup>37</sup> Marova teva eannaa va ia propete ia, me Spiriti eteva etokatoka etana, aue ekila va sa ateva apitipiti emae etaimim, Vau palepale ghe sungieghila tani gheleia.

<sup>38</sup> Marova teva etam aloanna isaa o voto, tau veluela me enim toka.

<sup>39</sup> Isaa avalua o, kapughu etoa, me am tani alonaaili tani auliaa inangarina God, me am rau mene ghelei runga kateva tani aippooaa tale mene kasina ase niaippooa kanna Spiriti eteva.

<sup>40</sup> Ta voto akapaaili am tani ghelei emasina me tale salana ghulughuluena.

## 15

### Tottotuaane Karisto

<sup>1</sup> Kapughu etoa, aghanna tani mene auliaa etaimim masi kiukiu aghe ppooala etaimim. Ngam ghe aiesoala me ngam ghe atokala tuutulimim etana.

<sup>2</sup> Poli ngam ghe aiesoala isaa o masi kiukiu, ngam ghe saangala, marova am poso parasi inangari aghe ppooala etaimim. Arova karika, aue aikaiaaimim aue enim peisaane.

<sup>3</sup> Sa ateva aghe ghiaielia, aghe tau aatu sio etaimim va mata ngemue ia, va Karisto ghe metela tale kaluita ssavoto, nongina Uru ngai Manga ateva eaauliaa;

<sup>4</sup> va laghe kaieiniela me ghe mene totula tale aiaakotonna ateva nau, nongina Uru ngai Manga ateva eaauliaa.

<sup>5</sup> Ghe aotuotula ta Pita,\* vara me apostolo kasangaulu ghalua (12) laghe taraiela.

<sup>6</sup> Emulina ghe aotuotula ta lo atoa oroiaira elaulau ghalima ai (500), oroi lo atoa etaira ila tokatoka maulue ila, me katoa ngila ghe asekuelua.

<sup>7</sup> Ghe aotuotula ta Jeimis, vara me ta ila akapa apostolo atoa.

<sup>8</sup> Airuuruu etaira akapa ghe aotuotula etaghî, nongina va lo ateva ghe tam ghaa nauna tani lutu.

<sup>9</sup> Aghi airuuruueili ieghi ta apostolo atoa, karika masina tani koloaghi va apostolo ieghi, poli aghe gheelei saasakiaa alena ale manga ateva God.

<sup>10</sup> Me tale maamasinaane ateva God, ngaghe aghi evalua oia. Maamasinaane ateva etaghî karika ghe nim peisaanelia, poli auungu aanasaili ta ila akapa disaepolo atoa, me karika va aghi, ta maamasinaane ateva God etokatoka aitauua teeieghi.

**14:29:** 1 Tes 5:21.

**14:34:** 1 Ko 11:3; 1 Tim 2:12.

**14:37:** 1 Jon 4:6.

**15:3:** Ais 53:5-12.

**15:4:** Mat 12:40;

Apos 2:24-32.

**15:5:** Luk 24:34; Mat 28:16-17.

\*

**15:5:** Pita Tale inangari nge Griek, Kepas.

**15:7:** Apos 1:3-4.

**15:8:** Apos 9:3-6.

**15:9:** Ips 3:8; 1 Tim 1:15.

**15:10:** 2 Ko 11:23.

<sup>11</sup> Liuna avalua o me, marova aghi o mene katoa apostolo laghe ppooala etaimim, ami ekapaaili ami ghe poppoaa isaa o masi kiukiu, me am ghe aikaiaala etana.

*Aue ita totu tale nimate*

<sup>12</sup> Me marova ami poppooaa va Karisto ghe totula tale nimate, vaalua me katoa etaimim la ue va taumattu matena karika aue la totu?

<sup>13</sup> Marova taumattu ngatoa matena ila la tam totu, Karisto ghe tam totula.

<sup>14</sup> Marova Karisto ghe tam totula, unemami nippooaa nim peisaane, tee me uneimim niaikaiaia.

<sup>15</sup> Marova koronna va matena atoa la tam totu, God karika ghe totula Karisto. Me ami apostolo atoa ngami aikamea tee God, poli ami ue va God ghe totula Karisto tale nimate.

<sup>16</sup> Poli marova matena atoa la tam totu, Karisto karika ghe totula.

<sup>17</sup> Me marova Karisto ghe tam totula, uneimim niaikaiaia nim peisaane, me tee kaluimim ssavoto karika ghe kapa.

<sup>18</sup> Me lo atoa la ghe aikaiaia ta Karisto me laghe matela, ang ghe rau laalaa liulala.

<sup>19</sup> Marova ita aatoka tuutuliita ta Karisto tale ie nonga oia maulue ateva, aalousiusiaaita namungaili ta mene katoa taumattu.

<sup>20</sup> Me koronna va Karisto ghe totula tale nimate, mata ngemue ia tale lo atoa laghe matela.

<sup>21</sup> Poli kateva taumattu ghe gheleila me nimate ateva ghe mae sio, nitotu eteae tale nimate tee ghe mae sio tale kateva taumattu.

<sup>22</sup> Poli mausi Adam ita akapaaili aue ita mate, me mausi Karisto aue ita maulue.

<sup>23</sup> Tale nauira taumattu ngatoa tani totu, ila akapaaili aue la totu me la maulue. Karisto ghe aitituliuta, me nau emene mae, lo atoa kapuna ila aue la mene totu.

<sup>24</sup> Vara me eturungi ekapaaili tau ngai totoi etoa me lo atoa matuutuliena ila me sarasarakanan atoa, me airuuruu aue emae, me aue etau lao ararimangalina ateva ta Tamane ta God.

<sup>25</sup> Poli God ghe nnaala va Karisto aue eaitoiaa voto akapa nongina kingi eteva, lomasina ta nau God etau sio ila akapaaili tau ngai ssateena atoa euu.

<sup>26</sup> Me airuuruu eteva tau ngai ssateeta aue eturungia, nimate ateva.

<sup>27</sup> Poli Uru ngai Manga ateva eue va, God "ghe tau lao sia sarasarakanan tale Natuna ateva Taumattu ngateva tani aitaraa voto akapaaili." Nau eue va "isaa akapaaili voto," karika va God tee epona liu, ia o ghe taula voto akapaaili ta Karisto tani aitoiaa.

<sup>28</sup> Nau isaa akapaaili o voto ange tokala tale sarasarakanan Natuna God, ia aue emene toka euu tale sarasarakanan Tamane, poli ia ghe taula isaa akapaaili voto etana tani aitoiaa. Me God aue eaitara ngakapaaili isaa akapa voto.

<sup>29</sup> Marova karika teva nitotu tale nimate, taumattu ngatoa laghe ghaala niasuu poli la taatara lao emua ta nau eteva matena atoa aue la totu, sa ateva aue la gheleia? Vaalua me la ghe ghaala niasuu marova matena atoa karika aue la totu?

<sup>30</sup> Me ta ngetaimami, vaalua me ami aatokaiemami tale nivakovako nau ekapaaili?

<sup>31</sup> Kapughu etoa, asousou nimate nau ekapaaili! Am rooroo tani kila va isaa o inangari koronna, nongina koronna va atautau sae nannaaghi tale sa ateva Vauita ateva Iesu Karisto ghe gheleiela etaimim.

<sup>32</sup> Marova aghe aiuvii teela sesa taumattu ngatoa ila nongina ueli ghaata kkena atoa elpires me karika aghe taatara lao tale nitotu tale nimate, sa ateva aue aghaaia? Marova taumattu etam totu,

"Ita roo tani namanama me ita ropi,

poli nimanaa aue ita mate."

<sup>33</sup> Am rau mene aikameainam: "Am rau mene aipatolaa tee sesa taumattu ngatoa, poli aue la ghelei saasakiaa masi gheleiaaimim."

<sup>34</sup> Am mene mae tale masi ninannaa, me am ruu tani ghelei ssavoto. Aghaaulia ngavalua o poli katoa etaimim karika am kilakila God. Aghaaulia ngavalua o tani apalataiem.

*Nau ita totu vilikiita aue isaa ppae*

<sup>35</sup> Me katoa aue la kolomi va, "Vaalua aue taumattu ngatoa matena ila la totu? Me vilikiira aue vaalua?"

<sup>36</sup> Am rau mene alokapakapa. Sa ateva am pasapasaia karika erooroo tani maulue, ta etani mate me auena epinosa.

<sup>37</sup> Me nau upasapasaia, karika upasapasa namu ngateae ai, ta upasapasa katu ue ngai nongina katu kone me mene kasina voto.

<sup>38</sup> Me God etautaula vilikina ange annala va etauela etana, me kateva kateva tana katu ue ngai epiipinosa tale katuma ateva.

<sup>39</sup> Isaa akapaaili viliki karika va isaa aitauua. Taumattu ngatoa uneira kateva ase viliki, me kko atoa uneira kateva, me ghaata kkena atoa uneira kateva, me ghila atoa uneira ateva ppae.

<sup>40</sup> Viliki ngelomarase kasina, me kasina, viliki tale kosa ateva oia. Viliki ngelomarase ateva, masi aimolumoluna isaa ppae tale masi aimolumoluna viliki tale kosa ateva.

<sup>41</sup> Sinaka ateva unna kateva ase aimolumolu, me ulana ateva unna kateva, me katto atoa uneira ppae tani aimolumolu, me elome tale kateva kateva katto, aimolumoluira isaa ppae tale mene kasina katto.

<sup>42</sup> Aue nim nongina avalua o nongina matena atoa nau la totu. Viliki eteva laghe kiaeiniela tale kosa nongina la pasapasa katu ue ngai eteva, aue emauu, me nau etotu tale nimate, karika aue emene mate.

<sup>43</sup> Ia o vilikiita ateva karika masina ia, me karika sarasarakania ia, aue emasina me sarasarakania nau etotu.

<sup>44</sup> Ia o vilikiita ateva laghe kiaeiniela, viliki tale kosa ateva oia, me nau ita totu aue ita totu eitauua tee viliki ngepona liu eteva. Vilikiita ateva masina ia ita tokatoka teeia ghaine tale kosa ateva oia aue ekapa, me lo ateva vilikiita aue ita totu teeia, aue emasina tani toka epona liu.

<sup>45</sup> Laghe pitila tale Uru ngai Manga va, "Aitiutiu eteva taumattu ta Adam God ghe gheleiela me ghe mauluela," me Karisto, la kolokoloa va airuruu eteva Adam, ia spiriti ia etautau maulue.

<sup>46</sup> Lo ateva ghe mae akasina sio, viliki tale kosa ateva ia, vara me mina viliki ngepona liu eteva, Karisto etana, maulue ia.

<sup>47</sup> Ta aitiutiu eteva taumattu ghe mae sio tale au tale kosa ateva oia, me aiaaghalua ateva taumattu, Karisto etana, taumattu ngepona liu ia.

<sup>48</sup> Taumattu tale kosa ateva oia, vilikiita ateva nongina taumattu ngateva God ghe gheleiela tale au tale kosa ateva oia, me taumattu ngepona liu etoa, vilikiira nongina taumattu ngepona liu eteva.

<sup>49</sup> Nongina ghaine ita nongina taumattu tale kosa ateva, liuna avalua o me auena aue ita nongina taumattu ngepona liu eteva.

<sup>50</sup> Kapughu etoa, aghaauliaa etaimim va malatauita ateva me raeita ateva karika lalu rorooroo tani kupi sso epona liu. Karika ita rorooroo tani toka epona liu tee vilikiita ateva erooro tani mate, poli karika righi nimate epona liu.

<sup>51</sup> Am nongo, aghaauliaa etaimim voto aisuliaane: Karika va ita akapa aue ita asekanua, ta ita akapaaili aue ita aikolikoliaa nau Karisto emae.

<sup>52</sup> Aue elutu arovaeangaili nonga, nonginaaili va mata ateva eapeepere, nau airuruu eteva tauue eaangari. Poli tauue ateva aue eaangari me matena atoa aue la totu, karika aue la mene mate, me aue ita aikolikoliaa.

<sup>53</sup> Poli vilikiita ateva matena ia me mauuna ia, aue aikolikoliaa me ita ghaa lo ateva viliki karika aue eroo tani mate me emauu.

<sup>54</sup> Nau isaa o voto elutu, me inangari laghe pitila tale Uru ngai Manga ateva aue ekoronna va, "God ghe apalala me ghe turungila nimate ateva."

<sup>55</sup> "Nimate ateva, eaa aloi sarasarakaniaam,

me eaa aloi mammarikana utautau lao ta taumattu ngatoo?"

<sup>56</sup> Mammarikanaane nimate ateva ssavoto ia, me sarasarakaniaa ssavoto ateva inangari nipaopao.

<sup>57</sup> Liuna avalua o me ita kaili emasinaaili ta God ta ghe tau mae sio etaita niapala tale uunguaa nimate me ssavoto, ta kapuita namu ngateva ta Iesu Karisto.

<sup>58</sup> Liuna avalua o, kapughu etoa, am tingina akorokorongana. Am rau mene tau velu righi voto va eakatungiem. Am tau lao maamauluaaimim tale uunguaane Vau ngepona ateva, poli am kilakila va isaa o niuungu am gheelei ta Vau ngepona ateva karika nim peisaane.

## 16

*Tani ghaa viliki veu uneira kapuna atoa God ejerusalem*

<sup>1</sup> Me tale viliki veu am ghaaghhaa aitauaa uneira kapuna taumattu ngatoa God eJerusalem, am aimuli tee sa ateva aghe aulieinie lao sio tale ale manga atoa tale provinsi eteva eGalaisia va la gheleia.

<sup>2</sup> Tale aitiutiu eteva nau, tale uiki ekapaaili, kateva kateva etaimim ealokoi ppae righi viliki veu tale sa ateva eghaaghhaaia, me ealokoi eitauaa. Me nau amae, karika aue am mene toka paepae viliki veu.

<sup>3</sup> Me nau arekata, am suoiongaa righi taumattu la sau kaluimim viliki veu me la saea eJerusalem. Me ae asungi taula lao tee me uru ngai etikirighi tani apasunga va am, am ghe sungilala.

<sup>4</sup> Marova emaamasina va aghi tee alao eJerusalem, aue la kasu eitauaa teeieghi.

*Nannaane Pol tani kasu*

<sup>5</sup> Aue alao mua tale provinsi eteva eMesedonia, me auena amae taraiem, poli aghanhaa tani lao mua eMesedonia.

<sup>6</sup> Nau akasu eMesedonia me amae taraiem, koti aue atoka teeiem mua lomosi ta eghaa nau kuukuu eteva\* ekapa, ta aue eaa aghanhaa tani lao aue am roo tani sausieghi tale viliki veu me ghinna.

<sup>7</sup> Arova amae taraiem me auena alao eMesedonia, aue nau tani toka teeiem etukunaaili, me karika aghanhaa tani toka teeiem tale tukuna nau. Aghanhaa tani mae toka teeiem tale oroi nau, marova Vau ngepona ateva ealoanna.

<sup>8</sup> Me aue atoka oia elpisos lomosina ta nau Pentikos eruu,

<sup>9</sup> poli salana tani uunguua masi niuungu ang ghe otila etaghi, arongona ta oroeili taumattu ngatoa la tootoonga tani ghelei rungainieghi.

<sup>10</sup> Me marova Timoti emae, am aitarainia me erau mene matauta righi voto nau etokatoka teeiem, poli egheelei uunguuae Vau ngepona ateva, nongina aghi.

<sup>11</sup> Liuna avalua o me karika toa la mene ratia. Am sausia va ekasu tale luei me emene mae taraieghi. Atoitoia va emae tee mene katoa tau ngaisesoaa.

<sup>12</sup> Me kapuita ta Apolos, aghe aippooaa teeia tani asarasarkananaia va emae taraiem me mene katoa kapuita la mae aitauaa teeia. Me ghe tam aloannala tani mae tale isaa oia nau. Aue emae tale nau eannaa va masi nau tani mae.

<sup>13</sup> Am paniem me am tingina akorokorongana tale niaiesoaa. Am rau mene matautu me am korokorongana.

<sup>14</sup> Am ghelei voto akapaaili tale niaeelousi.

<sup>15</sup> Am kilakila va Stepanas me kapuna atoa tanganuena, ila akasina laghe aitiutiula tani aiesoaa tale provinsi eteva eAkaia me laghe taula maamauluaaira tani sausieghi kapuna taumattu ngatoa God. Aghaaulia ngakorokorongana etaimim, kapughu etoia,

<sup>16</sup> tani nongo usilaa isaa o ase taumattu nongina ila me am ghelei evalua o ta mene katoa la uuung aanasa teeila.

<sup>17</sup> Aghe masimasila nau Stepanas me Potunatus me Akaiakus laghe kasula ona eKorint me laghe rekatala oia elpisos, poli karika iem me ila laghe ghaala liuimim tani sausieghi.

<sup>18</sup> Poli laghe akorokoronganala maamauluaaghi nongina laghe gheleila etaimim. Ia o ase taumattu ngateva am rooroo tani oneoneainia.

<sup>19</sup> Ale manga atoa elome tale provinsi eteva eEisia, laghe suula masimasiaairaa etaimim. Akuila me vausenna ta Prisila tee me taumattu ngatoa tale ale manga atoa la veluvelu eitauaa tanganueirarua, laghe suula masimasiaairaa tale ararina ateae Vau ngepona ateva.

<sup>20</sup> Ila akapaaili kapuita atoa oia, laghe suula masimasiaairaa etaimim. Am sou kateva kateva etaimim tale niaeelousi.<sup>†</sup>

<sup>21</sup> Airuuruu tale uru ngai etikirighi oia, aghi Pol, tale nimaghi tuunga atelange aghe pitila isaa oia masimasiaaghi.

<sup>22</sup> Marova teva etam ailousiaa Vau ngepona ateva, nikasikienaa aue etoka etana. Mae sio o, Vau ngepona ateva!<sup>‡</sup>

<sup>23</sup> Alooloo sae va maamasinaane Vau ngepona ateva ta Iesu aue etoka aitauaa teeiem.

<sup>24</sup> Asusuu aatu aielousiaaghi ta lo atoa etaimim am elome ta Iesu Karisto. Koronna.

---

**16:1:** Rom 15:25-26; 2 Ko 8:1-9.    **16:5:** Apis 19:21.    **16:6:** Rom 15:24.    \* **16:6:** nau kuukuu eteva Nau kuukuu eteva eghaaghhaa kotolu ulana, taumattu ngatoa karika laghe aikasuaa tale paamanu eteva, poli ttasi kuukuu eteva ghe naanamuu.    **16:9:** Apis 19:8-10; 2 Ko 2:12.    **16:10:** 1 Ko 4:17.    **16:11:** 1 Tim 4:12.    **16:12:** 1 Ko 3:6.    **16:15:** 1 Ko 1:16.    **16:19:** Apis 18:2, 18, 26.    † **16:20:** Tale inangari nge Griek, *tale niaingusu eteva manga ia*.    **16:22:** Gal 1:8-9; Aotu 22:20.    ‡ **16:22:** Pol ghe pitila tale inangari nge Aramaik, *Marana tha*, malloeana va “Mae sio o, Vau ngepona ateva.”

## Aiaaghaluene atikirighi uru ngai Pol ghe pitela ta aKorint atoa Inangari emuemua

Pol ghe pitila 1 Korint, me avirina ghe kasu tani laa tara ale manga ateva eKorint. Karika masau, katoa tau ngai aapasunga laghe mae sio eKorint, me laghe uela va ila apostolo tuungi ila, me Pol karika. Tau ngaisesoa ngatoa eKorint laghe aipolaii etokala tale isaa o voto. Pol ghe piti emuemuela mene katikirighi uru ngai, me avirina ghe suula Taetas tani lao eKorint tani tara va ale manga ateva ang ghe aikolikoliaala o karika. Emulina, ghe pitila uru ngai etikirighi ia oia, ta 2 Korint, vara me ghe lao sio eKorint, me ghe saela eJerusalem. Ia o airuuruu eteva nau na Pol tani asa eKorint.

Ta 2 Korint, Pol ghe aulia ngakorokorongana va ia matuutuliena ia poli ia apostolo tuungi ia. Ghe pitila inangari niloeloe tale viliki veu laghe ghaagħha aitaua tani sausi tau ngaisesoa ngatoa la tuutukuna tale voto eJerusalem, me ghe auliaala vaalua ghe aielousiaa tau ngaisesoa ngatoa eKorint.

### **Tani kila amuemua**

Aitutiutu tale inangari *1:1-11*

Pol me nannaane tani lao eKorint *1:12-2:13*

Uunguaane Pol va apostolo tuungi ia *2:14-7:16*

Viliki veu laghe ghaagħha tani sausi aJerusalem atoa *8:1-9:15*

Pol me apostolo atoa la ue va ilaaili ila apostolo ila *10:1-13:10*

Airuuruu tale inangari *13:11-13*

<sup>1</sup> Aghi, Pol, kapuna apostolo iegħi Iesu Karisto, me tale aloannaane God, me kapuita ta Timoti,

Angalu pitipiti mae ona tale alena ale manga ateva God eKorint me tale ila akapa taumattu ngatoa la aikaaia ta God la tokatoka akapa see tale provinsi eteva eAkaia.

<sup>2</sup> Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

### *Pol ghe kaili emasinala ta God*

<sup>3</sup> Ita tau sae God, kapuna Goto ia me Tamane ia Vauita ateva ta Iesu Karisto. God ia Tamaita ia, pasueili ta tale nialousiusi me etautau mae sarasarakana tale sesa nau etoa.

<sup>4</sup> Ia etautau mae sarasarakana etaimami tale nau ekapa atoa nau ami tokatoka tale maate, liuna avalua o me ami rororo tani mene sausi katoa la tokatoka tale sesa nau tee. Ami aisausieinila tale isaa o sarasarakana God ghe tau mae sio etaimami.

<sup>5</sup> Poli mausii nimmarikana Karisto ghe għala, ami tee ami għaagħha, me tale ia o salana atikirighi, Karisto etautau attu sarasarakana etaimami.

<sup>6</sup> Poli nau etoa ami aateetaa maate tale maamauluuaimami, isaa o voto aue etaу aatru sarasarakana etaimim lomosina ta eghħaq ħażżeen. Me nau ami għa sarasarakana, isaa o sarasarakana aue esausi teeiem me aue etaу aatru nitingga akorokorongana tale voto maate nongina ami, ami ghe ateateaala.

<sup>7</sup> Ami kilakila va am għaagħha nimmarikana nongina ami me aue am għaa tee niaisaus nongina ami, liuna avalua o me nannaaimami etaimim sarasarakanaa.

<sup>8</sup> Me tani kila amasina isaa o voto, tuegħi me nengħi etoa, ami aaloanna va am kila maate me mmarikana ami għe għala tale provinsi eteva eEisia. Namungaili me maatea illi voto lagħe saoħala tale maamauluuaimami me karika ami għe roola tani sau, me ami għe annnagħi teela va aue ami għe mate.

<sup>9</sup> Me tee, ami għe ateateaala va lagħe uela va aue ami mate. Poli va llo għe lutula, ami għe tara kilala va ami rou mene atoka tuutulii mami etaimami, ta ami atoka sae nonga ta God, ia etottotu taumattu matena.

<sup>10</sup> Ta elome tale salana nimate, ia nonga għe asaangiemmila me aue emene asaangiemmami nau ekapa atoa. Isaa avalua o me ami aatoka tuutulii mami etana va ia aue emene asaangiemmami,

<sup>11</sup> nongina am saasausiemmami tale kaluimim nilooloo sae. Oroi ila lo atoa aue la kaili emasina poli niarangise aue ami għaas tale aili liu tale kaluira nilooloo sae.

<sup>12</sup> Tale nannaaimami ami kilakila va voto akapa ami għe għeelei tale kosa ateva oia, ami għe għeelei voto koronnailli me masalikeall għe maemae ta God. Isaa o voto ami

ghe gheleila etaimim tee, me ami saasaeaa nannaaimami. Ami ghe gheelei isaa o voto tale maamasinaane God me karika va tale aalomasaanganiaane kosa ateva.

<sup>13</sup> Poli karika ami pitipiti voto aisulianna am tam rooroo tani riti me kila mallooeana. Me aghaaiesoaa va aue am kila amasina

<sup>14</sup> saa llo voto karika am ghe kila amasinala, me tale nau eteva Vau ngepona ateva Iesu aue emae etana, aue am saeaa nannaaimim nongina ami, mausiumim me ami saasaeaa nannaaimami.

### *Pol ghe aikolikoliaala nannaane tani lao eKorint*

<sup>15</sup> Poli aghe kilakilaaili isaa o voto, liuna avalua o me aghe nnaala tani mae taraiem mua me aue am roo tani ghia niarangise ghaluaata.

<sup>16</sup> Aghe nnaala tani mae taraiem me auena alao tale provinsi eteva eMesedonia me nau akiriaa, aue am sausieghi me alao tale provinsi eteva ejidua, me karika aghe mae sio.

<sup>17</sup> Liuna avalua o me, nau aghe nannaa llo oia me karika aghe gheleila, am annaa va karika aghe nanna ngamasinala? Karika! Nau agheelei nannaaghi, karika agheelei nongina taumattu tale kosa ateva, va eue ta paane va, "Ue, ue," me nannaane va, "Karika, karika," ta agheelei tale aloonnaane God.

<sup>18</sup> Me nongina God egheelei voto eue va aue egheelei, inangari ami poppoaa etaimim, karika ami ue va "Koti".

<sup>19</sup> Ta Iesu Karisto Natuna ia God, aghi, Saelas me Timoti angotolu ghe ppooainiela me karika va ami aakotikotia, me ta ngetana isaa akapaaili voto eaauliaa eue va "Ue" nonga.

<sup>20</sup> Ta ngetana isaa akapa inangari nialokoi egheelei "Ue" nonga, me ta ngetana ita ue va, "Aloannaam aue elutu," tani tau sae God mausi voto ita gheelei.

<sup>21</sup> Am tani nnaa va God nonga ghe gheleitala tani tingina akorokorongana ta Karisto. Me ia God ghe suitoongainitala

<sup>22</sup> me ghe aimatoongainitala va kapuna ita God, me ghe atokala kapuna Spiriti eteva tale urunguitaniita tani apasunga va auena emene ghelei rooroaa voto ange tiuala.

<sup>23</sup> God erooroo tani ue va inangarighi aghauliaa koronna: karika aghe oghi lao sio eKorint ta poli karika aghe aloannala va aghauliaa inangari sarasarakananaili va ghe maate tale maamauluaaimim.

<sup>24</sup> Karika ami aaloanna va ami, ami sulungiem tale uneimim niaikaiaa. Ta sarasarakanan iem tale niaiesoaa me nim tau ngai uungu iemami tani uungu eitauaa teeiem tale masimasiaaimim.

## 2

<sup>1</sup> Poli aghe nnaala va arau mene oghi mae ta ita rau alousiusi.

<sup>2</sup> Ta marova aghi agheleiem va am alousiusi, see aue egheleieghi amasimasi? Ta am nonga o taumattu ngatoka aghe ghelei alousiusiemla, am gheelei emasimasieghi.

<sup>3</sup> Liuna avalua o me aghe pitila uru ngai etikirighi etaimim. Karika aghanna va amae etaimim va am gheleieghi va aghalousiusi, ta am nonga am gheelei emasimasieghi. Aghe atokala tuutulighi etaimim akapaaili va nau eteva amasimasi, am tee am masimasi.

<sup>4</sup> Arongona ta aghe pitipitila etaimim tee kinatama nialousiusi me ninannaa maate, me oroi rarum mata, karika aghe pitipitila tani gheleiem va am alousiusi, ta aghe anna va am kila vaalua aghailousia ngakapaailiem.

### *Am apasunga niaielousi ta lo ateva ghe ghelei saasakiaala*

<sup>5</sup> Arova teva ghe gheleieghila va aghe alousiusila, karika va ghe ghelei nongala etaghi ta ghe ghelei ekapala etaimim. (Karika aghanna va aghauliaa oroi inangari sarasarakananaili etana.)

<sup>6</sup> Ang ghe roola maate oroi iem lo atoa am ghe taula ta ia o taumattu ngateva.

<sup>7</sup> Isaa oia nau, am kkaluaa voto ghe gheleila me am ppooa ngaisausia tale masi nitoka tani tingina akorokorongana poli erau alousiusieili me erau oghi vulu masi niaikaiaa.

<sup>8</sup> Liuna avalua o me aghaakorokoronganaiem va am mene apasunga etana va am ailousiangaililia.

<sup>9</sup> Koronna, aghe pitila uru ngai etikirighi poli aghe anna tani kila va am aimuli tee inangarighi ekapa, o karika.

<sup>10</sup> Me nau am kkaluaa voto kateva egheelei, aghi tee akkaluaa voto egheelei etaimim. Me nau aghe kkaluaala, marova righi voto tani kkaluaa, agheelei lao ta matane Karisto mausiumim.

<sup>11</sup> Agheelei llo poli aghanna va am akekkeliem ta Satana, poli ita kilakila voto eanna tani ghelei etaimami.

*Pol ghe anna tani tara Taetas*

<sup>12</sup> Nau aghe rekatala tale masaliki taatara ataeae eTroas tani ppooaa masi kiukiuna Karisto, arongona ta aghe tarala va Vau ngepona ateva ghe otila salana tani uungu tee kapuna atoa okae,

<sup>13</sup> me aghe alousiusieiliila poli karika aghe tarala kapughu ta Taetas. Liuna avalua o me aghe akorovailala me aghe lao sio eMesedonia.

*Tau ngai uungu etoa tale ouna ateva inangari niapirooa ngaitauaa*

<sup>14</sup> Me akaakaili emasina ta God, poli nau ekapa atoa God emuemueiniemami nongina va kapuna karavusu iemami tani apasunga va Karisto ghe apalala tau ngai ssateena atoa. God euungu etaimami tani ghelei masi kiukiuna Iesu Karisto elao akapa see nongina voto ateva masi ngusungusuaane.

<sup>15</sup> Poli ami nongina voto ateva masi ngusungusuaane Karisto egheelei esae ta God me elao la akapa see ta lo atoa etaita ita ghe saangala me lo atoa ngila raaraua.

<sup>16</sup> Ta lo atoa la raaraua, lo ateva o nei, nongina nei nimate ateva aue eamatela. Me ta lo atoa laghe saangala, lo ateva o nei nongina maulue ateva aue etau lao maulue ateva. Me karika teva taumattu erooroo tani ghelei isaa o niuungu.

<sup>17</sup> Poli ami karika nongina mene katoa la poppoaa inangarina ateva God tani ghaa viliki veu. Ta Karisto ami poppoaa ngakoronna inangarina ateva God nongina va lo atoa taumattu God ghe sungilala, me tale ninannaa raarangisana, me ami kilakila va God etaataraimami.

### 3

<sup>1</sup> Am annaa va ami mene tiitiuaa tani asaesae arariimami? Karika. Katoa la annaa va la ghaa mae uru ngai etaimim tani apasunga va Karisto ghe sungilala, o la annaa va am piti uru ngai ta mene katoa. Me ami karika.

<sup>2</sup> Am uneimami uru ngai iem laghe pitimla tale urunguitaniimami va taumattu ngakapa atoa la riti me la tara kila.

<sup>3</sup> Me am nongina uru ngai etikirighi Karisto ghe pitila me ghe pitila tale niuungu ami gheelei. Karika ghe pitila tale ingki ta tale Spiriti eteva kanna ia God ateva tokatoka liu ia, me karika ghe pitila tale atu nongina inangari nipaopao ta tale urunguitani taumattu.

<sup>4</sup> Ami aulaa llo poli, ta matane God, ami kilakila va tale niuungu ami ghe gheleila etaimim, Karisto ghe gheleila.

<sup>5</sup> Karika ami rooroo tani ue va muenna iemami tani ghelei isaa oia niuungu, ta nimuenna ekasukasu ta God.

<sup>6</sup> Poli God nonga ghe gheleiemamila ami ghe muennala tani tau ngai uungu tale ouna ateva inangari niapirooa ngaitauaa, karika pitipiti ia tale inangari nipaopao ta tale Spiriti, poli inangari nipaopao eaamate taumattu, me Spiriti eteva etautau mae maulue.

*Mallangina ouna ateva inangari niapirooa ngaitauaa*

<sup>7</sup> Nau eteva God ghe tau lao sio inangari nipaopao laghe pitila tale atu, ghe asaesaela ararina ataeae me mallangina etana. Arongona ta mallanga ateva ta matane Moses karika ghe toka liula, me taumattu nge Israeli etoa karika laghe rooroo tani pasiaa mataira ta matane Moses. Inangari nipaopao etautau mae nimate ghe mae aitauaa tee sio namungaili sarasarakan me mallanga.

<sup>8</sup> Me koronnaaili va maamallanganiaane niuungu kanna Spiriti eteva erooroo tani lau isaa o voto.

<sup>9</sup> Poli arova ia o salana atikirighi tale uunguaa naisakei namuu ia, niuungu tani asaangi elaulau ekapa isaa o voto.

<sup>10</sup> Ita rooroo tani ue va maamallangia isaa oia niuungu ghaine, elaulau maamallangia isaa o niuungu ang lao sio.

<sup>11</sup> Inangari nipaopao ghe mae sio emua arau tee mallanga ateva karika ghe toka liula. Me ouna ateva inangari niapirooa ngaitauaa ghe mae tee sio mallanga namungaili, poli karika aue ekapa.

<sup>12</sup> Liuna avalua o me poli ami aatoka tuutuliihami tale isaa o inangari me karika ami maamatautu tani ppooaa.

**2:11:** Luk 22:31.    **2:12:** Apos 14:27; 1 Ko 16:9.    **2:13:** Apos 20:1.    **2:16:** Luk 2:34; 2 Ko 3:5-6.    **3:1:** 2 Ko

5:12; Apos 18:27.    **3:2:** 1 Ko 9:2.    **3:3:** Eks 24:12; Jer 31:33; Esik 36:26-27.    **3:6:** Jer 31:31; 1 Ko 11:25; Jon 6:63.

**3:7:** Eks 34:29.    **3:9:** Diut 27:26; Rom 1:17.

<sup>13</sup> Karika va ami nongina Moses ghe akou rungaala matane poli taumattu nge Israeli etoa laghe rau tara ia o mallanga ateva karika ghe toka liula.

<sup>14</sup> Nannaaira karika masalike. Emaemae tee tale isaa oia nau, nau eteva la ritiriti pokane ateva inangari niaippooa ngaitauaa, arova tuku kalio ateva eaakou runga mataira me karika la alomasaanga. Ia o tuku kalio ateva, ta Karisto nonga ekapakapa.

<sup>15</sup> Nongina isaa tee oia, nau la ritiriti kanna inangari nipaopao Moses, o me tuku kalio ateva eaakou runga urunguitaniira.

<sup>16</sup> Me marova lo ateva elao ta Vau ngepona ateva, Vau ngepona ateva aue eghaa velu tuku kalio ateva eaakou runga matane.

<sup>17</sup> Isaa avalua toko va, Vau ngepona ateva Spiriti ia, me eaa Spiriti eteva kanna ia Vau ngepona ateva etokatoka, karika righi voto erooroo tani ghelei rungainia.

<sup>18</sup> Ita akapa, karika righi kalio eaakou runga mataita, ita aapasunga maamallanganiaane Vau ngepona ateva nongina ghalasi eteva me ita aaikolikoliaa tale taataraane egheeleteita ita laa saesae tale llo mallanga namuu ekasukasu ta Vau ngepona ateva, ia Spiriti ia.

## 4

*Masi ghinna elome tale sospena atoa  
laghe gheleilala tale kosa*

<sup>1</sup> Tale alousiusiaane ateva, God ghe tau mae sio lo ateva oia niuungu etaimami. Liuna avalua o me karika aue ami sio asoasoaa tee ia oia lo ateva niuungu.

<sup>2</sup> Karika poi ami gheelei eisulia voto etautau mae nipalata me karika ami gheelei voto kamena. Me karika poi ami aikolikoliaa inangarina ateva God. Ami auliaa llo voto koronna ta matane God, me taumattu ngakapa atoa la rooroo tani aimasokoiaa me la atoka tuutuliira etaimami.

<sup>3</sup> Me marova masi kiukiu ami poppooaa eaaisulia, eaaisulia ta lo atoa ngila raaraaua,

<sup>4</sup> karika la ghaisoaa, ta vau tapaa kosa ateva egheelei runga nannaaira, me karika la rooroo tani tara mallangina masi kiukiu eaauliaa naanamungaane Karisto, ia tootoona ia God.

<sup>5</sup> Poli karika ami poppooaa gheeleiaaimami ta ami poppooaa Iesu Karisto va ia Vau palepale ia, me ami nim kapuimim tau ngai uungu iemami mausi Iesu.

<sup>6</sup> Ta God ghe uela va, “Mallanga ateva ellaa tale saurrom ateva,” me ia ghe gheleila mallanga ateva ghe llaala tale urunguitaniimami tani tau mae mallangina alomasaanga tale naanamungaane God ta matane Karisto.\*

<sup>7</sup> Ami nongina sospena atoa laghe gheleilala tale kosa la kaakaai isaa o masi ghinna, tani apasunga va ia o sarasarakana ateva elaulau isaa akapaaili voto, kanna ia God me karika va kaluimami ia.

<sup>8</sup> Arongona ta ami ghaaghaa voto maate tale pai ekapa aluevilau, karika etuuturungi maamauluuaimami. Arongona ta kasina nau nannaaimami ekaakatuu, karika ami sio asoasoaa.

<sup>9</sup> Arongona ta la gheelei voto sesa etaimami, karika ami nannaa va God ekasukasu vuliemami. Me arongona ta la tautauemami sio euu, karika la tuuturungiemami.

<sup>10</sup> Nau etoa ami sousou nimate nongina va ami sausau matemateaane Iesu. Isaa avalua o me vilikiimami aue eapasunga maamauluuane Iesu.

<sup>11</sup> Poli ami maulue iemami, nau etoa taumattu ngatoa la aloanna tani uvi emateamami poli ami aaimuli usi tee Iesu, liuna avalua o me vilikiimami, arongona ta karika tokatoka liunna, aue eapasunga maamauluuane Iesu.

<sup>12</sup> Isaa o voto eaaimatoonga va nimate ateva euungu elome etaimami, me eaalutu maulue ateva elome etaimim.

<sup>13</sup> Laghe pitila tale Uru ngai Manga va, “Aghe aiesoala, liuna avalua o me aghe ppooala.” Tale ie nonga o spiriti niaikaaia ngateva, ami aaiesoaa, liuna avalua o me ami poppooa ngaotu,

<sup>14</sup> poli ami kilakila va lo ateva ghe totula Vau ngepona ateva Iesu tale nimate, aue etotu teeiemami tale nimate tee Iesu, me aue ami me am aue ita laa toka tee God.

<sup>15</sup> Isaa akapaaili o voto ami gheelei aisausiimim poli ami aloanna va maamasinaane God ekasukasu ekapa see tale taumattu aue egheelei me oroieili lo atoa aue la kaili emasina sae tani tau sae God.

**3:13:** Eks 34:33.    **3:16:** Eks 34:34.    **3:17:** Jon 8:36; Rom 8:2.    **4:2:** 2 Ko 2:17; 1 Tes 2:5.    **4:4:** Ips 2:2; Kol

1:15; Hib 1:3.    **4:6:** Aitiutiui 1:3; Ais 9:2; 2 Ko 3:18.    \* **4:6:** Kasina uru ngai laghe pitila, laghe uela va *Iesu Karisto*.

**4:7:** 2 Ko 5:1.    **4:8:** 2 Ko 1:8; 7:5.    **4:10:** 1 Ko 15:31.    **4:11:** Rom 8:36.    **4:13:** Sams 116:10.    **4:14:** 1 Ko

6:14.

*Tani toka tale niaikaaiaa*

<sup>16</sup> Mausina avalua o me karika ami sio asoasoaa, arongona ta vilikiimami ange sessa, me kapumami spiriti eteva ta God elutululu eouna ta kateva kateva nau.

<sup>17</sup> Poli maate ami ghaaghaa nau ghaine, nim saeokana me karika aue etoka liu, ta la nim gheelei tau mae voto oroieili me masinaaili aue etoka nau ekapa atoa, me nioneoneaane etokatoka epona liu elaulau voto maate tale kosa eteva.

<sup>18</sup> Liuna avalua o me karika ami paapasiaa mataimami tale voto ami taatara, ta ami paapasiaa mataimami tale voto karika ami taatara. Poli voto ita taatara, enim tokatoka tau, me voto karika ita taatara, etokatoka liu.

## 5

<sup>1</sup> Isaa oia ita kilakila va arova ale kandisi eteva eaaimatoonga vilikiita tale kosa eteva oia ita tokatoka etana etarurru, mene kateva aleita God ghe gheleielo, lo eteva ale tokatoka liu ia epona liu, taumattu ngatoa karika laghe gheleielo.

<sup>2</sup> Isaa oia ita alousiusi me ita nannaa poi vaalua arova ita ghele asae ale ngepona liu eteva.

<sup>3</sup> Poli nau eteva ita aitiitii, karika aue la tara vilikiita.

<sup>4</sup> Nau ita tokatoka tale lo eteva ale kandisi tale kosa eteva oia, ita ghaaghaa maate me ita alousiusi poli karika ita anna va ita velu ale kandisi eteva, ta ita anna va ita aitiitii tale ale ngepona liu, me aue vilikiita pei nimate aue eakolikoliaoaa me aue emaulue.

<sup>5</sup> God ghe aimanomanosieinalta mausii isaa oia voto me ghe atokala unna Spiriti eteva tale urunguitaniita tani apasunga va aue ita ghaa lo eteva ale tokatoka liu ia.

<sup>6</sup> Liuna avalua o me ita aatoka asarasarakana nannaaita, arongona ta ita kilakila va nau ita tokatoka tale lo eteva oia vilikiita, karika ita tokatoka tee Vau ngepona eteva.

<sup>7</sup> Malloeana avalua o me ita tokatoka tale voto ita aikaiaia etana, me karika va tale voto ita taatara.

<sup>8</sup> Ita aatoka asarasarakana nannaaita me ita masimasi tani ghaa velu ia oia vilikiita eteva, me tani laa toka aitauua tee Vau ngepona eteva.

<sup>9</sup> Liuna avalua o me kinatama nannaaita eteva tani amasimasia nau etoa, nau ita tokatoka tale kosa eteva oia o auena tee Vau ngepona eteva.

<sup>10</sup> Poli ita akapaaili aue ita tingina emua ta Karisto nongina liu niaisakei eteva me eghelei niaisakei etaita. Ita akapa aue ita ghaa aipolipoli erooaa niuungu ita gheelei nau oio, masina o sesa, ita uunguaa tale kosa eteva oia.

*Uunguaa tani gheleita tani kateva nonga*

<sup>11</sup> Liuna avalua o me poli ami kilakila vaalua malloeana tani oneoneaa Vau ngepona eteva, me ami tootoonga tani pasali taumattu ngatoa tani aiesoaa God ghe sungiemamila. God ekilakilaailemami me tale urunguita etaimim, aghaiesoaa va am tee am kilaki-laiemami.

<sup>12</sup> Karika va ami nim aasaesae arariimami etaimim, karika! Ta ami tautau aatu inangari niaisausi, me aue am roroo tani liu inangariira taumattu ngatoa la tautau sae nannairia tale voto la taatara etaira, me karika va tale urunguitaniira.

<sup>13</sup> Arova ami gheelei voto tale taataraimim alokapakapanna, ta taataraane Vau ngepona eteva masina; arova nannaimami masina tale taataraimim, ami gheelei evalua o mausimim.

<sup>14</sup> Poli aielousiaane eteva Karisto ia emuemueinamami, poli ami kilakila va kateva nonga ghe matela mausi tani sausi ekapaailiita, liuna avalua o me ita akapa ita ghe matela.

<sup>15</sup> Me ghe matela mausi tani sausi ekapaailiita, liuna avalua o me lo atoa maulue ita ghaine, karika ita tokatoka tani amasimasita, ta ita toka tale lo eteva ghe matela etaita me ghe mene totula tale maulue mausiiita.

<sup>16</sup> Isaa oia me nau too, ita tani anna ngamasina me karika ita mene ghelei niaisakei tale taumattu nongina taumattu tale kosa eteva oia. Arongona ta emua arau ita ghe anna ngavalua o ta Karisto, me isaa oia karika.

<sup>17</sup> Isaa avalua o me arova lo eteva etokatoka ta Karisto, ia emene oouna. Me voto pokane ang ghe kapala, me oouna ang ghe mene lutula etana!

<sup>18</sup> Isaa akapa voto oia kannaa God. Ia ghe atokala luei ta ngetaita me God tale uunguaane Karisto me ghe tau mae sio niuungu etaimami tani mene atoka luei ta taumattu ngatoa me God.

**4:16:** Ips 3:16.    **4:17:** Rom 8:17-18.    **4:18:** Kol 1:16.    **5:1:** 2 Ko 4:7.    **5:2:** Rom 8:23.    **5:6:** Hib 11:13-16.

**5:8:** Plp 1:23.    **5:9:** Kol 1:10; 1 Tes 4:1.    **5:10:** Alomasaanga 12:14.    **5:15:** Rom 14:7-8.    **5:17:** Rom 8:1; Gal

6:15.    **5:18:** Rom 5:10.

<sup>19</sup> Inangariimami va God ghe atokala luei ta taumattu ngatoa tale kosa ateva oia me ta God tale uunguaane Karisto. God karika emene annaa kaluira ssavoto atoa. Me ghe tau mae sio etaimami isaa oia niuungu tani ppooaa inangari luei.

<sup>20</sup> Isaa avalua o me Karisto ghe sungiemamilia tani aippooaa poli mausina, poli nau ami aippooaa etaimim, nonginaaili va God ekolokoaloam. Ami mene aippooaa ngasarakanaili etaimim tale ararina atea Karisto: Am tani toka tale luei tee God.

<sup>21</sup> Karisto karika righi kannna ssavoto me God ghe gheleielia va ie tee etoka elome tale uunguaa ssavoto ateva. Ghe ghelei evaluela o poli ghe aloanna va tale uunguaane Karisto, aue ita ghulughuluena ta God.

## 6

<sup>1</sup> Poli ami uungu tee God,\* liuna avalua o me ami aloannaailiim tee va maamasinaane ateva am ghe ghlaelia, erau nim peisaane.

<sup>2</sup> Nongola saa llo God eauliaa,  
“Naughu tani apasunga maamasinaaghi etam aghe nongoola,  
me nau ghe ghaala naughu tani asaangio aghe sausiola.”  
Am nongo! Ia oia tuku nau erighi, nauimim tani ghaa maamasinaane ateva God. Ghaine nau eteva tani ghaa niasaangi.

### *Pol ghe soula maate*

<sup>3</sup> Karika ami aaloanna va teva etara sesa niuungu tale uunguaaimami. Liuna avalua o, me ami tee ami tootoonga va karika ami mene ghelei runga sala taumattu.

<sup>4</sup> Tale voto akapa ami tootoonga tani apasunga va ami kapuna tau ngai uungu iemami God. Nau ekapa atoa ami ghe tiitingina akorokorongana nau ami ghe sousou maamatana, mmarikana me sesa nau;

<sup>5</sup> me nau laghe paruparuemami, me laghe aatokaiemami sso tale ale mata voovoo me laghe aiaoreaa me aikkalui; me nau niuungu maate ami ghe ghaaghha, me karika ami ghe rooroo tani asekanue eleivoo me karika ami ghe namanama.

<sup>6</sup> Ami apasunga va ami kapuna tau ngai uungu iemami God tale gheeleiaa niraarangsana, me tale alomasaanga, me tani tam sessai parasi, me tani ghelei masi voto, tee Spirit Manga ateva me koronna ateva niaelousi,

<sup>7</sup> tale poppooaammi koronna, me tale sarasarakaniaane God. Ghulughuluena iemami nongina ghinna niauvii tani aiuvii me tani ghelei runganimami.

<sup>8</sup> Katoa taumattu la oneoneainamami me katoa karika la oneoneainamami, me katoa la auliaa teeiemami voto sesa, me katoa la auliaa masi voto. Arongona ta ami aulia ngakoronna, katoa la ue va tau nikamekame iemami.

<sup>9</sup> Katoa, karika la kilakilaiemami, me God ekilakilailemami. Ami nongina taumattu ngateva ange aloanna tani mate me karika, ta ami maamaulue. Laghe uviuviemami me karika ami ghe matela.

<sup>10</sup> Arongo ta ami ghaaghha nialousiusi me ami masimasi nau etoa. Karika tue peipeina iemami me ami saasausi oroi taumattu tani ghaa oroi voto tale niaikaiaia. Taumattu ngatoa la ghannaa va karika peimami, me karika, ta rooroona iemami tale niarangise kanna God.

<sup>11</sup> Masi kapumami etoa tale masaliki taatara atea eKorint, ami ghe ppooala voto koronna etaimim tani apasunga va aielousiaaimami etaimim namungaili.

<sup>12</sup> Karika ami ghe kavatila urunguitaniimami etaimim, ta am, am ghe kavatila urunguitaniimami etaimim.

<sup>13</sup> Apoppooaa etaimim nongina va natugu iem: Am ghelei nongina ami ghelei etaimim me am tee am oti urunguitaniimim etaimami.

### *Urau mene toka tee lo atoa karika la aikaiaaa*

<sup>14</sup> Am rau mene toka tee lo atoa karika la aaimuli tee Karisto, poli vaalua, ghulughuluena me sesa lalu rooroo tani lao aitauua? Me am annaa va mallanga me saurrom lalu kasukasu eitauua?

<sup>15</sup> Vaalua, am annaa va Karisto me raroai eteva<sup>†</sup> lalu rooroo tani mae aitauua tale ninannaa? Me lo ateva karika eaikaiaaa me lo ateva eaikaiaaa, lalu roo tani mae aitauua nonga tale kateva nonga ninannaa?

<sup>16</sup> Vaalua, alena ale manga ateva God me tootoo goto atoa la rooroo tani mae aitauua tale righi ninannaa? Karika poi! Aghauliaa llo, poli ita alena ale manga ita God ateva

---

<sup>5:19:</sup> Rom 3:23-25.    <sup>5:21:</sup> Hib 4:15.    \* <sup>6:1:</sup> ami uungu tee God o, ami uungu teeiem.    <sup>6:2:</sup> Ais 49:8.    <sup>6:5:</sup> 2 Ko 11:23-27.    <sup>6:6:</sup> 1 Tim 4:12.    <sup>6:9:</sup> 2 Ko 4:10.    <sup>6:13:</sup> 1 Ko 4:14.    <sup>6:14:</sup> Ips 5:11.    † <sup>6:15:</sup> Tale inangari nge Grik, Belial.    <sup>6:16:</sup> 1 Ko 3:16; Lev 26:12.

tokatoka liu ia, nongina God ghe uela va, "Aue atoka aitauaa teeila, me akasu teeila, me aghi aue kapuira Goto ieghi, me ila aue la kapughu taumattu ila."

<sup>17</sup> Liuna avalua o me, "Vau ngepona ateva eue va: Am kasu vulila,  
me am toka apolapola,  
Am rau mene poso voto karika raarangisana  
me aue aghaaiem."

<sup>18</sup> "Vau ngepona ateva sarasarakananaili ia eue va: Aue aghi tamaimim etaghi  
me am aue enatughu iem."

## 7

<sup>1</sup> Masi kapughu etoa, isaa akapa masi inangari nialokoi ghe mae sio ta God. Liuna avalua o me ita ghelei eraarangisanaita me ita ghaa velu voto elome tale vilikiita me maamauluaaita kulukulutana, me tokatokaaita etani manga akapa tani oneoneaa God.

### *Masimasiaa Pol*

<sup>2</sup> Am annaailiemami tale urunguitaniimim, poli karika ami ghe ghelei saasakiaala ta teva, me karika ami ghe ghelei saasakiaala aikaaiaaimim, me karika ami ghe kamela tevi tani ghaa peina.

<sup>3</sup> Karika aghauliaa llo tani aulia ngaotu va am ghe gheleila righi voto sesa etaghi. Nongina ngaghe aulia ngakasinala va, am tokatoka elome tale urunguitaniimami, liuna avalua o me arova am mate, ami tee aue ami mate, me arova am sakesake, aue ami tee ami sakesake.

<sup>4</sup> Karika aghe aisuliaala righi voto etaimim, me atautau sae nannaaghi mausim. Aisasiaaimim etaghi egheleieghi amasimasi me eaasarasarakanaiieghи me amasimasi nau ami tokatoka tale sesa nau.

<sup>5</sup> Nau ami ghe lao sio eMesedonia, karika ami ghe ainoana amasinala poli ami ghe toka saaoala tale orioeli voto sesa, katoa laghe aissakeana teeiemami, me matautu eteva elome tale rangoimami namungaili ia.

<sup>6</sup> Me poli God nonga etautau lao sarasarakanan ta lo atoa la tokatoka tale nau sesa, ghe tau mae sio sarasarakanan etaimami, tee tale reerekataane Taetas.

<sup>7</sup> Karika va ami ghe masimasiaala nonga reerekataane, ta kiukiu tee nongina vaalua am ghe asarasarakanaiel. Ghe auliaa tevi etaimami va am annaaili tani taraiieghи, me vaalua aalousiusiaaimim etaghi, me nannaaimim ta getaghii namungaili. Liuna avalua o me masimasiaaghi ghe namungailili.

<sup>8</sup> Arova uneghi uru ngai etikirighi aghe pitiela ghe gheleiemla va am ghe aalousiusila, karika aghalousiusi tee llo, arongona ta aghe alousiusi nau aghe pitiela. Uneghi uru ngai etikirighi ghe gheleiemla, am ghe alousiusila tale nau karika aluse.

<sup>9</sup> Me isaa oia amasimasi, karika va poli aghe ghelei alousiusiemla, ta poli alousiusiaaimim ghe gheleiemla, am ghe nna ngaioghioghiaala. Ia o ase nialousiusi eteva kanna ia God, liuna avalua o me karika ami ghe gheleila righi voto sesa etaimim.

<sup>10</sup> Ta llo nialousiusi kanna God, etautau mae ninna ngaioghioghiaa me eaasaokita lao tale nisaanga. Liuna avalua o me karika am rooroo tani alousiusi, ta lo ateva nialousiusi lo atoa la tam aiesoaa la ghaateateainia, karika etautau mae ninna ngaioghioghiaa, ta etautau mae nimate.

<sup>11</sup> Poli am tara vaalua nialousiusi God ghe tau aatu etaimim me ghe gheleila etaimim: am ghe annangailiemamila, me am ghe aloannala tani apasunga va am karika va sesa am, me am ghe atateala va aghe nim aliu teeiemla. Me am ghe matautula me am ghe annangailili, me am aimonomonosiaa tani taula sesa aipolipoli ta lo atoa la gheelei sesa. Tale isaa akapa o voto, am ghe apasungaala va am karika righi gheeleiaaimim sesa.

<sup>12</sup> Isaa avalua o, me karika aghe pitila uru ngai etikirighi mausi lo ateva ghe gheleila voto sesa, me mausi lo ateva ghe ghaala maate ta lo ateva ghe ghelei teeila, ta aghe pitila uru ngai etikirighi etaimim tani apasunga ta matane God vaalua maamasinaiimim etaimami.

<sup>13</sup> Tale isaa o voto me easasarakanan maamauluaaimami.

Epona tale isaa o niasasarakanan, tale maamauluaaimami ami ghe masimasielili tani tara vaalua Taetas ghe masimasila. Poli am ghe gheleila me ghe akorokoronganala maamauluaane.

<sup>14</sup> Aghe arueinamla ta Taetas me karika poi am ghe gheleila nannaaghi va ghe siola euu. Nongina voto akapa ami ghe auliaala etaimim koronna, tale isaa o salana niaruaa, ami ghe gheleila ta Taetas ghe koronnala.

<sup>15</sup> Liuna avalua o me ailousiaane etaimim sarasarakananaili nau eaannaa va am ghe aimonomonosiaala tani nongo usilaa, me am ghe ghaaiela tale nioneoneaa.

<sup>16</sup> Amasimasi ta arooroo tani atoka akapa tuutulighi etaimim.

## 8

### *Laghe sausila tau nikkaua ngatoa*

<sup>1</sup> Kapughu etoa, ami anna va am kila maamasinaane ateva God, ghe tauue lao sio tale ale manga atoa tale provinsi eteva eMesedonia.

<sup>2</sup> Nau laghe tokatoka tale nau sesaaili, laghe masimasieili, me karikaaili righi peiira, me laghe aloannaaili tani aiparruu.

<sup>3</sup> Poli aghi aghe tarala me aghaauliaa va laghe taula voto laghe roola tani taula me laghe saao ngaoroi teela mene kasina voto tani taula. Karika teva ghe sungilala va la ghelei.

<sup>4</sup> Laghe aakorokorongana tani kolomiemami va ami tau vella tani sausi tee tau ngai kkaua ngatoa ejerusalem.

<sup>5</sup> Ami ghe soghiaala voto laghe tau mae sio. Laghe taula lao sio mua ta Vau ngepona ateva, vara me etaimami, nongina aloannaane God.

<sup>6</sup> Liuna avalua o me ami ghe aulia ngasarasarakanala ta Taetas va emene oghi mae etaimim me emae ruu masi niuungu poli ia ghe tiuuala.

<sup>7</sup> Ngam ghe tue peipeinala tale isaa o voto nongina uneimim niaikaaiaa namuu, me tale poppoaaimim, me tale nialomasaanga, me aloaloannaaimim namungaili tani sausiemami me tale ailousiaaimim etaimami.\* Tale ia o salana atikirighi am tani sarasarakananale masi uunguaaimim tani sausi.

<sup>8</sup> Karika va asungsungi ererrekanaaiei tani taula, ta aghauliaa nongina aMesedonia ngatoa la paaparruu, poli anim anna tani pae aotu va ailousiaaimim ta mene katoa tau ngaiseoaa koronna o karika.

<sup>9</sup> Poli ngam ghe kilala maamasinaane Vauita ateva Iesu Karisto va ia tue peipeina ia me mausiiimim ghe gheleieila me ghe karikala peina, poli ghe aloannala va am ae am tue peipeina poli ia ghe karikala peina.

<sup>10</sup> Tale nannaaghi aghanhaa va am ghelei evalua toko tale isaa o voto, poli aghaaiesoaa va isaa o llo masi voto tani ghelei. Poli tale lo atae too ninamanama ang ghe lao sio, am, am ghe aitiutiula tani tau lao, me tee am ghe aitiutiula tani aloanna tani tau lao viliki veu.

<sup>11</sup> Aghanhaa va am tani ruu niuungu am ghe tiuua ngakasinala. Am ghe aloannaaili tani tiuua, me am tani aloanna tee tani ruu. Liuna avalua o me am taula llo voto isaa etaimim.

<sup>12</sup> Marova am annaaili tani tau lao, God ae eghaa kaluimim nitau lao tale voto etaimim, me karika va tale voto karika etaimim.

<sup>13</sup> Karika ami anna va am ghelei tokatoka katoa emasina me am tokatokaaimim emaate. Ami anna va voto emasina akapa etaimim.

<sup>14</sup> Tale ia oia nau etiulu, nau oroi voto etaimim, isaa o voto am mene sausi katoa, me auena, voto emene oroi etaira ae la mene sausiem nau ngam tukunala tale voto, me voto au emasina akapa etaimim.

<sup>15</sup> Aue nongina Uru ngai Manga ateva eaauliaa va, "Lo ateva ghe ghaala oroi karika righi ghe tokala, me lo ateva ghe ghaala malaki ghe ghaa rooroaaala."

### *Taetas ghe oghi lao sio eKorint*

<sup>16</sup> Ami kaakaili emasinaaili ta God poli ghe atokala niaielousi tale urunguitanina ateva Taetas nongina aghi aghanhangaili tani sausiem.

<sup>17</sup> Poli Taetas ghe nongo usilaala, voto ami ghe annaaili va ghe ghelei, ghe annaailiila va emene mae etaimim me ie tee nannaane tani mae sausiem namungaili.

<sup>18</sup> Ngami suusuu tee kateva tau ngaiseoaa ange maemae aitauuaa tee Taetas, ale manga akapa atoa la aarueinia poli masi uunguaane tale masi kiuki.

<sup>19</sup> Me karika va isaa nonga o, ta ale manga atoa laghe suoongainiela va ekasu teeiemami nau ami ghe sausau viliki veu tani kkaua ararina atae Vau ngepona ateva, me tani apasunga vaalua ami annaaili tani sausi.

<sup>20</sup> Karika ami anna va teva ealiu teeiemami tale righi voto sesa nau ami aaitaraa isaa o viliki veu oroi.

<sup>21</sup> Ami aainanganangaaili tani ghelei voto ghulughuluena, karika va ta matane Vau ngepona nonga ateva, ta tale matane taumattu tee.

**8:1:** Rom 15:26; 2 Ko 9:1-2.    **8:7:** 1 Ko 16:1-2.    \* **8:7:** *ailousiaaimim etaimami* Katoa uru ngai laghe pitila, laghe ue va, *ailousiaaimami etaimim*.    **8:9:** Mat 8:20; Plp 2:6-7.    **8:12:** Mak 12:43-44.    **8:15:** Eks 16:18.

<sup>22</sup> Liuna avalua o me ngami mene suusuu tee kateva tani mae aitauua tee taita alua, oroi nau ngami ghe toongainiela, me ngami ghe tarala va eannaaili tani aisausiaa, me eaatoka tuutulina etaimim me eannaaili tani sausiemami tani ghelei niungu.

<sup>23</sup> Me ta Taetas, ia kapughu ia angalu uungu eitauua elome etaimim tani sausiem, me mene ghalua kapuita tau ngaisesoaa, lalu aaimatoonga ale manga atoa, me nioneoneaa elao ta Karisto.

<sup>24</sup> Liuna avalua o me am apasunga ailousiaaimim tale isaa o taumattu, me ila akapa ale manga atoa aue la tara, me la kila va llo ami ghe aarueinam etana, koronna.

## 9

<sup>1</sup> Karika righi uunguaaghi tani pitipiti eatu etaimim me auliaa voto tani sausi tau ngai kkaua ngatoa ejerusalem.

<sup>2</sup> Poli akilakila aloaloannaaaimim tani sausi, me aghe aarueinam ta aMesedonia ngatoa. Aghe uela etaira va tale ie too ninamanama ateae ang ghe lao sio, am ona tale provinsi eteva eAkia am ghe aimonomonosiaala tani tau lao. Me aloannaaimim tani taula ghe gheleilala me oroi ila tee lo atoa laghe annala tani sausi tee.

<sup>3</sup> Ngasungisungi tau mae kapuita atoa etaimim me llo aghe aarueinam etaira erau nim peisaane, me am tee am aimanomanosiaa nongina aghe auliaala etaira.

<sup>4</sup> Karika aue masi taataraane arova toa aMesedonia la usieghi me la atu tara va karika am ghe aimanomanosiaala. Isaa o voto aue egheleita, ita palata. Karika aue va ami nonga ta ita akapa. Anim auliaa runga llo ta isaa o voto erou lutu.

<sup>5</sup> Liuna avalua o me aghe nnaala va masina arova asungi esarasarakana kapuita atoa mua la muemue eatu me la ghatu aimanomanosia ngakapa isaa o viliki veu am nim anna tani tau lao, me am, am ghe auliaala inangari nialokoi va aue am tau lao. Tale isaa o salana me aue eapasunga va am tautau lao poli am annaaili tani tau lao, me karika va ami suusulungiem.

### *Lo ateva emasimasi tani nim taula*

<sup>6</sup> Am nnaa: Lo ateva epasapasa llo karika oroi emukemuke llo karika oroi, me lo ateva epasapasa oroi emukemuke oroi.

<sup>7</sup> Keteva kateva taumattu etaula nongina vaalua urunguitana ateva eanna tani taula. Karika umene taula arova karika ualoanna tani tau, me karika umene taula poli la suusulungi tani taula, poli God eaaielousiaa lo ateva taumattu emasimasi tani nim tau lao.

<sup>8</sup> Me God erooroo tani tau aatu niarangise aue elau aloaloannaaaimim, me nau etoa aue am ghaa oroieili voto karika isaa etaimim, me aue am rooroo tani ghelei oroieili masi niuungu etana.

<sup>9</sup> Gheegheleiaaimim aue enongina Uru ngai Manga ateva eaauliaa va,  
“God etautaula ta lo atoa karika peiira  
kanna nighulughuluena aue etoka liu.”

<sup>10</sup> God etautau lao katu ue ngai ta tau ngai pasa ngutana atoa, me etautau lao inana ta taumattu ngakapa atoa. Tale isaa o salana, aue eghelei aoroi peiimim me aue am mene tau lao ta lo atoa la ghanna niaisausi.

<sup>11</sup> Me God aue egheleiem aue am tue peipeina tale isaa akapa ase salana, me aue am roo tani nim taula. Oroi taumattu aue la kaili emasina sae ta God nau ami taula viliki veu am ghe tau mae sio etaimami.

<sup>12</sup> Isaa avalua o me niuungu am gheelei karika va aue esausi nonga tau ngai kkaua ngatoa ejerusalem, ta oroi ila mene katoa aue la masimasieili tani kaili emasina sae tee ta God.

<sup>13</sup> Tale llo niuungu ngam ghe gheleila, eaapasunga ngakoronna va am gheelei voto am ghe uela va am ghelei. Me aue eghelei oroieili taumattu etaue sae God tale masi uunguaaimim eaapasunga va am nonganongo usilaa masi kiukiuna Karisto, am ue va am aikaaiiaa etana. Me eaapasunga tee masi aloannaaimim tani sausila me tani sausi mene katoa.

<sup>14</sup> Me tale uneira nikokkolomi sae ta God mausimim, aue urunguitanira elao aitauua teeiem mausii kinatama maamasinaane ateva God ghe tau aatu etaimim.

<sup>15</sup> Ita kaili emasina ta God poli voto ghe nim tau mae sio, karika ita rooroo tani kila amasina!

## 10

*Pol ghe vativatia tale uunguaane ta Karisto*

<sup>1</sup> Aghi Pol, tale ararina ataeae Karisto, ia saghuighuiena ia, me karika esessai parasia, akokolomiem tani nongoaghi. Kasina tani taumattu la ue va atautaueghi sio nau atokatoka teeiem, me nau karika atokatoka teeiem, atautau aatu inangari sarasarakanaili etaimim.

<sup>2</sup> Akokolomi esasarakanaili emaetiaem va nau amae taraiem, va ngam ghe aikolikoliaala, karika aue amene sorriena tani aulia ngasarasarakanaili inangari etaimim nongina aghannaa tani auliaa tee isaa o taumattu la nannaa va ami tokatoka tale uunguaa kosa ateva oia.

<sup>3</sup> Arongona ta ami tokatoka tale kosa ateva oia, me karika ami aaiuvii nongina taumattu ngatoa tale kosa ateva oia la aiuvii.

<sup>4</sup> Poli ghinna niaiuvi amai aaiuvii etana, karika va nongina pei tale kosa ateva oio, karika. Ta ami aaiuvii tale ghinna, sarasarakaniaane emaemaa ta God, me erooroo tani rruti ekatuu uneira valavala ataeae sarasarakaniaane ia tau ngai ssateeimami etoa,

<sup>5</sup> me isaa akapaaili ninannaa me voto la nannaa tani saeaa nonga epona me egheeghelei saasakiaa alomasaanga kanna God. Me ami gheelei nannaairaa tau ngai ssateeina atoa Karisto tani oghi vulu isaa o salana me la nongo usilaa nonga Karisto.

<sup>6</sup> Me nau ngam nongo usilangaili Karisto, aue ami aimanomanosiaa tani atoka ghoa eleka tale ale manga llo taumattu etam aaloanna tani nongo usilaa.

<sup>7</sup> Am tara amasina voto am rooro tani tara.\* Arova teva etaimim enannangaili va ia kapuna ia Karisto, eroo tani mene nnaa va ami tee kapuna amami Karisto, nongina ia.

<sup>8</sup> Arova aghe saasaee nannaaghi tale isaa o matutulienaa Vau ngepona ateva ghe tau mae sio etaimami tani atingina akorokoronganaiem me karika tani gheleiem va am katuu, karika aue apalata.

<sup>9</sup> Poli karika aghaaloanna va aghamatatuem tale uru ngai apitipi atu etaimim.

<sup>10</sup> Poli katoa la ue va, "Am rau mene annangaili Pol, poli uru ngai epitipi pasu tale inangari matutulienaa me sarasarakanaili, me tani tara tuungiia nau eaippooaa, karika muenna ia tani aippooaa, me inangari eaauliaa karika righi malloeana."

<sup>11</sup> Isaa o taumattu eaauliaa isaa o ase inangari, la tani anna ngamasina me la kila va, nau ami mae toka teeiem, aue ami toka nongina sa ateva am ghe taraiela tale uru ngai etikirighi aghe piti ekasinaie mae sio etaimim.

<sup>12</sup> Ami gheelei tani apasunga va saa taumattu iemami, me karika ami aasasarakanaiemami tani apasunga va ami eitauaa me lo atoa la saasaee nannaairaa. La ghaitoongieinila elome ta ngetaira tale ninannaa. Isaa o ase ninannaa eaapasunga va alokapakapa ila.

<sup>13</sup> Me karika aue ami aasakeaa llo niuungu karika isaa etaimami tani lau aioghioghi etaimami nongina ami uungu. Kinatama nannaaimami va ami toka tale aioghioghi nongina God ghe aloannala va ami gheelei, me am tee elome tale isaa o niuungu.

<sup>14</sup> Poli karika masina va karika ami ghe mae sio tani taraiem, me ami asaesae nannaaimami. Ta ami, ami ghe aitiutiula tani maeeaa masi kiukiuna Karisto etaimim.

<sup>15</sup> Karika ami aasaeasae nannaaimami tani lau aioghioghi etaimami, tale niuungu katoa taumattu laghe gheleila. Ta nannaaimami va nau alesoaimim epinosa akorokoronganaa me elao ta mene kasina taumattu laghe tam kila masi kiukiuna Iesu, elome nongina ami, ami uungu,

<sup>16</sup> me aue ami roo tani mene ppooaa masi kiukiui tale mene kasina patunganua namuu masau tanganueimim. Me karika ami rooro tani aasakeaa niuungu katoa laghe gheleila elome nongina ila la uungu.

<sup>17</sup> Me nongina Uru ngai Manga ateva eue va, "Arova teva ealoanna tani aasake, aasakeaa saa llo voto Vau ngepona ateva ghe gheleila etana."

<sup>18</sup> Poli ita kilakila va lo ateva taumattu esaasaee nannaane, ia o taumattu ngateva karika God eue va masina ia. Ta arova Vau ngepona ateva etau sae ararina ataeae ia o taumattu ngateva, ie nonga o ase taumattu ngateva masina ia ta matane Vau ngepona ateva.

## 11

*Pol me kamena atoa apostolo*

---

**10:1:** 1 Ko 2:3.    **10:2:** 1 Ko 4:21.    **10:4:** Ips 6:13-17.    \* **10:7:** Katoa la ue va malloeana va Voto ateva am taataaraia nonga eleka.    **10:8:** 2 Ko 13:10.    **10:13:** Rom 12:3.    **10:17:** Jer 9:24; 1 Ko 1:31.    **10:18:** 1 Ko 4:4.

<sup>1</sup> Aghanna va ue am rooroo tani nongo niaippooaa ue aghelei, arongona ta aghi nongina alokapakapa ateva, me am tani nongoaghi.

<sup>2</sup> Poli anannangailiim tee ninannaa manga. Aghe auliaala inangari nialokoi tani tauem lao ta kateva nonga taitaniiimim, ta Karisto, me aghi ue arooroo tani tauem lao etana nongina vause ateva raarangisana ia, karika ghe kila tata.

<sup>3</sup> Me amaamatautu, poli nongina Ivi katu ngateva muennaili ia tani kamekame ghe kameala, nannaaimim erou tiu ppae me karika am aielousiaa Karisto tale urunguitaniim akapa.

<sup>4</sup> Poli nau eteva kateva emae etaimim me eppooaa Iesu, me karika va lo ateva Iesu ami ghe ppooainiela etaimim, o arova am ghaa kateva ppae spiriti tale lo ateva am ghe ghaa akasinaiela, o kasina ppae masi kiukiu tale llo akasina am ghe ghaala, emaamaluminaaili etaimim me arovaea ta am ghaaghaa.

<sup>5</sup> Poli karika atanai nannaai va aghieili euu tale ila o apostolo atoa la ue va ilaaili epona.

<sup>6</sup> Arongo ta karika aghe lao sio tani ghaa alomasaanga tale uunguaa niaippooaa, me karika koronna va atam kilakila amasina isaa o masi kiukiu. Tale isaa akapa salana ami ghe ghelei emasalikangailila isaa o voto etaimim.

<sup>7</sup> Am annaa va aghe gheleila ssavoto nau aghe sioainaghila euu tani gheleiem va am, am sae epona nau aghe poppooaa masi kiukiuna God me karika aghe ghaaghaa aipolipoli?

<sup>8</sup> Aghe aainao viliki veu katoa ale manga laghe nim tautau mae tani sausieghi, tani uungu etaimim.

<sup>9</sup> Me nau aghe tokatoka teeiem, me aghe anna voto, karika aghe tautaula maate ta teva taumattu, poli kapughu etoa laghe kasula eMesedonia, laghe tau mae sio voto aghe anna. Aghe aaitarainaghi tani ghelei va erau mene maate etaimim tale asease salana, me aue atoka gheelei evalua o.

<sup>10</sup> Me nongina voto koronna ta Karisto etokatoka etaghi, aghaaulia ngakoronna va karika teva tale provinsi eteva ona eAkaia ue eghelei rungainaghi tale aasakeaaghi va karika aghaaghaa viliki veu tale uunguaa tani ppooaa masi kiukiu.

<sup>11</sup> Poli saa? Poli karika aghaailousieinam? God ekilakilaaili va agheelei evalua o poli aghaailousieinam.

<sup>12</sup> Me karika aue aruu tani ghelei voto agheelei, poli aghaloanna va lo atoa la paepae salana va la ghairooaa teeiemami tale llo la ghaasakeaa etana, karika aue la roo tani aasake.

<sup>13</sup> Ta isaa o taumattu apostolo kamekame ila. La ghaikameaa tale uunguaaira, la gheelei varu mene kapuna apostolo koronna ila Karisto.

<sup>14</sup> Karika ita rooroo tani soghiaa poli Satana egheelei tee vara mene ensolo tale mallanga ia.

<sup>15</sup> Liuna avalua o me karika ita rooroo tani soghiaa arova kapuna tau ngai uungu etoa la gheeleila arova tau ngai uungu tale ghulughuluena ila. Me airuuruu etaira, aue la ghaa aipoliira tale voto la gheelei.

#### *Pol ghe aasakeaa nimmarikana ghe ghaala*

<sup>16</sup> Amene aulia ngaghaluene va karika teva emene taraiieghi va alokapakapa aghi. Me arova am taatara avalueieghi o, am ghaaieghi va alokapakapa aghi me aue amala aasake.

<sup>17</sup> Tale isaa o voto, aghaasake tani aulieinaghi. Karika aghaippooaa nongina teva kapuna Vau ngepona ateva, ta nga samasama arova alokapakapa ateva.

<sup>18</sup> Oroi ila lo atoa la ghaasake nongina aasakeaa sala kosa ateva, liuna avalua o me aghi tee aghaasake.

<sup>19</sup> Me aue aghaasake poli alomasaangaaili iem me am ghe masimasieiliila tani lao aitauuaa tee nannaairaa alokapakapa atoa,

<sup>20</sup> me am ghe masimasila tani tau veluem ta lo ateva taumattu ghe annala tani gheleiem am ghe nim tau ngai uungula me karika am tokatoka tale aloannaaimim, me enim ghaaghaa peiimim me karika emene nannaainam, me ekamekameam tani muemueinam, me eaasaesee ararina atae, me nonginaaili lo ateva eanna tani posala pasipasi mataimim.

<sup>21</sup> Tale paapalataaghi nga ghaaulia ngaotu va, saghuighuinaili emami tani ghelei isaa o voto.

Arova teva taumattu eaasarasarakan tani asaesee nannaane, aghi tee arooroo. (Nga ghaippooaa nongina alokapakapa ateva).

<sup>22</sup> Vara ila nonga va aHibru ila? Ta aghi tee. Me vara ila nonga va aIsraeli ila? Ta aghi tee. Me vara ila nonga va tuvuna ila Abraham? Ta aghi tee.

<sup>23</sup> Vara ila nonga va kapuna tau ngai uungu ila Karisto? (Nga ghaaippooaa arova veeveena ieghi.) Alaulaula tale niuungu. Aghe uungu esarasarakanaaili, me oroiaata aghe ssola tale ale mata voovoo, me laghe paruparueghi oroaata me karika arooroo tani nnnaa va ghaisaata, me oroaata aghe oghioghi lao tale nimate.

<sup>24</sup> Ghalimaata aghe ghaala nipauparu ta ajiu etoa, kateae nipauparu ghe saesae ta kotolungaulu ghasio (39).\*

<sup>25</sup> Kotoluata laghe parueghila tale ai, me katengaata laghe osaieghila tale atu. Me kotoluata anua aghe aikaila etana, ghe tarurrtula elamana. Kateva voo me llaa ngateva aghe vukalala elo malionge.

<sup>26</sup> Orieili nau aghe kasukasuu ekapa see, aghe sousou sesa nau tani kasu longoti tale ateo atoa, me ta tau ngai sari ghinna atoa tapaa salana, me ta lo atoa tanganueimami eitauua, me ta taumattu ngeleka atoa, me tale masaliki taatara, me tale voto karika righi taumattu etana, me elamana, me aghe tokala tale sesa nau tee lo atoa laghe kamekame vara mene kapughu ila.

<sup>27</sup> Aghe uungu aanasa tee nimmarikana, me oroaata karika aghe asesekanua eleivoo. Aghe maamaloo me aghe kaakangngata tee manu, me karika righi aneghi, me karika oroi klioghu nau aghe kakkaili.

<sup>28</sup> Tani mene saoaa sae tale isaa o voto, nau ekapa atoa anannangaili isaa akapaili ale manga.

<sup>29</sup> Nau kateva tale ale manga atoa esaasaghuihuina, aghi tee esaasaghuihuina. Nau kateva ange gheleila kateva ange katuala tale ssavoto, am annaa va karika esessaieghi?

<sup>30</sup> Poli arova atani aasake, aue aghaasakeea llo voto eaapasunga saasaghuihuiaaghi.

<sup>31</sup> God, ia kapuna Goto ia me Tamane ia Vau ngepona ateva Iesu, me ie nonga ita taue sae nau ekapa atoa, ekilakila va karika akamekame.

<sup>32</sup> Tale masaliki taatara ataeae eDamaskas namu ngateva ghe uungu ta King Aretas ghe atinginala soldia ngatoa tani toi runga masaliki taatara ataeae tani ghelei va ghe kuneieghi.

<sup>33</sup> Me laghe tauueghi siola euu tale kinatama aikaai eteva arova keru eteva tale uindoa tale keavalavalava ateva me aghe saangala.

## 12

### *Unna nitaatara ataeae Pol*

<sup>1</sup> Atani toka aasake. Arongona ta karika aue aghaa righi voto masina, me isaa oio apoppooaa tee nitaatara me llo Vau ngepona ateva ghe aotula etaghi.

<sup>2</sup> Akilakila kateva taumattu eaimuli tee Karisto, kasangaulu ghaatiae (14) ninamanama ang ghe lao sio God ghe ghaiae saela epona liu\* (karika akilakila va ghe saela nongina va taumattu ngateva o tale ninanna — God nonga ekilakila).

<sup>3-4</sup> Amene auliaa, akilakila va taumattu ngateva oio God ghe ghaiae saela tale masi umana utana atingiu God (karika akilakila va ghe saela nongina va taumattu ngateva o tale ninanna — God nonga ekilakila), me isaa okae ghe nongola voto karika ghe rooroo tani kila mata nginangari tani aulia ngamasina, voto taumattu erou mene auliaa.

<sup>5</sup> Aghaasakeea ia o ase taumattu ngateva — karika amene aasakeainaghi nonga, ta voto nonga eaapasunga va karika sarasarakanai ieghi.

<sup>6</sup> Poli marova aghaloanna tani aasake, karika va alokapakapa aghi, ta aue aghaulia ngakoronna, ta karika aghaloanna va teva etingina tale llo oia me etauueghi sae tale nannaane, ta marova eghelei evalua o, etingina tale voto llo ghe tarala aghe gheleila me ghe nongola ta aghe ppooala.

<sup>7</sup> Me tani ghelei rungainaghi va arou mene saeaa nganamuu nannaaghi tale masi voto atoa aghe tarailala, aghe ghaala mmarijuana tale vilikighi nonginaaili va kateva voto ghe rorrooaghi, eaimatoonga uunguaane Satana tani tingina rungainaghi me tani ghelei va asioaa nannaaghi.

<sup>8</sup> Kotoluata aghe kolomi esarasarakana saela Vau eteva tani ghaa velu ia o voto ateva.

<sup>9</sup> Me karika ta ghe uela etaghi va, “Alousiusiaaghi eteva erooroo etam, poli sarasarakaniaaghi etani sarasarakanaiili tale taumattu karika righi sarasarakaniaaira.” Liuna evalua o me amasimasieilli tani aasake tani ue va aghi karika sarasarakanai ieghi me aue sarasarakanian Karisto aue etoka ta ngetaghi.

<sup>11:23:</sup> Apos 16:23.    <sup>11:24:</sup> Diut 25:3.    \* <sup>11:24:</sup> Ta Diutronomi 25:1-3 God ghe uela va nipauparu erau mene lau ghaatingaulu (40), me ajiu etoa laghe uela va karika emene lau kotolungaulu ghasio (39), poli la rau tam ioie amasina va la lau aioghioghi eteva ta ghaatingaulu.    <sup>11:25:</sup> Apos 16:22; 14:19.    <sup>11:26:</sup> Apos 9:23; 14:5.    <sup>11:32:</sup> Apos 9:23-25.    \* <sup>12:2:</sup> *epona liu* Tale inangari nge Grik, aiaakotolu eteva *epona liu*.

<sup>12:7:</sup> Job 2:6.    <sup>12:9:</sup> Plp 4:11-13.

<sup>10</sup> Liuna avalua o me amasimasi tani tam sarasarakana, tale sesa inangari la poppooa teeieghi, me tale nau asousou mmarakana, tale nau etoa la gheelei saasakiaa etaghi, me tale asease nau karika masina tale maamauluaaggi, mausi Karisto. Poli nau eteva atam sarasarakana, isaa o nau asarasarakana.

*Pol ghe nannangaili aKorint ataoa*

<sup>11</sup> Isaa oia inangari agheelei marova alokapakapa ateva, poli mausimim me agheelei isaa oia voto. Ghe roola va am, am ghe auliaa masi uunguaaggi, me karika, am ghe gheleila me aghi ngaghauilia ngaotu. Arongona ta aghi nim lao ieghi, me aghi alaulau ila o apostolo atoa la ue va ilaaili epona.

<sup>12</sup> Aghe gheleila orioeili aimatootongana me mirikolo, eaapasunga va aghi apostolo ieghi, nau aghe tam sio asoasoaa tani uungu teeiem nau voto karika masina ghe lutulutu teeieghi.

<sup>13</sup> Karika va aghe ghelei emla va amaili euu tale mene katoa ale manga. Voto nonga ateva karika aghe gheleila etaimim, karika aghe looloo righi viliki veu va emaate etaimim. Aghaloanna va am kkaluua!

<sup>14</sup> Am nongo, aiaakotonna oio ngamene aaimonomonosiaa tani mene mae taraiem, me nongina arau, karika aghaloanna tani loo righi voto etaimim. Ta anim aloannaiem, karika va peiimim. Ta karika va aliki etoa la aitaraa tamaira me kinaira, ta tamaira me kinaira la aitaraa natuira atoa.

<sup>15</sup> Aue amasimasi tani tau peighi, me aue amasimasi tee arova God etaueghi atu etaimim, tani sausiem. Vaalua, ailousiaaimim etaghi ange ghaaghauna nau eteva ailousiaaggi etaimim namuu?

<sup>16</sup> Am rooroo tani asokoi va karika aghe saoaala maamatana etaimim. Me katoa aue la ue va alomasaanga aghi me aghe kameamla.

<sup>17</sup> Vaalua? Saa nannaaggi nau aghe sungi mae sio taumattu tani ppooaa etaimim? Tani kameam me tani ghaa viliki veu? Karika poi!

<sup>18</sup> Aghe kookolomi esarasarakanaaili Taetas tani mae, me aghe sungila mene kateva kapuita tau ngai kkaua va eusia. Am annaa va Taetas tee ghe kameamla? Am rooroo tani kila va gheleiaaimami me nannaaimami, kateva nonga ia.

<sup>19</sup> Koti am nanna va isaa o nau ami ghe nim tootoonga tani vatiemami etaimim. Karika poi! Ami poppooaa nongina kapuna atoa Karisto ta matane God, me voto akapa ami ghe gheleila, masi kapughu etoa, ami ghe gheleila tani akorokoronganaiem.

<sup>20</sup> Poli amaamatatautu va nau amae rekataa ona, arau tara va karika am tokatoka nongina aghanna va am ghe toka, me koti am tee aue am tara va aghi tee karika atokatoka nongina am anna va atoka. Amaamatatautu va aue atara va am aaikiso, am nanna saasakiaa, am aaisessaii, am tokatoka apolapola, am auliaa inangari tani ghelei kateva nannaane esio euu, am auliulia see, am saesaea nannaaimim me am tam aimulisi tee masi salana.

<sup>21</sup> Amaamatatautu va ia o nau eteva aue amae, kapughu God ateva aue eghelei nannaaggi esio euu mausi voto am gheelei, me aue aghalousiusi tee lo atoa taumattu angila ghe katuila tale ssavoto me karika laghe nna ngaioghioghaala tale voto karika raarangisana, me nialai salosalooa see, me tani nim anna tani ghelei sesa voto.

## 13

*Airuuruu tale inangari tani auliaa kieira*

<sup>1</sup> Kotonna oia ngamaemae tani taraiem. Aue nongina Uru ngai Manga ateva eue va, "Nau niaisakei, eroroo va ghalaui o kotolu la ghasokoi voto laghe tarala."

<sup>2</sup> Ngaghe auliaala kieimim nau aghe toka teeiemla tale aiaaghahuene ataeae uneghi niatu etaimim, me ghaine, nau karika ieghi, nga ghaauliaa ta lo atoa laghe ghelei ekasinala ssavoto, me ta ngetaim akapa, nau amene mae rekataa karika aue agharrasaiem,

<sup>3</sup> poli am anna tani kila va koronna va inangari apoppooaa ekasukasu ta Karisto, o karika. Karisto, ia karika saghuighuina ia tani uungu teeiem, ta ia sarasarakanaaili ia elome etaimim.

<sup>4</sup> Me koronna va laghe avukalaie saela tale aikotoo tale nisaghuihuina, me karika ta emaamaulue tale sarasarakaniaane God. Isaa avalua o me arongona ta ami saghuighuina iemami etana, me tale sarasarakaniaane God aue ami toka teeia tani uungu etaimim.

<sup>5</sup> Am taraiem mua tani tara va am tale niaakaiaa o karika; am tootoonganainam mua. Karika am kilakila va Iesu Karisto ia etaimim? Me arova karika ia etaimim, karika am ghe tani aikaia ngakoronna.

<sup>6</sup> Me aghaaiesoaa va, aue am pae me kila va ami apostolo tuungi iemami.

<sup>7</sup> Isaa oia ami kokkolomi sae ta God va karika am mene ghelei voto sesa. Karika va poli taumattu ngatoo la tara va ami apostolo tuungi iemami, ta poli am aue am ghelei voto ghulughuluena, arongona ta katoa la nannaa va karika va apostolo tuungi iemami.

<sup>8</sup> Poli karika ami rooroo tani ghelei righi voto tani ghelei runga llo voto koronna, ta ami ghelei nonga llo voto masina elaoalo aitauaa tee koronna.

<sup>9</sup> Aghaauliaa isaa o voto poli ami masimasi nau ami saasaghuighuina me am sarasarakana am, me kaluimami nikokkolomi etaimim va am rooroo tani mene tingina asarasarakana.

<sup>10</sup> Liuna avalua o me apitipiti isaa oia voto nau karika aghi ona, me nau amae, karika aue amene sorriena tani aulia ngasarasarakanaili nau aghelei llo matuutuliena. Isaa o niuungu matuutuliena Vau ngepona ateva ghe tau mae sio etaghi tani asarasarakanaiem, karika va tani ghelei ekatungiem.

*Airuuruu tale inangarina Pol*

<sup>11</sup> Airuuruu, kapughu etoa, am masimasi, me am tootoonga tani toka tale masi nitoka, me am ppooa ngaisausia tani asarasarakana kateva kateva etaimim, me ekateva nonga iem tale ninannaa, me am toka tale luei, me Goto ateva etautau niaielousi me luei aue etoka teeiem.

<sup>12</sup> Am sou kateva kateva etaimim tale niaielousi.\*

<sup>13</sup> Ila akapa kapuna taumattu ngatoo God la sungi atu sio masimasiaairia etaimim.

<sup>14</sup> Alooloo sae va aue maamasinaane Vau ngepona ateva Iesu Karisto me aielousiaane ateva God me niaighui eitauaa ta Spirit Manga aue etoka aitauaa tee akapaiem.

## Uru ngai etikirighi Pol ghe pituela ta aGalaisia ngatoa Inangari emuemua

Uru ngai etikirighi Pol ghe pituela ta aGalaisia ngatoa, tau ngalomasaanga atoa la nannaa va aitiutiu ia tale uru ngai Pol ghe pitila. Galaisia kateva provins tale patunganua ateva namuu ia ghaine ita aseaseva va Teki, me Pol ghe kasu seela tani atoka ale manga tale aitiutiu eteae unna nikasu. Pol ghe lao sio okae eGalaisia tani tara isaa o ale manga tale aiaaghaluene me aiaakotonna atea nikasu.

Aitiutiu etoa taumattu laghe aiesoala ta Iesu, aJiu ila, me kinatama niaissa ghe lutula va tau ngeleka atoa la tani ajiu, me auena la rooroo tani saanga. Pol ghe pitila ia oia uru ngai etikirighi tani aulia ngaotu nannaane tale isaa o voto. Ghe apasungaala va ta niaikaiaaa ta Iesu nonga ita saanga, me karika va ita aaimuli usi tee inangari nipaopao kanna Moses. Me tee, ghe apasungaala va, nau ita aiesoaa ta Iesu, mallooeana karika va ita rooroo tani ghelei voto akapa ita aloanna, ta ita ghelei voto masina, ita sausi kateva kateva etaita tale niaielousi, tee niaisausi kanna Spirit Manga.

### **Tani kila amuemua**

Aitiutiu tale inangari 1:1-5

Pol ghe apasungaala va ia apostolo ia 1:6-2:21

God easaangita mausi kaluita niaiesoaa, me karika poli ita aimuli usi tee inangari nipaopao 3:1-4:31

Karisto egheeleita ita rooroo tani ghelei masina me tee niaisausi kanna ia Spirit Manga 5:1-6:10

Airuuruu tale inangari 6:11-18

<sup>1</sup> Aghi Pol, apostolo ieghi karika toa taumattu laghe sungieghila, me karika tee nim teva taumattu ghe suimatoongainaghila, ta Iesu Karisto me God Tamaita ia, ia ghe totula Iesu tale nimte.

<sup>2</sup> Aghi me kapughu tau ngai kkaua ngakapa atoa la tokatoka teeieghi ami pitipiti aatu etaimim tale ale manga atoa tale provinsi eteva eGalaisia.

<sup>3</sup> Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

<sup>4</sup> Ghe tau mae sio maamauluaane tale kaluita ssavoto tani għha oghita tale nau etiulu oia sesaħħili ia, nongina aloaloannaane Tamaita ateva ta God.

<sup>5</sup> Ta getana nikkauua aue etoka nau ekapa atoa, koronnaaili.

### *Karika mene teva masi kiukiū*

<sup>6</sup> Aghe soghieinamla va arovaea ta am ghe kasu vulila God ghe koloamla tale maamasinaane Karisto me ngam aaimuli tee kasina ppae masi kiukiū,

<sup>7</sup> Ilo karikaaili va masi kiukiū. Taataraane va katoa taumattu la ghe għeilela nannaaim ang ghe aisavisavilaala me la tootoonga tani aikolikoliaa masi kiukiuna Karisto.

<sup>8</sup> Me arova ami o teva ensolo ngepona liu għeppooaa masi kiukiū me karika elaoal aitaua tee llo ami għe ppooala etaimim, nikasikien kanna God aue etoka etana.

<sup>9</sup> Nongina ngami auliaala me ngamene aauliaa va, arova teva epoppoaa masi kiukiū me karika elaoal aitaua tee llo ngam għe għala, nikasikien kanna God aue etoka etana.

<sup>10</sup> Ia oia see aue eue va masi taumattu iegħi, taumattu ngatoa o God? Arova anim anna tani amasimasi taumattu ngatoa, karika arooroo tani kapuna tau ngai nongonongo anna Karisto.

### *Kiukiū vaalua God għe kolola Pol*

<sup>11</sup> Aghħanna, kapugħu etoa, ya am kila va masi kiukiū apoppoaa karika va nim kiukiū taumattu ngatoa lagħe għeilela,

<sup>12</sup> me karika agħe għala ta nim teva taumattu, me karika toa lagħe apasungaala etagħi, ta Iesu Karisto għe apasungaala isaa o voto etagħi.

<sup>13</sup> Ngam għe nongħola għeelleiaagħi tale nau too ang għe lao sio tani usilaa għeelleiaair aJiu etoa. Agħe uviuvi saasakia alena ale manga ateva God me agħe anna tani turungia.

<sup>14</sup> Ngaghe muumuennaaili me kilakilaaili vaalua tani aimuli tee kakkauaaimami ajiu etoa. Gheeleiaaggi ghe laulau lo atoa aneimami ninamanama isaa aitauaa me aghe sarasarakanaaili tani aimuli tee gheeleiaaira tuvuimami etoa.

<sup>15</sup> Me nau Goto ateva, ghe suitoongainaghila nau aghe lutula me ghe koloaghila poli maamasinaane, ghe masimasila

<sup>16</sup> tani apasunga Natuna etaghi me aue appoainia ta lo atoa karika ajiu ila. Isaa o voto karika aghe kolomila teva taumattu,

<sup>17</sup> me karika aghe sae teela ejerusalem tani kolomi lo atoa tee taumattu laghe apostolo akasinala etaghi. Karika, ta gharovaeaa nonga ta aghe ssola eArabia vara me aghe mene lao sio eDamaskas.

<sup>18</sup> Vara kotoluae ninamanama ghe ruula me aghe saela ejerusalem tani kila amasina Pita<sup>\*</sup> me aghe toka teeiela kasangaulu ghalima (15) nau.

<sup>19</sup> Karika aghe mene tarala teva apostolo nim Jeimis nonga, tue me nenga ilalua me Vau eteva.

<sup>20</sup> Aghaaaulia ngakoronna etaimim tale taataraane God va voto apitipiti aatu etaimim karika va kamena.

<sup>21</sup> Emulina aghe lao sio tale provinsi elua eSiria me eSilia.

<sup>22</sup> Oroieli ale manga ejjudia laghe aaimuli tee Karisto karika laghe tara poila mataghi.

<sup>23</sup> Laghe nim nonganongo kiukiu va, "Taumattu ngateva ghe tuuturungita, nau ghaine ange poppoaa niaakaia ngateva emua arau ghe anna tani turungia."

<sup>24</sup> Me laghe tau saela God poli mausighi.

## 2

### *Mene katoa apostolo laghe masimasiaala Pol*

<sup>1</sup> Kasangaulu ghaatiae (14) ninamanama ghe ruula me angalua me Banabas angalu ghe mene saela ejerusalem, me aghe kolo teela Taetas tani kasu teeengalua.

<sup>2</sup> Aghe saela poli aghe aaimuli tee voto aghe tarala. Aghe sou eisuliaala lo atoa marova namuu ila, me aghe auliaala etaira masi kiukiu aghe poppoaa ta taumattu ngeleka atoa. Aghe gheelei llo va voto aghe gheleila me voto ghaine agheelei oia ghe rau nim peisaane.

<sup>3</sup> Arongo ta Taetas aGriki ia ghe usieghila, me karika poi laghe asarasarkanala tani ue va la isoia.

<sup>4</sup> Voto ateva o ghe lutula poli katoa taumattu tau nikamekame ila laghe sosso ainao tani tara rungainamami tale masi nitoka ngami ghe ghaala ta Karisto Iesu. Me laghe anna tani gheleiemami va ami, ami nongina tau ngai uungu eteva euungu me karika etokatoka tale aloaloannaane.

<sup>5</sup> Karika poi ami ghe annaala tani nongo usilainila, poli ami anna va koronna voto tale masi kiukiui etani toka etaimim.

<sup>6</sup> Me lo atoa namuu ila me matarane ila, karika laghe auliaa saoaala righi inangariira tale voto aghe auliaala. (Saa taumattu ila, karika aghanainila; God karika egheelei niaiskei tale voto eleka tale taumattu)

<sup>7</sup> Tale isaa o voto, laghe tara kilala va aghi God ghe tau mae sio ia oia niuungu eteva tani ppooaa tale taumattu ngeleka atoa nongina Pita ta ajiu etoa.

<sup>8</sup> Nongina God euungu ta Pita tale uunguaane va apostolo ia ta ajiu etoa, God tee euungu etaghi tale uunguaaghi va apostolo ieghi ta taumattu ngeleka atoa.

<sup>9</sup> Jeimis, Pita<sup>\*</sup> me Jon, nau laghe tara kilala maamasinaane God ghe tau mae sio etaghi, la taatara sae etaira va namuu ila, laghe ssuuuala nimaira muenna tani sighaa etaingalua me Banabas. Laghe mae sio nonga tale kateva nonga ninannaa va ami lao ta taumattu ngeleka atoa me ila ta ajiu etoa.

<sup>10</sup> Kateva nonga voto laghe kolomiemamila etana, va ami rau mene ruu tani sausi lo atoa karika tue peipeina ila. Lo ateva o voto aghe annaaili tani gheleia, poli emua arau aghe gheleia.

### *Pol ghe tam masimasiaala Pita*

<sup>11</sup> Nau Pita ghe sio mae eAntioq aghe sama anamuun teeiela ta mataira taumattu ngatoa poli llo ghe gheelei karika masina.

<sup>12</sup> Auena Jeimis ghe suu katoa taumattu tani sio, Pita ghe namanama akasina tee taumattu ngeleka atoa me nau laghe rekatala, ghe kasu vulilala me ghe ruula tani usi

**1:14:** Apo 22:3.    **1:15:** Ais 49:1; Gal 2:7.    **1:18:** Apo 9:26-27.    \* **1:18:** Pita Pol ghe pitila va Kepas. Tale inangari nge Aramaik, Kepas mallooeana va atu. Tale inangari nge Grik, Pita tee mallooeana va atu.    **1:21:** Apo 9:30.

**2:1:** Apo 15:2.    **2:4:** Gal 1:7; 5:1, 13.    **2:7:** Apo 22:21.    \* **2:9:** Pita Tale inangari nge Grik, Kepas. Me tee tale vesi 11 me 14.    **2:10:** Apo 11:29-30.    **2:12:** Apo 11:3.

taumattu ngeleka atoa poli ghe maamatauta lo atoa taumattu ila elome ta lo atoa isoisoila.

<sup>13</sup> Ajiu ekapa atoa laghe usila nannaane kamena, liuna avalua o me Banabas tee ghe usila voto kamena laghe gheelei.

<sup>14</sup> Nau eteva aghe tarala va karika laghe kasukasu eghulughuluena nongina koronna voto tale masi kiukiu, aghe uela ta Pita emua ta mataira akapa va, “Io ajiu io me utokatoka nongina taumattu ngeleka ateva, karika va nongina ajiu eteva. Vaalua me usarasarakana va taumattu ngeleka atoa la ajiu?”

<sup>15</sup> “Italua italu ghe lutula va ajiu italua karika nongina lo atoa la ue va taumattu ngeleka atoa tau ssavoto ila.

<sup>16</sup> Ita kilakila va taumattu karika eghulughuluena nau eaaimuli tee inangari nipaopao ta tale niaikaaiaa nonga ateva ta Iesu Karisto. Liuna avalua o me ita tee ita atoka aikaiaaita ta Karisto ateva Iesu, tani ghulughuluena tale niaiesoaa ta Karisto, karika va tani aimuli tee inangari nipaopao. Poli tani aimuli tee inangari nipaopao, karika teva erooro tani ghulughuluena.

<sup>17</sup> “Nau ita paepae salana tani ghulughuluena ta God tale niaikaaiaa ta Karisto, aue ita pae aotu va sesa gheegheleiaaita. Vaalua, ia o Karisto egheegheleita va ita ghelei ssavoto? Karika poi!

<sup>18</sup> Arova amene atulu voto aghe rrutila, voto o eaapasunga va karika aghaaimuli tee inangari nipaopao.

<sup>19</sup> Me mausi inangari nipaopao me aghe matela tale inangari nipaopao me aue amaulue ta God.

<sup>20</sup> Aghi aghe mate teela Karisto tale aikotoo, karika va aghi va atokatoka nau ghaine ta Karisto etokatoka etaghi. Maulue ateva ghaine atokatoka etana, atokatoka tale niaikaaiaa tale Natuna ateva God, ghe ailousleinaghila me ghe tau mae sio maamauluaane etaghi.

<sup>21</sup> Karika aghanma tani velu maamasinaane God me arova ita rororo tani ghaa nighlughuluena mausi inangari nipaopao, karika righi malloeane matemateaane Karisto.”

### 3

#### *Niaikaaiaa o tani aimuli tee inangari nipaopao*

<sup>1</sup> Alokapakapa am aGalaisia ngatoa! See ghe ghelei esavisavilaala nannaaimim? Tale nonganongoaaimim nonginaaili va am ghe tara amasinaailila matemateaane Iesu Karisto tale aikotoo.

<sup>2</sup> Agħanna tani kolomiem tale kateva nonga voto: Vaalua am ghe għala Spiriti eteva, nau am ghe aimuli teela inangari nipaopao, o poli am ghe aiesoala tale voto am ghe nongola?

<sup>3</sup> Ngam alokapakapaaili va? Am ghe tiuала tani kasu tale Spiriti eteva me ngam anna tani ruu tale aloaloannaa taumattu ngatua tale kosa ateva, va?

<sup>4</sup> Voto maateaili am ghe għala tale maamauluaaimim, ang ghe nim peisaaneli? Karika aghanma va ghe nim peisaane.

<sup>5</sup> Am anna va God ghe tau aatu sio Spiriti eteva me ghe għeilela mirikol elome etaimim nau am ghe aimuli teela inangari nipaopao o poli am ghe aiesoala voto am ghe nongola?

<sup>6</sup> Am annaa Abraham: “Għe atokala tuutulina ta God, liuna avalua o me ghe aseala va ia ghulughuluena ia.”

<sup>7</sup> Am tani kila amasina va lo atoa la ghajiesoaa, natuna ila Abraham.

<sup>8</sup> Uru ngai Manga ateva ghe tara amuemua alokoila va God aue egħelei eghulughuluena taumattu ngeleka atoa tale uneira niaikaaiaa. Me għe aulia ngakasinala masi kiukiuk ta Abraham va, “Aue ararimangali ekapaaili etoa aue la għaa niarangise ta ngetam.”

<sup>9</sup> Liuna avalua o me lo atoa la ghajjesoaa, la għażżeha niarangise ateva tee Abraham, ia tau niaikaaiaa ia.

<sup>10</sup> Lo atoa la ghannaa va la ghaimuli tee inangari nipaopao tani ghulughuluena ta matane God, la tokatoka tale nikasikienna, poli lagħe pitilä va, “Nikasikienna ta lo akpa atoa karika la għeeli voto akpa pitipiti tal-ejek.”

<sup>11</sup> Masalikeaili tani tara va karika teva erooro tani ghulughuluena ta taṭtaraane God mausi inangari nipaopao, poli, “Lo atoa la ghajjesoaa, God aue easela va ghulughuluena ila, me aue la maulve.”

<sup>12</sup> Tani aimuli tee inangari nipaopao karika elaoao aitauua tee uunguaa niaikaaiaa. Tale mene kasina salana, “Lo ateva taumattu eghelei isaa o voto, aue etoka tale llo egheelei.”

<sup>13</sup> Karisto ghe ghaa oghitala tale nikasikiena tale inangari nipaopao nau ia ghe ghaala liuita tale nikasikiena, poli laghe pitila tale Uru ngai Manga va, “Nikasikiena ta lo ateva esae vulaka tale ai eteae.”

<sup>14</sup> Ghe ghaa oghitala liuna avalua o me tale uunguaane Karisto ateva Iesu, niarangise ateva ta Abraham, aue elao tee ta taumattu ngeleka atoa. Mausina avalua o me tale niaikaaiaa aue ita ghaa Spirit Manga ateva God ghe aulieiniela tale inangari nialokoi.

### *Inangari nipaopao me inangari nialokoi*

<sup>15</sup> Kapughu etoa, aghaimatoonga kateva inangari niaimatoonga tale maamauluaaita. Karika teva erooroo tani ue va vulla o emene saoaa sae righi nannaane tale inangari niaippooa ngaitauua taumattu ngatoa laghe nim gheleila. Mausina avalua o me,

<sup>16</sup> inangari nialokoi God ghe auliaala ta Abraham me tuvuna, Uru ngai Manga ateva etam ue va “ta tuvuna atoa” (malloeana va oroi taumattu) ta eue va, “ta tuvuna ateva.” Malloeana va kateva nonga taumattu, Karisto ta ngetana.

<sup>17</sup> Malloeana voto aghanina tani auliaa isaa avalua toko, va God ghe gheleila inangari niaippooa ngaitauua tee Abraham, me isaa o inangari nipaopao, vara ghaata ai me kotolungauluea (430) ninamanama ghe lange sio me God ghe mene tau lao sio, karika eghaaghaa velu isaa o inangari niaippooa ngaitauua, me inangari nialokoi.

<sup>18</sup> Poli arova ita ghaaghaa niarangise kanna God, poli ita aimuli tee inangari nipaopao, tale isaa o salana karika ita ghaaghaa isaa o voto mausi inangari nialokoi. Poli nim maamasinaane God me ghe tau lao sio ta Abraham tale inangari nialokoi.

<sup>19</sup> O saa uunguaane inangari nipaopao? God ghe nim alokoi saoala mausi ssavoto, me laghe toitoi tuvuna ateva elutu inangari nialokoi ghe auliaala va aue emae. Inangari nipaopao ghe tulaanaa nau ensolo atoa laghe tau lao sio ta taumattu ngateva etiitingina elome etaita me God.

<sup>20</sup> Taumattu ngateva elome karika eaimatoonga nonga kativilau pai, me God nim ie nonga kateva nonga ia.

<sup>21</sup> Vaalua? Inangari nipaopao karika elaoao aitauua tee inangari nialokoi kanna God? Karika me karika! Poli arova isaa o inangari nipaopao ita ghe ghaala erooroo tani tau mae maulue, tani ghulughuluena tee aue ghele mae tale inangari nipaopao.

<sup>22</sup> Me poli Uru ngai Manga ateva eue va kosa akapa ateva etokatoka tale voto sesa nonginaaili ale mata voovoo ateva, liuna avalua o me voto God ghe auliaala tale inangari nialokoi, God etautau lao ta lo atoa la ghaaisesoa ta Iesu Karisto.

<sup>23</sup> Auena niaikaaiaa ghe mae, ami ghe tokatoka tale ale mata voovoo tale uunguaa inangari nipaopao ghe kavati rungainamamila lomosina ta niaikaaiaa ghe kauerekatila.

<sup>24</sup> Mausina avalua o me inangari nipaopao God ghe atokala tani aitarainamami lomosina ta Karisto emae tani ghelei eghulughuluuenaiemami poli niaikaaiaa.

<sup>25</sup> Niaikaaiaa ang ghe mae sio isaa oia nau karika inangari nipaopao emene aitaraina-mami.

### *Natuna atoa God*

<sup>26</sup> Am akapaaili natuna iem God poli aikaaiaaimim ta Karisto Iesu.

<sup>27</sup> Poli am akapaaili am ghe ghaala niaasuu ta Karisto, ngam ghe asae atokaiela etaimim nongina ita aasae ghinna.

<sup>28</sup> Am akapaaili ang ghe kateva nonga iemla ta Iesu Karisto: karika teva ajiu o aGrik, me karika toa tau ngai uungu me lo atoa la tokatoka tale aloannaaira, me karika toa vause me taita.

<sup>29</sup> Poli am ta Karisto, am natuna am Abraham, me voto inangari nialokoi eaauliaa kaluimim.

## 4

<sup>1</sup> Llo aghaauliaa isaa avalua toko va, aliki eteva aue eghaa peina tamane me nau aliki taita ia, enim tokatoka nongina tau ngai uungu etoa kapuna ila tamane, arongona ta voto akapa peina.

<sup>2</sup> Nau aliki ia etokatoka ta nimaira lo atoa la ghaaitarinia me lo atoa la loeloea lomosina ta elaa ghaa nau tamane esuisuitoongaa.

**3:12:** Lev 18:5; Rom 8:3.    **3:13:** Rom 8:3; Diut 21:23.    **3:16:** Aitiutiu 12:7.    **3:17:** Eks 12:40.    **3:18:** Rom 4:14.

**3:19:** Rom 5:20; Apes 7:38.    **3:21:** Rom 8:2-4.    **3:23:** Gal 4:3.    **3:24:** Rom 10:4.    **3:26:** Jon 1:12.    **3:27:**

Rom 6:3.    **3:28:** Rom 10:12.    **3:29:** Rom 4:13.

<sup>3</sup> Ita tee ita evalua o nau aliki ita, raroai etoa la aitaraa kosa ateva oia la gheegheleita va ita nim tau ngai uungu ita.

<sup>4</sup> Me vara nau God ghe suila ghe rekatala, me ghe suula Natuna ateva, ghe lutula tale vause ateva, me ghe usilaala inangari nipaopao,

<sup>5</sup> tani ghaa oghi lo atoa inangari nipaopao ghe aitoieinilala me ae natuna ita God.

<sup>6</sup> Poli natuna am God, ia esusuus kapuna Spiriti eteva Natuna, tani mae tale urunguitaia me Spiriti eteva ekolokolo tani ue va, "Abba, Tamaghi."

<sup>7</sup> Liuna evalua o me io karika va nim tau ngai uungu io ta natuna io. Me poli natuna io, ghe gheleiola va aue ughaa niarangise God ghe auliaala tale inangari nialokoi.

#### *Pol ghe nannangaili aGalaisia ngatoa*

<sup>8</sup> Emua arau nau am ghe tam kila God, tau ngai uungu iem tale goto atoa karika koronna ila.

<sup>9</sup> Me ia oia ngam ghe kilala God, o aroo tani ue va God ang ghe kilaiemla. Vaalua me ngam mene oghioghi tani lao ta raroai etoa karika sarasarakana ila me karika masina ila, me am aloanna tani mene nim tau ngai uungu?

<sup>10</sup> Am aimuli tee asease nau etoa me ulana atoa me mene kasina ase nivelu eitauaa me ninamanama.

<sup>11</sup> Amaamatautu tani nnaa va niuungu aghe gheleila etaimim, erau nim peisaane nonga.

<sup>12</sup> Akolokolo tauem, kapughu etoa, va am ghelei nongina aghi, poli aghi aghe nonginala am. Karika am ghe gheleila righi voto sesa ta ngetaghi.

<sup>13</sup> Am kilakila va poli mausi isiki eteva me aghe ppooa ngakasinala masi kiukiu etaimim.

<sup>14</sup> Arongo ta isikinna aghi, me aneghi isiki ghe gheelei nitootoonga me maate etaimim me karika am ghe maamangoo me uessainaghi. Am ghe ghaaieghila nongina va kapuna ensolo ieghi God, me nonginaaili va aghi va Karisto Iesu ta ngetaghi.

<sup>15</sup> Aghaaiesoaa va arova nongina va am ghe rooroo tani valiki velu mataimim me am ghe tau mae ae am ghe rooroo tani ghelei. Isaa o nimasimasi eaa ang ghe lao sio?

<sup>16</sup> Vaalua me isaa oia poli ngaghauiliaa voto koronna etaimim me ngam sessa teeieghi?

<sup>17</sup> Ila o taumattu ngatoa la ghannaaili tani ghaaiem va am lao aitauaa teeila me karika righi masi voto aue elutu. Llo la nim anna va am masau etaimami me ae am aloannaailila.

<sup>18</sup> Masina tani nnangaili tani ghelei masi voto ta mene katoa. Am elei evalua o nau ekapa atoa, karika va nau atokatoka teeiem nonga.

<sup>19</sup> Masi natughu etoa, poli am me amene mammarikana nonginaaili vause ateva ange momolenaa aliki eteva lomosina ta am nongina Karisto.

<sup>20</sup> Aghannaaili va arova ghaine nonga aghele toka teeiem me aghele aikolikoliaa samasamaaghi poli aghannangailiim.

#### *Eiga me Seraa*

<sup>21</sup> Am auliaa etaghi, lo atoa am anna tani usilaa inangari nipaopao, va vaalua me karika am kilakila voto inangari nipaopao eaauliaa.

<sup>22</sup> Laghe piti elokoila va Abraham natuna taita alua. Kateva natuna ia vause ateva tau ngai uungu ia, me kateva ta vausenna tunga ateva.

<sup>23</sup> Lo ateva taita ghe lutula tale vause ateva tau ngai uungu ia, karika etokatoka tale aloannaane, ghe lutula poli nannaaira taumattu nonga, me vausenna tunga ateva, natuna taita ateva ghe lutula poli inangari nialokoi.

<sup>24</sup> Isaa o voto eaapasunga etaita va vause alua lalu aimatoonga ghalua nimae aitauaa. Tale inangari niaippooa ngaitauaa kateva tale motouru eteva eSaenae, me ghe alutula aliki aue la nim tau ngai uungu, Eiga etana.

<sup>25</sup> Eiga eaaimatoonga motouru eteva eSaenae isaa eArabia me eaaimatoonga tee eJerusalem nau ghaine, poli ia me natuna atoa nim tau ngai uungu ila.

<sup>26</sup> Me lo ateva ejerusalem ia epona liu me etokatoka tale aloaloannaane, ia kinaita ia.

<sup>27</sup> Poli Uru ngai Manga ateva eue va,

"Umasimasi, vause ateva kina ngere io,

me utam kakkaai aliki;

uaore tale nimasimasi,

io lo ateva ughe tam aateateaa mammarikanaane nimolena ngateae;

poli ase vause ateva o kina ngere ia aue oroi natuna

elau lo ateva vause taitanna ateva."

<sup>28</sup> Am, kapughu etoa, am nongina Aisiki, aliki tale inangari nialokoi iem.

<sup>29</sup> Tale isaa o nau, lo ateva aliki taita ghe lutula poli nannaaira taumattu ngatoa ghe gheelei voto sesa tale lo ateva aliki ghe lutula tale sarasarakaniaane Spiriti eteva. Nim nongina ghaine.

<sup>30</sup> Me sa ateva Uru ngai Manga ateva eaaulieinia? Eue va, “Suu vella lo ateva vause tau ngai uungu ia karika etokatoka tale aloannaane me natuna ateva. Poli natuna ateva karika poi aue eghaa peina aliki eteva natuna ia lo ateva vausenna tuungi ia.”

<sup>31</sup> Liuna avalua o me, kapughu etoa, ita karika va natuna ita vause ateva tau ngai uungu ia karika etokatoka tale aloannaane, ta natuna ita lo ateva vausenna tuungia.

## 5

### *Tani toka tale aloannaane Karisto*

<sup>1</sup> Poli ita rau mene tau ngai uungu, poli Karisto ghe gheleitala va ita toka tale aloaloannaaita. Am tingina akorokorongana me am rau mene tau veluem va am mene nim tau ngai uungu.

<sup>2</sup> Am nongo inangarighi! Aghi Pol aghaauliaa etaimim va arova am tau veluem me la isoiem, karika aue righi uunguaane Karisto etaimim.

<sup>3</sup> Amene aaulia ngamasalikaa ta lo atoa am anna tani tau veluem va la isoiem, va am tani aimuli tee isaa akapaaili inangari nipaopao.

<sup>4</sup> Am lo atoa am anna tani aimuli tee inangari nipaopao me am ghulughuluena, tale isaa o salana eaapasunga va Karisto karika ia etaimim me ngam ghe kasu vulila maamasinaane.

<sup>5</sup> Me tale Spiriti eteva, tale niaakaiaa ita toitoi rerrekana nighulughuluena ita atoka tuutuliita etana.

<sup>6</sup> Ta Karisto Iesu ni-isoiso atae me nitam isoiso atae karika righi uunguaairarua, ta niaakaiaa nonga ateva eaapasungainia tale uunguaa niaeelousi.

<sup>7</sup> Am ghe ilou emasina tale niaikarati eteae, me see ghe ilou rungainamla me ghe gheleiemla va am rau mene nongo usilaa llo koronna?

<sup>8</sup> Ia o ase ninanna ngateva etam kasukasu ta lo ateva ekolokoam.

<sup>9</sup> Pisike ia tuku isti erighi erooroo tani ghelei verete akapa ateva erranga.

<sup>10</sup> Aghaataoka tuutulighi ta Vau ngepona ateva va karika aue am mene tiu ppae. See ia lo ateva egheelei esavisavila nannaaimim aue eghaa aipolipoli sesa.

<sup>11</sup> Kapughu etoa, arova ngamene poppoaa uunguaa ni-isoiso, vaalua me la mene gheelei teeieghi voto karika masina? Tale ia o salana atikirighi, inangari aikotoo ateva karika aue emene sesa nonganongoaane.

<sup>12</sup> Me ila o lo atoa la ghelei saasakiaa nannaaimim, aghanna va karika va laghele mene isoila nonga ta la ghele kaati teeila.

### *Maulue ateva tale Spirit*

<sup>13</sup> Am, kapughu etoa, God ghe koloamla va am toka tale aloannaaimim. Am rau mene mnaa va poli am tokatoka tale aaloaloannaaimim va am ghelei voto tale nannaaira taumattu tale kosa ateva oia. Am aisausiaa kateva kateva tale niaeelousi.

<sup>14</sup> Isaa akapaaili inangari nipaopao egheelei rooroaa nonga tale kateva ninannaa eue va, “Uaielousiaa taumattu ngateva kalakalangina ia etam, nongina uaaielousieinio.”

<sup>15</sup> Am paniem! Arova am toka aikiso me am aaiuvieinam, aue am aiturungia ngakapaiem.

<sup>16</sup> Liuna avalua o me aue va, am toka tale uunguaa Spiriti me karika aue am usilaa nannaaimim tani ghelei sesa niuungu.

<sup>17</sup> Poli nannaaita ateva, eanna voto Spiriti eteva etam aaloanna, me Spiriti eteva, eanna voto nannaaita ateva etam aaloanna. Karika lalu rooroo tani mae aitauua, liuna avalua o me karika am rooroo tani ghelei voto am anna tani ghelei.

<sup>18</sup> Arova Spiriti eteva ekaakatulainiem, karika am uusilaa inangari nipaopao.

<sup>19</sup> Uunguaa sesa ninannaa masalike avalua toko va: nialai salosaloaa see, me voto karika raarangisana, me tani nim anna tani ghelei sesa voto,

<sup>20</sup> me tani kkauua tootoo goto, me uunguaa nialala, me tani sessai, me nitam niaighui, ninannaa saasakiaa, me tau nitoka sessai, me tani nnainio nonga, me niaitiuui poli ase ninannaa,

<sup>21</sup> me nissaii, me tani toka nannaa saasakiaa tee kateva, me tani ropi sesa manu, me nivelu eitauua tani ropi me ghelei ssavoto, me mene kasina asease voto sesa. Aghaauliaa

**4:28:** Aitiuti 15:4-5; Rom 9:7.    **4:29:** Aitiuti 21:9-10; Jon 8:35.    **5:6:** 1 Ko 7:19; Gal 6:15.    **5:9:** 1 Ko 5:6.

**5:10:** Gal 1:7; 2 Ko 11:15.    **5:13:** 1 Pita 2:16.    **5:14:** Lev 19:18; Rom 13:9.    **5:17:** Rom 7:15-23.    **5:19:** 1 Ko

kieimim nongina aghe aulia ngakasinala etaimim, va lo atoa la tokatoka avalua o, karika aue la kipi sso tale ararimangalina ateva God.

<sup>22</sup> Me uene Spiriti eteva tale niaielousi, nimasimas, me luei, me karika nisessai parasi, me nigheli masi voto ta mene kateva, me niparruu, me tani kaarasi tani ghelei emasina niungu,

<sup>23</sup> me uunguua tani siuua ninannaa, me tani ghelei nannaam enna ngamasina. Karika righi inangari nipaopao egheelei runga isaa o ase voto.

<sup>24</sup> Lo atoa kapuna ila Iesu Karisto, ngeila ghe uvi ematela ninannaa sesa me gheeleiaaira me aloaloannaairia tale aikotoo.

<sup>25</sup> Poli ita tokatoka tale Spiriti, ita kasu tee Spiriti eteva.

<sup>26</sup> Ita rau mene saeaa nannaaita me tani ghelei esessai kateva me tani nannaas saasakiaa tee mene kateva.

## 6

### *Tani sausi mene kateva*

<sup>1</sup> Kapughu etoa, arova lo ateva ange kipi ssola tale ssavoto, lo atoa am aimuli tee Spiriti eteva am sama amasinaaili teeia tani ghia oghia me emene oghi mae. Me utani taatara ta io tee urau sso tale nitootoonga va ukattu.

<sup>2</sup> Am sausi tani sau voto maateaili tale mene kateva maamauluaane me tale isaa o voto, am rooroo tani ghelei ekapa voto tale inangari nimae aitauaa kanna Karisto.

<sup>3</sup> Poli arova teva eannahaa va ia iaaili, nau eteva ia nim lao ia, ia enim kamekamea.

<sup>4</sup> Kateva kateva etoongi voto egheelei me emasimasieinia. Erau mene tootoonga tani toongi gheeleiaane ta mene kateva taumattu.

<sup>5</sup> Poli kateva kateva esau voto maate tale gheegheleiaane.

<sup>6</sup> Lo ateva eghaaghhaa masi voto tale inangarina ateva God, eparruu lo ateva eapasinga voto etana tale righi masi peina.

<sup>7</sup> Am rau mene aikameinam poli karika am rooroo tani kame tee God. Taumattu emukemuke voto epasapasa.

<sup>8</sup> Lo ateva epasapasa voto sesa tale maamauluaane tani amasimas nannaane sesa, tale isaa o voto sesa aue emuke voto sesaaili. Lo ateva epasapasa voto masina tani amasimas Spiriti eteva, aue emuke maulue ateva tokatoka liu ia tale Spiriti eteva.

<sup>9</sup> Karika ita mene sio asoasoaa tani ghelei voto masina, poli aue kateva masi nau aue ita muke masi voto, arova ita tam mangoo.

<sup>10</sup> Liuna avalua o me nau ita roo tani ghelei voto masina tale taumattu ngakapa atoa, ita ghelei tee lao ta lo atoa ila elome ta llo taumattu eaiesoaa.

### *Airiuruu tale inangarina Pol*

<sup>11</sup> Am tara mata nginangari aghe piti enamuula!

<sup>12</sup> Lo atoa la nim annaa va taumattu ngatoa la tara eeleiaaira la tani aakorokoron-ganaiem va la isoim. La gheelei voto o poli karika la aloanna va taumattu ngatoa la ghelei saasakiaa etaira mausi aikotoo ateva ta Karisto.

<sup>13</sup> Lo tee atoa isoiso ila, karika la aimuli tee inangari nipaopao, me la nim anna va la isoim me la ghaasake tani ghelei arariira mausi voto la gheelei tale vilikiimim.

<sup>14</sup> Me ta ngetaghi, karika poi arooroo tani aasakeainaghi, aghaasakeaa nonga aikotoo ateva ta Vau eteva Iesu Karisto. Poli ta ngetana me kosa ateva ang ghe matela tale maamauluaaghi me aghi tale kosa ateva.

<sup>15</sup> Karika righi uunguua ni-isoiso atea me nitam iso atea. Tani lutu aouna nonga koronna ia.

<sup>16</sup> Lo akapa atoa la aimuli tee llo aghe auliaala aue la ghia luei me masi nialousiusi, tee me lo atoa Israeli kapuna ila God.

<sup>17</sup> Karika teva emene tau mae maate etaghi, poli asausau tauramoramoa eaapasinga va aghi tau ngai uungu ieghi ta Iesu.

<sup>18</sup> Alooalo sae va maamasinaane ateva Vau eteva Iesu Karisto aue etoka tee lo ateva spiriti etaimim, kapughu etoa. Koronnaaili.

## Uru ngai etikirighi Pol ghe pitiela ta alpires atoa Inangari emuemua

Ipires kinatama masaliki taatara ia tale provinsi eteva eEisia, tale patunganue namu ngeleva ghaine ita aseasea va Teki. Pol ghe tokala elpires kotoluae ninamanama (Apostolo 19) tale unna aiaakotonna atae nikasu, me masi kiukiu ghe kasu ekapa seela tale provinsi eteva eEisia. Katoa tau ngaisesoa elpires ajiu ila, me oroi ila lo atoa karika ajiu ila. Tale ia o uru ngai etikirighi, Pol ghe apasungaala va ajiu etoa me tau ngeleka atoa kateva nonga ila, poli ita akapaa ilauvanina ita Karisto. Karika mene righi niaipolapolaaii ta ajiu etoa me tau ngeleka atoa, poli matemateane Karisto ghe apalala ia o niaipolapolaaii eteae. Tau ngaisesoa ngakapa atoa la tani toka tee katoa tale masi nitoka, tale femili, ale manga, me niuwungu. Pol ghe pitila inangari ita akapa ita kilakila, tale ghinna niauvii kannna God.

### **Tani kila amuemua**

Aitiutiu tale inangari 1:1-2

God ghe ghelei ekatevaitala ta Karisto 1:3-3:21

Vaaluua tani toka nongina ouna ateva taumattu 4:1-6:20

Airuuruu tale inangari 6:21-24

<sup>1</sup> Aghi, Pol, kapuna apostolo ieghi Iesu Karisto, tale aloannaane God.

Apitipiti etaimim kapuna taumattu ngatoa God, am tokatoka elpires,\* am aiesoaa ta Iesu Karisto.

<sup>2</sup> Alooloo sae va maamasinaane me luei ekasukasus ta God Tamaita ia me Vau ngepona ateva Iesu Karisto aue etoka teeiem.

### *Niarangise manga, isaa ta Karisto*

<sup>3</sup> Ita tau sae God, kapuna Goto ia kapuita Vau eteva Iesu Karisto, me tee Tamane ia, ghe arangiseitala tale masi voto akapa tani sausi kapuita spirit. Isaa o masi voto ghe mae sio epona liu ta Karisto.

<sup>4</sup> God ghe suimatoongainitala ta Karisto me auena aitiutiu tale kosa ateva va ita manga me ita raarangisana ta matane elome tale niaielousi.

<sup>5</sup> Emua arau ghe suimatoongainitala va aue egħħajita me enatuna ita mausi Iesu Karisto, poli ghe masimacieiniela me ghe aloannala tani ghelei evalua o.

<sup>6</sup> Liunaavalua o me ita tau sae God tale kinatama maamasinaane, ghe nim tau mae sio etaita tale Natuna eaielousieinu.

<sup>7</sup> God ghe poli aaoghitala tale matemateane Iesu, me ghe kkaluaala kaluita ssavoto, poli God pasu ia tale maamasinaane etaita,

<sup>8</sup> me ghe tau mae sio oroieili maamasinaa me ghe gheleitala va ita alomasaanga, me ita rooroo tani kila voto koronna kannna God.

<sup>9</sup> God ghe apasungaala etaita voto aisulianna eanna tani ghelei, poli ghe masimacieiniela, me ghe aloannala tani ghelei isaa o voto ta Karisto.

<sup>10</sup> Ghe aloannala va nau eteva ghe suimatoongainielu, aue eatoka aitauua isaa akapaa ilu voto epona liu me tale kosa ateva oia, ya Iesu aue emuemueaa.

<sup>11</sup> Ta ngetana God ghe suimatoongainiemmila va ami kapuna taumattu iemami, poli ang ghe nnaa vella emua arau tani ghelei isaa o voto, me God egħeelei isaa akapa voto nongina aloannaane.

<sup>12</sup> Ghe suimatoongainiemmila poli ghe aloannala va ami lo atoa ami ghe aitiutiula tani aiesoaa ta Karisto, ami tau sae inasanina God.

<sup>13</sup> Me am tee ange kapuna iemla God, nau ngam ghe aiesoala kiukiu koronna, ia o masi kiukiu eteae eaauliaja vaaluua God ghe asaangiela. Nau am ghe aikaaiaala ta Karisto, God ghe aimatoongainiemla va kapuna am: ghe tau aatu sio Spirit Manga ateva tale inangari nialokoi.

<sup>14</sup> Spirit Manga ateva ia aitiutiu eteva aipolipoli, tani apasunga va aue ita għha sa ateva God ghe aulja nglakojela tale inangari nialokoi, va aue etauela ta kapuna taumattu ngatoa. Isaa avalua o me God aue egħha oghi lo atoa kapuna ila, me aue ita tau sae inasanina God.

---

\* 1:1: Apo 18:19-21; 19:1.      \* 1:1: Kasina uru ngai lagħe pitila, karika lagħe pitila va am tokatoka elpires.      1:3: Ips 2:6.      1:4: Jon 15:16.      1:5: Jon 1:12.      1:7: Ips 2:7; Kol 1:14.      1:9: Rom 16:25.      1:10: Kol 1:16, 20.      1:11: Rom 8:28-29.      1:14: 2 Ko 1:22.

*Nikaili emasina tale nilooloo sae*

<sup>15</sup> Mausina avalua o me nau aghe nongola uneimim niaikaiaia ta Vau eteva Iesu me ailousiaaimim ta kapuna taumattu ngakapa atoa God,

<sup>16</sup> karika aghe kakkalueinam tale nilooloo sae, tani kaili emasina ta God mausiiim.

<sup>17</sup> Me alooloo sae ta kapuna God ateva Vauita ateva ta Iesu Karisto, ia Tamaita ia etokatoka tale mallanga ateva. Akookolomi va etaui aatu Spiriti eteva tani gheleiem me am alomasaanga me Spiriti eteva aue eapasunga ngaotu God etaimim me aue am roo tani kila amasinaia.

<sup>18</sup> Me akookolomi tee va eoti nannaaimim me aue am atoka amuemue nannaaimim tale voto ghe koloamla etana me vaalua ooroi ia kanna niarangise ghe auliaala tale inangari nialokoi va aue etaula ta kapuna taumattu manga.

<sup>19</sup> Me akookolomi va am kila vaalua kinatama sarasarakaniaane ateva euungu elome etaita lo atoa ita aikaiaia. Ia o sarasarakaniaane ateva euungu elome etaita korokoronganaaili ia,

<sup>20</sup> ghe uungula etana nau ghe totula Karisto tale nimate, me ghe atokaiela tale pai muenna atelange epona liu.

<sup>21</sup> Karisto ia namuu ia ta ensolo akapa atoa me spiriti ekapa atoa, me ia emuemuea ngakapa tau ngaitoitai etoa nau ghaine me auena.

<sup>22</sup> God ghe tau ekapa lao sio ninamu ngateae ta Karisto me ghe suoiongainiela va emuemuea ngakapa voto tale ale manga.

<sup>23</sup> Ale manga ateva vaulanina ia Karisto, me ia ghe apasula ale manga ateva tale sarasarakaniaane, me ghe tau lao sio maulue ateva tale isaa akapaaili voto tale isaa akapaaili salana.

## 2

*Ita ghe mene mauluela ta Karisto*

<sup>1</sup> Emua arau am ghe tokatoka tale nimate tale kaluimim nitam nongo usilaa me ssavoto.

<sup>2</sup> Tale isaa o nau am ghe aaimuli tee uunguaa kosa ateva oia karika masina. Am ghe aaimuli tee uunguaane lo ateva emuemueaa uunguaaira sesa spiriti etoa epona elomarase. Isaa o sesa spiriti ghaine ekaakatulaa isaa o taumattu karika enonganongo usilaa God.

<sup>3</sup> Nau ang ghe lao sio ita ghe tokatoka nongina ila. Ita ghe aaloanna tani amasimasi sesa aaloanna vilikiita me nannaaita. Me ita ghe roola tani ghaa sessaaiane God.

<sup>4</sup> Me karika, ta God ghe aielousiangailiita, me pasueili ia tale aalousiusiaane. Liuna avalua o

<sup>5</sup> me nau ita ghe tokatoka tale nimate tale kaluita nitam nongo usilaa, ghe ghelei emaulueitala ta Karisto. Tale maamasinaane God am ghe saangala.

<sup>6</sup> Ghe totutala tani maulue tee Karisto, me ghe atoka aitiaeintala me Karisto Iesu epona liu.

<sup>7</sup> Ghe apasungaala etaita aalousiusiaane tale isaa o salana ta Karisto Iesu, me tale isaa to nau emaemae, taumattu ngatoa aue la tara maamasinaane namungaili, elaulau ekapa voto atoa.

<sup>8</sup> Poli tale maamasinaane, am ghe saangala tale niaikaiaia, me karika va tale sarasarakaniaaimim, ta God ghe nim tau mae sio.

<sup>9</sup> Karika va am ghe uunguala va am roo tani aasake.

<sup>10</sup> Poli ita, God ghe gheleitala. Ghe tau mae sio maulue etaita ta Iesu Karisto tani ghelei masi niuungu God ghe aimonomonosia ngalokoila etaita tani ghelei.

*Kateva nonga ita ta Karisto*

<sup>11</sup> Liuna avalua o, am annaa parasi va nau ang ghe lao sio, nau am ghe lutula, karika va ajiu iem, ta am tau ngeleka am, me lo atoa la aseasela va “isoiso ila” laghe kolokoloam va “karika isoiso iem”. (Isaa o voto la gheelei ta vilikiira, nim taumattu ngatoa la gheelei me karika va God.)

<sup>12</sup> Isaa akasina am ghe maamasau ta Karisto. Am karika taumattu nge Israeli em, ta ativuu iem tale kanna inangari niaippooa ngaitauua tale inangari nialokoi, ta am ghe tokatoka tale kosa ateva oia me karika am ghe kilakila God, me karika righi masi voto am ghe toitoi.

<sup>13</sup> Me ghaine ta Karisto Iesu am lo atoa am ghe maamasau tali God, ngam ghe mae

akalakalaa sio poli raena ateva Karisto.

<sup>14</sup> Poli ia luei ia etaita, ghe gheleila ajiu etoa me taumattu ngeleka atoa laghe kateva nongala. Niaissa ghe tokatoka arova aivativati eteva, me Karisto ghe ghaa veluela,

<sup>15</sup> tale matemateaane, ghe atoka lange sio mua kaluira inangari nipaopao ajiu etoa, poli nannaane tani ghelei eouna taumattu ngalua, ajiu etoa me taumattu ngeleka atoa, tani kateva nonga, me tale ia o salana atikirighi aue eghelei luei.

<sup>16</sup> Ghe matela tale aikotoo tani atoka aitauaa pai eluevilau va lalu kateva nonga me ekapuna ilalua God, me tale aikotoo ghe ghelei ematela uunguua niaisesessaii ghe tokala emua arau.

<sup>17</sup> Ghe mae sio tani aulia ngaotu luei etaimim lo atoa masuaeili em ta God, me luei ta lo atoa kalakalangina ila.

<sup>18</sup> Poli tale matemateaane ita akapa ita roroo tani mae ta Tamaita ateva God tale kateva nonga Spiriti.

<sup>19</sup> Liuna avalua o me lo atoa karika ajiu iem, ghaine karika ativuu iem, ta ita tokatoka tale kateva nonga ararimangali, ararimangalina ia God. Am elome tale natuna atoa God.

<sup>20</sup> Am nongina ale ateva, God ghe atuluela epona ta apostolo atoa me propete atoa nongina suena atoa, me Iesu Karisto ia aitiutiu eteva suena la aipatolaa lao etana.

<sup>21</sup> Ta Iesu ia akapa ale ateva eaaipatolaa me esaesae aitauaa me manga ia ta Vau ngepona ateva.

<sup>22</sup> Me ta ngetana am tee am aipatolaa tee ajiu etoa, me am tokatoka aitauaa tee Iesu, me God aue etoka aitauaa teeiem tale kanna Spirit Manga ateva.

### 3

#### *Pol ghe uungu ta taumattu ngeleka atoa*

<sup>1</sup> Liuna avalua o aghi, Pol, tau karavusu ieghi mausi Iesu Karisto, me poli mausiiimim taumattu ngeleka atoa, aoololo sae ta God.

<sup>2</sup> Aghaaiesoaa va ngam ghe nongola va tale maamasinaane God ghe tau mae sio etaghi uunguua nippooaa mausiiimim.

<sup>3</sup> Nongina ngapiti ekasinala tale ia oio uru ngai etikirighi, karika apiti aaoroila vaalua voto aisulianna God ghe apasungaala etaghi.

<sup>4</sup> Nau am riti isaa o voto aghe pitila, aue am kila vaalua kilakilaaghi tale voto aisuliaane eaulia Karisto.

<sup>5</sup> God karika ghe apasungaala ta llo akasina atoa vituu emua arau, me ghaine tale kapuna Spirit Manga ateva ange aapasunga ta kapuna apostolo atoa manga ila me tee propete atoa.

<sup>6</sup> Voto ateva aisulianna ia, ia avalua toko: va poli taumattu ngeleka atoa la aikaaiaa tale masi kiukiu eteae, la roroo tani ghaa aitauaa masi voto kanna God tee Israeli etoa, me tee ekateva nonga ita tale vaulaniita me ita akapa aue ita ghaa llo voto ghe auliaala tale inangari nialokoi ta Iesu Karisto.

<sup>7</sup> Tale maamasinaane, God ghe tau mae sio ia oia niuungu eteva tani ppooaa masi kiukiu eteae. Ghe ghelei evalua o tale uunguaane sarasarakananaili.

<sup>8</sup> Arongona ta aghieili euu ta kapuna taumattu ngakapa atoa God, ia oia maamasinaane ateva God ghe nim taue mae sio etaghi: tani aulia ngaotu ta taumattu ngeleka atoa isaa o masi voto ta Karisto karika ita roroo tani kila akapa.

<sup>9</sup> God, ia o ghe ghelei ekapaailila voto, ghe suimatoongainaghila tani aulia ngamaslikangaili ta ila akapa taumattu ngatoo ia oia voto ateva aisuliaane ia. God karika ghe apasungaala voto aisuliaane lomosina ta ghaine.

<sup>10</sup> God ghe nnaala va tale isaa oia nau ensolo akapa atoa me spiriti etoa elomarase aue la tara kinatama aalomasaanganiaane God tale kapuna taumattu ngatoo.

<sup>11</sup> God ghe nnaala va aue eghelei evalua o ta Karisto Iesu kapuita Vau ia me avirina ghe vira gheleila kosa ateva.

<sup>12</sup> Ita roroo tani lao ta God me ita rau mene matautu tani lao etana, poli ita aaiesoaa ta Karisto me ita tokatoka aitauaa teeia.

<sup>13</sup> Liuna avalua o, akookolomiem va am rau mene sio asoasoaa tale voto maate aghaaghhaa mausiiimim, poli isaa o nonga voto me aue am roo tani aasake.

<sup>14</sup> Mausina avalua o me asusuusuaa sio ta Tamaita ateva,

<sup>15</sup> ia ghe gheleila pamili ekapa atoa epona liu me tale kosa ateva. Liuna avalua o me la ghaaghhaa maulue ta God.

<sup>16</sup> Aloooho sae va tale aarangiseaane namungaili, ia aue eakorokorongana urunguitani imim tale sarasarakaniaane kapuna Spiriti eteva.

<sup>17</sup> Me aloooho sae va aue Karisto erooro tani toka tale urunguitaniimim tale niaikaiaia. Me aue am tingina akorokorongana tale niaielousi nongina ai eteae oane eakorokoronganaia,

<sup>18</sup> me am me kapuna taumattu ngakapa atoa God aue am ghaa sarasarakan tani kila nongina vaalua naanamungaane, aaluseaane, maamasauaane sae me siosio liuaane, aielousiaane ateva Karisto.

<sup>19</sup> Me aloooho sae va aue am kila ia o aielousiaane ateva Karisto elaulau isaa akapa alomasaanga, me gheeleiaaimim aue elao aitauaa tee gheeleiaane God.

<sup>20</sup> Ita tau sae God tale sarasarakaniaane, erooro tani ghelei oroeiili asease voto elaulau voto ita rooroo tani kolomi me nnaa. Ia o sarasarakan ateva euungu elome etaita.

<sup>21</sup> Liuna avalua o me ita tau sae God elome tale ale manga me tee Karisto Iesu tale ila akapaili vituu etoa tale nau ekapaili etoa. Koronna.

## 4

### *Ita uungu eitauaa tee Karisto*

<sup>1</sup> Me agni Pol, tau karavusu ieghi mausi Iesu Karisto, aghaaulia ngakorokorongana etaimim va am toka amasina tani apasunga va God ghe koloamla.

<sup>2</sup> Am kaarasi tani sioaa nannaimim, aippooaaimim esaghuihuiena, me erau mene sessai parasiem, me arova kateva eghelei saasakiaa etaimim, am kkaluaa gheeleiaane me am nim aielousieinia.

<sup>3</sup> Am tootoonga tani poso parasi uunguua nitoka aitauaa kanna Spirit Manga ateva egheelei tale luei.

<sup>4</sup> Ita kateva nonga ita nongina vaulanita ateva, me kateva nonga ia Spiriti eteva. Tale ie nonga o salana atikirighi God ghe koloamla tale kateva nonga ia nitaatara lao emua.

<sup>5</sup> Katega nonga ia Vau eteva, me kateva nonga ia niaikaiaia ngateva, me kateva nonga ia niasuu eteva.

<sup>6</sup> Katega nonga ia God ateva Tamaita akapa ia, me ia emuemuaa taumattu ngakapa atoa, me euungu etaita akapa, me etokatoka elome etaita akapa.

<sup>7</sup> Me Karisto ghe tau mae sio ta kateva kateva etaita maamasinaane me tale aloaloanaane etautau mae voto ealona tani tau mae.

<sup>8</sup> Liuna avalua o me Uru ngai Manga ateva eue va,

“Nau eteva ghe laa saesae

ghe muamuaala tau karavusu etoa

me ghe tau lao sio masi voto atoa ta taumattu ngatoa.”

<sup>9</sup> Vaalua mallooeana va ghe saela epona liu? Mallooeana va ghe sio mae akasina mua tali kosa ateva.

<sup>10</sup> Ia ghe sio mae epona liu, ia ghe laa sae kasu elomarase, me erooro tani toka tale voto akapaili.

<sup>11</sup> Ia ghe taula sarasarakan va katoa la roo tani apostolo, me katoa la propete, me katoa la tau ngai ppooa, me katoa la pasta me la tau ngai aapasinga.

<sup>12</sup> Ghe gheleila llo tani aipanipanliaa kapuna taumattu God, tani uunguua uunguaane, liuna avalua o me vaulanina ateva Karisto\* ekorokorongana me etoka amasina,

<sup>13</sup> lomosi ta ita akapa ita mae aitauaa tale kateva nonga niaikaiaia, me tale alomasaanganiaane Natuna ateva God, me ita matuenna me ita nongina Karisto.

<sup>14</sup> Me karika ita mene nongina natu ngaliki etoa, va ila o lo atoa muenna ila tani aikameea la toka kamekameta see nongina kotoo ateva me kuukuu eteva evebbeitia see, me la gheelei asease inangari etoa tani apasunga me tani kame mene katoa taumattu.

<sup>15</sup> Liuna avalua o me ami aaulia ngakoronna tale niaielousi, va tale isaa akapa voto ita gheelei, ita gheelei etana, ta ia Karisto uruita ia.

<sup>16</sup> Eposoposo aitauaa vaulanina ateva Karisto me epiipinosa amasina, arova kateva kateva etaita egheelei uunguaane. God eaaloanna isaa akapaili voto tale vaulanina ateva Karisto va la aipatola ngaitauaa tale niaielousi.

### *Am toka nongina taumattu tale mallanga atoa*

**3:17:** Jon 14:23; Kol 1:23; 2:7.    **4:1:** Kol 1:10.    **4:2:** Kol 3:12-13.    **4:3:** Kol 3:14-15.    **4:6:** 1 Ko 12:6.    **4:7:**

Rom 12:3, 6.    **4:8:** Sams 68:18.    **4:9:** Jon 3:13.    **4:11:** 1 Ko 12:28.    \* **4:12:** vaulanina ateva Karisto Utara Ipises 1:23.    **4:13:** Kol 1:28.    **4:15:** Kol 1:18; 2:19.

<sup>17</sup> Liuna avalua o me aghaloannaaili va tale ararina atae Vau palepale am rau mene kasu nongina taumattu ngatoa karika la aiesoaa, me nannaaira nim lao.

<sup>18</sup> Nannaaira saurromiena, la maamasauailei ta maamaulaane God, poli urunguitaniira korokorongananaaili, liuna avalua o me karika la kilakila God.

<sup>19</sup> Karika la paapalata, liuna avalua o la nim anna tani ghelei sesa voto, me la ghannaaili tani toka gheelei asease voto karika raarangisana.

<sup>20</sup> Am karika va am ghe kilala Karisto tale isaa o ase salana.

<sup>21</sup> Koronnaaili, am ghe nongola etana, me laghe aaulieinia etaimim va voto koronna isaa ta Iesu.

<sup>22</sup> Laghe apasungaala ta ngetaimim va am ghaa velu poka gheeleiaaimim ang ghe lao sio, me am ghaa velu pokane ateva taumattu ang ghe sesala tale aloannaane kamenia.

<sup>23</sup> Me am tau velu God eghelei eouna gheeleiaaimim me nannaaimim.

<sup>24</sup> Me am mene atoka ouna ateva taumattu God ghe gheleielia va enongina God. Me gheeleiaaimim aue eghulughuluena me emanga poli am tokatoka tale llo koronna.

<sup>25</sup> Liuna avalua o me kateva kateva etaimim eghaa velu nikamekame, me eaippooa ngakoronna tee lo atoa ita aiesoaa ngaitauaa ta Karisto, poli ita akapaaili kateva nonga ita.

<sup>26</sup> "Nau ange sessaiola, urau mene tau velu sessaaam va egheleio me ukupi sso tale ssavoto," me erau mene toka sessaoa ta kateva nau lomose ta sinaka ateva esuu,

<sup>27</sup> ta Satana erau tingina akorokoronganana tani akatungio.

<sup>28</sup> Lo ateva eaainao nonga eruu tani ainao, me etiuua tani uungu tani ghelei masi voto esausi lo atoa la ghaloanna niaisausii.

<sup>29</sup> Am rau mene auliaa righi voto tani ghelei saasakiaa kateva taumattu, ta am auliaa nonga masi voto aue esausi lo atoa la anna niausa, me am akorokoronganaila.

<sup>30</sup> Karika am mene ghelei alousiusi kapuna Spirit Manga ateva God, poli ia eaaimatoonga va am kapuna am God me aue eghaa oghiem.

<sup>31</sup> Am ghaa velu sesa niateateaa, me nisessaia etiituaa elome me eghooa eleka, me niauvii, me niauliaa saasakiaa, me tee issaa akapaaili sesa gheeleiaaimim.

<sup>32</sup> Am ghelei masi voto ta mene katoa, me am apasunga niaielousi, me am kkaluaala sesa gheeleiaaira katoa, nongina God ghe kkaluaala kaluimim sesa voto ta Karisto.

## 5

<sup>1</sup> Liuna avalua o, me am usilaa gheeleiaane God, poli am natuna am God, me eaaielousiangulariiliem.

<sup>2</sup> Me am tokatoka tale maulue ateva pasu ia tale niaielousi, nongina Karisto ghe aielousieinitala me ghe tau mae sio maamaulaane ta ngetaita nongina lo ateva o aiaavusuvusuena egheelei emasimasi God.

<sup>3</sup> Me elome ta ngetaimim karika am mene toka tale uunguua niailai salosalooa see, va taumattu ngatoa la toka aulieinam, o righi ase niuungu karika raarangisana, o nikuruetu, poli issaa oia voto karika masina ta kapuna taumattu God manga.

<sup>4</sup> Karika mene righi niamatakata, o niaippooaa alokapakapanna, o ase inangari niaikusi. Karika, ta am kaili emasina tale voto masina.

<sup>5</sup> Me tale issaa oia voto am rooroo tani kila amasina va: lo ateva eailai salosalooaa, me lo ateva etam raarangisana, me lo ateva esassaii voto (nim aikkauaa tootoo goto ia), issaa o taumattu karika aue la ghaa righi masi voto tale ararimangalina ateva Karisto me God.

<sup>6</sup> Karika am mene tau veluem va la kameam tale inangari karika koronna, poli sessaaane God ange maemae ta lo atoa karika la nongongo usilaa.

<sup>7</sup> Liuna avalua o me karika am mene aighui teeila tale sesa gheeleiaaira.

<sup>8</sup> Poli issaa akasina am ghe tokatoka tale saurrom, me ghaine am, mallanga iem ta Vau ngepona. Am toka nongina aliki tale mallanga iem.

<sup>9</sup> (Poli mallanga ateva eaalutu voto masinaaili, ghulughuluena me koronna.)

<sup>10</sup> Me am tani ghaa alomasaanga va sa ateva egheelei emasimasi Vau ngepona ateva.

<sup>11</sup> Karika am mene kupi sso tale uunguua saurrom ateva karika righi uenenna, ta am mae aulia ngautou ia o ase niuungu tale tummatavanga.

<sup>12</sup> Poli pei palata tani auliaa voto la gheelei eisulia tale tummatavanga.

<sup>13</sup> Ta voto akapa tale saurrom, mallanga ateva aue egheelei eotu,

<sup>14</sup> poli mallanga ateva egheelei isaa akapaaili voto eotuotu. Liuna avalua o me laghe uela ta lo atoa taumattu karika la ghiaiesoaa va,  
“Am anguu taatarala, tau niasekanue atoa,  
    am totula tale nimate,  
me Karisto ave emallanga ta getaimim.”

<sup>15</sup> Am tani aitaraa vaalua am tokatoka – karika va nongina lo atoa karika alomasaanga ila, ta nongina alomasaanga atoa.

<sup>16</sup> Nau urooroo tani ghelei voto masina, ughelei voto masina urooroo tani ghelei, poli nau oia sesa nau.

<sup>17</sup> Liuna avalua o, me karika am mene alokapakapa, ta aloimim emasaanga aloaloanaane Vau ngepona ateva.

<sup>18</sup> Karika am mene ropi oroieili uaeni va eghelei esavisavilaa nannaaimim, me ave ekatulainiem lao tale voto sesaaili. Karika, ta am pasu tale Spirit Manga ateva.

<sup>19</sup> Am aippooaa tee kateva kateva tale nikkinari, me masi kkinari tani kkinari tau sae, am kkinari me am ghelei musik tale urunguitaniimim esae ta Vau ngepona ateva.

<sup>20</sup> Nau ekapa am kaili emasina sae ta God Tamaita ia tale isaa akapaaili voto, tale ararina ateae Iesu Karisto Vauita ia.

<sup>21</sup> Am tau veluem tani ghelei voto katoa la ghaaloanna me karika va aloannaaimim, tani oneoneaa Karisto.

#### *Vause atoa me taita atoa lailai ila*

<sup>22</sup> Vause atoa lailai iem, am tau veluem tani ghelei voto taitaniimim atoa la ghaloanna me karika va aloannaaimim, nongina am gheelei ta Vau ngepona ateva.

<sup>23</sup> Poli taita ateva uruna ia vausenna ateva nongina Karisto uruna ia ale manga ateva, me ale manga ateva vaulanina ia. Ta Karisto ghe asaangitala.

<sup>24</sup> Nongina ale manga ateva eaatoka nannaane ta Karisto, vause atoa lailai iem tee am aatoka nannaaimim ta taitaniimim atoa tale isaa akapaaili voto.

<sup>25</sup> Taita atoa lailai iem, am aielousiaa vauseniiim atoa, nongina Karisto eaaielousiaa ale manga ateva, me mausina me ghe tau lao sio maamauluaane

<sup>26</sup> tani gheleie manga ia me raarangisana ia, eghe poraiela tale inangari eteva me tale manu eteva.

<sup>27</sup> Ghe ghelei evaluela o tani ghia lo ateva o ale manga masinaaili taataraane, me karika righi tungitungiena, o kolokoluena, o righi voto egheelei saasakiaa taataraane, ta manga ia me karika righi voto sesa etana.

<sup>28</sup> Tale ia o ase salana atikirighi, taita atoa am tani aielousiaa vauseniiim atoa, nonginaaili va am aaielousiaa vilikiimim. See eaaielousiaa vausenna ateva, eaaielousieinia.

<sup>29</sup> Karika teva esessaiai tale vilikina ateva, ta eangiinginia me eaaitaraa vilikina, nongina Karisto egheelei tale ale manga ateva.

<sup>30</sup> Ta ita, vilikina ita Karisto.

<sup>31</sup> “Liuna avalua o me taita ateva ekasukasu vuli tamane me kinna me ekaakateva nonga iluua me vausenna ateva, me ilalu aue lalu kateva nonga tale vilikiirua.”

<sup>32</sup> Isaa oia llo karika ita rooroo tani kila akapa malloeanina, me aghi aghauliaa Karisto me ale manga ateva.

<sup>33</sup> Liuna avalua o, kateva kateva ta getaimim etani aielousiaa vausenna ateva, nongina etani aielousieinia, me vausenna ateva etani oneoneaa taitanna ateva.

## 6

#### *Aliko etoa me tamaira me kinaira atoa*

<sup>1</sup> Aliko etoa, am nongo usilaa tamaim me kinaim atoa, poli am kapuna iem Vau ngepona ateva, me isaa o voto ghulughuluena.

<sup>2</sup> “Uoneoneaa tamam me kinam,” – ia oia inangari nipaopao ateva, aitiutiu ia tale llo inangari nipaopao elaoao aitauuaa tee inangari nialokoi –

<sup>3</sup> “me isaa akapaaili voto ave emasina etam, me tee tokatokaam ave aluse tale kosa ateva oia.”

<sup>4</sup> Lo atoa taita natuena am, am rau mene ghelei natuim atoa va esessaila, ta am apinosaila tale masi salana, me tale alomasaanga me tale niapasunga Vau ngepona ateva eaaloanna.

**5:14:** Ais 26:19; Rom 13:11.   **5:15:** Kol 4:5.   **5:18:** Luk 21:34.   **5:19:** Kol 3:16.   **5:20:** Kol 3:17.   **5:21:**

1 Pita 5:5.   **5:22:** Kol 3:18; 1 Pita 3:1.   **5:23:** 1 Ko 11:3; Ips 1:22.   **5:25:** Kol 3:19; 1 Pita 3:7.   **5:26:** Tts 3:5.

**5:27:** 2 Ko 11:2; Kol 1:22.   **5:31:** Aitiutiu 2:24; Mat 19:5.   **5:32:** Autu 19:7.   **6:1:** Kol 3:20.   **6:2:** Diut 5:16.

**6:4:** Kol 3:21; Sams 78:4; Nitoka 22:6.

*Tau ngai uungu etoa karika la tokatoka tale aloannaaira, me vauira atoa*

<sup>5</sup> Tau ngai uungu etoa karika am tokatoka tale aloannaimim, am nongo usilaa lo atoa la aitoieiniem tale kosa ateva oia, me am oneoneainila tale urunguitaniimim akapa ateva nongina va am nonganongo usilaa Karisto.

<sup>6</sup> Me karika am mene nnaa va nau la taataraiem nonga, karika. Poli am tau ngai uungu iem ta Karisto me karika am tokatoka tale aloannaimim. Liuna avalua o, tale urunguitaniimim akapaaili, am uungu aanasa tani ghelei saa voto God ealoanna va am ghelei.

<sup>7</sup> Am nnaaili tani uungu tee nimasimasi, nongina va am uungu ta Vau ngepona ateva me karika va taumattu ngatoa.

<sup>8</sup> Arova tau ngai uungu io utokatoka tale aloannaam o karika, ukilakilaaili va Vau ngepona ue eta au aipolipolim tale masi niuungu ugheelei.

<sup>9</sup> Me vau etoa, karika emene aloimim nonga ta katoa tana kapuimim tau ngai uungu karika la tokatoka tale aloannaaira, me am rau mene amatautula, poli am kilakila va lo ateva Vauira ia me Vauimi ia tee, ia epona liu. Ia karika egheelei tani anna katoa me katoa karika.

### *Ghinna niaiuvi kanna God*

<sup>10</sup> Airuuruu tale inangarighi, isaa avalua toko va, am toka akorokorongana ta Vau eteva me tale kinatama sarasarakaniaane.

<sup>11</sup> Am asae akapaaili ghinna niaiuvi kanna God, me ue am roo tani tingina akorokorongana tale sesa uunguaane namu ngateva ta raroai etoa. <sup>12</sup> Karika va ita aaiuvii tee taumattu, ta ita aaiuvii tee asease spiriti etoa epona me euu, me asease sarasarakanita tam taatara, me asease voto atoa sarasarakanaili ila pei saurrom, ghaine la aitoiaa kosa ateva oia.

<sup>13</sup> Liuna avalua o me am asae akapaaili ghinna niaiuvi kanna God me tale nau sesa, ue am roo tani tingina akorokorongana. Me nau ta ngam aipanipania ngakapaailila am roo tani tingina.

<sup>14</sup> Liuna avalua o me am tingina akorokorongana me am iriem tale ai-iri eteae tale voto koronna nonga etaliaa usueimim, me am asae tee tuku kapa ateva eaakou runga kassauimim, eaaimatoonga niuungu ghulughuluena.

<sup>15</sup> Me tale kkeimim, am asae aikasukasu tani aimonomonosieinam tani ppoaa masi kiukiu luei etana.

<sup>16</sup> Me tee am ghaa aighelei runga vaalau eteva eaimatoonga niaikaiaa, poli ta getana ue am roo tani apala isaa akapa unna vaalau sesa taumattu ngateva ataatana esoasoaa mae etaimim.

<sup>17</sup> Am ghaa kou nguru eteva egheelei runga uruim ateva, eaimatoonga niasaangi, me am ghaa baenata ateva unna ia Spiriti, ia o inangarina ia God.

<sup>18</sup> Am rau mene ainoana tani looloo sae mausi mene kasina taumattu. Nau ekapaaili am looloo sae tale asease nilooloo sae akapa, nongina Spirit Manga ekatulainiem. Am atae nau ekapaaili me am looloo sae mausi kapuna taumattu ngatoa God.

<sup>19</sup> Me am kookolomi tee ta God mausighi tani tau mae inangari etaghi nau ue appooaa, me arau mene matautu tani ppoaa ngaotu voto aisulianna tale masi kiukiu.

<sup>20</sup> Aghi aghaaghaa liuna ateva God tani ppoaa, me aghi tale ale mata voovoo, liuna avalua o am kokkolomi sae va arau mene matautu tani ppoaa, nongina God eaaloanna.

### *Airuuruu tale inangarina Pol*

<sup>21</sup> Tikikus ue eaulia ngakapa voto ghe ailutuaala etaghi me voto agheelei. Ia nengaghi tuungia ta Karisto, me aghailousienia. Ia kapuna tau ngai uungu ia Vau ngepona ateva, me egheelei emasinaaili uunguaane.

<sup>22</sup> Aghe sungiela tani mae taraiem poli aghanna va am kila etana va sa ateva elutulutu etaimami, me ue eakorokorongana urunguitaniimim.

<sup>23</sup> Alooloo sae va God Tamaita ia me Vauita ateva ta Iesu Karisto, ue eta lao luei, niaielousi, me niaiesoaa tale tau ngaisesoa ngakapa atoa.

<sup>24</sup> Me alooloo sae tee va maamasinaane ateva God ue etoka tale lo atoa la aaielousiaa Vauita ateva Iesu Karisto, tale lo ateva o niaielousi karika ekapakapa.

**6:5:** Kol 3:22-23; Tts 2:9-10; 1 Pita 2:18.    **6:8:** 2 Ko 5:10; Kol 3:24-25.    **6:9:** Kol 4:1; Rom 2:11.    **6:11:** Rom 13:12;

2 Ko 10:4.    **6:12:** 1 Pita 5:8-9.    **6:14:** Ais 11:5; 59:17; 1 Tes 5:8.    **6:15:** Rom 10:15.    **6:17:** Hib 4:12.    **6:18:**

Luk 18:1; Kol 4:2; 1 Tes 5:17.    **6:19:** Kol 4:3-4; 2 Tes 3:1.    **6:20:** 2 Ko 5:20; Plm 9.    **6:21:** Apos 20:4; Kol 4:7-8; 2

Tim 4:12.

## Uru ngai etikirighi Pol ghe pituela ta aPilipae atoa Inangari emuemua

Pilipae masaliki taatara namuu ia tale provinsi eteva eMesedonia, tale pai not tale namuu patunganua ateva ghaine ita aseasea va Gris. Pol ghe lao sio ePilipae tale aiaaghahuene ateva nikasu, me ghe atokala ale manga ateva etana (Apostolo 16). Masi niaikapukapuaa ghe tokatoka elome Pol me tau ngaisesoa ngatoa ePilipae. Laghe tau lao sio niaisausui etana oroaata nau ghe kasu ekapa seela tani ppooaa masi kiuki.

Nau Pol ghe pitila ia oia uru ngai etikirighi, arongona ta ghe tokatoka tale ale mata voovoo, ghe masimasi, poli ghe tarala va masi kiuki kannia ia God ghe mene laolao ta mene katoa taumattu. Pol ghe aloannala va tau ngaisesoa ngatoa la aimuli tee isaa o voto laghe tarala ta Iesu, me la rati lo atoa laghe ue va tau ngeleka atoa la tani ajiu mua, me lauenia la rooroo tani saanga. Ghe auliaala va aPilipae atoa la rooroo tani masimasi, me la rau mene nnangaili tale voto.

### Tani kila amuemua

Aitiutiu tale inangari me nikaili emasina 1:1-11

Masi kiuki elaulau maamauluaane Pol 1:12-26

Am toka me am kasu nonga tale masi kiuki kannia Karisto 1:27-2:18

Taita alua laghe uungu eitauaa tee Pol, Timoti me Epaproditus 2:19-30

Lo atoa la apasungu voto kamena 3:1-21

Inangari niloeloe 4:1-9

Pol ghe kaili emasinala tale niaisausui kaluira aPilipae atoa 4:10-20

Airuuruu tale inangari 4:21-23

<sup>1</sup> Angalua Pol me Timoti, kapuna tau ngai uungu iengalua Iesu Karisto,

Angalu pitipiti atu etaimim akapa lo atoa taumattu manga am ta Iesu Karisto ePilipae tee elda me rikina atoa.

<sup>2</sup> Angalu looloo sae va maamasinaane me luei ekasukasus ta God Tamaita ia me Vau ngepona ateva Iesu Karisto aue etoka teeiem.

*Nikaili emasinaaili me niloeloo sae*

<sup>3</sup> Akaakaili emasina ta kapughu Goto ateva nau ekapa atoa nau aghannainam.

<sup>4</sup> Tale isaa akapa uneghi niloeloo sae mausiiim akapa, alooloo sae tee nimasimasi

<sup>5</sup> poli niaighui me niuungu am gheelei tale masi kiuki ghe tiuaala tale aitiutiu eteva nau me ange mae ghaa sio nau oia.

<sup>6</sup> Aghaatoka tuutulighi va, lo ateva ghe tiuaala masi niuungu etaimim aue eghelei isaa o niuungu lomosina ta elaa ruu ta nauna ateva Iesu Karisto.

<sup>7</sup> Karika sesa etaghi tani ateateea ia o salana atikirighi mausiiim akapa, poli aghielousieinam tale urunguitanighi eteva. Arova la iriiri etokaieghi tale sene o agheelei kotokotoo me aghaauliaa va koronna masi kiuki, am akapaaili me aghi, ita ghaaghaa niparruu tale maamasinaane God.

<sup>8</sup> God erooroo tani aulia ngaoatu vaalua aghannaaili ekapaiem tee ailousiaane ateva Iesu Karisto.

<sup>9</sup> Me uneghi niloeloo sae mausiiim isaa avalua toko, va aielousiaaimim aue epinosa me eoroi tale nialomasaanga, me tale ninannaa masalike tale niaielousi etaimim,

<sup>10</sup> va am tara kila saa llo voto masina me raarangisana me karika mene righi voto sesa etaimim lomosina ta nauna ateva Karisto,

<sup>11</sup> me aue am pasu tale uene voto ghulughuluena ekasukasus ta Iesu Karisto, tale niasaesae me nikkauua at God.

*Unna sene Pol ghe akasukasula masi kiuki*

<sup>12</sup> Isaa oia aghanna, kapughu etoa, va am kila va saa llo ghe lutula etaghi ghe aisausiaala tani akasukasus masi kiuki.

<sup>13</sup> Tale isaa o voto me soldia ngakapa atoa la aitoiaa tangane Siisa me mene katoa taumattu la kilakila wa atokatoka tee sene mausii Karisto.

<sup>14</sup> Me poli isaa o sene etaghi, me oroi ilia lo atoa kapuita laghe asarasarakailala ta Vau ngepona ateva laghe tam matautula tani ppooaa inangari.

<sup>15</sup> Koronna va katoa la poppooa Karisto tale nisessaia tani tau sio ararighi eteae me unguua niaittaraaii. Mene katoa la gheelei tale masi ninannaa.

<sup>16</sup> Kateva uta taumattu laghe gheelei tale niaielousi poli la kilakila va atokatoka oia mausi tani aippooaa kotokotoo tee masi kiukiu.

<sup>17</sup> Mene kateva uta taumattu la poppooa Karisto ta la nnainila nonga, karika va tale masi ninannaa. La nim anna tani ghelei teeieghi voto sesa nau atokatoka tale sene.\*

<sup>18</sup> Me isaa o voto vaalua malloeane? Tani voto ateva masinaaili ia, ia avalua toko: va tale saa ase salana arova kamena o koronna me la poppooa Karisto. Tale isaa o voto me amasimasi.

Ue, anim toka masimasi

<sup>19</sup> poli akilakila va tale kaluimim nilooloo sae, me tale nisausi kanna kapuna Spiriti eteva Iesu Karisto, saa llo voto ghe lutula etaghi, aue egheleieghi me asaanga.

<sup>20</sup> Tale nannaaghii aghaloannaaili va tale saa ase salana, erau mene ghelei epalataieghi, me anim sarasarakanan tani apasunga Karisto tale vilikighi, arova amaulue o amate.

<sup>21</sup> Ta ngetaghi, tani toka aue atoka ta Karisto, me tani mate aue aghaa masi voto.

<sup>22</sup> Arova maamauluaaghi emene toka tee lao, malloeanina va aue unguuaaghi etue uene manee, me ta ngetaghi tani ue va ea alao karika akilakila.

<sup>23</sup> Aghainanga teelilaua ilalua o salana aluekiri. Aghanna tani kasu, me alaa toka tee Karisto, poli emaamasinaaili evalua o.

<sup>24</sup> Me mausimim me emaamasina va atoka.

<sup>25</sup> Liuna evalua o me aghaisesoa ngasarasarakananaili va aue amene toka aitaua ngakapa teeiem me aikaaiaimim me masimasiaaimim aue enamuu.

<sup>26</sup> Liuna evalua o me nau amene toka teeiem, masimasiaaimim ta Iesu Karisto aue evalua esassanga mausighi.

<sup>27</sup> Marova sa ateva elutu, am toka me am kasu nonga tale masi kiukiu kanna Karisto. Arova amae taraiem o anim nongoam, aue akila va am tiitingina akorokorongana tale kateva nonga spiriti, me ekaakateva iem tale ninannaa me niuungu va mene katoa la aikaaiia tale masi kiukiu.

<sup>28</sup> Me karika aue am matauta lo atoa la sessa teeiem tale voto la gheelei. Eaimatootoongana etairaa va aue la turungila me am, aue am saanga. Isaa o voto God aue eghelei.

<sup>29</sup> Poli God ghe nim tau aatu sio etaimim mausi Karisto, karika va tani aiesoaa nonga etana, ta tani sau maate aitauaa teeia.

<sup>30</sup> Am tee ngam laolao tale isaa o ase maamatana me am ghe taraieghila ta aghe ghaala, me isaa oia am nonganongo va aghaaghhaa.

## 2

### *Tani usilaa vaalua Karisto esio siuua nannaane*

<sup>1</sup> Arova righi niasarasarakana poli am tokatoka tee Karisto, me arova righi inangari nisausi tale ailiouisiaane ateva, me arova righi niaighui tale Spiriti eteva, me arova righi nihamaramara me nialousiusi,

<sup>2</sup> am ghelei erooroaa masimasiaaghi nau ekateva nonga nannaaimim, me eisaa aitauaa niaielousi, me ekateva nonga iem tale spiriti me tani uungu etauaa.

<sup>3</sup> Am rau mene ghelei righi voto tale nikuruetu me tani saeaa nannaaimim. Me karika, ta tale nisuua ninannaa am tara katoa va masinaaili ila etaimim.

<sup>4</sup> Kateva kateva etaimim erau mene atoka nonga nannaam tale llo nonga voto ia eaalonata etara tee saa llo mene katoa la ghianoa.

<sup>5</sup> Nannaaimim enonginaaili tee nannaane Iesu Karisto.

<sup>6</sup> Koronnaaili Karisto ia Goto ia  
me karika ghe nnaala va easarasarakanaia tani toka nongina God me tani poso parasi va Goto ia.

<sup>7</sup> Ghe ghaa vella mallangina ateva

me ghe ghaala unguuaaira tau ngai uungu etoa,  
me ghe gheleielva va arova nim  
taumattu ia nongina ita.

<sup>8</sup> Me laghe tarala taataraane va taumattu ia

ghe sio siuua nannaane  
me ghe nongo usilaala tani lao tale nimate

\* **1:17:** Katoa uru ngai laghe pitila, laghe piti emuemuela ves 17, me emulina ves 16.   **1:19:** 2 Ko 1:11.   **1:21:** Gal 2:20.   **1:23:** 2 Ko 5:8.   **1:27:** Ips 4:1; 1 Tes 2:12.   **1:29:** Apos 16:19-40.   **2:3:** Gal 5:26.   **2:4:** 1 Ko 10:24.   **2:6:** Jon 1:1-2; 17:5.   **2:7:** 2 Ko 8:9; Jon 1:14.   **2:8:** Hib 5:8; 12:2.

me tani mate tee tale aikotoo.

- <sup>9</sup> Liuna avalua o me God ghe tauue liue saela epona  
me ghe taula arari eteae elaulau isaa akapa arari,  
<sup>10</sup> va tale ararina ateae Iesu ila akapa la suuiaa sio patu kkeira etana,  
epona liu me kosa ateva me lo atoa eeu tale kosa ateva,  
<sup>11</sup> me ila akapa aue la ghulia ngaotu va Iesu Karisto Vau ngepona ia  
tale nitau sae ta God Tamaita ia.

*Ita mallanga nongina katto atoa*

12-13 Mausina avalua o, masi kapughu etoa, me nongina am ghe nonganongo usilaa, karika va nau atokatoka teeiem nonga, ta nau karika aghi, am ghelei isaa o voto nau ekapa atoa, poli God euungu etaimim tani asarasarakanaiem tale aloannaaimim me uunguaimim. Am uuungu tee nioneoneaa tani apasunga va God ghe asaangiema, tale masi aloaloannaane.

<sup>14</sup> Me nau am ghelei voto am rau mene ghelei tale niauliulia me niaitamamarasii,  
<sup>15</sup> va karika aue righi kaluimim ssavoto me aue am raarangisana, me enatuna am God, karika gheeleiaaimim sesa tale uunguua karika ghlughuluena me sesa voto tale lo ateva oia vituu. Me am mallanga nongina katto atoa tale kosa ateva,

<sup>16</sup> nau am posoposo atingina sae inangari maulue ateva. Me tale nauna ateva Karisto, aue aghaasava ke karika aghe iloula tale niaikarati eteae o aghe uungula tale nim lao.

<sup>17</sup> Me arongona ta la ghele kaoaghi sae tale liu nigheli aiaavusuvusuena nongina manu opring, me am ghele ghelei llo tale uneimim niaakaiaa, amasimasi me amasimasi eitaungaili teeiem.

<sup>18</sup> Liuna avalua o me am tee am masimasi, me am masimasi eitauua teeieghi.

*Timoti me Epaproditus*

<sup>19</sup> Aghaiesoaa ta Vau ngepona ateva Iesu va ghaisa ngarighi asungi aatu Timoti etaimim me aghi tee aue amasimasi nau emae auliaa kiukiuiim etaghi.

<sup>20</sup> Karika amene annaa teva nongina ia, eannangailiim tani aitarainam.

<sup>21</sup> Mene katoa la annainila nonga me karika va llo voto isaa ta Iesu Karisto.

<sup>22</sup> Me am kilakila va Timoti ang ghe ghelelai voto eaapasunga va erooroo, poli nongina kateva me tamane, ang ghe uuungu eitauua teeieghila tale masi kiukiui.

<sup>23</sup> Liuna avalua o me aghaiesoaa va aue asungia tani mae taraiem ghaisa ngarighieili me atara mua va sa ateva aue la gheleia mua etaghi.

<sup>24</sup> Me aghaatoka tuutulighi ta Vau ngepona ateva va gharighi tau amae taraiem.

<sup>25</sup> Me aghanna va emamasina tani sungi aatu kapughu ta Epaproditus euungu eitauua teeieghi me tee tau ngaiuvii ia, me kapuimim tau ngai kasuaa inangari teeia me am ghe sungiela tani mae sausieghi.

<sup>26</sup> Ta poli eannangailiim me ghe alousiusieiliila poli ghe kilala va am ghe nongola va ghe isikila.

<sup>27</sup> Koronna va ghe isikila me ghaisa ngarighi ghe mate, me God ghe alousiusi teeelia, me karika va ie nonga ta aghi tee, tani akekkelieghi tale mene kasina nialousiusi.

<sup>28</sup> Liuna avalua o me asungi parasia atu etaimim me nau am taraia aue am masimasi me karika aue atani alousiusi.

<sup>29</sup> Am ghaia va nongina kapuna ia Vau ngepona ateva tee kinatama nimasimasi, me am oneoneaa ase taumattu nongina ia.

<sup>30</sup> Poli ghaisa ngarighi ghe mate tee uunguaane Karisto, me karika ghe annaa maamauluuane tani ghelei eroorooaa nisausi am karika am ghe rooroo tani ghelei etaghi poli masaeili iem.

### 3

*Am rau mene atoka tuutuliimim tale uunguaa vilikiimim*

<sup>1</sup> Liuna avalua o, kapughu etoa, me am masimasi ta Vau ngepona ateva. Karika egheelei righi sesa etaghi tani mene piti aatu etaimim llo ngaghe auliaa muela etaimim, ta isaa o voto erooroo tani sausiem.

<sup>2</sup> Am paniem tale ila o paua atoa isaa o taumattu la gheelei voto karika masina, tau ngai ghelei saasakiaa viliki etoa.

<sup>3</sup> Poli ita isoiso ita. Ita lo atoa ita kakkauaa tale Spiriti eteva kanna ia God, ita asaesae Iesu Karisto me karika ita atoka tuutuliita tale uunguaa vilikiiti.

<sup>4</sup> Arongona ta aghi arooroo va aghatoka tuutulighi tale isaa o voto.

Arova teva eannaa va eatoka tuutulina tale uunguaa vilikina, aghi alaulaula.

<sup>5</sup> Tale aiaaghaoaluna ateva nau, laghe isoieghila. Aghi atala nge Israeli ieghi, tale ararimangali eteva ta Benjamin, aHibru ieghi me asamasama nge Hibru.\* Me tale uunguaa inangari nipaopao, aghi Paresi ieghi.

<sup>6</sup> Aghe annaaili isaa o voto, liuna avalua o me aghe uviivi kapuna taumattu God, me karika teva erooroo tani auliaa teeieghii, poli aghe nonganongo usila ngakapa inangari nipaopao.

<sup>7</sup> Me tale isaa akapa o salana tani ghelei va aghe ghaa oroi voto, nau ghaine ataataraila va peisaane ila mausi Karisto.

<sup>8</sup> Liuna avalua o me ataataara isaa akapa voto peisaane nau aghe toongi teela kinatama voto atoa tani kila Iesu Karisto Vaughu ia. Mausina me aghe velu ekapala voto o, ataatara va nim lao me aue aghaa nonga Iesu.

<sup>9</sup> Me aue atoka ta ngetana, me karika aue aghulughuluena tale uunguaa inangari nipaopao, ta aghulughuluena tale niaikaiaa kanna Karisto, me isaa o nighulughuluena ghe kasula ta God tale niaikaiaa.

<sup>10</sup> Aghanna tani kila Karisto, me sarasarakaniaane tale unna nitotu tale nimate, me tani lao nongina vaalua ghe mmaparkanala me tani nongina ia tale matemateaane.

<sup>11</sup> Me tale isaa o ase salana, aue arooroo tani totu tale nimate.

#### *Ni-iilou esarasarakana tani laa rekata*

<sup>12</sup> Karika va ngaghe ghaala isaa o voto va ngaghe ghulughuluena. Iesu Karisto eposoposoaghi, me akasukasu kkai tani laa ghaa isaa o voto.

<sup>13</sup> Kapughu etoa, karika ataataraiieghii va ngaghe ghaala isaa o voto. Me kateva nonga voto agheelelia, akakkaluua llo emuli etaghi me aghameemeti tani laa ghattau aipolipoli emua etaghi.

<sup>14</sup> Aiilou parasi nonga tani laa rekata tale airuuruu me tani ghaa aipolipoli nongina God ghe koloaghila tani sae epona liu ta Iesu Karisto.

<sup>15</sup> Ita akapa lo atoa ngita ghe matuennala ita nna ngamasina isaa o voto. Me arova karika am maemae aitauua tale kasina ninannaa, isaa tee o llo God aue eghelei emasalika etaimim.

<sup>16</sup> Me arova vaalua, ita toka nonga tale llo voto ngita ghe kilala.

<sup>17</sup> Kapughu etoa, am mae aitauua me am usilaa gheeleiaaghi, me am tani tara amasina lo atoa la kasukasu nongina vaalua ami, ami ghe kasukasu.

<sup>18</sup> Poli nongina aghe auliaa nonga etaimim orioata, me ngamene auliaa tee nialousiusi, va oroi lo atoa la tokatoka tani ssatee aikotoo ateva ta Karisto.

<sup>19</sup> Airuuruu tale kasukasuaaira nitturuu eteae. Kovaira ateva kapuira goto ia me llo tani palata, la aasakeaa. Me nannaaaira etokatoka nonga tale voto tale kosa ateva.

<sup>20</sup> Me ita tanganeita epona liu, me earieri ita tani toi teva tau ngai asaangi ekasu okae, Vau ngepona ateva Iesu Karisto etana.

<sup>21</sup> Aue eaikolikoliaa ia oia vilikiita ateva sesa ia ghele nongina vilikina masinaaili, tale sarasarakaniaane erooroo tani ghaa aitauua ngakapa voto me eghelei tale aloaloannaane.

## 4

<sup>1</sup> Liuna avalua o, kapughu etoa, me aghailousieinam me aghannangailiim, am arova aipolipolighi iem tale uunguaaghi me tale masimasiaaghi, liuna avalua o me am tingina akorokorongana ta Vau ngepona ateva, masi kapughu etoa.

#### *Inangari niloeloe me niakorokorongana*

<sup>2</sup> Alooloo luei ta Iuodia me Sintike tani mae aitauua tale ninannaa ta Vau ngepona ateva.

<sup>3</sup> Me tee akokolomio, lo ateva ughe uungu teeieghii, tani sausi ilalua o vause alua laghe uungu aaanasa teeieghii mausi masi kiukiu, tee me Klemen me ila akapa lo atoa la uungu teeieghii, me arariira isaa tale vuku maulue ateva.

<sup>4</sup> Nau ekapa atoa am masimasi ta Vau ngepona ateva, me amene ue va am masimasi.

<sup>5</sup> Am tau velu va taumattu ngakapa atoa la tara va karika am saasavalaa inangari, poli Vau ngepona ateva ange aakalakalaa.

---

**3:4:** Apo 22:3; 2 Ko 11:18.    **3:5:** Luk 1:59; 2 Ko 11:22; Apo 23:6.    \* **3:5:** o aHibru ieghi me tuvughu ekapa atoa aHibru ila.    **3:6:** Apo 8:3.    **3:7:** Mat 13:44-46.    **3:9:** Rom 3:21-22.    **3:10:** Rom 6:3-5; 8:17.    **3:12:** 1 Tim 6:12, 19.    **3:14:** 1 Ko 9:24.    **3:15:** 1 Ko 2:6.    **3:17:** 1 Ko 4:16.    **3:19:** Rom 16:18.    **3:20:** Ips 2:6, 19.    **3:21:** 1 Ko 15:28, 42-53.    **4:1:** 1 Tes 2:19-20.    **4:3:** Luk 10:20.    **4:5:** Hib 10:25; Jms 5:8-9.

<sup>6</sup> Am rau mene annangaili asease voto atoa. Tale voto akapa, am kokkolomi sae ta God tani auliaa sae aloaloannaaimim tee nikaili emasina.

<sup>7</sup> Me luei eteva kanna ia God elaulau ekapaaili ninannaa, aue eitaraa urunguitaniimim me nannaaimim ta Iesu Karisto.

<sup>8</sup> Liuna avalua o, kapughu etoa, me saa voto koronna, me llo voto pei nioneoneaa, me llo ghulughuluena, me saa llo raarangisana, me saa llo eaalutu nimasimasi, me saa llo voto taataraane masikkanaaili, me arova righi voto masinaaili o am aruua etana, am annaa isaaa o voto.

<sup>9</sup> Saa llo voto ngam ghe kilala o ngam ghe ghaala, o am ghe nongola o tarala etaghi, am tootoonga tani ghelei me God, etautau luei, aue etoka aitauua teeiem.

*Nikaili emasina tale uneira nitaula*

<sup>10</sup> Namungaili masimasiaaghi ta Vau ngepona ateva poli ngam ghe mene nnainaghila. Akilakila va am ghe nannainaghi erau me poli karika righi salana va am ghe apasunga.

<sup>11</sup> Karika aghauliaa llo poli aghanna righi niaisausi, poli ngaghe kilala tani toka tale nimasimasi tale asease nitoka.

<sup>12</sup> Ngaghe kilala vaalua tani toka arova karika righi voto etaghi o arova oroi voto etaghi. Ngaghe kilala vaalua tani toka tale isaaa o ase nau, arova pasu kovaghi o maloona aghi o oroi peighi o karika oroi.

<sup>13</sup> Arooroo tani ghelei voto akapa ta lo ateva eaasarasarakanaiieghi.

<sup>14</sup> Me masinaaili etaimim ta am ghe sausieghila tani sau maate tale maamauluaaghi.

<sup>15</sup> Am aPilipae atoa am kilakila va nau masi kiukiu ghe tiuaala etaimim, me ngaghe anna tani kasu eMesedonia, am nonga am ghe tau mae sio, me ita ghe ailiuaala voto. Karika mene teva ale manga ghe gheleila isaaa o voto.

<sup>16</sup> Me nau aghe tokatoka eTsalonika am ghe aasaoki mae voto tani sausieghi, karika va katengaata nonga.

<sup>17</sup> Karika va poli aghe annaa va am ghe tau mae voto, ta aghe annaa va am ghe ghaa aipolipoli ta poli masi gheeleeiaaimim.

<sup>18</sup> Ngaghe ghaala voto aghannaa me oroieili. Aghe pasueilila poli am ghe tau lao sio ta Epaproditus va emaeaa voto am ghe asaoki mae sio, nonginaaili nitau lao tale aiaavusuvusuena masi ngusungusuaane, me God egahaaghaa me emasimasia.

<sup>19</sup> Me aue kapughu Goto ateva aue etau aatu isaaa akapaaili aloaloannaaimim tale oroiaa ngepona liu ta Iesu Karisto.

<sup>20</sup> Ta God Tamaita ia aue ita taue sae tale nau oia, me nau ekapa atoa. Koronna.

*Airuuruu tale inangarina Pol*

<sup>21</sup> Am auliaa masimasiaaghi ta isaaa akapa taumattu manga ta Iesu Karisto. Kapughu tee atoa la tokatoka teeieghi laghe suula masimasiaaira etaimim.

<sup>22</sup> Ila akapa taumattu ngatoa manga ila, la suu teela masimasiaaira ta lo atoa la uungu ta Siisa.

<sup>23</sup> Alooloo sae va maamasinaane Vau ngepona ateva Iesu Karisto aue etoka tee lo ateva spiriti etaimim. Koronna.

## Uru ngai etikirighi Pol ghe pitiela ta aKolosae atoa Inangari emuemua

Ia oia uru ngai etikirighi Pol ghe pitiela nau ghe tokatoka tale ale mata voovoo, nongina Ipises, Pilipae me Pilimon. Pol karika ghe lao sio eKolosae, ta Epapras aKolosae ia ghe nongola masi kiukiu elpis, ghe aiesoala, me ghe oghi saela eKolosae tani ppooaa okae, me ale manga ateva eKolosae ghe lutula.

Tau ngalomasaanga ngatoa la nannaa va katoa laghe mae sio eKolosae me laghe apasungaalo voto kamena okae, me Pol ghe aloannala tani auliaa kieira aKolosae atoa tale voto kamena laghe aapsunga. Ghe aulia ngakorokorongana va Iesu mata ngemua tale masi kiukiu, me marova teva voto elaulau Iesu, kamena ia. Ita rau mene aimuli usi tee voto taumattu ngatoa la ghaauliaa va masina, me ita rau mene kkauaa ensolo atoa, ta ita aimuli usi tee Iesu, me gheeleiaaita etani masina. Pol ghe auliaa teela vaalua tani toka amasina tale ale manga ateva me tanganueita.

### **Tani kila amuemua**

Aitiutiu tale inangari 1:1-2

Iesu mata ngemua ia tale masi kiukiu 1:3-2:5

Aimuli usi tee Iesu, me karika niaapasunga kamena 2:6-23

Am tokatoka nongina kapuna atoa God 3:1-4:6

Airuuruu tale inangari 4:7-18

### *Pol ghe amasimasila tau ngaisesoa ngatoa eKolosae*

<sup>1</sup> Aghi Pol, kapuna apostolo ieghi Karisto Iesu me tale aloaloannaane God, me Timoti kaputta ia.

<sup>2</sup> Angalu pitipiti atu etaimim akapa lo atoa taumattu manga am me am aaiesoaa ta Karisto eKolosae. Alooloo sae va maamasinaane me luei ekasukasus ta God aue etoka etaimim.

### *Nikaili emasina me nilooloo sae*

<sup>3</sup> Angalu kaakaili emasina ta God Tamana ia Vau eteva Iesu Karisto tale kalumami nilooloo sae,

<sup>4</sup> poli angalu ghe nongola uneimim niaikaaiaa ta Karisto Iesu me aielousiaaimim ta kapuna taumattu ngakapa atoa God manga ila.

<sup>5</sup> Am aikaaiaa poli God eaaitaraa aipolipoli eteva epona liu am kilakila va aue etau aatu. Ngam ghe nongo vella arau tale inangari koronna, tale masi kiukiu,

<sup>6</sup> ghe mae sio etaimim. Me tale kosa akapa ateva inangarina ateva God ekuukuneaa uene me epipinosa nongina ghe gheleila etaimim nau am ghe kilala inangari koronna tale maamasinaane God.

<sup>7</sup> Am ghe nongoala ta masi kapumami eteva ta Epapras, kapuna tau ngai uungu eteva ia Karisto, me egheelei emasinaaili uunguaane, eghaaghaa liumami.

<sup>8</sup> Me ange auliaa tau mae sio etaimami kaluimim niaielousi kanna Spirit Manga.

<sup>9</sup> Liuna evalua o me nau eteva ami ghe nongola karika ami ghe ainoanala tani looloo sae tani kolomi God tani tau aatu alomasaanga tale Spirit Manga ateva me aue am kila aloannaane God.

<sup>10</sup> Me aue am kasu tale masi salana eoneoneea Vau ngepona ateva, me aue am amasimasia nau am ghelei masi niuungu me aue am tani kila amasinaaili God.

<sup>11</sup> God aue easarasarakaniem tale kinatama sarasarakaniaane tani gheleiem va am rau mene sio asoasoaa tale nau sesa arova emae, ta aue am nim matua ngatoka, me am masimasi

<sup>12</sup> tani kaili emasina sae ta Tamaita ateva, ia ghe gheleiemla va am tee am rooroo tani ghaa saa llo ghe suoiongaala va ekaluimim epona liu tee kapuna taumattu ngatoa God manga tale mallanga ateva.

<sup>13</sup> God ghe ghaa oghitala tale sarasarakaniaa saurrom ateva, me ghe atokaita lao sio tale ararimangalina ateva Natuna ateva eaielousieinia.

<sup>14</sup> Ie nonga aighaa oghiita ia, me ekakkluuaa kaluita ssavoto.

### *Iesu Karisto ia nonga tale voto akapa*

**1:3:** Ips 1:15-16.

**1:5:** Ips 1:13; 1 Pita 1:4.

**1:7:** Kol 4:12; Plm 23.

**1:9:** Ips 1:16-17.

**1:11:** Ips 1:19; 3:16.

**1:12:** Ips 1:11, 18.

**1:13:** Luk 22:53; Ips 2:2.

**1:14:** Ips 1:7.

<sup>15</sup> Karisto tootoona ia God ateva, karika ita roroo tani tarai, ghe tokala arau me ia mue ia tale voto akapa God gheleila.

<sup>16</sup> Poli ta ngetana voto akapa God gheleila, voto epone liu me tale kosa ateva, voto ita taatara me voto karika ita roroo tani tara, me ila akapaaili ensolo atoa, kuturu etoa, raroai etoa me asease tau ngai toitoi etoa. God gheleila isaa akapaaili voto ta Karisto, me kannia Karisto.

<sup>17</sup> Ghe tokala emua arau, me ta ngetana isaa akapaaili voto etokatoka amasina.

<sup>18</sup> Me ia emuemua ale manga ateva nongina uruuta ateva emuemueaa vaulaniita ateva. Ia ghe toka akasinala me aititui ia tani totu tale nimate. Ia avalua o me ie nonga eaitara ngakapanaaaili voto atoa.

<sup>19</sup> Poli God emasimasi va isaa akapaaili voto kannia God etoka ta Karisto.

<sup>20</sup> Ta ngetana God ghe mene atoka aitauaala isaa akapa voto teeia, voto tale kosa ateva me epone liu, me ghe gheleila luei tale raena ateva Natuna ateva tale aikotoo ateva.

<sup>21</sup> Me am, isaa too nau am ghe masaeiiliila me tale nannaaimim am ghe sessa tee God, me gheegheleiaaimim sesa,

<sup>22</sup> me isaa oia ia ghe atoka aitaueniemla teeia tale matemateaane tale aikotoo ateva, tani maeainiem nongina etokatoka, manga, me raarangisana, me karika righi sesa gheegheleiaaimim,

<sup>23</sup> arova am aloanna tani mene lao tee tale kaluimim niaikaaiaa, karika am mene tau velu uneimim niaikaaiaa tale masi kiukiu am ghe nongola, laghe ppooala tale isaa akapaaili taumattu tale kosa ateva, me aghi tee, Pol, tau ngai uungu ieghi tani ppooaa ia o masi kiukiu.

### *Unguaane Pol tale ale manga*

<sup>24</sup> Ghaine amasimasi tani ghaa maamatana tani aisausieinam, me aghelei erooa maate Karisto ghe suoongainaghila va aghaa tale vilikighi, tani sausi ale manga ateva.

<sup>25</sup> God ghe tau mae sio niuungu etaghi tani uungu mausi ale manga ateva, ghe sungieghila tani ppooa ngakapa masi kiukiu etaimim.

<sup>26</sup> Ia o inangari eteva ang ghe aisuliaa vella arau, me tale isaa oia nau ang ghele kaurekatila tale taumattu manga.

<sup>27</sup> God ghe suoongainilala tani apasunga voto aisulianna etaira, va tau ngeleka atoa ue la ghaa kinatama niarangise ateva, me Karisto aue etoka teeiem tau ngeleka atoa, me am atoka tuutuliiim tale voto emae epone liu.

<sup>28</sup> Ami aaulia ngaotu Karisto, ami aauliaa kieira taumattu ngakapa atoa me ami aapasunga ta taumattu ngakapa atoa tale alomasaanganiaane Karisto, tani ghelei taumattu ngakapa atoa va la matuenna ta Karisto nau la tingina emua ta God.

<sup>29</sup> Liuna avalua o me auungu ekorokorongana tale isaa akapaaili sarasarakaniaane etaftau mae etaghi.

## 2

<sup>1</sup> Aghaloanna tani auliaa kieimim vaalua aghe saula maamatana mausimim me tau ngai kkaua ngatoa eLaodesia, me tee lo atoa la aikaaiaa karika poi laghe taraiweghi.

<sup>2</sup> Aghanna tani aisausieinila me tani gheleila va la toka aitauaa tani korokorongana tale niaielousi. Aue la kaarasi tani ghaa niarangise me alomasaanga, me aue la kila voto aisulianna kanna God, isaa ta Karisto.

<sup>3</sup> Karisto nonga erooroo tani ghelei taumattu ngatoa la alomasaanga me tani apasunga llo voto God eaipanipanlia ta taumattu ngatoa.

<sup>4</sup> Aghaauliaa etaimim llo oia voto, ta toa taumattu la rau kameam nonga tale kamena niapasunga am nonganongo arova masinaaili.

<sup>5</sup> Arongona ta masaeuili ieghi etaimim, me urunguitanighi eteva etokatoka teeiem, me amasimasi tani tara va tokatokaaimim masina me uneimim niaikaaiaa ta Karisto korokoronganaaili.

### *Ouna ateva maulue ta Karisto me karika tale inangari niloeloe*

<sup>6</sup> Me isaa oia, nongina ngam ghe ghaala Karisto Iesu va ang ghe Vauimmi iela, am kasu teeia nau etoa.

<sup>7</sup> Am atoka maamauluaaimim epone etana nongina ai eteae oane eposoposo asarasarakana ia, me am tingina akorokorongana tale niaikaaiaa am ghe ghaala, me aue am kaili emasina etana nau etoa.

**1:15:** 2 Ko 4:4; Jon 1:18.    **1:17:** Jon 1:1; 8:58.    **1:18:** Ips 1:22-23; Apos 26:23; Autu 1:5.    **1:19:** Kol 2:9.    **1:20:**

Ips 1:10.    **1:21:** Rom 5:10; Ips 2:12.    **1:22:** Ips 5:27; Rom 5:10.    **1:25:** Ips 3:2, 7-8.    **1:26:** Rom 16:25-26; Ips 3:5, 9.    **1:29:** Ips 3:7, 20; Plp 4:13.    **2:3:** 1 Ko 1:24, 30.    **2:4:** Rom 16:18.    **2:5:** 1 Ko 5:3.    **2:7:** Ips 3:17.

<sup>8</sup> Am aipanipania! Toa taumattu la rau kameam nonga tale nim nannaaira pei tale kosa ateva oia korokoronganaaili me kamea, emaemaetra raroai etoa me karika ernaemae ta Karisto.

<sup>9</sup> Poli isaa akapaaili voto kanna God etoka ta Karisto,

<sup>10</sup> me ngam ghe pasula nau am tokatoka ta Karisto, ia emuemue ngakapa tau ngai toitoi etoa me namu ngatoa tee.

<sup>11</sup> Nau eteva am ghe mae sio ta Karisto am ghe ghaala ni-isoiso, karika tale ni-isoiso tuunga ateva, ta am ghe ghaala ni-isoiso ateva kanna ia Karisto, ghe iso vella vilikina tale matemateaane.

<sup>12</sup> poli am ghe mate teela Karisto nau eteva laghe asuuemla tale manu me am ghe totu teeila tale ouna ateva maulue, poli am aatoka tuutuliimim tale kaluimim niaikaaia elome tale sarasarakaniaana God, ghe totula Karisto tale nimate.

<sup>13</sup> Am nongina va matena am poli kaluimim ssavoto me poli sesa gheeleiaaimim karika ghe kapa, vara me God ghe ghelei esakesakeamla ta Karisto, ta ghe kkaluaala isaa akapaaili kaluimim ssavoto.

<sup>14</sup> Ghe sei vella kaluita ssavoto tale uru ngai laghe pitila me kaluita dinao nau ghe matela tale aikotoo.

<sup>15</sup> Tale isaa o salana, ghe apalala sarasarakaniaa sesa spiriti etoa me tau ngai toitoi etoa me ghe apalatailala ta mataira taumattu ngatoa nau eteva ghe apalailala tale aikotoo.

<sup>16</sup> Ia avalua o me am rau mene tau veluem va la auliaa teeiem tale inana am namanama me manu am ropiropi me karika am laolao tale kasina tana uneira nivelu eitauua tale nau manga tale kateva kateva ninamanama me kateva kateva ulana me tale nau sambati.

<sup>17</sup> Isaa o inangari niloeloe me kastam nim tootoo voto auena emae, me ia o Karisto, ia koronna ia, ang ghe mae sio.

<sup>18</sup> Am rau mene tau velu taumattu ngatoa va la ghelei kaluimim nikkauua tani ue va am siuua nannaaimim me am kkauua ensolo atoa me la annaa va muennaaili ila poli laghe tarala nitaatara, sesa nannaaira egheeleila me la tautau sae nannaaira.

<sup>19</sup> Karika la tokatoka tee Karisto, ia nongina uruita eposoposo aitauua vaulaniita me riuita me ita piipinosa nau eteva God eapinosaita.

<sup>20</sup> Am ghe mate teela Karisto, me ghe akekkeliemla tale raroai etoa, me vaalua am mene usiusi inangari niloeloe tale kosa ateva oia:

<sup>21</sup> Am rau mene poso, am rau mene namunamua, am rau mene tul!

<sup>22</sup> Isaa o ase inangari niloeloe pei tale kosa ateva oia aue ekapa, nim kaluira taumattu ngatoa la apasunga.

<sup>23</sup> Isaa o inangari niloeloe enim gheeleila va la kkauua me la ghelei voto tale vilikiira va enim usilaa nannaaira. Isaa o inangari niloeloe arova tani alomasaanga, karika, me karika etautau mae righi niaisaisu tani apala sesa gheeleiaia kateva kateva taumattu.

### 3

#### *Am toka tale ouna ateva maulue*

<sup>1</sup> Nau am ghe totula tale ouna ateva maulue, am ghe totu eitauua teela Karisto, me am tani pae voto ngepona liu, nongina Karisto etokatoka tale pai muenna atelange ta God

<sup>2</sup> me am atoka nannaaimim tale voto ngepona liu me karika va voto tale kosa ateva.

<sup>3</sup> Tale lo ateva oia maulue angam ghe matela etana, me maamauluaaimim tuunga ateva eaaisulua ta Karisto elome ta God.

<sup>4</sup> Karisto etautau aatu maulue ateva. Me nau eteva ekaurekati tale kosa akapa ateva, aue eapasunga sarasarakaniaane me mallangina, am tee aue am lao aitauua teeia me aue la tara akapaiem me maamauluaaimim aue etoka tee Iesu, karika aue am aisulua me aue am toka tale mallangina ateva.

<sup>5</sup> Liuna avalua o me am ghelei emate sesa ninannaa me sesa voto tale kosa ateva oia: uuungua nialai salosalooa see, karika am mene kune taita me vause, me am rau mene ghelei llo voto sesa taumattu ngatoa la paapalata, me aloaloannaaimim korokoronganaaili tani kune vause me taita tani ghelei ssavoto, me nikuruetu, nim nongina va am kakkauua tootoo.

<sup>6</sup> Poli isaa o ase voto, sessaiaane God aue emae sio.\*

<sup>7</sup> Me am, am ghe kasukasus tale llo akasina maulue sesa am ghe tokatoka etana.

**2:9:** Jon 1:14, 16.    **2:10:** Ips 1:21-22.    **2:11:** Rom 2:29.    **2:12:** Rom 6:4.    **2:13:** Ips 2:1, 4-5.    **2:14:** Ips 2:14-16; 1 Pita 2:24.    **2:16:** Rom 14:1-13.    **2:17:** Hib 8:5.    **2:19:** Ips 2:21; 4:16.    **2:20:** Gal 4:3, 9; 1 Tim 4:3.

**2:22:** Mat 15:9.    **3:1:** Mak 12:36; 16:19; Ips 1:20.    **3:2:** Mat 6:33.    **3:5:** Rom 6:6, 11; Ips 4:19; 5:3-6.    **3:6:** aue emae sio Kasina uru ngai laghe pitila, laghe pitila aue emae sio ta lo atoa la sassakieinia.

<sup>8</sup> Me isaa oia, am ghaa velu etaimim isaa o asease voto nongina nisessai, me niauliaa saasakiaa ta kateva, me nitam aloanna kateva, me niaasake, me inangari nilakolako ta paaimim.

<sup>9</sup> Karika am mene aikameaa, nau eteva am ghe ghaa vella uunguaaimim pei ngarau am ghe gheeghelei

<sup>10</sup> me am ghe mene tiuaa ngaounala nau God ghe mene ghelei eounaiemla tale tootoona ateva lo ateva ghe gheleitala, tani ghelei va am tani kila aalomasaanganiaane.

<sup>11</sup> Tale ouna ateva maulue karika toa ajiu me karika toa aGrik, me karika toa isoiso me lo atoa karika isoiso ila, me lo atoa karika va ajiu ila me aGrik ila, me lo atoa karika alomasaanga ila, me lo atoa karika la rooroo tani ghelei voto tale nim nannaairia, me lo atoa la rooroo tani ghelei nongina la aloanna tani ghelei, ta Karisto ie nonga akapa etaira.

<sup>12</sup> Nongina God ange suoiongainamla va am manga am, me eaailousiangailiem, am amolumoluem tale isaa o niuungu: am alousiusi tee lo atoa la tokatoka tale maamatana, me niaisausi etani mae tale urunguitaniimim, me am sioaa nannaaimim ta katoa, me am nnaa mene kateva, me karika emene sessai parasiem ta mene kateva.

<sup>13</sup> Arova ange gheleila voto ateva karika masina ia me karika ange mae sio ta nannaam, unim sioaa nannaam me lao aitauaa teeia, me arova kateva eghelei saasakiaa, am kkalueinia, nongina Vau eteva ghe kkaluaala kaluimim maamatana.

<sup>14</sup> Me tale llo voto matutulieni, am ailousia ngakoronna me ae am toka amasina tee mene kateva.

<sup>15</sup> Am tau velu kanna luei eteva Karisto emuemue tale urunguitaniimim, nongina ghe koloamla tani kateva nonga, me am kaili emasina.

<sup>16</sup> Am tau velu inangarinia ateva Karisto etoka elome etaimim me eapasunga ta kateva kateva alomasaanga tani kkinari tau sae emaema ta Spiriti eteva, me kkinari tee nimasimasi tani tau sae God tale urunguitaniimim.

<sup>17</sup> Me saa llo am gheelei tale inangari me niuungu, am gheelei llo voto tale ararina ataei Vau eteva Iesu, tani kaili emasina ta God Tamaita ia.

#### *Inangari niloeloe tale kateva kateva tau ngaisesoaa*

<sup>18</sup> Vause atoa lailai iem, am atoka nannaaimim ta taitaniim atoa ta isaa o voto ghulughuluena ta Vau eteva.

<sup>19</sup> Taita atoa lailai iem, am aielousia vauseniim atoa karika am mene sorriena teeila.

<sup>20</sup> Aliko etoa am nongo usilaa tamaimim me kinaimim atoa tale isaa akapa voto, poli isaa o voto eaamasimasi Vau eteva.

<sup>21</sup> Tamatama atoa am rau mene savalaat natuimim atoa va esessaila, ta erau ghelei nannaairia va esioaili euu.

<sup>22</sup> Lo atoa am uungu me karika am tokatoka tale aloaloannaaimim, am nongo usilaa vauim atoa tale kosa ateva oia tale voto akapa. Karika am mene uungu nonga ta nau eteva la taataraiem va am ghelei emasimasi, ta am uungu tale masi ninannaa emaemaetale urunguitaniimim, me tani oneoneea God.

<sup>23</sup> Saa niuungu am gheelei, am ghelei tale masi ninannaa emaemaetale urunguitaniimim ateva, nongina va am uungu ta Vau ngepona ateva, me karika va ta taumattu ngatoo.

<sup>24</sup> Am uungu emasina poli am kilakila va ta Vau eteva ae am ghaa voto masina ghe aulia ngalokoila, nongina aipolipoli. Am uungu ta Vau eteva Karisto.

<sup>25</sup> Tau ngai ghelei ssavoto atoa ae la ghaa aipolipoli tale llo voto sesa laghe gheleila. Karika ae righi naimassiaa.

## 4

<sup>1</sup> Vau etoa am aitoiaa tau ngai uungu etoa karika la tokatoka tale aloannaairia, me am ghelei emasina me ghulughuluena lao ta kapuimim tau ngai uungu etoa, ta am kilakila va am tee kapuimim Vau eteva ia epona liu.

#### *Niailoe tale nikokkolomi sae*

<sup>2</sup> Am rau mene amaomao tani kokkolomi sae, me nau am kokkolomi sae, nannaaimim eoti, me am kaili emasina sae ta God.

**3:8:** Ips 4:25-29; 5:4.    **3:9:** Ips 4:22, 25.    **3:10:** Ips 4:24.    **3:11:** Gal 3:28.    **3:12:** 1 Pita 2:9.    **3:13:** Ips

4:2, 32.    **3:14:** Rom 13:8-10.    **3:15:** Plp 4:7; 1 Ko 12:27; Ips 4:4.    **3:16:** Ips 5:19.    **3:17:** 1 Ko 10:31; Ips 5:20.

**3:18:** Ips 5:22.    **3:19:** Ips 5:25.    **3:20:** Ips 6:1.    **3:21:** Ips 6:4.    **3:22:** Ips 6:5-8.    **3:25:** Rom 2:11.    **4:1:** Ips 6:9.    **4:2:** Ips 6:18; Plp 4:6.

<sup>3</sup> Me am kokkolomi sae mausiihami tee va God aue etau mae salana tani laa ppoaa masi kiukiu, me aue ami aulia ngaotu voto aisulianna isaa ta Karisto, poli aghe poppooaa masi kiukiu eteva, laghe atokkieghi ssola tale ale mata voovoo.

<sup>4</sup> Atani mene ppoaa ngaotu masi kiukiu ta taumattu ngatoa. Ia avalua o me am kokkolomi sae ta God me aue esausieghi tani kila tani ppoaa ngamasinaaili.

<sup>5</sup> Nau am tokatoka tee taumattu karika la aikaiaia ta Iesu, am tani aitoka tee llo voto am gheelei me am rau mene tau velu kasina voto va enim peisaane.

<sup>6</sup> Nau etoa am sama masina etaira, nongina uela ateva eaamasikkana anem inana, ia avalua o me aue am kila tani asokoi kaluira nikokkolomi.

*Airuuruu tale inangari niloeloe me nimasimasi*

<sup>7</sup> Tikikus aue eaulia ngakapa voto ghe ailituaala etaghi. Ia nengaghi tuungia aghailousieinimia. Ia kapuna tau ngai uungu ia Vau ngepona ateva nongina aghi, me egheelei emasinaaili uunguaane.

<sup>8</sup> Aghe sungiela tani mae taraiem tale masi voto am kila etana va sa ateva elutulutu etaimami, me ia aue eakorokorongana urunguitaniimim.

<sup>9</sup> Aue emae aitauaa tee Onesimas, am kilakilaia ghe kasula ona tale masalikiimim atae, egheelei emasinaaili uunguaane me ami aaielousiangailiia. Ilalua aue lalu auliaa etaimim isaa akapaaaili voto elutulutu oia.

<sup>10</sup> Aristakus esuula masimasiaane etaimim. Etokatoka teeieghi tale ale mata voovoo. Me Mak, aloana ta Banabas ia tee esuula masimasiaane etaimim. Am nnaa inangari aghe auliaala tale uunguaane Mak; arova emae etaimim, am aikoloainia.

<sup>11</sup> Me Iesu, ia kolokoloa va Jastas, ie tee esuula masimasiaane tee etaimim. Ilotolu o taita kotolu ilotolu nonga ajiu ilotolu. Ilotolu lotolu kakkauaa, me lotolu uungu teeieghi tale ararimangalina ateva God. Lotolu kaakaaras tani aisausieinagi.

<sup>12</sup> Epapras tee ghe kasula ona tanganueimim ie tee etautau aatu masimasiaane etaimim. Ia kapuna tau ngai uungu ia Karisto Iesu. Karika enim aaitoka ta ekokkolomi sae nau ekapa atoa poli am, va am tingina akorokorongana me am matuenna me aue am kilaaili saa voto God ealona va am ghelei.

<sup>13</sup> Aghaloanna tani aulia ngakorokorongana etaimim va ia euungu ekorokoronganaaili tani sausiem, me lo atoa tee eLaodesia me Ierapolis.

<sup>14</sup> Luk dokta ia ami ailousiangailia etautau aatu masimasiaane etaimim me tee Diimas.

<sup>15</sup> Me am auliaa tee masimasiaaghi ta tuemami me nengamami etoa eLaodesia, me ta vause ateva la kolokoloa va Nimpia me tee ta lo atoa la kakkauaa tale alena ateva.

<sup>16</sup> Nau eteva lo atoa am tokatoka eKolosae am ruu tani nongo uru ngai etikirighi oia am mene laoainia me la ritia tale ale manga ateva eLaodesia. Me am tani riti ia oia uru ngai etikirighi aghe pitila ta aLaodesia ngatoa.

<sup>17</sup> Me am auliaa ta Akippus va, "Utani ghelei ekapa llo voto Vau eteva ghe tau aatu sio va ughelei."

<sup>18</sup> Aghi Pol, aghe pitila isaa oia masimasiaaghi. Am annaa tokatokaaghi tale ale mata voovoo. Aloooho sae va maamasinaane God aue etoka teeiem.

## Aitiutiu etikirighi uru ngai Pol ghe pitiela ta aTesalonika ngatoa Inangari emuemua

Pol ghe atokala ale manga ateva eTesalonika tale unna aiaaghaluene ateva nikasu (Apostolo 17:1-9), me ajiu etoa laghe aloannala tani turungi uunguaane Pol. Pol ghe tokatoka eAten nau ghe pitila ia oia uru ngai etikirighi, me ghe aloannala tani apasunga va ia apostolo tuungi ia, me tee tani aulaa vaalua ghe suula Timoti tani akorokoronganaila tale uneira niaiesoaa. Ghe pitila voto tani akorokoronganaila va la toka tale uunguaa nimanga, me tee tani liu nikkolomi va sa ateva elutu ta tau ngaisesoa ngatoa nau la mate, me tee vaalua Iesu aue emene mae.

### **Tani kila amuemua**

Aitiutiu tale inangari 1:1-10

Pol me aTesalonika atoa 2:1-3:13

Nitoka manga 4:1-12

Vaalua Iesu aue emene mae 4:13-5:11

Inangari niloeloe 5:12-28

<sup>1</sup> Aghi Pol, Saelas me Timoti,

Ami pitipiti atu etaimim taumattu ngatoa tale ale manga ateva ona eTesalonika ta God Tamaita ia, me Vau ngepona ateva Iesu Karisto.

Ami looloo sae va maamasinaane God me luei aue etoka etaimim.

*Nikaili emasina tale uneira niaikaaiia aTesalonika ngatoa*

<sup>2</sup> Nau ekapa atoa, ami kaakaili emasina ta God ta poli mausimim, me ami aaseainam tale kaluimami nilooloo sae.

<sup>3</sup> Nau ekapa atoa ami looloo sae ta matane God Tamaita ia, ami nannaa uunguaaimim elutulutu tale aikaaiiaimim, me niuungu am gheelei tale niaielousi, me karika am maamangoo nau am toitoi voto ita aatoka tuutuliita etana ta kapuita Vau ngepona ateva Iesu Karisto.

<sup>4</sup> Poli ami kilakila va God ghe suoongainamla va natuna am, masi kapuimami etoa, God eaaielousieinam,

<sup>5</sup> ta poli, nau eteva ami ghe poppoaa etaimim, kaluimami masi kiukiu karika ghe mae sio etaimim tale mata nginangari nonga, ta tee sarasarakanan me Spirit Manga ateva, me nannaaimami sarasarakananaili tale masi kiukiu, nongina am ghe tarala vaalua ami ghe toteeimla mausimim.

<sup>6</sup> Am ghe uusilaa gheeleiaaimami me Vau ngepona ateva. Arongona ta am ghe ghaala orioiei asease voto sesa laghe gheelei teeiem, Spirit Manga ateva ghe tau aatu nimasimasi nau eteva am ghe ghaala inangari eteva.

<sup>7</sup> Liuna avalua o me tau ngaisesoa ngakapa atoa eMersedonia me Akaia la taatara atu etaimim va uneira niaimatoongana iem.

<sup>8</sup> Kurruna ateva inangarina ateva Vau ngepona ghe kasula etaimim. Karika laghe nongoala nonga eMersedonia me Akaia. Aikaaiiaimim ta God ngila ghe kila akapa seela. Liuna avalua o me karika ami rooroo tani mene aulaa righi voto.

<sup>9</sup> Poli ila la kiukiuaa vaalua am ghe ghaaiemamil, me la ghauliaa vaalua am ghe liula viliium tale tootoo goto, me am ghe lao sio ta God tani uungu ta God ateva sakesake ia me koronna ia,

<sup>10</sup> me tani toi Natuna ekasu epona liu, ia God ghe totuela tale nimate, me ia Iesu eaasaangita tale sessaiaane God auena emae.

## 2

*Uunguaane Pol eTesalonika*

<sup>1</sup> Am kilakila, kapuimami etoa, va maemaeeaimami etaimim karika ghe nim peisaanelia.

<sup>2</sup> Me auena ami ghe mae etaimim ami ghe ghaa akasinala maate tale maamaulu-aaimami, me laghe gheelei epalataiemamil ePilipae, nongina ngam ghe kilala. Me poli va aisausiaane God, ami ghe ghaala sarasarakanan tani aulaa etaimim masi kiukiu kanna God, arongona ta tau ngai ssateeiemami etoa la gheelei teeiemami voto sarasarakananaili.

<sup>3</sup> Poli inangari nissausi ami aauliaa, karika ekasukasu tale voto kamena me kulukulutana, me karika va ami anna tani kameam.

<sup>4</sup> Me karika, ta ami aippooaa nongina taumattu God ang ghe atokala tuutulina ta ngetaira, me ghe tarala va ami rooroo, me ghe tau mae sio niuungu tani auliaa masi kiuki. Karika ami anna tani amasimasi taumattu, ta ami anna tani amasimasi God poli ia etootoonga urunguitaniimami.

<sup>5</sup> Am kilakila va karika ami ghe gheelei inangari tani nim ghaiem, me karika ami ghe tara ssaila righi peiimim me ami ghe aaisulia va am rau kila. God etaatara me erooroo tani aulia ngaotu isaa oia voto.

<sup>6</sup> Karika ami ghe paepae niaruaa ta ngetaimim o ta mene katoa.

Poli kapuna apostolo iemami Karisto, ami ghe roola va ami ghe tau aatu maate etaimim tale uungua viliki veu.

<sup>7</sup> Me karika, ta ami ghe kaarasila tani toka teeiem nonginaaili va ami kinaim iemami.

<sup>8</sup> Ami ailousiangailiim, liuna avalua o me ami masimasieili, karika va tani auliaa nonga masi kiukiuna God, ta ami tautau aatu tee maamauluuaimami, poli ami maa-masiangailiim.

<sup>9</sup> Koronnaaili, kapuimami etoa, am roo tani nnaa niuungu me aanasa ami ghe ghaaghhaa. Ami ghe uungu eleivoo me ellaa tani ghaa aneimami inana ta poli ami ghe anna va ami rau mene taula maate ta teva taumattu nau ami ghe poppooaa masi kiukiuna God etaimim.

<sup>10</sup> Am, am rooroo tani aulia ngaotu, me God tee, vaalua ami ghe mangala me ghulughuluuenala, me karika am ghe aliu teeiemami tale righi voto, nau ami ghe tokatoka teeiem lo atoa am ghe aaiesoaa.

<sup>11</sup> Nongina am kilakila va ami ghe gheelei kateva kateva etaimim nongina va ami tamaimi iemami.

<sup>12</sup> Ami ghe aasarasarakanaiem me poppooaa inangari nissausi, me ami ghe aulia ngasarasarakana etaimim va, tani kasu tale masi salane God, ia ghe koloamla tani toka tale ararimangalina ateva me tale mallangina ateva.

<sup>13</sup> Me nau ekapa atoa ami kaakaili emasina ta God poli nau am ghe ghaala inangarina ateva God, am ghe nongoala etaimami, karika am ghe ghaiela va arova inangariira taumattu ngatoa, ta am ghe ghaiela va inangarina ia God, me koronnaaili va inangarina ia God. Nau ghaine euungu ta lo atoa etaimim am aaiesoaa.

<sup>14</sup> Poli am, kapuimami etoa, ngam uusilaa nongina vaalua taumattu ngatoa tale alena ale manga God ejjudia ila ta Karisto Iesu: ngam ghe ghaala mmarikeka ta kapuimim atoa tanganueimim eitauaa, nim nongina isaa o ale manga ejjudia laghe ghaala mmarikeka ta ajiu etoa,

<sup>15</sup> laghe uvi ematela Vau ngepona ateva ta Iesu me propete atoa, me laghe ameti veluemamila, me laghe ssatee akapa teela taumattu. Laghe gheleila God ghe tam masimasila.

<sup>16</sup> Ami aloanna tani aippooaa tee lo atoa karika va ajiu ila va la saanga, me laghe toooonga tani ghelei rungainamami. Tale isaa o salana, laghe apasulala tale ssavoto me ghe laula aioghioghi, me tale airuuruu sessaiane God ghe tokala etaira.

### *Pol ghe annaaili tani laa tara aTesononika ngatoa*

<sup>17</sup> Me, kapuimami etoa, ami ghe masaula etaimim tale nau karika aluse (karika va tale ninanna, ta tale vilikiimami ekapa), liuna avalua o me ami ghe paepaeaili salana poli kinatama nannaaimami tani mae taraiem.

<sup>18</sup> Ami annaaili tani mae taraiem, me koronnaaili aghi Pol aghe toooongaala orioata, me Satana egheelei rungainamami.

<sup>19</sup> Poli isaa o voto ami nannangaili va ami ghaa auena, me isaa o uneita nimasimasi me kou nguru aue ami ghaa nau ami tingina ta matane Vau ngepona ateva Iesu nau emae. Karika am kilakila va mausiiim ami masimasi?

<sup>20</sup> Mausiiim me aue ami ghaa nioneoneaa me nimasimasi.

## 3

<sup>1</sup> Poli karika ami ghe roola tani ghaa velu ia o ninanna ngateva tale nannaaimami, ami ghe nnaala va masina va aghi nonga atoka eAten.

<sup>2</sup> Ami ghe suu aatu sio Timoti, ia kapuimami ia, me kapuna tau ngai uungu ia God tani kasuua masi kiukiuna Karisto, tani akorokoronganaiem, me tani auliaa inangari nissausi tale aikaiaaimim

<sup>3</sup> va karika teva etaimim emene katuu tale isaa o nitootoonga. Am kilakila amasina va ita aue ita lao tale isaa o ase nitootoonga.

<sup>4</sup> Nau ami ghe tokatoka teeiem, ami ghe auliaa etaimim nau ekapa atoa va aue ita ghaa mmarikana, me am kilakilaivali wa isaa o voto, me ngasuusuu atu Timoti tani mae kila va vaalua aikaiaaimim. Amaamatautu va tale righi ase salana, saikame ateva erau tootoongainiem, me uunguaaimami etaimim erau nim peisaane.

### *Masi kiuki Timoti ghe oghiaa mae sio*

<sup>6</sup> Me ghaine, Timoti ang ghele mae rekataa sio etaimami, ghe kasula etaimim me ghe rekataala masi kiukiu tale aikaiaaimim me niaielousi. Ghe auliaala vaalua am nannainamami tee nimasimasi me am annaaili tani taraiemami, nongina ami tee ami annaaili tani taraiem.

<sup>7</sup> Liuna avalua o, kapuimami etoa, me tale isaa akapa uneimami maate me niuvuvi, ami ghe ghaala airuui ngalo nau ami ghe nongola aikaiaaimim.

<sup>8</sup> Ia oia ami rooroo tani toka, poli am tiitingina akorokorongana ta Vau ngepona ateva.

<sup>9</sup> Ami kaakaili emasina ta God poli am, me mausiimim ami ghaaghaa kinatama nimasimasi eteva ta God.

<sup>10</sup> Eleivoo me ellaam ami looloo sae asarasarakanaaili va ami ghele mene taraiem, me tani mene auliaa tau aatu llo karika tale aikaiaaimim.

<sup>11</sup> Ami looloo sae va aue kapuita God ateva, Tamaita ia, me Vau ngepona ateva Iesu aue eghelei emasalika salana me ami mene mae taraiem.

<sup>12</sup> Aue Vau ngepona ateva eghelei ailousiaaimim enamuu, me epasu esassanga, me ekao vellao ta kateva kateva etaimim me ta mene katoa taumattu ngeleka nongina ami, ami ghe gheleila etaimim.

<sup>13</sup> Ia aue easarasarakana urunguitaniimim, me karika aue righi kaluimim ssavoto me aue am manga ta matane kapuita God ateva Tamaita ia, nau kapuita Vau ngepona ateva Iesu emae tee ila akapa kapuna atoa manga ila.

## 4

### *Ita toka tani amasimasi God*

<sup>1</sup> Liuna avalua o, kapuimami etoa, me ami ghe loeamla vaalua tani toka tani amasimasi God, me tokatokaaimim nau ghaine am usilaa. Me isaa oia ami kookolomiem me ami aulia ngasarasarakanetai amasimasi tani gheleiem va am toka tale ia o ase nitoka ateva nau ekapa atoa.

<sup>2</sup> Poli am kilakila saa inangari niloeloe ami ghe tau aatu sio etaimim, me isaa o inangari, matutulienia ghe mae sio ta Vau ngepona ateva Iesu.

<sup>3</sup> Aloaloannaane God etaimim va am manga, me am akekkeliem tale uunguaa nialai salosalooa see.

<sup>4</sup> Kateva kateva etaimim etani kila vaalua tani ainanganangaa vilikina tale salana manga me nioneoneaa,

<sup>5</sup> karika va sesa ninanaaa emene muemueiniem va am ghelei voto sesa, nongina taumattu ngeleka atoa karika la kilakila God.

<sup>6</sup> Me tale isaa o voto karika teva emene ghelei saasakiaa ta teva kapuna, o ekamea me eghaa peina. Vau ngepona ateva aue eliu aipolipoli sesa tale ia o ase taumattu ngateva, poli isaa o ase ssavoto, nongina ngami ghe auliaa muela, me ngami mene auliaa kieimim.

<sup>7</sup> Poli God karika va ghe kolotala tani tam raarangsana ta ita toka va manga maamauluaaita.

<sup>8</sup> Liuna avalua o me lo ateva erati isaa o inangari niloeloe, karika va eratirati taumattu, ta eratirati God, ia etautau aatu kapuna Spirit Manga ateva.

<sup>9</sup> Me tani ailousiaa mene katoa tau ngaisesoaa, karika righi uunguaaimami tani mene pitipiti me auliaa etaimim, poli God ang ghe apasungaala etaimim vaalua tani aielousiaa mene kateva.

<sup>10</sup> Me koronnaaili, am, am aielousiaa kapuita akapa atoa eMesedonia, me, kapuimami etoa, ami mene aulia ngasarasarakanetai gheleiem va am toka tale ia o ase nitoka ateva nau ekapa atoa.

<sup>11</sup> Am gheleia va ekateva voto namuu ia tale maamauluuaaimim tani toka tale luei, me am annaa nonga uunguaaimim, me am uungu aanasa nongina ami ghe auliaala etaimim.

<sup>12</sup> Me aue tokatokaaaimim tale nau ekapa aue lo atoa eleka la oneoneainam, me am rau mene nim toka, me am anna va katoa la ghelei tau aatu voto am aaloanna.

### *Maemaeaane Vau ngepona ateva*

<sup>13</sup> Kapuimami etoa, ami anna va am kila sa ateva aue elutu ta lo atoa la nim aseasekanua tale nimate, me aue am tam alousiusi nongina taumattu ngakapa atoa poli karika la kilakila va mene teva maulue auena.

<sup>14</sup> Ita aiesoaa va Iesu ghe matela me ghe mene totula, me ita aiesoaa tee va God aue emaeaa Iesu tee lo atoa laghe asekanuela tale aikaaiaira ta Iesu.

<sup>15</sup> Nongina inangarina Vau ngepona ateva, ami aauliaa etaimim va lo atoa ita tokatoka, karika ita ghe mate me Vau ngepona ateva aue emae, karika aue ita kasu ekasina ta lo atoa la aseasekanua.

<sup>16</sup> Ta ia Vau ngepona ateva Iesu aue ekasu epona liu me aue ekolokolo atingina, me tee lingi ngalona ateva kapuira namu ngateva ensolo atoa, me nikolokolo ateva tale unna taua ateva God, me lo atoa laghe aikaaiaala ta Iesu me laghe matela aue la totu ekasina.

<sup>17</sup> Vara me lo atoa ita tokatoka, karika ita ghe mate, aue ita sae aitauaa teeila tale urukookoo tani sou Vau ngepona ateva elomarase, me aue ita toka tee Vau ngepona ateva nau ekapa atoa.

<sup>18</sup> Liuna avalua o me am aippooaa tale inangari niaisausiai tale kateva kateva etaimim tale isaa oia inangari tale maemaeaane Vau ngepona ateva.

## 5

<sup>1</sup> Me, kapuimami etoa, tale nau eteva isaa o voto aue elutu, karika righi uunguaaimami tani mene pitipiti.

<sup>2</sup> Poli am kilakilaaili va nauna ateva Vau ngepona ateva aue emae nongina tau niainao ateva eleivoo.

<sup>3</sup> Nau eteva taumattu ngatoa la ue va, "Ami tokatoka tale luei me aue ami saanga," me aue la nim soghi, ta nitturu sesa aue elutu etaira, nongina vause ateva emoomolena aeghaaghaa nimmarikana, me karika poi aue la saanga.

<sup>4</sup> Me am, kapuimami etoa, karika va am tokatoka tale saurrom, va ia o nau eteva aue eghelei esoghisoghiem nongina tau niainao ateva.

<sup>5</sup> Am akapaaili natuirarua am mallanga ateva me llaa ngateva, karika va ita tale voo ngateva me saurrom ateva.

<sup>6</sup> Liuna avalua o me karika ita mene ghelei nongina katoa la aseasekanua. Ita, ita anguu taataria, me nannaaita emasalike.

<sup>7</sup> Lo atoa la aseasekanua, la aseasekanua eleivoo. Me lo atoa la ropiropi sesa manu, la ropiropi me la veevee eleivoo.

<sup>8</sup> Me poli ita tau ngellaa ita, nannaaita emasalike. Nongina ita aasae sioto ateva, ita atoka niaakaiaa me niaielousi, nongina kapa aisoa vaalau eteva eaakou kassauita ateva, me nitaataaro lao emua tale nisaanga enongina kou nguru eteva, gheeleia tale kapa.

<sup>9</sup> Ta karika God ghe suoiongaintala va ita ghaa sessaiaane, ta nisaanga ta kapuita Vau ngepona ateva Iesu Karisto,

<sup>10</sup> ghe matela etaita, liuna avalua o me arova maulue ita o matena ita, aue ita toka aitauaa teeia.

<sup>11</sup> Liuna avalua o me am asarasarakana kateva kateva etaimim, me am aisueieinam, nongina am gheelei.

### *Airuuruu tale inangari niloeloe*

<sup>12</sup> Me ami loeloeam, kapuimami etoa, tani oneoneaa lo atoa la uungu aanasa elome etaimim, me la ghaaitoieinam ta Vau ngepona ateva, me la ghaauliaa kieimim tale voto.

<sup>13</sup> Am oneoneainila me am aielousieinila poli uunguaairaa. Am toka tee kateva kateva tale luei.

<sup>14</sup> Ami aasarasarakanaiem, kapuimami etoa, tani auliaa kieira lo atoa ngila tokatoka me karika la uungu emasina, me am ppooaa inangari nissausi ta lo atoa ngila laa siosio euu tale ninannaa, me am sausi lo atoa ngila saasaghuighuina, me erau mene sessai parasiem tale taumattu ngakapa atoa.

<sup>15</sup> Am tara va karika teva emene liu sesa tale sesa. Nau ekapa atoa am tootoonga tani masina tee mene kateva etaimim, me ta ila akapaaili taumattu ngatoa.

<sup>16</sup> Nau ekapa atoa am masimasi,

<sup>17</sup> am looloo sae nau ekapa atoa,

<sup>18</sup> am kaili emasina tale isaa akapa ase voto, ta aloaloannaane God etaimim isaa avalua o ta Karisto Iesu.

<sup>19</sup> Am rau mene ghelei epala Spiriti eteva.

<sup>20</sup> Am rau mene rati inangarina ateva God propete atoa la ghaaulieinia etaimim.

<sup>21</sup> Am tootoonga isaa akapa inangari o, me am poso parasi llo masina.

<sup>22</sup> Am akekkeliem tale isaa akapaaili asease voto sesa.

<sup>23</sup> Aue ia God, God ia tale luei, eamanga akapa maamauluuaimim. Me aue spiriti eteva etaimim, me maamauluuaimim, me vilikiimim, lotolu ekapa lotolu ghulughuluena, nau Vau ngepona ateva Iesu Karisto emae.

<sup>24</sup> Lo ateva ekolokoloam, am rooroo tani atoka tuutuliimim etana, me ia aue eghelei isaa o voto.

<sup>25</sup> Kapuimami etoa, am looloo sae mausiiimami.

<sup>26</sup> Am sou kapuita akapa atoa tale niaielousi eteva manga ia.\*

<sup>27</sup> Aghaulia ngasarasarakanan etaimim ta matane Vau ngepona ateva tani riti ia oia uru ngai etikirighi ta kapuita akapa atoa.

<sup>28</sup> Ami looloo sae va aue maamasinaane Vau ngepona ateva Iesu Karisto etoka teeiem.

---

**5:15:** Rom 12:17; 1 Pita 3:9.    **5:16:** Plp 4:4.    **5:18:** Ips 5:20.    **5:19:** Ips 4:30.    **5:21:** 1 Jon 4:1.    **5:23:** 2 Tes 3:3.    **5:25:** Kol 4:3; 2 Tes 3:1.    \* **5:26:** *tale niaielousi eteva manga ia* Tale inangari nge Grik, *tale naingusu manga ia*.

## Aiaaghaluene atikirighi uru ngai Pol ghe pitiela ta aTesalonika ngatoa Inangari emuemua

Pol ghe pitala aiaaghaluene atikirighi uru ngai ghe lao sio tale ale manga ateva eTesalonika tani ghelei emasalika kasina voto tale nau eteva Iesu aue emene mae. Katoa karika laghe kila amasina isaa o voto koronna ia, poli katoa tau ngai aapasunga laghe auliaala va Iesu ang ghe mene mae sio. Mene katoa laghe nnaala va karika la mene ungu, poli ghaisa ngarighi Iesu aue emene mae.

### Tani kila amuemua

Aitiutiu tale inangari 1:1-2

Tani toka akorokorongana tale nau sesa 1:3-12

Tau ngai ghelei saasakiaa inangari nipaopao ateva me maemaeaane Iesu 2:1-17

Vaaluua tani toka nau am toitoi maemaeaane Iesu 3:1-15

Airuuruu tale inangari 3:16-18

<sup>1</sup> Aghi Pol, Saelas me Timoti,

Ami pitipiti aatu ta taumattu ngatoa tale ale manga ateva ona eTesalonika tale ararina atea God Tamaita ia me Vau ngepona ateva Iesu Karisto.

<sup>2</sup> Ami looloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

*Iesu aue esio me etaula aipolipoli ta kapuna atoa*

<sup>3</sup> Uunguaaimami tani kaili emasina ta God nau ekapa atoa mausiimim, kapuimami etoa, me emaamasina tani ghelei isaa o llo voto, poli aikaaiaaimim epiipinosa anamuu nau ekapa atoa, me niaielousi eteva ta kateva kateva etaimim egheelei elao ta mene kateva ange ooroi.

<sup>4</sup> Liuna avalua o me elome tale alena ale manga akapa God, ami aasakeaa vaaluua karika am maamangoo tani ghelei voto masina, me aikaaiaaimim tale isaa akapa nitootoonga me nimmarikana am ghaaghhaa me am tiitingina akorokorongana.

<sup>5</sup> Isaa o voto eaapasunga va unna niaisakei God ghulughuluena tale isaa o voto, me God aue iraiem va masina am tale ararimangalina ateva, am mammarikana mausi ia o ararimagalina ateva.

<sup>6</sup> Nongina nighulughuluena ta matane God va eliu voto sesa ta lo atoa la gheelei voto sesa etaimim,

<sup>7</sup> me aue etau aatu niainoana etaimim lo atoa am ghaaghhaa voto sesa, me etaimami tee. Isaa o voto aue elutu nau Vau ngepona ateva Iesu ekauerekati epona liu, tale kura atea eramerame, tee kapuna ensolo atoa sarasarakananaili ila.

<sup>8</sup> Aue eliu voto sesa ta lo atoa karika la kilakila God me karika la nonganongo usilaa masi kiukiuna kapuita Vau ngepona ateva Iesu.

<sup>9</sup> Aue la ghaa aipolipoli tale voto sesa etaira, tale nitturu eteae tokatoka liu ia, me Vau ngepona ateva aue tiu vella tale taataraane me tale kinatama mallangina ateva

<sup>10</sup> tale ia o nau eteva aue emae, ita kapuna taumattu ngatoa manga ita, ita asaesae ararina atea, me lo atoa la aiesoaa etana la gharueinia. Am tee aue am toka tee lo atoa la aiesoaa ta Iesu, poli am aiesoaa inangariimami etaimim.

<sup>11</sup> Poli isaa o voto etokatoka tale nannaaimami, me nau ekapa atoa ami looloo sae mausiimim, va aue God esausiem tani ghelei voto ghe koloamla tani ghelei, me tale sarasarakaniaane aue am ghelei ekapa isaa o masi voto am aloanna tani ghelei, me isaa akapa gheeleiaimim am gheelei mausi tale aikaaiaimim.

<sup>12</sup> Ami looloo sae va isaa o voto elutu me aue ararina atea kapuita Vau ngepona ateva Iesu am aamuemueia etaimim, me am etana, tale maamasinaane kapuita God ateva me Vau ngepona ateva Iesu Karisto.

## 2

*Tau ngai ghelei saasakiaa inangari nipaopao ateva*

<sup>1</sup> Me tale maemaeaane kapuita Vau ngepona ateva Iesu Karisto, me nivelu eitauua ita gheelei etana, ami kookolomiem, kapuimami etoa,

<sup>2</sup> tani rau mene nnangaili me emoiem tale taumattu la ue va nauna ateva Vau ngepona ateva ang ghe mae sio. La ghele ue va laghe nongoala tale inangari niaulia ngamuemua, o inangari laghe nongola, o inangari tale uru ngai taataraane va ghe kasula etaimami.

<sup>3</sup> Am rau mene tau velu teva taumattu va ekameam tale teva ase salana, poli ia o nau eteva karika aue emae lomose ta nioghi vulu masi voto emae mua, me tau ngai ghelei saasakiaa inangari nipaopao ateva\* aue eotua, lo ateva elaoalo tale salana nitturuu.

<sup>4</sup> Aue eghelei runga salane God, me aue easaesaea tale voto akapaili manga, me aue etoka tale alena ale manga ateva God, me aue eue va ia Goto ia.

<sup>5</sup> Koti am ghe kkalaala va nau aghe tokatoka teeiem aghe aauliaa isaa o voto etaimim.

<sup>6</sup> Me ia oia am rooroo tani kila va sa ateva eghelei rungainia, me aue vira otua tale nau eteva ang ghe suielia.

<sup>7</sup> Ta ia o tau ngai ghelei saasakiaa inangari nipaopao ateva ange tiuala tani apasunga uunguua sarasarakaniaane ghe aaisulua, me lo ateva eghelei rungainia aue etoka ghelei rungainia, lomose ta God aue eghaa velua.

<sup>8</sup> Vara me aue eotu tau ngai ghelei saasakiaa inangari nipaopao ateva, Vau ngepona ateva Iesu aue uvi ematea tale aulao paane ateva, me eturungia tale mallangi maemaeaaane ateva.

<sup>9</sup> Maemaeaa ia o tau ngai ghelei saasakiaa inangari nipaopao ateva aue elao aitauaa tee sarasarakaniaane Satana, me aue eapasunga tale asease sarasarakan, niaimatoonga me mirikolo kamena,

<sup>10</sup> me isaa akapa ase voto sesa tani kame lo atoa aue eraula. Aue eraula, poli laghe ratila tani aielousiaa koronna kiukiu kannia God me aue la ghele saanga.

<sup>11</sup> Liuna avalua o me God aue eghelei savisavila nannaairaa, me aue la aikaiaa tale llo kamena.

<sup>12</sup> Liuna avalua o me God aue eghelei niaisakei etaira, poli karika laghe aaiesoaa tale llo koronna, ta laghe masimasiaa llo sesa.

### *Inangari niaisausiaa tani tingina akorokorongana*

<sup>13</sup> Uunguaimami tani kaili emasina ta God nau ekapa atoa poli mausiimim, kapuimami etoa, Vau ngepona ateva eaailousieinam. Ami kaakaili emasina ta God ta poli aitiutiu God ghe suoongainamla va am saanga tale uunguane Spiriti eteva, tani manga poli am ghe aiesoala tale koronna kiukiu kannia God.

<sup>14</sup> Ghe koloamla tani saanga tale masi kiukiu ami ghe poppoaa, liuna avalua o me am tee aue am ghaa mallangina ateva kapuita Vau ngepona ateva Iesu Karisto.

<sup>15</sup> Liuna avalua o, kapuimami etoa, me am tingina akorokorongana, me am poso parasi voto ami ghe apasungaala etaimim, tale inangari am ghe nongola ta paaaimami me tale uru ngai ami ghe pitila.

<sup>16</sup> Aue ia kapuita Vau ngepona ateva Iesu Karisto, me God Tamaita ia, ghe aielousieintala, me tale maamasinaane ghe tau mae sio inangari niasarasarakan tokatoka liu me masi voto emua etaita,

<sup>17</sup> easarasarakana urunguitaniimim, me eaisausieinam tani ghelei isaa akapa masi niuungu me inangari.

## 3

### *Pol ghe kolomila tau ngaisesoa ngatoa tani looloo sae mausiira*

<sup>1</sup> Liuna avalua o, kapuimami etoa, me am looloo sae mausiiimami, me aue inangarina Vau ngepona ateva ekasu parasi ekapa see, me la oneoneainia nongina am, am ghe oneoneainia.

<sup>2</sup> Me am looloo sae va God eghaa oghiemami tale sesa taumattu ngatoa la ghelei voto karika masina, fa poli karika va taumattu ngakapa atoa la ghaaikaiaa ta God.

<sup>3</sup> Me Vau ngepona ateva eghelei voto ghe uela va eghelei, me aue easarasarakanaiem, me eghelei rungainam ta sesa taumattu ngateva.

<sup>4</sup> Ami aatoka tuutuliiimami ta Vau ngepona ateva va am toka ghelei voto ami ghe aulia ngasarasarakanala etaimim, me aue am toka ghelei isaa o voto.

<sup>5</sup> Aue Vau ngepona ateva ekatula ngaghulughuluena urunguitaniimim tani lao tale ailousiaane ateva God me nitigina asarasarakana ta Karisto.

### *Niaulia ngaotu tale uunguua tani nim toka*

---

\* **2:3:** 1 Tim 4:1; 1 Jon 2:18; 4:3.    **2:3:** tau ngai ghelei saasakiaa inangari nipaopao ateva Katoa uru ngai laghe pitila, la ghe pitila va tau ssavoto ateva.    **2:4:** Den 11:36; Esik 28:2.    **2:8:** Ais 11:4; Aotu 19:15.    **2:9:** Aotu 13:11-13.

**2:13:** 2 Tes 1:3; Ips 1:4.    **3:4:** 2 Ko 7:16; Gal 5:10.

<sup>6</sup> Tale ararina atae Vau ngepona Iesu Karisto, ami aaulia ngasarasarakanana etaimim, kapuimami etoa, va am kasu emasalika ta lo atoa kapuita la nim tokatoka me karika la usilaa inangari am ghe ghaala etaimami.

<sup>7</sup> Poli am kilakila vaalua tani usilaa gheeleiaaimami, karika ami ghe nim tokatoka nau ami ghe tokatoka teeiem.

<sup>8</sup> Karika ami ghe nim namanama inana ta teva taumattu, ta ami ghe polipoli, me ami ghe uungu aanasa eleivoo me ellaa tani ghelei va ami rau mene taula maate ta teva etaimim.

<sup>9</sup> Ami ghe gheelei llo, karika va poli karika masina etaimami tani ghelei, ta ami ghe anna va ami ghe apasunga voto am aimuli tee.

<sup>10</sup> Nau ami ghe tokatoka teeiem, ami ghe aulia ngasarasarakanala etaimim va, "Lo ateva taumattu etam aloanna tani uungu, erau mene namanama."

<sup>11</sup> Ami nongonongo va katoa elome etaimim la nim tokatoka, karika la uungu me la nim toka aauliaa uunguairaa katoa.

<sup>12</sup> Isaa o ase taumattu ami aulia ngasarasarakanana, me aaloannaaimami tani auliaa etaira tale ararina atae Vau ngepona ateva Iesu Karisto, va la toka rarieinila me la nama inana la uunguua.

<sup>13</sup> Me ta ngetaimim, kapuimami etoa, am rau mene mangoo vulu tani ghelei voto masina.

<sup>14</sup> Arova teva etam nongo usilaa inangari niloeloe ami aauliaa tale uru ngai etikirighi oia, am tani tara toooongainia me am rau mene ghuia, tani attara mataneia me epalata.

<sup>15</sup> Me am rau mene taraiia va tau ngai ssateeimi ia, ta poli kapuita ia, am auliaa kienaa.

#### *Pol ghe arangiseilala*

<sup>16</sup> Isaa oia, aue Vau ngepona ateva luei ia, ia aue tau aatu luei nau ekapa atoa me tale isaa akapa salana. Vau ngepona ateva aue etoka aitaua ngakapa teeiem.

<sup>17</sup> Aghi Pol apitipiti isaa oia inangari niarangise tale nimaghi etelange, me ia oia niaimatootoongana ateva etokatoka tale isaa akapa uneghi uru ngai apitipiti, tani apasunga va aghi aghe pitila.

<sup>18</sup> Alooloo sae va aue maamasinaane kapuita Vau ngepona ateva Iesu Karisto etoka teeiem akapaili.

## Aitiutiu etikirighi uru ngai Pol ghe pitiela ta Timoti Inangari emuemua

Pol ghe soula Timoti tale unna aiaaghaluene ateva nikasu, me ghe koloala tani mae aitauaa me euungu eitauaa teeia (Apostolo 16:1-3). Timoti ghe usila Pol, me lalu ghe uungu eitauaala oroi ninamanama. Tale nau eteva Pol ghe pitila ia oia uru ngai etikirighi, Timoti ghe tokatoka eIpises, me ghe muemueaa ale manga ateva okae.

Pol ghe aloannala tani akorokorongana Timoti me tee tani tau lao kasina niloeloe tale voto atoa laghe lutula tale ale manga eIpises. Ghe pitila voto tale nilooloo sae, vaalua tani amatoonga elda ngatoa me rikina atoa, nisausi ta vause rauve vulu etoa, vaalua tani nnaa ta lo atoa karika la tokatoka tale aloannaaira, me vaalua tani nnaa tale viliki veu.

### **Tani kila amuemua**

Aitiutiu tale inangari 1:1-2

Pol me Timoti 1:3-20

Vaalua tani ikkua ngakoronna tale ale manga 2:1-4:16

Vaalua taumattu ngatoa la tani toka 5:1-6:2

Inangari niloeloe ta Timoti 6:3-20

<sup>1</sup> Aghi Pol, kapuna apostolo ieghi Karisto Iesu ta niaulia ngasarasarakanan ta God tau ngai asaangiita ia me Karisto Iesu ita atoka tuutuliita etana.

<sup>2</sup> Ta Timoti natughu koronna io, ta poli unem niaikaiaia.

Alooloo sae va God Tamaita ia me Karisto Iesu kapuita Vau ngepona ia lalu tau aatu maamasinaane God me alousiusiaane me luei.

### *Upanio tale lo atoa la aapasunga kamena inangari*

<sup>3</sup> Nongina aghe auliaala etam nau aghe anna tani lao eMesedonia, va utoka eIpises me uaulia ngasarasarakanan ta kasina taumattu va la rau mene apasunga kamena inangari, karika va inangarina God.

<sup>4</sup> La rau mene tau vella va la lao tale uunguaa kiukiu marripana me tani kila lao tuvuira atoa emua arau. Isaa o voto eaalakuti uunguaa niaikiso me karika egheelei uunguaane God tale niaikaiaia.

<sup>5</sup> Mallooeana isaa o niaulia ngasarasarakanan va niaielousi ekasukasus tale lo ateva urunguita raarangisana ia, me ninannaa masalike me niaikaiaia koronna.

<sup>6</sup> Katoa taumattu ngila ghe kasu vulila isaa o voto me ngila ghe kirila tani laa usilaa inangari karika righi mallooeane.

<sup>7</sup> La ghanna tani tau ngai aapasunga tale inangari nipaopao, me karikaaili la kilakila sa ateva la għalileinie.

<sup>8</sup> Ita kilakila va inangari nipaopao masina arova teva taumattu eapasunga ngamasina voto etana.

<sup>9</sup> Ita kilakila tee va, karika God ghe tau mae sio inangari nipaopao mausi ghulughuluena atoa taumattu. Ghe tau mae sio mausi lo atoa la għeellei saasakia inangari nipaopao me lo atoa la għammatkata, me lo atoa karika la oneoneaa God me tau ssavoto ilā, me karika mangi ilā, me karika la kakkauaa, me uneira lo atoa la uviuvi emate tamaira me kinairia atoa, me lo atoa la għaijuvi emate,

<sup>10</sup> me lo atoa la ailai salosalooa, me lo atoa taita la asoaso tee mene katoa taita, me lo atoa la ainao taumattu, me tau nikamekame atoa me lo atoa la kamekame tale niaiseki, me mene saa righi llo etam laolao aitauaa tee inangari koronna.

<sup>11</sup> Isaa o voto eaasokoi tale masi kiukiuna God ghe tau mae sio etagħi. Ia o masi kiukiun għe mae sio ta masi God ateva taumattu ngatoa la tautea sae.

### *Maamasinaane Vau ngepona ateva ta Pol*

<sup>12</sup> Akaakaili emasina ta Karisto ateva Iesu, kapuita Vau ngepona ia, ghe tau mae sio sarasarakanan me ghe taraiiegħila va arooroo tani għelei emasina uunguaane, me ghe suitoongainaghila wa agħelei.

<sup>13</sup> Arongona ta emua arau aghi agħe poppoa saasakiaa tee God, me agħe uviuvi tau ngajiesha ngatoa, me ssu taumattu ngagħi, Karisto għe apasungaala alousiusiaane etagħi poli agħe għeellei voto karika agħe kilakila va sesa, me karika agħe aiesoaa.

<sup>14</sup> Maamasinaane kapuita Vau ngepona ateva ghe arangise amasinaailieghila, orioiei tee niaikaiaia me niaielousi isaa ta Karisto Iesu.

<sup>15</sup> Kateva inangari koronnaaili ia, erooroo va ita ghaaia, eue va, Karisto Iesu ghe mae sio tale kosa ateva oia tani asaangi tau ssavoto atoa, me ta ila o sesa taumattu ngatoga aghi tani sesaaili ieghi etaira akapa.

<sup>16</sup> Poli aghi sesaaili ieghi, liuna avalua o me God ghe apasungaala alousiusiaane etaghi, me ta ngetaghi ssa taumattu ngaghi, Karisto Iesu ghe apasungaala vaalua toitoiaane aluse karika airuruu etana, tani aimatoonga ta lo atoa aue la ghaisoaa etana, me la ghaa maulue ateva tokatoka liu ia.

<sup>17</sup> Tale kingi eteva tokatoka liu ia, karika ematemate me karika ita taataraia, ie nongaaili Goto ia, ita oneoneainia me ita taue sae nau ekapa atoa. Koronna.

<sup>18</sup> Timoti, natughu, aloeloeo tale isaa oia inangari elaolao aitauaa tee niaulia ngamue-mue laghe gheleila etam. Me nau uaimuli tee aue uaiuvii emasina tale unna niaiuvi eteae Vau ngepona ateva.

<sup>19</sup> Uposo parasi tale niaikaiaia me tale masalike ninannaa. Katoa laghe ratila isaa o voto me aikaiaairaa ang ghe sesala.

<sup>20</sup> Tale ia o ase taumattu ngateva, Aemenaeas me Aleksanda elome etaira. Ngaghe taulalue lao sio ta Satana tani apasunga etairarua va lalu rau mene ppooaa saasakiaa ta Vau ngepona ateva.

## 2

### *Uunguua nikkauaa*

<sup>1</sup> Aghaaulia ngasarasarakanva aitiutiu tale isaa akapa voto, isaa akapa nilooloo sae me nikaili emasina ita gheelei ta taumattu ngakapa,

<sup>2</sup> ta kingi etoa me ta lo atoa la ungul tale niuungu matuutulienia, va aue ita toka tale luei me karika nimatautu, tale salane God me tale nimanga.

<sup>3</sup> Isaa o voto masina me eaamasimasi God tau ngai asaangiita ia.

<sup>4</sup> Eaanna va taumattu ngakapa esaanga me la ghaa alomasaanga tale voto koronna.

<sup>5</sup> Poli kateva nonga ia God ateva, me kateva nonga ia tau ngai sausia ngateva elome ta God me taumattu. Ia o taumattu ngateva Karisto ia, Iesu etana.

<sup>6</sup> Ghe tau lao sio maamauluaane tani poli aaoighi isaa akapa taumattu. Isaa o inangari koronna ghe tau mae sio tale nauna tuunga ateva.

<sup>7</sup> Tale mausi llo me God ghe suitoongainaghila va tau ngai ppooaa ieghi me aghapostolo me tau ngai aapasunga ieghi tale koronna niaikaiaia ta lo atoa karika ajiu ila. Aghaaulia ngakoronna, karika akamekame.

<sup>8</sup> Liuna avalua o me aghanna va taita akapa atoa tale isaa akapa voto la ssuuaa sae nimaira manga tale nikokkolomi me karika emene sessaila o la ghaikiso.

<sup>9</sup> Tale isaa o salana, aghanna va vause atoa la molu tale ase nimolu emasina tale tummatavanga me taatara taumattu. Karika va tani rungiaa viliki veu tani poli asease voto tani ghelei emasina taatara uu nguruiraa o tani asae gol o pels o ghinna aipolina isaa arau epona.

<sup>10</sup> Me tani molu tale niuungu masina, isaa o voto masinaaili ta lo atoa vause la ue va la kakauaa God.

<sup>11</sup> Vause ateva ekila voto tale uunguua nimatua ngatoka me tani nongo inangari me tani oneoneaa lo ateva eaapasunga.

<sup>12</sup> Karika aghanna va vause atoa la ghasunga, o la ghelei niuungu sarasarakanva tani lau taita atoa. Ila la nim matua atoka.

<sup>13</sup> Poli God ghe ghelei ekasinala Adam me avirina Ivi.

<sup>14</sup> Me karika va Satana ghe kamela Adam ta ghe kamela vause ateva me ghe tau ssavotola.

<sup>15</sup> Me vause atoa aue la saanga poli la kaakaai aliki, arova la tam mangoo vulu niaikaiaia, niaielousi me nimanga tee tale taatara taumattu.

## 3

<sup>1</sup> Kateva inangari koronnaaili ia, lo ateva ange annaala tale urunguitanina ateva va e-elda, ange nnaala niuungu eteva nioneoneaa etana.

<sup>2</sup> Ia o elda ngateva karika mene sesa gheeleiaane, me ekateva nonga vausenna ateva, me aue eapasunga va eaitaraa tokatokaane, taumattu ngatoa la oneoneainia, me eaaitaraa taumattu nau la laolao tanganuena, me tau ngai aapasunga ia,

<sup>3</sup> karika tau niropi ia, me karika tau nisessai ia, ta ennaa mene kateva, me karika eaakiso me karika eaelousiaa viliki veu.

<sup>4</sup> Etani aaitara ngamasina vausenna ateva me natuna atoa, me etara va natuna atoa la nongonongo usilainia me la gheelei masi nioneoneaa etana.

<sup>5</sup> Arova teva taumattu karika ekilakila vaalua tani aitaraa vausenna ateva me natuna atoa, vaalua aue eaitaraa alena ale manga ateva God?

<sup>6</sup> Karika va evira mene aikolikoliaa, ta erau tau sae nannaane, va ekatuu va eghaa niaiskei nongina raroai eteva.

<sup>7</sup> Tau ngeleka atoa la tani oneoneainia me erau mene katuu lao tale voto karika masina me tale unna airekreti eteae raroai eteva.

<sup>8</sup> Rikina atoa ila tee taumattu ngatoa la oneoneainila, me karika tau nikamekame ila, me karika la ropiropi sesa manu, me la rau mene kuruetu tale viliki veu.

<sup>9</sup> La poso parasi voto eaaisulia tale niaikaiaa, tee tale ninannaa masalike.

<sup>10</sup> La toongila mua me arova karika righi voto sesa la tara etaira, erooro va la rikina.

<sup>11</sup> Tale isaa o salana, vauseniira\* tee atoa, taumattu ngatoa la oneoneainila. Karika va tau nigheli saasakiaa taumattu ila tale inangariira, ta la aitaraa tokatokaaira me tale isaa akapa voto ita rooroo tani atoka tuutuliita etaira.

<sup>12</sup> Rikina ateva evausenna nonga kateva me etani aitara ngamasina natuna atoa me lo atoa la tokatoka tanganuena.

<sup>13</sup> Lo atoa la uungu emasina, la ghaagħhaa nioneoneaa me la sarasarakanaili tani auliah aikaiaiaira ta Karisto ateva Iesu.

<sup>14</sup> Arongona ta aghaaisoaa va ghaisa ngarighi amae taraiem, apitipiti isaa oia inangari niloeloe

<sup>15</sup> me arova atam mae parasi, aue ukila vaalua taumattu ekasu me euungu tale tau ngaisesoa ngatoa, kapuna ila Goto ateva etokatoka liu. Ale manga ateva suena ia me voto koronna etokatoka saoaa etana.

<sup>16</sup> Koronnaaili, voto aisuliana emua arau tale salane God namungaili:  
Ghe rekataala taumattu ia

me Spiriti eteva ghe apasunga ngamasalikala va ia Natuna ia God.

Ensolo atoa laghe taraiela

me apostolo atoa laghe ppooiniela tale anue namu ngatoa.

Taumattu tale kosa ateva laghe aikaiaala etana,

me God ghe għħaie saela epona liu.

## 4

### *Inangari niloeloe Pol għe auliaala ta Timoti*

<sup>1</sup> Spiriti eteva ghe aulja ngamasalikangailila va tale isaa oia nau me nau too emaema, katoa aue la kasu vuli niaikaiaa me la usi raroai etoa tau nikamekame ila me voto raroai etoa la għapapunga.

<sup>2</sup> Isaa o ase niapasunga emaema ta usimaghluu atoa tau nikamekame ila. Nannaaira karika eroo tani kila voto masina me sesa.

<sup>3</sup> La għeeli runga taumattu ngatoa va la rau mene lai, la ue va la rau mene nama kasina ase nginna, God għe għeilei me pei ninama tee nikaili emasina ta lo atoa la għaiesoaa me la kilak llo koronna.

<sup>4</sup> Isaa akipa voto God għe għeilela, masina, me karika ita mene rati righi ase nginana arova ita għha tee nikaili emasina.

<sup>5</sup> Poli God eaamangaia tale inangarina ateva me tale uneita nilooloo sae.

<sup>6</sup> Nau uauliaa isaa o voto ta kapuita atoa, io aue umasi tau ngai uungu ta Karisto Iesu, nau uanginio tale voto kanna God tale inangari niaikaiaa me tale niapasunga koronna uaimuli tee.

<sup>7</sup> Urau mene aimuli tee kiukiu marripana me kiukiu kaluira vause namu ngatoa, karika la oneoneea God. Ta ugħelexi nonga tani għha għeelleiaane God.

<sup>8</sup> Poli niaimatoonga tale nianamisi masina, ta egħeeli emasina vilikiita, me għeelleiaane God esausio tale isaa akpa voto me egħeeli inangari nialokoi tale maulue ateva ghaine me auena.

<sup>9</sup> Kateva inangari koronnaaili ia, erooroo va ita ghaaia.

<sup>10</sup> Mausi isaa o voto me ita uungu tale niaanasa me niasaraka me ngita ghe atokala tuutuliita ta Goto ateva etokatoka liu. Ia tau ngai asaangi ia ta taumattu ngakapa atoa, me tani lo atoa la ghaiesoaa.

<sup>11</sup> Uapasunga isaa o voto me uaulia ngasarasarakanana etaira va la nongo usilaa.

<sup>12</sup> Utingina asarasarakana tale voto koronna. Urau mene ghelei va taumattu ngatoa la tara aloio sio eeu poli aliki taita io. Utuu niamatoonga ta tau ngaisesoa ngatoa tale inangari, tale gheeleiaam, tale niaelousi, tale niaikaiaa me tale niraarangisana.

<sup>13</sup> Uatoka maamauluuaam tani riti Uru ngai Manga ateva tale tummatavanga, tani ppooaa me tani apasunga, me auena amae.

<sup>14</sup> Urau mene rati voto God ghe nim tau aatu sio, ughe ghaala tale inangari kanna God nau elda ngatoa laghe saoaala nimaira etam.

<sup>15</sup> Utani uungu esarasarakana tale isaa o voto. Utauo lao akapa tale isaa o voto me ila akapa aue la tara uunguam ugheelei.

<sup>16</sup> Utani aitokaa tee maamauluuaam me tale voto uapasunga. Arova utam oghi vulu isaa o voto, aue easaangio me lo atoa tee la nonganongoio.

## 5

### *Uunguaane Timoti tale tau ngaisesoa ngatoa*

<sup>1</sup> Urau mene sama anamuu tee taita namu ngateva me esessaio etana, ta uloea tani asarasarakanaia nongina va tamam ia. Ughelei aliki taita atoa va tue me nenga iem,

<sup>2</sup> vause namu ngatoa va kinam ila, me aliki vause atoa va kapum vause ila. Ughelei isaa o llo voto tale niraarangisana.

<sup>3</sup> Utani aitara ngamasina lo atoa vause rauve vulu ila karika poi righi aisausiira.

<sup>4</sup> Me arova vause rauve vulu eteava righi natuna o tuvuna, ila la kila akasina tani apasunga aikaiaairaa tale uunguaa nikkuuuaa tani aitaraa lo atoa kalakalangina ila etaira, tani liu aitaraa kinaira me tamaira me tuvuira atoa etaira, poli isaa o voto God emasimasia.

<sup>5</sup> Lo ateva vause rauve vulu ia etuutukuna tale voto ealoannaaili me karika toa tani aitarainia, eaatoka tuutulina ta God me eloooloo sae voo me llaa tani kolomi niaisausi ta God.

<sup>6</sup> Me lo ateva vause rauve vulu etokatoka tani amasimasia, ang ghe matela arongona ta sakesake ia.

<sup>7</sup> Utauila ta taumattu ngatoa isaa oia inangari niloeloe me karika teva taumattu aue eroo tani auliaa saasakiaa teeila.

<sup>8</sup> Arova teva taumattu karika eitarraa mangalina atoa me tee tamane me kinna me tuena me nengane atoa me natuna atoa, ang ghe ratila niaikaiaa me sesaane elaulau lo atoa karika la ghaisoaa.

<sup>9</sup> La piti sio arariira lo atoa vause rauve vulu ila aneira ninamanama ang ghe laula ghaonomongauluae (60), me laghe tokatoka amasina tee taitaniira atoa,

<sup>10</sup> me laghe kilakila akapaila tale masi gheeleiaaira, nongina aitarraairaa tale aliki, me masinaaili ila tani aitarraa taumattu ghe laolao tanganueira, me laghe porapora kkeira kapuna taumattu ngatoa God, me laghe saasausi lo atoa laghe tokatoka tale sesa nau, me laghe tautau lao maamauluuaira tani ghelei isaa akapa asease masi niuungu.

<sup>11</sup> Lo atoa rauve vulu aliki vause ila, urau mene piti sio arariira va rauve vulu ila, poli aaloannaaaira tani lai namungaili me elaulau inangari nialokoi laghe gheleila ta Karisto.

<sup>12</sup> Isaa avalua o me aue la aisakei poli karika la ghelei llo laghe auliaala tale inangari nialokoi va la ghelei.

<sup>13</sup> Me tee la nim toka ghelei kateva ase voto tani nim toka me la paapaangale me karika nonga va la nim tokatoka ta la ghaikusia me la nim toka auliaa uunguaaira katoa. La ghaauliaa voto karika masina va la ghauliaa.

<sup>14</sup> Liuna avalua o me atautaula masi ninannaa ta aliki vause atoa rauve vulu ila va la mene lai, me la ssu aliki, me la ghaitaraa tanganueira, me karika aue la taula righi nauna tau ngai ssateeita atoa tani auliaa saasakiaa teeila.

<sup>15</sup> Katoa ngila ghe kirila tani aimuli tee Satana.

<sup>16</sup> Arova teva vause tau ngaisesoaa ia, me toa rauve vulu la tokatoka teeia, eitarainila me esausila tani ghelei me ale manga ateva erau mene maate. Me ale manga ateva aue esausi nonga lo atoa vause rauve vulu ila la tuutukuna tani ghaa aaloannaaaira.

<sup>17</sup> Lo atoa elda la gheelei emasina uunguaa ale manga ateva, la taula namuu nioneoneaa, tani lo atoa uunguaairia tani ppooaa me apasunga.

<sup>18</sup> Poli Uru ngai Manga ateva eue va, “Nau vulumakao ateva euungu tani ghaa velu viliki raisi, am rau mene gheelei runga paane ateva va karika emene nama isaā o raisi,” me, “Emaamasina va tau ngai uungu eteva eghaa aipolipoli tale uunguaane egheelei.”

<sup>19</sup> Urau mene nongo teva taumattu eauliaa tee teva elda. Arova evira ghalua o kotolu taumattu la vira aulilia teeia ta ie nonga o voto ateva.

<sup>20</sup> Lo atoa la gheelei sesa voto, usama anamuu teeila tale tummatavanga, me mene katoa elda aue la matautu tani gheelei sesa voto.

<sup>21</sup> Ngatautau aatu isaa o voto tani aitaraa isaa oia inangari niloeloe, ta matana God me Karisto Iesu me ensolo atoa suisuitoongainila. Urau mene aimassiaa.

<sup>22</sup> Urau mene ailiului tani saoaa nimam me urau mene usi katoa tani gheelei ssavoto. Uaitrainio tani raarangisana.

<sup>23</sup> Urau mene ropi nonga manu ta ukaii tee uaeni enim pisikeaili tani sausi kovam ateva poli umim toka iisiki.

<sup>24</sup> Katoa taumattu eotuotu kaluira ssavoto tale ia arau o nau eteva, me auena eghaa nau niaiskei. Me mene katoa kaluira ssavoto karika eotuotu, ta auena etani otu tale nau niaiskei.

<sup>25</sup> Tale isaa o nonga ase salana masi niuungu eotuotu, arongona ta llo karika eotuotu, isaa o voto karika aue eaisuliaa.

## 6

<sup>1</sup> Lo atoa la uungu me karika la tokatoka tale aloannaaira, la nnaa va vauira atoa la roro va la ghaa nioneoneaa namuu, me karika aue la ppooaa saasakiaa tee ararina atae God me voto ita aapasunga.

<sup>2</sup> Lo atoa vauira atoa la ghaisoaa, la rau mene ghelei va oneoneaaira etaira episike poli la kakkaua ngaitauua. La tani uungu emasinaaili etaira, poli lo atoa la ghaaghaa voto etaira nau la uungu, tau ngaisoaa ila me masinaaili ila etaira.

Uapasunga isaa o voto etaira me uaulia ngasarasarakanava la ghelei.

### *Niaielousiaa viliki veu*

<sup>3</sup> Arova teva eapasunga kamena niaiesoaa, me karika elao aitauaa tee masi inangari niloeloe kanna kapuita Vau eteva Iesu Karisto, me tale niapasunga eoneoneaa God,

<sup>4</sup> ia etautaue sae nonga me karika ekilakila righi voto. Eanna nonga tani toka aikiso me aissakeana tee inangari, eaalutu nisessaia ta katoa peiira me ia karika, me niaikiso elome ta ghalua taumattu, niauliaa saasakiaa ta kateva, me sesa voto la nim nannaee tene mene kateva,

<sup>5</sup> karika niruu tale niaitamamarasii elome tale taumattu nannaaira karika masina. Karika la roo tani alomasaanga tee voto koronna, me la ghanna va salane God la ghaaghaa viliki veu etana.

<sup>6</sup> Emaamasina etaita tani ghelei llo voto eamasimasi God me ita masimasiaa saa llo etautau mae.

<sup>7</sup> Poli karika ita mae aitauaa tee sio righi voto tale kosa ateva oia me karika aue ita kasu etauaa tee righi voto tale kosa ateva oia.

<sup>8</sup> Arova righi inana me aiaasae etaita, ita masimasiaa isaa o voto.

<sup>9</sup> Lo atoa taumattu la ghanna tani tue peipeiena la kaakatuuo lao tale nitootoonga me airrekati eteae, me tale ase voto alokapakapanna me sesa nialoanna, me ekaakatulainila lao tale voto sesa me aue la ghaa nitturuu.

<sup>10</sup> Poli uunguaa niaielousiaa viliki veu liuena ia tale isaa akapa ase voto sesa. Kasina taumattu eannaaili tani ghaa viliki veu me ngila ghe kasu vulila niaikaiaa, me ngila ghe ghaala nimmarikana tale asease nialousiusi.

### *Airuuruu tale inangarina niloeloe Pol*

<sup>11</sup> Me io, kapuna taumattu ngateva God, uilou vulu isaa o voto, me uaimuli parasi tani ghaa voto ghulughuluena, aloannaane God, niaikaiaa, niaielousi, nitoka akorokoron-gana ta God, me uunguaa tani siuua ninannaa.

<sup>12</sup> Uaiuvuviitale masi niaiuviitale niaikaiaa, me uposo parasi maulue ateva tokatoka liu ia nongina God ghe koloola nau ughe gheleila masi niaulia ngaotu ta mata ngoroi etoa.

**5:18:** Diut 25:4; 1 Ko 9:9; Mat 10:10.    **5:19:** 2 Ko 13:1.    **5:20:** Ips 5:11.    **6:1:** Ips 6:5.    **6:2:** Plm 16.    **6:3:**

Gal 1:6-9.    **6:5:** 2 Tim 3:8; 4:4; Tts 1:14.    **6:6:** 1 Tim 4:8; Plp 4:11-12; Hib 13:5.    **6:7:** Job 1:21.    **6:10:** Ips 5:5.

**6:11:** 2 Tim 2:22.    **6:12:** 1 Ko 9:25-26; 2 Tim 4:7.

<sup>13</sup> Tale taataraane God, ia etautaula maulue tale isaa akapa voto, me ta Karisto Iesu, ghe auliaala inangari koronna nau Pontius Paelat ghe kolomila nikokkolomi, aghaaulia ngasarasarakana etam va

<sup>14</sup> utani aitaraa niaulia ngasarasarakana akapa me karika teva ae etara righi sesa gheeleiaam me karika ae la aliu teeio righi voto, lomasina ta kapuita Vau eteva Iesu Karisto esio,

<sup>15</sup> me God aue emaeaa tale nauna ia ghe suoongaala. God ateva taumattu ngatoa la tautea sae me ie nonga tau ngaitoitoi ia, kingi ia ta kingi ekapa atoa me vau ia ta vau ekapa atoa,

<sup>16</sup> ia nonga karika ae emate, me etokatoka tale mallanga karika ita rooroo tani lao etana, ia karika teva ghe tarai o erooroo tani tarai. Ta getana taumattu ngatoa la tau lao nioneoneea me sarasarakana nau ekapa atoa. Koronna.

<sup>17</sup> Uaulia ngasarasarakana ta lo atoa tue peipeiena ila tale kosa ateva oia tale isaa oia nau tani rau mene aasake me la rau mene atoka tuutuliira tale peiira, poli isaa o voto eroo tani kapa parasi. Me la atoka tuutuliira ta God poli ia etautau mae oroieili voto etaita me isaa akapa voto tani amasimasita.

<sup>18</sup> Uaulia ngasarasarakana etaira tani ghelei oroieili masi niuungu, me la aitauaa peiira me la masimasi tani aiparruuii.

<sup>19</sup> Tale ia o salana atikirighi, ae la atoka oroieili masi voto atoa tani sueila nau ngemuli epona liu, me aue la ghaa maulue ateva koronnaaili ia.

<sup>20</sup> Timoti! Uaitara ngamasina saa llo voto laghe tau aatu sio etam va uitaraa. Uliu vilim tale nisama kamena me karika eauliaa God, me uakekkelio tale lo atoa la apasunga inangari kamena la ue va alomasaanga.

<sup>21</sup> Katoa taumattu laghe usilaala ia o salana atikirighi, me laghe tiu ppaela tale uunguua niaikaaiaa.

Alooloo sae va maamasinaane ateva God aue etoka teeio.

## Aiaaghaluene atikirighi uru ngai Pol ghe pitila ta Timoti Inangari emuemua

Pol ghe pitila ia oia uru ngai etikirighi tale airuuruu nau tale maamaulueaane, me eaauliaa niaikapukapuaa elome ta Pol me Timoti. Pol ghe auliaala kienaa va niapasunga kamena enaanamu, me taumattu ngatoa aue la aikaiaia tale ia o nikamekame. Ghe auliaala Timoti va etani tingina akorokorongana tale voto koronna, me aue eghaa masi aipolipoli ta God.

### Tani kila amuemu

Aitiutiu tale inangari 1:1-2

Niaulia ngakorokorongana tale maamaulueaane Pol 1:3-18

Inangari niloeloe ta Timoti 2:1-26

Airuuruu etoa nau 3:1-9

Mene katoa niloeloe 3:10-4:8

Airuuruu inangarina Pol 4:9-18

Nimasimasi me airuuruu 4:19-22

<sup>1</sup> Aghi Pol, kapuna apostolo ieghi Karisto Iesu me tale aloannaane God, ghe sungieghila tani ppooaa inangari nialokoi maulue tokatoka liu, isaa ta Karisto Iesu.

<sup>2</sup> Ta Timoti, masi natugħu eteva:

Alooloo sae va God Tamaita ia me Karisto Iesu kapuita Vau ngepona ia lalu tau aatu maamasinaane God me alousiusia me luei.

*Niasarasarakana tani tingina akorokorongana*

<sup>3</sup> Akaakaili emasinaaili ta Goto ateva ia o akaakaeinia, tale nannaagħi masalikeaili, nongina tuvugħu etoa lagħe għeelei. Nau ekapaaħili, tale llāa me voo, akaakaili emasina ta God me anannainio tale kalugħu nilooloo sae.

<sup>4</sup> Aghaloannaaili tani mene tarāi, poli aghħannaa rarum matam nau italu ghe aitħħa, me aue amasimasi marova italu mene aitħra.

<sup>5</sup> Akilakila va kalum niaikaiaia koronna għe tokatoka ta kinam ta Junis me tuvum ta Lois, me aghħaesooa va ia o niaikaiaia ngateva ia tee etam.

<sup>6</sup> Liuna avalua o me aghħanna tani mene arava etam va, nongina ita palepale va kura atħae ħarġi, ugħeilei evalua u unguuam tale sarasarakana God għe nim tau aatu sio nau agħe saoħħa nimagħi etam.

<sup>7</sup> Poli God karika eaaloannaita va ita matautu, ta għe tau mae sio spiriti eteva va ita pasu tale sarasarakana, niaielousi, me masi ninnannaa.

<sup>8</sup> Liuna avalua o, urau mene palata tani aulia ngaotu masi kiukiuna kapuita Vau eteva, me urau mene palatainagħi ta karavus iegħi poli agħe poppoa Karisto. Me uaimonomonosia tani għha maamatħana nongina aghi mausi masi kiuki, tale sarasarakaniaane God.

<sup>9</sup> God għe asaangitala me għe kolotala va ita toka tale maulue ateva manga ia tani amasimasi God. Karika għe kolotala poli righi masi għeegħeleiħa. Karika, ta poli tale aloannaane me maamasinaane ateva, ia oia maamasinaane ateva għe taue mae sio etaita ia ta Iesu Karisto, me auena għe għeħlej kosa ateva.

<sup>10</sup> Me isaa oia ang għe apasunga ngaotula nau eteva Karisto Iesu għe mae sio, tau ngi asaangiita ia, għe apalala nimate, me tale masi kiuki, għe apasunga ngaotula etaita maulue ateva tokatoka liu ia.

<sup>11</sup> God għe suo ħiġi għażiex għiex għe għeħlej kosa ateva.

<sup>12</sup> Me liuna avalua o, aghaaghha maamatħana ghaine me karika apaapalata, poli akilakila see agħe aatoka tuutulighi etana, me akilakilaaili va ia erooroo tani aitaraa voto agħe taula etana \* lomosi ta nau eteva eogħi mae.

<sup>13</sup> Uposo parasi niapasunga tale salana koronna ugħe nongħola etaqbi, tale niaikaiaia me niaielousi isaa ta Karisto Iesu.

<sup>14</sup> Tale saasausiaane Spirit Manga ateva etokatoka elome etaita, utani aitarra ngammasinaaili masi kiuki God għe tau sio mae etam.

<sup>1:2:</sup> Apos 16:1; 1 Tim 1:2.    <sup>1:3:</sup> Apos 23:1.    <sup>1:5:</sup> Apos 16:1.    <sup>1:6:</sup> 1 Tim 4:14.    <sup>1:7:</sup> Rom 8:15.    <sup>1:9:</sup> Ips 2:8-9; Tts 3:5.    <sup>1:10:</sup> Hib 2:14.    <sup>1:11:</sup> 1 Tim 2:7.    \* <sup>1:12:</sup> voto agħe taula etana o isaa oia niuunguaa għe tau mae sio etaqbi tani għeħlej.    <sup>1:14:</sup> 1 Tim 6:20.

<sup>15</sup> Ukilakila va isaa akapaaili taumattu tale provinsi eteva eEisia angila ghe ratieghila tani aisausieinagh, tee me kapughu elua ta Pigelus me Emogenis.

<sup>16</sup> Alooloo sae va aue Vau ngepona ateva eapasunga alousiusiaane ta lo atoa la tokatoka tee Onesiporus, poli nau ekapa atoa ghe mae taataraieghi tani asarasarakanaieghi, me karika ghe paapalatainieghi nau irririna ieghi tale sene.

<sup>17</sup> Karika, ta nau ghe mae sio eRom, ghe pae akapaieghi seela lomosi ta ghe taraieghila.

<sup>18</sup> Alooloo sae va aue Vau ngepona ateva eapasunga nialousiusi etana tale ia o nau niaiskei eteva. Me ukilakilaaili vaalua ghe saasausieghi elpises tale asease salana atoa.

## 2

### *Masi tau ngai uvii eteva kapuna ia Karisto Iesu*

<sup>1</sup> Masi natughu eteva Timoti, ukorokorongana tale maamasinaane ateva Karisto Iesu etautaua etam.

<sup>2</sup> Me voto ughe nongola aghe apasungaala tale tummatavanga, isaa o voto utau lao ta lo atoa taumattu urooro tani atoka tuutulim etaira, me aue la roo tani mene apasunga tale mene katoa taumattu.

<sup>3</sup> Ughusi tani ghaa maamatana, nonginaaili masi tau ngai uvii eteva kapuna ia Karisto Iesu.

<sup>4</sup> Karika teva taumattu tau ngai uvii ia erooro tani ghelei mene kasina ase niuungu me etam ghelei emasina uunguaane, karika. Egheelei emasina uunguaane tani amasimasi kapuna namu ngateva.

<sup>5</sup> Nonginaaili arova teva ealoanna tani aikarati tale niaikarati eteae, arova karika eusila ngakapaaili asease salana tani usilaa tale ia o niaikarati eteae, arongona ta eilou vuli ekapaila, karika aue eghaa aipolipoli.

<sup>6</sup> Tau ngai pasa utana ateva karika mangoona ia, ia etani mata ngemua tani ghaa inana emaamatue akasina eutana.

<sup>7</sup> Uannaa parasi sa ateva aghaaulieinia, poli Vau ngepona ateva aue etau aatu alomasaanga tani kila isaa akapaaili voto.

<sup>8</sup> Utani annaa Iesu Karisto, ia tuvuna ia Deivit, God ghe totuela tale nimate. Tani iaaili o masi kiukiu apopppoa ngaotu.

<sup>9</sup> Me poli apopppoa masi kiukiu eteva oia, sesa nitoka eghaaghaieghi, me laghe irieghila tale sene nonginaaili ssa taumattu ngateva. Me karika teva taumattu erooro tani akaravusu inangarinia ateva God.

<sup>10</sup> Liuna avalua o me arooro tani ghaa isaa akapa o maamatana tani sausi lo atoa God ghe suitoonganilala, arova erooro va la saanga, me aue etau mae nioneoneaa tokatoka liu isaa ta Karisto Iesu.

<sup>11</sup> Kateva inangari koronnaaili ia,  
Arova ita mate teeia,

    aue ita maulue teeia.

<sup>12</sup> Arova ita tam oghi vulu maamatana,  
    aue ita toka teeia me aue ita aitara ngakapa voto.

Arova ita ue va ita tam kilakilaia,  
    ie tee aue eue va etam kilakilaita.

<sup>13</sup> Arova ita tam ghelei voto ita ue va ita ghelei,  
    ia aue eghelei voto eue va aue eghelei,  
    poli karika erooro tani aikolikoliaa saa voto ghe uela va aue eghelei.

### *Kapuna tau ngai uungu eteva Vau eteva*

<sup>14</sup> Nau etoa, uauliaa va la rau mene kkaluaa isaa oia voto. Uaulia ngakorokorongana etaira, poli God\* etaatara sa ateva la gheeleia, va la rau mene aissakeana tee malloeana inangari, poli isaa o ase niaissakeana karika erooro tani sausi teva taumattu. Ta enim gheelei saasakiaa lo atoa taumattu la nonganongo.

<sup>15</sup> Ughelei emasina akapa voto, nongina taumattu ngateva karika epaapalataa masi uunguaane, tani apasunga ta God va ia erooro tani masienio, me eapasunga inangari koronna tale salana ghulughuluena.

<sup>16</sup> Uamasalikainio tale nisama kamenia me karika eaulia ngamasalikaa God, poli isaa o inangari aue ekatalaa taumattu ngatoo me aue la masauieili ta God.

<sup>17</sup> Inangariira la ghauliaa me la ghaapasunga, karika masina, nonginaaili sesa usai

**2:3:** 2 Tim 1:8.     **2:5:** 2 Tim 4:8.     **2:6:** 1 Ko 9:7.     **2:8:** 1 Ko 15:4; Rom 1:3.     **2:9:** Ips 3:1, 13; Plp 1:12-14.     \*

**2:11:** 2 Ko 4:11.     **2:12:** Mat 10:33.     **2:13:** Rom 3:3-4; Tts 1:2.     **2:14:** 1 Tim 6:4; Tts 3:9.     **2:14:** God Katoa uru ngai laghe pitila, laghe uela va *Vau ngepona ateva*.     **2:15:** 1 Tim 4:6.     **2:16:** 1 Tim 4:7.     **2:17:** 1 Tim 1:20.

eteva ange uusai enamuu. Elome etaira Aemenaeas me Piletus ilalua avaluaaili o,

<sup>18</sup> lalu ghe kasu vulila voto koronna. Lalu ghe uela va, "Angita ghe totula tale nimate nau ita ghe ghaala niasuu, me auena karika mene teae nitotu." Lalu gheelei saasakiaa uneira niaikaaiaa kasina tana tau ngaisesoaa.

<sup>19</sup> Inangarina ateva God koronna ia, etiitingina nonginaaili suena atiulu karika erooroo tani aisiisia me la gheelei ale ateva epona etana. Me laghe piti elokoila kasina mata ngingangari tale ia o suena atiulu laghe uela va, "Vau palepale ekilakila llo taumattu kapuna," me, "Lo atoa la ue va kapuna ila God, la tani kiri vulu isaa akapaaili voto karika masina."

<sup>20</sup> Elome tale alena ateva tau peipeiena ateva, kasina tana aikaai inana laghe gheleila tale gol me silva me kasina laghe gheleila tale kosa me tale tuku ngai, kasina la namanamaa tale nau namu ngatoa la veluvelu eitauua, me kasina la namanamaa tale nau ekapa atoa.

<sup>21</sup> Lo atoa la gheelei eraarangisanaila, aue la nongina aikaai inana ateva la namanamaa nau namu ngatoa la veluvelu eitauua. Aue la manga, me la tau ngai uungu ta Vau eteva, me aue la aimonomonosiaa tani ghelei isaa akapa ase masi niuungu.

<sup>22</sup> Me uakekkelio tale sesa niuungu aliki taita me vause atoa la aloanna tani ghelei, me ukasu tee voto ghulughuluena me niaikaaiaa, niaielousi, luei, tee lo atoa la ghaatoka tuutulira ta Vau ngepona ateva, me tee urunguitanira raarangisana.

<sup>23</sup> Uamasalikaa tee ase niaissakeana kaluira alokapakapa atoa taumattu, poli ukilakila va isaa o voto, aue ealakuti niaikiso.

<sup>24</sup> Kapuna tau ngai uungu eteva Vau ngepona ateva, karika emene aikiso ta samasamaane esaghuiighuina tee isaa akapaaili taumattu. Etani roo tani apasunga, me erau mene sessai parasia.

<sup>25</sup> Esiooa nannaane nau eloeloe taumattu ngatoa la ghaapasunga llo voto etam lao aitauua tee Uru ngai Manga ateva, me koti God aue ekatulainila tani nna ngaioghioghi me la kila voto koronna,

<sup>26</sup> me aue nannaairaa emasalike me la kasu vuli unna airrekatii eteva Satana, poli ia ghe gheleilala laghe karavusula tani ghelei ssavoto, ealoanna va la ghelei.

### 3

#### *Gheegheleiaira sesa taumattu ngatoa tale airuuruu*

<sup>1</sup> Ukila llo oia va: Airuuruu tale nau, taumattu ngatoa aue la ghaa mmarikana.

<sup>2</sup> Taumattu ngatoa aue la ghailousieinila nonga, me aue la ghailousiaa viliki veu me la ghaasakeainila me aue la saeaa nannaairaa, me aue la ghauliaa saasakiaa ta mene katoa, la tam nongo usilaa tamaira me kinaira, karika aue la kaili emasina, me karika aue la oneoneea God,

<sup>3</sup> karika aue la ghaielousiaa mene katoa, karika aue la ghanna tani aikkaluuaa tee mene katoa, aue la ghelei saasakiaa taumattu tale inangariira, karika aue la rooroo tani apala sesa aaloannaairaa, karika aue la nna ngaitootoonga tee mene katoa, aue la ratirati voto ghulughuluena,

<sup>4</sup> aue la tau kapuira atoa ta tau ngaiussaniira atoa, aue la ailuilui tani ghelei voto sesa, aue la saeaa nannaairaa, aue la ghaielousiaa gheeleiaa kosa ateva me karika aue la ghaielousiaa God.

<sup>5</sup> La aapasunga vara la mene aaimuli usi tee God, me karika ta la ratirati sarasarakaniaane God tani gheleila la ghulughuluena. Uakekkelio tale isaa o taumattu.

<sup>6</sup> Katoa etaira la aikamea tani sso aleira katoa, me la kamekame lo atoa vause karika marekate nannaairaa me maate ila tale ninannaa tale sesa gheegheleiaira, me la kaakatulainila lao tale voto sesaaili.

<sup>7</sup> Ilia o vause atoa la aaloanna tani kila ouna voto, me karika la rooroo tani kila amasina voto koronna.

<sup>8</sup> Emua arau Jannes me Jambres karika lalu ghe tiitingina aitauua tee nannaane Moses,\* me tale ia o salana atikirighi, ila o taumattu ngatoa karika la tiitingina aitauua tee inangari koronna. Sesaili nannaairaa me peisaane ila tale niaikaaiaa.

<sup>9</sup> Nauira karika aue aluse poli taumattu ngakapa atoa aue la tara kila alokapakapaairaa, nongina taita alua o.

**2:19:** Nam 16:5; Jon 10:14; 1 Ko 8:3; Ais 52:11.    **2:22:** 1 Tim 6:11.    **2:23:** 1 Tim 4:7.    **3:1:** 1 Tim 4:1.    **3:5:** Mat

7:15, 21; Tts 1:16.    **3:8:** Eks 7:11.    \* **3:8:** Ajiu etoa la ghe uee va taita alua oia tau nialala ilalua, kapuna ilalua Peroo ta nau Moses. Utara Eksodis 7:11-22.

*Inangari niloeloe ta Timoti*

<sup>10</sup> Me io, ukilakilaaili voto aghe apasungaala, tokatokaaghi, voto aghanna tani ghelei, aikaiaaghi, nongina karika esessai parasiegni, ailousiaaghi, karika aghe sio asoasoaa tale uunguaagi,

<sup>11</sup> maamatana me nimmarikana, voto laghe gheelei teeieghi tale masaliki taatara eAntiok, elkoniam me eListra. Ukilakila va aghe ghaala oroi nimmarikana oia, me Vau ngepona ateva ghe asaangieghila tale isaa o nimmarikana aghe ghaaghaa.

<sup>12</sup> Koronna, lo akapa atoa la aikaiaaa ta Karisto Iesu me la aloanna tani tok a nongina God, aue la ghaa nimmarikana,

<sup>13</sup> me sesa taumattu ngatoa me tau nikamekame atoa karika aue la ruu poi tani ghelei ssavoto me kaluira ssavoto aue oroieili. Aue la kame taumattu ngatoa, me Satana aue ekamela tee.

<sup>14</sup> Me io, unnaa parasi voto koronna ami ghe apasungaala etam, me ukilakila va koronna, poli uatoka tuutulim ta lo atoa laghe apasungaala etam,

<sup>15</sup> me ta nau aliki io, ughe kilala Uru ngai Manga ateva. Uru ngai Manga ateva egheelei alomasaangaita tani kila va God ghe asaangitala nau ita ghe aiesoala ta Karisto Iesu.

<sup>16</sup> Ia akapa Uru ngai Manga ateva ghe mae sio ta paane ateva God, eaaisausieinita tani apasunga, tani pao voto karika masina, tani loeta tale voto karika masina, me tani apasunga salana tani ghelei voto ghulughuluena.

<sup>17</sup> Tale ia o salana atikirighi, kapuna tau ngai uungu eteva God aue eaimonomonosiaa me erooroo tani ghelei asease masi niuungu etoa.

## 4

<sup>1</sup> Ta matane God, me Karisto Iesu, aue eghelei niaisakei ta taumattu ngakapa atoa, maulue ila me matena atoa, me poli emaemae tani aitaraa kosa akapa ateva, aghaulia ngakorokorongana etam:

<sup>2</sup> Tani ppooaa masi kiukiu; unim aimonomonosiaa nau ekapaaili tani ppooainia tale nau la aloanna tani nongo, me nau la tam aloanna tani nongo, urau mene sio asoasoaa tani loe taumattu tani gheleila va la oghi vulu kaluira ssavoto, me uapasunga tani asarasarakanaaila.

<sup>3</sup> Poli nau too emaemae, taumattu ngatoa karika aue la aloanna tani nongo koronna niapasunga. Ta aue la usilaa aloannaairaa, me aue la kolo oroieili tau ngai aapasunga ngatoa tani auliaa etaira sa ateva talingaira ealoannaaili tani nongoa.

<sup>4</sup> Aue la tam aloanna tani nongo inangari koronna, me aue la anna tani nongo asease kiukiu uunguaa kosa ateva.

<sup>5</sup> Me io, uitafarinio tale isaa akapaaili o asease voto. Usau llo voto maate me mmarike, me ughelei uunguaa tau ngai ppooa ngateva tale masi kiukiu eteva, me ughelei ekapa ia o niuungu eteva God ghe tau aatu sio tani gheleia.

<sup>6</sup> Me nau amate, raeghi eteva aue nongina uaeni oprangi eteva la kaokaoa sae tale liu ngehelei aiaavusuvusuena. Naughu oia tani kasu vuli ia oia maulue ateva.

<sup>7</sup> Ngaghe kaarasila tani aiuvii tale masi niaiuviit etae, ngaghe rekatala tale airuuruu tale niaikarati etae. Me ngaghe poso asarasarakanalai niaikaiaia.

<sup>8</sup> Me ghaine aipolipoli eteva, kou nguru ia, etoitieghi, uneira ia lo atoa ghulughuluena ila. Vau palepale ateva ia ghulughuluena ia tani ghelei niaisakei, ia aue atokiae sae ta urughu tale ia o nau eteva emae. Me karika va aghi nonga, ta lo atoa tee la toitoia me la ailousieinia tani taraiia va emae.

*Airuuruu inangarina Pol*

<sup>9</sup> Utotoonga tani mae tara parasieghi,

<sup>10</sup> poli Diimas ghe ailousiangailila gheeleiaa kosa ateva, me ghe kasu vulieghila, me ia eTesonika. Me Kreskens ghe lao sio tale provinsi eteva eGalaisia, me Taetas ia tale provinsi eteva eDalmatia.

<sup>11</sup> Angulau nonga oia me Luk. Ukolo Mak me amalu mae, poli ia eroo tani sausieghi tani uungu.

<sup>12</sup> Aghe sungi tau lao sio Tikikus elpises.

<sup>13</sup> Nau umaemae ughaa mae tee uneghi aiaasae ngeleka ateva aghe velu elokoielaa Troas, tangane Kapus. Ughaa tee mae uneghi vuku, llo vuku aghaloannaili laghe gheleila tale viliki ghaata kkena.\*

**3:11:** Apo 13:14-52; 14:5, 8-20.    **3:12:** Mat 16:24; Jon 15:20; Apo 14:22.    **3:16:** Rom 15:4.    **4:3:** 1 Tim 4:1.

**4:6:** Plp 2:17.    **4:7:** 1 Tim 6:12.    **4:8:** 1 Ko 9:24-25.    **4:10:** 2 Ko 8:23; Apo 15:37-39; Kol 4:14.    **4:13:** Apo 20:6.

\* **4:13:** laghe gheleila tale viliki ghaata kkena llo vuku laghe gheleila tale viliki ghaata kkena, aipolina namungaili, poli karika erooroo tani sesa parasi.

<sup>14</sup> Aleksanda, ia o egheelei voto tale brasi me aeana, ghe ghelei teeieghila oroieili voto karika masina. Me Vau ngepona ateva aue etaula aipolipoli tale sa ateva eghe gheleila.

<sup>15</sup> Io tee uaimonomonosiaa tee ia o taumattu ngateva poli etam aloanna poi inangari-imami.

<sup>16</sup> Karika teva ghe tiitingina tani sausieghi, tale aitiutiu eteva nau aghe tinginala tale naisakei. Taumattu ngakapa atoa laghe kasu vulieghila. Alooloo sae va God ekkaluaa isaa o voto.

<sup>17</sup> Me Vau eteva ghe tokatoka aitauaa teeieghi me ghe tautau mae sarasarakaneta etaghi. Liuna avalua o me aghe ppooa ngakapaailila masi kiukiu ta taumattu karika ajiu ila tani nongoa. Me Vau eteva ghe asaangieghila nau laghe annaala va amate.<sup>†</sup>

<sup>18</sup> Me Vau ngepona ateva aue easaangieghi tale voto akapaaili sesa la aloanna tani ghelei etaghi. Me aue eghaa amasinaaileighi lao tale ararimangalina ateva epona liu. Ta ngetana ita tau sae ararina ateeae nau ekapa atoa. Koronna.

<sup>19</sup> Utuu lao masimasiaaghi ta Prisila me Akuila me ta kapuna atoa Onesiporus.

<sup>20</sup> Erastus etokatoka eKorint, me aghe kasu vulila Tropimus eMiletus poli isikinna ia.

<sup>21</sup> Utootoonga tani mae, me auena nau ttasi. Iubulus, Pudens, Linus me Klaudia la tau aatu sio masimasiaaira tee me ila akapa tau ngaikaaia ngatoa oia.

<sup>22</sup> Alooloo sae va Vau ngepona ateva aue etoka aitauaa teeio. Me masimasiaane God aue etoka aitauaa teeiem akapaaili.

## Uru ngai etikirighi Pol ghe pitiela ta Taetas Inangari emuemua

Taetas kateva namuu tale ale manga atoa tale patunganua ateva eKrit. Nongina Pol ghe pitipitila ta Timoti, ghe mene piti teela inangari niloeloe ta Taetas tale voto tale ale manga, nongina elda ngatoa me rikina atoa. Me tee, ghe auliaala va Taetas eposo parasi inangari koronna, me ghe aakorokorongana Taetas tale niaiesoaa ghulughuluena tale ale manga, niuungu, me taumattu tale kosa ateva oia.

### **Tani kila amuemua**

Atiutiu tale inangari **1:1-4**

Namu ngatoa tale ale manga **1:5-9**

Lo atoa la apasunga voto kamena eKrit **1:10-16**

Nitoka manga **2:1-10**

Liue nitoka tani manga **2:11-15**

Vaalua tani toka tee mene katoa taumattu **3:1-11**

Nimasimasi me airuuruu **3:12-15**

<sup>1</sup> Aghi, Pol, kapuna tau ngai uungu ieghi God, me kapuna apostolo ieghi Iesu Karisto: Ghe sungieghila tani laa ghasarasarakana uneira niaikaiaa kapuna taumattu ngatoa God ghe suitoongainilala, tani apasunga salana koronna, eaapasunga vaalua tani toka tale aaloannaane God.

<sup>2</sup> Ia oia inangari eteva koronna ia, egheeleita ita aatoka tuutuliita tale maulue ateva tokatoka liu ia. God ghe aulia ngalokoielta etaira tale inangari nialokoi emua arau, me auena kosa ateva ghe lutula. Ia karika erooroo tani kamekame.

<sup>3</sup> God, ia tau ngai asaangiita ia, ghe apasunga ngaotula ia oia inangari eteva koronna ia tale nauna tuunga ateva ghe suitoongainiela, me ghe taue mae sio etaghi me ghe aulia ngasarasarakanala etaghi tani ppooainia.

<sup>4</sup> Apitipiti atu etam Taetas, io natughu tuungi io elome tale niaikaiaa italu uunusi. Aloooleo sae ya maamasinaane me luei kanna God Tamaita ia, me Karisto Iesu, tau ngai asaangiita ia, aue etoka etam.

### *Uungua Taetas eKrit*

<sup>5</sup> Aghe kasu vuliola eKrit va ughelei kasina voto karika ita ghe ruula, me usui elda ngatoa tale ale manga, tale kateva kateva masaliki taatara, nongina aghe auliaa tau aatu sio.

<sup>6</sup> Elda ngatoa gheeleiaaira etani masinaaili, karika mene righi sesa gheeleiaaira, me vauseuniira ekateva nonga, me natura atoa la nongo usilainila, la rau mene amakatakata me la tau nissakeaa ila.

<sup>7</sup> Ta lo ateva eitaraa uunguaane God tale ale manga karika mene righi sesa gheeleiaane. Erau mene ue va ia nonga namuu ia, me etau nisessa ia. Erau mene tau niropi sesa manu, me ealona tani aiuvii, erau mene kuruetu tale viliki veu.

<sup>8</sup> Me ia o taumattu ngateva eakoloa taumattu me eitarainila nau la lao tanganuena. Me eailousiaa saa voto masina, me enanna ngamasina, me eghulughuluena, me eraarangisana, me eitaraa nannaane me gheeleiaane.

<sup>9</sup> Eposo parasi inangari koronna, nongina ami ghe apasungaala me erooroo tani aisausiaa mene katoa tale koronna niapasunga, me erooroo tani kiso lo atoa la sessa tee inangari koronna.

<sup>10</sup> Poli aue eoroieili taumattu ngatoa aue la tau nissakeaa me tau ni-nim sama ila me tau nikamekame ila, tani ila o lo atoa la aasarasarakana uunguaan ni-isoiso.

<sup>11</sup> Uauliaa etaira va karika la mene apasunga, poli ngila ghe gheleila katoa taumattu me tee natura atoa tale kateva kateva ale, ngila ghe oghi vulula inangari koronna, laghe nim gheelei isaa o niapasunga tani ghaa uneira viliki veu.

<sup>12</sup> Kateva taumattu eKrit la ghe kolokoloa va propete ia ghe uela va, “Taumattu nge Krit atoa, tau nikamekame ila. Ila nongina sesa ghaata kkena atoa, mangoona ila, me tau ninamanama ila.”

<sup>13</sup> Isaa o inangari koronna. Liuna avalua o me uppooaa inangari sarasarakanana etaira, me aue la roo tani sarasarakanana tale uneira niaikaiaa.

<sup>14</sup> Me la rau mene tau lao nannaairaa tale kaluiraa kiukiu marripana ajiu etoa, me

inangari lo atoa la liuliu viliira tale inangari koronna la poppooa ngasarasarakanana.

<sup>15</sup> Lo atoa urunguitaniira raarangisana, voto akapa etaira raarangisana, me ta lo atoa urunguitaniira karika raarangisana me karika la aikaaiaa, karika righi voto etaira raarangisana, tale isaa akapa ninannaa karika la kilakila eaa sesa me eaa masina.

<sup>16</sup> La ue va la kilakila God, me gheeleiaira eaapasunga va karika la kilakilaia, ila mauuna ila, karika la roo tani nongo usilaa, me karika muenna ila tani ghelei niuungu masina.

## 2

### *Inangari tani apasunga tale asease taumattu*

<sup>1</sup> Me io uapasunga voto koronna elao liao aitauaa tee koronna niapasunga.

<sup>2</sup> Uauliaa ta taita namu ngatoa va la aitaraa tokatokaairia, me uunguaaira, me aippooa airia, me la nanna ngamasina. La tani ghulughuluena tale uneira niaikaaiaa, me niaielousi, me la tingina akorokoronganega eghaa nau eruu.

<sup>3</sup> Me tale ia nonga o salana atikirighi, uapasunga ta vause namu ngatoa, tani apasunga va la oneoneaa God. La rau mene kasu see tani ghelei saasakiaa ta mene katoa tale inangariira, me la rau mene toka aloanna tani toka ropiropi sesa manu, ta la apasunga ta katoa saa voto masina.

<sup>4</sup> Liuna avalua o me ila o vause namu ngatoa la apasunga ta llo vause aviri laghe laila, tani allousia taitaniira atoa me natuira atoa,

<sup>5</sup> me la nanna ngamasina, me la raarangisana, me tani masi vause tani aitaraa paa ngale, me tani aisausiaa, me tani oneoneaa taitaniira atoa, me aeue karika teva eppooaa saasakiaa tale inangarinata aveva God.

<sup>6</sup> Me tale ia nonga o salana atikirighi, uapasunga tee tale llo taita aviri laghe laila, tani nanna ngamasina

<sup>7</sup> tale voto akapa. Me io uapasunga nonga masi voto. Urau mene usimaghala nau uaapasunga, me uapasunga tale masi ninannaa me nioneoneaa,

<sup>8</sup> me utani apasunga nonga koronna tana inangari, me karika teva aeue eauliulieinio. Arova ughelei evalua o, tau ngai ssateem atoa karika aeue la ghauliaa teeio righi voto, me aeue la palata.

<sup>9</sup> Uapasunga ta tau ngai uungu etoa karika la tokatoka tale aloanna airia va la nongo usilaa kapuira namu ngatoa tale isaa akapa voto. Me la tau lao nanna airia me sarasarakania airia tani ghelei voto erooroo tani ghelei emasimasi kapuira namu ngatoa, me la rau mene ssakeainila.

<sup>10</sup> La tani apasunga va la rooroo tani atoka tuutuliira etaira tale isaa akapaa il voto la gheleli me karika la ainao peiira, me aeue la oneoneaa inangarinata aveva God tau ngai asaangita ia.

### *God eaalona akapa taumattu ngatoa tani saanga*

<sup>11</sup> Poli maamasinaane God ang ghe kauerekatila, eaasaangi taumattu ngakapa atoa.

<sup>12</sup> Eaapasunga etaita tani ue va "karika" tale voto karika ita oneoneaa God etana me sesa voto kosa ateva ealoanna, me ita nanna ngamasina, ita ghulughuluena, me ita oneoneaa God tale tokatokaaita tale nau etiulu oia,

<sup>13</sup> nau ita toitoi esarasarakanaaili masi nau eteva nau kapuita Goto ateva me tau ngai asaangita ateva Iesu Karisto emae tale sarasarakaniaane me mallangina ateva.

<sup>14</sup> Ghe taeue mae sio etaita tani ghaa oghita tale isaa akapa sesa voto me tani ghelei eraarangisana taumattu va etani kapunaaili ila me la ghannaaili tani ghelei masi niuungu.

<sup>15</sup> Me isaa toko voto utani apasunga. Uaippooaa teeila tani asarasarakanaaili me ukisoila tale inangari matuutulienia. Urau mene tau velu teva va etara aloio sio euu.

## 3

### *Tani ghelei voto masina*

<sup>1</sup> Umene auliaa ta tau ngaisesoa ngatoa va la oneoneaa lo atoa la muemueinila me matuutulienia ila me la tani nongo usilainila me la ghaimonomonosiaa tani ghelei masi niuungu,

**1:16:** 1 Jon 1:6; 2:4.    **2:3:** 1 Tim 3:11.    **2:5:** Ips 5:22.    **2:7:** 1 Tim 4:12.    **2:8:** 1 Pita 2:15.    **2:9:** 1 Tim 6:1.

**2:12:** 1 Jon 2:16.    **2:14:** Gal 1:4; Eks 19:5; Diut 7:6; Esik 37:23; 1 Pita 2:9.    **2:15:** 1 Tim 4:12.    **3:1:** Rom 13:1-7;

1 Pita 2:13-14.

<sup>2</sup> me tani rau mene ppooaa saasakiaa tee kateva, me tani rau mene aikiso, me tani nnaa mene kateva, me tani siuua nannaairaa tale isaa akapa taumattu.

<sup>3</sup> Poli ita tee tale nau too ang ghe lao sio, alokapakapa ita me karika ita ghe nongonongo usilaa me laghe kametala me ita ghe nim uungu tale ase niateateaa sarasarakanaaili me ase nimasimasi. Ita ghe tokatoka tale ninannaa tani ghelei saasakiaa kateva me tani sessaita ta lo atoa peiira me uunguaaira me ita karika. Laghe sessa teeita me ita, ita ghe sessa tee mene katoa.

<sup>4</sup> Me nau masi aisausiaane me aielousiaane God tau ngai asaangiita ia ghe kauerekatila,

<sup>5</sup> ghe asaangitala. Karika va tale voto ghulughuluena ita ghe gheelei ta poli aalousiisiaane, ghe asaangitala tale nisuusuu tale nilutu aouna me nighelei aouna kanna Spirit Manga ateva.

<sup>6</sup> Poli Iesu Karisto ghe matela etaita tani asaangita, God ghe tau sio mae Spirit Manga ateva etaita, me karika ghe ghaa oghielo.

<sup>7</sup> Me nau God ghe ghelei eghulughuluenaitala poli maamasinaane, ita, ita rooroo va ita ghaa voto ita taatara lao etana tale maulue ateva tokatoka liu ia.

<sup>8</sup> Ita aatoka tuutuliita tale isaa oia inangari. Me aghanna va utani aulia ngakorokoronganaa isaa oia voto me lo atoa la ghaaiesoaa ta God, la ainanganangaa tani taula lao tani ghelei masi niuungu. Isaa o voto masinaaili me esausi taumattu ngakapa atoa.

<sup>9</sup> Me uakekkeliu tale nisama alokapakapanna me kiukiura me tuvura atoa me niaisoa me niaikiso tale inangari tale uunguaa inangari nipaopao. Poli isaa o voto karika aue esausi taumattu, me nim kamena.

<sup>10</sup> Uauliaa kiena lo ateva taumattu eaatoka apolapola taumattu. Uauliaa katengaata etana, vara me umene auliaa ghaluene etana. Nau uruu, urau mene ghelei mene righi llo etana.

<sup>11</sup> Aue ukilaaili va ia o ase taumattu ngateva sesa ia me tau ssavoto ia me gheeleiaane eaapasunga aotu va sesa taumattu ia.

#### *Airuuruu tale inangari*

<sup>12</sup> Nau eteva asuu aatu Atemas o Tikikus etam, utootoonga ngakapa ase salana tani mae taraiieghi eNikopolis, poli aghanna tani toka oia eNikopolis nau nikkaili me kuukuu eteva.

<sup>13</sup> Ughelei saa llo voto urooroo tani ghelei tani sausi Senas loeaa ia me Apolos tale kasukasuaairarua me karika lalu mene tukuna tale voto lalu aanna.

<sup>14</sup> Me tee, kapuita taumattu ngatoo la tani ghaa alomasaanga tani taula lao tani ghelei masi niuungu, me aue la rooroo tani tau lao voto ta lo atoa la aloanna niaisausi, me la rau nim mene toka me karika la ghelei righi voto.

<sup>15</sup> Ila akapa lo atoa la tokatoka teeieghi la suu atu sio masimasiaaira etam. Am amasimasi lo atoa la ghalousieinamami tale niaikaaiaa.

Alooloo sae va maamasinaane etoka akapa etaimim.

## Uru ngai etikirighi Pol ghe pituela ta Pilimon Inangari emuemua

Pol ghe pitila ia oia uru ngai etikirighi nau ghe tokatoka tale ale mata voovoo. Pilimon taita ateva ghe tokatoka eKolosae, me ghe aiesoala masi kiukiu nau ghe nongola ta Pol, me tale isaa o nau, ia kateva namuu tale ale manga ateva okae. Kateva tau ngai uungu karika ghe tokatoka tale aloannaane, ta tale aloannaane Pilimon, ararina atae ta Onesimas, ghe ilou vulila vauna ateva. Ghe soula Pol, me ghe aiesoala ta Iesu. Pol ghe pitipitila ta Pilimon tani ue va esungiaa oghi Onesimas tani mene oghi lao etana, me ghe kolomila Pilimon tani kkaluuaa Onesimas me tani mene aikoloainia, arongona ta karika va gheeleiaaira avalua o taumattu ngatoa tale isaa o nau. Emulina tale issaa o voto, katoa la aaiesoaa va Onesimas ghe katevala ta namu ngatoa tale ale manga ateva elpis.

### **Tani kila amuemua**

Aitiutiu tale inangari me nikaili emasina 1-7

Pol ghe kolomila Pilimon tani ghaa oghi Onesimas 8-20

Nimasimasi me airuuruu 21-25

<sup>1</sup> Aghi Pol, tau karavusu ieghi mausi Iesu Karisto, me Timoti kapuita ia.

Apitipiti aatu etam Pilimon, masi kapuimami eteva, me tau ngai uungu eitauua teeiemami io.

<sup>2</sup> Me angalu suusuu masimasiaangalua ta kapuingalua vause ateva Apfia me ta Akippus tauru ngai uvii eitauua teeengalua tale masi kiukiu eteva, me ta tau ngaisesoa ngatoa la mae veluelu eitauua tangantuem.

<sup>3</sup> Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

*Nikaili emasina me nilooloo sae*

<sup>4</sup> Nau etoa aghannainio tale kalughu nilooloo sae, akaakaili emasina ta kapughu Goto ateva,

<sup>5</sup> poli anonganongo aikaaiaam ta Vau ngepona Iesu me aillousiaam ta lo atoa manga ila.

<sup>6</sup> Alooloo sae va ughele livalivasanaili tani auliaa ta mene katoa aikaaiaam me aue ughele kila amasinaaili isaa akapa masi voto ita ghaaghhaa ta Karisto.

<sup>7</sup> Aielousiaam ghe tau mae sio kinatama nimasimasi me eaasarasarakananiegħi poli io, masi kapughu eteva, ugheelei urunguitaniira lo atoa manga ila tani mene ateatea ngamasina.

*Pol ghe looloo luei mausi Onesimas*

<sup>8</sup> Liuna avalua o me arongona ta, ta Karisto karika amaamatautu tani ppooa ngasarasarakanana sa ateva erooroo tani gheleia,

<sup>9</sup> me karika, ta akolokolo tauo tale uunguaa niaielousi eteva. Aghi Pol, tau ngaimataonga iegħi me karavusu iegħi ta Iesu Karisto,

<sup>10</sup> akolokolo tauo mausi natughu ta Onesimas, ghe natughu iela nau atokatoka tale ale mata voovoo.

<sup>11</sup> Nau too ang ghe lao sio, karika righi uunguaane ta ngetam me isaa oia nau ang ghe uunguanelia manee etam me etagħi namungaili.\*

<sup>12</sup> Ngamene sungisungie aatu etam tee me urunguitanighi eteva.

<sup>13</sup> Agħe annala va ghe toka teeiegħi tani għha lium ateva tani sausiegħi nau atokatoka tale ale mata voovoo mausi masi kiukiu.

<sup>14</sup> Me karika aghħanna tani auliaa voto va ugħelei ta saa llo voto ugħelei, ugħelei tale aloaloannaam, me karika va la sulungo tani għelei.

<sup>15</sup> Koti aghħanna ngavalua toko va Onesimas għe kasu vuliola tale nau karika aluse, va nau ekrija mae etam, aue etoka laalaa liu teeio.

<sup>16</sup> Karika va nongina tau ngai uungu ia karika etokatoka tale aloannaane, ta elaulau tau ngai uungu eteva karika etokatoka tale aloannaane, ia masi kapumaili ia. Masinaaili ia etagħi me maamasinaane etam aue enāmungaili va kapum tau ngai uungu ia, me kapumi ia mausi Vau ngepona ateva.

<sup>17</sup> Liuna avalua o me poli utaataraiiegħi va kapum iegħi, ughħaia nongina va ughaħħaiegħi.

**1:2:** Kol 4:17; 2 Tim 2:3.

**1:7:** 2 Ko 7:4.

**1:10:** Kol 4:9; 1 Ko 4:15.

\*

**1:11:** Tale inangari nge Griek, Onesimas

malloċeana va “għelei masi niuungu eooroi”.

**1:16:** 1 Tim 6:2.

<sup>18</sup> Arova gheleila righi voto sesa o ghe tam liula voto ghe ghaala, uatoka sae maate ateva etaghi.

<sup>19</sup> Aghi Pol apitipiti isaa oia inangari ta nimaghi va aue aliu isaa o voto. Me karika aghanna tani auliaa va io tee karika ughe liu voto aghe gheleila tale maamauluaam.

<sup>20</sup> Aghannaaili, kapughu, va arova aghele ghaa righi nimasimasi etam ta Vau ngepona tani mene ateatea ngamasina tale urunguitanighi eteva ta Karisto.

<sup>21</sup> Poli aghaiesoangaili tale nongonongo usilaam, liuna avalua o me apitipiti etam. Akilakila va aue ughelei oroi voto epona tale llo voto aghe kolomiola va ughelei.

<sup>22</sup> Me mene kateva voto: uaimonomonosiaa tiulu rum nau aghatu aue atoka etana, poli aghaiesoaa va aue amae taraiem mausi niliu tale kaluimim nilooloo sae.

<sup>23</sup> Epapras angalu kaakaravusu eitauaa ta Iesu Karisto, esuula masimasiaane etam.

<sup>24</sup> Me Mak tee me Aristakus, Diimas me Luk ila o lo atoa la uungu teeieghi, la suula masimasiaaira.

<sup>25</sup> Alooloo sae va maamasinaane Vau ngepona ateva Iesu Karisto aue etoka tee kapuimim spiriti eteva.

## Uru ngai etikirighi ghe lao sio ta aHibru etoa Inangari emuemua

Karika ita kilakila va see ghe pitila ia oia uru ngai etikirighi, me karika ita kilakila va see ila lo atoa laghe ghaaiela, me tee karika ita kilakila va poli saa me ghe pitiela. Oroi inangari etana eauliaa aleira ale manga ajiu etoa me niaiaavusuvusuena atoa, liuna avalua o me oroi ila lo atoa la aikaaiaa va lo atoa laghe ghaaiela ajiu ila.

Lo ateva ghe pitiela ghe auliaala vaalua Iesu me ouna ateva niaulia ngaitauua elaulau pokane ateva niaulia ngaitauua, Moses, me ensolo atoa. Ghe auliaaa kieira va la rau mene oghi vulu aairesoaa tira tale maamasinaane God. Tale airuuruu etoa sapta, ghe aulia ngakorokorongana etaira va la tingina asarasarakana arongona ta mene katoa la tau lao nimmarikana, me ghe auliaala lo atoa uneira niaiesoaa namungaili, me tani aimuli tee Iesu me tani poso parasi tale niaiesoaa.

### **Tani kila amuemua**

Atiutiu tale inangari: Airuuruu eteva inangarina God, Natuna ia 1:1-4

Natuna God elaulau ensolo atoa 1:5-2:18

Niaulia ngatootoonga tale uunguua nitam aiesoaa 3:1-4:13

Natuna God namuu ia tale pristi ekapa atoa 4:14-7:28

Niaiaavusuvusuena kanna ia Iesu 8:1-10:18

Am mae akalakalangina ta God 10:19-25

Am tingina akorokorongana tale nimmarikana 10:26-12:29

Nilooloo sae, nimasimasi me airuuruu 13:1-25

*Natuna ateva God, emuemuaa ensolo atoa*

<sup>1</sup> Emua arau, God ghe aaippooaa tee kateva kateva tale propete atoa tale oroi ase salana,\* me ghe gheleilala va la ghaliaa inangarina ta tuvuita atoa.

<sup>2</sup> Me isaa oia tale airuuruu tale nau, God ghe aaippooaa teetitala ta Natuna. Ta ngetana God ghe gheleila kosa ateva, me ia God ghe suielaa va aue eghaa voto akapaili.

<sup>3</sup> Eaapasunga naanamungaane ateva God, me ia nim nonginaaili Tamane. Me tale inangarina ateva sarasarakanaaili ia, esuusuei voto akapaili tale kosa ateva tani toka. Nau ghe ruula uunguua tani ghelei salana atikirighi tani ghelei eraarangisanaila tale kaluira ssavoto, ghe toka siola epona liu, tale pai muenna ativilau ta lo ateva sarakanaaili ia me iaaili epona, eaaimatoonga va matuutuliena ia.

<sup>4</sup> Me ia God ghe anamunamunganeiela ta ensolo atoa, nim nongina ararina atae God ghe taue lao sio etana namungaili ia ta ensolo atoa.

<sup>5</sup> Poli God karika ghe ue ta teva ta kapuna ensolo atoa va,

“Io natughii io,

    għaine nge tamami iegħila.”

Me tee, karika God ghe uela ta teva ensolo va,

“Aue tamana etaghix,

    me ia aue natughu ia.”

<sup>6</sup> Ta nau God ghe maeaa sio natuna mua ateva tale kosa ateva, ghe uela va,

“Ila akapa kapuna ensolo atoa God la tani kkaueinia.”

<sup>7</sup> Me tani auliaa ensolo atoa, God ghe uela va,

“Egħeelei kapuna ensolo atoa va ilu kuukuu ila

    me kapuna tau ngai nongonongo anna atoa la kura ramerame.”

<sup>8</sup> Me tani auliaa Natuna ateva, ghe uela va,

“God, aitokatokam ateva aue etoka liu.

    Uaaitoiaa kapum taumattu ngatoa tale nighlughuluena.

<sup>9</sup> Uaailousiaa saa voto ghulughuluena, me usessa tee voto sesa,

    liuna avalua o me God, kapum Goto ateva ghe suoongainiola,

    me ghe ghelei emasimasiellliola, me masimasiaam elaulau mene katoa kapum.”

<sup>10</sup> Ghe mene uela va,

“Vau palepale, io ugħe għeħeilek kosa ateva tale aitutiu,

\* **1:1:** Katoa tau ngalomasaanga la annaa va mallooeana isaa avalua toku va God ghe aaippooaa tale propete atoa tale oroi ase salana tale oroi nau.   **1:2:** Jon 1:3.   **1:3:** Jon 14:9; Kol 1:20; Hib 8:1.   **1:4:** Plp 2:9.   **1:5:** Sams 2:7; Apos 13:33; 2 Sam 7:14; 1 Kro 17:13.   **1:6:** Diut 32:43; Rom 8:29.   **1:7:** Sams 104:4.   **1:8:** Sams 45:6-7.   **1:10:** Sams 102:25-27.

me ughe gheleila epona liu ta nimam.  
 11 Aue la kapa, me io aue utoka.  
     Aue la poka nongina koloso aiaasae.  
 12 Aue ughoula nongina koloso aiaasae pokane,  
     la aaikolikoliaa tani ghaa velu pokane aiaasae me tani asae ouna,  
     me io karika aue uaikolikoliaa,  
     me maamaauluaam, karika airuuruu etana.”  
 13 Me God karika ghe ue ta teva ta ensolo atoa va,  
     “Toka siola tale pai muenna ativilau,  
     lomosina ta aghatoka sio lo atoa la sessa teeio euu  
     me uatingina saoaa kkem etaira.”  
 14 Me ensolo atoa saa ila? Ila spiriti ila la uungu ta God me esungisungila tani sausi lo  
     atoa aue la ghaa niasaangi.

## 2

*Salana atikirighi tani saanga*

<sup>1</sup> Isaa avalua o me ita tani ailokoia ngamasina sa ateva ngita ghe nongoala, me karika  
 aue ita mene tiu ppae tale inangari koronna.

<sup>2</sup> Poli marova inangari ensolo atoa laghe auliaala eaapasunga va koronna, me see etam  
 nongo usilaa me etam aimuli tee aue eghaa sesa aipolipoli,

<sup>3</sup> vaalua aue ita ttuua sesa aipolipoli, marova ita rati ia o paka niasaangi eteva? Ia oia  
 niasaangi eteva, Vau eteva ghe aititiula tani aulia ngaotua, me lo atoa laghe nongola Vau  
 eteva, laghe auliaala etaita va koronna ia.

<sup>4</sup> God tee ghe apasunga ngaotula tale niaimatootoongana, asease mirikol, me voto Spirit  
 Manga kanna ghe nim koitaala, tale aaloannaane.

*Iesu ghe taumattula tani sausita*

<sup>5</sup> God karika ghe suila ensolo atoa va la toi ouna ateva kosa tani mae, ia oia ami  
 aaulleinia.

<sup>6</sup> Me tale kateva voto, kateva ghe pitila tani ue va,  
 “Saa taumattu ila me unannangailila?

Vaalua me uitaraa nim taumattu ngatoa?

<sup>7</sup> Ughe gheleilala, tale tukuna nau, ila euu\* ta ensolo atoa  
     me ughe anamunamungainilala tale nioneoneaa.

<sup>8</sup> Me ughe atoka akapala voto va la aitaraa.”

God ghe tau ekapa lao sio voto, karika ghe ghaa oghila righi, me tale isaa oia nau karika  
 ita taatara va voto akapa etokatoka tale aitarraira.

<sup>9</sup> Ta ita tara lo ateva ghe gheleila ghe siola euu ta ensolo atoa, Iesu etana. Me nau  
 ghaine, God ghe anamungainiela tale nioneoneaa, poli ghe ghaala nimmarikana tale  
 nimate mausii, liuna avalua o me tale maamasinaane ateva God ghe lao sio tale nimate  
 mausi taumattu ngakapa atoa.

<sup>10</sup> God ghe gheleila voto akapaili, me isaa akapa o voto ghe gheleila tani asaesae  
 ararina atae, poli emaamasina va emaeaa oroi natuna epona liu tani toka teeia, liuna  
 avalua o me ghe gheleila Iesu va eruu uunguaane tale nimmarikana, tani muemuua  
 taumattu ngatoa tani saanga.

<sup>11</sup> Iesu me taumattu ngatoa egheelei emangaila, kateva nonga tamaira, liuna avalua o  
 me Iesu karika epaapalata tani kolola va nengane ila.

<sup>12</sup> Eue va,

“Aue aghaulia ngaotu uunguaane ta kapughu etoa.

Me emua ta mataira, aue akkinari fani tau sae ararim atae.”

<sup>13</sup> Me emene ue va,

“Aue aghatoka tuutulighi ta God.”

Me emene ue va,

“Aghi toko, tee me natughu etoa, God ghe taula mae sio etaghi.”

<sup>14</sup> Poli aliki etoa nim taumattu ila tale malatau me rae, Iesu ghe ia avaluela o. Liuna  
 avalua o me tale matemateaane ia aue eroo tani turungi raroai eteva, ia euunusi  
 sarasarakaniaa nimate.

**1:13:** Sams 110:1.   **1:14:** Sams 34:7; 91:11.   **2:2:** Gal 3:19.   **2:3:** Hib 10:29; 12:25.   **2:4:** Mak 16:20; 1 Ko

12:4, 11.   **2:6:** Sams 8:4-6.   **2:7:** Ughe gheleilala, tale tukuna nau, ila euu o Ughe gheleilala mala euu.   **2:9:** Plp  
 2:8-9.   **2:11:** Mat 25:40.   **2:12:** Sams 22:22.   **2:13:** Ais 8:17-18.   **2:14:** 1 Jon 3:8; Aotu 12:10.

<sup>15</sup> Me aue easaangi lo atoa la maamatauta nimate ataeae tale maamauluuaaira, nonginaaili va lo atoa la tokatoka tale karavusu.

<sup>16</sup> Poli koronnaaili Iesu karika ghe sausila ensolo atoa ta tuvuna atoa Abraham.

<sup>17</sup> Malloane avalua o me Iesu, God ghe gheleiela nongina kapuna atoa tale isaa akapa salana, me aue eroo tani nongina pristi eteva namuu ia, me aue ealousiusi tee taumattu me aue eruu niungu God ghe tau lao sio etana, tani ghelei salana va God aue eroo tani kkaluuaa kaluira ssavoto taumattu ngatoa.

<sup>18</sup> Poli ghe ghaala nitootoonga, me nimmarikana ghe mae sio etana, isaa avalua o me ia eroo tani sausi lo atoa nitootoonga emaemae etaира.

### 3

#### *Iesu namuu ia ta Moses*

<sup>1</sup> Liuna avalua o me, kapughu etoa am manga am, me am tee elome tale nikolokolo ngepona liu eteae, aghaloanna va am atoka nannaaimim ta Iesu, Apostolo ia me namuu ia ta pristi etoa, ia o ita aaulia ngaotua.

<sup>2</sup> Ghe gheelei emasinaaili uunguaane lo ateva ghe suiematoongainiela, nongina Moses ghe gheelei emasina uunguaane elome ta kapuna taumattu ngatoa God.

<sup>3</sup> Nioneoneea ta Iesu isaa epona ta Moses nongina lo ateva eatuutulu ale ateva eghaaghaa nioneoneea isaa epona tale ale ateva eatuutulua.

<sup>4</sup> Ta ale akapa tau ngai atuluna manee, me God ghe gheleila isaa akapa voto.

<sup>5</sup> Moses ghe gheelei emasinaaili uunguaane nau ghe tau ngai uungula ta kapuna taumattu ngatoa God, ghe aaulia ngaotu sa ateva God aue eaulieinia tale nau too emaemae.

<sup>6</sup> Me Karisto Natuna ia God, me ghe aaitara ngamasina alena ateva God. Me ita alena ita God, arova ita sarasarakana tani tingina akorokorongana, me ita poso parasi tale uneita niaruaa tale voto ita taatara lao emua me karika ita ghe ghaa.

#### *Niaulia ngatootoonga tale uunguaa nitam aaiesoaa*

<sup>7</sup> Liuna avalua o me, nongina Spirit Manga ateva eue va,

“Ghaine, arova am nongo lingi ngalona ateva,

<sup>8</sup> am rou mene akorokorongana urunguitaniimim

nongina am ghe sassakeaa

    nau nitootoonga tale voto ateva karika righi taumattu etana,

<sup>9</sup> tale ia o voto ateva tuvuim atoa laghe tootoongainaghila tale nitootoonga,  
    me ghaatingauluae (40) ninamanama laghe tarala sa ateva aghe gheleielia.

<sup>10</sup> Liuna avalua o me ghe sessaiegħila tale ia o vituu eteva,

    me aghe uela va, ‘Urunguitanira etiutiu ppae nonga,

    me karika la kilakila salagħi.’

<sup>11</sup> Liuna avalua o me tale sessaiegħi aghe aulia ngaotula tale inangari nialokoi va  
    karika poi aue la kupi sso tale umegħi niainoħna.”

<sup>12</sup> Am tani taatara amasina, kapughu etoa, va karika teva etaimim emene tau velu urunguitanina ateva va esesa me karika eaiesoaa me eliuliu vilina ta God ateva tokatoka liu ia.

<sup>13</sup> Ta am asarasarakana kateva kateva etaimim nau ekapa atoa, tale nau etiulu oia ita aseasea va “Ghaine,” poli aghaaloanna va kamekamea ssavoto ateva karika emene akorokorongana urunguitaniimim.

<sup>14</sup> Poli angita ghe aikapukapuaa teela Karisto arova ita poso parasi tale kaluita niaikaiaa, tale voto ita ghe għa akasinala, lomosina ta elaa għa airuuruu tale voto akapa.

<sup>15</sup> Nongina eauliaa va,

“Ghaine, arova am nongo lingi ngalona ateva,

    am rou mene akorokorongana urunguitaniimim

nongina am ghe sassakeaa.”

<sup>16</sup> See ila lo atoa laghe nongola me laghe sassakeaa? Am roo tani kila va ila o lo atoa Moses ghe katulaa vellala ejip.

<sup>17</sup> Me ghe sessaieħla ta see atoa ta għaatingauluae (40) ninamanama? Am roo tani kila va ta lo atoa laghe għeilela ssavoto me laghe matela me vilikiira għe asola tale voto ateva karika righi taumattu etana.

<sup>18</sup> Me ta see atoa God ghe gheleila inangari nialokoi va karika la mene kupi sso tale unna niainoana? Lo atoa karika laghe nongo usilaala.

<sup>19</sup> Liuna avalua o me ita taatara va karika laghe roola tani kupi sso poli karika laghe aaiesoaa.

## 4

### *Niainoana nongina nau manga ateva ta kapuna taumattu ngatoa God*

<sup>1</sup> Liuna avalua o me God ghe auliaala inangari nialokoi tale nau niainoana ateva, me ia o inangari nialokoi eteva karika ghe ruu, ita tani anna ngamasina va teva etaita erau tam kupi sso.

<sup>2</sup> Poli ngita ghe ghaala masi kiukiu laghe ppooaala etaita nongina alsraeli etoa tee laghe ghaala ta Moses. Me inangari laghe nongola, karika ghe alutula righi masi voto etaira. Poli lo atoa laghe nongola karika laghe aikaiaa ngaitauua teela lo atoa la ghe nongo usilaala.

<sup>3</sup> Isaa oia lo atoa ita aaiesoaa ita kupikupi sso tale ia o niainoana atae, nongina God ghe uela va,

“Liuna avalua o me tale sessaiaaggi aghe aulia ngaotula tale inangari nialokoi va karika poi aue la kupi sso tale uneghi niainoana,”

arongo ta uunguaane ghe ruula nau ghe gheleila kosa ateva.

<sup>4</sup> Elome tale Uru ngai Manga ateva ghe auliaala nau ghaituna ateva, tale inangari isaa avalua toko va, “Tale nau ghaituna ateva God ghe ainoanala tale uunguaane akapa.”

<sup>5</sup> Me nongina ghe aulia ngakasinala mua va,

“Karika poi aue la kupi sso tale uneghi niainoana.”

<sup>6</sup> Liuna avalua o me ekokoronna va katoa aue la kupi sso tale ia o niainoana atae, me ta lo atoa laghe aulia ngakasinala masi kiukiu etaira, karika laghe kupi ssola poli laghe tam nonganongo usilaa.

<sup>7</sup> Liuna avalua o me God ghe mene suimatoongaala kateva nau, “ghaine,” nau ghe aulieiniela ta Deivit tale oroieili ninamanama atoa ngila ghe lao sio, nongina ghe auliaala emua arau va,

“Ghaine, arova am nonganongo lingi ngalona ateva,  
am rou mene akorokorongana urunguitaniimim.”

<sup>8</sup> Poli arova Josua ghe tau lao sio niainoana etaira, God karika aue ghe auliaa mene kateva nau.

<sup>9</sup> Liuna avalua o me niainoana nongina nau manga ateva etoittoi kapuna taumattu ngatoa God.

<sup>10</sup> Poli arova lo ateva ekupi sso tale niainoana kanna God, eaainoana tee tale uunguaane nongina God ghe ainoanala tale uunguaane.

<sup>11</sup> Liuna avalua o me ita ghelei isaa akapa ase salana tani kupi sso tale ia o niainoana atae, me karika teva aue eaimuli tee ia o ase nitam nongo usila ngateva.

<sup>12</sup> Poli inangarina ateva God maulie ia, sarasarakana uunguaane me maamatarrrokeaane elaulau baenata ateva matarroke pai ekapa aluevilau. Erooroo tani uvi liuna tani sso nongina nannaa me voto nongina nialousiusi lalu aaitiuua, me aighoughou me llo etokatoka elome tale riu. Egheelei naisakei tale ninannaa me gheeleiaa urunguitaata ateva.

<sup>13</sup> Karika teva llo God ghe gheleila erooroo tani aisulia ta matane. Isaa akapaaaili voto karika aakou runga, ta matane etaatara akapa me ekilakila voto akapaaili, me ta netetana aue ita tani auliaa sa ateva ita gheleielia.

### *Iesu namuu ia ta pristi ekapa atoa*

<sup>14</sup> Liuna avalua o me poli pristi eteva namuu ia, elaulau pristi ekapa atoa, ghe saela epona liu tani aimatoongainita, Iesu etana, Natuna ia God, ita poso parasi tale kaluita niaikaiaia ita aulia ngaotu.

<sup>15</sup> Poli karika va kapuita pristi eteva namuu ia etam rooroo tani alousiusi tee kaluita saghuighuina, ta ia ghe ghaala nitootoonga tale isaa akapa salana nongina ita, me karika righi kanna ssavoto.

<sup>16</sup> Isaa avalua o me ita rou mene matautu tani lao nongina God etokatoka, ia eaapasunga maamasinaane ta kapuna taumattu ngatoa, me aue ealousiusi teeita, me ita ghaa maamasinaane tani sausita tale nau ita aaloanna niaisausi.

**5**

<sup>1</sup> Poli ila akapa namuu ta pristi etoa, nau God ange anna tani ghaa kateva elome ta taumattu ngatoa, esuisuitoongainia tani aimatoonga taumattu ngatoa tale niuungu kanna God, tani taula voto ta God me tani ghelei aiaavusuvusuena tani ghaa velu ssavoto.

<sup>2</sup> Ia karika aue esessai parasia tee lo atoa karika la kilakila amasina kasina tani voto me la tiutiu ppae, poli ie tee nim taumattu ia me saghuighuina ia.

<sup>3</sup> Poli ie tee saghuighuina ia, liuna avalua o me etani ghelei sae aiaavusuvusuena tale kanna tani ssavoto me la kulaira ssavoto tee taumattu ngatoa.

<sup>4</sup> Karika teva erororo tani nim ghaa nioneoneaa tale nim aaloannaane. God etani koloa nongina ghe kolola Eron.

<sup>5</sup> Karisto tee karika va nim ia ghe asaesaela ararina ateae va namuu ia ta pristi etoa, ta God ghe uela etana va,

“Io natughu io,

ghaine nge tamam ieghila.”

<sup>6</sup> Me ghe auliaala tale mene kasina inangari nippetipiti manga va,

“Io pristi io nau ekapa atoa  
nongina Melkisedek.”

<sup>7</sup> Tale nauna Iesu me maamauluaane tale kosa ateva oia, ghe gheleila nilooloo sae me nikkolomi sae tale nisausi tale ningala anamuu tee rarum mata ta lo ateva ghe roola tani asaangia tale nimate, me God ghe nongoala poli unna nioneoneaa ta lo ateva namuu ia etana.

<sup>8</sup> Arongona ta Iesu natuna ia God, ghe ghaaghhaa alomasaanga tale uunguua ninongo usilaa, tale nimmarikana ghe ghaala.

<sup>9</sup> Me nau God ghe ghelei emasina akapailiela, ghe liue salanala tale nisaangi eteae tokatoka liu ia ta lo akapa atoa la nongongo usilainia.

<sup>10</sup> Me God ghe suoongainiela va enamuu ta pristi etoa, nongina Melkisedek.

*Niauliaa kieita tale uunguua nioghi vulu masi salana*

<sup>11</sup> Orioelli voto ami anna tani auliaa tale isaa oia voto, me aanasa tani aulia ngamasalika poli karika ailiuinua am tani ghaa alomasaanga.

<sup>12</sup> Ang ghe alusela nau ngam ghe tau ngaisesoala, me isaa oia nau am ghele tau ngai aapasunga, me karika, ta etani maamasina va teva emene apasunga tau aatu voto eaitiuiti tale uunguua koronua tale inangarina ateva God tani mene laa tiuua. Karika am ghe roo tani nama inana korokorongan, ta am nongina aliki etoa la sussu.

<sup>13</sup> Lo ateva esussu aliki ia, karika ekilakila llo masina me llo sesa.

<sup>14</sup> Me inana korokoronganane aineira matuenna atoa taumattu, ngila ghe tukatukaala tani ghelei masi voto. La rororo tani tara kila llo masina me llo sesa.

**6**

<sup>1</sup> Liuna avalua o me ita kasu vuli llo voto ngita ghe kila akasinala ta Karisto, me ita toka tau sae tale voto aue egheleita ita matuenna, me karika ita mene atingina ghaluene suena tale uunguua ninna ngaioghiohgiaa tale voto eakaatulainita lao tale nimate, me tale niaikaaiaa ta God,

<sup>2</sup> niloeloe tale niaasuu, me tani saoaa nima, me nitotu tale nimate, me niaiskei eteae tokatoka liu ia.

<sup>3</sup> Me aue ita ghelei isaa o voto, marova aloaloannaane God.

<sup>4</sup> Lo atoa ngila ghe kilala aloannaane God, ngila ghe tootoongaala masi voto epona liu, me ila tee laghe aitauaala Spirit Manga ateva,

<sup>5</sup> me laghe namunamuaala masi inangarina ateva God me sarasarakaniaane tale nau too emaemae,

<sup>6</sup> marova la katuu vulu, karika mene tikirighi salana tani mene oghi mae tale uunguua ninna oghiohgiaa. Tale isaa o llo la ghelei, la mene aavukala sae Natuna ateva God tale aikotoo, tani mene apalataia ghaluene tale tummatavanga.

<sup>7</sup> Poli llo kosa vaao ateva ekaakatuu etana oroi nau, eaapinosa amasina inana umana lo ateva ghe pasala. Ia o ase kosa ateva eghaaghhaa niarangise ta God.

<sup>8</sup> Me llo kosa eapinosa uasa karasa me llo uso rorroana aue epeisaane, karika masau me aue eghaa nikasikiena, me aue airuruu ia o ase kosa ateva aue eataa.

<sup>9</sup> Masi kapuimami etoa, arongona ta ami aaippooa ngavalua o, ami aaikaaiangaili va masi voto aue elutu etaimim, voto elao la aitauaa tiniisaanga.

<sup>10</sup> God karika va sesa taumattu ia, karika erooroo tani kkaluaa uunguaaimim me aailousiaaimim am ghe apasungaala etana, nau am ghe sausila kapuna taumattu ngatoa tale nau too me isaa tee oia.

<sup>11</sup> Ami aaloanna va kateva kateva etaimim eapasinga ia o ase niuungu eteva, me karika am mene mangoo vulua lomosi ta airuuruu, me saa voto am toitoi tani ghaa, aue am vira mene ghaa.

<sup>12</sup> Karika ami anna va am mangoona ta am ghelei nongina lo atoa uneira niaikaaiia karika ekaakatuu tani toitoi, tani ghaa voto aue ekaluira God ghe auliaala tale inangari nialokoi.

*Kinatama inangari nialokoi kannna God*

<sup>13</sup> Nau God ghe gheleila kannna inangari nialokoi ta Abraham, ta poli karika teva mene namuu ia etana tani auliaa inangari koronna, eghe nim auliaala tale ararina ateeae.

<sup>14</sup> Ghe uela va, "Aghaaulia ngakoronna va aue agharangiseio me atau aatu oroieili tuvum atoa."

<sup>15</sup> Me nau eteva Abraham ghe tam mangoola tani toitoi, Abraham ghe ghaala voto God ghe auliaala ta ngetana tale inangari nialokoi.

<sup>16</sup> Taumattu ngatoa la ghaauliaa inangari niaulia ngakoronna sae\* ta lo ateva taumattu ararina ateeae namuu ia etaira, me isaa o inangari niaulia ngakoronna sae egheelei ekoronna sa ateva la ghaaulieinia, me eruuruu ekapa niaissakeana.

<sup>17</sup> God ghe gheleila inangari nialokoi ta Abraham, me ghe aaloanna va lo atoa aue la ghaa isaa o voto la kila amasina va karika aue eaikolikoliaa nannaane, liuna avalua o me ghe auliaala inangari niaulia ngakoronna sae.

<sup>18</sup> God ghe gheleila ilalua o voto alua, inangari nialokoi me inangari niaulia ngakoronna sae ta God, me ilalua o voto alua karika lalu aaikolikoliaa, me God karika erooroo tani kamekame. Ita lo atoa ita ghe iloula tani laa poso tale nitaatara lao emua, aue ita ghaa namuu niaisausi.

<sup>19</sup> Nitaatara lao emua isaa etaita nongina angga ngateva tale maamauluaaita, korokorongana ia me karika aue eaisiisia. Ghe kipi ssola elome tale rum mangaaili etiulu, emuli tale kalio atiulu.

<sup>20</sup> Tale ia o voto ateva Iesu ghe muuemueinitala tani sso etana, ghe kipi ssola mausiita. Ia kapuita pristi ia namuu ia tokatoka liu ia, nongina Melkisedek.

## 7

*Melkisedek pristi ia*

<sup>1</sup> Ia oia Melkisedek, kingi ia eSalem me pristi ia ta God iaaili epuna, ghe soula Abraham nau ghe kiriuala tale niaiuviit eteeae nau ghe apalala kingi etoa, me Melkisedek ghe arangiseiela.

<sup>2</sup> Me Abraham ghe tau lao sio ta Melkisedek aiaasokolo tale isaa akapa voto. Aitiutiu, ararina ateeae, malloeana va "kingi ia tale nighulughuluena", me tee, "kingi ia eSalem," malloeana va "kingi ia tale luei."

<sup>3</sup> Karika righi kiukiuna va ia see ia, karika teva tamane me karika teva kinna, me karika toa tuvuna, me karika righi aitiutiu tale nauna, o airuuruu tale maamauluaane, nongina Natuna ateva God, ia pristi laalaa liu ia.

<sup>4</sup> Am nim nnaa va ararina ateeae namuu ia, poli Abraham, tuvuira ia ajiu etoa, ghe taula aiaasokolo tale voto ghe sarila ta tau ngai ssateena atoa.

<sup>5</sup> Tale inangari nipaopao, kateva inangari niaulia ngakorokorongana eue va mangalina atoa Livae ila la ghaa aiaasokolo ta kapuira atoa aIsraeli ila, arongona ta ila tee kapuira me mangalina ila Abraham.

<sup>6</sup> Me ia oia taumattu ngateva, arongona ta karika mangalina ta Livae, me ghe nim ghaala aiaasokolo ta Abraham, me ghe arangisela lo ateva ghe ghaala inangari nialokoi.

<sup>7</sup> Me karika teva erooroo tani ue va kamena va, lo ateva taumattu ararina ateeae epuna, eaarangise lo ateva taumattu ararina ateeae eeu.

<sup>8</sup> Ila akapa pristi etoa laghe ghaala aiaasokolo, angila ghe matela, me Melkisedek, ghe ghaala aiaasokolo ta Abraham, Uru ngai Manga ateva karika eue va ghe matela.

<sup>9</sup> Kateva aue eroo tani ue va Livae, ghe ghaaghaa aiaasokolo, ghe taula aiaasokolo nau Abraham ghe tau lao sio ta Melkisedek,

<sup>10</sup> poli nau Melkisedek ghe soula Abraham, Livae elome ta vilikina Abraham, poli tuvuna ia.

*Iesu nongina Melkisedek*

<sup>11</sup> Arongona ta inangari nipaopao kanna Moses eue va pristi etoa la tani mae tale ararimangalina ateva Livae, uunguaaira pristi etoa karika erooroo tani ghelei eghulughuluena teva. Liuna avalua o me mene kateva pristi etani mae nongina Melkisedek, me karika va nongina Eron.

<sup>12</sup> Poli arova righi niaikolikoliaa ta pristi etoa me uunguaaira, inangari nipaopao tee aue etani aikolikoliaa.

<sup>13</sup> Ia oia lo ateva eaaulieinia ararimangalina ppae ateva, me karika teva tale ia oia ararimangali eteva ghe uungu tale liu nighelei aiaavusuvusuena.

<sup>14</sup> Poli masalikeili va Vauita ateva ghe lutula tale ararimangali eteva ta Jiuda, me tale ia o ararimangali eteva Moses karika ghe auliaala righi voto va pristi ila.

<sup>15</sup> Me sa ateva ami ghe auliaeli masalikeili ia va arova mene kateva pristi nongina Melkisedek ekauerekati,

<sup>16</sup> ia lo ateva ghe pristila karika esuisui kkai tale inangari nipaopao nongina tuvuna atoa. Ta esuisui kkai tale sarasarakaniaa lo ateva maulue karika aue ekapa.

<sup>17</sup> Poli laghe aulia ngaotula va,

“Io pristi io nau ekapa atoa  
nongina Melkisedek.”

<sup>18</sup> Llo voto tani aimuli tee emua arau ang ghe vullala poli maomaona me sesa

<sup>19</sup>(poli inangari nipaopao karika erooroo tani ghelei eghulughuluena teva voto), me masi voto ghe kauerekatila, ita taatara lao emua etana, eaaulia ngaotu isaa o voto egheeleita va ita rooroo tani lao akalakalaia ta God.

<sup>20</sup> Me karika va karika righi inangari niaulia ngakoronna sae ta God. Katoa laghe pristila me karika righi inangari niaulia ngakoronna sae laghe gheleila,

<sup>21</sup> me ia ghe pristila tee inangari niaulia ngakoronna sae nau eteva God ghe uela etana va,

“Vau ngepona ang ghe aulia ngakoronnala  
me karika aue eaikolikoliaa nannaane:

‘Io pristi io nau ekapa atoa.’”

<sup>22</sup> Mausi ia o inangari niaulia ngakoronna sae ta God, me Iesu ghe tau mae sio masina ateva inangari niaippooa ngaitauaa.

<sup>23</sup> Ghe oooreieli pristi etoa, poli karika laghe rooroo tani ghelei uunguaaira pristi etoa nau ekapa atoa poli uunguaa nimate ateva.

<sup>24</sup> Me poli Iesu etokatoka nau ekapa atoa, ia lo ateva pristi karika aue eruu.

<sup>25</sup> Liuna avalua o me nau ekapa atoa ia erooroo tani asaangi lo atoa la mae ta God tale ararina atuae, poli ia etokatoka nau ekapa atoa tani kolomi niaisausia ta God mausira.

<sup>26</sup> Poli emamasina va ue ita ghaa ia oia ase namu ngateva tani pristi, ta ia etautau rooroaa aloaloannaaita. Ia manga ia, karika la ghaaliu teeia tale righi voto sesa, raarangisana ia, karika etokatoka aitauaa tee ssavoto, me God ghe atokiae saela eponaaili.

<sup>27</sup> Karika nongina mene katoa namuu ta pristi etoa, karika erooroo va ghe toka gheleil aiaavusuvusuena nau ekapa atoa, etiuuaa mua tale kanna ssavoto, vara me tale kaluira ssavoto taumattu ngatoa. Me ia, ghe gheleila aiaavusuvusuena tale kaluira ssavoto taumattu ngatoa katengaata nonga, nau ghe taue lao sio arova voto la gheleli sae aiaavusuvusuena etana.

<sup>28</sup> Poli inangari nipaopao esuisuitoongaa namu ngatoa ta pristi etoa nim taumattu ila, arongona ta maomaona ila, me inangari niaulia ngakoronna sae ta God, ghe mae sio emuli tale inangari nipaopao, ghe suoiongaala Natuna ateva, God ghe gheleli eghulughuluena laalaa liuela.

## 8

*Namu ngateva pristi tale ouna inangari niaippooa ngaitauaa*

<sup>1</sup> Liuena voto ami aauliaa isaa avalua toko, va ia o pristi eteva namuu ia etokatoka, me ghe toka siola tale pai muenna ativilau ta God epona liu.

<sup>2</sup> Me euungu tale voto ateva manga ia, lo ateva ale kandisi manga ia koronna ia Vau ngepona ghe atinginaia saela, karika va taumattu.

<sup>3</sup> Ila akapa namuu tale pristi etoa la suisuitoongainila tani taula voto ta God me tani ghelei aiaavusuvusuena. Liuna avalua o me ghe masinala va lo ateva tee oia ie tee ghe tau sae teva voto tani tau lao ta God.

<sup>4</sup> Arova ia tale kosa ateva oia, karika aue ghe pristi, poli taumattu ang ghe tokala laghe tauata sae voto ta God, nongina inangari nipaopao ghe auliaala.

<sup>5</sup> Laghe uungu tale voto ateva manga ia taataraane me tooona llo voto epona liu. Liuna avalua o me God ghe auliaala kienu Moses nau ang ghe anna tani ghelei ale manga ateva kandisi ia, ghe uela etana va, "Utani tara masina va ughelei isaa akapa voto nongina taataraa lo ateva ughe taraiela tale motouru."

<sup>6</sup> Ta poli niuungu Iesu ghe ghaala elaulau uneira pristi etoa, me inangari niaippooa ngaitaua ngateva Iesu ghe gheleielaa elaulau pokane ateva, poli etokatoka tale masi inangari nialokoi.

<sup>7</sup> Poli arova karika righi sesa tale aitiutiu eteva inangari niaippooa ngaitauua, karika righi uunguaane aiaaghhaluene ateva tani koliaa aitiutiu eteva.

<sup>8</sup> Poli God ghe tarala kaluira sesa voto taumattu ngatoa me ghe uela va,

"Vau ngepona ghe auliaala va: Nau too emaemae  
aue aghelei ouna ateva inangari niaippooa ngaitauua  
tee taumattu nge Israeli etoa me ajiuda ngatoa.

<sup>9</sup> Karika aue enongina lo ateva inangari niaippooa ngaitauua

aghe gheleielaa ta tuvuira atoa  
nau aghe kunela nimaira  
me aghe katulaa vellala tani kasu vuli elijip,  
poli karika laghe aaimuli emasina tee kalughu inangari niaippooa ngaitauua,  
aghe liula vilighi etaira,

Vau ngepona ghe aulia ngaotula.

<sup>10</sup> Vau ngepona ghe mene aulia ngaotula va, vara isaa o nau elange, inangari niaippooa ngaitauua ngateva aue agheleia ta taumattu nge Israeli etoa,  
ia avalua toko va:

Aue aghatoka kalughu inangari nipaopao tale nannaaira  
me aue apitia tale urunguitanira  
me aghi aue kapuira Goto ieghi,  
me ila aue la kapughu taumattu.

<sup>11</sup> Karika teva taumattu aue emene apasunga ta lo ateva etokatoka akalakalangina teeia  
o ta teva tuena o nengane tani ue va, 'Ukila Vau ngepona ateva.'

Poli ila akapa aue la kilaieghi,  
lo atoa matuutulienaa ila me lo atoa karika matuutulienaa ila.

<sup>12</sup> Ta aue akkaluaa sesa gheeleiaaira,  
me karika aue atoka nannaai kaluira ssavoto."

<sup>13</sup> Nau ghe aauliaa ia oia inangari niaippooa ngaitauua ngateva va ouna ia, ghe gheleila aitiutiu eteva ghe vullaieila poli ang ghe pokala me aue ekapa.

## 9

### *Nikkauaa tale ale kandisi eteva*

<sup>1</sup> Tale aitiutiu eteva inangari niaippooa ngaitauua, God ghe alokoila kasina salana tani usilaa tale uunguaa nikkauaa, me tee ale nikkaua ngateva ghe tokatoka tale kosa ateva oia.

<sup>2</sup> Ale kandisi eteva oia laghe gheleielaa, ghaluulu rum elome ta ngetana. Tale aitiutiu etiulu rum, aitiitinginane ateva lam ataeetee me tevoo ateva aiatoka verete laghe amangala, ia o rum atiulu, la kolokoloa va rum atiulu manga ia. <sup>3</sup> Emuli tale aiaaghhalua atiulu kalio, rum atiulu laghe aseasea va rum atiulu manga ilia.

<sup>4</sup> Elome ta ngetana olta ngateva gheleeli ia tale gol, me vokisi eteva eaaimatoonga inangari niaippooa ngaitauua gheleeli ia tee tale gol. Elome ta ngetana aikaaai mena ngateva gheleeli ia tale gol, me aikkatuluna atiulu Eron ghe kuneala pusi ngai, me tee inangari nipaopao laghe pitila tale atu elua.

<sup>5</sup> Epona tale vokisi eteva keruvim alua, lalu aaimatoonga va God etokatoka tale ia o voto ateva, kaekaeirarua ghe aakou aikou vokisi eteva, voto ateva God ekakkaluua ssavoto etana. Me ghaine karika righi nau tani aulia ngamasina akapa isaa oia voto.

<sup>6</sup> Nau isaa akapaaili voto laghe atoka avaluela o, nau ekapa atoa pristi etoa laghe soso tale aitiutiu etiulu rum tani ghelei uunguaaira.

<sup>7</sup> Me namu ngateva ta pristi etoa ia nonga ghe soso tale aiaaghaluene atiulu rum, katengaata nonga tale kateae ninamanama, me karika va nim ia, ta ghe sossoaa tee rae, tani ghelei aiaavusuvusuena ta ngetana me tee tale ssavoto kaluira taumattu ngatoa laghe ghelei me karika laghe kilakila va sesa.

<sup>8</sup> Tale isaa oia voto, Spirit Manga ateva eaapasunga va ia o salana atikirighi tani sso tale rum atiulu mangaaili ia, karika ghe otia va taumattu ekupi sso poli aitiutiu etiulu rum, ia etokatoka.

<sup>9</sup> Isaa akapaaili o voto eaaimatoonga ia oia nau etiulu, me eaaimatoonga va voto ita tautau lao me aiaavusuvusuena ita gheelei sae, karika eroroo tani ghelei emasalika nannaaira tau ngai kkaua ngatoa la tautau lao isaa o voto.

<sup>10</sup> Isaa oia voto la nim gheelei tale inana me manu, me asease niuungu tani pora sesa gheeleiaira taumattu ngatoa. Isaa oia voto nim salana ila tani ghelei eleka tale vilikiira, aue la tok alosina ta nau eteva God aue eatoka ouna voto tani usilaa.

### Raena ateva Karisto

<sup>11</sup> Nau Karisto ghe mae sio nongina teva namuu ta pristi etoa, tale masi voto ang ghe atoka akasinala oia\* tale ouna ateva inangari niaippooa ngaitauua, eghe lao sio tale masinaaili me koronna ateva ale kandisi, karika va taumattu ngatoa laghe gheleielu, me ita roo tani ue va, karika va laghe gheleielu tale kosa ateva.

<sup>12</sup> Karika ghe kupi ssola tale mangaaili etiulu rum tee rae meeeme me natu vulumakao, ta ghe kupi ssola katengaata mausiita akapaaili tale raena ateva, tani ghaa nisaangi eteva tokatoka liu ia.

<sup>13</sup> Inangari nipaopao ghe uela va la kaokao sae rae meeeme me vulumakao me aunna aliki vause ateva vulumakao laghe tungitungia ta lo atoa karika raarangisana ila tani ghelei eraarangisanaila me tani amangaila, arongona ta laghe ghelei eraarangisana nonga vilikiira.

<sup>14</sup> Arova ia evalua o, raena ateva Karisto korokoronganaili ia tani ghelei eraarangisanaita. Tale sarasarakaniaane Spiriti eteva tokatoka liu ia, Karisto ghe taue mae sio nongina lo ateva aiaavusuvusuena sae ta God karika righi voto sesa etana. Ghe ghelei eraarangisanala nannaaita tale ase niuungu elaoaloainita tale nimate, me tani uungu ta God ateva tokatoka liu ia.

<sup>15</sup> Liuna evalua o me Karisto ghe alokoila lo ateva o ouna inangari niaippooa ngaitauua. Ghe ghelei evaluelo o poli ghe aaloanna va lo atoa ghe suoongainilala la rooroo tani ghaa masi voto ghe aulia ngalokoila tale inangari nialokoi eteva tokatoka liu ia — ia ghe matela tani poli aoghi me tani gheleila me la saanga tale ssavoto laghe gheleila tale pokane ateva inangari niaippooa ngaitauua.

<sup>16</sup> Nim nongina tale inangari niaippooa ngaitauua ngateva, kateva etani mate.

<sup>17</sup> Poli ia o inangari niaippooa ngaitauua ngateva esasararakana nau lo ateva ghe aulia ngalokoila ange matela. Karika righi sarasarakaniaane inangarina nau taumattu ngateva maulue ia.

<sup>18</sup> Liuna evalua o me aitiutiu eteva inangari niaippooa ngaitauua laghe gheelei tee rae.

<sup>19</sup> Nau Moses ghe aulia ngoutula isaa akapaaili inangari nipaopao ta ila akapa taumattu ngatoa, ghe ghaala raeira natu vulumakao atoa me meeeme atoa, me tee manu, me uu sipsipi raeraeanaili me laangi isopi me ghe akaokao sae tale vuku eteva me ila akapa taumattu ngatoa,

<sup>20</sup> me ghe ue va, “Ia oia raena ateva inangari niaippooa ngaitauua ngateva, ia God ghe tani aulieiniela va am aitarainia.”

<sup>21</sup> Tale ia nonga o salana atikirighi ghe akaokao sae rae tale ale kandisi eteva me tale isaa akapaaili voto laghe uungua tale asease uungua nikkuua.

<sup>22</sup> Koronnaaili, tale inangari nipaopao gharighi tau isaa akapaaili voto laghe ue va la ghelei eraarangisana tale rae ateva, me marova karika rae ghe akaakala, karika righi nikkuua.

<sup>23</sup> Isaa oia voto nim tootoo tale voto koronna epona liu, emaamasina va isaa akapaaili o voto tale kosa ateva la tani ghelei eraarangisana tale aiaavusuvusuena, me voto ngepona liu, ghe ghelei eraarangisanala tale masi aiaavusuvusuena elaulau voto tale kosa ateva.

---

<sup>9:6</sup> Nam 18:2-6.    <sup>9:7</sup> Lev 16:2-34.    <sup>9:9</sup>: Hib 10:1-2.    \* <sup>9:11</sup>: masi voto ang ghe atoka akasinala oia Kasina uru ngai laghe pitila, laghe uela va, masi voto aue emae.    <sup>9:13</sup>: Lev 16:15-16; Hib 10:4; Nam 19:9, 17-19.    <sup>9:14</sup>: 1 Pita 1:18-19.    <sup>9:19</sup>: Eks 24:6-8.    <sup>9:21</sup>: Lev 8:15, 19.    <sup>9:22</sup>: Lev 17:11.    <sup>9:23</sup>: Hib 8:5; 10:1.

<sup>24</sup> Poli Karisto karika ghe kupi ssola tale lo ateva o ale nikkaua taumattu ngatoa laghe gheleiela, nim tootoona ia lo ateva koronna ia; eghe kupi ssola epona liu, tani tingina erhua ta matane God mausiita.

<sup>25</sup> Karika ghe kupi ssola epona liu tani mene taua mae ta ngetaita oroaata, nongina salana atikirighi namuu ta pristi etoa ghe kupikupi sso tale rum atiulu mangaaili ia tale issaa akapaili ninamanama tee rae, karika va raena.

<sup>26</sup> Arova isaa avalua o, ghe tiuala tale aitiutu tale kosa ateva, aue oroaata Karisto aue ghele nim toka matemate. Me isaa oia ghe mae sio katengaata nonga mausiita tale airuuruu tale nau, tani ghaa velu ssavoto nau ia ghe gheleila niaiaavusuvusuena tale vilikina.

<sup>27</sup> Nim nongina taumattu ngatoa aue la mate katengaata, me emulina aue la tingina tale naisakei,

<sup>28</sup> Karisto ghe gheleila aiaavusuvusuena ta ngetaita katengaata, tani ghaa velu kaluita ssavoto; me ia aue emae aghaluene, karika va tani mene ghaa velu kaluita ssavoto, ta emae tani tau mae niasanga ta lo atoa la toitoia.

## 10

*Karisto ghe aiaavusuvusuena katengaata ta ngetaita akapa*

<sup>1</sup> Inangari nipaopao nim tootoo tale voto masina aue emae, karika va tani koronna isaa o voto. Liuna avalua o, me aiaavusuvusuena la nim toka gheelei tale ninamanama atoa, karika erooroo tani ghelei eghulughuluena lo atoa la laolao akalakalaan tani kkauaa.

<sup>2</sup> Aiaavusuvusuena karika erooroo tani ghelei eraarangisanaila, liuna avalua o me karika laghe ruuruu tani toka gheelei sae aiaavusuvusuena. Arova tau ngai kkauaa ngatoa laghe raarangisanala, karika aue la ghe ateateaa maamatana tale kaluira ssavoto.

<sup>3</sup> Me isaa o aiaavusuvusuena la gheelei katengaata tale kateae ninamanama emene gheeleita ita mene nannaa kaluita ssavoto.

<sup>4</sup> Poli raeira vulumakao atoa me meemee atoa karika erooroo tani ghaa velu ssavoto.

<sup>5</sup> Liuna avalua o me nau Karisto ghe sio mae tale kosa ateva, ghe uela va,

“Aiaavusuvusuena me opring karika ughe aanna,  
ta viliki eteva ughe aimonomonosieiniela etaghi.

<sup>6</sup> Tee, aiaavusuvusuena eataata akapa me aiaavusuvusuena tale ssavoto  
karika ughe masimasiaala.

<sup>7</sup> Vara me aghe uela va, ‘Aghi toko — laghe pitila me laghe aulieinaghila tale Uru ngai  
Manga ateva —

aghe sio mae tani ghelei aloaloannaam, God.’”

<sup>8</sup> Aitiutu ghe uela va, “Aiaavusuvusuena me opring, me aiaavusuvusuena eataata akapa me aiaavusuvusuena tale ssavoto, karika ughe aloannala, me karika ughe masimasiaala” (arongona ta inangari nipaopao eue va la ghelei).

<sup>9</sup> Vara me ghe uela va, “Aghi toko, aghe sio mae tani ghelei aloaloannaam.” Ghe ghaa vella aitiutu eteva tani atoka aiaaghaluene ateva.

<sup>10</sup> Me tale ia o aloaloannaane ateva, ang ghe ghelei emangaitala tale aiaavusuvusuena tale vilikina Iesu Karisto katengaata ta ngetaita akapa.

<sup>11</sup> Nau ekapa atoa pristi etoa la tiitingina tani ghelei uunguaaira tale ale nikkaua ngateva; nim isaa aitauua nonga aiaavusuvusuena atoa la nim toka gheeleia, karika erooroo tani ghaa velu ssavoto.

<sup>12</sup> Me nau eteva Karisto ghe gheleila ia o aiaavusuvusuena ateva mausi ssavoto ateva, katengaata nonga, ghe toka siola tale pai muenna ativilau ta God.

<sup>13</sup> Tale isaa o nau etoitoi tau ngai ssateena atoa va God eatokaila sio euu me eatingina sae kkena etaira.

<sup>14</sup> Poli tale kateva nonga aiaavusuvusuena me Karisto ghe ghelei eghulughuluena lo atoa God eaamangaila.

<sup>15</sup> Spirit Manga ateva tee ghe asokoila etaita isaa oia voto. Aitiutu ghe uela va,

<sup>16</sup> “Inangari niaippooa ngaitaua ngateva aue agheleia ta ngetairaa, va vara isaa o nau elange,

Vau ngepona ghe aulia ngaotula va aue ia avalua toko.

Aue aghatoka kalughu inangarighi nipaopao tale urunguitaniira,  
me aue apitia tale nannaaaira.”

<sup>17</sup> Vara me ghe mene uela va,

“Kaluira ssavoto me gheeleiaairaa karika elaolao aitauua tee inangari nipaopao,

karika poi va aue amene annaa."

<sup>18</sup> Me nau isaa oia voto ang ghe kkaluaala, karika mene righi uunguua nighelei sae aiaavusuvusuena.

*Nikolokolo ateae tani tingina asarasarakana*

<sup>19</sup> Liuna avalua o, kapughu etoa, karika ita roo tani mene matautu tani kupi sso tale rum atiulu mangaaili ia mausi raena ateva Iesu.

<sup>20</sup> Ghe otila ouna atikirighi salana etaautau mae maulue ateva, tani kupi sso tale kalio atiulu, ia o vilikina ia.

<sup>21</sup> Me poli ia kapuita pristi eteva iaaili epona tale alena ateva God,

<sup>22</sup> ita lao akalakalaa ta God tee koronna urunguita pasu tale niaikaiaa. Poli tale raena ateva Iesu ghe pora araarrangisanaitala tale sesa ninannaa, me ghe porala vilikiita tale manu raarangisanaaili.

<sup>23</sup> Ita poso parasi tale nitaatara lao emua ita ghe aulia ngaotula me ita rau mene amaramara, ta lo ateva ghe auliaala isaa o voto, aue eghelei erooroaa.

<sup>24</sup> Me ita tee, ita mene annaa righi ase salana vaalua tani aisausiaa mene katoa tale niaielousi me tale masi niuungu.

<sup>25</sup> Karika ita mene mangoo tani mae kkaua ngaitauua, nongina katoa la gheelei. Me nau ekapa atoa am asarasarakana mene kateva kateva, poli am taatara va nauna ateva Karisto tani sio ange aakalakalaa.

<sup>26</sup> Marova ita nim tok a gheelei ssavoto, me arongona ta ngita ghe ghaala alomasaanga tale voto koronna, karika mene teva aiaavusuvusuena tani mene kkaluaa kaluua ssavoto.

<sup>27</sup> Me karika, aue ita matautu nau ita toitoi nau niaiskei kanna God, me kura ateae ataataaili ia aue emae tani ata tau ngai ssateena atoa God.

<sup>28</sup> See ghe ratila inangari nipaopao kanna Moses, me marova ghalua o kotolu taumattu laghe aasokoi voto sesa ghe gheelei, karika righi nialousiusi etana, laghe tani uvivi ematea.

<sup>29</sup> Me vaalua ta lo ateva taumattu easaasa tau sio Natuna ateva God? Egheelei raena ateva Natuna ateva God ghe amangaiela va karika manga ia, me tee eaauliaa saasakiaa ta Spirit eteva eaapasunga maamasinaane God.

<sup>30</sup> Poli ita kilakila lo ateva ghe uela va, "Aghi aue aliu me aghelei saasakieinila." Me ghe uela tee va, "Vau ngepona ateva aue eghelei niaiskei tale kapuna taumattu ngatoa."

<sup>31</sup> Matautunaaili tani lau tale nimana God ateva tokatoka liu ia.

<sup>32</sup> Am nnaa isaa too nau ang ghe lao sio, nau eteva am ghe ghaala mallanga ateva, am ghe ghaala oroielio voto sesa, me isaa o voto karika ghe gheleiemla va am ghe katuuila.

<sup>33</sup> Kasina nau laghe aauliaa saasakiaa teeiem me laghe gheelei voto etaimim karika poi masina ta mata ngoroi etoa, me kasina nau am ghe aaimonomonosiaa tani lao aitauua tee tau ngaisesoa ngatoa laghe gheelei saasakieinila.

<sup>34</sup> Am ghe aalousiusi tee tau karavusu etoa me am ghe saasausila, me nau peiimim laghe sarasarakanan tani nim ghaa tale aloannaaira, karika am ghe aalousiusi tee peiimim, ta am ghe masimasi, poli am ghe kilakila va voto masinaaili etokatoka, me aue etoka nau etoa, isaa epona liu.

<sup>35</sup> Liuna avalua o me am rou mene velu kaluimim nimatuutuliena ta God, poli aue am ghaa aipolipoli eteva namungaili ia.

<sup>36</sup> Am tani tingina akoronna tani gheelei aloaloannaane God, me aue am ghaa saa llo ghe auliaala tale inangari nialokoi.

<sup>37</sup> Poli,

"Karika masauna arighi

me lo ateva taumattu ange maemae aue emae me karika aue aippetana,

<sup>38</sup> me tale niaikaiaa kapughu tau ghulughuluena ateva aue etoka maamaulue  
me arova eoghi vulu isaa o voto,  
karika aue amasimasieinia."

<sup>39</sup> Poli ita karika nongina lo atoa la oghioghi me nitturuu eghaaghaila, ta nongina lo atoa la ghaisesoa me la saasaanga.

## 11

### Tale niaikaiaaa

<sup>1</sup> Niaikaia ngateva ia avalua toko va ita aiesoaa va aue ita ghaa llo emua etaita, me eaapasunga va ita rooroo tani kila va aue ita ghaa voto ita tam taatara.

<sup>2</sup> Tale isaa o ase voto, me lo atoa emua arau laghe ghaala niaruaa ta God.

<sup>3</sup> Tale niaikaiaia ita kilakila va tale niaulia ngasarasarakan tale inangarina God, me kosa ateva ghe lutula. Liuna avalua o me voto ita taatara ghaine, karika God ghe gheleilala tale voto ita rooroo tani tara.

<sup>4</sup> Tale niaikaiaia, Eibol ghe ghelei saela lo ateva aiaavusuvusuena masina ia ta God me ta lo ateva Kein ghe gheleiel, me tale unna niaikaiaia, God ghe arueiniela va ghulughuluena ia nau ghe ppoaala masimasiaane tale unna aiaavusuvusuena. Arongona ta ghe matela, esamasama ta ngetaita tale unna niaikaiaia.

<sup>5</sup> Tale niaikaiaia me God ghe ghaa saela Inok epona liu me karika ghe ateateaala nimate. Karika laghe roola tani mene tarai, poli God ghe ghaaieila. Auena God ghe ghaaia, laghe aaulieinia va God ghe masimasieinia.

<sup>6</sup> Me karika ita rooroo tani amasimasi God arova karika righi niaikaiaia. Poli lo ateva elao etana etani aiesoaa va God etokatoka, me etautaula aipolipoli ta lo atoa la tani paepaea.

<sup>7</sup> Tale unna niaikaiaia Noa, nau God ghe auliaala kiena tale llo karika ghe tara, tale nioneoneaa tale inangarina God ghe atulula aka ateva tani asaangi vausenna ateva me natuna atoa. Tale niaikaiaia ghe aulia ngaotula ta taumattu ngatoa tale kosa ateva oia va sesa ila me ghe ghaala nighulughuluena tale uunguua niaikaiaia.

<sup>8</sup> Tale niaikaiaia, Abraham ghe nongo usilaala nau God ghe koloala tani lao tale voto ateva auena aue ghe ghaaia va ghe kannia ia, arongona ta ghe tam kilakila va eaa ghe laalao.

<sup>9</sup> Tale niaikaiaia, ghe tanganuenala tale masaliki eteae God ghe aulia ngalokoiela, nongina ativuu eteva tale anua karika anuena. Ghe tokatoka tale ale kandisi, nongina Aisiki me Jekop ila tee elome tale ia o inangari nialokoi eteva.

<sup>10</sup> Poli ghe taatara lao emua tale lo atea masaliki taatara tokatoka liu ia, me lo ateva ie nonga ghe nnainiela me ghe atuluela, God ta ngetana.

<sup>11</sup> Tale niaikaiaia, arongona ta Abraham ang ghe taita namuula, me Sera kina ngere ia, karika ghe roola tani alakuti aliki, me ghe tamaneiela aliki eteva ghe lutula. Poli ghe tarala va lo ateva ghe auliaala inangari nialokoi, aue eghelei llo ghe auliaala.

<sup>12</sup> Liuna avalua o me ta kateva nonga ia taita, nongina va matena ia, ghe alutula kolengenina atoa, ororoaairia nongina katto atoa elomarase me rira atoa elosamarra, karika ita rooroo tani ira.

<sup>13</sup> Ila akapa o taumattu ngatoa laghe tokatoka tale niaikaiaia nau laghe matela. Karika laghe ghaala voto God ghe auliaala tale inangari nialokoi. Laghe tara amasau lao sio, me laghe masimasila, me laghe aulia ngaotula va ila ativuu ila me karika tanganueira tale ia oia kosa ateva.

<sup>14</sup> Lo atoa taumattu la ghaauliaa isaa o ase voto la ghaapasunga va la paepae masaliki aue tanganueira.

<sup>15</sup> Arova laghe aannaa masaliki laghe kasu vulila, aue laghe nnaa righi salana tani kiriaa lao.

<sup>16</sup> Me karika ta laghe nannangaili masina atea masaliki pei ngepona liu ia. Liuna avalua o me God karika epaapalata nau la kolokoloa va kapuira Goto ia, poli ia ang ghe aimonomonosiaala masaliki taatara atea va masalikiira ia.

<sup>17</sup> Tale niaikaiaia Abraham, nau God ghe tootoongainiela, ghe gheleila aiaavusuvusuena ta Aisiki. Lo ateva ghe ghaala inangari nialokoi ghe ainasiaala tani ghelei aiaavusuvusuena ta kateva nonga ia natuna taita ateva,

<sup>18</sup> arongona ta God ghe uela etana va, "Ta Aisiki tuyum atoa aue la lutu."

<sup>19</sup> Abraham ghe nnaala va God erooroo tani totu matena atoa, me ita rooroo tani ue va nonginaaili va ghe ghaa oghila Aisiki tale nimate.

<sup>20</sup> Tale niaikaiaia, Aisiki ghe arangisela Jekop me Iso tale voto auena ghe lutu tale maamauluaairarua.

<sup>21</sup> Tale niaikaiaia, Jekop ghe arangisela natuna alua Josep, nau ghe saoainiela epona tale unna aikkatulu etiulu me ghe kakkauaa God emulina ghe matela.

<sup>22</sup>Tale niaikaiaia Josep, nau eteva ang ghe aainasiaa tani mate, ghe auliaala nau alisraeli etoa aue la kasu vuli eljip, me ghe aulia ngalokoila inangari tani usilaa va sa ateva aue la gheleia tale riuna.

<sup>23</sup>Tale niaikaiaia tamane me kinna Moses lalu ghe aisulieiniela kotolu ulana nau eteva ghe lutula. Poli lalu ghe tarala va aliki eteva oia masinaaili taataraane, karika lalu ghe matautula tani tam nongo usilaa inangarina kingi eteva.

<sup>24</sup>Tale niaikaiaia Moses, nau eteva ghe namuula, ghe ratila va la koloa va natuna ia natuna vause ateva Peroo.

<sup>25</sup>Ghe aloannala tani ghaa nimmarikana tee kapuna taumattu ngatoa God, me ghe rau mene amasimasia tani ghelei ssavoto tale nau karika aluse.

<sup>26</sup>Eghe nnaala va marova eghaa nimmarikana, me etam ghaa nioneoneaa, tale ararina ateeae Karisto, aue elau ekapa asease ghinna atoa eljip, poli ghe aatoka matane tale apolopoli eteva auena.

<sup>27</sup>Tale niaikaiaia Moses ghe kasu vulila eljip, poli karika ghe matautaala sessaiaane kingi eteva, nongina va arova ghe tarala lo ateva karika ita rooroo tani taraia, me ghe ratila tani mene oghiaa lao.

<sup>28</sup>Tale niaikaiaia ghe gheleila uunguaa Pasova ngateva, me ghe auliaala laghe atoka saela rae tapaa ngatamaniira, me ensolo tale nimate ateva ghe tam uvi ematela natuira mua atoa taita alisraeli etoa.

<sup>29</sup>Tale niaikaiaia alisraeli etoa laghe kasu longotila paa manu eteva la ghaseasea va eRet Sii etana, nongina va elae. Nau aljipi etoa vara laghe toonga tani kasu tee, manu eteva ghe arropilala.

<sup>30</sup>Tale niaikaiaia aivativati etoa ejeriko laghe katuula nau alisraeli etoa laghe kasu taliaala erooroo ghaitu nau.

<sup>31</sup>Tale niaikaiaia Rejab aipae taita ia karika ghe matela tee lo atoa laghe tam nonganongo usilaa God, poli ghe aitaraala kapuira tau llosa atoa alisraeli etoa.

<sup>32</sup>Vaalua, sa ateva amene aulieinia? Karika oroi naughu tani mene auliaa Gidion, Barak, Samson, Jepta, Deivit, Samuel me propete atoa.

<sup>33</sup>Tale niaikaiaia laghe uviubi patunganue namu ngatoa me laghe ghaaghaaila, laghe gheelei niaiseakei tale uunguaa nighulughuluena, me laghe ghaaghaa saa voto God ghe aauliaia ta ngetaira tale inangari nialokoi. Laghe gheelei runga paaira laeoni etoa,

<sup>34</sup>laghe aapala kura atoa ataataailiila, laghe saasaanga tale baenata. Arongona ta saghuluguina ila, me laghe mene sarasarakana, me laghe tiitingina asarasarakana tale niaiuvi, me laghe uviubi tau ngai ssateeira atoa ativuu ila.

<sup>35</sup>Tale niaikaiaia, vause atoa kapuira atoa matena ila laghe mene totu saela tale nimate. Katoa laghe tam aaloanna va la nim karavusu, laghe matemate tale nimate mmarikanaili, poli laghe aloannaaili va la mene totu tale lo ateva nitotu masinaaili ia.

<sup>36</sup>Mene katoa laghe aauliaia teeila asease inangari etoa me laghe uuetaila. Katoa laghe aatoka sene ta ngetaira me laghe laolaoainila tale ale mata voovoo.

<sup>37</sup>Laghe osaosa amatela tale atu, laghe soosoo eghaluevilauila, laghe uviubi ematela tale baenata. Laghe kasukasu see, laghe aasae viliki sipsipi me meemee, karika righi peiira, taumattu ngatoa karika laghe gheelei righi masi voto ta ngetaira, laghe gheelei saasakieinila.

<sup>38</sup>Kosa ateva karika ghe maamasina ta ngetaira. Laghe aso kasukasu see nongina va lo atoa karika va righi liuira, laghe tokatoka tale voto karika righi taumattu ta ngetana me tale motouru etoa, me tale lienga atoa me liu etoa tale kosa.

<sup>39</sup>Ila oia lo atoa laghe ghaala niaruua ta God poli tale uneira niaikaiaia, arongona ta karika teva ta ngetaira ghe ghaala voto laghe aulia ngamuemue alokoila tale inangari nialokoi.

<sup>40</sup>God ang ghe loela kasina voto masinaaili ta ngetaita, me karika va lo atoa akasina nonga, ta ita akapa aitauua aue ita ghaa.

## 12

*Iesu, aitiutiua ia me aighelei eghulughuluena niaikaiaia ia*

<sup>1</sup>Ita taatara orioeili taumattu ngatoa maamauluuairaa eaapasunga vaalua mallooeana niaikaiaia. Liuna avalua o ita ilou tale ia o niaikarati eteae emua ta ngetaita me ita rau

**11:22:** Aitiuti 50:24-25; Eks 13:19.    **11:23:** Eks 1:22; 2:2.    **11:28:** Eks 12:21-30.    **11:29:** Eks 14:21-31.    **11:30:**

Jos 6:12-21.    **11:31:** Jos 2:1-21; 6:21-25; Jms 2:25.    **11:32:** Aitoi 6:11-8:32; 4:6-5:31; 13:2-16:31; 11:1-12:7.    **11:33:**

Den 6:1-2.    **11:34:** Den 3:23-27.    **11:35:** 1 Ki 17:17-24; 2 Ki 4:25-37.    **11:36:** 1 Ki 22:26-27; Jer 20:2; 37:15; 38:6.

**11:37:** 2 Kro 24:21.    **12:1:** 1 Ko 9:24-25.

mene mango vulua. Ita ghaa velu righi aseasee voto maamatana, me ssavoto tee erau kavili rungainita.

<sup>2</sup> Nau etoa ita tani taatara lao ta Iesu, poli ia aitiutiu ia me aighelei eghulughuluena niaikaiaia ia. Karika ghe nnaala nipalata tale ia o ase nimate ateva tale aikotoo, ta ghe nnaala nimasimasi eteva ue eghaa me etoka etana nau ekapa atoa. Me ghaine etokatoka tale pai muenma ativilau tale aitokatokane ateva God.

*God eparuparu natuna atoa*

<sup>3</sup> Am nim nnaa voto sesaaili tau ssavoto atoa laghe gheleila etana, me ghe tingina akorokoronganala etana. Karika laghe maamasieinia me laghe gheeleia va eghaa voto maate. Liuna avalua o me am rau mene mango me am sio asoasoaa.

<sup>4</sup> Tale uneimim niaissarakaa tee ssavoto ateva, karika toa laghe uvi emateam.

<sup>5</sup> Me koti ngam ghe kkaluaala isaa o inangari niaisausiaa eaauliaa etaimim va am natuna am.

“Natughu, urau mene nnaa va neparuparu eteae kanna ia Vau ngepona peisaane ia, me urau mene sio asoasoaa nau eloeloeo.

<sup>6</sup> Poli Vau ngepona ateva eparuparu lo atoa eaaielousiangailila

me eattara matane lo ateva taumattu eghaaghaaia nongina va natuna ia.”

<sup>7</sup> Liuna avalua o me am tingina asarasarakana tale neparuparu aanasa, poli God egheeleiem nongina va natuna am. Poli sa ateva aliki tamane etam paruparua?

<sup>8</sup> God eparuparu ekapa natuna atoa. Arova etam parula, karika va tani natuna ila, ta nim aliki tale kosa ateva oia.

<sup>9</sup> Nim nongina tamaita tuunga atoa la paruparuta, me ita oneoneainila. Vaalua me karika ita roo tani tau velu Tamaira ateva kapuita spiriti etoa eparuta me etaue maulue ateva me aue ita toka?

<sup>10</sup> Tamaita atoa tale kosa ateva oia la paruparuta tale nau karika aluse, tale aaloannaaira; me God eparuparuta tani sausita tale masi nitoka nau etoa egheeleita va ita manga nongina ia manga ia.

<sup>11</sup> Karika ita masimasi nau la tautau mae neparuparu mmaprikanaaili tani ghaa oghita tale sesa salana. Me marova ita kila tani nongo usilaa nau la paruparuta, aue ita ghelei voto għulughuluena me aue ita toka tale luei.

<sup>12</sup> Poli ngam ghe maomaonala tale niaikarati eteae, liuna avalua o me am gheleiem me am mene sarasarakan.

<sup>13</sup> Am toka tale għulughuluena atikirighi salana me aue am roo tani saanga, me voto atoa la gheelei emaomaoanaiem, karika la rororo tani gheleiem va erauem.

<sup>14</sup> Am tootoonga tani toka tee taumattu ngakapa atoa tale luei, me am toka tale maulue manga. Arova teva maamaulueaane karika manga, karika aue etara Vau ngepona ateva.

<sup>15</sup> Am aipanipaniaa nonga ta am rau katuu vulu nonga maamasinaane ateva God. Karika teva etaimim emene nongina natu ngai erighi kaaleaili ia epiipinosa sae me egheelei orioieil voto sesa, me oroi taumattu la tam raarangisana ta matane God.

<sup>16</sup> Karika teva taumattu emene aimuli tee uunguaa nialai salosalooa me karika eoneoneea voto atoa manga ila, nongina Iso, ghe nim aikolikoliaala saa voto ia ghe rororo tani għha poli ia mue ia, tale nim tuku nginana arighi.

<sup>17</sup> Am nim nnaa va nau Iso ang ghe għeilela isaa o voto, me emulina ang ghe mene aaloanna niarangise me God għe ratila. Iso karika għe roola tani aikolikoliaa isaa o voto poli karika għe nna ngħaqiġħiġha ngakoronnaal arongona ta għe ngangngala poi.

*Ita għe mae sio ta Jerusalem ngepona liu eteva*

<sup>18</sup> Karika am għe mae tale motouru eteva eSaenae ita rororo tani posoa, karika teae kura eramerame, o righi saurrom me urukookoo, o teva ttasi vaoo,

<sup>19</sup> o lingi taue ateva me lingi ngħal ateva esamasama, me lo atoa lagħe nongoala, lagħe tam aloannala tani mene nongo righi inangari.

<sup>20</sup> Poli karika angila għe rororo tani nongo me tingina akorokoronganala tale saa llo God għe auljaala va, tee marova teva għaata kkena enim tuli motouru eteva, la tani uvi ematea.

<sup>21</sup> Saa voto lagħe tarala għe għeħli ematautulala me Moses għe uela va, “Ngagħi reteretee nimatautu.”

<sup>22</sup> Me, ngam għe mae sio tale motouru eteva la aseasea va Saeon, ia o masaliki taatara eteae masalikina ia God ateva tokatoka liu ia, ia o Jerusalem ngepona liu eteva, me ta kapuna ensolo atoa orioannaaili ila lagħe mae sio tani masimasi eitaua.

**12:5:** Nitoka 3:11-12; Job 5:17; Aotu 3:19.    **12:7:** Diut 8:5.    **12:11:** Jms 3:17-18.    **12:12:** Ais 35:3.    **12:13:**

Nitoka 4:26.    **12:16:** Aitiutiu 25:29-34.    **12:17:** Aitiutiu 27:30-40.    **12:18:** Eks 19:16-20; Diut 4:11-12.    **12:19:**

Eks 20:18-21; Diut 5:22-27.    **12:20:** Eks 19:12-13.    **12:21:** Diut 9:19.

<sup>23</sup> Ngam ghe mae sio tale kinatama nivelu eitaua ngateae ta lo atoa nongina va natuna mata ngemue ila God, me ila la masimasieili poli ila arariira isaa epona liu, me ngam ghe mae sio ta God, ia tau ngai ghelei niaisakei ia ta ila akapaili taumattu ngatoa, me ta ghulughuluena tee atoa laghe matela me God ghe amangailala.

<sup>24</sup> Me Iesu etiitingina elome etaita me God tale ouna ateva inangari niaippooa ngaitauua, poli raena ateva elaulau raena ateva Eibol me eaaulia ngaotu orioieili masi voto.

<sup>25</sup> Am nna ngamasina, me am rau mene rati tani nongo usilaa God nau eaaippooa. Katoa laghe nongo vuluela nau ghe aauliaa voto etaira tale kosa ateva oia, me karika laghe rooroo tani ilou eisulia. Liuna avalua o me karika poi aue ita rooroo tani ilou eisulia marova ita tam nongo usilaa inangarina God epona liu.

<sup>26</sup> Lingi ngalona ateva God ghe gheleila kosa ateva ghe rukeiela, me tale isaa oia nau ang ghe aulia ngalokoila tale inangari nialokoi va, "Aue amene ruke kosa ateva ghaluene me epona liu tee."

<sup>27</sup> Isaa o mata nginangari va "ghaluene" eaaulia ngamasalikangaili va aue eghaa velu voto erooroo tani ruke, malloeana va llo voto ghe gheleila, poli ghe aloannala va llo voto karika la rooroo tani ruke, isaa nonga o voto aue etoka.

<sup>28</sup> Liuna avalua o me ita kaili emasina ta God, poli ita ghaaghha aririmangali eteva karika erooroo tani rukeia, aue ita kkauua God tale ase salana erooroo tani apasunga nioneoneaa me nimatautu ta God.

<sup>29</sup> Poli kapuita God ateva koronnaaili va ia nongina "kura ataeae etuuturungi ekapaaili voto atoa."

## 13

### *Niuungu tani amasimasi God*

<sup>1</sup> Am rau mene ruu tani aielousi nongina va tue me nenga am.

<sup>2</sup> Am rau mene kkaluaa tani aikoloa ativuu etoa, poli katoa laghe gheelei evalua o me karika laghe kilakila va laghe aikoloaala ensolo atoa.

<sup>3</sup> Am nnaa lo atoa tale ale mata voovoo, arova nongina va am tee am tokatoka tale ale mata voovoo teeila, me tee lo atoa karika la gheelei masina etaira, nongina va am tee am ghaaghha nimmariikana.

<sup>4</sup> Am akapaaili am oneoneaa nilai eteae, me lailai elua komo tellaai ekomoirarua nonga ia. Ta poli God aue egheli niaisakei ta lo ateva taumattu lailai ia me emene laa ghaailai see, me lo atoa la lailai sari maneira atoa mene katoa.

<sup>5</sup> Am alekalekaiem tale uunguua niaielousiaa viliki veu, me am masimasiaa saa voto ngam ghe ghaala isaa etaimim. Poli God ghe uela va,  
"Karika aue akasu vulio;

me karika aue akkaluaa poio."

<sup>6</sup> Mausina avalua o me ita atoka tuutuliita ta God me ita ue ta taumattu ngatoa va,

"Vau ngepona ateva tau ngai sausighi ia,

karika aue amatauta

saa righi voto teva taumattu eanna tani ghelei etaghi."

<sup>7</sup> Am rau mene kkaluaa lo atoa laghe muemueinam, ila laghe aaulia ngaotu inangarina ateva God etaimim. Am nnaa tee vaalua tokatokaairaa me matemateaairaa, me am tootoonga tani ghaa ia o ase niaikaiaa ngateva nongina ila.

<sup>8</sup> Iesu Karisto karika ghe aikolikoliaa poi nau too ang ghe lao sio, nau ghaine, me nau too emaemae.

<sup>9</sup> Am rau mene tau velu asease niapasunga ngatoa kamena ila va la katulaa veluem tale masi salana atikirighi. Emaamasinaa tale urunguita ateva tani ghaa sarasarakan tale maamasinaane God, me karika va tani usilaa inangari tale uunguua inana la gheelei aiaavusuvusuena etana, ta poli lo atoa la usilaa isaa o inangari karika esaasausila.

<sup>10</sup> Ouna ase liu nighelei aiaavusuvusuena etokatoka etaita, me pristi etoa la uungu tale ale kandisi eteva manga ia karika la rooroo tani ghaa inana tale ia o voto ateva.

<sup>11</sup> Nau namu ngateva ta pristi etoa eghaaghha raeira ghaata kkena atoa me esossoa elome tale rum atiulu mangaaili ia tani ghelei aiaavusuvusuena tani ghaa velu kaluiraa ssavoto taumattu ngatoa, me ghaata kkena akapa ateva laghe ghooainia eleka, me laghe ghoa tungitungia.

**12:24:** Hib 8:6; Aitiuti 4:10.    **12:25:** Hib 2:1-3; 10:26-29.    **12:26:** Ag 2:6.    **12:29:** Diut 4:24; 9:3.    **13:2:** Rom

12:13; Aitiuti 18:1-8; 19:1-3.    **13:4:** Ips 5:5.    **13:5:** Diut 31:6, 8; Jos 1:5.    **13:6:** Sams 118:6.    **13:7:** 1 Ko 4:16.

**13:9:** Rom 14:17.    **13:11:** Lev 16:27.

<sup>12</sup> Mausina avalua o me Iesu tee ghe matela eleka tale masaliki taatara atae, tani ghelei eraarangisana kaluira ssavoto taumattu ngatoa tale raena ateva.

<sup>13</sup> Liuna avalua o me ita tee ita ghoa tee Iesu eleka me ita ghaa nipalata nongina laghe ghelei teeielia.

<sup>14</sup> Poli tale kosa ateva oia karika teae masaliki taatara erooroo tani toka nau ekapa atoa, ita toitoi ia oouna atae masaliki taatara va emae.

<sup>15</sup> Liuna avalua o tale uunguaane Iesu ita toka kaakaueinia nau ekapa atoa tani ghelei arova uneita aiaavusuvusuena nitau sae ta God. Me nilooloo sae me nitau sae ita auliaa ta paaita nongina va kaluita aiaavusuvusuena ta God nau ita auliaa ararina atae.

<sup>16</sup> Am rau mene kkaluua tani ghelei masi voto me tani parruu mene kateva kateva, poli God emasimasiaa ia o ase aiaavusuvusuena.

<sup>17</sup> Am nongo usilaa lo atoa la muemueinam me am ghelei saa voto la auliaa. Poli ila la aaitarainiem, me aue la ghauliaa ta God vaalua aaitaraaira etaimim. Am nongo usilainila, me aue nimasimasi elutu tale uunguaaira. Arova karika, aue la ghelei uunguaaira tale nialousiusi me karika aue la roo tani sausim.

<sup>18</sup> Am rau mene ruu tani looloo sae poli mausiiimami, poli ami kilakila va nannaaimami masalikeaili va karika ami ghe gheelei righi sesa voto, poli nau ekapa atoa ami aloanna tani ghelei voto masina.

<sup>19</sup> Tale urunguitanighi ekapaaili eteva akookolomiem tani looloo sae va God aue esungi parasieghi atu etaimim.

#### *Airuuruu eteva nilooloo sae*

<sup>20-21</sup> Alooloo sae va God, ia etaatau luei, aue etaau aatu isaa akapaaili masi voto atoa me am rooro tani ghelei voto eaaloanna. God ghe totula Vauita ateva Iesu Karisto tale nimate, ia kinatama aitoitoi ia ta sipsipi etoa, poli tale raena ateva tale matemateaane. Raena ateva ghe tiauala niaippooa ngaitaua ngateva aue etoka nau ekapa atoa. Alooloo sae va aue God eghelei etaita saa voto emaamasina etana, tale uungua Jesu Karisto, me ta ngetana nitau sae nau ekapa atoa. Koronna.

#### *Airuuna inangari tale uru ngai etikirighi*

<sup>22</sup> Akookolomiem, masi kapughi etoa, tani nna ngamasina isaa o inangari niaisausiaa aghe pitila tale uru ngai etikirighi oia karika aluse ia.

<sup>23</sup> Aghaalaoannaiem tani kila va kapuita ateva ta Timoti ang ghe kupi ghoa mae tale ale mata voovoo. Arova emae parasi, aue aghaaia me angalu mae taraiem.

<sup>24</sup> Am taula masimasiaaimami ta lo atoa la muemueinam me tee ta kapuna taumattu ngatoa God. Kapuita atoa eItali la suu aatu sio masimasiaaira etaimim.

<sup>25</sup> Alooloo sae va aue maamasinaane God etoka etaimim akapa.

**Uru ngai etikirighi  
Jeimis  
ghe pitiela  
Inangari emuemua**

Oroi ila tau ngalomasaanga atoa la nanna va Jeimis kateva tana nengane Iesu. Ia namuu ia elome ta tau ngaisesoa ngatoa eJerusalem (Apostolo 15; Galaisia 2:9). Uru ngai etikirighi oia ghe pitiela eaauliaa oroi voto tale tokatokaaita nau ita aimuli tee Karisto.

**Tani kila amuemua**

Aitiutiui tale inangari, me niapasunga tale nitootoonga **1:1-27**

Lo atoa karika righi peiira, me niparruu **2:1-26**

Nisama raarangisana **3:1-4:12**

Nitootoonga tale viliki veu **4:13-5:6**

Nitingina akorokorongana, nilooloo sae, me airuuruu tale uru ngai etikirighi **5:7-20**

<sup>1</sup> Aghi Jeimis, kapuna tau ngai nonganongo anna ieghi God me Vau ngepona ateva Iesu Karisto.

Apitipiti atu etaimim kasangaulu ghalua (12) aririmangali nge Israeli am tokatoka reerekataa see tale mene kasina patunganua.

Masi nau eteva etaimim.

*Nitootoonga eaasarasarakanaita*

<sup>2</sup> Kapughu etoa, nimasimasi eteva namungaili ia epasu etaimim nau am ghaa ase nitootoonga,

<sup>3</sup> poli am kilakila va nau ita apala nitootoonga tale aikaaiiaita egheelei nitingina akorokorongana ateva.

<sup>4</sup> Tani tam ruu tani tingina akorokorongana etani ruu uunguaane etaimim me aue am matuenna me am ghulughuluena me karika aue am tukuna tale righi ase voto.

<sup>5</sup> Arova teva etaimim etuutukuna tale masi alomasaanga kanna God, ekolomi God. God emasimasieili tani tau lao me karika etautau mae tale nisessaia me tani ului gheeleiaaita seesa, me aue eta lao masi alomasaanga etana.

<sup>6</sup> Me nau eteva ukolomi, uaiesoaa me karika emene ghalua nannaam, poli lo ateva eghaaghala nannaane nonginaaili kotoo ateva elamana kuukuu eteva ekuukueenie see.

<sup>7</sup> Ia o ase taumattu ngateva karika emene nnaa va aue eghaa righi voto ta Vau ngepona ateva,

<sup>8</sup> poli nannaane ase taumattu ngateva o eghaaghala me karika eaatoka tuu nannaane tale voto egheelei.

<sup>9</sup> Lo atoa kapuna iem God me karika peiimim, am masimasi poli am tokatoka euu, poli aue am kapa nongina uelei palaoa ngateva emammate.

<sup>10</sup> Me lo atoa tue peipeiena iem, am masimasi poli am tokatoka euu, poli aue am kapa nongina uelei palaoa ngateva emammate.

<sup>11</sup> Nau sinaka ateva esaesae, mallangina ateva elallangia me palaoa ngateva ekaakatuu me masi taataraane esessa. Tue peipeiena ateva aue ekapa avalua o nau eteva egheelei uunguaane.

<sup>12</sup> Aue emasinaaili ta taumattu ngateva etiitingina akorokorongana tale nitootoonga, poli nau nitootoonga eruu, aue eghaa kou nguru maulue ateva tokatoka liu ia, God ghe aulialia inangari nialokoi ta lo atoa la aielousieinia.

<sup>13</sup> Arova nitootoonga eghaa, karika teva emene ue va, "God etootoongainieghi." Ta voto sesa karika etootoonga God, me ia karika egheelei nitootoonga ta teva.

<sup>14</sup> Ta ninannaa sesa etaita egheelei nitootoonga me eghaaghaita lao tale voto sesa arova ivia ateva.

<sup>15</sup> Nau eteva sesa ninannaa ange tokala, eaalutu sesa voto, me nau sesa voto epiipinosa anamuu, eluulutuua nimate atea.

<sup>16</sup> Kapughu etoa, isaa o voto erau kameam.

<sup>17</sup> Isaa akapaaaili masi voto me voto ghulughuluena ekasukasuu epona liu. Ekasukasuu me esiosis etaita ta Tamaita ngepona liu eteva ghe gheleila mallanga atoa me karika eakolikololia nongina tootoo ateva.

<sup>18</sup> Tale aloaloannaane ghe alututala tale inangari koronna me aue ita rooroo tani taumattu niaitiutu tale isaa akapaaili voto gheleila.

*Tani nongo me ghelei*

<sup>19</sup> Masi kapughu etoa, am nnaa parasi inangari toko va, am akapaaili am kila tani oti parasi talingaimim tani nonganongo me am rau mene ailiului tani sama me tani sessai.

<sup>20</sup> Ta sessaiaa taumattu karika aue ghelei righi voto va eghulughuluena ta matane God.

<sup>21</sup> Liuna avalua o me am ruu tani ghelei sesa me tani annaa saasakiaa ta mene kateva, me am siuua nannaaimim me am ghaa inangari laghe auliaala etaimim erooroo tani asaangiem.

<sup>22</sup> Am rau nim mene nongo inangari me karika am ghelei voto eaauliaa. Arova am ghelei evalua o, am nim kamekameam.

<sup>23</sup> Lo ateva enongonongo inangari me etam gheelei, nonginaaili taumattu ngateva etaatara taataraane tale ghalasi eteva,

<sup>24</sup> me nau eruuruu tani taatara, me ekasukasu, arovaea ta eaikkaluua taataraane.

<sup>25</sup> Me lo ateva etam ghaaghhaa velu matane tale isaa o inangari nipaopao ghulughuluena egheelee karika ekaakaravusu tale ssavoto me nimate, me karika eoghioghi vulu isaa o voto, me karika eaaikkaluaa voto ghe nongola me ghe tarala, ta egheelei, niarangise aue etoka tale voto egheelei.

<sup>26</sup> Arova teva eue va tau nikkauua ia me karika eaitara ngamasina ramuramuti paana ateva, enim kamekamea me unna nikkauua egheelei nim peisaane.

<sup>27</sup> Llo nikkauua God Tamaita ia eloanna me eghaaghaha va raarangisana me masina isaa avalua toko: tani sausi aliki raeue vulu etoa me vause raeue vulu etoa nau nialousiusi eghaaghaila, me am rau mene tau velu gheeleiaa kosa ateva va egheelei saasakieinam.

## 2

*Karika masina tani aimassiaa*

<sup>1</sup> Masi kapughu etoa, poli ita aiesoaa ta Vau ngepona ateva Iesu Karisto iaaili epona, liuna avalua o me am rau mene aimassiaa.

<sup>2</sup> Arova teva taumattu emae nongina am veluelu eitauua me eaasae ringi gheelei tale gol me eaasae tee masi ghinna, me teva llo tee karika righi peina me ghinnanina sesa ghele kupi tee sso,

<sup>3</sup> me arova utara kkai nonga lo ateva emolumolu emasina me ughele ue etana va, "Masi aitokatokam ateva toko," me ughele ue ta lo ateva karika peina va, "Utingina lao too," o "Utoka sio tapaa kosa,"

<sup>4</sup> karika ukilakila va angu aaimuli tee tani ghelei niaiskei tani pola taumattu tale ale manga ateva tale ninannaa karika masina?

<sup>5</sup> Am nongo, masi kapughu etoa, God ghe suietoongaala lo atoa karika peiira tale kosa ateva oia va la tue peipeiena tale niaikaiaa me la ghaa niarangise tale ararimangalina ateva God, ghe auliaala inangari nialokoi ta lo atoa la aielousieinia.

<sup>6</sup> Me karika, ta am taatara lo atoa karika peiira va peisaane ila. Karika am kilakila va tue peipeiena atoa la tautauem sio euu tani ghelei voto maate etaimim? Me karika am kilakila va la ghaaghiaeim tani laoainam tale liu niaiskei?

<sup>7</sup> Karika am kilakila va ila la tani aattara tani auliaa saasakiaa teeiem lo atoa masi ararina atae Iesu etaimim?

<sup>8</sup> Arova am tani aitaraa kanna inangari nipaopao Iesu kingi ia tale Uru ngai Manga ateva eue va, "Uaielousiaa lo ateva etokatoka akalakalangina etam nongina uaaielousieinio," am gheelei masi voto.

<sup>9</sup> Me arova am aimassiaa, am gheelei voto sesa, me inangari nipaopao egheelei niaiskei etaimim va karika am aaimuli tee voto masina.

<sup>10</sup> Poli arova lo ateva eaimuli tee isaa akapaaili inangari nipaopao me kateva nonga ia ange tam aimuli teeielia, ange ghelei saasakia ngakapaailila inangari nipaopao.

<sup>11</sup> Poli God ghe uela va, "Karika umene lai sari kateva vausenna ateva," ghe ue teela va, "Karika umene aiuvi emate." Me arova utam lai sari kateva vausenna ateva me uaaiuvi emate nonga, angu ghelei saasakiaala inangari nipaopao.

<sup>12</sup> Am ppooa me am ghelei nongina lo atoa aue la aisakei tale inangari nipaopao poli isaa o llo, aue egheleiem me karika aue am karavusu.

**1:18:** Jon 1:13.    **1:20:** Alomasaanga 7:9.    **1:21:** Kol 3:8; 1 Pita 2:1.    **1:22:** Mat 7:26; Rom 2:13.    **1:25:** Rom

8:2; Jms 2:12.    **1:26:** Sams 141:3.    **2:1:** Apos 10:34; Jms 2:9.    **2:5:** 1 Ko 1:26-28.    **2:8:** Mat 19:19; Gal 5:14.

**2:9:** Diut 1:17.    **2:10:** Lev 19:37; Nam 20:7-12, 24; Mat 5:19.    **2:11:** Eks 20:13-14; Rom 13:9.    **2:12:** Gal 6:2; Jms

1:25; 1 Pita 2:16.

<sup>13</sup> Poli llo niaiskei karika righi nialousiusi etana, aue eghaa lo ateva taumattu karika eaalousiusi, me nialousiusi aue eapala niaiskei.

### Niaikaaiaa me niuungu

<sup>14</sup> Kapughu etoa, arova teva taumattu eue va eaiakaiaa, me karika righi masi niuungu egheelei, karika aue esausia. Am annaa va ase niaikaiaa ngateva o aue easaangia?

<sup>15</sup> Arova teva tuem me nengam etutukuna tale ghinna eaaloanna me inana tani nama ta kateva kateva nau,

<sup>16</sup> me teva etaimim ghele ue etana va, "Kasula tale luei me laa ghasae ghinna me uaanasa, me unamanama me essoio," me karika eghelei righi voto tani sausia, am annaa va saa righi masi voto aue elutu?

<sup>17</sup> Tale isaa o ase salana me arova niaikaaiaa karika elaoalao tee niuungu, isaa o niaikaaiaa nim matena.

<sup>18</sup> Me kateva aue eue va, "Unem niaikaiaa?" Me aghi aue aue va, "Auungu. Uapasunga unem niaikaaiaa karika niuungu etana me aue aghapasunga aikaiaaghi tale voto auungu etana."

<sup>19</sup> Uuaiesoaa va kateva nonga ia God ateva? Masi ninannaa ia! Me raroai tee atoa la ghaaiesoaa me la reterete.

<sup>20</sup> Alokapakapa ateva, uanna va aghapasunga va niaikaaiaa karika elaoalao tee niuungu, nim peisaane?

<sup>21</sup> Vaalua tuvuita ateva ta Abraham ghe ghulughuluena ta matane God? Poli voto ghe gheleila nau ghe alokoi saela natuna ta Aisiki tale liu nighelei aiaavusuvusuena ateva tani tauela ta God.

<sup>22</sup> Utara va, unna niaikaaiaa me voto ghe gheelei ghe kasukasu eitauaa. Me unna niaikaaiaa ghe masinala tale voto ghe gheleila.

<sup>23</sup> Me inangari tale Uru ngai Manga ateva ghe koronnala nau ghe uela va, "Abraham ghe atokala tuutulina ta God, liuna avalua o me God ghe aseala va ia ghulughuluena ia," me laghe kolokoloa va kapuna ia God.

<sup>24</sup> Am tara va taumattu ngateva eghulughuluena poli voto egheelei, karika va eaiakaiaa nonga.

<sup>25</sup> Nim nongina Reiab aipae taita ia me God ghe aseala va ghulughuluena ia tale voto ghe gheleila nau ghe aitarala tau lloua akilakila atoa me ghe apasungaala katikirighi ppaee salana me laghe usilainiela.

<sup>26</sup> Nongina taumattu ngateva karika eaainoana, matena ia, liuna avalua o me arova niaikaaiaa nonga me karika righi niuungu, isaa tee o voto matena.

## 3

### Tani aitara ngamasina ramuramuti paa ateva

<sup>1</sup> Kapughu etoa, erau mene oroi iem lo atoa am anna va am tau ngai aapasunga, poli am kilakila va lo atoa ita aapasunga, aaisakeiaita aue la tani kutumi emasina.

<sup>2</sup> Ita akapa ita gheelei asease voto sesa. Me arova teva taumattu etam gheelei voto sesa tale poppoaaane, ia ghulughuluena ia me egheelei runga ngamasina akapa vilikina.

<sup>3</sup> Nau eteva ita aasae tau lao biti eteva tale paa ooso ateva tani aloooia kona eaa ita anna va elao, ita gheeleia va ia akapa ekirie see nongina ita aloanna. <sup>4</sup> Ita mene tara kateva aimatoongana tale anua ateva. Arongona ta namuu ia me kinatama kuukuu eteva ekuukueinia, kapteni eteva enim aloaloaa tale aialoalo atiulu ghaunaaili ia.

<sup>5</sup> Nonginaaili ramuramuti paa ateva ghauna ia tale vilikiita me eaasake va erooroo tani gheleli kinatama voto. Gharighi kuraa erooroo tani ata teva kinatama tuvui.

<sup>6</sup> Ramuramuti paa ateva tee kuraa ia, tanganeuireia ia sesa voto atoa. Etokatoka elome tale mene kasina voto tale vilikiita tani ghelei saasakiaa taumattu ngateva me eaatoka maamauluane akapa tale kuraa atea me eGehenna eaarokoti kuraa atea etana.

<sup>7</sup> Taumattu ngatoa la roro tani gheleli isaa akapa ase ghaata kkena me ghila me llo erarraa me voto elamana la roro tani gheleila la matukkale me la ghaitarainila

<sup>8</sup> me karika teva taumattu erooroo tani ghelei ematukkale ramuramuti paa ateva poli sesa ia, me karika erooroo tani matua atoka, me ia pasu ia tale voto kaale erooroo tani kaali emate taumattu.

<sup>9</sup> Tale ramuramuti paa ateva ita tautau sae Vau ngepona ateva Tamaita ia, me ie nonga o ramuramuti paa ateva ita kaakasikienaa taumattu etana, ila tee lo atoa tootoona ila God.

**2:13:** Mat 5:7; 18:32-35.    **2:15:** 1 Jon 3:17.    **2:18:** Gal 5:6.    **2:21:** Aitiutiu 22:9-12.    **2:22:** Hib 11:17-18.

**2:23:** Aitiutiu 15:6; 2 Kro 20:7; Ais 41:8.    **2:25:** Jos 2:1-21; Hib 11:31.    **3:6:** Mat 12:36-37; 15:11, 18-19.    **3:8:**

<sup>10</sup> Tale ie nonga o paa ateva nitau sae me nikasikieno ekupikupi ghoa. Kapughu etoa, karika emene isaa avalua o.

<sup>11</sup> Am annaa va manu maraange me manu uelane lalu rooroo tani akala nonga tale kateae mata ngateo?

<sup>12</sup> Kapughu etoa, am annaa va fig atea ai ia eroroo tani kuneaa oliv, o uasa uaeni eroroo tani kuneaa righi ue fig? Mata ngateo atea uelanna ia karika eroroo tani ghelei righi manu va emaraange.

#### *Alomasaanga ekasukasus epona liu*

<sup>13</sup> See alomasaanga nannaane etaimim? Eapasunga tale masi niuungu egheelei tale nisiuua ninannaa.

<sup>14</sup> Me arova nissa tee kateva poli ia ange apalaiola me nikuruetuna etokatoka tale urunguitaniim, am rau mene aasakeaa isaa o voto ta am rau mene ghelei nikamekame tale voto koronna.

<sup>15</sup> Isaa o ase ninannaa karika ekasukasus epona liu, ta pei tale kosa ateva me karika emaema ta Spiriti eteva, ta kanna Satana.

<sup>16</sup> Nau usessa tee kateva poli ia ange apalaiola me ukuukuruetuna, aue utara va voto eaaikasakasaliaa me asease voto sesa aue elutu.

<sup>17</sup> Me alomasaanga ekasukasus epona liu, mata ngemua ateva voto etana, raarangisana, me ealoanna luei eteva, me enannaa mene kateva, me tani nongo mene katoa, me pasu ia tale nialousiusi me masi uenenna, me karika niaimassia etana me karika ekamekame.

<sup>18</sup> Tau ngai ghelei luei etoa la pasapasa luei, me la mukemuke voto ghulughuluena.

## 4

#### *Am tau ekapaiem lao ta God*

<sup>1</sup> Sa ateva egheeghelei niaitunna me niaikiso elome etaimim? Karika am kilakila va ekasukasus tale aloannaaimim eaaivii tee masi ninannaa tale urunguitaniimim?

<sup>2</sup> Am aaloanna voto me karika am ghaaghaa, liuna avalua o me am aaiuvii emate. Am sassaii me karika am rooroo tani ghaa voto am aloanna tani ghaa. Am aikiso me am aiiuvii. Karika am ghaaghaa poli karika am kookolomi God.

<sup>3</sup> Me nau am kokkolomi, karika am ghaaghaa, poli am kokkolomi tale sesa ninannaa, poli nau aue am ghaa aue am uunguua tale aloaloannaaimim.

<sup>4</sup> Am tau ngai lai sari etoa! Karika am kilakila va tani aikapukapuaa tee kosa ateva nitau ngai ssateena ia God? See io ualoanna va kapuna io kosa ateva, io aue utau ngai ssateena io God.

<sup>5</sup> Am annaa va voto Uru ngai Manga ateva ghe auliaala va karika righi malloeanina? Eue va, "God eannangaili arova ita aimulusi teeia, me enannaa saasakiaa tee spiriti eteva ghe atokaiela ta ngetaita arova eusilaa uunguua kosa ateva."

<sup>6</sup> Me God etautau mae orioeili maamasinaane etaita. Liuna avalua o me Uru ngai Manga ateva eue va,

"God karika poi ealoanna lo atoa la tautau sae nannaaira

me etautau lao maamasinaane ta lo atoa la siosioaa nannaaira."

<sup>7</sup> Liuna avalua o me am tau ekapaiem lao ta God. Am rati namu ngateva ta raroai etoa me aue eroo tani ilou vuliem.

<sup>8</sup> Am lao akalakalaa ta God me aue emae akalakalaa ta ngetaimim. Am tau ngai ghelei ssavoto atoa, am ghelei eraarangisana maamauluaaimim, me lo atoa egħaagħalua nannaaaimim, am ghelei eraarangisana urunguitaniim.

<sup>9</sup> Am alousiusi me am ngala. Me am lo atoa am kangkanga nau ghaine, am ruu tani kanga me am ngala me am ruu tani masimasi, me am alousiusi.

<sup>10</sup> Am siuua nannaaimim ta matane Vau ngepona ateva, me aue easaes arariimim.

<sup>11</sup> Kapughu etoa, am rau mene auliaa saasakiaa tee mene kateva. Lo ateva eauliaa saasakiaa tee teva tuena o nengane nonginaaili va egheelei niaiskei etana, me arova egheelei evalua o eauliaa saasakiaa tee tale inangari nipaopao me egheelei niaiskei etana. Me arova ugħelei niaiskei tee tale uunguua inangari nipaopao, me karika uaimuli tee, nonginaaili wa io tau ngai ghelei niaiskei io.

<sup>12</sup> Keteva nonga etautau mae inangari nipaopao me egheelei niaiskei. Ie nonga eroroo tani asaangi me tturuu. Me io see etam me vara ugħelei niaiskei ta lo atoa la tokatoka akalakalangina etam?

*Tani aasakeaa nimanaa*

<sup>13</sup> Am nongo, lo atoa am ue va, “Ghaine o nimanaa ita lao tale teva masaliki taatara me ita laa toka kateae ninamanama, me ita ghelei niuungu tani ghaa viliki veu.”

<sup>14</sup> Me karika am kilakila sa ateva ue elutu nimanaa. Vaalua tale maamauluaaimim? Nim nonginaaili asu emaemae karika masau me ekapakapa.

<sup>15</sup> Me masina arova am nim ue va, “Arova aloaloannaane Vau ngepona ateva ue ita toka me ita ghelei llo voto.”

<sup>16</sup> Am tautau sae nannaaimim me am aasake. Isaa akapa o ase niaasake sesaaili.

<sup>17</sup> Liuna avalua o, lo ateva ekilakila voto masina tani ghelei me etam gheelei, egheelei voto sesa.

## 5

*Tue peipeiena atoa ue la ghaa aipoliira sesa*

<sup>1</sup> Tue peipeiena atoa am nongo! Am alousiusi me am ngala, poli voto sesaaili ange maemae etaimim.

<sup>2</sup> Peiimim oroi ange maamarokase me ane ateva enamanama ghinnaniimim.

<sup>3</sup> Uneimim gol me silva ange roroso, me rorrosaaaira ue aulia ngaoetuem tale nau niaiskei, me ue enama vilikiimim arova kuraa atae. Am ghe atoka aitauaala peiimim tale llo nau airuuruu.

<sup>4</sup> Am tara! Aipoliira taumattu ngatoa am ghe tam polilala nau laghe uungula etaimim ange kolokolo anamuu sae ta Vau ngepona ateva, me kolokoloaaira lo atoa la mukemuke Vau ngepona ateva sarasarakanaili ia ang ghe nongola.

<sup>5</sup> Am ghe tokatoka tale kosa ateva tale masi nitoka, me am ghe kuukuruetuna tee masi tokatokaaimim, me am ghe mmoro teela ninamanama nonginaaili ghaata kkena ange ghaala nau eteva la uvi ematela.

<sup>6</sup> Lo atoa taumattu ghulughuluena ila, am ghe aaliu teeila va laghe gheelei sesa, me am ghe uvi ematela llo taumattu karika ghe gheleila isaa o voto. Me karika toa laghe liula voto am ghe ghelei teeilala.

*Ita rau mene mangoo nau ita ghaagħhaa mmarikana*

<sup>7</sup> Liuna avalua o, kapugħu etoa, me am rau mene mangoo tani toitoi lamosina ta Vau ngepona ue emae. Am tara vaalua tau ngai ghelei utana ateva etoitoi va kosa ateva esausi tani ghelei me umana voto ekuneaa masi voto me vaalua etam maamangoo tani toi vaoō ateva.

<sup>8</sup> Am tee am rau mene mangoo me am tingina akorokorongana, poli maemaeaane Vau ngepona ateva ange aakalakalaa.

<sup>9</sup> Kapugħu etoa, am rau mene ainguunguuaa tee mene kateva ta am rau aisakei, poli tau ngai ghelei niaiskei eteva etiitingina ta paa ngatamana.

<sup>10</sup> Kapugħu etoa, am anna ngamasina uuングuaane nitam mangoo tale nimmarikana, me am annaa propete atoa laghe aippooa tale ararina atae Vau ngepona.

<sup>11</sup> Am kilakila va ita taatara va niarangise tale lo atoa ta tiitungina akorokorongana tani toitoi. Ngam ghe nongola vaalua Job ghe tam oghi vulula tani aiesoaa ta God, me ghe tarala sa ateva Vau ngepona ateva ghe tauue lao sio tale airuuruu. Vau ngepona ateva pasu ia tale nialousiusi me eaaloanna tani aisausiaa.

<sup>12</sup> Me tale voto akapaaili, kapugħu etoa, am rau mene ue va, “Arova akamekame, lo ateva epona liu eattara mataneagħi,” o, “Arova akamekame, lo ateva eaaitaraa kosa ateva eattara mataneagħi,” o mene righi ase voto. Llo erooroo va, am ue va “ue” etana, am ue va “ue” etana. Me llo karika, am ue va “karika” etana, God erau ghelei niaiskei etam.

*Niiloolo sae tale niaikaiaa*

<sup>13</sup> Lo ateva etaimim etokatoka tale nau sesa, erooroo tani looloo sae. Me lo ateva emasimasi euei righi kkinari tani kkauaa God.

<sup>14</sup> Lo ateva etaimim eiisiki, ekolo elda ngatua tale ale manga, me la looloo sae etana me la kao oeli tale ararina atae Vau ngepona ateva.

<sup>15</sup> Me nioloolo sae tale niaikaiaa ue eghelei emasina tau ngisiki eteva, me ue Vau ngepona ateva etotua, me arova ghe gheleila righi sesa voto, God aue ekkaluua.

<sup>16</sup> Liuna avalua o me am aulia ngaotu sesa gheeleiaimim ta mene katoa me am looloo sae ta God mausi mene katoa, me ue am masina. Unna nioloolo sae ghulughuluena ateva taumattu sarasarakanaili me erooroo tani ghelei voto.

**4:13:** Luk 12:18-20.    **4:14:** Nitoka 27:1; Sams 39:5, 11.    **4:17:** Luk 12:47.    **5:2:** Mat 6:19.    **5:4:** Diut 24:14-15.

**5:5:** Luk 16:25.    **5:7:** Jer 5:24; Diut 11:14.    **5:8:** Rom 13:11-12; 1 Pita 4:7.    **5:11:** Eks 34:6; Job 1:21-22; 2:10;

Sams 103:8.    **5:12:** Mat 5:34-37.    **5:14:** Mak 6:13.    **5:15:** Mat 17:18-20.

<sup>17</sup> Elaija nim taumattu ia nongina ita me ghe nim looloo saela va erau mene vaoo, liuna avalua o me ghe tam vaoola ghe roola kotoluae ninamanama me ghaonomo ulana.

<sup>18</sup> Ghe mene looloo saela me epona liu ghe tau sio mae vaoo ateva me kosa ateva ghe apinosala voto laghe pasapasa.

<sup>19</sup> Kapughu etoa, arova teva etaimim eoghi vulu voto koronna me lo ateva emene ghaa oghie mae,

<sup>20</sup> etani kila va, see ia lo ateva emene ghaa oghi lo ateva sesa gheeleiaane, me eoghi vulu salana sesa, eaasaangia tale nimate me eaakou oroiannaaili sesa voto.

## Aitiutiu etikirighi uru ngai Pita ghe pitiela Inangari emuemua

Apostolo ateva Pita ghe pitila ia oia uru ngai etikirighi ta tau ngaisesoa ngatoa laghe tokatoka tale pai not me pai nge sinaka esuu tale patunganua namu ngateva ghaine ita aseasea va Teki. Laghe ghaaghhaa nimmarikana mausi inangarina ateva God. Pita ghe auliaala etaira va la rau mene soghiaa nau eteva la ghaaghhaa nimmarikana, poli Iesu tee ghe ghaala nimmarikana, me lo atoa la aimuli teelia ue la tani ghaa nimmarikana tee. Pita ghe auliaala va la tani masimasi me toi Iesu nau la ghaa nimmarikana, me la rooroo tani ppooaa masi kiukiu ta mene katoa. Me tee, ghe auliaala oroi inangari niloeloe tale maamauluuairia lo atoa la aiesoaa.

### **Tani kila amuemua**

Aitiutiu tale inangari 1:1-2

Kapuna atoa God: la saanga, manga, me la uungu nongina pristi etoa 1:3-2:10

Tokatokaaira kapuna atoa God tale kosa ateva oia 2:11-4:11

Ale manga ateva me elda ngatoa 4:12-5:11

Nimasimasi me airuuruu 5:12-14

<sup>1</sup> Aghi Pita, kapuna apostolo ieghi Iesu Karisto, apitipiti uru ngai etikirighi oia etaimim kapuna taumattu ngatoa God, ghe suimatoonganamla, me ngam tokatoka see nongina va ativuu etoa tale provinsi etoa ePontus, eGalaisia, eKapadosia, eEisia me eBitinia.

<sup>2</sup> God Tamaita ia emua arau ghe kilaiemla me ghe suimatoonganamla, me kapuna Spiriti eteva ghe ghelei emula am ghe mangala. Liuna avalua o me am ghe nongo usilainiela me raena ateva Iesu Karisto ghe ghelei eraarangisanaiemla.

Alooloo sae va God aue etau aatu maamasinaane me luei eoroi etaimim nau ekapaaili.

### *Kinatama niasaangi eteva*

<sup>3</sup> Ita kaili emasina ta God Tamana ia kapuita Vau ngepona ateva Iesu Karisto. God ghe totula Iesu Karisto tale nimate. Tale ia o nitotu eteva, me mausi kinatama alousiusiaane ateva, ghe tau mae sio nilutu ppae me ita rooroo tani taatara lao emua

<sup>4</sup> tale masi voto pasu tale niarangise God ghe aimonomonosiaala etaita. Isaa o voto isaa epona liu, karika erooroo tani mauu, karika erooroo tani poka, me karika erooroo tani kapa.

<sup>5</sup> Poli tale kaluimim niaiesoaa, God eaaitarinam tale sarasarakaniaane lomosina ta am ghaa ia o niasaangi eteva, eaaimonomonosiaa tani apasungainia tale airuuruu tale nau.

<sup>6</sup> Tale isaa oia voto masimasiaaimim enamungaili, arongona ta karika tani aluse nau am ghe soula nimmarikana tale asease nitootoonga.

<sup>7</sup> Golo ateva la tootoongia tale kura tani tara va golo nonga ia. Tale isaa o salana nitootoonga etootoonga uneimim niaikaiaia, maamasinaane elaulau maamasinaane golo, ta poli golo ateva aue ekapa. Liuna avalua o me poli am aaiesoaa ta God, aue God etau aatu nitau sae, ninamuu me nioneoneaa nau Iesu Karisto aue ekauerekati.

<sup>8</sup> Arongona ta karika am ghe taraiela, am aaielousieinia, me arongona ta karika am taataraia nau oia, am aiesoaa ta getana me pasu iem tale lo ateva o kinatama nimasimasi mata nginangari karika erooroo tani aulieinia.

<sup>9</sup> Poli God aue easaangi, liuna avalua o me am ghe aiesoala ta Karisto.

<sup>10-11</sup> Propete atoa laghe aulia ngamuemuela maamasinaane God tani asaangiem. Spiriti eteva ta Karisto elome etaira ghe poppoaa ngaotu ase nimmarikana Mesaea aue eghaa, me kinatama voto evira mene lutu, me propete atoa laghe paepae aanasaaili tani kila va eaauliaa see me lovisa.

<sup>12</sup> God ghe apasungaala ta propete atoa va isaa o voto laghe ppooala karika mausii ta mausii. Me God ghe tau sio mae Spirit Manga ateva epona liu, me tale sarasarakaniaane Spirit Manga ateva, tau ngai ppooa ngatoa tale masi kiukiu ngila ghe auliaala etaimim isaa oia voto God ghe gheleila. Ensolo tee atoa la aloannaaili tani ghaa alomasaanga tale masi voto God ghe gheleila etaita.

### *Am manga*

<sup>13</sup> Isaa avalua o me am aipanipanliaa nannaaimim me am aikinikinitaa tee popooaaimim me tokatokaaimim. Am aiesoa ngasarasarakanalai tale isaa o voto God ealoanna tani tau aatu nau eteva Iesu Karisto emae.

<sup>14</sup> Am tani nongo usilaa God. Emua arau nau ta am ghe tam kila amasina salane God, am ghe uusilaa sesa ninannaa. Karika am mene aimuli tee isaa o sesa voto.

<sup>15</sup> God ghe koloamla, ia manga ia. Liuna avalua o me am manga. Am ghulughuluena tale gheleiaaimim me tokatokaaimim.

<sup>16</sup> Ta Uru ngai Manga ateva eauliaa va, "Am manga, poli aghi manga aghi."

<sup>17</sup> Ta poli am koloa va Tamaimmi ia me egheeeli niaisakei ghulughuluena ta kateva kateva taumattu tale uuunguaaira, am oneoneaa tee God tale tokatokaaimim, nau am toka tale tokatokaaimim va am nongina lo atoa atiyuu ila tale kosa ateva oia.

<sup>18</sup> Am ghe kasukasus tale salana karika righi malloean ghe tiuala ta tuvuimim atoa, me God ghe asaangiemla tale isaa o salana. Me am kilakila va karika ghe poliemla tale isaa tee o voto esesa nongina silva o golo,

<sup>19</sup> ta ghe poliemla tale raena ateva Karisto, aipolina namungaili, nongina sipsipi erighi karika vereverena ia me karika righi kulukulutana etana.

<sup>20</sup> God ghe suimatoongainiela mua, me auena aitiutiu tale kosa ateva, me tale airuuruu oia nau God ghe apasunga ngaotuela mausiimim.

<sup>21</sup> Ta getana am ghe aiesoala ta God, ia ghe totuela tale nimate me ghe asaesaela ararina atee, liuna avalua o kaluimim niaikaiaa me tuutulimim am ghe atokala ta God.

<sup>22</sup> Nau am ghe nongo usilaala voto koronna, am ghe ghelei eraarangisanaiemla tale kaluimim ssavoto ta matana God, me am apasunga koronna niaielousi ta mene katoa kapuimim nonginaaili va tue me nenga am. Liuna avalua o me am aielousi ekoronna tale urungitaniimim nau ekapaaili etoa.

<sup>23</sup> Poli tale inangarina ateva God maulue ia me tokatoka liu ia, am ghe lutu ppaela, karika va nongina katu ue ngai eteva emammate, ta nongina lo ateva katu ue ngai karika emammate.

<sup>24</sup> Nongina Uru ngai Manga ateva eue va,  
"Taumattu ngakapa atoa nim nonginaaili rarrasa ateva,

masi taatarairia nongina pusi ngai eteva;  
rarrasa ateva emaamalle me pusi ngai eteva ekaakatuu,

<sup>25</sup> me inangarina ateva Vau ngepona ateva etokatoka nau ekapaaili etoa." Isaa o inangari, masi kiukiu laghe auliaala etaimim.

## 2

<sup>1</sup> Liuna avalua o me am sau velu ekapaaili sesa ninannaa tani ghelei saasakiaa tee mene kateva, me karika am mene kamekame me tani usimaghala me tani annaa saasakiaa tale taumattu oroi peiira me tani aululilia.

<sup>2</sup> Nonginaaili lutu ngaliki etoa la vira lutulutu, la aloannaaili tani ssu, am tee am aloannaaili tani ssu rarumi ssu eteva raarangisanaaili ia kanna ia God, nau am ssu etana, aue am pinosa me aue aikaiaaimim ematuueni lomosi ta nau God easaangiem.

<sup>3</sup> Isaa oia ngam ghe namunamuaala va Vau eteva masina ia.

*Atu eteva maulue ia me taumattu God ghe suoongoala*

<sup>4</sup> Am mae ta Vau eteva, ia atu eteva etautau aatu maulue — taumattu ngatoa laghe ratiela me God ghe suimatoongainiela poli ia masinaaili gheegheleiaane ta matane God

<sup>5</sup> am tee nonginaaili va atu etoa maulue ila, God eatutuluem va am nongina ale manga ateva, me am nongina pristi etoa manga ila, la ghelei aiaavusuvusuena tani amasimasi God, tale ararina atee Iesu Karisto.

<sup>6</sup> Ta poli Uru ngai Manga ateva eue va,  
"Aghe atokala atu eteva eSaeon,

ia aghe suimatoongainiela me masinaaili ia, me aitiutiu ia tale atu ekapa atoa tani suei ale ateva,

me lo ateva taumattu eatoka tuutulina etana karika aue etoka tale nipalata."

<sup>7</sup> Ta lo atoa am aiesoaa, ia oia atu eteva masinaaili ia, me ta lo atoa karika la aiesoaa, Uru ngai Manga ateva eue va,

**1:14:** Rom 12:2; Ips 2:3; 4:17-18.    **1:16:** Lev 11:44-45; Mat 5:48.    **1:17:** Rom 2:11; Aotu 2:23.    **1:19:** Apo 20:28;

Hib 9:12-14.    **1:20:** 2 Tim 1:9-10; Ips 1:4.    **1:21:** Jon 14:6; Rom 5:1-2.    **1:22:** Jon 13:34; Rom 12:10.    **1:24:** Ais

40:6-8.    **2:1:** Ips 4:22; Jms 1:21.    **2:3:** Sams 34:8.    **2:5:** Ips 2:21-22; Aotu 1:6.    **2:6:** Ais 28:16; Ips 2:20.    **2:7:**

Sams 118:22.

“Ia o atu eteva tau ngai atulu ale atoa laghe ratiela  
ie nonga o atu eteva esusuei ale ateva.”

<sup>8</sup> Me emene ue va,

“Ia o atu eteva egheelei taumattu etuttukainila,  
me egheelei ekatungila.”

La kaakatuu poli la tam nongonongo usilaa inangari, poli God ghe tau vellala va la lao evalua o tale aloannaaira.

<sup>9</sup> Me am, karika va am evalua o, am taumattu ngatoa God, ghe suimatoongainamla va pristi iem tani uungu ta kingi eteva, God etana. Anue manga am, me taumattu ngatoa kapuna am God va aue am aulia ngaotu nitau sae ta lo ateva ghe kolo veluemla tale saurrom tani mae tale masi mallangina ateva.

<sup>10</sup> Isaa to nau karika va kapuna taumattu iem God, me isaa oia nau ang ghe kapuna iemla. Isaa to nau karika am ghe ghaala alousiusiaane God, me isaa oia nau ngam ghe ghaala alousiusiaane.

#### *Tau ngai uungu etoa ta God*

<sup>11</sup> Masi kapughu etoa, poli am ativuu iem tale kosa ateva oia, aghaaulia ngasarasarakanava am alekalekaiem tale uunguua ninnaa ssavoto, isaa o voto eaaiuvii tee nannaaimim.

<sup>12</sup> Nau am toka tee taumattu ngeleka atoa, am toka tale masi nitoka, me nau la ghaauliaa teeiem va am gheelei voto sesa, aue la tara masi uunguaimim me la tau sae God, nau eteva emae taraiem.

<sup>13</sup> Mausi Vau ngepona ateva, am nongo usilaa lo akapa atoa taumattu matuutulienila, nongina kingi eteva poli matuutulienaaane isaaili epona,

<sup>14</sup> me ta gavana ngatoa, poli king ghe suoongainila tani laa gheelei saasakiaa lo atoa la gheelei sesa voto, me tani oneoneaa lo atoa la gheelei voto masina.

<sup>15</sup> Poli aaloannaane God va, poli am gheelei voto masina, am roo tani gheelei runga sesa inangariira alokapakapa atoa.

<sup>16</sup> Am toka nongina va lo atoa taumattu la tokatoka tale aaloannaaira me la gheelei masi voto. Me karika am mene gheelei ia o ase nitoka ateva tani akou runga voto sesa, ta am toka ta alooannaane God.

<sup>17</sup> Am apasunga masi ni oneoneaa ta taumattu ngakapa atoa. Am aielousiaa lo atoa am aaiesoa ngaitauua me ila, am matauta God me am oneoneaa kingi eteva.

#### *Niamatoonga tale nimmarikana Iesu ghe ghaala*

<sup>18</sup> Tau ngai uungu etoa karika am tokatoka tale aloaloannaaimim, am tauem lao ta vauimim atoa tale isaa akapa ase ni oneoneaa, karika va lo atoa nonga masina ila me gheeleeiaira saghuighiuina, ta lo atoa tee karika masina ila.

<sup>19</sup> Nau katoa la gheelei voto karika masina etam arongona ta ugheelei masi voto ukilakila va God aaloanna, God aue emasieinio.

<sup>20</sup> God karika aue earangiseiem arova am ghaaghaa nimmarikana mausi am gheelei voto sesa. Ta aue earangiseiem arova am ghaaghaa nimmarikana mausi am gheelei voto masina.

<sup>21</sup> Tale isaa oia voto God ghe koloamla poli Karisto ghe ghaala voto mmarikanaili mausimim, ghe alokoila niamatoonga ngateva, va am tani aimuli usi tee liu kasukasaane.

<sup>22</sup> “Karika ghe gheelei poila righi ssavoto,

me karika righi inangari nikamekame ghe kupi ghoa mae ta paane.”

<sup>23</sup> Nau eteva laghe aulaa teeia asease inangari etoa, karika poi ghe liuliu; nau ghe ghaaghaa nimmarikana, karika poi ghe aapasunga va eliu. Ghe tau lao sio isaa o voto ta God, poli God egheelei niasakei ghulughuluena.

<sup>24</sup> Nim ia nonga ghe saula gheeleeiaita sesa tale vilikina tale ai eteae; mausina evalua o ita rororo tani kasu vuli sesa voto me ita lao tale niuungu ghulughuluena; poli tale usai ghe ghaala, am ghe masinala.

<sup>25</sup> Poli am ghe nonginala sipsipi etoa karika la kilakila va eaa la laolao, me isaa oia angam ghe oghi mae sio ta kapuimim Tau ngai toitoi eteva ia eaitarainiem.

**2:8:** Ais 8:14.    **2:9:** Diut 7:6; 14:2; Ais 9:2; Tts 2:14; Apos 26:18; Ips 5:8.    **2:10:** Osea 2:23.    **2:11:** Gal 5:17, 24.

**2:12:** Mat 5:16.    **2:13:** Tts 3:1.    **2:15:** 1 Pita 3:16.    **2:17:** Rom 12:10.    **2:18:** Ips 6:5.    **2:20:** 1 Pita 3:14, 17.

**2:21:** Mat 16:24; Jon 13:15.    **2:22:** Ais 53:9.    **2:23:** Ais 53:7; 1 Pita 3:9.    **2:24:** Rom 6:11; Ais 53:5-6.    **2:25:**

**3***Lailai etoa*

<sup>1</sup> Tale ia o salana atikirighi, am vause atoa lailai iem, am tani nongo usilaa taitaniim atoa. Me arova katoa tale ila o taita atoa karika la aikaaiaa tale inangarina God, karika va tale inangariimim, ta tale masi gheegheleiaaimim aue egheleila me la aikaaiaa,

<sup>2</sup> poli aue la tara vaalua masi uuunguaimim raarangisana me niioneoneaa tale tokatokaaimim.

<sup>3</sup> Am rau mene nnangaili tani amolumolu vilikiimim va emasinaaili taatarane, nongina am gheelei tale uu nguruuim, me nongina asease vurra atoa am aamolumolu vilikiimim, me tale masi ghinna atoa am aasaela,

<sup>4</sup> ta am anna tani amolumoluem, ghele masina arova am ghele amolumolu elome etaimim tale uuunguaa niimasiaa me nisioaa nanna, poli isaa o ase niuungu masinaaili ta matane God me karika aue ekapa.

<sup>5</sup> Tale isaa o salana, emua arau vause atoa manga ila laghe gheelei emasinaaili taataraira. Laghe aatoka tuutuliira ta God, me laghe aaimuli usi tee saa voto taitaniira atoa laghe aauliaa.

<sup>6</sup> Nim nongina Sera ghe nongo usilaala taitanna ateva ta Abraham, me ghe kolokoloa va vauna ia. Am tee aue natuna vause iem arova am gheelei voto masina, me karika aue am matauta saa voto pei nimatauta.

<sup>7</sup> Tale ia o salana atikirighi, am taita atoa lailai iem, am tani oneoneaa vauseniim atoa. Am gheelei emasina ta ngetairaa nau am tokatoka aitauaa, poli sarasarakaniaaimim elaulau sarasarakaniaairaa, me poli amalua aitauaa, amalu ghaaghaa maulue ta God, arova ughelei emasina etana, karika teva voto aue eghelei runga kalum nilooloo sae.

*Nimmarikana mausi masi niuungu*

<sup>8</sup> Tani ruu, am akapaili gheegheleiaaimim me ateateaaimim ekateva nonga ia. Am aielousi nongina va tue me nenga atoa, me am annaa mene katoa me am sioaa nannaaimim tee kateva kateva etaimim.

<sup>9</sup> Am rau mene liu sesa tale sesa voto o inangari nilakolako tale inangari nilakolako; ta am liu tale niarangise, poli God ghe koloamla tani gheelei isaa o voto, me aue am ghaa niarangise.

<sup>10</sup> Poli Uru ngai Manga ateva eue va,  
“Marova lo ateva taumattu ealoanna va maamauluaane emasina  
me etoka liu,

etani aitaraa ramuramuti paana ateva tale sesa voto  
me tee musiki paanne tale inangari kamena.

<sup>11</sup> Me etani oghi vulu sesa voto me eghelei masina;  
euungu aanasa tani atoka luei me esarasarakana tani toka tale luei.

<sup>12</sup> Poli matane Vau eteva eaatoka ta ghulughuluena atoa taumattu  
me talingane enongonongola nau la looloo sae,  
me eliliu vilina ta lo atoa la gheelei sesa voto.”

<sup>13</sup> See aue ealoanna tani avakovakoam marova am annaaili tani gheelei masi voto?

<sup>14</sup> Me marova am ghaaghaa nimmarikana tale voto masina, aue am ghaa niarangise. Nongina Uru ngai Manga ateva eue va, “Am rau mene matauta saa llo la maamatauta; am rau mene matauta.”

<sup>15</sup> Ta elome tale urunguitaniimim am atoka Karisto va ia Vau palepale ia. Arova teva taumattu ekokolomio tani tau lao saa malloeane unem niaikaaiaa uaatoka tuutulim etana, uaimonomonosiaa tani liu etana nau ekapa atoa.

<sup>16</sup> Ta am gheelei tale nisama saghuighuiena me niioneoneaa. Nau ekapa atoa, am gheelei voto am kilakila va masina, poli am aloanna va lo atoa la poppooa saasakiaa tale masi uuunguaimim ta Karisto aue la palata mausi inangariira la poppooa teeiem.

<sup>17</sup> Emaamasina, marova aloannaane God, va ita ghaa nimmarikana tale voto ita gheelei masina me karika va ita ghaa nimmarikana tale voto ita gheelei sesa.

<sup>18</sup> Poli Karisto ghe matela tale isaa akapaili ssavoto katengaata nonga, Iesu ghulughuluena ia ghe matela ta lo atoa karika ghulughuluena ila, tani taula lao ta God. Ghe matela, me Spiriti eteva ghe mene taula maulue etana.

<sup>19</sup> Ta Spiriti eteva ghe lao tee siai tale ale mata voovoo me ghe ppooaala tale spiriti etoa

<sup>20</sup> laghe tam nongo usilaala emua arau nau God ghe kaarasila tani toitoi me karika ghe turungilala lmosina ta Noa ghe atuluka aia ateva, me manu ghagga ateva ghe ghaailala.

Tale aka ateva karika oroi taumattu ghe saangala tale manu ghagga ateva, nim ghaoalu (8) nonga.

<sup>21</sup> Me ia oia manu eteva eaaimatoonga niaasuu eteva, ghaine am tee am ghaaghaa niasaangi etana — karika va tale nighaa velu kulukulutana tale vilikiita, ta niaasuu eaimatoonga inangari nialokoi ita gheelei ta God ekasukasu tale urunguitaniita. Ghe asaangitala tale nitotu eteae ta Iesu Karisto,

<sup>22</sup> ang ghe saela epona liu me etokatoka tale pai muenna ativilau ta God, ia ghe gheleila Karisto va eaitoiaa ensolo atoa me spiriti etoa elomarase.

## 4

### *Tani toka ta God*

<sup>1</sup> Liuna avalua o, poli Karisto ghe ghaala nimmarrakana tale vilikina, am tee am tani poso parasi ia o ase ninanna ngateva nongina ia ghe gheleila, poli lo ateva ang ghe ghaala nimmarrakana tale vilikina, karika emene tokatoka tale uunguaa ssavoto ateva.

<sup>2</sup> Nau ekapa atoa, am tau ekapa lao tokatokaaimim tale aloaloannaane God me karika va tale sesa aloaloannaaimim.

<sup>3</sup> Isaa to nau ang ghe lao sio ang ghe ssoiemla tani uunguaa asease voto atoa taumattu ngeleka atoa la aloannaaili tani ghelei. Maamauluuaaimim am ghe nim anna tani ghelei sesa voto, me tani nnaa nongina uunguaa nialai salosalooa, me tani ropi sesa manu, me tani ghelei kinatama ninamanama atoa la ghaalutu ssavoto, me kinatama nivelu eitauaa tani ropi sesa manu, me tani kkaua goto atoa kamena ila me karika poi masina ila.

<sup>4</sup> Me ghaine taumattu ngeleka atoa angila ghe soghiaala tani tara nau karika am mene laolao aitauaa teeila tale isaa o ase voto karika masina, liuna avalua o me la auliaa teeiem.

<sup>5</sup> Me am tani nnaa parasi va aue la tingina emua ta matane God, me ia aue eghelei niaiskei ta taumattu ngakapaaili etoa, maulue atoa me matena tee atoa.

<sup>6</sup> Liuna avalua o me lo atoa ngila ghe matela ila tee ngila ghe nongola masi kiukiuna, arongona ta vilikiira ang ghe matela, nongina taumattu ngakapa atoa la tani mate, me kapuira spiriti etokatoka tee God.

<sup>7</sup> Airuuruu tale voto akapa ange kalakalangina. Liuna avalua o me nannaaaimim emasalike, am aaitarainam tani ghelei ghulughuluena voto me aue am roo tani looloo sae amasina.

<sup>8</sup> Tale isaa akapaaili voto am kaarasi tani aielousiaa kateva kateva etaimim, poli niaelousi eteva eaakou orioeili ssavoto.

<sup>9</sup> Am aikoloaa taumattu tani mae tanganueimim, me am rau mene ueessaa.

<sup>10</sup> God ghe tau aatu sio ta kateva kateva etaimim voto kanna Spiriti eteva, tani uungu ta mene katoa taumattu tani aisausia tale asease salana, tani apasunga ngaotu maamasinaane God ta mene katoa.

<sup>11</sup> Arova teva taumattu uunguaam tani ppooaa, uppoaa nongina va lo ateva eaauliaa inangarina ateva God. Me arova see ughungu ta katoa, ughungu tale sarasarakan God etautau aatu, poli ita aloanna va tale isaa akapaaili voto, taumattu ngatoo aue la tau sae God mausi Iesu Karisto. Ita rororo tani oneoneaa Iesu poli sarasarakaniaane etokatoka liu, koronna.

### *Nimmarrakana tale tau niaiesoa ngatoo*

<sup>12</sup> Masi kapughu etoa, karika am mene soghiaa isaa o nitootoonga mmarikanaaili am mammarrakana tee, nonginaaili va isaa o voto ouna.

<sup>13</sup> Karika, ta am masimasi ta am tee am usiusi tani ghaa nimmarrakana ta Karisto, liuna avalua o me aue am pasu tale nimasimasi nau eteva emae tale sarasarakaniaane.

<sup>14</sup> Arova la avakovoakam mausi ararina ateaet Karisto, niarangise etaimim, poli kapuna Spiriti eteva God sarasarakania ia etokatoka ta ngetaimim.

<sup>15</sup> Arova ummarrakana, karika ughaaghaa mmarikana poli uaaiuvu emate, o tau niainao io, o mene righi ase talo nissangaliki, o nongina ase niaikkisicia.

<sup>16</sup> Isaa avalua o me marova ughaa nimmarrakana poli uaaiesoaa, urau mene palata, ta utau sae God poli la kilakila va io kapuna io Karisto.

<sup>17</sup> Poli nau niaiskei ang ghe tiuaala, aue etiuua ta natuna atoa God; me marova etiuua etaita, aue esesaai ta lo atoa la tam nonganongo usilaa masi kiukiuna God.

<sup>18</sup> Me, nongina Uru ngai Manga ateva eue va,

“Marova aanasa ta tau ghulughuluena atoa tani saanga,

aye vaalua ta lo atoa la tam oneoneaa poi God, me tee ta tau ngai ghelei ssavoto atoa,  
ila tee, vaalua aue la saanga?"

<sup>19</sup> Lo atoa la ghaaghhaa nimmarikana poli la aaimuli tee aaloannaane God, la tani tau  
vella lao ta lo ateva gheleilala, poli egheelei voto ghe uela va aue eghelei, me la toka  
gheelei nonga masina.

## 5

### *Tani aitaraa kiena sipsipi etoa God*

<sup>1</sup> Me isaa oia, inangari niaisausi eatuetu etaimim namu ngatoa am muemueaa ale  
manga atoa, aghi tee namu ngaghi. Aghe tarala ta mataghi vaalua Karisto ghe ghaala  
nimmarikana, me am me aghi aue ita ghaaitauaa sarasarakana me nioneoneaa tee Karisto  
nau ekauerekati.

<sup>2</sup> Am aitara ngamasina sipsipi etoa God ghe tau aatu sio etaimim tani aitaraa. Am  
aitarainila poli aloaloannaaimim tani aitarainila me tale nimasimasi, nongina aloan-  
naane God, me karika va la suusulungiem. Me karika va mausi viliki veu, ta poli am  
aloannaaili tani saus.

<sup>3</sup> Am rau mene ghelei nongina va lo atoa arariira, ta am tau ngaimatootoonga etaira.

<sup>4</sup> Me nau namuu tale tau ngaitoi sipsipi etoa ekauerekati, aue am ghaa kou nguru eteva  
mallangina karika aue ekapa.

<sup>5</sup> Aliko taita atoa, tale ia nonga o salana atikirighi, am nongo usilaa kapuimim taita namu  
ngatoa. Me am akapanaaili am ghaa uunguaa nisiooa ninannaa tee mene kateva kateva,  
poli Uru ngai Manga ateva eue va,

"God karika poi ealoanna lo atoa la tautau sae nannaairaa,

me eaapasunga maamasinaa la lo atoa la siosioaa nannaairaa."

<sup>6</sup> Liuna avalua o me am siooa nannaaimim ta God sarasarakanaili ia tani sausiem, me  
God aue easaesaeam tale ia o nau eteva ealoannaia.

<sup>7</sup> Isaa akapaaili uneimim nimoia me maate am taula ta ngetana poli ia eaaitarinam.

<sup>8</sup> Am nanna ngamasina me am taatara amasina poli Satana aissateeimim ia ekasukasu  
ekapa see arova laeoni eteva engoongoo atingina me epaepae teva tani nama. <sup>9</sup> Am tiu  
velua me am tingina akorokorongana tale uneimim niaakaiaa, poli am kilakila va lo  
akapa atoa tale kosa ateva la ghaiesoaa ta Iesu la ghaaghhaa ie nonga o ase nimmarikana  
ateva.

<sup>10</sup> Tale kinatama maamasinaane God, ghe koloamla va am ghaa aitauaa nioneonea  
ngateva tokatoka liu ia ta Karisto. Me nau am ghaa nimmarikana tale nau karika aluse,  
aue emene ghelei rooroaa me aue eghelei emasinaaili uunguaane etaimim tani atingina  
akorokoronganaiem, me easarasarakanaiem.

<sup>11</sup> Alooloo sae va ta ngetana sarasarakana tale isaa akapaaili nau. Koronna.

### *Airuuruu tale inangrina Pita*

<sup>12</sup> Tale saasausiaane Saelas,\* akolokoloa va kapuita ia, me arooroo tani atoka tuutulighi  
etana, aghi aghe piti atu sio etaimim ia oia uru ngai etikirighi karika aluse ia, tani  
asarasarakanaiem me tani aulia ngatuva ia oia maamasinaane ateva God koronna ia.  
Am tani tingina akorokorongana etana.

<sup>13</sup> Tau ngaisesoa ngatoa tale ale manga atoa eBabilon,<sup>†</sup> God ghe suimatoongainilala  
teeiem, laghe suula masimasiaaira etaimim, me tee natughu eteva ta Mak ghe suula  
masimasiaane etaimim.

<sup>14</sup> Am sou kateva kateva tale niaielousi.<sup>‡</sup>

Alooloo sae va luei aue etoka ta ngetaimim akapa, lo atoa am ta Karisto.

**5:2:** Jon 21:15-17; Apos 20:28.    **5:3:** 2 Ko 1:24; Plp 3:17; Tts 2:7.    **5:5:** Nitoka 3:34; Ips 5:21; Jms 4:6.    **5:6:** Mat 23:12; Luk 14:11; Jms 4:10.    **5:7:** Mat 6:25-30.    **5:8:** 1 Tes 5:6.    **5:9:** Ips 6:11-13; Jms 4:7.    **5:12:** Apos 15:22, 37-40; 12:2, 25; 13:13.    \* **5:12:** Tale inangari nge Grik, Silvanus.    Mallooeana va Rom, ta Rom ghe aitoiaa kosa ateva tale isaa o nau.    † **5:13:** eBabilon    ‡ **5:14:** tale niaielousi Tale inangari nge Grik, tale niaingusu eteva tale niaielousi.

**Aiaaghaluene atikirighi uru ngai**  
**Pita**  
**ghe pitiela**  
**Inangari emuemua**

Aiaaghaluene atikirighi uru ngai Pita ghe pitiela eaauliaa tee gheeleiaaita tau ngaisesoa ngatoa tale kosa ateva oia. Ghe aulia ngakorokorongana ta tau ngai aapasunga ngatoa kamena ila, va ave God eturungila. Ghe auliaala tee maemaeaane Iesu.

**Tani kila amuemua**

Aitiutiui tale inangari 1:1-2

Tokatokaaira kapuna atoa God 1:3-21

Niaulia ngatootoonga tale tau ngai aapasunga ngatoa kamena ila 2:1-22

Maemaeaane Iesu 3:1-16

<sup>1</sup> Aghi Saemon \* Pita, tau ngai uungu me apostolo ieghi ta Iesu Karisto,

Apitipiti atu etaimim lo atoa aikaaiiaaimim nonginaaili aikaaiiaaimami. Am ghe ghaala ia o niaikaia ngateva tale ghulughuluueniaane Iesu Karisto, kapuita Goto ia me tau ngai asaangiita ia.

<sup>2</sup> Alooloo sae va God ave etaau maamasinaane me luei epasu etaimim poli ngam ghe kila amasinaailila God me Iesu kapuita Vau eteva.

*Tani pinosa tale aalomasaanganiaane God*

<sup>3</sup> God ghe kolotala tale kinatama sarasarakaniaane ateva me maamasinaane, me ita kilakilaia. Tale sarasarakaniaane ghe tau mae sio isaa akapaaili voto ita tuutukuna etana tani asarasarakana maamauluaaita me ita rooroo tani usila salane God.

<sup>4</sup> Tale ia o salana atikirighi ghe tau mae sio kinatama inangari nialokoi etoa tani nim tau mae masi voto etaita. Isaa oia inangari nialokoi eroroo tani gheleiem me am toka tale gheeleiaane God me am apala sesa voto emaemaue tale nannaa taumattu tale kosa ateva oia me egheelei saasakiaa urungutaniira.

<sup>5</sup> Mausina avalua o aghaualia etaimim va, poli ngam ghe aiesoala ta Karisto, am uungu esarasarakana tani masi taumattu, me tee am uungu esarasarakana tani kila God me sa ateva ealoanna va am gheleia,

<sup>6</sup> me tani apala sesa aloannaaimim, me am toka akorokorongana tale sesa nau, me tani usila salane God,

<sup>7</sup> me am aielousi nongina tue me nenga atoa, me tani aielousiaa tee taumattu ngakapa atoa.

<sup>8</sup> Me arova am ghaa isaa o masi voto me la pinosa aoroi etaimim, ave la gheleiem va alomasaanganiaaimim ta Vauita ateva Iesu Karisto karika ave nim peisaane, ta ave ealutu masi uene.

<sup>9</sup> Me arova isaa o voto karika ta teva taumattu, ia o taumattu ngateva nongina llo taumattu taataaraane tukuna, o nongina mata salusalu eteva ang ghe aikkluuala va God ang ghelel eraarangansaniela tale kannaa ssavoto.

<sup>10</sup> Liuna avalua o me, kapughu etoa, am tani aitokaa tani kilaaili va God ghe koloamla me ghe suimatoonganamla. Poli arova am ghelei isaa o voto, karika ave am katuu.

<sup>11</sup> Me ave la masimasi tani souem tani kupi sso tale ararimangalina ateva Iesu Karisto, Vauita ia me tau ngai asaangiita ia, ia ave kingi nau ekapa atoa.

*Inangari niaulia ngamuemue tale Uru ngai Manga ateva*

<sup>12</sup> Mausina avalua o me, arongona ta am kilakila isaa o voto me am tiitingina akorokorongana tale voto koronna ghaine isaa etaimim, ave amene toka auliaa kieimim tale isaa o voto.

<sup>13</sup> Aghannaa va masina tani mene aravaiem nau maulue ieghi,

<sup>14</sup> poli akilakila va ghaisa ngarighi amate, nongina Vauita ateva Iesu Karisto ghe aulia ngamasalikaala etagli.

<sup>15</sup> Me ave atootoonga tani uungu esarasarakana tani tara va nau eteva karika ieghi, ave am roo tani nnaa isaa oia voto.

<sup>16</sup> Nau ami ghe auliaala etaimim sarasarakaniaane Vauita ateva ta Iesu Karisto ave emene oghi mae, karika ami ghe aimulisi teela isaa o kiukiui laghe nim gheleila. Ta ami, ami ghe farala ta mataimami isaa o naanamungaane me sarasarakaniaane Karisto.

\* **1:1:** Tale inangari nge Griek, *Simion*.    **1:6:** Gal 5:22-23.    **1:14:** 2 Ko 5:1; Jon 21:18-19.    **1:16:** Mat 17:1-5.

<sup>17</sup> Ta ia ghe ghaala nioneoneaa me nianamunamungaane ta God Tamane nau eteva lingi ngalo ateva ghe mae sio tale maamallangiaane urukookoo ateva, me ghe uela va, "Ia o natughu eteva, aghailousiangaililia, ta ngetana amasimasiangaililia."

<sup>18</sup> Ami, ami ghe nongoala ia o lingi ngalo ateva ghe mae sio epona liu, nau ami ghe tokatoka aitauaa tee Karisto tale motouru eteva manga ia.

<sup>19</sup> Me ita kilakila va inangariira propete atoa koronnaaili, me am tani aimuli teeila, poli nongina mallanga ateva emaamallanga tale voto saurrom, isaa o inangariira aue eapasunga voto koronna ta Karisto, lomasina ta Iesu ekiri sio, nongina ange paipai me katto pai eteva<sup>†</sup> esaesae tale urunguitaniimim.

<sup>20</sup> Tale voto akapaaaili, am rou mene kkaluaa va karika righi inangari niaulia ngamue-mue tale Uru ngai Manga ateva ghe nim mae sio tale nim nannaaira propete atoa.

<sup>21</sup> Ta inangari niaulia ngamuemue karika ghe nim tiuala tale nim aloaloanna taumattu, ta taumattu ghe aippooaa tale inangari ghe maemae ta God nau eteva Spirit Manga ateva ghe kaakatulainila.

## 2

### *Tau ngai aapasunga ngatoa kamena ila*

<sup>1</sup> Emua arau propete kamekame atoa laghe tingina saela elome ta kapuna taumattu ngatoa God. Me tale ia o salana atikirighi tau ngai aapasunga ngatoa kamena ila aue la tingina sae elome etaimim me la auliaa llo kamena me la ue va koronna, me isaa o voto kamena aue eghelei saasakiaa taumattu ngatoa. Ila o tau ngai aapasunga ngatoa aue la liu viliira ta Vau eteva, lo ateva ghe ghaa oghilala. Aue la ghelei evalua o me gharovaea nonga ta God aue eturungila.

<sup>2</sup> Oroeili taumattu aue la usilaa asease uunguaaira atoa sesa ila; me isaa o voto aue eghelei taumattu ngatoa la auliaa saasakiaa tale salana koronna.

<sup>3</sup> Ila o tau ngai aapasunga ngatoa la kamekameam tale oroi kiukiu kamena tani ghaa uneimim viliki veu. God ang ghe aimonomonosiaala uneira niaisakei eteae, me aue eturungila.

<sup>4</sup> Am kilakila va emua arau, God karika ghe amaramara teela ensolo atoa nau laghe gheleila sesa voto, ta ghe sau vella siola tale voto ateva siosionaaili ia me saurorromiendaaili tee ia, va la toitoi nau niaisakei eteva.

<sup>5</sup> God karika ghe amaramara teela taumattu tale kosa ateva oia nau laghe liula viliira etana, karika, ta ghe tau sio mae manu ghagga ateva etaira me laghe matela; ghe asaangi nongala Noa, poli ia nongaili ghe aauliaa me ghe aapasunga voto ghulughuluena, tee mene ghaitu (7) taumattu.

<sup>6</sup> God ghe auliaa teela masaliki taatara aluae eSodom me eGomorra va aue lalu ghaa sesa aipolipoli. Ghe turungilaluela tale kura ateae me au nonga ghe tokala. God ghe ghelei evaluela o tani eapasunga etaita saa voto aue elutu tale llo taumattu la liuliu viliira ta ngetana.

<sup>7</sup> Ghe asaangila Lot, ghulughuluena ia, poli karika ghe masimasiaa sesa gheegheleiaaira tau ngai ghelei ssavoto nge Sodom atoa.

<sup>8</sup> Koronna, ia o ghulughuluena ateva taumattu ghe tokatoka elome etaira, me isaa akapa nau ghe ghaaghaa nimmarikana me nialousiusi tale nannaane nau ghe taatara me nongonongo sesa gheegheleiaaira.

<sup>9</sup> Isaa evalua o me Vau ngepona ateva ekilakila vaalua tani asaangi lo atoa la nongonongo usilainia nau nitootoonga eghaaghaila, me ekilakila vaalua tani akaravusu lo atoa karika ghulughuluena ila me aue la ghaa kinatama sessaiaane ateva God tale maamauluaaira me la toitoi nau niaisakei eteva.

<sup>10</sup> Isaa o voto tani koronnaaili ta ila o tau ngai aapasunga ngatoa kamena ila la ghaimuli tee aaloannairia sesa emaemae tale vilikiira, me tee llo matuutulienia la tam aloanna.

La sarasarakana tani nnaainila nonga me karika la maamatautu tani auliaa saasakiaa tee kapuna ensolo atoa la ghaaghaa nioneoneaa.

<sup>11</sup> Arongona ta ensolo atoa sarasarakanaaili ila me ila karika la ghaauliaa saasakiaa tee isaa o taumattu la gheelei niaisakei etaira ta matane Vau eteva.

<sup>12</sup> Me ila o taumattu ngatoa, la ghaauliaa saasakiaa tale voto ila la tam kilakila amasina. Ila nongina ghaata kkenna atoa, me la ghaaimuli tee aloannaa vilikiira, laghe nim lutula va la ghaaila, me la turungila. Me nongina ghaata kkenna atoa, ila tee aue la raua.

<sup>1:17:</sup> Mat 17:5.    <sup>† 1:19:</sup> katto pai eteva Utara Nambas 24:17; Niaulia ngaotu 22:16.    <sup>1:21:</sup> 2 Tim 3:16; 1 Pita 1:11-12.    <sup>2:1:</sup> Mat 24:11; Jjud 1:4.    <sup>2:4:</sup> Jjud 6.    <sup>2:5:</sup> Aitiutiu 6-8; 2 Pita 3:6.    <sup>2:6:</sup> Aitiutiu 19:24; Jjud 7. <sup>2:7:</sup> Aitiutiu 19:1-16.    <sup>2:10:</sup> Jjud 7-8, 16.    <sup>2:11:</sup> Jjud 9.    <sup>2:12:</sup> Jjud 10.

<sup>13</sup> Aue la ghaa aipoliira sesa tale voto sesa laghe gheleila. Ila masimasieili tani ghelei kinatama ninamanama me niropi tale tummatavanga. Me nau la namanama teeiem tale ale manga ateva, la nannainila nonga, me la ghelei saasakiaa arariira ale manga atoa.

<sup>14</sup> Mataira epasupasu tani lai sari lo atoa vause karika va maneira ila. Karika la ruuruu poi tani ghelei ssavoto. La kamekame lo atoa karika la aikaia ngasarasarakanata Karisto me la kaakatulainila lao tale ssavoto. Me muennaaili ila tani raungaa me kuruetu. Ang ghe ssuua vellala.

<sup>15</sup> Ngila ghe laula salana ghulughuluena me ngila ghe kasula tani laa ghaimuli tee salane Baelam natuna ia Beo, ia ghe aielousiaa aipolipoli tale uunguaa sesa salana.

<sup>16</sup> Donki eteva ghe auliaala etana va voto egheelei karika masina, ia o donki eteva karika esamasama, ghe samala nongina taumattu ngateva, ghe ghelei rungaala propete ateva tani ghelei voto alokapakapanna.

<sup>17</sup> Isaa oia taumattu nongina ateo mata vubbu karika righi manu ta ngetana, me urukookoo ateva, ttasi eteva ekuukueinisa see. Saurrom ateva aavoonaaili ia etoitola.

<sup>18</sup> La auliaa inangari karika righi mallooeana tani tau sae nannaaira, me la auliaa ta taumattu ngatoa va la rooro tani usilaa sesa nannaaira, me la kaakatulainila lao tale salana ngila ghe oghi vulula.

<sup>19</sup> La ghaauliaa inangari nialokoi ta taumattu ngatoa va karika aue la toka tale aloannaane mene kateva; me karika ta ila tee, karika la tokatoka tale aloannaaira, karika righi sarasarakaniaira tani ghelei rungainila tale voto sesa – poli arova teva eta velu teva voto emuemueinia, ia nongina taumattu ngateva karika etokatoka tale aloannaane.

<sup>20</sup> Nau laghe kilala kapuita Vau eteva me tau ngai asaangita ngateva Iesu Karisto, laghe kasu vulila voto sesaaili tale kosa ateva. Me nau oia ngila ghe mene oghi lao sio tani mene ghelei isaa o voto sesaaili, me isaa oia nau esesaaili ta ngetaira.

<sup>21</sup> Aue ghele masina marova karika la ghele mene kila salana tani ghulughuluena, ta nau eteva laghe kilala, me la mene oghioghi vulu, aue esesaaili ta matane God.

<sup>22</sup> Tale isaa o voto, kateva tuku inangari koronna ia, eue va: “Paua ateva eoghioghi lao tale luekina ateva,” me, “Mosu eteva nau ange raarangisanala, emene oghioghi lao tale suesuena ateva.”

### 3

#### *Nauna ateva Vau eteva*

<sup>1</sup> Masi kapughu etoa, aiaaghalua atikirighi oia uneghi uru ngai apitipitie atu etaimim, tale ilalua o uru ngai eluekirighi agheelei nannaaimim va emasalike tani mene nnaa isaa o masi voto.

<sup>2</sup> Agahaalonaiem tani nnaa parasi isaa o inangari propete atoa manga ila laghe auliaala emua arau, me tee saa voto kapuita Vau ngepona ateva me tau ngai asaangiita ia ghe aulieiniela ta apostolo atoa, me apostolo atoa laghe auliaala etaimim.

<sup>3</sup> Aitiutiu eteva voto aghanna tani aulieinia etaimim ia avalua toko, va tale airuuuu tale nau kasina taumattu aue la mae tale sesa nannaaira me la auliaa saasakiaa me la kaili ekamena voto koronna me aue la pilosiem

<sup>4</sup> tanu ue va, “Ghe uela tale inangari nialokoi va aue emene sio, va? Eaa ange reerekata? Tamaita me tuvuita atoa angila ghe matela, me ila akapaaili voto atoa ila tokatoka nongina arau aitiutiu tale kosa ateva me nau ghaine tee.”

<sup>5</sup> Laghe ghaa vella tale nannaaira va God ghe nim aippooala me epona liu ghe lutula, me kosa ateva oia ghe kaurekatila tale manu, me tale manu ghe gheleila kosa ateva.

<sup>6</sup> Me tale manu eteva, ghe tturuula kosa ateva oia tale kinatama manu ghaggia ateva.

<sup>7</sup> Tale ie nonga o inangarinia ateva God eunaakookoo me elomarase me kosa ateva oia ghaine am taataaraia, God ghe aimonomonosieinila tani ghaa kura ateae, tale nau niasakei eteae, ia o nau eteva taumattu ngatoa karika la uusilaa masi salana kanna God, God aue eturungila.

<sup>8</sup> Me am rau mene kkaluaa ie toko voto ateva, masi kapughu etoa, va, ta Vau ngepona ateva, kateva nau nim nongina va kateva airari (1,000) ninamanama, me kateva airari (1,000) ninamanama nim nongina va kateva nau.

<sup>9</sup> Vau ngepona ateva karika eaimaomaoa tale kanna inangari nialokoi ghe gheleila, nongina kasina taumattu la annaa va eaimaomaoaa. Karika, ta eakaakaarsi tani totoi mausimim, me karika ealoanna va teva etaimim eraua, ta ealoanna akapaiem va am nna ngaioghioghia.

**2:15:** Nam 22:7; Jjud 11; Atou 2:14.    **2:16:** Nam 22:28-35.    **2:17:** Jjud 12:13.    **2:20:** Mat 12:45.    **2:21:** Luk

12:47-48.    **2:22:** Nitoka 26:11.    **3:2:** Jjud 17.    **3:3:** 1 Tim 4:1; Jjud 18.    **3:4:** Mat 24:48.    **3:5:** Aitiutiu 1:6-9.

**3:6:** Aitiutiu 7:11; 2 Pita 2:5.    **3:8:** Sams 90:4.    **3:9:** Abak 2:3; 1 Tim 2:4.

<sup>10</sup> Me nauna ateva Vau ngepona ateva aue emae nongina tau niainao ateva, karika ita kilakila maemaeaane. Eunaakookoo aue ekapa tale kinatama mangalia ateva, me ila akapaaili voto atoa God ghe gheleilala aue kura atae eata akapaailila, me tale ia o nau ateva, voto akapaaili tale kosa ateva aue etou.

<sup>11</sup> Am nim nnaa marova voto atoa aue God eturungi evalueila o, me am aue vaalua etaimim? Am tani toka tale ase nitoka manga me tale aloaloannaane God.

<sup>12</sup> Nau am toitoi nauna ateva God va emae am tee am ailuiluieinia. Ia o nau eteva aue kura atae eata eunaakookoo me elomarase, me ila akapaaili voto atoa aue la nim manu tale lallangina ateva.

<sup>13</sup> Me tani nnaa inangari inangari nialokoi ita taatara lao emua tale ouna ateva epona liu me ouna ateva kosa, voto ghulughuluena etokatoka etana.

<sup>14</sup> Liuna avalua o masi kapughu etoa, poli am taatara lao emua tale isaa o voto, am tani toka va God aue etaraiem va raarangsiana iem me aue erau mene aliu teeiem tale voto sesa, me am toka ta ngetana tee luei.

<sup>15</sup> Am tani nnaa va Vauita ateva karika emamangoo tani totoi, poli eaaloanna va mene katoa la mene saanga, nongina masi kapuita ateva ta Pol ia tee ghe pitipitila ta ngetaimim tale nialomasaaanga God ghe tau lao sio etana.

<sup>16</sup> Tale unna uru ngai ekapa ghe pitipiti tale ia nonga o salana atikirighi, ghe aauliaa ta ngetaira isaa oia voto. Tale unna uru ngai ghe aauliaa kasina tana voto aanasa tani alomasaanga tee, liuna avalua o me llo taumattu karika masi gheeleiaaira me aikaaiaaira karika korokoronganana, la kirikiri saasakiaa inangari Pol, me la gheelei evalua tee o tale mene kasina inangari tale Uru ngai Manga ateva. Liuna avalua o me la gheelei va God aue eturungila.

<sup>17</sup> Mausina avalua o, masi kapughu etoa, nongina ngam ghe kilala isaa o voto, am tani taatara amasina me inangariira lo atoa taumattu karika la ghaaimuli tee masi salana, la rau mene mae ghelei saasakiaa nannaaimim tani tiuua kalipiem va am katuu vulu aikaaiaaimim ngam ghe korokoronganala etana.

<sup>18</sup> Me, tale maamasinaane, am pinosa tale alomasaanganiaaimim ta Vauita ateva me tau ngai asaangita ateva Iesu Karisto. Ta ngetana ita taue sae ghaine me nau ekapa atoa! Koronna!

**Aitiutiu etikirighi uru ngai  
Jon  
ghe pitiela  
Inangari emuemua**

Oroi tau ngalomasaanga la nannaa va lo ateva ghe pitila 1 Jon, 2 Jon me 3 Jon, Jon apostolo ia, me tee ghe pitila Masi kiukiu me Aulia ngaotu.

Tale ia oia uru ngai etikirighi, Jon ghe pitila voto tani sausile manga ateva tani kila va see ila tau ngai aapasunga ngatoa kamena ila. Katoa laghe ue va Iesu karika taumattu tuungi ia, me mene katoa laghe ue va la kilakilaaili voto tale spirit, me karika poi la gheelei ssavoto. Jon ghe aulia ngasarasarakanala voto ita kilakila, me tee vaalua ita rooroo tani kila va taumattu eaiesoa ngakoronna arova eaielousiaa mene katoa tau ngaisesoaa. Ghe piti teela mene ghalua nitoonga tani kila va see ia tau ngaisesoaa tuungi: la nongonongo usilaa God, me la aiesoaa voto koronna. Jon ghe aielousiaa lo atoa ghe pitipitila etaира, me ghe aselala va natuna ila.

**Tani kila amuemua**

Aitiutiu tale inangari 1:1-4

Tani toka tale mallanga ateva 1:5-2:29

Tani toka nongina natuna atoa God 3:1-5:12

Voto ita atoka tuutuliita etana 5:13-21

*Inangari maulue*

<sup>1</sup> Inangari eteva maulue ia ghe tokatoka tale aitiutiu, me ami ghe nongoala, me ami ghe taraiela ta mataimami, me ami ghe posoala ta nimaimami, ia o inangari eteva ami aulia ngaotua.

<sup>2</sup> Lo ateva etautau maulue ateva ghe kaurekatila, ami ghe taraiela me ami aaulieinia me ami poppoainia etaimim. Ia o maulue ateva tokatoka liu ia me ghe tokatoka tee Tamana, me ang ghe kaurekatila etaimami.

<sup>3</sup> Ami poppoainia ngaotu sa ateva ami ghe taraiela me ami ghe nongoala, mausina avalua o me am rooroo tani mae aitauua teeiemami me ita aighui etauua, me kaluimami niaighui etauua ta Tamaita me Natuna ta Iesu Karisto.

<sup>4</sup> Ami pitipiti voto tani ghelei va masimasiaaita enamungaili.

*Tani kasu tale mallanga*

<sup>5</sup> Inangari eteva oia ami ghe nongoala etana me ami aulia ngaotua etaimim va God mallanga ia, me ta ngetana karika poi righi surrom.

<sup>6</sup> Arova ita ue va ita aighui etauua teeia me karika, ta ita kasukasu tale gheeleiaa surrom, ita nim kamekame me karika ita uusilaa voto koronna.

<sup>7</sup> Me arova ita kasukasu tale mallanga nongina ia elome tale mallanga, aue ita aighui etauua tee mene kateva kateva etaita, me raena ateva Iesu Natuna ia egheeghelei eraarangisanaita tale kaluita ssavoto akapa.

<sup>8</sup> Arova ita ue va ita karika righi kaluita ssavoto, ita nim kamekameta, me voto koronna karika isaa elome etaita.

<sup>9</sup> Arova ita aulia ngaotu kaluita ssavoto, ia egheelei voto ghe uela va eghelei, me ia aue etani kkalua ngakapaaili sesa gheeleiaaita me eghelei eraarangisanaita tale isaa akapaaili gheegheleiaaita karika ghulughuluena ia.

<sup>10</sup> Arova ita ue va ami karika ami ghe gheleila righi ssavoto, ita gheleia va ia tau nikamekame ia, me inangarinia ateva karika ia tale urunguitanii.

**2**

*Iesu aisausiita ia*

<sup>1</sup> Masi natughu etoa, apitipiti etaimim va karika am mene ghelei ssavoto. Me arova teva eghelei ssavoto, kateva taumattu aisausiita ia eaippooaa tee Tamane ta poli ita, Iesu Karisto etana ghulughuluena ia.

<sup>2</sup> Ia ghe matela tani ghaa aipolipoli tale kaluita ssavoto, karika va kaluita ssavoto nonga, ta kaluira tee taumattu ngatoa tale kosa akapaaili eteva oia.

<sup>3</sup> Ita kilakila va, arova ita nongo usilaa llo eaauliaa, angita ghe kilaiela.

<sup>4</sup> Lo ateva taumattu eue va, "Aghi akilakilaia," me karika enonganongo usilaa tee llo eaauliaa, tau nikamekame ia, me voto koronna karika isaa etana.

<sup>5</sup> Me arova kateva etaita enongo usilaa inangarina, ailousiaane ateva God etokatoka akoronna etana me ghulughuluena ia. Tale isaa o salana, aue ita kila va ita etana:

<sup>6</sup> lo ateva eue va etokatoka tee Iesu, etani kasu nongina Iesu ekasukas.

<sup>7</sup> Masi kapughu etoa, karika amene pitipiti righi ouna voto tani usilaa, ta pokane, llo oia ngam ghe ghaala tale aitiutiu. Isaa oia voto pokane ngam ghe nongola.

<sup>8</sup> Arongona ta pokane, amene pitipiti tani aulaa ouna voto tani usilaa, me am roo tani tara kanna voto koronna ta lesu me ta ntetaimim, poli surrom ateva ange kapakapa, me koronna ateva mallanga ang ghe llaala.

<sup>9</sup> Arova teva eue va ia tale mallanga ateva, me esessa tee tuena o nengane ateva, ia karika ghe kasu vuli surrom ateva.

<sup>10</sup> Lo ateva eaielousiaa tuena o nengane ateva, etokatoka tale mallanga, me karika righi voto erooroo tani gheleia va ekatuu.

<sup>11</sup> Me lo ateva esessa tee tuena o nengane ateva, ia tale surrom, me ekasukasu elome tale surrom, me karika ekilakila va eaa elaoalao, poli surrom ateva eaakou runga matana me karika etaatara.

<sup>12</sup> Apitipiti etaimim masi aliki etoa,

poli God ang ghe kkaluuala kaluimim ssavoto poli uuunguaane ateva Iesu.

<sup>13</sup> Apitipiti etaimim tamatama atoa,

poli ngam ghe kilala lo ateva ghe tokatoka tale aitiutiu.

Apitipiti etaimim aliki taita atoa,

poli ngam ghe apalala sesa taumattu ngateva.

Apitipiti etaimim masi aliki etoa,

poli ngam ghe kilala Tamaita ateva.

<sup>14</sup> Apitipiti etaimim tamatama atoa,

poli ngam ghe kilala lo ateva ghe tokatoka tale aitiutiu.

Apitipiti etaimim aliki taita atoa,

poli am sarasarakania iem,

me inangarina ateva God, ia etaimim,

me ngam ghe apalala sesa taumattu ngateva.

### *Am rau mene aielousiaa kosa ateva*

<sup>15</sup> Am rau mene aielousiaa kosa ateva oia me voto etokatoka etana. Arova teva eaielousiaa kosa ateva, karika erooroo tani aielousiaa Tamaita.

<sup>16</sup> Ta isaa akapaaili voto tale kosa ateva oia: aaloanna vilikiira taumattu ngatoa, sesa voto mataira etaatara la aloannaaili, me nitau sae nannaaira tale peiira; isaa o voto karika emaema ta Tamaita, ta emaema tale kosa ateva oia.

<sup>17</sup> Kosa ateva me aaloannaane aue ekapa, me lo ateva taumattu eaimuli tee aaloan-naane God, aue etoka liu.

### *Tau ngai ssateena atoa Karisto aue la mae*

<sup>18</sup> Masi aliki etoa, airuuruu oia nau, me ngam ghe nongola va tau ngai ssateena ateva Karisto aue emae, me tale isaa oia nau oroi tau ngai ssateena atoa Karisto angila ghe mae sio. Liuna avalua o me ita kilakila va airuuruu oia tale nau.

<sup>19</sup> Kasina taumattu oia ghe tokatoka teeita, me isaa oia angila ghele kasu vulitala. Karika va koronna va kapuita ila, ta arova kapuita ila aue la ghele toka teeita. Kasukusuaire eaapasunga va ila karika va ita aitauua.

<sup>20</sup> Me am, lo ateva manga ia ghe amangaiemla me am akapaaili ngam ghe kilala llo koronna.

<sup>21</sup> Karika va apitipiti etaimim poli karika am kilakila inangari koronna. Karika, ta am kilakila. Me poli am kilakila va nikamekame karika emaema tale voto koronna.

<sup>22</sup> See tau nikamekame ia? Lo ateva taumattu eue va Iesu karika va Mesaea ia. Ia o ase taumattu ngateva, tau ngai ssateena ia Karisto, me eliuliu vilina ta Tamaita me Natuna.

<sup>23</sup> Lo ateva eliuliu vilina ta Natuna ateva God, Tamana karika ia etana. Me lo ateva eaulia ngaotu Natuna ateva God, Tamana ia etana.

<sup>24</sup> Llo inangari am ghe nongola tale aitiutiu, am poso parasi. Arova am poso parasi, Natuna ateva God me Tamane aue lalu toka teeiem tale nau ekapa atoa.

<sup>25</sup> Inangari nialokoi ia ghe auliaala, va maulue ateva tokatoka liu ia.

**2:5:** Jon 14:21, 23.    **2:7:** Jon 13:34; 2 Jon 5-6.    **2:8:** Rom 13:12; Jon 1:9.    **2:9:** 1 Jon 4:20.    **2:10:** Rom 14:13.

**2:11:** Jon 12:35.    **2:15:** Rom 8:7.    **2:16:** Rom 13:14.    **2:17:** Mat 7:21.    **2:18:** Mat 24:5, 24; 2 Jon 7.    **2:19:**

Apes 20:30.    **2:20:** 1 Ko 2:15; 2 Ko 1:21; 2 Jon 2.    **2:22:** 1 Jon 4:3; 2 Jon 7.    **2:23:** Jon 5:23; 1 Jon 4:15; 5:1.

<sup>26</sup> Apitipiti atu inangari toko tani aulia ngaotu kieimim tale taumattu ekamekame.

<sup>27</sup> Karisto ghe amangaiemla, liuna avalua o me karika am tuutukuna tale alomasaanga, ta poli Spirit Manga ateva, ia etaimim, eaapasunga ngakapaaili voto etaimim me inangarina akapaaili koronna, karika righi kamena. Liuna avalua o me am tokatoka aitauaa tee Karisto, nongina Spirit Manga ateva ghe apasungaala etaimim.

### *Natura atoa God*

<sup>28</sup> Me liuna avalua o, masi natughu etoa, am toka aitauaa teeia, ta nau eteva ekaurekati, aue ita tingina akorokorongan me karika aue ita palata nau eteva emae.

<sup>29</sup> Arova am kilakilaia va ia ghulughuluena ia, ngam nim kilala va lo atoa la gheeghelei voto ghulughuluena laghe lutula etana.

## 3

<sup>1</sup> Karika pisike ia niaielousi eteva God Tamaita ghe gheleielaa etaita, ta ghe kolotala va ita natuna ita, me koronna ia. Taumattu tale kosa ateva karika la kilakila God, liuna avalua o me karika la kilakilaita.

<sup>2</sup> Kapughu etoa, ang ghe natuna itala God me auena vaalua ita toka, karika ghe auliaala etaita. Me ita kilakila va nau eteva ekaurekati, aue ita nongina ia, poli aue ita taraiia va ia vaalua ia.

<sup>3</sup> Lo atoa la aatoka tuutuliira etana, la gheeghelei eraarangisanaila nongina ia raarangisana ia.

<sup>4</sup> Lo atoa la gheeghelei ssavoto, la gheeghelei saasakiaa inangari nipaopao, poli ssavoto egheeghelei saasakiaa inangari nipaopao kanna God.

<sup>5</sup> Am kilakila va ia ghe kaurekatila tani ghaa velu ssavoto, me ia karika righi ssavoto etana.

<sup>6</sup> Lo ateva etokatoka etana, karika egheelei ssavoto, me lo ateva egheelei ssavoto, karika ghe taraiia me karika ghe kilaiia.

<sup>7</sup> Natughu etoa, am rau mene tau veluem va katoa ppae la ttuaa kalipiem. Ta lo ateva egheeghelei voto ghulughuluena, ghulughuluena ia nongina Karisto ghulughuluena ia.

<sup>8</sup> Lo ateva egheeghelei ssavoto kapuna ia Satana, poli Satana ghe tiua ngakasinala tani ghelei ssavoto emua arau. Liuna avalua o me Natuna ateva God ghe sio mae tani tturu unguuane Satana.

<sup>9</sup> Lo ateva taumattu ghe lutula ta God karika erooroo tani ghelei ssavoto, poli inangarina ateva God etokatoka etana. Ia avalua o me karika erooroo tani ghelei ssavoto, poli ang ghe lutula ta God.

<sup>10</sup> Ia avalua o me aue ita tara kila va see ila natuna atoa God me see ila natuna atoa Satana: lo atoa gheegheleiaaira karika masina karika va natuna ila God, tee me lo ateva karika eailousiaa tuena o nengane.

### *Tani aielousiaa kateva kateva*

<sup>11</sup> Inangari eteva ngam ghe nongoala tale aitiutiu va ita aielousiaa kateva kateva.

<sup>12</sup> Ita rau mene nongina Kein kapuna ia sesa taumattu ngateva me ghe uvi ematela nengane. Mausi saa me ghe uvi emateala? Poli gheegheleiaane sesa me gheegheleiaane nengane ghulughuluena.

<sup>13</sup> Liuna avalua o me am rau mene soghi, kapughu etoa, arova taumattu ngatoa tale kosa ateva oia la ssa teeiem.

<sup>14</sup> Ita kilakila va angita ghe kasu vulila nimate me ita tale pai maulue ativilau, poli ita, ita aielousiaa tueita me nengaita atoa. Lo atoa la tam aaielousi, ila la tokatoka tale nimate.

<sup>15</sup> Lo atoa la sessa tee tueira o nengaira atoa ila nongina tau niaiuvi emate atoa, me am kilakila va tau niaiuvi emate atoa, maulue ateva tokatoka liu ia, karika ia etaira.

<sup>16</sup> Ia avalua o me ita kilakila va vaalue ia niaielousi eteva: Iesu ghe tau vella maamauluaane etaita, me ita, ita mene tau velu maamauluaaita tale tueita me nengaita atoa.

<sup>17</sup> Arova see righi peina, me etam kila tuena o nengane ateva karika righi peina va aue esausia, vaalua ailousiaane ateva God aue etoka etana?

<sup>18</sup> Masi natughu etoa, karika ita mene aielousiaa tale paaita, ta tale niuungu me tale voto koronna.

<sup>19</sup> Ia o eaapasunga va ita kilakila va ita elome tale inangari koronna, me urunguitaniita ateva tee etokatoka amasina ta matane God

<sup>20</sup> nau urunguitaniita ateva eue va angita sesala, poli God enaanamuu tale urunguitaniita ateva, me ekilakila akapa voto.

<sup>21</sup> Kapughu etoa, arova urunguitaniita ateva karika eue va angita sesala, ita atoka tuutuliita ta God,

<sup>22</sup> me aue ita ghaa voto ita kookolomi etana, poli ita nongonongo usilaa voto eauliaa me ita gheeghelei voto eaamasiasia.

<sup>23</sup> Me inangarina ghe auliaala toko, va tani aikaaiaa tale ararina atae Natuna ateva ta Iesu Karisto, me tani aielousiaa kateva kateva, nongina ghe auliaala etaita.

<sup>24</sup> Lo atoa la nongonongo usilaa llo eauliaa, la tokatoka etana me ia etaira. Ghe tau mae Spiriti eteva etaita, mausina avalua o me ita kilakila va ia etokatoka etaita.

## 4

### *Am tootoonga ase spiriti etoa*

<sup>1</sup> Kapughu etoa, am rau mene aikaaia ngakapa tale ase spiriti etoa. Poli oroi ila propete kamekame atoa angila ghe kasu ekapa seela tale kosa ateva oia, am tootoonga spiriti ekapa atoa tani tara va laghe kasula ta God o karika.

<sup>2</sup> Aue utara kila kapuna ateva spiriti God ia avalua toko: va lo ateva spiriti eaulia ngaotu va Iesu Karisto ghe taumattuula.

<sup>3</sup> Me lo ateva spiriti karika eaulia ngaotu Iesu, karika ghe kasula ta God. Ia o ase spiriti eteva, tau ngai ssateena ia Karisto, am ghe nongoala va aue emae, me ia oia ang ghele rekatala.

<sup>4</sup> Am, aliki etoa, am kapuna iem God, me ngam ghe apalala propete kamekame atoa, poli lo ateva etokatoka etaimim sarasarakanaili ia me elaulau lo ateva tale kosa ateva.

<sup>5</sup> Ila tale kosa ateva oia, me la auliaa voto tale kosa ateva oia, me taumattu ngatoa tale kosa ateva la nongonongo usilainila.

<sup>6</sup> Ita kapuna ita God, me lo atoa la kilakila God, la nongonongo usilainita. See karika ia ta God karika enonganongo usilainita. Tale isaa o salana, ita roroo tani kila koronna ateva spiriti me kamena ateva spiriti.

### *Kanna God niaielousi me kaluita*

<sup>7</sup> Masi kapughu etoa, ita aielousiaa kateva kateva, poli niaielousi eteva ghe mae sio ta God. Lo ateva eaaielousiaa ghe lutula ta God, me ekilakila God.

<sup>8</sup> Lo ateva etam aaielousiaa karika ekilakila God, poli God tau ngaielousi ia.

<sup>9</sup> God ghe apasungaala aielousiaane ateva etaita avalua toko: va ghe suula kateva nonga ia Natuna ateva ghe mae sio tale kosa ateva, me mausina avalua o me ita maamaaulue.

<sup>10</sup> Ia o niaielousi eteva: karika va ita, va ita ghe aielousiaala God, ta God ghe aielousieinitala, me ghe suula Natuna tani ghaa aipolipoli tale kalutu ssavoto.

<sup>11</sup> Kapughu etoa, poli God eaielousieinitala, ita tee ita tani mene aielousiaa kateva kateva.

<sup>12</sup> Karika teva ghe tara God, me arova ita aielousiaa kateva kateva, God etokatoka etaita, me ia o niaielousi eteva egheelei niuungu ghe uela va ita ghelei.

<sup>13</sup> Ita kilakila va ita, ita tokatoka etana, me ia etaita, poli ghe tau mae sio kapuna Spirit Manga ateva etaita.

<sup>14</sup> Me angita ghe tarala me angita ghe aulia ngaotula va Tamane ghe suula Natuna tani sio asaangi taumattu tale kosa ateva.

<sup>15</sup> Lo ateva eaulia ngaotu va Iesu Natuna ia God, God etokatoka etana, me ia ta God.

<sup>16</sup> Me mausina avalua o me ita kilakila me ita aatoka tuutuliita tale aielousiaane ateva God etaita.

God tau ngaielousi ia, me lo ateva etokatoka tale niaielousi, etokatoka ta God, me God etokatoka etana.

<sup>17</sup> Tale isaa o salana, niaielousi eteva egheelei niuungu ghe uela va ita ghelei, me aue ita roroo tani tingina akorokorongana tale nau niaisakei eteva, poli ita nongina Iesu tale kosa ateva oia.

<sup>18</sup> Karika righi nimataatu tale niaielousi eteva, ta ghulughuluena ateva niaielousi eghaaghaa velu nimataatu eteva, poli mataatu eteva aipolina sesa. Lo ateva emaa-mataatu, ghulughuluena ateva niaielousi karika ia etana.

<sup>19</sup> Ita aielousiaa God poli ia ghe aielousia ngakasinaitala.

<sup>20</sup> Arova teva eue va, "Aghi aghielousiaa God," me esessa tee nengane o tuena ateva, tau nikamekame ia, ta lo ateva karika eaielousiaa nengane o tuena ateva etaataraila, karika erooroo tani aielousiaa God karika etaatarai.

<sup>21</sup> God ghe tau mae sio niungu tani ghelei, va lo ateva eaielousiaa God etani aielousiaa tee nengane o tuena ateva.

## 5

### *Niaikaaiaa ta Natuna ateva God*

<sup>1</sup> Lo atoa la ghaikaaiaa va Iesu Mesaea ia, natuna ila God, me lo atoa la ghaielousiaa Tamana, la ghaielousiaa tee natuna atoa.

<sup>2</sup> Arova ita aielousiaa me nonganongo usilaa God, ita kilakila va aue ita aielousiaa natuna atoa.

<sup>3</sup> Tani aielousiaa God, mallooeana va ita aimuli tee voto eaauliaa va ita ghelei, me inangarina God karika aue aanasa tani ghelei.

<sup>4</sup> Ta lo akapa atoa ita ghe lutula ta God, ita ghaapala sesa tale kosa ateva. Ia o lo ateva niapala: ita aikaaiaa ta God.

<sup>5</sup> See ia lo ateva eaapala kosa ateva? Lo ateva nonga eaikaaiaa va Iesu Natuna ia God.

<sup>6</sup> Ia o lo ateva ghe mae sio tale manu ghe ghaala niasuu me tale rae ghe akalala tale aikotoo, Iesu Karisto etana, karika ghe mae sio nonga tale manu, ta ghe mae sio tale manu me rae. Isaa o voto Spirit Manga ateva ghe auliaala, ita kilakila va koronna ia, poli Spirit Manga ateva koronna ia.

<sup>7</sup> Kotolu voto lotolu aaulia ngaotua:

<sup>8</sup> Spiriti eteva, manu eteva me rae ateva.\* Lotolu ghe asokoi eitauaala.

<sup>9</sup> Taumattu ngatoo la aakoronna llo voto taumattu ghe tarala me eaauliaa. Tale ia o salana atikirighi taumattu etani akoronna llo voto God eaaulia ngaotu Natuna, ta poli God koronna ia.

<sup>10</sup> Lo ateva eaaisoaa tale Natuna ateva God, ia ghe aiesoala inangarina ateva God ghe aulia ngaotuela, me lo ateva etam aaiesoaa ta God egheelei va God tau nikamekame ia, poli karika eaikaaiaa llo voto God eaaulia ngaotu Natuna.

<sup>11</sup> Me inangari koronna isaa avalua toko, va God ang ghe tau mae sio etaita maulue ateva tokatoka liu ia, me ia o maulue ateva, ie ta Natuna.

<sup>12</sup> Lo ateva eaighui tee Natuna, eghaaghaa maulue ateva. Me lo ateva karika eaighui tee Natuna ateva God, karika aue eghaa maulue ateva.

### *Airuuruu tale inangari*

<sup>13</sup> Apitipiti voto toko etaimim lo atoa am aaikaaiaa tale ararina atuae Natuna ateva God tani gheleiem va am rooroo tani kila va maulue ateva tokatoka liu ia, ia etaimim.

<sup>14</sup> Ita atoka tuutuliita ta God va arova ita kolomi righi voto tale aloaloannaane, aue enongota.

<sup>15</sup> Me arova ita kila va enonganongota, saa llo ita kolomi, angita kilala va angita ghaala.

<sup>16</sup> Arova teva etaimim etara teva nengana o tuena va egheelei ssavoto ateva karika aue ekatulainia lao tale nimate, elooloo sae mausina, me God aue etau lao maulue etana. Amene aauliaa lo atoa kaluira ssavoto karika ekaakatulainila lao tale nimate. Ta kateva ssavoto ekaakatulainila lao tale nimate. Karika aue va am looloo sae tale ia o ase ssavoto ateva.

<sup>17</sup> Isaa akapaaili sesa gheegheleiaita, ssavoto ia, me kasina ssavoto karika ekaakatulainita lao tale nimate.

<sup>18</sup> Ita kilakila va lo akapa atoa laghe lutula ta God karika la gheeghelei ssavoto. Natuna ateva God, Iesu etana, eaitarainila, me sesa taumattu ngateva karika erooroo tani ghelei saasakieinila.

<sup>19</sup> Ita kilakila va ita kapuna ita God, me taumattu ngakapaaili tale kosa ateva la tokatoka tale sarasarakaniaa sesa taumattu ngateva.

<sup>20</sup> Me ita kilakila va Natuna ateva God ghe mae sio me ghe tau mae sio alomasaanga etaita va aue ita kila God koronna ia, me ita etana, me Natuna ta Iesu Karisto. Ia koronna ateva God me etautau maulue ateva tokatoka liu ia.

**4:21:** Mak 12:29-31.    **5:1:** 1 Jon 4:15.    **5:3:** Jon 14:15, 23-24.    **5:6:** Jon 1:29-34.    **5:8:** Jon 15:26.    \* **5:8:** Kasina uru ngai laghe pitila tale inangari nge Latin me mene ghaata tale inangari nge Grilk laghe pitila auena ta ninamanama 1300, la ghe pitila<sup>7</sup> Kotolu voto lotolu aulia ngaotua epona liu: Tamana, Inangari eteva me Spirit Manga ateva, me lotolu ghe asokoi eitauaala.<sup>8</sup> Me kotolu voto lotolu aulia ngaotua tale kosa ateva: Spiriti eteva, manu eteva me rae eteva.

**5:9:** Jon 5:32-37.    **5:10:** Jon 5:36-40; Gal 4:6.    **5:12:** Jon 3:36.    **5:13:** Jon 20:31.    **5:14:** Jon 14:13-14; 1 Jon 3:21-22.    **5:16:** Mat 12:31.    **5:18:** 1 Jon 3:9.

<sup>21</sup> Masi natughu etoa, am alekalekaiem tale tootoo goto atoa.

**Aiaaghaluene atikirighi uru ngai  
Jon  
ghe pitiela  
Inangari emuemua**

Jon ghe pitila ia oia uru ngai etikirighi tale kateva ale manga, me easeasea va “masi kapughu vause ateva, God ghe suiematoongainiola, me natum atoa.” Ghe auliaala va la aielousiaa God, me malloeanava la aimuli usi etana me la aielousiaa mene katoa. Ghe auliaala kieira tale tau ngai aapasunga ngatoa kamena ila.

**Tani kila amuemua**

Aitiutiu tale inangari 1-3

Tani usilaa God me aielousiaa mene katoa 4-6

Niaulia ngatootoonga ta tau ngai aapasunga ngatoa kamena ila 7-11

Airuuruu 12-13

<sup>1</sup> Aghi Jon, namu ngateva,

Apitipiti uru ngai etikirighi eatuetu etam, masi kapughu vause ateva, God ghe suiematoongainiola, me natum atoa. Aghaielousieinam tale voto akapa koronna, me karika va aghi nonga ta lo atoa tee la kilakila voto koronna.

<sup>2</sup> Aghaielousieinam poli voto koronna etokatoka etaita me aue etoka etaita nau ekapa atoa.

<sup>3</sup> Alooloo sae va maamasinaane, alousiusiaane, me luei kannna God Tamaita ia me Iesu Karisto Natuna ia God, aue etoka aitauaa teeita poli am ghe aiesoala me am aielousiaa voto koronna ghe auliaala.

<sup>4</sup> Etautau mae kinatama nimasimasi etaghi tani kila va katoa natum la kasukasu tale salana koronna nongina Tamaita ateva ghe auliaala va ita ghelei.

<sup>5</sup> Me ia oia, masi kapughu vause ateva, karika apitipiti etam tani auliaa righi ouna voto tani ghelei, ta anim auliaa voto ita ghe ghaala tale aitiutiu, va God ekookolomi va ita aielousiaa kateva kateva.

<sup>6</sup> Me niaielousi eteva ia avalua toko, va ita kasu tale ninongo usilaa tale voto ghe auliaala va ita ghelei, nongina am ghe nongola tale aitiutiu. Voto ghe auliaala isaa avalua toko va am kasu tale niaielousi.

*Tau ngai aapasunga ngatoa kamena ila*

<sup>7</sup> Oroieili tau nikamekame atoa, karika la aulia ngaotu va Iesu Karisto ghe taumattula. Ngila ghe kasu ekapa seela tale kosa ateva, me isaa o ase taumattu, tau nikamekame ila, me tau ngai ssateena ila Karisto.

<sup>8</sup> Am paniem ta tau nikamekame atoa ta am rau velu voto ita ghe uunguaala, ta aue am ghaa akapaaili aipolipoli.

<sup>9</sup> Lo ateva eilou emuemue me eruu tani kasu tale niapasunga kanna Karisto, God karika ia etana, me lo ateva ekorokorongana tani kasu tale isaa o niapasunga, Iesu me Tamane lalu tokatoka etana.

<sup>10</sup> Arova teva emae etaimim me karika eatuaa isaa oia niapasunga, am rau mene ghaaia va esso tanganeimim me am rau mene aikoloainia.

<sup>11</sup> Lo ateva eaikoloainia, ie tee egheelei isaa o uunguaane sesa.

*Airuuruu*

<sup>12</sup> Oroieili voto aghanna tani piti tau aatu etaimim, me karika aghalona tani piti tale uru ngai me aipitipiti etiulu, poli aghaisoaa tale minannaa va aue amae taraiem, me ita aippooaa. Nau ita aitara, aue masimasiaaita enamungaili.

<sup>13</sup> Natuna atoa nengam vause ateva God ghe suimatoongainiela la suula masimasiaaira etam.

**Aiaakotonna atikirighi uru ngai  
Jon  
ghe pitila  
Inangari emuemua**

Jon ghe pitila ia oia uru ngai etikirighi ta kateva taita, ararina ateae ta Gaeas. Ghe auliaala masimasiaane tani nongo va Gaeas etiitingina akorokorongana tale voto koronna. Ghe auliaala kiena tale kateva namuu tale ale manga, ararina ateae ta Diotrepes, ghe gheelei erunga tau ngai aapasunga ngatoa koronna ila tani mae apasunga tale ale manga.

**Tani kila amuemua**

Aitiutu tale inangari, me inangari nimasimasi 1-8

Niaulia ngatootoonga ta Diotrepes 9-10

Niaulia ngamasina ta Demetrius 11-12

Airuuruu 12-14

<sup>1</sup> Aghi Jon, namu ngateva,

Apitipiti etam, masi kapughu eteva Gaeas, aghailousieinio tale voto koronna.

<sup>2</sup> Masi kapughu eteva, aooloo sae va umasimasi tale masi nitoka me isaa akapa voto aue emasina etam, nongina akilakila va maamauluaam ta Vau ngepona masina.

<sup>3</sup> Nimasimasi eteva namungaili ia ghe ghaaiegħila nau katoa kapuita ita aikaia nraigtaua laghe mae sio me laghe auliaala vaalua karika ugħe kasu vulila voto koronna.

<sup>4</sup> Nau eteva anongonongo va natugħu etoa la kasukasu tale salana koronna, masimasa-aagli namungaili.

<sup>5</sup> Masi kapughu eteva, ugħeelei emasina uunguaam ta tau ngai kasuaa inangari etoa arongona ta utam kilakila katoa etaira.

<sup>6</sup> Ailousiaam lagħe auliaala tale ale manga. Urau mene ruu tani sausila tale aloan-naħira, poli ia o ase salana atikirighi eaamasimasi God.

<sup>7</sup> Ta poli ararina ateae Iesu me lagħe kasula, karika lagħe annala tani għha righi niaisausi ta lo atoa karika la kilakila God.

<sup>8</sup> Liuna avalua o me ita tani sausi isaa o ase taumattu tani uungu eitauua teeila tale voto koronna.

<sup>9</sup> Agħe pitipiti lao sio ta taumattu ngatoa tale ale manga ateua, me Diotrepes, eaanna nonga tani muemueinila, karika aue eanna tani nongo usilaa voto aghħaaulia.

<sup>10</sup> Liuna avalua o me marova amae, aue aghpasunga ngamasina voto egħeelei me voto eauliaa teeieġhi karika masina. Me karika va egħeelei nonga llo, ta etam aikoloaa tee lo atoa la għħaikaiaa me epaopao lo atoa vara la għelei isaa o voto, me etiutti vella tale ale manga.

<sup>11</sup> Masi kapughu eteva, urau mene aimuli tee taumattu sesa, ta uaimuli tee taumattu masina. Lo ateva egħeelei voto masina kapuna ia God, me lo ateva egħħeelei voto sesa, karika għe kila God.

<sup>12</sup> Ila akapa taumattu ngatoa la għħaauliaa masi għħeelia Demetrius, me għħeeliaane elaqolao aitauua tee inangarina God koronna. Aghi tee aghħaauliaa masi għħeeliaane me am kilakila va kiukiuk aghħaauliaa koronna.

<sup>13</sup> Oroi voto aghħanna tani auliaa etam, me karika aghħanna tani piti tale uru ngai,

<sup>14</sup> poli aghajiesoaa tale ninanna va ghaisa ngarighi amae me italu aitara me italu aippooħa.

<sup>15</sup> Alooloo sae va luei aue etoka etam, me kapum atoa oia la suula masimasiaira ta ngetgam, me uauliaa masimasiaagħi ta kateva kateva ta kapu talua atoa ona.

**Uru ngai etikirighi  
Jiud  
ghe pitiela  
Inangari emuemua**

Oroi tau ngalomasaanga atoa la nannaa va Jiud nengane ia Jeimis, ia o nengane ia Iesu. Tale inangari nongina llo Pita ghe pitila (2 Pita 2), eaaulia ngatootoonga ta tau ngai aapasunga ngatoa kamena ila, me aipolipoliira. Ealoanna va lo atoa la ritiriti la tingina akorokoronganaga tale voto koronna laghe ghaala tale nau laghe aiesoala masi kiukiu eteva.

**Tani kila amuemua**

Aitiutiu tale inangari 1-2

Niaulia ngatootoonga ta tau ngai aapasunga ngatoa kamena ila 3-16

Am poso parasi tale niaikaiaa me voto koronna 17-23

Niarangise 24-25

<sup>1</sup> Aghi Jiud, kapuna tau ngai uungu ieghi Iesu Karisto, me nengane ieghi Jeimis,

Apitipiti ta am lo atoa God ghe koloamla, me God Tamaita ia eaailousieiniem me eaaitarainiem mausii Iesu Karisto.

<sup>2</sup> Aloodoo sae va God aue earangiseiem tale oroeiili alousiusiaane, luei, me nialousi eteva.

*Niaiskei tale kamena atoa tau ngai aapasunga*

<sup>3</sup> Masi kapughu etoa, aghe annaailila va aghe pitipiti aatu etaimim tani auliah uunguua nisaanga God eghelei etaita, ta aghe ateateaalaa va apitipiti me aghaulia ngakorokoronganaga etaimim tani ppooaa kotokotoo tale voto koronna God ghe taula katengaata ta kapuna atoa manga ila.

<sup>4</sup> Poli katoa ase taumattu ngila ghe kupi einao ssola elome etaimim, emua arau laghe pitila va aue sesa voto elutu etaira. Karika la oneoneaa God. La aikolikoliaa maamasinga kapuita God ateva elaoalao tale aloannaaira sesaaili, me la ratirati Iesu Karisto, ie nonga kapuita namuu ia me Vauita ia.

<sup>5</sup> Ngam ghe kilala kiukiu, me aghanha tani mene auliah etaimim va Vau ngepona ateva ghe ghaa oghila kapuna taumattu ngatoa eljip, me emulina ghe tturuula lo atoa karika la aiesoaa etana.

<sup>6</sup> Ngam ghe kila teela ensolo atoa karika laghe ghelei emasinala uunguaaira nongina laghe tokatoka me laghe kasu vuli tanganueira, God ghe irilala tale sene atoa karika la rooro tani tapate me la toitoi tale saurrom ateva tani aisakei tale kinatama nau niaiskei eteae.

<sup>7</sup> Tale isaa nonga o ase salana, eSodom me llo masaliki taatara kalakalaa etairarua laghe ghaala sesa aipolipoli ta laghe tau vella vilikiira tani ghelei niailai salosaloaa me laghe laula salana ghulughuluena tale uungua nilai. Liuna avalua o me la aimatoonga va am akekkeliem tale kura ataeae karika erooroo tani pala.

<sup>8</sup> Tale isaa o nonga ase salana, isaa o taumattu ila elome etaimim, tau niasaosopoiila, la gheelei ekulukulutana vilikiira tale uungua niailai salosaloaa, me la ratirati voto matuutulienia, me la auliah saasakiaa tee kapuna ensolo atoa God mallanga ila.

<sup>9</sup> Me kapuire namu ngateva ensolo atoa ta Maekol karika ghe aimuli tee isaa o salana. Nau ghe aissakeana tee Satana, va see kaiaa Moses, karika ghe auliah saasakiala tee God tani ghelei niaiskei ta Satana, ta ghe nim uela etana va, “Aue Vau ngepona ateva eghelei niaiskei etam tale voto sesa ugheelei.”

<sup>10</sup> Me ila o taumattu ngatoa la auliah saasakiaa tee llo voto aloira karika emaamasaanga, me llo la ghalomasaanga tani ghelei la gheelei nonginaaili ghaata kkena atoa karika righi nannaaaira, me isaa o voto etani tuuturungila.

<sup>11</sup> Alousiusi etaira, ta ngila aimuli tee salane Kein, me la ghe ailuilui nonginaaili sesa gheeleiaane Baelam laghe gheelei tani ghaa viliki veu. Aue la turungila nongina laghe turungila Kora poli ghe aamakatakata.

<sup>12</sup> Isaa o taumattu nongina atu eteva etokatoka runga sao atikirighi tale uneimim niaighui me kinatama ninamanama atoa. La namanama teeiem me karikaaili emoimoila.

Tau ngai toi sipsipi ila la angiunginila nonga; ila urukookoo ila karika la ghalakuti vaoo me enim kuukueinila see. Me ila arova ai eteae nauna tani kune me karika ekunekuneaa uene ta matena ia me la mene mukemukeia.

<sup>13</sup> Paapalataaира tale gheeleiaaira eotuotu arova viiso kotoo ngelo malionge atoa la ghaasuu, me ila nongina katto atoa la nim ilou ekapa see, me saurrom ateva avoonaaili ia God ghe aimonomonosieiniela etaira tokatoka liu ia.

<sup>14</sup> Inok, aiaaghaituna (7) ia ta Adam, ghe aulia ngamuemua alokoila inangari tale isaa oia ase taumattu, ghe uela va, "Tarala, Vau ngepona ateva ange maemae tee airari me airari kapuna ensolo atoa manga ila

<sup>15</sup> tani ghelei niaiskei ta taumattu ngakapa atoa me tani apasunga sesa gheeleiaaira lo akapa atoa taumattu karika la oneoneaa God, me tale isaa akapaaili sesa voto laghe gheleila tale sesa salana, me tale sesa inangariira ila o tau ssavoto atoa laghe auliaa teeielia."

<sup>16</sup> Ila o taumattu ngatoa tau niauliuliaa ila me la sessa tee mene katoa. La aimuli tee sesa aloaloannaaira me la tautau sae nannaaira me la ghaaruaa mene katoa tani nim asaesae arariira.

#### *Nikolokolo tani poso parasi*

<sup>17</sup> Me masi kapughu etoa, am mnaa sa ateva kapuna apostolo atoa Vauita ateva Iesu Karisto laghe aulia ngamuemua alokoiola.

<sup>18</sup> Laghe uela etaimim va, "Aue airuuruu tale nau, lo atoa la aanamisa God aue la aimuli tee aloannaaira karika masina."

<sup>19</sup> Isaa o taumattu aue eatoka apolapolaiem, la aimuli tee nannaaira, me Spiriti eteva karika ia etaira.

<sup>20</sup> Me am, masi kapughu etoa, am asarasarakanaiem tale uneimim niaikaaiaa mangaili, me am looloo sae tee Spirit Manga ateva me esausiem.

<sup>21</sup> Me am toka tale aielousiaane ateva God nau am toitoi Vauita ateva Iesu Karisto tani tau aatu maulue ateva tokatoka liu ia, poli ghe apasungaala alousiusiaane etaimim.

<sup>22</sup> Am alousiusi tee lo atoa nannaaira egħaagħalua.

<sup>23</sup> Am asaangi lo atoa la ghanna tani saanga nongina va am ghe asaangilala tale kura ateeae. Am apasunga alousiusiaaimim ta mene katoa tee nimoia, am akekkeliem tale kaluira ssavoto, egħeellela la kulukulutana.

#### *Niarangise*

<sup>24</sup> God sarasarakania me eroo tani sausiem me karika am rooroo tani katuu. Eroroo tani għaaiem me elaoainam tale voto ateva mallangina ateva etokatoka etana, nau etaraiem, karika aue etara righi sesa gheeleiaaimim. Me aue eroo tani tau aatu kinatama nimasimasi etaimim.

<sup>25</sup> Ia nongaaili kapuita Goto ia, tau ngai asaangita ia, ta netgħana mallanga, namuu ja tale voto akapaaili, sarasarakania, me matuutulieniha tale uunguaane Iesu Karisto, kapuita Vau palepale ateva, tale isaa akapa nau emua arau, ghaine me nau ngemuli. Koronna.

## Niaulia ngaotu eaauliaa Iesu Karisto Inangari emuemua

Oroi ila lo atoa la nannaa va apostolo ateva Jon ghe pitila ia oia vuku eteva, me katoa la ue va mene kateva ppae Jon. Vuku eteva oia, uru ngai etikirighi ghe lao sio ta ghaitu (7) ale manga tale provinsi eteva eEisia, tale anua ateva ghaine ita aseasea va Teki. Jon ghe auliaala unna nitaatara atea ta Iesu, vara me ghe pitila uru ngai tale kateva kateva ale manga. Sapta 4-22 eaauliaa unna nitaatara Jon, ghe tarala voto epona liu, me voto atoa aue la lulu epona liu me tale kosa ateva oia. Jon ghe pitila tale oroi niaimatootoongana, me karika malumina tani kila malloeanan. Jon eaauliaa airuuruu eteva niaisakei, me tokatokaairia kapuna atoa God tale ouna ateva anua eJerusalem.

### **Tani kila amuemua**

Aitiutu tale inangari 1:1-8  
 Ghaitukirighi uru ngai 1:9-3:22  
 Ghaitu airarrangasi 4:1-8:6  
 Ghaitu taue 8:1-11:19  
 Ghaitu aimatootoongana 11:15-16:1  
 Ghaitu uivilau pelete 15:1-16:21  
 Ghaitu nippooaa 16:17-19:21  
 ouna ateva epona liu me kosa 20:1-22:7  
 Airuuruu tale inangari 22:8-21

<sup>1</sup> Niaulia ngaotu eaauliaa Iesu Karisto, God ghe taula isaa oia inangari etana, tani apasunga ta kapuna tau ngai nonganongo anna atoa sa ateva ghaisa ngarighi elutu. Ghe suula kapuna ensolo ateva tani sio apasunga ta Jon, kapuna tau ngai nonganongo anna ia.

<sup>2</sup> Aghi Jon aghe tara akapaailila voto akapaaili me aghasaoki va inangari oia inangarina God, me inangari inangarina Iesu Karisto, me aghi aue va, inangari oia koronna.

<sup>3</sup> Niarangise ta lo ateva eritiriti inangari tale isaa oia inangari propesi. Me niarangise ta lo atoa la nonganongo me la usilaa saa llo aghe pitila, poli nau ange aakalakalaa.

*Jon ghe piti lao sio inangari ta ghaitu ale manga*

<sup>4</sup> Uru ngai Jon ghe piti lao sio ta ghaitu (7) ale manga tale provinsi eteva eEisia.

Alooloo sae va maamasinaane me luei aue etoka etaimim, ekasukasus ta God etokatoka ghaine, me ghe tokala arau me auena emae, me ta ghaitu spiriti la tokatoka emua tale unna aitokatoka ateva God, kingi ia,

<sup>5</sup> me ta Iesu Karisto, ia eaaulia ngakoronna inangarina akapa God, me aitiutu ia tani totu ta lo atoa matena ila, me eaaitoaa kingi ekapa atoa tale kosa ateva.

Ta netgana ghe aielousieinala, me ghe asaangitala tale kaluita ssavoto tale raena ateva,

<sup>6</sup> ghe swoitoongainitala va ita kingi me pristi tani uungu ta kapuna God ateva, Tamane ia. Ita taue sae me aue eaitoiaa voto akapa nau ekapa atoa. Koronna.

<sup>7</sup> Tarala, aue emae tale urukookoo,

me taumattu ngakapaka atoa aue la taraia,  
 me lo atoa laghe soaiala

me taumattu ngakapaaili etoa tale kosa ateva aue la alousiusi mausina.

Ue, koronna.

<sup>8</sup> Vau ngepona ateva God ghe uela va, "Aghi alpa me omega<sup>\*</sup> ieghi,<sup>†</sup> atokatoka ghaine me aghe tokala arau me auena amae. Aghi God ateva sarasarakananaili ieghi."

*Nitaatara atea Natuna ateva Taumattu ngateva*

<sup>9</sup> Aghi Jon, kapuimim tau ngaisesoaa ieghi, me kapuimmi ieghi tale nimmarikana, me ararimangali me nitingina akorokorongana, isaa o llo ita ghaaghaa mausi Iesu.

**1:1:** Aotu 22:6.    **1:3:** Aotu 22:7, 10.    **1:4:** Eks 3:14-15; Aotu 3:1; 4:5.    **1:5:** Kol 1:18; Sams 89:27.    **1:6:** 1 Pita 2:9; Aotu 5:10; 20:6.    **1:7:** Den 7:13; Sek 12:10; Mat 24:30; Jon 19:34-37; 1 Tes 4:17.    **1:8:** Aotu 21:6; 22:13.    **\* 1:8:** alpa me omega Alpa aitiutu eteva tale mata ngingangari nge Grik, me omega airuuruu eteva.    **† 1:8:** Kasina uru ngai laghe pitila, laghe mene uela va, me aghi aitiutu ieghi me airuuruu ieghi.

Laghe atokaiegħila tale patunganua ateva ePatmos mausi inangarina ateva God me tee inangarina ateva Iesu.

<sup>10</sup> Tale nauna ateva Vau ngepona ateva kapuna Spiriti eteva God ghe tokala etagħi, me emuli etagħi agħe nongola lingi ngalo ateva arova taue ateva.

<sup>11</sup> Għe uela etagħi va, “Upiti tale vuku eterha saa llo angu tarala me utau lao tale ale manga ghajtu, eIpses, Smena, Pegamom, Taeataera, Sadis, Piladelpia, me Laodesia.”

<sup>12</sup> Vara me agħe kiriegħila tani taatara lao tale lingi ngalo ateva għe samasama teeieġhi, me naa tevva agħe kiriegħila, agħe tarala ghajtina aitingina lam lagħe għelejla tale gol.

<sup>13</sup> Elome tale ghajtu (7) aitingina lam, kateva taumattu arova natuna ia taumattu ngateva,<sup>‡</sup> kaliona ati lu għe aakou llusi sio kkrena, me tukk kalio ateva (arova ses ateva) għe vaovaoa ta sauna ateva, lagħe għelejla tale gol.

<sup>14</sup> Uu nguruna ususoanaaili nongina uu sipsipi, me ususoonaanee tee nongina urukookoo ateva ususoana ia, me matana alua nongina ramerame kura atae.

<sup>15</sup> Kkien aluelange ravaravaienāaili nongina brasi lagħe tungila tale kura atae, me lingi ngalona ateva nonginaaili kotoo ateva eaasuu.

<sup>16</sup> Nimana muenna atelange għe posoposo katto ghajtu, me baenata ateva pai ekpa aluevilau matarroke illuu għe għoħa ta paana. Me matane għe lallaa nonginaaili mallangi sinaka ateva.

<sup>17</sup> Nau agħe taraiela, agħe katuula ta liuekkena arova matena aghi. Għe saoħala nimana muenna atelange etagħi, me għe uela va, “Urau mene matautu. Aghi aitħiutiu iegħi me airuuruu iegħi.

<sup>18</sup> Aghi oia maulue iegħi, agħe matela, me tarala, maulue iegħi tale nau ekapaaili etoa, me aghi auunus kii etoa tale nimate me Hades.

<sup>19</sup> “Liuna avalua o me upiti elokoi sio saa voto angu tarala, voto ghaine me voto auena elutu.

<sup>20</sup> Katto ghajtu utarala tale nimagħi muenna atelange me ghajtu aitħi tinginane lam, malloxeen isaa avalua toko. Katto ghajtu, eaaimatoonga ensolo atoas<sup>§</sup> tale ghajtu ale manga, me ghajtu aitingina lam eaaimatoonga ghajtu ale manga.

## 2

### *Inangari tale ale manga ateva eIpses*

<sup>1</sup> “Upiti isaa toko inangari elao ta ensolo ateva \* tale ale manga ateva eIpses.

“Inangarina toko lo ateva eposoposo ghajtu katto tale nimane muenna atelange me ekasukku elome tale ghajtu aitingina lam lagħe għelejla tale gol.

<sup>2</sup> Akilakila għeeleiaam me uunguaam aħħana, me karika ugħe sio asoasoaa nau ugħe għala nimmarikana. Akilakila va karika ugħe anna sesa taumattu ngatoa. Ugħe tootoongainilala lo atoa la ue va apostolo ila o me karika, me ugħe kilala va la nim kamekame.

<sup>3</sup> Karika ugħe laa sio asoasoaa nau ugħe soula maate mausi ararighi eteae me karika ugħe mangħo.

<sup>4</sup> “Me isaa oia karika nga maamasiein poli ugħe kasu vulila aitħiutiu eteva niaielousi.

<sup>5</sup> Umene nnaa eaa ugħe tokatoka me angu għe katuu vulula ia o voto ateva. Unna ngaiophiġħihaa me ugħeilei llo ugħe għeelei ekasina. Arova utam nna ngaiophiġħihaa aue amae etam me aghħaa velu unem aitingina lam atea nongina etiħi tingina.

<sup>6</sup> Me kateva masi voto ugħeeleja ghulughuluena ia: Utam anna voto lo atoa la usilaa Nikolaos la għeelei, aghi tie atam anna.

<sup>7</sup> “Lo ateva talingane mannej tani nongo, aue enongo llo Spiriti eteva eaaulieinia tale ale manga atoa. Lo ateva eapala aue attau velua me enama uene ai maulue atea etiħi tingina tale umana paa ngutana atingiu God.”

### *Inangari tale ale manga ateva eSmena*

<sup>8</sup> “Upiti isaa toko inangari elao ta ensolo ateva tale ale manga ateva eSmena.

“Inangarina toko lo ateva aitħiutiu ia me airuuruu ia, għe matela, me għe mene sakesakela.

<sup>1:13:</sup> Den 7:13; 10:5.    <sup>‡ 1:13:</sup> kateva taumattu arova natuna ia taumattu ngateva Utara Deniol 7:13.    <sup>1:14:</sup> Esik 43:2; Den 7:9; 10:6; Aotu 2:18; 19:12.    <sup>1:16:</sup> Hib 4:12; Aotu 2:12; 19:15.    <sup>1:17:</sup> Ais 44:6; 48:12; Aotu 2:8; 22:13.

<sup>§ 1:20:</sup> ensolo atoa o tau ngai kasuua inangari eto.    <sup>2:1:</sup> Aotu 1:16.    <sup>\*</sup> <sup>2:1:</sup> ensolo ateva o tau ngai kasuua inangari eteva.    <sup>2:2:</sup> 1 Jon 4:1.    <sup>2:5:</sup> Aotu 3:3.    <sup>2:7:</sup> Aitħiutiu 2:9; Aotu 22:2, 19.

<sup>9</sup> Akilakila mmarikana uaateateaa me karika tue peipeina io me karika, ta tau peipeiena io. Akilakila va lo atoa la ue va ajiu ila o me karika, ta alena nivelu eitauua ila Satana, la aauliaa teeio.

<sup>10</sup> Urau mene matauta voto ange anna tani gheleio ummarikana. Aghauliaa kiem va Raroai eteva ange anna tani atoka sso katoa etaimim tale ale mata voovoo tani toooongainam, me aue ummarikana nau la ghelei voto karika masina aue eroo kasangaulu (10) nau. Uaikaaya ngakorokorongana arongona ta arova umate, me aue atau aatu kou nguru maulue ateva.

<sup>11</sup> “Lo ateva taligane manee tani nongo, aue enongo sa ateva Spiriti eteva eaaulieinia tale ale manga atoa. Lo ateva eapala karika aue eghaa sesa tale aiaaghluene atae nimate.”

*Inangari tale ale manga ateva ePegamom*

<sup>12</sup> “Upiti isaa toko inangari elao ta ensolo ateva tale ale manga ateva ePegamom.

“Inangarina toko lo ateva euunusi baenata ateva matarroke pai ekapa aluevilau.

<sup>13</sup> Akilakila eaa utokatoka, utokatoka tale voto ateva Satana eaaitarinia. Me karika, ta uaakoronna tale ararighi eteae, karika ughe oghi vulu aikaiaam etaghi nau tee ta nau Antipas, ghe aaulia ngakoronna inangarina akapa God, me laghe uvi emateala tale masalikim ateeae, masaliki taatara ia Satana etokatoka etana.

<sup>14</sup> “Me kasina voto karika amaamasiaa etam. Kasina taumattu elome etam, la posoposo parasi llo voto Baelam ghe apasungaala. Ghe apasungaala ta Balak vaalua tani kame alsraeli etoa me la ghelei ssavoto nau laghe namala inana laghe gheleila aiaavusuvusuena sae ta tootoo goto atoa etana, me laghe kupi tee ssola tale uunguua nialai salosalooa.

<sup>15</sup> Tale ia nonga o ase salana atikirighi katoa elome etam la aaimuli tee lo atoa laghe aaimuli tee inangarina Nikolaos.

<sup>16</sup> Liuna avalua o me unna ngaioghioghiaa poli arou mae parasi etam me aghaiuvii tee isaa o taumattu tale baenata ateva matarroke akapa pai eluevilau tale paaghi eteva.

<sup>17</sup> “Lo ateva taligane manee tani nongo, aue enongo sa ateva Spiriti eteva eaaulieinia tale ale manga atoa. Lo ateva eapala aue ataula kasina tani mena aisuliaane. Aue ataula tee atu eteva usousoana ia ouna atae arari pitipiti ia etana, karika teva aue ekila ia o arari eteae ta llo nonga ateva aue ghaaia.”

*Inangari tale ale manga ateva eTaeataera*

<sup>18</sup> “Upiti isaa toko inangari elao tale ensolo ateva tale ale manga ateva eTaeataera.

“Inangarina toko Natuna ateva God, matane arova kura atae eramerame, me kkena arova brasi ravaravaienaaili.

<sup>19</sup> Akilakila gheeleiaam, aailousiaam, aikaiaam, me niuungu ugheelei me karika usio asoasoaa nau ughe ghaaghaa nimmarike. Me tale isaa oia nau ugheelei oroieli voto elaulau voto ughe gheelei ekasina.

<sup>20</sup> “Me kasina llo karika amaamasiaa etam. Isaa avalua toko va, utautau velu ia o vause ateva Jesebel etana, eue va propete ia, tale voto eaapasunga, ekamekame kapughu tau ngai uungu etoa, la kupikupi sso tale uunguua nialai salosalooa me tani nama inana la gheelei sae aiaavusuvusuena etana tale tootoo goto atoa.

<sup>21</sup> Aghe taula nauna tani nna ngaioghioghiaa tale uunguuae nialai salosalooa see me karika eaaloanna.

<sup>22</sup> Liuna avalua o me aue aghalokoie sio tale komo nighaa mmarikana, me aue aghelei lo atoa la laolao etana aue la mmarikana saasakiaa, arova la tam nna ngaioghioghiaa tale uunguuae atoa.

<sup>23</sup> Aue auvi emate lo atoa la ghaaimuli teeia tale nimate ateeae. Me ila akapa ale manga atoa aue la kila va aghi lo ateva etaatara aikoliaa urunguita me nannaa, me aue aliu aioliimim kateva tale voto am gheelei.

<sup>24</sup> Me ta lo atoa ona eTaeataera am ghe tam aimuli teela llo ghe aapasunga, me karika am ghe annala tani kila voto la asease va “kanna voto Satana aisuliaane,” karika aue asaoaa sae mene righi maate etaimim.

<sup>25</sup> Isaa o voto etaimim, am poso parasi lomosi ta amae.

<sup>26</sup> “Ta lo ateva eapala me egheelei aaloannaaghi lomosi ta elaa ghaa airuuruu, aue ataula matutulienaa tani aitaraa mene katoa patunganua.

<sup>27</sup> “Me ia aue eaitoieinila tale aikkatulu etiulu aeana ia

**2:9:** 2 Ko 11:14-15; Autu 3:9.    **2:10:** 2 Tim 4:8; Jms 1:12.    **2:11:** Autu 20:14; 21:8.    **2:14:** Nam 22:1-25:3; 31:16;

2 Pita 2:15.    **2:17:** Eks 16:4, 14-15, 33-34; Jon 6:48-50; Ais 62:2.    **2:18:** Autu 1:14-15.    **2:20:** 1 Ki 16:31; 2 Ki 9:22.

**2:23:** Sams 7:9; Jer 17:10; Autu 20:12-13.    **2:25:** Autu 3:11.    **2:26:** Sams 2:8-9.

me aue eparu reerekatainila nongina sospena ateva gheelei ia tale kosa maramarakana,"  
nongina aghi aghe ghaala matuutulienia ta Tamaghi.

<sup>28</sup> Me aue atau teela katto pai eteva.

<sup>29</sup> Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.'

### 3

#### *Inangari tale ale manga ateva eSadis*

<sup>1</sup> "Upiti isaa toko inangari elao ta ensolo ateva \* tale ale manga ateva eSadis.

"Inangarina toko lo ateva eposoposo ghaitu (7) spiriti kanna God me ghaitu katto. Akilakila uunguaam, uunguaam egheelei taumattu la ghaannaa va maulue io, me karika, ta matena io.

<sup>2</sup> Anguu taatarala! Me uakorokorongana tuku airuuruu erighi niuungu, erau mate akapa. Karika aghe tarala righi voto ughe gheelei erooroaala ta matana kapughu Goto ateva.

<sup>3</sup> Annaa lao sio sa ateva ughe ghaaiela me ughe nongoala. Uaimulusi tee, me unna ngaioghiogliaa, me arova utam anguu taatara atoka, aue amae nongina teva tau niainao me karika aue ukila saa nau eteva aue arekata mae etam.

<sup>4</sup> "Ghaisa pai nonga kapum taumattu eSadis, karika laghe gheelei ekulukulutanala uneira aiaasae. Aue la kasu eitauaa teeieghi, me aue la aasae aiaasae ateva usousoana ia, poli masinaaili gheegheeliaairia.

<sup>5</sup> Lo ateva eapala aue easae aiaasae ateva usousoana ia nongina ila, me karika aue asei velu ararina tale vuku maulue ateva, me aue aghauliaia ta Tamaghi me kapuna ensolo atoa va kapughu ila.

<sup>6</sup> Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.'

#### *Inangari tale ale manga ateva ePiladelpia*

<sup>7</sup> "Upiti isaa toko inangari elao ta ensolo ateva tale ale manga ateva ePiladelpia.

"Inangarina toko lo ateva manga ia me koronna ia, eposoposo kii eteva ta Deivit, sa ateva eotia, karika teva erooro tani kavatia, me sa ateva ekavatia, karika teva erooro tani otia.

<sup>8</sup> Akilakila uunguaam. Tarala, ngaotila atamana ataeae ta matam, karika teva aue ekavatia. Akilakila va sarasarakaniaam ghaunaaili, me ughe aitaraa inangarighi me karika ughe ue va karika ukilakila ararighi eteae.

<sup>9</sup> Aue aghelei lo atoa tale alena ale nivelu eitaua ngateva Satana, la ue va ila ajiu ila, me karika va ajiu ila, ta tau nikamekame ila, aue agheleila la mae me la tturru sio tale lieu kkem, me aue la aulia ngaotu va aghailousieinio.

<sup>10</sup> Poli ughe tani aimuli usi tee inangari aghe aauliaa tani tingina akorokorongana nau ughaaghhaa nimmarikana, aue aghaitarainio tale nau nitootoonga emae tale kosa akapa ateva oia tani tootoonga lo atoa la tokatoka etana.

<sup>11</sup> "Ghaisa ngarighi amae. Isaa o voto etam, uposo parasi, me karika teva aue eghaa unem kou nguru eteva.

<sup>12</sup> Lo ateva eapala aue aghatinginaia nongina ttulu tale alena ale manga ateva kapughu Goto ateva, me karika aue ekasu vulia. Aue apiti epona etana ararina ataeae kapughu Goto ateva, me arari masalikina ataeae kapughu Goto ateva, ouna ateva Jerusalem, ekasu epona liu tale kapughu Goto ateva, me aue apiti tee ararighi eteae ouna ia etana.

<sup>13</sup> Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa.'

#### *Inangari tale ale manga ateva eLaodesia*

<sup>14</sup> "Upiti isaa toko inangari elao ta ensolo ateva tale ale manga ateva eLaodesia.

"Inangari toko inangarina lo ateva koronna ia, eaaulia ngakoronna inangarina akapa God, eaaitoiaa voto akapaaile God gheeleila.

<sup>15</sup> Akilakila uunguaam, karika va makarringe io o aanasa io, aghanina va ughele kateva etairarua.

<sup>2:28:</sup> Autu 22:16.    <sup>3:1:</sup> Autu 1:4, 16.    \* <sup>3:1:</sup> ensolo ateva o tau ngai kasuua inangari eteva.    <sup>3:3:</sup> Mat 24:43-44; Autu 2:5; 16:15; 1 Tes 5:2.    <sup>3:4:</sup> Jiud 23.    <sup>3:5:</sup> Eks 32:32-33; Mat 10:32; Luk 12:8.    <sup>3:7:</sup> Ais 22:22.    <sup>3:8:</sup> 1 Ko 16:9.    <sup>3:9:</sup> Autu 2:9.    <sup>3:10:</sup> Luk 21:19; 2 Tim 2:12.    <sup>3:12:</sup> Ais 62:2; 65:15; Autu 14:1; 21:2.    <sup>3:15:</sup> Rom 12:11.

16 Poli mala aanasa io, karika makarringe io me karika aanasa io, ghaisa ngarighi aue akanusu veluo ghoa ta paaghi.

17 Uue va, "Aghi tau peipeina aghi me ngaghele ghaa tokala peighi etoa, karika amene aloanna righi voto," me karika ukilakila va karika umasimasi, la aalousiusi mausim, karika righi peim, mata salusalu io me karika kaliom.

18 Aghaaulaa toooonga etam va upoli mae etaghi golo ateva laghe tungi er-aarangisaniela tale kura atae, me aue utau peipeina, me upoli usousoana ateva aiaasae tani asae runga tale vilikim, tani akou runga palata ateva etam, me upoli marasina mata ateva tani atokaia tale matam me aue utatara amasina.

19 "Lo atoa aghailousieinila aparuparula tale sesa gheegheleiaira va la masina. Am anna ngamasina me am nna ngaioghioghia.

20 Aghi toko atitingina tale atamana atae me amirimiri me akolokolo, arova lo ateva enongo lingi aloghu eteva me eoti atamana atae, aue akupi sso tani namanama teeia, me aue enamanama teeieghi.

21 "Ta lo ateva eapala aue aghauliaa etana tani toka sio teeieghi tale uneghi aitokatoka ateva unna ia king, nongina aghi aghe apalala me aghe toka teela Tamaghi tale unna aitokatoka ateva unna ia king.

22 Lo ateva talingane manee tani nongo, aue enongo sa ateva Spiriti eteva eaaulieinia tale ale manga atoa."

## 4

### *Aitokatokane ateva kingi epona liu*

1 Vara me aghe mene taatarala, me emua etaghi aghe tarala atamana atae ghe otioti etingina ia epona liu, me aghe nongola lingi ngalo ateva ngaghe nongoala amua arova taeu ateva ghe uela va, "Sae mae toko, me aghapasunga etam sa ateva aue elutu auena."

2 Arovaengaili ta Spiriti eteva ghe tokala etaghi me emua etaghi aghe tarala aitokatokane ateva kingi epona liu me kateva ghe tokatoka etana.

3 Me lo ateva ghe tokatoka, taataraane arova masi atu eteva la aseasea va jaspa ia me mene kateva masi ngatu raeraeana ia la aseasea va kanalien. Me renbo ateva eaaimatoonga kala ngateva soanna ia la aseasea va emerol, ghe taataliaa aitokatokane ateva kingi.

4 Mene ghaluengaulu ghaata (24) aitokatokane kingi uneira ghaluengaulu ghaata (24) namuu laghe taatalia ngatoka aitokatokane ateva kingi. Laghe molumolu tale ghinna usousoana me kou nguru laghe aatoka ta uruira, laghe gheleila tale gol.

5 Ravaravaia ateva ghe kasukasus tale aitokatokane ateva kingi, me palapalanga ateva ghe aakurrua. Emua tale aitokatokane ateva kingi ghaftue (7) lam ghe ramerame, isaa o ghaftu (7) spirit kanna God.

6 Me tee emua tale aitokatokane ateva kingi kateva voto taataraane arova manu eteva laghe gheleila tale ghalasi me masalaangeaili ia arova voto ateva la aseasea va kristol.

Ghaata (4) voto maulue laghe tokatoka elome, taliaa aitokatokane ateva kingi, mataira isaa emua me emuli.

7 Aititiutu eteva llo maulue ia arova laeoni eteva, aiaaghalua ateva arova taita ateva vulumakao, me aiaakotolu eteva matane arova taumattu ngateva, me aiaaghaatane ateva arova savaakoroara ateva eloooloo.

8 Kateva kateva ta ilaata o voto maulue ghaonomo (6) kaekaena, me ghe pasupasu tale mata atoa laghe taatalieinia, me laghe tokatoka pakeaa tee tale kaekaeira. Karika laghe ainoana ellaa me eleivoo tani ue va,

"Manga, manga, manga

Vau eteva God, sarasarakananaili ia,

ghe tokala me ie etokatoka me aue etoka tale nau too emaemae."

9 Me nau voto ghaata maulue la tautaula nitau sae inasanina me nikaili emasina ta lo ateva etokatoka tale aitokatokane ateva kingi, me etokatoka nau ekapa atoa,

10 ghaluengaulu ghaata (24) namuu la tuuturru sio tapaa kosa emua ta lo ateva etokatoka tale aitokatokane ateva kingi me la kakkauaa lo ateva aue etoka nau ekapa atoa. Me la atoka sio uneira kou nguru emua tale aitokatokane ateva kingi. Me la ue va,

11 "Vau ngepona ateva me kapuimami Goto ateva,

io urooroo va ughaa nitau sae me niioneoneaa me sarasarakanan

poli ughe gheleila voto akapaaili,  
me tale aloaloannaam laghe lutula  
nau ughe gheleilala.”

## 5

*Uru ngai eteva talitali ia me natu sipsipi erighi*

<sup>1</sup> Vara me aghe tarala nimane muenna atelange lo ateva ghe tokatoka tale aitokatokane ateva king, ghe posoposo uru ngai eteva pitipiti ekapa pai eluevilau laghe rrangasi rungainiela tale ghaitu airarrangasi. <sup>2</sup> Me aghe tarala ensolo ateva sarasarakanaiili ia ghe aippooa nganamungailila me ghe uela va, “See teva taumattu masinaaili urooroo tani ghelei evolovoloki llo laghe ghelei erungaala me uoti uru ngai eteva talitali ia?”

<sup>3</sup> Karika poi teva taumattu epona liu, me epona tale kosa ateva oia, me elo pakena etana, erooroo tani otu uru ngai eteva talitali ia me etaatara sso etana.

<sup>4</sup> Aghe tiuala tani ngala anamungaili poli karika poi laghe tarala teva taumattu masina erooroo tani otu uru ngai eteva talitali ia me tani taatara sso etana.

<sup>5</sup> Vara me kateva tana namuu ghe uela etaghi va, “Urau mene ngala! Tarala, laeoni eteva eaaimatoonga ararimangalina ateva Jiuda, tuvuna ia Deivit, ange apalala, erooroo tani otu uru ngai eteva talitali ia laghe rrangasi rungainiela tale ghaitu airarrangasi.”

<sup>6</sup> Me aghe tarala sipsipi erighi, taataraane va arova laghe uvi emateala, ghe tiitingina nongina aitokatokane ateva king, ghaata voto maulue me namu ngatoa laghe tokatoka talieinia. Ghaituae unna kom me ghaitu matana, ila o ghaitu Spiriti kapuna ila God ghe sungilala tani lao akapa see tale kosa ateva oia.

<sup>7</sup> Ghe mae sio me ghe ghaala uru ngai eteva talitali ia tale nimane muenna atelange lo ateva ghe tokatoka tale aitokatokane ateva king.

<sup>8</sup> Me nau eteva ghe ghaaiela, voto maulue ghaata me ghaluengaulu ghaata (24) namuu laghe tturru siola eeu tale natu sipsipi erighi, kateva kateva etaira laghe uunusi aikaukau me laghe uunusi tee pelete atoa gheeghelei tale golo me pasu tale voto tani ghelei asu eteva masi ngusungusuaane, isaa o voto kaluira pure kapuna taumattu ngatoa God.

<sup>9</sup> Me laghe ueila kkinari eteae ounaaili ia, eue va

“Io nonga masina io tani ghaa uru ngai eteva talitali ia

me ughelei evolovoloki airarrangasi

poli laghe uvi emateola me tale raem ateva ughe polila kapuna taumattu ngatoa God

tale ararimangali me tale ase nisama

me tale taumattu me tale patunganua akapa atoa.”

<sup>10</sup> Ugh gheleilala va la kingi me pristi tani uungu tale kapumami Goto ateva,  
me aue la aitaraa kosa ateva.”

<sup>11</sup> Aghe taatarala me aghe nongola lingi aloira ensolo atoa erooroo airari etoa, kasangaulu airari me mene orioieili kasangaulu airari etoa, laghe taatalia ngatoka voto maulue me namu ngatoa.

<sup>12</sup> Me laghe kikkinari enamungaili me laghe ue va,

“Natu sipsipi erighi laghe uvi emateala,

ia nonga erooroo tani tue peipeina me tani ghaa sarasarakanana,

nialomasaanga me nikorokoronganana,

me niioneoneaa me nikaili emasina me niarangise.”

<sup>13</sup> Vara me aghe nongola isaa akapaaili voto maulue epona liu me epona tale kosa ateva me elo pakena tale kosa ateva me elome tale paamanu eteva me isaa akapaaili voto atoa o laghe kikkinari sae etana,

“Lo ateva etokatoka tale aitokatokane ateva king me natu sipsipi erighi,  
aue lalu ghaa niarangise, niioneoneaa me sarasarakanana,

nau etoa me nau ekapa atoa.”

<sup>14</sup> Ghaata voto maulue laghe ue va, “Koronna.” Me namu ngatoa laghe tturru siola eeu me laghe kkaueinilalueia.

## 6

*Ghaitu airarrangasi laghe rrangasi rungaala uru ngai eteva talitali ia*

<sup>1</sup> Aghe tarala nau eteva natu sipsipi erighi ghe ghelei evolovolokila mua ateva tana ghaitu airarrangasi laghe rrangasi rungaala uru ngai eteva talitali ia, vara me aghe

nongola kateva tana ghaata voto maulue ghe samala nongina palapalanga ateva, ghe uela va, "Mae sio."

<sup>2</sup> Aghe taatara me aghe tarala ooso ateva usousoana ia. Lo ateva ghe iilou etana ghe posoposo bunara ateva, me kateva ghe tau lao sio kou nguru eteva etana, me ghe iilou nongina lo ateva ange apalala niaiuvii me eaaloanna tani mene apala.

<sup>3</sup> Nau eteva natu sipsipi erighi ghe ghelei evolovolokila aiaaghalaene ateva airarrangasi laghe rrangasi rungaala uru ngai eteva talitali ia, me aghe nongola ghaluene ateva voto maulue ghe uela va, "Mae sio."

<sup>4</sup> Vara me mene kateva ooso ghe mae sio, raeraeana ia nongina ramerame kura atae. Lo ateva ghe iilou etana, kateva ghe tau lao sio sarasarakana tani ghaa velu luei tale kosa ateva, me tani ghelei taumattu ngatoa la toka aiuvieinila, me tee ghe tau lao sio baenata ateva namungaili ia.

<sup>5</sup> Nau eteva natu sipsipi erighi ghe ghelei evolovolokila kotonna ateva tana airarrangasi laghe rrangasi rungaala uru ngai eteva talitali ia, aghe nongola aiaakotonna ateva voto maulue ghe uela va, "Mae sio." Aghe taatara, me aghe tarala voovongienra ateva ooso. Lo ateva ghe iilou etana ghe posoposo sikeli eteva tani ghaa maamaataniaa voto. <sup>6</sup> Vara me aghe nongola lo ateva ghe angarila nonginaaili lingi ngalo ateva elome tale ghaata voto maulue, ghe ue va, "Kateva beke uiti eroo kateva silva koen," me kotolu beke bali erooroo tee kateva silva koen, me karika umene ghelei saasakiaa oeli me uaeni."

<sup>7</sup> Nau eteva natu sipsipi erighi ghe ghelei evolovolokila aiaaghaataane ateva airarrangasi laghe rrangasi rungaala uru ngai eteva talitali ia, aghe nongola lingi ngalona ateva aiaaghaataane ateva voto maulue ghe uela va, "Mae sio."

<sup>8</sup> Aghe taatara me aghe tarala ooso ateva taataraane nim mala usousoana ia. Lo ateva ghe iilou etana la kolokoloa va Nimate, me Hades ghe aimuli ekalakala ngatoka etana. Me kateva ghe tau lao sio etairarua matuutulienra tale tuku kateva tale pai ghaata tale kosa ateva, tani aiuvi emate tale baenata, maloo me isiki, me llo ghaata kkena karika la aitaraa tale kosa ateva.

<sup>9</sup> Nau eteva ghe ghelei evolovolokila ghalimane ateva airarrangasi laghe rrangasi rungaala uru ngai eteva talitali ia, aghe tarala elo pakena tale liu nighelei aiaavusuvusuena ateva, taumattu laghe uvi emate poli inangarinra ateva God me tale kiukiu laghe aaulia ngaotu.

<sup>10</sup> Laghe sama anamungailiila, laghe uela va, "Vau palepale eteva, manga io me koronna io, lovissa eghaa nau umae ghelei niaiskei tale taumattu tale kosa ateva me uliu lao ta lo atoa laghe gheleila raemami ghe akalala?"

<sup>11</sup> Me kateva kateva etaира ghe ghaala aiaasae ateva usousoana ia. Me God ghe uela etaира va la toka toitoi mene righi mua nau, lomosina ta la uvi emate kasina aruu tana tau ngai uungu me tau ngaisoea ngatoa nongina ila tani rooaa isaa o voto.

<sup>12</sup> Nau eteva ghe ghelei evolovolokila aiaaghaonomina ateva airarrangasi laghe rrangasi rungaala uru ngai eteva talitali ia, me kinatama rukeruke ateva, me sinaka ateva ghe voovongienala nongina teva aiaasae la ghaasae tale nau nialousiusi, laghe gheleila tale uu meemee, me ulana akapa ateva ghe raeraeanala nongina rae,

<sup>13</sup> me katto atoa laghe katuula elomarase me laghe sio mae tale kosa ateva, nonginaaili uene fig atea ghe tam matue me ekaokao nau eteva kinatama kuukuu eteva.

<sup>14</sup> Elomarase ghe aikakapakapaiila nongina uru ngai talitali eteva la talitalia. Patunganua akapa atoa me motouru ekapa atoa laghe kasu vulila nongina laghe tokatoka.

<sup>15</sup> Me ila akapa kingi tale kosa ateva, namu ngatoa, tau ngai toitoi tale tau ngai uvii etoa, tau peipeina atoa, sarasarakana atoa, lo atoa la uungu karika la tokatoka tale aloannaaira, me lo atoa la nim tokatoka tale aloannaaira, ila akapa laghe aaisulia tale lienga me tale kinatama atu etoa tale motouru,

<sup>16</sup> me laghe kolokolo lao tale motouru etoa me tale atu etoa va, "Am katuu saoaa etaimami me am aisileinamami tale lo ateva etokatoka tale aitokatokane ateva kingi me tale sessaiaane natu sipsipi erighi,

<sup>17</sup> ta poli kinatama nau eteva sessaiaairarua ange mae sio, me see aue eroo tani tingina akorokorongan?"

<sup>1</sup> Vara me aghe tarala ensolo ghaata laata ghe tiitingina tale aighoughou ghaata tale kosa ateva. Laata ghe posoposo parasi etoka kuukuu ghaata tale kosa ateva tani ghelei erunga ase kuukuu etoa va la rau mene kuu saasakiaa elae me tale paamanu me epona tale ai etoa.

<sup>2</sup> Vara me aghe tarala mene kateva ensolo ghe kasula tale pai sinaka esae ativilau, ghe posoposo aimatootoongana ateva unna ia God. Ghe kolokolo anamu lao sio tale ensolo ghaata laata ghe posoposo sarasarakanana tani ghelei saasakiaa kosa ateva me paamanu eteva.

<sup>3</sup> Ghe ue va, “Karika am mene ghelei saasakiaa kosa ateva me paamanu eteva me ai etoa, lomosina ta ami atoka aimatootoongana tale patilakaira kapuna tau ngai uungu etoa kapuita Goto ateva.”

<sup>4</sup> Vara me aghe nongola kateva ghe asela lo atoa laghe ghaala aimatootoongana ateva kanna ia God; kateva ai me ghaatingaulu ghaata airari (144,000) taumattu tale ila akapa ararimangali etoa Israeli.

<sup>5</sup> Tale ararimangalina ateva Jiuda, 12,000 taumattu laghe ghaala aimatootoongana ateva kanna ia God,

me tale ararimangalina ateva Ruben, 12,000,

me tale ararimangalina ateva Gad, 12,000,

<sup>6</sup> me tale ararimangalina ateva Asa, 12,000,

me tale ararimangalina ateva Naptalae, 12,000,

me tale ararimangalina ateva Manasa, 12,000,

<sup>7</sup> me tale ararimangalina ateva Simion, 12,000,

me tale ararimangalina ateva Livae, 12,000,

me tale ararimangalina ateva Isika, 12,000,

<sup>8</sup> me tale ararimangalina ateva Sebulon, 12,000,

me tale ararimangalina ateva Josep, 12,000,

me tale ararimangalina ateva Benjamin, 12,000.

*Oroieili taumattu ngatoa laghe molumolu tale usousoana aiaasae*

<sup>9</sup> Vara me aghe tarala taumattu ngatoa oroiennaaili ila, karika teva erooroo tani ioila, tale anua atoa, me tale ararimangali etoa, me tale taumattu ngatoa, me tale aseasee nisama atoa, laghe tiitingina emua tale aitokatokane ateva kingi me emua tale natu sipsipi erighi. Laghe aasae aiaasae usousoana me laghe posoposo laa ootou ta nimaira.

<sup>10</sup> Me laghe tautau sae ararina atea God me laghe ue va,

“Salana tani saanga kanna kapuita Goto ateva,

ia etokatoka tale aitokatokane ateva kingi,

me tee natu sipsipi erighi.”

<sup>11</sup> Ensolo atoa laghe tiitingina talia aitokatokane ateva kingi me laghe tiitingina talia namu ngatoa me ghaata voto maulue. Ila akapa laghe tuuturru siola euu tani kkaua God.

<sup>12</sup> Laghe ue va,

“Koronna!

Nitau sae, me inasanina

me nialomasaanga me nikaili emasina me niioneoneaa

me nisarasarakana

elao ta kapuita Goto ateva aue etoka nau ekapa atoa.

Koronna!”

<sup>13</sup> Vara me kateva tana namuu ghe kolomieghila va, “Lo atoa la molumolu tale usousoana — see ila, me eaa laghe kasula?”

<sup>14</sup> Aghe liula me aghe uela va, “Vau eteva, ukilakila.”

Me ghe uela va, “Lo atoa ona laghe kupi ghhoa mae tale kinatama nau sesaaiili. Laghe porala ghinnaniira me laghe ghelei eusousoanalala tale raena ateva natu sipsipi erighi.

<sup>15</sup> Liuna avalua o me,

“la tiitingina emua tale aitokatokane ateva God,

me la uungu ta ngetana llaa me voo elome tale alena ale manga ateva;

me lo ateva etokatoka tale aitokatokane ateva king aue epule me eakoula tale unna

kandisi eteva.

<sup>16</sup> Karika aue la mene maloo,

karika aue la mene kangngata,

sinaka ateva karika aue epalangila,

me karika aue esinaki ekulukulukila.

<sup>17</sup> Ta natu sipsipi erighi elome tale aitokatokane ateva king aue kapuira tau ngai toitoi ia, aue ekasueinila lao tale ateo akaakala atoa tokatoka liu ila, me God aue esei velu rarum mata tale mataira.”

## 8

*Ghaituna ateva airarrangasi gheeghelei runga ia me aikaai niaiaavusuvusuena ateva*

<sup>1</sup> Nau eteva ghe ghelei evolovolokila gaituna ateva airarrangasi laghe rrangasi rungaala uru ngai eteva talitali ia, me epona liu karika righi niamasamasaanga ghaisa ngarighi ghe roo pai kativilau tale kateva aoa.

<sup>2</sup> Me aghe tarala gaitu (7) ensolo nau ekapa atoa la tiitingina emua ta God, me laghe tau lao sio gaitu taue etaira.

<sup>3</sup> Kateva tana ensolo ghe uunusi aikaai niaiaavusuvusuena gheegheleia tale gol, ghe mae sio me ghe tingina valaala tale liu nigheli aiaavusuvusuena ateva. Laghe tau lao sio oroiennaili voto tani ghelei masi ngusungusuaane tani ghelei aiaavusuvusuena, me tee kaluira nilooloo sae kapuna taumattu ngatoa God epona tale olta ngateva gheelei ia tale gol emua tale aitokatokane ateva king.

<sup>4</sup> Asu niaiaavusuvusuena ateva me kaluira nilooloo sae kapuna taumattu ngatoa God laghe saela ta God tale aikaai niaiaavusuvusuena ateva ensolo ateva ghe uunusia.

<sup>5</sup> Vara me ensolo ateva ghe ghaala aikaai niaiaavusuvusuena ateva me ghe kaaila kura atae tale liu nigheli aiaavusuvusuena ateva me ghe kao velue siola tale kosa ateva, me palapalanga ateva ghe akurruela, me ravaravaia ateva ghe ravaiela me ghe rukela kosa ateva.

### *Gaitu taue*

<sup>6</sup> Vara me gaitu ensolo laghe posoposo gaitu taue laghe aipanipaniaala tani vuu.

<sup>7</sup> Aitiutiu eteva ensolo ghe vuula unna ateva tani taue, me vaoo ateva korokoronganiane nongina atu, me kura atae, me rae ateva, lotolu ghe mae aitauaa sio tale kosa ateva, nau laghe sau velu sio mae tale kosa ateva. Me ghe atala aiaakotolu etivilau pai tale kosa ateva me tee ghe atala aiaakotolu etivilau pai tale ai etoa me rarrasa akapa atoa maulue ilia.

<sup>8</sup> Aiaaghaluene ateva ensolo ghe vuula unna ateva taue, me kinatama voto ateva arova motouri eteva ghe rameala me ghe velue ghoala elamana, me aiaakotolu etivilau pai tale manu eteva ghe raela,

<sup>9</sup> me aiaakotolu etivilau pai tale voto atoa maulue ila tale paamanu eteva laghe matela, me aiaakotolu etivilau pai tale paanaka atoa me anua atoa tale ia o paamanu eteva laghe turungilala.

<sup>10</sup> Aiaakotonna ateva ensolo ghe vuula unna ateva tani taue, me kinatama katto ateva ghe katuu sio mae eunaakookoo, mallangina ateva nonginaaili teae usulu ghe ramerame, ghe sio mae tale aiaakotolu etivilau pai tale kinatama ateo akaakala atoa, me tale lutu ateo atoa.

<sup>11</sup> Katto ateva ararina atae ta Kaakaalina. Aiaakotolu etivilau pai tale ateo atoa ghe kaakaalinala, me oroieli taumattu ngatoa laghe matela tale manu kaakaalina.

<sup>12</sup> Aiaaghaatane ateva ensolo ghe vuula unna ateva taue, me aiaakotolu etivilau pai tale sinaka ateva, me ulena ateva me katto atoa, laghe saurromla, me aiaakotolu etivilau pai tale llaa karika ghe mallangala, me tee aiaakotolu etivilau pai tale voo ngateva karika ghe mallangala.

<sup>13</sup> Vara aghe toka taatara me aghe nongola savaakoroara ateva ghe looloo elomarase me ghe ovaova ghe ue va, “Alousiusi, alousiusi, alousiusi ta lo atoa am tokatoka tale kosa ateva oia, poli sa ateva aue elutu etaimim nau eteva ensolo kotolu airuuruu lotolu vuu uneirotolu taue.”

## 9

<sup>1</sup> Aiaaghalima ateva ensolo ghe vuula unna ateva taue, me aghe tarala katto ateva ghe katuu sio mae eunaakookoo me ghe sio mae tale kosa ateva, laghe tau lao sio kii eteva pei tale liu eteva karika righi aioghioghi etana.

<sup>2</sup> Nau eteva ghe otala liu eteva, asu eteva ghe sae mae nongina va asu kinatama nginei eteva. Sinaka ateva me elomarase ghe saurromla tale asuna ateva liu eteva.

<sup>3</sup> Me tale asu eteva toto atoa laghe sio mae tale kosa ateva me laghe tau lao sio sarasarakania ta toto atoa nongina sarasarakaniaa onioni tale kosa ateva. <sup>4</sup> Laghe uela

**7:17:** Ais 25:8; Sams 23:2; Autu 21:4.    **8:3:** Autu 5:8; Eks 30:1-3.    **8:5:** Lev 16:12; Eks 19:16-19; Autu 11:19; 16:18.

**8:7:** Esik 38:22; Joel 2:30; Eks 9:23-26.    **8:11:** Jer 9:15.    **8:12:** Esik 32:7; Autu 6:12-13.    **8:13:** Autu 9:12; 11:14.

**9:1:** Autu 20:1.    **9:2:** Aitiutiu 19:28; Joel 2:2, 10; Eks 10:12-15.    **9:4:** Autu 7:3.

etaira va la rau mene tturuu rarrasa me voto epiipinosa me ai etoa tale kosa ateva. La tturuu nonga taumattu ensolo ateva karika ghe atokala unna aimatootongana ateva God tale patilakaira.

<sup>5</sup> Karika laghe tau lao sio sarasarakanana tani uvi ematela, ta la nim toka gheelei emmarikanaila tale ghalima ulana, me nimmarikana la ghaa aue nongina onioni eteva eonioni.

<sup>6</sup> Tale isaa o nau, taumattu aue la pae nimate me karika aue egħaaila, me aue la alonaaili tani mate, me nimate ateva aue eilou vulila.

<sup>7</sup> Toto atoa taataraira nongina ooso atoa la aimanomanosiaa tani laa aiuvii. Epona tale uruira la aatoka voto nongina kou nguru etoa gheegħelei tale gol, me mataira akpa atoa nongina mataira taumattu ngatħo.

<sup>8</sup> Uu ngurura nongina uu ngurura vause atoa, me ngalungaluira nongina ngalungalu laeoni.

<sup>9</sup> Aigħelei runga kassauira nongina llo aigħelei runga kassauira taumattu ngatħo għeegħelei tale aeana, me lingi kaekaeira għe aangari nongina oroieili ooso atoa la aeae aċ-ċiġlu la iilou tani laa aiuvii.

<sup>10</sup> Ujira nongina onioni eteva eonioni, me sarasarakaniaira etokatoka tale uiira tani għelei saasakia taumattu ngatħo erooroo għalima ulana.

<sup>11</sup> Kapuira kingi eteva eaġitara ngakapaila, ia o ensolo ateva tale liu, ararina atae ġi inangari nge Hibru la ue va Abaddon, me ta Grik la ue va Apolion.\*

<sup>12</sup> Aitiutiu eteva sesa nau ang għe lange sio, me kasi għalua sesa nau karika lalu għe mae.

<sup>13</sup> Aiaagħaonomina ateva ensolo għe vuula unna ateva taue, me agħe nongola lingi ngalo ateva għe mae sio tale għaata aissopiaa tale olta ngateva għeħelei ia tale gol nongina God etokatoka.

<sup>14</sup> Għe ue tale aiaagħaonomina ateva ensolo għe uunusi taue ateva va, “Tau vella ensolo għaata la għe iri etokkalaatala tale kinatama ateo akaakala atħeqx eluppreit.”

<sup>15</sup> Me ilaata o ensolo għaata laata għe nim toka aimanomanosiaa tale ia o aoa ngateva, nau eteva, ulana ateva me ninamanama atħxae, lagħe tau vellaata tani uvi emate taumattu tale aiaakotolu etiġilu pailek kosa ateva.

<sup>16</sup> Isaa akapaaili tau ngai uvu ħażi iilou tħalli oħoso agħe nongola erooroo 200,000,000.

<sup>17</sup> Tale uneħgi nitaatara atħxae agħe tarala avalu toku va: ooso atoa me lo atoa la għe iilou etaira, uneira aigħelei runga kassauira raeraeana nongina kura atħxae me savuluvulungana me talakien nongina salpa ngateva, uruira ooso atoa taataraira nongina uruira laeoni etoa, me kura me asu me salpa għe ghoo ta paaria.

<sup>18</sup> Aiaakotolu etiġilu pailek tħalli kosa ateva lagħe uvi ematelala tale kotolu voto sesa: kura me asu me salpa għe ghoo ta paaria.

<sup>19</sup> Sarasarakaniaa ooso atoa isaa ta paaria me ta uiira, poli uiira nongina katu ngatħo, uruira atoa għe aavakovako taumattu ngatħo.

<sup>20</sup> Me llo taumattu karika għe matela tħalli maate ooso atoa lagħe għeħeila etaira, lagħe ratirati tħalli nna ngaiophiġħiaa tale kaluira sesa niuungu lagħe għeħelei ta nimairi; karika lagħe ruu tħalli kkauua raroai etoa, me toto atoa għeħelei tale għol me silva me brasi me āi, toto atoa karika la rororo tħalli tħalli kura nongħo me karika la aħxaġi.

<sup>21</sup> Me tee karika lagħe nna ngaiophiġħiaala tale kaluira niaiuvi emate, me nialala, me unguua nialai salosaloo see, me niaināo.

## 10

### *Ensolo ateva me għauna arighi skrol*

<sup>1</sup> Vara me agħe tarala mene kateva ensolo sarasarakanāiia ia għe sio mae epona liu. Għe molumolu tale urukookoo, me renbo ateva epona tale uruna ateva, me matane għe maamallanga nongina mallangi sinaka ateva, me kkena aluelange nongina ttulu eluulu lalu għe ramerame nongina kura atħħata atħxae.

<sup>2</sup> Għe posoposo atingina ta nimane natu uru ngai eriġi la aseasea va skrol, otio tiegħi. Għe atingina għoala kkena muenna atelange elamana me kkena uaise atelange għe atinginaiela elae,

<sup>3</sup> me għe aore anamungailiila nongina teva laeoni. Nau eteva għe aorela, lingi ngaloira għajtu palpalangha lagħe samala.

<sup>4</sup> Nau ghaiut palapalanga laghe samala me ngaghe aainasiaa tani pitipiti, me aghe nongola lingi ngalo ateva epona liu ghe uela va, "Ghelei rungaala vuku eteva, karika umene piti llo ghaiut palapalanga laghe auliaala."

<sup>5</sup> Vara me aghe tarala ensolo ateva ghe tiitingina elamana me elae ghe ssuua saela nimane muenna atelange epona liu.

<sup>6</sup> Me ghe aulia ngakoronna saela ta lo ateva tokatoka liu ia, ghe gheleila epona liu me isaa akapaaili voto etana, me kosa ateva me voto akapa etana, me paamanu eteva me voto akapa etana, me ghe uela va, "Karika aue mene righi niaiolateaa!"

<sup>7</sup> Ghaituna ateva ensolo aue evuu unna ateva tana tau, me isaa o nau, voto aisulianna kanna God aue elutu ekapa, nongina ghe aulia ngaotula tale kapuna tau ngai nonganongo anna atoa, propete ila."

<sup>8</sup> Vara me aghe nongola lingi ngalo ateva aghe nongo amuela epona liu ghe mene aippooaa teeieghila, ghe uela va, "Kasula me ulaa ghaa skrol ateva otioti ia ta nimane atelange ensolo ateva etiitingina elamana me elae."

<sup>9</sup> Me aghe lao sio tani kolomi ensolo ateva va etau mae natu skrol ateva. Ghe uela etaghi va, "Ghaaiela me unamaia. Aue eghelei kovam ateva esesa, me tale paam ateva aue onose nongina iruena ateva."

<sup>10</sup> Aghe ghaala natu skrol arighi ta ensolo ateva me aghe namaiela, namina onoseaili ta paaghii nongina iruena ateva, me ta kovaghi eteva ghe sesala.

<sup>11</sup> Vara me ghe mene uela etaghi va, "Umene ppooa ngaotu inangarina God ta taumattu ngatoa, me patunganua atoa, me asease nisama atoa me kingi etoa."

## 11

### *Uitnesi elua*

<sup>1</sup> Me kateva ghe tau mae sio aitootoongi eteae arova aikkatulu etiulu. Me God ghe uela etaghi va, "Laa toongi alena ale manga ateva God me liu nighelei aiaavusuvusuena ateva, me uira tau ngai kkaua ngatua.

<sup>2</sup> Me urau mene toongi ale ngeleka atiulu tale ale manga ateva, poli aghe tauela ta tau ngeleka atoa. Aue la sapeleaa masaliki taatara ateae manga ia ta ghaatingaulu ghalua (42) ulana.

<sup>3</sup> Me aue ataula sarasarakana ta kapughu uitnesi elua, aue lalu asae ghinna nialousiusi, me aue lalu aulia ngaotu inangarighi eroo kateva airari ghalua ai me ghaonomongaulu (1,260) nau."

<sup>4</sup> Ilalua oliv ai ilalua, me aitingina lam ilalua lalu tiitingina emua ta Vau eteva eaitaraa kosa ateva.

<sup>5</sup> Arova teva eaanna tani ghelei saasakiaa etairarua, kura ateae aue ekupi ghoa ta paairarua, me eata akapa tau ngai ssateirarua atoa. Lo ateva eaanna tani ghelei saasakiaa etairarua, aue emate avalua o.

<sup>6</sup> Ilalua o taumattu ngalua sarasarakana ilalua tani ghelei runga eunaakookoo me karika emene vaao tale nau lalu aulia ngaotu inangarina God. Me sarasarakaniaairarua erooro tani ghelei manu ekoli lao tale rae, me tani ghelei asease sesa tale kosa ateva tale aaloaloannaairarua.

<sup>7</sup> Nau lalu ruu ekapaaili tani auliaa voto God ghe taula va lalu auliaa, kinatama ghaata kkena ateva aue ekasu tale liu eteva karika righi aioghioghi etana, aue euateilalua, me evui ematelalua.

<sup>8</sup> Aue evui emate alokoilaluelu tapaa salana tale masaliki taatara ateae matuutulienia ia, eaaimatoonga eSodom me eljip. Tale ia o voto ateva, Vauirarua ateva laghe avukalaie saela tale akotoo.

<sup>9</sup> Aue eroo kotolu nau me pai kativilau tale mene kateva nau, isaa akapa taumattu tale anua atoa, me tale ararimangali etoa, me tale taumattu ngatua, me tale asease nisama atoa aue la tara vilikiirarua, me karika aue la ghanna tani kiaeinilalua.

<sup>10</sup> Me taumattu etokatoka tale kosa ateva oia aue la masimasi me la ghelei maakiikii mausirarua. Aue la ghaftauaa masi voto atoa elome etaira, poli ilalua o propete alua lalu ghe taula nimmarikana ta taumattu tale kosa ateva oia.

<sup>11</sup> Vara kotolu nau me pai kativilau tale mene kateva nau ghe lange sio, me God ghe mene tau lao sio ainoaa maulue etairarua, me lalu ghe tingina saela, me nimoia ghe ghaala lo atoa laghe tarailaluelu.

<sup>12</sup> Me lalu ghe nongola kinatama lingi ngalo ateva ghe kaurekatila epona liu me ghe uela etairarua va, "Amalu sae mae toko." Me lalu ghe saela epona liu tale urukookoo ateva nau tau ngai ssateeirarua atoa laghe taatara.

<sup>13</sup> Me tale ia nonga o nau eteva, kinatama rukeruke ateva ghe tturuula aiaakasangaulu etivilau pai tale masaliki taatara atae. Ghaitu airari (7,000) taumattu rukeruke ateva ghe uvi ematela. Me lo atoa laghe saangala laghe matautula me laghe tau saela God epona liu.

<sup>14</sup> Aiaaghaliene ateva sesa nau ghe lange sio, me aiaakotonna ateva ghaisa ngarighi emae.

### *Aiaaghaitu eteva taue*

<sup>15</sup> Aiaaghaitu eteva (7) ensolo ghe vuula unna taue ateva me kinatama lingi ngalo atoa epona liu laghe uela va,

"Sarasarakana tani aitaraa kosa akapa ateva ange tokala tale aitaraane kapuita Vau ngepona me kapuna Mesaea ngateva,  
me aue eaioiaa nau ekapa atoa."

<sup>16</sup> Me ghaluengaulu ghaata (24) namuu laghe tokatoka tale uneira aitokatoka atoa king, emua ta matane God laghe tturru siola euu me laghe kkauaala God.

<sup>17</sup> Laghe ue va,

"Ami kaakaili emasina etam, Vau ngepona God sarasarakanaili io,  
lo ateva utokatoka me ughe tokala arau,

poli angu ghe ghaala kinatama sarasarakaniaam  
me angu ghe tiauala tani aitoiaa kosa ateva.

<sup>18</sup> Patunganua atoa ghe sessailala,  
me sessaiaam ange rekatala.

Ange naua tani ghelei niaiskei ta matena atoa  
me kapum tau ngai nonganongo anna atoa propete ila, la ghaa aipoliira,  
me lo atoa kapum manga ila me lo atoa la oneoneaa ararim atae,  
me tee lo atoa tue peipeina ila me lo atoa karika.

Me ange naua tani tturruu lo atoa la tutturuu kosa ateva."

<sup>19</sup> Me alena ale manga ateva God epona liu ghe otiela me elome tale ale manga ateva aghe tarala vokisi eteva aikaii inangari niaippooa ngaitauua. Ravaravaia ateva, kurruna palapalanga ateva, rukeruke ateva, me kinatama ttasi vaoo ateva korokorongana ia nongina atu ghe sio mae.

## 12

### *Vause ateva me otuena ateva*

<sup>1</sup> Kinatama niaimatootoongana ateva ghe kauerekatila elomarase. Vause ateva ghe aitiitii tale sinaka ateva, me ulana ateva ghe tokatoka tale pake lapalapa kkena, me kou nguru eteva ta uruna erooroo kasangaulu ghalua (12) katto etana.

<sup>2</sup> Vause ateva ghe kakkaai natuna ateva. Nauna tani molenaa me ghe piipii etingina poli ghe anoonongi etingina ia.

<sup>3</sup> Mene kateva niaimatootoongana ghe kauerekatila elomarase. Kinatama otuena ateva raeraeana ia, ghaitu uruna me unna kom kasangaulu me ghaitu kou nguru tale ghaitu uruna.

<sup>4</sup> Ghe leeala uina atiulu me ghe paru velu sio mae aiaakotolu etivilau pai tale katto atoa, me laghe katuu sio mae tale kosa ateva. Otuena ateva ghe tinginala emua ta vause ateva nau ange aloanna tani molenaa, poli ghe aaloanna tani olomi aliki eteva nau eteva elutu.

<sup>5</sup> Vause ateva ghe molenaala aliki erighi taita ia, ia aue emuemua ngakapa anua atoa, me aue epaso aikkatuluira atiulu kingi etoa aeana ia. Me gharavaeataaili ta aliki eteva ensolo ateva ghe ghaiae saela epona liu tani toka tee God tale unna aitokatoka ateva king.

<sup>6</sup> Vause ateva ghe iloula ghe ssola tale voto ateva karika righi taumattu etana. God ghe aimanomanosieiniela va elaa toka etana, me aue eitarainia erooroo kateva airari, ghalua ai me ghaonomongaulu (1,260) nau.

<sup>7</sup> Me niaiuviit eteae ghe tiauala epona liu, Maekol me kapuna ensolo atoa laghe aiuvii teela otuena ateva me kapuna atoa tani ensolo.

**11:12:** 2 Ki 2:11.    **11:13:** Atou 6:12; 16:18.    **11:14:** Atou 9:12.    **11:15:** Eks 15:18; Sams 10:16; Den 2:44; 7:14.

**11:18:** Sams 110:5; Rom 2:5; Atou 20:11-13; Sams 115:13.    **11:19:** Hib 9:4; Atou 8:5; 15:5; 16:21.    **12:2:** Maeka

4:10.    **12:3:** Den 7:7.    **12:4:** Den 8:10.    **12:5:** Sams 2:9; Atou 19:15.    **12:7:** Ijud 9.

<sup>8</sup> Poli otuena ateva karika sarasarakana ia, ia me kapuna atoa ensolo, laghe sau vella sio mae epona liu.

<sup>9</sup> Kinatama otuena ateva laghe sau velue sio mae la kolokoloa va Raroai eteva me Satana, ghe kamela kosa akapa ateva, ia me kapuna ensolo atoa laghe sau velu eitaueinila sio mae tale kosa ateva.

<sup>10</sup> Me aghe nongola lingi ngalo ateva namungaili ia epona liu, ghe uela va,  
“Isaa oia nisaanga, me sarasarakaniaane ararimangalina ateva God ange mae sio,  
me aaitoiaane kapuna Mesaea ngateva.

Lo ateva eaatingina kapumami etoa tale niaisakei,  
eaatinginaila tale niaisakei ta matane God, llaa me voo,  
ia o laghe sau velue sio mae.

<sup>11</sup> Laghe apalaiela  
tale raena ateva natu sipsipi eteva,  
me tale inangari ateva laghe aulia ngaotu.

Poli karika laghe annala maamauluaaira,  
karika laghe matautula tani mate.

<sup>12</sup> Liuna avalua o am masimasi lo atoa am tokatoka epona liu,  
me nialousiusi aue etoka tale kosa ateva me paamanu eteva,  
ta raroai eteva ang ghe sio mae etaimalua.

Sessaiane namungaili,  
poli ekilakila va nauna tukunaaili.”

<sup>13</sup> Nau eteva otuena ateva ghe tarala va angila ghe sau velue sio mae tale kosa ateva,  
ghe usila vause ateva ghe molenaala aliki eteva taita ia.

<sup>14</sup> Vause ateva laghe tau lao sio kaekaena alua nongina kaekae savaakoroara ateva va eloo elao tale voto ateva angila ghe aimanomanosieiniela va elaa toka etana karika righi taumattu etana. Me aue la aitarainia tale nau, nau etoa me pai kativilau tale nau eteva,  
me karika otuena ateva eroo tani ghaaia.

<sup>15</sup> Otuena ateva ghe luela manu eteva tale paana ateva nongina ateo atae eakaakalaatani akalaa velu vause ateva.

<sup>16</sup> Me kosa ateva ghe sausila vause ateva, me ghe otira paane ateva me ghe ropi ematiila ateo atae, otuena ateva ghe lueiela tale paane ateva.

<sup>17</sup> Me otuena ateva ghe sessaieiliela ta vause ateva, ghe lao sio tani aiuvii tee natuna atoa vause ateva, lo atoa la aaimuli usi tee inangari nipaopao kannna God me la sarasarakana tani aimuli tee inangarina ateva Iesu.

<sup>18</sup> Me otuena ateva ghe tinginala \* elosamarra.

## 13

*Ghaata kkena ateva ghe kauerekatila etapaa manu*

<sup>1</sup> Me aghe tarala ghaata kkena ateva ghe pangus sae mae etapaa manu erooroo kasangaulu (10) unna kom, ghaitu (7) uruna me kasangaulu kou nguru tale unna kom. Me kateva kateva uruna pitipiti asease inangari etoa tani auliaa va ia Goto ia.

<sup>2</sup> Ghaata kkena ateva aghe taraiela marova lepod ateva, kkena nongina kkena beaa ngateva, me paane ateva nongina laeoni eteva. Otuena ateva ghe tau vella ia o ghaata kkena ateva tani ghaa sarasarakaniaane me matuutulienia.

<sup>3</sup> KATEVA URUNA LAGHE AVAKOAKOLA ME GHE MENE MASINALA. TAUMATTU NGAKAPA ATOA LAGHE OUNALA TANI TARAIJA ME LAGHE USIELA.

<sup>4</sup> TAUMATTU NGATOAA LAGHE KAKKUAQA OTUENA ATEVA POLI GHE TAU LAO SIO MATUUTULIENIA TA GHAATA KKENA ATEVA, ME LAGHE KAKKUAQA TEE GHAATA KKENA ATEVA ME LAGHE UE VA, “SEE NONGINA GHAATA KKENA ATEVA? ME SEE EROOROO TANI AIUVII TEEIA ME EAPALAIJA?”

<sup>5</sup> GOD GHE TAU VELLA GHAATA KKENA ATEVA TANI TAU SAE NANNAANE ME GHE AAULIAA SAASAKIAA TA GOD. GHE GHEELEI ALOANNAANE GHE ANTANI GHEELEI GHE ROOLA GHAATINGAULU GHALUA (42) ULANA.

<sup>6</sup> ME GHE OTILA PAANE ATEVA, TANI AULIAA SAASAKIAA TA GOD, ME TALE ARARINA ATEAE, MASALIKINA ATEAE, ME LO ATOA LA TOKATOKA ETANA.

<sup>7</sup> GOD GHE TAU LA SARASARAKANA ETANA TANI LAA AIUVII TEE KAPUNA TAUMATTU NGATOAA GOD, ME TANI APALAILA. GOD GHE TAU LA SARASARAKANA TANI MUEMUA ARARIMANGALI EKAPA ATOA, ME TAUMATTU NGATOAA ME ASEASE NISAMA ATOA ME TALE ANUA ATOA.

**12:9:** Aitiutu 3:1, 14; Luk 10:18, 22:31; Aotu 20:2.    **12:10:** Job 1:9-11; Sek 3:1.    **12:12:** Ais 44:23; 49:13.    **12:14:**

Den 7:25; 12:7.    **12:17:** Aotu 11:7.    \* **12:18:** otuena ateva ghe tinginala Kasina uru ngai laghe pitila laghe uela va aghe tinginala.    **13:1:** Aotu 12:3; 17:3, 7-12.    **13:2:** Den 7:4-6.    **13:3:** Aotu 17:8.    **13:5:** Den 7:8, 25; 11:36; Aotu 11:2.    **13:7:** Aotu 11:7.

<sup>8</sup> Lo atoa la tokatoka tale kosa ateva la kakauua ghaata kkena ateva, lo atoa karika pitipiti arariira tale vuku maulue ateva unna ia natu sipsipi eteva, ia laghe uvi emateala tale aitiutiu tale kosa ateva.

<sup>9</sup> Lo ateva talingane manee, aue enongo.

<sup>10</sup> Arova see God ang ghe uela va elao tale ale mata voovoo, aue elao tale ale mata voovoo.

Arova see God ang ghe uela va emate tale baenata ateva, aue emate tale baenata ateva.

Nau isaa o ase voto ange lutulutu, kapuna atoa God aue la tingina akorokorongana ta God me la poso parasi aikaiaairia.

*Ghaata kkena ateva ghe kauerekatila tale kosa ateva*

<sup>11</sup> Vara me aghe tarala mene kateva tani ghaata kkena ghe kauerekatila tale kosa ateva, ghalua unna kom nongina natu sipsipi eteva, ghe samasama nonginaaili teva otuena.

<sup>12</sup> Ghe aapasunga ngakapala sarasarakanianae aitiutiu eteva ghaata kkena ta matane, me ghe gheleila taumattu ngatoa tale kosa ateva laghe kkauaala aitiutiu eteva ghaata kkena ia o laghe avakovakoala me ghe mene masinala.

<sup>13</sup> Me ghe gheelei niaimatoongana atoa namungaili ila. Ghe kolola kura atuae epona liu ghe sio mae tale kosa ateva ta mata taumattu ngatoa.

<sup>14</sup> God ghe tau lao sia sarasarakanana etana tani ghelei isaa o niaimatootoonga tani aimatoonga sarasarakanianae aitiutiu eteva ghaata kkena. Poli ghe gheelei isaa o niaimatootoongana, ghe saikamela taumattu ngatoa tale kosa ateva. Ghe sungilala tani atingina sae tootoo ateva tani oneoneaa ghaata kkena ateva ia o laghe avakovakoala tale baenata ateva me ie etokatoka.

<sup>15</sup> God ghe tau vella ghaata kkena ateva tani tau lao sarasarakanana tani tau lao maulue tale aitiutiu eteva tootoo me ia aue eaippooaa me eghelei lo atoa la tam aaloanna tani kkauaa tootoo ateva la mate.

<sup>16</sup> Ghe suusulungi ekapaila, ghauna me namuu, tue peipeiena me karika tue peipeiena, lo atoa karika la tokatoka tale aloannaairia me lo atoa la tokatoka tale aloannaairia, tani ghaa aimatootongana tale nimaira muenna atelange o ta patilakaira.

<sup>17</sup> Aue karika teva eppoli me eaitauaa voto arova etam ghaa aimatootongana ateva, ia o ararina atuae ghaata kkena ateva o namba ngateva eaaimatoonga ararina atuae.

<sup>18</sup> Tani kila isaa o voto, utani nanna ngamasina. Lo ateva taumattu masina nannaane erooroo tani nna ngamasina, me ekila tani ira namba ngateva, poli ia o namba ngateva unna ia taumattu ngateva. Unna namba ngateva toko va, ghaonomo ai, ghaonomongaulu me ghaonomo (666).

## 14

*Natu sipsipi eteva me 144,000*

<sup>1</sup> Aghe mene taatarala me emua etaghi natu sipsipi eteva ghe tiitingina tale motouru eteva eSaeon. Kateva ai, ghaatingaulu me ghaata airari (144,000) taumattu laghe tiitingina teeia, ararina atuae me ararina atuae Tamane pitipiti elokoi emua tale patilakaira.

<sup>2</sup> Me aghe nongola kateva lingi niaangari epona liu nonginaaili ateo atuae eakaakalaa atingina me nongina palapalanga ateva. Niaangari eteva aghe nongoala nonginaaili va lo atoa la kaukau uneira aikaukau.

<sup>3</sup> Kateva ai, ghaatingaulu me ghaata airari (144,000) taumattu laghe tiitingina emua tale aitokatokane ateva king unna ia God, me emua tale ghaata voto maulue me namu ngatoa. Laghe ueei kkinari eteae ouna ia, karika mene toa la kilakilaia ta lo nonga atoa laghe saangala tale kosa ateva la kilakilaia.

<sup>4</sup> Isaa o taumattu karika righi sesa gheeleiaaira poli karika laghe kila vause, poli laghe akekkelilala tale voto sesa. Laghe aaimuli tee kasukasuaane natu sipsipi eteva nongina eaa ghe laolao. Isaa o taumattu God ghe ghaa oghilala tale taumattu tale kosa ateva. Ila mata ngemua ila ta God me natu sipsipi eteva.

<sup>5</sup> Karika righi nikamekame ghe mae sia ta paaira me karika righi sesa gheeleiaaira.

*Ensolo kotolu*

<sup>6</sup> Vara me aghe tarala kateva ensolo, ghe looloo elomarase me ghe posoposo masi kiukiui eteva tokatoka liu ia tani ppooainia ta lo atoa la tokatoka tale kosa ateva, tale anua akapa atoa, tale ararimangali etoa, me tale aseasee nisama atoa me tale taumattu ngatoa.

<sup>7</sup> Me ghe sama anamuula me ghe uela va, “Am oneoneaa God, me am kkaueinia, poli nauna tani ghelei niaisakei tale taumattu ange rekatala. Am kkaueinia ta ia ghe gheleila epona liu, kosa ateva, paamanu, me ateo vubbuaa.”

<sup>8</sup> Aiaaghalua ateva ensolo ghe aimulila me ghe uela va, “Masaliki taatara ataeae namuu ia eBabilon angila ghe tturungiela! Laghe tturungiela! Ghe gheleila anua akapa atoa laghe ropila sesa manu eteva, me laghe lailai sari maneira atoa katoa tani taita me vause.”

<sup>9</sup> Aiaakotonna ateva ensolo ghe aimulila etairaruua, ghe sama anamungailili me ghe uela va, “Lo ateva ukakkaua ghaata kkenna ateva me tootoona ateva, me ughe ghaala aimatootongana ateva ta patilakam o ta nimam,

<sup>10</sup> io aue ughaa sessaiaane ateva God namungaili ia nongina kapa uaeni eteva, me aue ummarikana tale kura ataeae me atu etoa ramerame ila emua ta mataira ensolo atoa manga ila me natu sipsipi eteva.

<sup>11</sup> Asu tale uneira nimmarikana ae esae, me esae ae karika righi niaioghioghi etana. Aue karika righi niainoane llaa me voo, ta lo atoa ila kakkauua ta ghaata kkenna ateva me tootoona ateva, o laghe ghaala aimatootongana ateva eaimatootonga ararina ateeae.”

<sup>12</sup> Nau isaa o ase voto ange lutulutu, kapuna atoa God aue la tingina akorokorongana ta God, me la nongo usilaa inangari nipaopao kannaa God, me la poso parasi aikaiaiaira ta Iesu.

<sup>13</sup> Vara me aghe nongola lingi nisama ateva epona liu ghe uela va, “Pitila llo toko. Ghaine ange tiauala me nau emaemae lo atoa la aikaiaia ta Vau eteva me la mate, niarangise ae etoka etaira.”

Spiriti eteva eue va, “Ue. Aue la ainoana tale uunguaaira poli uunguaaira aeusila.”

#### *Nau nimukemuke tale kosa ateva*

<sup>14</sup> Vara aghe taatara me emua etaghi aghe tarala urukookoo ateva usousoana ia, me tau-mattu ngateva ghe tokatoka etana nonginaili va Natuna ateva Taumattu ngateva. Unna kou nguru eteva ta uruna gheeleia tale golo, me ta nimane iema ateva matakerenganaaili ia.

<sup>15</sup> Mene kateva ensolo ghe kupi ghoa mae tale ale manga ateva, ghe kolokolo anamungaili lao sio ta lo ateva ghe tokatoka tale urukookoo ateva. Ghe uela va, “Ghaala iemam ateva me usai inana tale utana atingiu, poli nauna ange mae sio tani ghaaia ta ange matuela.”

<sup>16</sup> Lo ateva ghe tokatoka tale urukookoo ateva ghe leea sio mae iemane ateva tale kosa ateva me ghe saila inana tale kosa ateva.

<sup>17</sup> Mene kateva ensolo ghe kupi ghoa mae tale ale manga ateva epona liu, ia tee ghe posoposo iema ateva matakerenganaaili ia.

<sup>18</sup> Me mene lo ateva ensolo ghe aitaraa kura aiaavusuvusuena ataeae ghe ghoa mae tale liu nighelei aiaavusuvusuena me ghe kolokolo anamungailili ta lo ateva ghe posoposo iema ateva. Ghe uela va, “Ghaala iemam ateva me ughaaitauaa ue ngai tale uaeni eteae tale kosa ateva, poli ue ngai ange masso akapala.”

<sup>19</sup> Ensolo ateva ghe leeaala iemane ateva tale kosa ateva. Ghe sai ekapala ue ngai tale uaeni me ghe velu kaaila ta aiposoa uaeni eteva, eaaimatoonga sessaiaane God.

<sup>20</sup> Me laghe pooposoa uaeni eleka tale masaliki taatara ataeae. Rae ateva ghe kupi ghoa mae tale aiposoa uaeni eteva eairooaa tee sae oasa atikirighi tale paa ooso ateva, me aaluseaane erooro kotolu ai (300) kilomita.\*

## 15

#### *Ghaitu ensolo ghe posoposo ghaitu voto sesa*

<sup>1</sup> Aghe taatara ssola epona liu me aghe mene tarala kateva kinatama masi niamatootongana. Ghaitu ensolo laghe posoposo ghaitu airuuruu tana voto sesa — airuuruu tale isaa oia voto sesa, poli sessaiaane God aue eruu tale isaa oia voto sesa.

<sup>2</sup> Aghe tarala voto ateva taataraane arova manu eteva laghe gheleielaa tale ghalasi, eaaisavisavila tee kura ataeae. Me epona etana, taumattu ngatoa laghe apalala ghaata kkenna ateva me tootoona ateva, me namba tale ararina ataeae, laghe tiitingina etana. Laghe posoposo aikaukau kannaa God ghe tau lao sio etaira.

<sup>3</sup> Laghe ueei unna kkinari eteae Moses, kapuna tau ngai nonganongo anna ateva God, me kkinarinna ataeae natu sipsipi eteva. Laghe ue va,

**14:8:** Ais 21:9; Jer 51:7-8; Aotu 17:2; 18:2, 3.    **14:9:** Aotu 13:12-17.    **14:10:** Ais 51:17, 22; Jer 25:15-16; Sams 75:8; Esik 38:22; Aitiuti 19:24; Aotu 16:19; 20:10; 21:8.    **14:11:** Ais 34:10.    **14:12:** Aotu 13:10.    **14:14:** Den 7:13.

**14:18:** Joel 3:13.    **14:20:** Ais 63:3; Aotu 19:15.    \* **14:20:** *kotolu ai (300) kilomita Tale inangari nge Griek, kateva airari me ghaonomo ai (1,600) stadia.*    **15:3:** Eks 15:1; Sams 139:14; 145:17.

"Namuu me masinaaili uunguaam,  
Vau eteva God sarasarakanai io.  
Ghulughuluena me koronna salam,  
kingi io tale nau ekapa atoa.

<sup>4</sup> Taumattu ngakapa atoa aue la oneoneainio, Vau eteva,  
me la tau sae ararim ataeae.

Poli io nonga manga io.

Anua akapa atoa aue la mae kkaueinio,  
ta uunguaam ghulughuluena ang ghele kaurekatila."

<sup>5</sup> Vara me aghe taatara ssola epona liu me aghe tarala ale manga ateva, ia o ale kandisi  
ia eaapasunga va God etokatoka, ghe otiela.

<sup>6</sup> Ghaitu ensolo laghe kipi ghoa mae tale ale manga ateva laghe uunusi ghaitu sesa voto.  
Laghe molumolu tale raarangisana kalio ravaravaiena, me laghe vaovao tuku kalio ateva  
tale sauira, gheelei ia tale golo.

<sup>7</sup> Vara me kateva tale ghaata voto maulue ghe tau lao sio ta ghaitu ensolo ghaitu pelete  
gheelei tale golo, me pasu tale sessaiaane God, etokatoka nau ekapa atoa.

<sup>8</sup> Me ale manga ateva ghe pasula tale asu tale maamallangiaane God me tale sarasarakanianne.  
Karika poi teva ghe rooroo tani kipi sso tale ale manga ateva lamosina ta ghaitu  
sesa voto tale ghaitu ensolo laghe ruula uunguaaira.

## 16

### *Ghaituvilau pelete ekaakaai sessaiaane God*

<sup>1</sup> Vara me aghe nongola kinatama lingi ngalo ateva ghe mae sio tale ale manga ateva,  
ghe ue ta ghaitu (7) ensolo va, "Am kasula me am laa kao see tale kosa ateva sessaiaane  
God tale isaa o ghaituvilau pelete."

<sup>2</sup> Aitiutu eteva ensolo ghe kasula me ghe kaola unna ativilau tana pelete epona tale  
kosa ateva, me usai etoa sesaaili taataraira me mmarikanaaili ila laghe tokala ta taumattu  
ngatoa laghe ghaala unna aimatoontongana ghaata kkena ateva me laghe kakkauaa  
tootoona ateva.

<sup>3</sup> Aiaaghluene ateva ensolo ghe kaola unna ativilau tana pelete epona tale paamanu  
eteva, me paamanu eteva ghe raeraeanala tani nonginaaili raeira taumattu ngatoa  
matena ila. Me isaa akapaaili voto maulue etokatoka tale paamanu eteva ghe mate  
akapala.

<sup>4</sup> Kotonna ateva ensolo ghe kaola unna ativilau tana pelete epona tale ateo akaakala  
atoa me ateo vubbu etoa, me laghe raeraeana voroila.

<sup>5</sup> Me aghe nongola ensolo ateva eaaitaraa ateo atoa ghe ue va,

"Io ghulughuluena io tale niaisakei etoa,  
utokatoka ghaine me angu ghe toka vella arau, me manga io  
poli angu tau rorooraala aipoliira tale gheegheleiaaira.

<sup>6</sup> Ta laghe uvi ematela kapum taumattu me propete atoa,  
me angu tau lao sio rae me ngila ropila poli mausi gheegheleiaaira."

<sup>7</sup> Me aghe nongola liu nighelei aiaavusuvusuena ateva ghe asokoila va,  
"Ue, Vau eteva God sarasarakanai io,  
koronna me ghulughuluena kalum niaisakei."

<sup>8</sup> Ghaatane ateva ensolo ghe kaola unna ativilau tana pelete epona tale sinaka ateva, me  
ghe tau lao sio sarasarakanai tale sinaka ateva tani sinaki ekulukuluki taumattu ngatoa  
tale aanasane ateva.

<sup>9</sup> Vilikiira ghe sinaki ekulukulukila tale kinatama aanasane ateva me laghe aauliaa  
saasakiaa sae tale ararina ataeae God, ia ghe aaitaraa isaa oia sesa voto, me karika poi  
laghe anna tani nna ngaioghioghiaa me la anamunamunganeia.

<sup>10</sup> Aiaaghali mane ateva tana ensolo ghe kaola unna ativilau tana pelete tale aitokatoka  
tokane ateva king unna ia ghaata kkena ateva, me isaa akapaaili masaliki ghe aitaraa  
ghe saurromla. Taumattu ngatoa laghe katakata ramuramuti paaira poli kinatama  
mmarikana ateva,

<sup>11</sup> me laghe aauliaa saasakiaa ta God epona liu poli tale kinatama mmarikana tale  
usaiira atoa. Me karika poi laghe alona tani nna ngaioghioghiaa tale voto laghe gheleila.

<sup>12</sup> Ghaonomina ateva ensolo ghe kaola unna ativilau tana pelete epona tale kinatama ateo atea eIupreitis me ghe matila tani aipanipaniaa salaira kingi etoa tale pai sinaka esae.

<sup>13</sup> Vara me aghe tarala kotolu sesa spiriti taatarailotolu arova roparopa atoa; kateva ghe kupi ghosa mae tale paane ateva otuena ateva, me kateva tale paane ateva ghaata kkena ateva, me kateva tale paane ateva kamena ateva propete.

<sup>14</sup> Ila spirit tale raroai ila la gheeghelei niaimatootoongana atoa, me la kasukasu ekapa see tale kingi etoa tale kosa akapa ateva oia, tani ghelei eitauuinila tale niauvii eteae tale kinatama nauna ateva God sarasarakanaiili ia.

<sup>15</sup> "Tarala, aue amae nongina tau nainao ateva! Aue emasinaaili ta lo ateva karika easeasekanue, me eaimonomonosiaa unna aiaasae, me karika aue evelu kalio va aue epalata."

<sup>16</sup> Me kingi etoa laghe velu eitauaala tale voto ateva tale inangari nge Hibru la kolokoloa va Amagedon.

<sup>17</sup> Ghaituna ateva ensolo ghe kaola unna ativilau tana pelete elomarase, me elome tale ale manga ateva kinatama lingi ngalo ateva ghe mae sio tale unna aitokatoka ateva king ghe uela va, "Ange kapala!"

<sup>18</sup> Vara me ravaravaia ateva ghe ravaiela, me palapalanga ateva ghe akurruela, me kinatama rukeruke ateva ghe rukela. Karika teva rukeruke ghe lutu poi nongina lo ateva oia rukeruke nau eteva taumattu ghe tiuaala tani toka tale kosa ateva oia.

<sup>19</sup> Kinatama masaliki eteae eBabilon ghe tarurrutila me ghe kotoluvilaula pai, me kinatama masaliki etoa tale patunganua atoa laghe turringilala. God ghe annaala kinatama masaliki eteae eBabilon me ghe tau lao sio kapa uaeni eteva pasu ia tale sessaiaane.

<sup>20</sup> Patunganua atoa laghe kapala me karika laghe rooroo tani tara motouru etoa.

<sup>21</sup> Paka vaao ateva korokorongan ia nongina atu ghe katuula maamaataniaane erooro ghaatingaulu ghalima (45) kilo ghe kaakatuu saoaa ta taumattu ngatoa, me laghe auliaa saasakiaa ta God ta poli laghe aateateaa saasakiaa nau eteva vaao ateva ghe kumkumla.

## 17

### Vause ateva epona tale ghaata kkena ateva

<sup>1</sup> Kateva tale ghaitu (7) ensolo ghe posoposo ghaituvilau pelete ghe mae sio, me ghe uela etaghi va, "Mae sio, me aghapasunga etam aipolipolina lo ateva vause emuemueaa niaivae ateeae, etokatoka tale oroi ateo atoa.

<sup>2</sup> Ta getana ia oia vause ateva kingi tale kosa akapa ateva la asoaso teeia me lo atoa la tokatoka tale kosa ateva angila ghe ropi saasakiaa voroila, tale kanna sesa manu eteva eaaimatoonga ssavoto."

<sup>3</sup> Vara me ensolo ateva ghe kasueinaghila tale spiriti eteva, ghe laoainaghi sio tale voto ateva karika righi taumattu ghe tokatoka etana, me aghe tarala ghaata kkena ateva raeraeana ia, ghe koukouua inangari niauliaa saasakiaa ngatoa, ghaitu uruna me kasangaulu unna kom, me vause ateva ghe tokatoka epona etana.

<sup>4</sup> Vause ateva ghe molumoluua aiaasae ateva ghueghuenia ia me raeraeana ia, me ghe molumoluua voto atoa gheelei ila tale golo laghe ravaravaiela, me masi atu etoa, me pel atoa, ghe posoposo kapa ateva airopiropi ia laghe gheleielala tale golo, pasu ia tale voto atoa mauuna ila ta mata God me mauuna gheegheleiaane vause ateva tani aivae.

<sup>5</sup> Arari eteae laghe pitiela tale patilakane, eue va,

Voto aisulianna

Babilon namuu ia

Kinaira ia lo atoa la vaevaea

me voto mauuna tale kosa ateva.

<sup>6</sup> Aghe tarala vause ateva ang ghe ropi saasakiaala tale raeira kapuna taumattu ngatoa God, raeira taumattu ngatoa la auliaa inangarina ateva Iesu.

Nau eteva aghe taraiela, namuu ta aghe soghiaala isaa oia voto.

<sup>7</sup> Vara me ensolo ateva ghe uela etaghi va, "Vaaluia me angu soghiaala? Aue akiri tau atu mallooeana isaa o voto aisulianna tale vause ateva me ghaata kkena ateva eilou etana. Ia o ghaata kkena ateva uruna ghaitu (7) me kasangaulu (10) unna kom.

<sup>8</sup> Ghaata kkena ateva utaraiela, ang ghe toka muela, me ghaine karika ia, me aue ekaurekati sae tale liu eteva karika aioghioghi etana, tani lao tale unna nimate ateva. Lo atoa taumattu la tokatoka tale kosa ateva, me karika laghe pitila arariira tale vuku maulue ateva tale aitiutiu tale kosa ateva, aue la soghi nau la tara ghaata kkena ateva, poli ang ghe toka muela, me ghaine karika ia, me aue emene mae.

<sup>9</sup> "Taumattu nannaane alomasaanga erooroo tani kila isaa o voto. Ghaitu uru eaaimatoonga ghaitu motouru vause ateva etokatoka etana,

<sup>10</sup> me tee ghaitu kingi. Ghalima (5) ang ghe matela, me kateva ie etokatoka, me mene kateva aue emae. Nau eteva emae, tokatokaane karika aue ealuse.

<sup>11</sup> Ghaata kkena ateva ghe toka akasinala, me ia oia karika ia, aiaaghaoalu (8) eteva kingi ia, ie tee elome tale ghaite kingi, ie tee elaelao tale nimate.

<sup>12</sup> "Kasangaulu kom utarala eaaimatoonga kasangaulu kingi, karika laghe ghaa matuutliena tani kingi, me aue la ghaa sarasarakana tani kingi tee ghaata kkena ateva tale kateva nonga ia aoa ngateva.

<sup>13</sup> KATEVA NONGA IA NANNAAIRA TANI TAU LAO SARASARAKANA ME MATUUTLIEA TALE GHAATA KKENA ATEVA.

<sup>14</sup> Aue la aiuvii tee natu sipsipi eteva, me natu sipsipi eteva aue eapalaila, poli ia Vau ia tale vau ekapa atoa, me kingi ia tale kingi ekapa atoa. Me lo atoa la aimuli teeia, God ghe kololala me ghe suimatoongainilala va kapuna ila me la ghaaiesoangaili etana."

<sup>15</sup> Vara me ensolo ateva ghe uela etaghi va, "Oroi ateo utarala vause ateva emuemueaa niaivae ateeae etokatoka etana, eaaimatoonga taumattu ngatoa me mene oroeilei tau-mattu, patunganua atoa, me ase nisama atoa.

<sup>16</sup> Ghaata kkena ateva me kasangaulu unna kom utarala aue la aisessaii tee vause ateva emuemueaa niaivae ateeae. Aue la gheleia epeisaane me aue la ghaa velu kaliona, aue la nama malatauna me la tauue sae tale kura.

<sup>17</sup> Poli God ang ghe atoka velu ssola ta urunguitaniira sa ateva aue la gheleia tani ghelei rorooodaa voto ghe uela va aue elutu, aue la nim asokoi va ue tani tau lao matuutliena tale ghaata kkena ateva, lomosina ta inangarina God aue eghelei rorooodaa.

<sup>18</sup> Me ia o vause ateva utaraiela, eaaimatoonga kinatama masaliki taatara ateeae eaaitoia ngakapaaili kingi etoa tale kosa ateva."

## 18

### *Laghe tturungila eBabilon*

<sup>1</sup> Emuli tale isaa o voto aghe mene tarala mene kateva ensolo ghe sio mae epona liu, matuutlienaane namungaili, me mallangina ateva ghe mallangi ekapala kosa ateva.

<sup>2</sup> Ghe sama anamungailila, ghe ue va,  
"Ang ghele tarurrutila! Ang ghele tarurrutila, kinatama masaliki taatara ateeae eBabilon!

Ang ghele tanganueira iela raroai etoa,  
me sesa spiriti etoa  
me ghila atoa karika raarangisana ila, me tee sesa ghaata kkena atoa karika  
raarangisana ila.\*

<sup>3</sup> Poli anua akapa atoa angila ghe ropila  
kanna uaeni korokorongana, eaaimatoonga uunguua nialai salosalooa see,  
me kingi ekapaaili tale kosa ateva angila ghe lailai ssola etana,  
me lo atoa tau bisnis ila tee laghe ghaala oroeilei viliki veu tale niuungu karika ghe  
paapalata tani ghelei."

<sup>4</sup> Vara me aghe nongola mene kateva lingi ngalo epona liu ghe ue va,  
Am kipi velue ghoa mae, kapughu etoa,  
am tee am rau kipi sso tale gheeleiaane  
va am ghaa sesa aipolipoli eteva aue eghaia.

<sup>5</sup> Poli sesa gheeleiaane ange namungailila me ange saela arau epona liu,  
me God eannahs isaa o sesa gheeleiaane.

<sup>6</sup> Am mene liu lao etana ase salana ghe gheleli lao ta katoa,  
am tani liu ghaluaata eaiokkonoria tee gheeleiaane,  
me tale unna kapa ateva ghe kaokao apasua,

am kao apasua me am gheleli ghaluaata nongina ghe gheleli.

<sup>7</sup> Nau etoa ghe saasaeaa nannaane me ghe ghaaghaa oroi masi voto,

**17:8:** Den 12:1; Aotu 11:7; 13:7.    **17:12:** Den 7:7, 24.    **17:16:** Aotu 18:8.    **18:2:** Aotu 14:8; Ais 13:21; 34:11-14; Jer 50:39.

\* **18:2:** Kasina uru ngai laghe pitila, karika laghe pitila va *me tee sesa ghaata kkena atoa karika raarangisana ila.*    **18:4:** Ais 48:20; Jer 50:8; 51:6, 45; 2 Ko 6:17.    **18:5:** Aitiutiu 18:20-21; Jer 51:9.    **18:6:** Sams 137:8; Jer 50:15, 29; 2 Tes 1:6.    **18:7:** Ais 47:7-9.

tale isaa oia nau utau lao nimmarikana tale vilikina me nialousiusi tani airooaa,  
poli ia ghe ue va, 'Aghi kuiini ieghi,

me aghi karika va vause rae vulu ieghi,  
me karika aue aghateateaa nialousiusi.'

<sup>8</sup> Ia avalua o me aue eateateaa sesa voto atoa tale kateva nonga nau;  
nimate, nialousiusi me kinatama maloo,

me aue kura atee eata voroia,

poli Vau ngepona ateva God sarasarakanaili ia aue eghelei niaisakei eteae etana.

<sup>9</sup> "Vara me lo atoa kingi tale kosa ateva laghe asoaso teeia tani ghelei ssavoto, me laghe  
masimasi eitauua teeia, aue la ngala me la alousiusi nau eteva la tara asuna ateva elaa  
saesae, nau kura atee eataataia.

<sup>10</sup> Aue la tingina amasau tani taatara lao poli la maamatautu tani tara nimmarikana  
ateva, me aue la ue va,

"'Alousiusi, alousiusi etam, masaliki nitaatara ateeae,

Babilon, sarasarakanaili io!

Tale kateva nonga aoa ngateva me niaisakei ange ghaaiola!"

<sup>11</sup> "Tau bisnisi etoa tale kosa ateva aue la ngala me la alousiusi teeia, poli karika toa aue  
la mene poli peiira.

<sup>12</sup> Peiira nongina golo, silva, masi ngatu etoa, pel atoa, kalio malallake, kalio  
ghueghuenna, kalio silk, kalio raeraeana, asease voto atoa gheeghelei tale ai masi  
ngusungusuaane, me asease voto atoa gheeghelei tale ngisi elepen, me asease voto atoa  
gheeghelei tale ai aipolina namuu, brons, aeana, me atu eteva mabolo ia,

<sup>13</sup> sinamon me mene katoa spais, aiaavusuvusuena, murr, frankinsens, uaeni, oliv oeli,  
palaoa, uiti, vulumakao, sipsipi, ooso, ai-ilou, me lo atoa la uungu me karika la tokatoka  
tale aloannaaira.

<sup>14</sup> "Tau bisnisi etoa laghe ue etana va, 'Masi voto atoa ughe aloanna tani tue peipeiena  
tee ang ghele aikapakapaila, peim atoa me masi taataram atoa ang ghele kapala, karika  
aue umene tara poi.'

<sup>15</sup> Tau bisnisi etoa laghe aippoliaa me laghe aaitauua isaa o voto etam me laghe tau  
peipeienala, aue la nim tingina amasau mae poli la maamatauta nimmarikana ateva  
etam, me aue la ngala me la ghalousiusi,

<sup>16</sup> me aue la ue va,

"'Alousiusi, alousiusi, masaliki taatara ateeae,

ughe molumoluaa masi kalio atoa, ghueghuenna me raeraeana kalio,

me ughe molumoluo tale golo me tale asease atu etoa masi taataraira atoa, me pel  
atoa.

<sup>17</sup> Poli tale kateva nonga ia aoa ngateva isaa akapa kinatama masi voto atoa ngila  
tturungilala.'

"Me ila akapaaili kapteni etoa tale anua atoa me lo atoa la aikaai etaira me mene katoa  
la uungu elamana tani ghaa viliki veu aue la tingina amasau.

<sup>18</sup> Me aue la sama anamuu nau eteva la tara asu kura ateeae nau eteva eataataia, me la  
ue va, 'Karika mene teae masaliki taatara nongina lo ateeae oia.'

<sup>19</sup> Me aue la velu sae au ta uruira me la aore atingina me la ngala me la alousiusi me la  
ue va,

"'Alousiusi, alousiusi etana, masaliki taatara ateeae,

isaa o anua evuuvukala elamana

la ghaaghhaa peiira etam!

Poli kateva nonga ia aoa ngateva me angu ghele peisaanelia.'

<sup>20</sup> Am masimasieiniela, lo atoa epona liu,

me am kapuna taumattu ngatoa God, me apostolo atoa me propete atoa,

ta God ang ghele gheilela niaisakei me sesa akapaaili ang ghele lao sio etana tale ase  
voto ghe gheelei etaimim."

<sup>21</sup> Vara me kateva ensolo korokoronganaili ia ghe saula kinatama atu eteva, naana-  
mungaane nongina lo ateva atu la gheelei eputuputu uiti etana me ghe sau velue siola ta  
paamanu, me ghe uela va,

"Tale ia o ase kinatama sarasarakanata ateva

Babilon, kinatama masaliki taatara ateeae, aue la tturungia,

me karika aue la mene taraiia.

22 Me karika aue la mene nongo etam  
    righi lingi aikaukau, me tau kkinari, me lo atoa la vuuvuu flut me taue.  
 Karika aue la tara  
    righi asease tau ngai uungu etam.  
 Lingi ngalo tale liu ngai ghelei eputuputu uiti  
    karika aue la mene nongo.  
 23 Me tee karika aue la tara  
    righi mallangi lam etam.  
 Karika aue la nongo righi lingi ngaloira lo atoa la aaloanna tani lai.  
 Kapum tau bisnisi etoa sarasarakanaiili ila tale kosa ateva  
    me tee ughe alaala me ughe kamekame patunganua akapa atoa tale kosa ateva, me  
    ughe tiuua ppaelala.  
 24 Raeira propete atoa me kapuna taumattu ngatoa God, ghe akalala tale salam,  
    me tee raeira lo akapa atoa laghe uvi ematelala tale kosa ateva."

## 19

### *Kkinari nimasimasi epona liu*

<sup>1</sup> Nau eteva namu ngateva ensolo ghe ruula tani aippooaa, aghe nongola paka mangalia  
ateva nonginaili taumattu ngatoa oroieili ila laghe kikkinari epona liu. Laghe ue va,  
"Ita tau sae inasanina God!"

God tau ngai asaangiita ia! Nioneoneaa me sarasarakanaiili kanna God.

<sup>2</sup> Poli kanna niaiskei egheelei koronna me ghulughuluena.

God ang ghe gheleila niaiskei ta ia o vause ateva laghe aaivaeainia  
    ghe ghelei saasakiala kosa ateva oia tale kanna nivaevae ataeae.

Me ghe uvi emateala kapuna tau ngai uungu etoa God, me God ange liuliu kanna ssavoto  
    ghe gheleila."

<sup>3</sup> Mene ghaluene, taumattu ngatoa laghe mene kkinari enamungailiila laghe ue va,  
"Ita tau sae inasanina God!"

Asuna ateva eBabilon ange saela me karika aue ekapa."

<sup>4</sup> Ghaluengaulu ghaata (24) namuu me ghaata ase voto maulue ila, laghe tturru siola  
tani kkauaa God, ghe tokatoka epona tale aitokatokane ateva king, me laghe ue va,  
"Ue, koronna, ita tau sae inasanina God!"

<sup>5</sup> Vara me lingi ngalo ateva ghe mae sio tale aitokatokane ateva king ghe uela va,  
"Am kkauaa saela kapuita Goto ateva.

    Am akapaailli kapuna tau ngai uungu etoa,  
lo atoa am oneoneainia,  
    am akapaailli ghauna me namuu!"

### *Nilai eteae tale natu sipsipi eteva*

<sup>6</sup> Vara me aghe nongola lo ateva ghe aangari nongina lingi ngaloira taumattu ngatoa,  
me nongina ateo eakaakalaa me tee nongina palapalanga ateva eaakurrua. Ghe uela va,  
"Ita tau sae inasanina God!"

Poli Vau palepale kapuita Goto ia, sarasarakanaiili ia eaaitoia ngakapa voto.

<sup>7</sup> Ita masimasieinia

    me ita taula nianamunamungaane!

Poli nilai tale natu sipsipi eteva ange mae sio

    me vause ateva natu sipsipi eteva elai etana ang ghele aimanomanosiaala.

<sup>8</sup> God ghe tau lao sio masi aiaasae pei tale nilai,  
    gheeghelei tale masi kalio, raarangisanaaili."

(Eaimatoonga masi gheegheleiaira kapuna taumattu ngatoa God.)

<sup>9</sup> Vara me ensolo ateva ghe uela etaghi va, "Pitila llo toko: 'Aue emasinaaili ta lo atoa  
laghe kololala va la mae tale unna nilai eteae natu sipsipi eteva.' " Me ensolo ateva ghe  
mene uela va, "Isaa oia inangari koronna kanna God."

<sup>10</sup> Nau eteva aghe nongola aghe tturru siola tale liue kkena tani kkaueinia, me ghe uela  
etaghi va, "Urau mene ghelei evalua o! Aghi nim tau ngai uungu ieghi nongina io me  
nengam me tuem atoa, ila o lo atoa la posoposo parasi tale inangari inangarina Iesu.  
Ukkauaa nonga God! Poli inangari inangarina Iesu spiriti ia tale propesi."

### *Lo ateva ghe iilou tale ooso ateva usousoana ia*

<sup>11</sup> Vara me aghe tarala epona liu ghe otiela, me usousoana ateva ooso ghe tiitingina, lo ateva ghe iilou etana la kolokoloa va “Lo ateva egheelei emasinaaili uunguaane” me “Koronna ia”. Me egheelei niaisakei tale salana ghulughuluena ia me egheelei niaiuvi.

<sup>12</sup> Matana alua nonginaaili kinatama kura atae ghe ramerame, me oroieili kou nguru etoa ta uruna, me arari eteae pitipiti ia etana, karika teva ekilakilaia ta ie nonga.

<sup>13</sup> Ia ghe molumolu tale aiaasae ateva laghe asuuela tale rae, me ararina atae la kolokoloa va Inangarina ateva God.

<sup>14</sup> Tau ngai uvii ngepona liu etoa laghe molumolu tale aiaasae usousoana me raarangisana laghe gheleila tale masi kalio laghe iilou tale ooso atoa usousoana ila, me laghe aaimuli tee lo ateva ghe iilou tale usousoana ateva ooso.

<sup>15</sup> Tale paane ateva baenata ateva matakerengana ia ghe kupi ghoa mae tani apala anua atoa. Aue eaitoieinila tale aikkatulu etiulu aeana ia, me easa uaeni tale aiasa uaeni eteva, eaaimatoonga sessaiane God sarasarakanaili.

<sup>16</sup> Tale unna aiaasae ateva ghe aakou au kkena muenna atelange, arari eteae pitipiti ia eue va,

Kingi tale kingi ekapa atoa me  
Vau tale vau ekapa atoa.

<sup>17</sup> Me aghe tarala ensolo ateva ghe tiitingina epona tale sinaka ateva. Namungaili ta ghe kolokoloala ghila atoa laghe looloo elomarase, ghe ue va, “Am mae aitauaa sio tale kinatama ninamanama atee kanna ia God.

<sup>18</sup> Ta am mae nama malatauira kingi etoa me lo atoa la muemueaa tau ngai uvii etoa, me tau ngai uvii etoa sarasarakanaili ila, me tee am nama malatauira ooso atoa me lo atoa la iilou etaira, me malatauira taumattu ngakapa atoa, la tokatoka tale aloannaaira me lo atoa la uungu me karika la tokatoka tale aloannaaira, me tee lo atoa arariira me lo atoa karika arariira.”

<sup>19</sup> Vara me aghe tarala ghaata kkena ateva me kingi etoa tale kosa ateva oia me kapuira tau ngai uvii etoa laghe velu eitauuala tani aiuvii tee lo ateva ghe iilou tale ooso ateva me kapuna tau ngai uvii etoa.

<sup>20</sup> Laghe velu eitauua tani aiuvii me lo ateva ghe iilou tale ooso ateva ghe akaravusula ghaata kkena ateva me tee propete kamekame ateva ghe gheelei mirikol me aimatootongan a atoa tale sarasarakaniae ghaata kkena ateva. Ghe gheleilala tani kame lo atoa laghe ghaala unna aimatootoongana ateva ghaata kkena ateva me tee lo atoa la kakkauaa tootoona ateva. Laghe sau esakesakeluelua me laghe sau vellalue saela tale kura ateeae.

<sup>21</sup> Me ghe pasa amatela kapuirarua etoa airuuruu ila tale baenata ateva ghe kupi ghoa mae tale paane ateva lo ateva ghe iilou epona tale ooso ateva, me ghila atoa laghe namala malatauira atoa, me ghe ssoilala.

## 20

### *Kateva airari (1,000) ninamanama*

<sup>1</sup> Aghe tarala ensolo ateva ghe kupi ghoa mae epona liu ghe uunusi kii tale paka liu eteva karika aioghioghi etana me kinatama sene ateva.

<sup>2</sup> Ghe kune atokala otuena ateva, ia o katu ngateva pei ngemua arau ia, ia Raroai ia me Satana etana, me ghe iri etokaiela va etoka ta kateva airari (1,000) ninamanama.

<sup>3</sup> Ensolo ateva ghe sau velue siola tale liu eteva karika righi aioghioghi etana me ghe kavati rungainiela me ghe llokimi ekorokoronganaiel, va karika emene kame anua atoa ta etani ruu kateae airari ninamanama. Me nau issaa o voto eruu me ensolo ateva evira tau velua tani ghelei voto tale aloannaane tale tukunaaili tuku nau erighi.

<sup>4</sup> Vara me aghe tarala uneira aitokatoka kingi etoa, me tau ngai toitoi etoa laghe tokatoka etaira. Isaa o taumattu God ghe taula sarasarakaneta etaira tani ghelei niaisakei. Me aghe tarala lo atoa laghe sai pulela aloira ta poli inangariira ta Jesu me inangarina ateva God. Karika laghe kakkauaa ghaata kkena ateva me tootoona ateva me karika laghe ghaala unna namba ngateva tale patilakaira me ta nimaira. Laghe sakesakela me laghe toka teela Karisto tani namuu me aitoiaa teeia tale kateva airari ninamanama.

<sup>5</sup> Ia o lo ateeae nitotu tale nimate, aitiutiu ia. Matena akapa atoa, lo atoa karika laghe totula tale aitiutiu eteae nitotu, karika aue la sakesake lamosina ta kateva airari ninamanama eruu.

**19:11:** Autu 1:5; 6:2; Sams 96:13; Ais 11:4.    **19:12:** Den 10:6; Autu 1:14; 2:17.    **19:13:** Ais 63:1-3; Jon 1:1, 14.

**19:15:** Sams 2:9; Autu 1:16; 14:20.    **19:16:** Autu 17:14.    **19:17:** Esik 39:17-20.    **19:20:** Autu 13:12-17; 20:10.

**20:1:** Autu 9:1.    **20:2:** Aitiutiu 3:1; Autu 12:9.    **20:4:** Den 7:9, 22, 27; 1 Ko 6:2; Autu 13:17.

<sup>6</sup> Niarangise aue etoka ta lo atoa ila tale aitiutiu eteae nitotu, me manga ila. Ta niaiaaghalua atea nimate karika righi sarasarakaniaane ta ngetaira, ta aue la pristi ta God me ta Karisto me aue la toka tani aitoiaa teeia ta kateva airari ninamanama.

### *Airuuruu eteva niaiuvi*

<sup>7</sup> Nau eteva kateva airari ninamanama eruu, Satana aue ekupi ghoa tale karavusu,

<sup>8</sup> me aue elaa kasu see tani kame anua atoa tale aighoughou ghaata tale kosa ateva oia, la aseasela va Gog me Megog, aue la mae aitauaa tale kinatama niaiuvi eteae, orioeili ila nongina rira ateva elosamarra.

<sup>9</sup> Me aue la lao aitauaa tale voto ateva namuu ia me mmaiina ia tani tingina talia masalikiira atea kapuna taumattu ngatoa God, masaliki taatara atea God eaelousieinia. Vara me kura ateaue aue esio epona liu me aue eata akapaailliila.

<sup>10</sup> Me ia o Satana ateva, tau nikamekame ia, aue la sau velue sso tale kinatama kura atea me atu etoa ramerame ila, nongina laghe sau velu ssola ghaata kkena ateva me propete kamekame ateva, aue la mmaprikana llaa me voo nau ekapa atoa.

### *Niaisakei eteae ta matena atoa*

<sup>11</sup> Vara me aghe tarala kinatama aitokatokane ateva king usousoanaaili ia, me lo ateva ghe tokatoka epona etana; kosa ateva me epona liu lalu ghe ilou emasaula ta ngetana, karika lalu ghe tarala righi liuirarua tani toka.

<sup>12</sup> Me aghe tarala taumattu ngatoa matena ila, katoa arariira manee me katoa karika, laghe tiitingina emua tale aitokatokane ateva king, vara me vuku etoa ghe otilala, me mene kateva vuku ghe mene otela, vuku maulue ia. Vara me laghe tiauala tani ghelei niaisakei ta lo atoa matena ila tale gheeleiaira laghe piti ssola tale isaa o vuku.

<sup>13</sup> Elamana me Nimate me Hades laghe tau vella matena atoa tani lao tale niaisakei eteae, me kateva kateva taumattu ghe aisakei tale gheegheleiaane.

<sup>14</sup> Vara me Nimate ateva me Hades laghe velulalue ssola tale kinatama kura atea. Ia o kura atea, aiaaghalueno atea o nimate.

<sup>15</sup> Me arova teva taumattu karika teae ararina tale vuku maulue ateva, ia o taumattu ngateva laghe velue ssola tale kinatama kura atea.

## 21

### *Ouna ateva epona liu me ouna ateva kosa*

<sup>1</sup> Vara me aghe tarala ouna ateva epona liu me ouna ateva kosa, poli lo ateva akasina epona liu me lo ateva akasina kosa ghe kapala, me paamanu eteva tee ghe kapala.

<sup>2</sup> Me aghe tarala masaliki taatara atea manga ia, ouna ateva ejerusalem, ghe sio mae ta God epona liu, masinaaili taataraane nonginaaili teva vause emolumolu tani laa sou taitanna ateva.

<sup>3</sup> Me aghe nongola kinatama lingi ngalo ateva ghe mae sio tale aitokatokane ateva king, ghe ue va, "Tarala! God ange gheleila tanganuena elome tale taumattu ngatoa, aue etoka teeila, me ila aue ekapuna taumattu ila, me ia God aue etoka teeila.\*

<sup>4</sup> Ia aue esei velu rarum mataira me karika aue mene righi nimate me niale amate me ningala me nimmarikana, poli isaa o voto tale pokane ateva kosa ekapa."

<sup>5</sup> Me ia o lo ateva ghe tokatoka tale aitokatokane ateva king ghe uela va, "Tarala! Ngagheeeli eouna isaa akapaailli voto!" Vara me ghe ue etaghi va, "Piti siola isaa o inangari, poli urooroo tani atoka tuutulim tale isaa o inangari koronna."

<sup>6</sup> Me ghe mene uela etaghi va, "Nga ghele ghelei ekapala isaa o voto! Aghi alpa me omega ieghi, aghi aitiutiu ieghi me airuuruu ieghi. Ta lo ateva eakaangngata tani ropi aue atau lao manu karika pei niploli tale ateo vubbu eteae maulue ia.

<sup>7</sup> Lo ateva eapala aue eghaa isaa akapaailli o voto, me aue ekapuna Goto ieghi me ia aue enatughu ia.

<sup>8</sup> Lo atoa la maamataatu me karika korokorongana ila, lo atoa karika la aikaaiaa, lo atoa sesaaili gheegheleiaira, lo atoa la aiui emate, lo atoa la ailai salosalooa, lo atoa la aalaala, lo atoa la kakkauaa tootoo goto me lo akapa atoa tau nikamekame ila, aue asau vella sso tale kinatama kura atea. Ia o aiaaghalueno atea nimate."

**20:6:** Autu 1:6.    **20:8:** Esik 38:2, 9, 15-16.    **20:9:** 2 Ki 1:10.    **20:10:** Sams 11:6; Autu 19:20; 21:8.    **20:12:** Den 7:9-10; Mat 25:31-46; Apus 17:31; 2 Ko 5:10; Autu 13:8.    **20:13:** Rom 2:6; 1 Pita 1:17; Autu 2:23; 22:12.    **21:1:** Ais 65:17; 2 Pita 3:13.    **21:2:** Ais 52:1; 61:10; Hib 11:16; 12:22; Autu 3:12.    **21:3:** Lev 26:11-12; Esik 37:27; Sek 2:10;

<sup>\*</sup> **2 Ko 6:16.**    **21:3:** Kasina uru ngai laghe pitila, laghe mene uela va, *me aue ekapuira Goto ia.*    **21:4:** Ais 35:10;

65:19; Autu 7:17.    **21:5:** 2 Ko 5:17.    **21:6:** Ais 55:1; Jer 2:13; Jon 7:37; Autu 1:8, 17; 22:17.    **21:7:** 2 Sam 7:14; 1

Kro 17:13; Sams 89:26-27.    **21:8:** Mat 25:41; Autu 20:15; 22:15.

<sup>9</sup> Me kateva ta ghatiu (7) ensolo, laghe uunusi ghatuvilau pelete pasu tale ghatiu airuuruu voto sesa, ghe mae sio etaghi me ghe uela va, "Mae sio me aghapasunga vause ateva uevausenna ia natu sipsipi eteva."

<sup>10</sup> Vara me ensolo ateva ghe kasueinaghila tale Spiriti eteva me ghe sauuehi saela tale kinatama motoura eteva me ghe apasungaala Jerusalem, masaliki taatara ataeae manga ia, ghe sio mae epona liu nongina God etokatoka.

<sup>11</sup> Masaliki taatara ataeae pasu ia tale mallangina ateva God; ghe maamallanga nonginaaili masi atu ateva la aseasea va jaspa ia, masalaangeaili ia arova voto ateva la aseasea va kristol.

<sup>12</sup> Me aivativatina masau sae me korokoronganaaili, kasangaulu ghalua (12) atamana etana, me kasangaulu ghalua ensolo la tiitingina etaira, me arari kasangaulu ghalua arimangali nge Israeli laghe piti saela tale atamana.

<sup>13</sup> Kotoluae atamana tale pai nge sinaka esae ativilau, me kotoluae tale pai not ativilau, me kotoluae atamana tale pai saot ativilau, me kotoluae atamana tale pai nge sinaka esuu.

<sup>14</sup> Aivativatina masaliki taatara ataeae ghe toka saoaala tale kasangaulu ghalua atu tani asarasarakania, me epona etaira laghe pitila kasangaulu ghaluae arariira kapuna apostolo atoa natu sipsipi eteva.

<sup>15</sup> Ensolo ateva ghe aippooaa teeieghila ghe uunusi aikkatulu etiulu golo ia tani toongi masaliki taatara ataeae me atamanina me aivativati etana.

<sup>16</sup> Ensolo ateva ghe toongila masaliki taatara ataeae tale aikkatulu etiulu, ghe toongielia ghe roola ghalua airari ghalua ai (2,200) kilomita,<sup>†</sup> aluseaane me naanamungiane me saesaeane epona.

<sup>17</sup> Ghe toongila naanamunga aivativati eteva nongina taumattu ngatoa la tootoongi, me tee nongina ensolo atoa la tootoongi, ghe roola ghaonomongaulu ghalima (65) mita.<sup>‡</sup>

<sup>18</sup> God ghe gheleila aivativati tale atu eteva la kolokoloa va jaspa, me masaliki taatara ataeae ghe gheleie nongala tale golo, soalannaaili ia nongina ghalasi.

<sup>19</sup> Aivativati eteva tale masaliki taatara ataeae ghe toka saoaala tale kasangaulu ghalua asease masi atu etoa, aitiuti eteva tale jaspa, aiaaghluene ateva ta sapae, aiaakotonna ateva kalkedoni, aiaaghqaata ateva emrol.

<sup>20</sup> aiaaghlima ateva sadonix, ghaonomina ateva kanalien, aiaaghaituna ateva krisolit, aiaaghaoauli ateva beril, aiaaghasio ateva topaz, aiaakasangaulu ateva krisopreis, aiaakasangaulu kateva jasint, me aiaakasangaulu ghalua ateva ametist.

<sup>21</sup> Kasangaulu ghaluae atamana gheeghelei tale pel, me tale kateae kateae atamana laghe atulula tale kateva nonga ia pel, me kinatama salana atoa laghe gheleilala tale gol, soalannaaili ila nongina ghalasi.

<sup>22</sup> Karika aghe tarala teva ale manga tale masaliki taatara ataeae, poli Vau eteva God sarasarakanaili ia me natu sipsipi eteva ale manga ilalua.

<sup>23</sup> Tale masaliki taatara ataeae karika aue la taatara tale mallangi sinaka ateva me tee ulana ateva, ta God aue emallanga etaira me natu sipsipi eteva aue ekuraira lam ia.

<sup>24</sup> Me aue anua atoa aue la kasu tale mallangina ateva, me kingi ekapa atoa tale kosa ateva aue la taula uneira masi voto etana.

<sup>25</sup> Atamanina masaliki taatara ataeae karika aue la kavati elo alai, poli aue karika teva voo.

<sup>26</sup> Aue la maeaa masi voto akapa atoa me masi peiira taumattu ngatoa tale kosa ateva tale masaliki taatara ataeae.

<sup>27</sup> Karika righi voto karika ghulughuluena aue esso etana, me llo taumattu egheeghelei voto mauuna me ekamekame karika poi aue la kupi sso, ta lo atoa nonga arariira pitipiti elokoi tale vuku maulue ateva unna ia natu sipsipi eteva.

## 22

### Ateo maulue ataeae

<sup>1</sup> Vara me ensolo ateva ghe mene apasungaala ateо maulue ataeae, soalannaaili ia nongina ghalasi, eakaakala ghoa elo pakena tale aitokatokane ateva king uneirarue ia God me natu sipsipi eteva,

---

**21:10:** Esik 40:2.    **21:11:** Ais 60:1-2, 19.    **21:12:** Esik 48:30-35.    **21:15:** Esik 40:3; Aotu 11:1.    <sup>†</sup> **21:16:** ghalua airari ghalua ai (2,200) kilomita Tale inangari nge Griek, kasangaulu ghalua airari (12,000) stadia.    <sup>‡</sup> **21:17:** ghaonomongaulu ghalima (65) mita Tale inangari nge Griek, kateva ai ghaatingaulu ghaata (144) kiubit.    **21:18:** Ais 54:11-12.    **21:23:** Ais 60:19-20; Aotu 22:5.    **21:24:** Ais 60:3, 5.    **21:25:** Ais 60:11.    **21:27:** Ais 52:1; Esik 44:9; 1 Ko 6:9-10.    **22:1:** Esik 47:1.

<sup>2</sup> elome tale kinatama salana atikirighi tale masaliki taatara ateae. Me tale pai eluevilau tale ateo maulue ateae, ai maulue ateae etiitingina, ekuukuneaa uene kasangaulu ghaluaata (12) tale kateae ninamanama, katengaata ta kateva kateva ulana, me uruna ai eteae oia aue eghelei emasina anua atoa.

<sup>3</sup> Me karika aue mene righi nikasikiena, me aitokatokane ateva king uneirarua God me natu sipsipi eteva aue etoka tale masaliki taatara ateae, me kapuna tau ngai uungu etoa aue la kkaueinia.

<sup>4</sup> Aue la tara matane, me ararina ateae aue la pitia tale patilakaira.

<sup>5</sup> Aue karika teva voo, me karika aue la taatara tale righi lam me mallangi sinaka ateva, poli Vau ngepona ateva God aue emallangila, me aue la toka nongina king tani aitoiaa nau ekapa atoa.

<sup>6</sup> Me ensolo ateva ghe uela etaghi va, “Urooroo tani atoka tuutulim tale isaa toko inangari koronna. Vau eteva God, esuuusu kapuna Spiriti eteva ta kapuna propete atoa, ia ghe sungila ensolo ateva tani apasunga tale kapuna tau ngai uungu etoa, saa voto ghaisa ngarighi aue elutu.”

### *Iesu ange maemae*

<sup>7</sup> (“Nongola! Ghaisa ngarighi amae! Aue emasinaaili ta lo atoa la nongo usilaa inangari tale propesi laghe pitila tale lo ateva oia vuku.”)

<sup>8</sup> Aghi Jon aghe nongola isaa oia voto me aghe tarala, me aghe tturru siola tale liue kkena ensolo ateva ghe apasungaala isaa o voto etaghi, me aghe aloanna tani kkaueinia.

<sup>9</sup> Me ghe uela etaghi va, “Karika umene ghelei evalua o! Aghi tau ngai uungu ieghi ta God tee me io me kapum atoa propete ila, me tee lo atoa la nonganongo usilaa inangari tale lo ateva oia vuku. Ukkauaa God.”

<sup>10</sup> Vara me ghe uela etaghi va, “Karika umene ghelei runga inangari propesi easoaso elome tale lo ateva oia vuku, poli nau ange aakalakalaa.

<sup>11</sup> Ta lo atoa la gheelei saasakiaa, la roro rooro tani toka gheelei saasakiaa, me lo atoa sesaaili gheeleiaaira, la roro rooro tani toka gheelei evalua o ssavoto. Me lo atoa ghulughuluena gheeleiaaira, la roro rooro tani toka gheelei ghulughuluena tana voto, me lo atoa manga ila, la roro rooro tani toka mangamanga.”

<sup>12</sup> “Nongola! Ghaisa ngarighi amae, me amaemaea tee aipolipoli tani poli kateva kateva tale niuungu laghe gheleila.

<sup>13</sup> Aghi alpa me omega ieghi, aghe toka akasinala me aghaairuuruu. Aghi aitiutiu ieghi me airuuruu ieghi.

<sup>14</sup> “Aue emasinaaili ta lo atoa la porapora kalioira, ta aue la usikatae ai maulue ateae, me aue la kupi sso tale atamana ateae tale masaliki taatara ateae.

<sup>15</sup> Eleka tale ia o masaliki taatara ateae tana paua atoa me tau nialaala atoa me lo atoa la aivaeainila me lo atoa la aiuuvi emate, me lo atoa la kakkauaa tootoo goto me isaa akapaili taumattu la tani aloannaili tani toka kamekame.

<sup>16</sup> “Aghi Iesu, asuula ensolo ateva tani mae auliaa etaimim isaa akapaili voto tale ale manga atoa. Aghi oaira ieghi me natuira ieghi mangalina atoa Deivit, me aghi katto pai eteva eramerame elue talaua.”

<sup>17</sup> Me Spirit Manga ateva me vausenna ateva natu sipsipi eteva lalu ue va, “Mae sio!” Me lo ateva unonganongo, umene ue va, “Mae sio!” Lo ateva ekaakangngata tani ropi, erooroo tani mae. Me lo ateva eaaloanna tani ropi, erooroo tani ropi ateo maulue ateae, karika aipolipoli etana.

<sup>18</sup> Aghaulia ngaotu ta lo atoa la nonganongo inangari propesi tale lo ateva oia vuku: arova teva taumattu emene piti saoaa righi nim kanna, God aue emene saoaa sae etana llo sesa lo ateva oia vuku eaauliaa.

<sup>19</sup> Me arova teva taumattu eghaa velu kasina inangari tale lo ateva oia vuku, God aue eghaa velu uelane ateae tale ue ngai eteae etaftau maulue, elome tale manga ateae masaliki taatara, ia oia vuku eteva eaaulia ngatootoongainia.

<sup>20</sup> Lo ateva eaaulia ngaotu isaa oia voto, eue va, “Ue, aghi ghaisa ngarighi amae!”

Koronna! Mae sio, Vau eteva Iesu!

<sup>21</sup> Alooloo sae va maamasinaane ateva Vau eteva Iesu aue etoka aitauua teeiem akapaili.\* Koronna.<sup>†</sup>

**22:2:** Esik 47:12; Aitiutiu 2:9; Sek 14:8; Joel 3:18.    **22:4:** Mat 5:8; Aotu 3:12.    **22:5:** Den 7:18, 27; Aotu 5:10; 20:6; 21:23, 25.    **22:6:** Aotu 1:1.    **22:7:** Aotu 1:3.    **22:8:** Aotu 19:10.    **22:11:** Den 12:10.    **22:12:** Ais 40:10; Jer 17:10; Aotu 2:23.    **22:13:** Ais 44:6; Aotu 1:8, 17; 21:6.    **22:14:** Aitiutiu 2:9; 3:22.    **22:16:** Nam 24:17; Ais 11:1, 10; Rom 1:3; Aotu 2:28; 5:5.    **22:17:** Ais 55:1; Aotu 21:6.    **22:18:** Diut 4:2; 12:32.    **22:20:** Mat 24:30-31; 1 Ko 16:22.

\* **22:21:** teeiem akapaili Kasina uru ngai laghe pitila, laghe uela va, aue etoka tee kapuna atoa God. † **22:21:** Kasina uru ngai laghe pitila, karika laghe uela va, Koronna.

## Malloeana inangari

**Aikotoo** ARom atoa laghe gheelei niaiskei tale taumattu ghe uviubi emate kateva me ghe sausau ghinnaniira. Kinatama nipalata ta llo taumattu ghe sae vuuvukala tale aikotoo. Taumattu ngateva la tuitu evukalaia tale aikotoo eaateateaa nimmarikana. Lo atoa la aloanna tani aimuli ta Iesu la sunuki uneira tani aikotoo. Malloeana va la ghaa mmarike nongina Iesu ghe mmarikanala, ta poli la aiesoaa ta Iesu.

**Airuui ngalo** Nau nialousiusi, inangari tani aippooa ngaisausiaa ta lo ateva etokatoka tale nialousiusi.

**Alabasta** Gharighi ase atu la gheelei aieku manu me aikaai manu, o aikaai oeli, etana.

**Ale kandisi** Emua arau, anua ateva ta Israeli ghe kasukasus see etapaa tuvui. God ghe uela ta Moses va, "Uatulu teva aleghi. Am ghaa vilikiira ghaata kkena atoa me ghinna raarangsanaili." Nau laghe kasukasus laghe ghoughou kalio me laghe suusunuki me laghe kasukasus. Atu elua pitipiti inangari nipaopao laghe aatokailalua tale mangaaili etiulu rum tale ale kandisi. Emua arau, ajiu etoa laghe kakkauua elome tale ale kandisi eteva. Emulina king Solomon ghe atulula ale manga ateva tale atu me ai.

**Ale manga** (1) Aleira ale manga ateva ajiu etoa ghe tokala ejerusalem. Jerusalem masaliki namuu ia tale masaliki taatara atoa Israel. King Solomon ghe atulu ekasinala aitiutu eteva ale manga. Voto manga laghe uunguua tale ale manga ateva kandisi ia, laghe mene ssoaalaa tale ale manga ateva. Ghe tiuala o laghe gheelei nonga aiaavusuvusuena tale ale manga ateva. Ajiu etoa laghe veluvelu eitauua tani kkauua God tale ale manga ateva. Tale uneira nivelu eitauua laghe saesae nonga ejerusalem.

Valavalaa ateva ghe taatalia ngatoka ale manga ateva me kasina taumattu tale anua namuu laghe kupikupi sso tale aitiutu etiulu rum. Mene katilu rum elome tale namu ngatiulu rum, ajiu nonga atoa laghe soso etana. Mene katilu rum, taita nge Jiu nonga atoa laghe soso etana. Airuruu etiulu rum, pristi nonga atoa laghe soso etana tani gheelei aiaavusuvusuena me laghe sso uviubi emate ghaata kkena. Ale manga tuunga ateva ghe tokatoka elome. Ghalua nonga rum etana, lo atiulu manga ia me lo atiulu mangaaili ia. Lo atiulu rum manga ia righi tana voto aiuungu tale ale manga ghe tiitingina etana. Kalio atiulu namungaili ia ghe vuuvukala runga lo atiulu manga ia me lo atiulu mangaaili ia. Namuu ta pristi etoa ghe soso katengaata ta kateae ninamanama tale lo atiulu rum mangaaili ia. Nau Iesu ghe matela kalio atiulu ghe tarrii longotila ghe tiuua epona me ghe laa sio ruu euu. Ia o voto ateva ghe apasungaala va ila akapaaili taumattu ngatoka la ghaaiesoaa ta Iesu Karisto la rooroo tani sso tale maamallanganiaane God.

(2) Emua arau tau ngai kkauua ngatoka laghe veluvelu eitauua tanganueira katoa tau ngai kkauua, poli karika righi ale nikkaaua. Tale Uru ngai Manga ateva tale inangari nge Musao, mata nginangari eteva ta "ale manga" karika malloeamina nonga va ale aikkauua ngatoka taumattu eatuutulu, ta malloeamina va taumattu la veluvelu eitauaa.

**Ale nivelu eitauaa** Ale nivelu eitauaa ta ajiu etoa. Laghe veluvelu eitauaa ta nau manga ateva. Nau ta Iesu masaliki taatara atoa laghe veluvelu eitauaa tale alena nivelu eitaua ngateva. Tale ale nivelu eitauaa laghe asease inangari tale Uru ngai Manga ateva, me laghe aapasunga inangari nipaopao kannaa God. Taumattu ngatoka laghe looloo sae me laghe kakkauua. Kasina nau laghe gheelei niaiskei tale ale nivelu eitaua ngatoka.

**Aloi** Masi ngusungusuaane masi neina la gheelei tale ue ngai. Ajiu etoa laghe aalokoi tale ghinnaniira matena atoa.

**Apostolo** Uunguaaira apostolo atoa tani auliaa voto laghe tarala ta Iesu me laghe nongola etana. Laghe katulaala taumattu ngatoka laghe nongo usilaala apostolo atoa me laghe aiesoala ta Iesu.

**Ararimangalina ateva God** Ararimangalina ateva God egheelei taumattu me God ekaakateva nonga. God nongina kingi eteva ta poli eitaraa taumattu me etaautaula inana me ghinna me ekaakatulainila. Taumattu tale ararimangalina ateva God la aaimuli usi tee God. Iesu ghe sio mae tani oti salana atikirighi tani lao ta God.

**Babilon** Masaliki taatara ia. Emua arau kingi nge Babilon ateva, ghe uviubi tee oroi mene katoa anua me ie nonga namuu ia. ABabilon atoa laghe aiuvii tee alsraeli etoa me laghe apalailala. Taumattu nge Israeli etoa laghe nim uungu eBabilon me karika laghe toka tale aloannairaa. Laghe tokala eBabilon erooroo ghaitungauluae (70) ninamanama (Matiu 1:11-12, 17; Apostolo 7:43).

Tale vuku Niaulia ngaotu Babilon malloeana va, taumattu ngatoka karika laghe nannaa God. Ta 1 Pita 5:13, Rom la ue va Babilon etana.

**Bali** Bali taataraane nongina uiti eteva. La gheelei tee verete tale bali.

**Beaa** Beaa ngateva asease ghaata kkena ateva. Namuu ia me sesa taataraane. Eroo tani uvi emate taumattu. Etokatoka tale motouru me etapaa tuvui.

**Disaepolo** Lo atoa laghe tokatoka tee Iesu, laghe nongonongo inangarina me laghe taataraia, kapuna tau ngai uungu ila.

**Elomarase** Nongina katto atoa, sinaka me ulana ateva la tokatoka.

**Ensolo** Tau ngai kasuua inangarina ia God. God ghe taula uunguaaira ensolo atoa tani ghelei uunguaane me tani laa ppooaa inangarina ta taumattu ngatoa. Uunguaaira tee tani aitaraa kapuna taumattu ngatoa God.

Namunganira ensolo atoa, ararina atea ta Maekol (Michael) (Jiud 9), mene kateva namuu ararina atea ta Gabriel (Luk 1:19, 26).

**Epikuria** Tau ngai aapasunga ngatoa la uusilaa inangarina Epikurus, ghe apasungaala va mata ngemua ateva voto, nimasimasi eteva.

**Epona liu** Nongina God etokatoka.

**Eunaakookoo** Nongina urukookoo me ghila atoa la looloo.

**Frankinsens** Emua arau laghe gheelei tale ue ngai masi ngusungusuaane nau la tungitungia. Ase ai eteva oia ghe piipinosa nonga eArabia. Ajiu etoa laghe la ghaaghaaia tale masaeuil anua, liuna avalua o me laghe ue va aipolina issaa arau epona.

**Gehenna** Tale inangari nge Hibrui, malloeana "Gehenna" va malaale ateva eHinnom, aituu sovu ia eleka ejerusalem. Ta ajiu etoa, emaamalloeanaa tanganueira sesa taumattu ngatoa matena ila.

**God** (1) Ta Hibrui etoa 'elohim la ue va "God". Namuu ia, la oneoneainia, ararina ateaet manga ia.

(2) Ta Hibrui etoa Vau Palepale la kolokoloa va "Yahweh", LORD, ararina ateaet God.

**Hades** Tanganueira matena atoa.

**Hermes** Hermes kateva tana kapuira goto aGrik atoa. Laghe aikaiaia va Hermes ghe kaakasuaa inangariira goto atoa ghe laolaoaa ta taumattu ngatoa.

**Inangari niaippooa ngaitauaa** (Covenant) Taumattu ngalua lalu aloanna tani auliaa righi inangari va ekateva nonga nannaairaru tale inangari niaippooa ngaitauaa. Pokane inangari niaippooa ngaitauaa God ghe auliaala tale motouru eSaenae. Karika teva taumattu erooroo tani raarangsiana me ghulughuluena ta poli karika la rorooroo tani usilaa inangari nipaopao. Ouna ateva inangari niaippooa ngaitauaa God ghe aulieiniela va taumattu ngatoa la aimuli tee nonga Iesu Karisto, aue la ghulughuluena me la raarangsiana poli Iesu ghe mmapikanala tale kaluira ssavoto.

**Inangari nialokoi** Ange asola tale ninannaa, ia o lo ateva ange gheleila, aue ia etani ghelei nongina ange aulia ngalokoila.

**Inangari nipaopao** Inangari nipaopao easoaso tale vuku ghalima Moses ghe pitila. God ghe taula inangari nipaopao ta Moses va esausi taumattu.

**Isopi** Mene kateva ase kone, kone nge Ijipi ia. Pristi etoa laghe aasuu uruna tale rae ghaata kkenu atoa me laghe reerepataa see ta taumattu ngatoa va laghe manga.

**Jiu** Jiu etoa ararimangalina ila Abraham. Aitiutu eteva ta Jiu etoa ta Jiuda. Jiuda kateva ararimangalina nge Israel. Emuli ajiu etoa ila akapaaili laghe alIsraeli ila.

**Kamolo** Kamolo ateva ase ghaata kkena ateva. Namungaili ia me la iilou etana. Esausau voto maate.

**Kandake** Kandake karika va arari kuiini ia, ta arariira ia lo atoa la aaitoiaa eItiopia, nongina Peroo eljip.

**Kapuna ensolo ateva Vau Palepale** Kapuna tau ngai nongonongo anna ateva God, ekaakasuaa me epoppoaa inangarina God.

**Karisi** Ai-ilou eteva, ooso atoa la ghaeaea.

**Karisto** AGrik atoa la asease va Karisto taumattu ngateva laghe amangaiela tale oeli. Tale inangari nge Hibrui, Mesaea malloeana va Karisto. Emua arau marova laghe aloanna va taumattu ngateva ekingi laghe aamangaia tale oeli eteva. Liuna avalua o me nau God ghe auliaala kateva inangari nialokoi va aue esuu tau ngai asaangi eteva tani asaangi kapuna taumattu ngatoa me tani atoka ararimangalina ateva God, ghe aseaseva va Mesaea o Karisto tani apasunga va God ghe suoongainiela.

**Kasangauluae Masaliki Taatara** Dikapolis malloeana va kasangauluae masaliki taatara tale kinatama masaliki eteae ta pai nge saot tale ateo talia ngateae eGalili.

**Kerub, keruvim** Laghe aaitoiaa ai maulue atea, me laghe aitaraa aka ateva ghe tokatoka tale mangaaili etiulu rum tale ale manga ateva. Epona taataraane taumattu, me euu arova ghaata kkena ateva, me kaekaena alua.

**Kohot** Tale tau ngai uvii etoa eRom, kateva lijen erooroo ghaonomo airari (6,000) tau ngai uvii, me kateva lijen erooroo kasangaulu (10) kohot, me kateva kohot erooroo

ghaonomo ai (600) tau ngai uvii, me namu ngateva emuemua kateva ai (100) tau ngai uvii.

**Kou nguru** Ghalua ase kou nguru: Kateva kou nguru kingi etoa la aatokaia. Mene kateva kou nguru, lo atoa la aikaratii, lo ateva aitiutiu ia tani apala, ia eghaaghahaia.

**Lijen** Tale tau ngai uvii etoa eRom, kateva lijen eroroo ghaonomo airari (6,000) tau ngai uvii.

**Liu nighelei aiaavusuvusuena** Ajiu etoa laghe gheelei niaiaavusuvusuena sae ta God. Laghe uviuvi emate ghaata kkena ateva nongina sipsipi eteva o meemee ateva o vulumakao ateva, tani gheelei aiaavusuvusuena etana. Tani gheelei liu nighelei aiaavusuvusuena, laghe aatoka atu euu me laghe alokoi sae kuraa me ghaata kkena ghe asoaso sae epona tale kuraa.

Nau ta Moses me emulina, pristi nonga atoa laghe gheleila aiaavusuvusuena tale ale kandisi eteva me emulina tale ale manga ateva ejerusalem, tale liu nighelei aiaavusuvusuena laghe gheleila ta brasi.

**Livae** Tau ngai iungu eteva tale ale manga, esaasausi pristi etoa.

**Masi kiukiu** Inangarina God la ue va masi kiukiu, ta poli God ghe suula Natuna ateva tani sio tale kosa ateva tani ghaa oghi taumattu ngatoa. Iesu Karisto ghe asaangila taumattu me la rau mene ghaa nimmarikana tale ssavoto. Iesu ghe gheleila salana tale taumattu tani mene oghiaa mae me natuna ila God.

**Mastet** Mastet ase ai eteae katuna pisikeaili.

**Mesaea** Utara inangari Karisto.

**Mur** Ai eteae masi ngusungusuaane raeraeana nnane laghe ghaaghaa elome tale vilikina. Laghe gheelei masi aiaaoo me masi aimolumolu me marasina ia. Laghe kaakaai tee uaeni tani ghaa velu manoonongana.

**Nadi** Vause ateva ghe kaola masi ngusungusuaane oeli eteva ta kkena Iesu (Mak 14:3; Jon 12:3), la aseaseva va nadi. La ghe gheeleia tale manu ngai eteae.

**Nanna ngaioghioghiaa** Ninanna ngaioghioghiaa tale voto sesa ita auliaa me ita gheelei. Ita kookolomi God va ekkaluaa voto sesa ita gheelei.

**Natuna sipsipi eteva God** Jon tau ngai aasuu ghe asease Iesu va arova sipsipi eteva natuna ia God. Ajiu etoa laghe gheelei aiaavusuvusuena tale natu sipsipi va God aue ghe kkaluaa kaluira ssavoto. La aseaseva Iesu nongina natu sipsipi eteva God poli ghe matela etaira tani kkaluaa kaluira ssavoto.

**Nau manga** Nau manga ateva nau niainoana ia. Ajiu etoa oroeili inangariira nipaopao tale nau manga ateva. Laghe ue va ajiu etoa karika la rooroo tani uungu tale nau manga ateva. Ghe sessaila nau Iesu ghe gheelei emasina taumattu tale nau manga ateva. Ajiu etoa ghe sessailala nau disaepolo atoa laghe ghaala uiti raisi ta nau manga ateva me laghe sapusapulaala me laghe namala.

**Niaiaavusuvusuena** (1) Ngusungusuaane masinaaili. Laghe gheelei niaiaavusuvusuena tale ue ngai, uru ngai, me ua ngai eteae. Tale ale manga ateva pristi etoa laghe tuutuu niaiaavusuvusuena nau taumattu ngatoa la looloo sae.

(2) Nau pokane ateva inangari niaippoa ngaitauua, emua arau, God ghe aloanna va taumattu ngatoa la gheelei aiaavusuvusuena me God aue ekkaluaa kaluira ssavoto. Aipolina ssavoto ateva, nimate eteae. Kapuna atoa God laghe uviuvi ghaata kkena elo ale tale ale manga me ghaata kkena ateva ghe matemate tani ghaa liuira. Pristi etoa laghe uviuvi emate ghaata kkena. Ghaata kkena raarangisanaaili vilikiira me karika righi usai me karika righi sessaaira. Iesu Karisto ghe matela ta ngetairaa akapaaili nongina va ia aiaavusuvusuena ia.

**Niaippoa ngaitauua** Utara inangari Inangari niaippoa ngaitauua.

**Niarangise** Masi voto Vau ngepona ateva etaftau mae.

**Niasuu** Ukupi sio tale manu eteva me utotu sae tani mene ghaa maulue. Ukila va Iesu ang ghe kkaluaala kalum ssavoto. Uaimuli ta Iesu nau utokatoka lomosi ta umate.

**Oliv** Oliv, ase ngai eteae ekuukuneaa uene. Arari uene la aseaseva oliv. Ajiu etoa laghe tuutuu inana tale oeli uene ateva. Oliv oeli ajiu etoa laghe aloannaailia. Kalakalangina ejerusalem motouru eteva ararina ateae ta Oliv.

**Otuenaa** Namunganiira ateva raroai etoa ararina ateae ta otuenaa, tale inangari nge Inglis, la kolokoloa va "dragon". Eaimatoonga Satana.

**Paresi** Nau ta Iesu ghe tokatoka tale kosa ateva oia, masi taumattu ngatoa la ghe aseaselva Paresi etoa. Laghe kilakilaaili inangari nipaopao God ghe tau lao sio ta Moses. Paresi etoa laghe nim alokoi saoala kasina nannaaire tale inangari nipaopao. Laghe aloanna va taumattu ngakapa atoa la aimuli tee nannaaire. Paresi etoa laghe nannaa va ila nonga namuu ila, me laghe tam aloanna Iesu me laghe uvi emateala. Iesu ghe aselala va usimaghalue ila, poli karika laghe aimuli tee llo laghe aauliaa.

**Pasova** Nivelu eitaua ngateae laghe nnaala nau eteva alsraeli etoa laghe kasu vuli eljip. Laghe atokala rae tale atamana, me ensolo ateva ghe tam uvi ematela natuira mua atoa alsraeli etoa, ta aljip nonga atoa. Utara Eksodis 11-13.

**Pel** Pel, la asease va katu ghalu eteva. Pisikeaili ia me aipolina nonga namuu. Masinaaili taataraane me usousoanaaili ia. La ghaatoka tale ai-iriira me vurra me pasipasi.

**Pentikos** Nau Pasova eruuruu, laghe mene veluelu eitauaa tale aiaaghalmangauluna (50) ateva nau, la ghaseasea va Pentikos. Utara Eksodis 23:16; 34:22; Levitikos 23:15-21.

**Peroo** Peroo ararina ia vau palepale nge Ijipi eteva. Taumattu namuu laghe asease va Peroo.

**Pristi** Pristi etoa laghe gheelei aiaavusuvusuena ta God mausi kaluira ssavoto taumattu ngatoa elome tale ale manga ateva ejerusalem. Pristi etoa mangalina ila Eron, tuyuna ila Livae. Namu ngateva ta pristi etoa, ie nonga erooroo tani kupi sso tale mangaaili etiulu rum tale ale manga ateva, katengaata nonga tale kateae ninamanama.

**Propete** Propete atoa God ghe aippooaa teeila me ila laghe laa ghaauliaa inangarina God ta mene katoa taumattu. Tale nau pokane ateva inangari niaippooa ngaitauua orioeili propete atoa laghe aaulia ngaotu va Mesaeaue elutu emua. Orioeili nimanama ghe lange sio me voto propete atoa laghe aulia ngamuemuela va ue elutu ta Iesu ghe lutu ekoronnala. Laghe aulia ngaotu teela oroi voto ue elutu nau Iesu emene oghiaa mae. Ouna ativilau ppae taumattu ghe aippooaa tale korokoronganianaane Spirit Manga laghe ue va propete ila.

**Raarangisana** Ajiu etoa laghe ue va lo atoa raarangisana ila la rooro tani uungu elome tale ale manga ateva. God ghe uela va llo inana me voto karika raarangisana urou mene poso me urou mene nama ta karika raarangisana. Taumattu karika raarangisana etani ghelel voto God eaauliaa va eghelei me emene raarangisana.

**Rabae** Ajiu etoa laghe ue va lo atoa alomasaanga ila laghe asease arariira eteae va rabae, malloeana va tau ngai aapasunga. Nau laghe kolokoloa va rabae, laghe ue va namuu ia, me laghe oneoneainia.

**Raroai** Raroai etoa kapuna tau ngai nongonongo anna ila Satana. Nau ekapaaili la kamekame taumattu ngatoa va la rou mene aimuli usi tee God ta la aimuli teeila. Kasina nau la laoloa tale taumattu ngatoa me la kamekame tani ghaa oghila ta Iesu.

**Ret Sii** Manu eteva, kasina nau, voto etana epiipinosa egheeleie raeraeana manu eteva.

**Sadiusi** Ta ajiu etoa, Sadiusi etoa namuu ila me tau peipeiena ila. Laghe aikaiaia inangari nipaopao God ghe taula ta Moses, me karika laghe aloanna mene kasina inangari nipaopao Paresi etoa laghe auliaala. Paresi etoa laghe aikaiaia va taumattu matena ue etotu me Sadiusi etoa karika laghe aikaiaia va koronna.

**Satana** Satana namuu ia tale sesa spiriti etoa me ghe sessaia ta God. Ekamekame taumattu va ssavoto la gheelei karika God ue ekkaluaa. La asease va Satana kingi tale kosa ateva oia.

**Selot** Kateva kapuna disaepolo Iesu ta Saemon la aseaseva Selot ia. Kateva malloeana inangari "selot" va etani aimuli tee inangari nipaopao. Mene kateva malloeana va taumattu ngatoa laghe aloanna tani aiuvii tee aRom atoa.

**Siisa** Siisa la asease va kapuira kingi ia aRom atoa.

**Silva koen** Silva koen (denarius) aipolipoli tale kateva nau.

**Sipsipi** Israeli etoa laghe aitaraa sipsipi ta laghe uvivi emate me laghe gheelei kalio tale uuna, me malatauna laghe gheeghelei aiaavusuvusuena etana.

**Sius** Kateva tani kapuira goto atoa aGrik atoa. Laghe aikaiaia va Sius kingi ia ta goto atoa.

**Stoik** Tau ngai aapasunga ngatoa la uusila inangarina Sino, ghe apasungaala va mata ngemua ateva voto, tani anna ngamasina, me uunguua masi nitoka.

**Taita sipsipi** Sipsipi eteva taita ia, komna ghalua.

**Tasussuku** Tasussuku eteva ghe tokatoka tale viliki taumattu. Lo ateva ange ghaala tasussuku eteva ghe kasukasu vuli masina atoa taumattu me ghe laa tokatoka ppae.

**Tau ngai aapasunga tale inangari nipaopao** Tau ngai pitipiti ila, me laghe aapasunga inangari nipaopao tale pokane ateva inangari niaippooa ngaitauua, tale vuku ghalima Moses ghe pitila.

**Tau ngai ghaa takis** Ta nau Iesu, lo atoa laghe ghaaghaa viliki veu me laghe laolaoaa ta aRom atoa. Lo atoa laghe ghaaghaa takisi ajiu ila, me laghe saasausi aRom atoa tani ghelel taumattu va la tani tau lao takis ta Siisa tani poli tau ngai uvii etoa aRom ila. Liuna avalua o me ajiu etoa karika laghe aaloanna tau ngai ghaa takisi etoa. Laghe ghaaghaa orioeili viliki veu me laghe aaisulia kasina me laghe laolaoaa nonga kasina ta aRom atoa.

**Ue uaeni** Ase ue ngai eteva karika va ai ia, ta arova uasa ateva la paapalaia me erarraa.  
La gheelei uaeni ita ropiropi ta ngetana.

**Usimaghala** Taumattu, enim auliaa voto, me karika eaimuli tee.

**Vau ngepona** Utara inangari God.

**Vau palepale** Utara inangari God.